


Diža' güen che
ancho Jesucristo



New Testament in Zapotec, Zoogocho (MX:zpq:Zapotec,
Zoogocho)

Diža' güen che ancho Jesucristo

New Testament in Zapotec, Zoogocho (MX:zpq:Zapotec, Zoogocho)

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
de7d40fb-3909-53d8-8bea-744cf1ce0e41

Contents

San Mateo	1
San Marcos	49
San Lucas	78
San Juan	127
Hechos	163
Romanos	207
1 Corintios	227
2 Corintios	246
Gálatas	258
Efesios	265
Filipenses	272
Colosenses	277
1 Tesalonicenses	282
2 Tesalonicenses	286
1 Timoteo	288
2 Timoteo	294
Tito	298
Filemón	301
Hebreos	302
Santiago	317
1 Pedro	322
2 Pedro	328
1 Juan	331
2 Juan	336
3 Juan	337
Judas	338
Apocalipsis	340

DIŽA' GÜEN DAN' BZOJ SAN MATEO

Ẅozxtao' Jesucriston'

(Lc. 3:23-38)

¹ Nga nyoj la bene' gosac Ẅozxtao' Jesucriston' chzolaon len da' Ẅozxta' ocho Abraham. Le Jesúsen' goque' xi'in diaža che da' David, na' da' Davin' goque' xi'in diaža che da' Abrahanna'.

² Abrahanna' goque' Ẅa Isaac, na' Isaaquen' goque' Ẅa Jacob, na' Jacoben' goque' Ẅa Judá len yezica'chle bene' biše' ca'.

³ Judán' na' Tamar gosaque' Ẅaxna' Fares na' Zara. Na' Faresen' goque' Ẅa Esrom, na' Esronna' goque' Ẅa Aram.

⁴ Na' Aranna' goque' Ẅa Aminadab, na' Aminadaben' goque' Ẅa Naasón, na' Naasónna' goque' Ẅa Salmón.

⁵ Salmónna' na' Rahab gosaque' Ẅaxna' Booz. Na' Boozen' na' Rut gosaque' Ẅaxna' Obed. Na' Obeden' goque' Ẅa Isai.

⁶ Na' Isain' goque' Ẅa rey David, na' rey Davin' goque' Ẅa Salomón. Na' xna' Salomónna' goque' xo'ol da' Uriás cate' za' yeca'a rey Davin' le' par gaque' xo'ole'.

⁷ Na' Salomónna' goque' Ẅa Roboam, na' Roboanna' goque' Ẅa Abías, na' Abíasen' goque' Ẅa Asa.

⁸ Na' Asan' goque' Ẅa Josafat, na' Josafaten' goque' Ẅa Joram, na' Joranna' goque' Ẅa Uzías.

⁹ Uzíasen' goque' Ẅa Jotam, na' Jotanna' goque' Ẅa Acaz, na' Acazen' goque' Ẅa Ezequías.

¹⁰ Na' Ezequíasen' goque' Ẅa Manasés, na' Manasésen' goque' Ẅa Amón, na' Amónna' goque' Ẅa Josías.

¹¹ Josíasen' goque' Ẅa Jeconías len yezica'chle biše' ca' gosenita' ca tiemp caten' bene' Babilonia ca' gosezene' bene' Israel ca' na' goseche'xoxje' legaque' Babilonian'.

¹² Gwde goc ca', golje Salatiel xi'in Jeconíasen'. Na' Salatielen' goque' Ẅa Zorobabel.

¹³ Na' Zorobabelen' goque' Ẅa Abiud, na' Abiuden' goque' Ẅa Eliaquim. Na' Eliaquinna' goque' Ẅa Azor.

¹⁴ Na' Azoren' goque' Ẅa Sadoc, na' Sadoquen' goque' Ẅa Aquim. Aquinna' goque' Ẅa Eliud.

¹⁵ Na' Eliuden' goque' Ẅa Eleazar, na' Eleazaren' goque' Ẅa Matán. Na' Matánna' goque' Ẅa Jacob.

¹⁶ Nach Jacoben' goque' Ẅa José ben' goc bene' che María. Na' Marían' goque' xna' Jesús ben' nzi' Cristo, zeje diža' ben' gwlej Diosen' cont yedenabi'e.

¹⁷ Na' gwzolaon tiemp che da' Abraham bžinte tiemp che da' David gosac žta' diaža chen', na' ca tiemp che da' David bžinte ca tiemp caten' gosezene' bene' Israel ca' goseche'xoxje' legaque' Babilonia, lecze gosac yežta' diaža chen', na' ca tiempen' bžinten ca žan' golje Criston' ben' gwlej Diosen' cont yedenabi'e, gosac yežta' diaža chen'.

Can' goc cate' golje Jesucriston'

(Lc. 2:1-7)

¹⁸ Na' quingan' goc cate' golje Jesucriston'. Ba naquen gwšagna' Marían' len José, na' za' ca'a Josén' le' par gaque' xo'ole' cate' gocbe'ede' ba noa' Marían' bdao'. Goc ca' dan' ben Spiritw che Diosen' cont bhendao' bdao' na' lo' le'e.

¹⁹ Na' Joséna' ben' ba naquen si'e Marían' par gaque' xo'ole', goque' to bene' ben da' güen lao Diosen'. Na' bene' xbab cuejyichje' Marían' šižize cont nono gacbe'e na' cont bi gws'i'e le' zto'.

²⁰ Šlac chone' xbab gone' ca' gwtase' na' to angl bene' gwsela' Xancho Diosen' blo'elagüe' le' lo' bišgal. Na' gože' le':

—José, le' goljo' lo diaža che da' rey David. Bitw žebo' si'o Marían' par gaque' xo'olo' Spiritw che Diosen' benen cont no'e bdao' na'.

²¹ Na' sane' to bi' byo dao' na' gws'i'o labe' Jesús, le' len' yeque'e xtola' bene' gualaž che' ca' bene' yesejnilaže'ne'.

²² Goc yogo' da' ca' cont goc can' gwna Diosen' dan' bzoj to ben' be'e xtižen' cani', gwne':

²³ To no'ol güego' no'ole ne' napši'ichgua cuine' güe'e to bi' byo dao' na' sane'be'.

Na' si' labe' Emanuel.

Na' Emanuel zeje diža': Diosen' zoacze' len chio'.

²⁴ Na' cate' beban Josén' beyož gwñede' yelen', bene' can' gož angl che Xancho Diosen' le', jaži'e Marían' liže' par goque' xo'ole'.

²⁵ Perw bi gwzualene' le' ca' xo'ole' san gwzoacze' le' respetw bžinte ža gwxxane' to bi' byo dao', xi'ine' nechw. Na' gwxi' labe' Jesús.

2

Magos ca' jasene'e Jesúsen'

¹ Ca tiempen' cate' gwnabia' rey Herodes, golje Jesúsen' Belén, to yež gan' mbane distritw Judea. Na' besežin to čhope magos Jerusalén, za'aque' to nación zito' dan' chi' do ga chla' gwbiž.

² Na' gosenabde' bene' lo ciudan' gose'ene':

—¿Gan rey čhe bene' Israel, ben' ba golje? Nezeto' ba golje', le ba ble'eto' beljw čhen' cate' blan' lažto' dan' zoa gan' chla' gwbiž. Na' za'to' gonxento'ne'.

³ Cate' gwneze rey Herodesen' can' gosenen', gocchgüe' tole, na' lecze ca' yogo'lol bene' lo ciuda Jerusalénna'.

⁴ Nach reyna' btobe' yogo'lol bxož gwnabia' čhe chio' bene' Israel na' lecze yogo' bene' ca' chososed chosolo'e dan' bzoj da' Moisésen'. Na' gwñabde' legaque' gan' naquen galje Criston' ben' gwlej Diosen' cont yedenabi'e.

⁵ Nach gose' bene' ca' Herodesen':

—Galje' Belén, gan' mbane distritw Judea, le can' ža dan' bzoj to bene' be' xtiža' Diosen' cani'. Quinga žan:

⁶ Ca nac yež Belén gan' že' diaža čhe da' Judá, nacczen yež da' zaca'chgua lao yež gwnabia' ca' zjachi' Judean'.
Le to bene' Belén gaque' bene' gwnabia',

na' le' güia ne'e nación Israel čhian'.

⁷ Nach Herodesen' goxe' magos ca' bagaše'ze cont ja'aque' lagüen' na' gwnabde' legaque' batyanen' besele'ede' bla' beljon'.

⁸ Nach gwsele' legaque' Belénna', gože' legaque':

—Le šja'ac na' le šjaydiljw bidao' na' tcho'a. Na' cate' yežezelebe' le yeda yedyedixjue'ele neda' cont lecze ša'a šjexnena'be'.

⁹ Beyož bosozenag magos ca' can' gož reyna' legaque', nach gosa'aque'. Na' beljon' dan' besele'ede' do gan' chla' gwbižen' cate' biña' yesa'ac lažgaquen', zejen le'e yaban' žialaon laogaque' bžintin yo'o gan' zoa bidao'na', na' gwlezen.

¹⁰ Na' magos ca' besyebede' juisyw cate' besele'ede' beljon' da' yoble.

¹¹ Nach cate' besežine' yo'o gan' zoa bidaon', goso'e lo' yo'ona' na' besele'ede' bidao'na' len xna'be' Marian'. Nach bosozoa xibgaque' gosonxene'be'. Na' gosesaljo caj čhegaquen' gosebeje' oro, yal na' to nechw da' chla' zix' da' zix' da' nzi' mirra na' gosoen' čebe'.

¹² Na' šlac ne' nita' magos ca' Belénna', Diosen' gwdixjue'ede' legaque' lo bišgal bich yesyedie' gan' zoa rey Herodesen'. Da'nana' besyeque'e yeto nez yoble jaya'ac laže'.

Bosoxonje' ja'aque' Egipto

¹³ Na' cate' ba besyeya'ac magos ca', to angl čhe Xancho Diosen' blo'elagüe' Josén' lo bišgal, na' gože'ne':

—Gwyas, gwčhe' bidaon' na' xna'ben' le šja'ac nación Egipto na' soale na'ze, na' cate'ch nia' le'e, cana' guaque yeza'le, le Herodesen' ba nžie' bia' yeyiljue' bidao'na' cont gote'be'.

¹⁴ Nach ne' ze bxin gwyas Josén', gwčhe'e bida'ona' len xna'ben' zja'aque' Egipton'.

¹⁵ Nach gosenite' Egipto na'ze šlac bžin ža got Herodesen'. Na' dan' gosone' ca' goc can' gwna Diosen' dan' bzoj to bene' be' xtiže'na' cani', gwne': "Čhixjue'eda' Xi'inan' yeze'e Egipton'."

Herodesen' gwsele' soldadw cont gosote' yogo' bi' byo dao'

¹⁶ Na' rey Herodesen', cate' gočbe'ede' gosonle magos ca' le' dan' bich besyedie' gan' zoe'na', leca bže'e. Na' bsaque' con can' gwyejni'ide' cate' gwnabde' legaque' batcan' bla' beljon', na' gwsele' soldadw čhe' ca' par jasete' yogo'lol bi' byo čhe'en' dao' zelao bi' čhop ize, bi' ca' gosalje Belénna' na' yezica'chle yež ca' zjanyechj zjambi'i Belénna'.

¹⁷ Na' lagüe dan' gosote' bi' byo dao' ca', goc can' bzoj da' Jeremías ben' be' xtiža' Diosen' cani', žan:

¹⁸ Nente ši'i bene' Ramá, chesebežchgüe' nita'čhgüe' ye'la' güine'.

No'ole ca' zjanaque' xi'in diaža čhe da' Raquel chesyeyaše' chesyegüine'de' čhe xi'in da'ogaque' ca',

na' bitw chesacłaže' no yeyoexenlaže' legaque', le ba gosatben'.

¹⁹ Cate' got Herodesen', Josén' ne' zoe' Egipton'. Nach to angl čhe Xancho Diosen' blo'elagüe' Josén' lo bišgal, na' gože'ne':

²⁰ —Gwyas, bečhe' bidaon' len xna'be'na' na' le šjaya'ac Israel. Ba gosat bene' ca' besyeyiljw bidao'na' cont yesote'be'.

²¹ Nach gwyas Josén' bečhe'e bidaon' len xna'ben' jaya'ac lažgaque' Israel.

²² Perw Josén', cate' bende' Arquelao bezoe' chnabi'e latje che da' xe' Herodesen', bžebe' yeyeje' gan' mbane distritw Judean'. Na' Diosen' gwdixjue'ede' le' lo bišgalen' bi cheyala' šjaya'aque' distritw Judean', san šjaya'aque' gan' mbane distritw Galilean'.

²³ Da'nan' besyežine' ciuda Nazaret na' jasenite'. Na' dan' jasenite' Nazareten' goc can' bosozoj da' bene' gosoe' xtiža' Diosen' cani', gosene': "Yososi'e Jesúsen' bene' Nazaret."

3

Juan ben' bzoa bene' nis gwdixjue'ede' diža' güen che Diosen'

(Mr. 1:1-8; Lc. 3:1-9, 15-17; Jn. 1:19-28)

¹ Na' gwde zan iz, Juan ben' bzoa bene' nis gwyeje' latje daš gan' mbane distritw Judean'.

² Na' gwdixjue'ede' bene', gože' legaque':

—Le yetinjje xtola'le ca', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

³ Che Juanna' bzoj da' Isaiasen' caten' bzoje' Xtiža' Diosen' cani', gwne':

Bena' chne' zižje latje dašen', že':

"Le gonšagüe' yichjlažda'olen' cont soale lez gwzenagle che Xančon' cate' yide'.

Le cuejyichj da' malen' chonle cont yichjlažda'olen' gaquen ca to nez da' ba gosonšagüe'."

⁴ Na' Juanna', xalane' goquen de yiša' xa camello. Na' da' bčhej lsinen' goquen de yid, na' gwdagüe' biše'zo len šina' beser yiže'.

⁵ Bene' že' ciuda Jerusalénna' na' bene' že' yogo' yež ca' gan' mbane distritw Judean', na' lecze bene' že' yež ca' nyečj mbi'i yegw Jordánna' gosa'aque' ja'aque' gan' zoa Juanna' cont bosozenague' xtiže'na'.

⁶ Na' cate' gosexoadole' bi da' xinj' zjanone', Juanna' bzoe' legaque' nis lo yegw Jordánna'.

⁷ Na' lecze ja'ac zan bene' Israel bene' ca' zjanzi' fariseo na' bene' ca' zjanzi' saduseo. Ja'aque' cont bzoa Juanna' legaque' nis. Nach Juanna' cate' ble'ede' legaque' gože'ne':

—Le'e nacchgualle bene' zgot na' bene' gwxiye'! ¿Chaquale guac yelale lao castigw dan' seła' Diosen' caten' gone' yela' justis che benachen'?

⁸ Še da' li ba betinjjele xtola'len', cheyala' gonle da' nac güen cont yesache'e bene' ba boša' yichjlažda'olen'.

⁹ Na' bitw gonle xbab gaquale Diosen' bitw gone' le'e castigw che xtola'len' lagüe dan' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'.

¹⁰ Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'.

¹¹ Neda' da' li chzoa' le'e nis neče ba betinjje xtola'le, perw coža'na' za' yid ben' gon cont soa Spiritw che Diosen' lo' yichjlažda'olen' naban' le'e. Na' bene' ca' bi yeson can' chazlaže' Diosen', sele' legaque' lo yi' gabilen'. Na' ben' za' za' coža'na' zaca'che' ca neda' na' da' nacchgüe' bene' zaca', bi zaca' gona' xmandadoe' lechja' no xe'le'.

¹² Benan' gone' len benachen' can' choncho cate' chdecho trigon' lo' rner. Chotobcho trigon' chgo'ošagüe'chon na' chzeycho yix beben'. Na' bene' bi chesejnilaže' Diosen', sele' legaque' lo yi' gabilen' dan' cbi cheyol chenit.

Cate' gwzoa Jesúsen' nis

(Mr. 1:9-11; Lc. 3:21-22)

¹³ Na' gwza' Jesúsen' gan' mbane Galilea na' gwyeje' gan' zoa Juanna' cho'a yegw Jordánna' cont Juanna' bzoe' le' nis.

¹⁴ Na' Juanna' ben cho'alagüe' gague goclaže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedenabo' gwzoa' le' nis.

¹⁵ Nach Jesúsen' gože' Juanna':

—Bzoa neda' nisen'. Cheyala' goncho ca' cont gac yogo'lo' dan' non Diosen' mandadw gac. Nach gwcheb Juanna' bzoe'ne' nis.

¹⁶ Na' cate' beyož gwzoa Jesúsen' nisen', bechoje' lo' nisen', na' la' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen gwzoan len le'.

¹⁷ Na' gosende' gwne' Dios ben' zoa yaban', gwne':

—Bengan' Xi'ina' bene' chacda' na' chebe chezaquelaže' chgüeda' che'.

4

Goclaže' gwxiyen' co'oyelan' Jesúsen' gone' da' mal

(Mr. 1:12-13; Lc. 4:1-13)

¹ Na' Spiritw che Diosen' benen cont gwyej Jesúsen' latje dašen' gan' Satanás dan' chnabia' da' xigüe' ca' goclažen' co'oyelan' le' cont gone' da' mal.

² Na' bitwbi gwdagw Jesúsen' lao choa ža choa yel, na' cate' gwde da' choa žana' gwdone'.

³ Na' Satanásen' gwbigan' gan' zoa Jesúsen', gožen le':

—Še le' naco' dogualje Xi'in Diosen', gož yej quinga yesyeyaquen yetextil.

⁴ Nach gož Jesúsen' len:

—Nyojczye Xtiža' Diosen' žan: “Gague yela' guagw na'zen' chyažje chio' beṇaḅ cont gac bancho, san leczye chyažjecho yogo'loḷ diža' dan' ža Diosen'.”

⁵ Nach gwčhe' Satanásen' le' ciuda Jerusalén dan' nac ciuda che Dios. Na' bcuen le' yichjo' yodao' blao gan' nac la'zelagüe sibe,

⁶ na' gožen le':

—Še len' naco' dogualje Xi'in Diosen', nga boslažo' cuino', le nyojczyen le'e Xtiža' Diosen', žan:

Seḷa' Diosen' bene' ca' zjanac angl che' yesaclene' le', na' yesoḅe' le' cont bi chego' no yej.

⁷ Na' gož Jesúsen' gwxiye'na':

—Leczye can' nyojen Xtiža' Diosen', žan: “Bitw goncho Xancho Diosen' prueba še lede' can' že'na'.”

⁸ Da' yoble gwxiye'na' gozche'en le' to lo ya'a da' nacchgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan chegaquen.

⁹ Nach gožen le':

—Yogo' da' quinga chle'edo' nga gonan' lo nao' še gwzao xibo' lagua' nga gonxeno' neda'.

¹⁰ Nach gož Jesúsen' len:

—Beyej ca'ale Satanás. Nyojczyen le'e Xtiža' Diosen' žan: “Cheyala' šejnilaže'cho Xancho Diosen' na' toze le' gonxencho.”

¹¹ Na' becuase Satanásen' cuite'na' beyejen ga yoble nach besežin to chope angl che Diosen' jasaclene' le'.

Jesúsen' gwzolažüe' chyixjue'ede' diža' güen che Diosen' distritw Galilea

(Mr. 1:14-15; Lc. 4:14-15)

¹² Na' Jesúsen' beze'e distritw Judean' na' beyeye' distritw Galilea cate' bende' ba de Juanna' ližya.

¹³ Na' gwze'e yež Nazaretan' jasoe' ciuda Capernaum dan' chi' cho'a nisdaon' do gan' zjachi' distritw dan' zjanzi' Zabulón na' Neftalí.

¹⁴ Na' dan' jayzoe' ciudan' goc can' gwna da' Isaías ben' be' xtiža' Diosen' cani' caten' bzoje' dan' ža:

¹⁵ Ca nac distritw Galilea gan' že' zan bene' cbi zjanaque' bene' Israel, gan' nita' distritw Zabulón na' distritw Neftalí dan' zjambane yešla'ale nisdaon' na' yegw Jordán,

¹⁶ nchoḷ yichjlaždao' bene' ca' že' na'.

Perw Diosen' gwsele' to bene' gwlo'o to be'ni' xen lo' yichjlažda'ogaquen'.

Gosaque' ca bene' guat len yichjlažda'ogüen' le gosone' da' malen',

perw bena' gwseḷa' Diosen' ba bocobe' yichjlažda'ogaquen'.

¹⁷ Cana' gwzolaž Jesúsen' gwdixjue'ede' gwne':

—Le yetinje xtoḷa'len', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

Jesúsen' gwleje' tap bene' gwxen beḷ cont gosaque' txen len le'

(Mr. 1:16-20; Lc. 5:1-11)

¹⁸ Na' zej Jesúsen' cho'a nisdao' che Galilea cate' ble'ede' chope bene' gwxen beḷ, Simón Pedro na' bene' biše' Andrés, na' zjanite' chosozale' yixjw dan' chesezende' belen' lo' nisa'.

¹⁹ Nach gože' legaque':

—Le šo'o len neda'. Nacle bene' gwxen beḷ, na' chbejle beḷ lo' nis, perw na'a gona' cont gaxle bene' yesyechoje' lo da' malen'.

²⁰ Na' la' gosebejyichjite' yixjw chen' nach ja'aclene' Jesúsen'.

²¹ Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e to lo' barcw len xagaque', chesyeyonšagüe' yixjw chegaquen'. Na' leczye gox Jesúsen' legaque' šja'aclene' le'.

²² Na' la' gosontie' barcon' lo na' xagaque' Zebedeon' na' ja'aclene' Jesúsen'.

Jesúsen' bsed blo'ede' bene' zan

(Lc. 6:17-19)

²³ Na' Jesúsen' gwyeje' yogo' yež ca' zjachi' gan' mbane Galilea, bsed blo'ede' bene' ca' zjaže' to to yodao' che chio' bene' Israel. Na' gwdixjue'ede' diža' güen can' nabia' Diosen' yichjlaždao' bene' yosozenag che'. Na' Jesúsen' beyone' bene' ca' chese'e bite'teze yižgüe'.

²⁴ Na' doxen naci3n Siria gwxa da diža' yogo' da' güen da' ben Jesús'en'. Nach beñe' Siria ca' jasesane' yogo' bene' chesacšene lagüe'na', beñe' chese'e zan yižgüe', bene' chesey chesela, bene' zjayo'o zjanyaz da' xigüe' yichjlažda'ogaque' len beñe' chesaz šon na' bene' natsi' cuerp čhegaquen'. Na' beyone' legaque'.

²⁵ Na' zan beñe' gosao' le', bene' za'ac distritw Galilea na' distritw Decápolis, na' beñe' za'ac ciuda Jerusalén, na' beñe' za'ac yezica'chle yež da' zjachi' distritw Judea, na' beñe' za'ac yešla'a yegw Jordán.

5

Diža' dan' bsed blo'e Jesús'en' to lo ya'a

(Lc. 6:20-23)

¹ Na' Jesús'en' cate' ble'ede' beñe' zan zjanžag, na' gwloe' gwchi'e to lo ya'a. Na' beñe' ca' zjanaque' le' txen gosebigue' gan' chi'ena'.

² Nach gwzolao bsed blo'ede' legaque', gwne':

³ —Mbalaz zoa le'e chache'ele chyažjele gaclen Diosen' le'e, le ba chzenagle che Diosen' cont chnabi'e yichjlažda'olen'.

⁴ Mbalaz soa le'e chacyaše'laže'le, le Diosen' yeyoe'xenlaže' le'e.

⁵ Mbalaz zoa le'e chzexjwlaže'le len Diosen' na' len beñachen', le gon Diosen' cont gac lo na'le doxen yežlion' can' gwne'.

⁶ Mbalaz zoa le'e chzelaže'chgualo gacle beñe' güen len Diosen', le ba cheyon Diosen' le'e beñe' güen lagüen'.

⁷ Mbalaz zoa le'e cheyaše'le beñe' yoble, le lecze ca' Diosen' yeyaše' yeži'ilaže'de' le'e.

⁸ Mbalaz zoa le'e ba nacle beñe' laždao' xilaže', le šjayzoale txen len Diosen'.

⁹ Mbalaz zoa le'e chego'ole yela' chxenlaže' che beñe' chesediše, le Diosen' ñe' nacle xi'ine'.

¹⁰ Mbalaz zoa le'e chosoči chososaca' beñe' le'e lagüe dan' chonle dan' nac güen lao Diosen', le chzenagle che Diosen' cont chnabi'e yichjlažda'olen'.

¹¹ Na' mbalaz soale še dan' chejnlaže'le neda' chesezi'diža' beñe' le'e na' chososaca'zi'e le'e na' chosošie' diža' güenlaže' chele.

¹² Le yebechgüe na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xoxxta'ocho len da' beñe' ca' goso'e xtiža' Diosen' cani'.

Naccho ca zede' na' ca be'ni' len beñe' že' yežlio nga

(Mr. 9:50; Lc. 14:34-35)

¹³ Le'e nacle ca zede', le zede' chaclenen cont bi cuiayi' no yid bela', na' le'e chonle cont beñachen' cbi chesontequ' da' mal. Perw še zeden' bich bi zxi' naquen, žnacxe goncho cont yeyaquen zxi' da' yoble? Na' bich bi zacan', lete cho'oñchon na' gwlejš gwšošj beñe' len. Na' le'e še cbich gonle can' chazlaže' Diosen', nacle ca zede' dan' bich bi zxi' naquen.

¹⁴ Na' le'e nacle ca be'ni' dan' chaclenle beñe' cont chesenezde' nac chaclaže' Diosen' yesone'. Na' dan' chonle can', nacle ca to ciuda da' chi' to lo ya'a, le yogo'ze beñe' chesele'eden'.

¹⁵ Notno gwguala' to yi' na' gw dosen' to caj, san chde'en le'e ze'e cont chšenin' len yogo' beñe' že' lo' yo'ona'.

¹⁶ Na' ca nac le'e, cheyala' soateze soale gonle da' güenña' cont yesele'e beñe' na' yesonxene' Xacho Dios ben' zoa yaban'.

Jesús'en' bsed blo'ede' can' ža ley dan' bzoj da' Moisés

¹⁷ Bitw gaquele še neda' za'a zedeyena' cont ley dan' bzoj da' Moisés'en' na' dan' bosozoj yezica'chle beñe' ca' goso'e xtiža' Diosen' cani' bich yesonen žin. Za'a cont gac can' ža yogo'lol Xtiža' Diosen' dan' bosozoj beñe' ca'.

¹⁸ Da' li žia' le'e, te che yežlio nga len da' ca' chle'echo le'e yaban', perw ñe to letr dao' ñe to punt dao' dan' nyoj le'e leyna' bi gac yexin, san gac yogo'lol dan' nžia bia' Diosen' gac.

¹⁹ Da'nana' note'tezle še bi gonle can' žanna', la'czla' še naquen la'zelagüe to da' dao', na' še lecze gwlo'ele beñe' yoble bi yosozenague' čhen, Dios ben' zoa yaba chnabi'e ñe' bi nacle beñe' blao len le'. Na' note'tezle še gonle can' žanna', na' še lecze gwlo'ele beñe' yoble yesone' ca', Diosen' ben' zoa yaba chnabi'e ñe' nacle beñe' blao len le'.

²⁰ Chnia' le'e, bene' fariseo' ca' na' beñe' ca' chososed chosolo'e dan' bzoj da' Moisés bitw zjanac yichjlažda'ogaquen' güen lao Diosen'. Na' še yichjlažda'olen' bi gacchen güen lao Diosen' clcl ca che beñe' ca', bitw yežinle yaban' gan' zoa Diosen' chnabi'e.

Da' malen' choncho še chža'a lježcho

(Lc. 12:57-59)

²¹ Na' lecze bsed blo'e Jesús'en' legaque' gože'ne':

—Ba ñezele can' bzejni'i Moisésen' bene' ca' gosenita' cani', gwne': "Nono gotle. Na' še no got ljež benache', justis ca' yesechoglagüe' che' cheyala' gate'."

²² Na' neda' žia' le'e, note'tezle še chža'a ljež benachle, zacan' yesechoglagüe' gata' castigw chele. Na' note'tezle še chzi'diža' lježle, zacan' yeson' bene' blao ca' chesenabia' nación Israel chechon' castigw chele. Na' note'tezle še chado'diža' lježle, zaca'czen' yesela' Diosen' le'e lo yi' gabil.

²³ 'Cheyala' soacho binlo len ljež benachcho. Na' la'czla' cate' ba zoale lo' yodao' cont gwnežjwle bi dan' gwnežjwle gonxenle Diosen', še šjasa'laže'le ba benle da' mal contr to bene' lježle,

²⁴ na'ze cheyala' gwcua'anle šlož dan' noxe'len' na' šjenle cont yezoale binlo len bene' lježlen'. Yeyoža' gwaque šjasanle dan' ba gwlejle cont gonxenle Diosen'.

²⁵ 'Cate' to bene' gagüe' xya chele na' che'e le'e lao justis, šlac ngo'ole nezen' le yeyiljwlaže' nac gonle cont yezoale binlo len le' cont bi che'e le'e lao justisen'. Še bitw gonle ca', cate' žinle lao justisen', nach gone' le'e lo na' bene' ca' yososeyjue' le'e ližya.

²⁶ Da' li žia' le'e, bitw yebeje' le'e še biña' chixjwle doxen dan' čala'le.

Da' malen' choncho še chzoa xtocho

²⁷ 'Ba ñezele ley dan' bzoj da' Moisésen' žan: "Bitw gata'lenle no'ole bi nac no'ol čele o bene' byo bi nac bene' chele."

²⁸ Na' neda' žia' le'e, note'tezle še chña'le to no'ole na' chzelaže'lene', ba naple doła'. Le tozecz ca' malen' ba chonle lo' lažda'olen' len dan' chon bene' chzoa xtoe'.

²⁹ 'Na' še yejlaolen' chonen cont gonle da' xinj, cheyala' cuejyichjle da' malen' chonle. Yejni'a cuiayi' yejlaolen' clcl ca cuiayi'le lo yi' gabilen' neče len.

³⁰ Na' še na'le chonen cont gonle da' xinj, cheyala' cuejyichjle da' malen' chonle. Yejni'a cuiayi' na'le clcl ca cuiayi'le lo yi' gabil neče len.

Bene' ca' zjanšagna' bitw cheyala' yesyele'e

(Mt. 19:9; Mr. 10:11-12; Lc. 16:18)

³¹ 'Łeczce ñezele ley dan' bzoj da' Moisésen' žan: "Note'teze bene' ye'e len no'ol če', cheyala' čhas to yiš ga güen' diža' le besyele'ena'."

³² Na' neda' žia' le'e note'teze bene' chele'e len no'ol če', len ñeztede' no'ole čhen' bitw naque' to no'ole chzoa xtoe', chone' cont gague' ca to no'ole bene' chzoa xto. Na' note'teze yošagna'lene' to no'ole bene' bel'a len bene' če', łeczce toczce ca da' xinj gone' len dan' chon bene' chata'lene' no'ol če bene' yoble.

Jesüsen' bzejni'ide' cheyala' güe'cho diža' li

³³ 'Na' łeczce ba ñezele can' bzejni'i da' Moisésen' da' xozxta'ocho ca': "Cate' gwzoale testigw Xancho Diosen', cheyala' gonle con can' ba gwnalen'."

³⁴ Perw neda' žia' le'e gwbat ñale quinga che bite'teze: "Yabana' zoan testigw čhia' cho'a diža' li". Bi ñale ca' le yaba nan' zoa Diosen' chnabi'e.

³⁵ Na' ñeca ñale: "Yežlion' zoan testigw čhia' cho'a diža' li", le yežlion' den xni'a Dios. Ñeca ñale: "Ciuda Jerusalenna' zoan testigw čhia' cho'a diža' li", le naquen ciuda čhe Dios ben' naque' la'zelagüe bene' chnabia'.

³⁶ Na' ñeca ñale: "Yichja' zoan testigw čhia' cho'a diža' li", le bitw gac gonle cont yiša' yichjen' yesyeyaquen da' šiš o yesyeyaquen da' gasj.

³⁷ Še žale gwaquen, gacczen; še žale bi gac, bi gacczen. Le bichle diža' da' ñale cont yesejle'e čhele, zan' che Satanás dan' chnabia' da' xigüe' ca'.

Bitw co'olaže'cho bene' chesegue'ede' chio'

(Lc. 6:29-30)

³⁸ 'Ñezele ley dan' bzoj da' Moisésen' žan: "Še to bene' gone' zi' yejlaolen', guac gonle zi' yejlagüen', na' še to bene' xope' to layle, guac xople to layen'."

³⁹ Perw neda' žia' le'e, bitw gwžonle gwsaca'zi' bene' le'e. Še to bene' cape' šla'a xaga'le, le güe' dan' yešla'a.

⁴⁰ Še to bene' chagüe' xya na' che'nde' que'e xcamisle, le güe' latje que'e len xadon' chelen'.

⁴¹ Na' še to bene' blao gone' byen šejlenlene' gua'le yoa' čhen' do gašj hor, le šejlene' le guan' chop ca'te'le.

⁴² Na' še bi dan' chnabe bene' le'e, le güen'. Na' le cuej še bi da' chnabe' cuejlene'.

Cheyala' gaquecho bene' chgue'e chio'

(Lc. 6:27-28, 32-36)

⁴³ Na' łeczce ba ñezele ley chelen' žan: "Cheyala' gaquele bene' migw čhele na' gue'ele bene' chgue'ede' le'e."

⁴⁴ Perw neda' zia' le'e, cheyała' gaquele bene' chgue'ede' le'e, na' cheyała' nabele Diosen' gac güen che bene' chesezi'diže' le'e. Le gon binlo len bene' cheseque'ede' le'e, na' le yol güiz Diosen' cont gac güen che bene' ca' chososacazi'e le'e.

⁴⁵ Še gonle ca', gwlo'ele nacle xi'in Diosen' ben' zoa yaban'. Len' chone' chla' gwbižen' cont chšenin' che bene' zjanaque' bene' güen lente che bene' zjanaque' bene' mal. Na' lecze chone' yejw par bene' zjanaque' bene' güen len bene' zjanaque' bene' mal.

⁴⁶ Še chaquele šinze bene' chacde' le'e na' bi chaquele bene' yoble čbixchen' chbezle gon Diosen' da' güen chele? Con can' cheson bene' güečhixjw ca' chonle, bene' ca' žale zjanaque' bene' xi'achgua.

⁴⁷ Na' še con chguaple tiox bene' biše' lježle ca'ze čchaquele güenna' chonle da' chonle ca'? Bitw chonle güen, le ca'czen' cheson bene' ca' bi zjanombi'e Diosen'.

⁴⁸ Cheyała' gacle bene' šagüe' bene' güen len note'teže bene' con can' nac Xacho Diosen' ben' zoa yaban' bene' šagüe' bene' güen.

6

Jesúsen' blo'ede' naquen' cheyała' goncho da' chazlaže' Diosen'

¹ 'Cate' gonle to da' güen, bitw gonlen cont yesele'e bene' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac güen chele.

² Da'nan' cate' gwnežjwle to bene' da' chyažjde', bitw gwnežjwlen par yeseneže bene' ca' dan' chonlen'. Bene' gwxiye' ca' chosonežjue' bi da' chosonežjue' do lo' yodao' na' do chanez par yeseneže bene' na' yesene' güen čhegaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen čhegaque' še ca'.

³ San le'e, še bi da' gwnežjwle to bene', le gwnežjon šižize.

⁴ Gonlen ga cbi yesache'e bene' na' cbi yesonxene' le'e, nach Xacho Diosen' ben' chle'ede' yogo' dan' choncho gone' ga gac güen chele ga yesele'e yogo' bene'.

Bsed blo'e Jesúsen' nac cheyała' yol güižcho Dios

(Lc. 11:2-4)

⁵ 'Cate' yol güižle Diosen', bitw gonle can' cheson bene' gwxiye' ca'. Legaque' chesyebede' chesezeche' chosol güiže'ne' lo' yodao' čhegaque', na' do squin chanez. Chesone' ca' cont yesele'e bene' can' chesone'na'. Da' li žia' le'e, ba gosacxenczen' lagüe da' chesone' ca', perw Diosen' bitw gone' ga gac güen čhegaque' še ca'.

⁶ Na' cate' yol güižle Diosen', le yeyo' o lo' yo' o chele na' gwseyjwle puerten' na' güe'le diža' len Diosen' ben' cbi chle'echo la'czla' zoe' len chio'. Na' Xacho Diosen' ben' chle'ede' yogo' dan' chonle gone' ga gac güen chele.

⁷ Na' cate' yol güižle Diosen' bi güe'le diža' zan can' cheson bene' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' čhegaque'.

⁸ Bitw gonle can' chesone'na'. Ca' nac Xacho Diosen', cate' za' nabelenen' ba nezczede' bi dan' chyažjele.

⁹ Quinga yol güižlene':

Xato' bene' zoa yaba, chnabto' yogo' lo' bene' yesonxene' le'.

¹⁰ Zelaže'to' nabi'o yichjlaždao' yogo' neto' beňach.

Gacšca can' chazlažo' yežlio nga can' chac yabana'.

¹¹ Ca' nac dan' che'ej chagwto' tža tža, beňšcan na'a.

¹² Na' beži'xenšca čheto', le lencze neto' cheži'xento' che ljež beňacht'o' bite'teže da' chesonde' neto'.

¹³ Na' bitw go'o latje soa da' gwžigan' neto' gonto' da' mal, san bcuas bcue'ejšca neto' len da' mala'.

Le'na' chnabi'o na' napo' yela' guac na' naco' bene' zaca' juisyw toli tocaňe.

Ca'czen' gacšca.

¹⁴ Na' še cheži'xenle' che ljež beňachlen' bite'teže da' chesonde' le'e, lecze Xacho Diosen' ben' zoa yaban' yezi'xene' xtola'len'.

¹⁵ Perw na' še le'e bi cheži'xenle' che ljež beňachle, lecze ca' Xacho Diosen' bitw yezi'xene' chelen'.

Jesúsen' bzejni'ide' nac goncho gwbas

¹⁶ 'Cate' le'e gonle gwbas cont gonxenle' Diosen', bitw gon cho'alaolen' ca' che bene' chegüine' chgüe', can' cheson bene' gwxiye' ca'. Legaque' chesone' ca' contze chesele'e bene' le chesone' gwbas na' yesonxene' legaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen čhegaque' še ca'.

¹⁷ San le'e cate' gonle gwbas, le gwpa'a yichjle na' le čhib cho'alaole.

¹⁸ Le gon ca' cont bi yesache'e bene' chonle gwbas, san gacbe'e toz Xacho Dios ben' zoa len chio' la'czla' bi chle'echone'. Na' Xacho Diosen' ben' chle'e yogo' da' choncho gone' cont gacxenle.

Da' ca' zjazaca'chgua yaba gan' zoa Diosen'

(Lc. 12:33-34)

¹⁹ Bitw co'osagüe'le da' zcha'o da' zjanac da' zaca' da' zjade yežlio nga, le yesebiayin'. Bał da' zjade yežlio nga chesaljen be dao' chesagwban', na' yebałen chesezen xche'en, na' lecze chaš bene' gwban na' yeseque'en.

²⁰ San le gaque Diosen' cont gone' da' šagüe' da' güen chele da' bi te chen cate' yežinle yaban' gan' zoe'na', da' bi šo'ba', na' neca sen xche'en, na' neca gac šo' bene' gwban yeseque'en.

²¹ Le gan' de dan' chaquelen' na' zoa yichjlažda'olen'.

Žia yejlaochi cont chle'echo

(Lc. 11:34-36)

²² Žia yejlaole cont chle'ele. Še bitw bi chaquen, chle'eczele binlo.

²³ Perw še yejlaolen' bi naquen binlo, bitw chle'ele. Ca'czen' naquen len yichjlažda'olen'. Da' licze leca nchoł yichjlažda'ole še bi chzenagle che Diosen'.

Bitw gac gaquecho Diosen' na' gaquetecho mechw

(Lc. 16:13)

²⁴ Notno gac gon žin len chope xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yichj do laže' na' che ben' yeto gonon' to chža'alaze'ze. Lecze ca' le'e bitw gac gonle xšin Diosen' do yichj do laže'le na' gonte xšinle cont gacle bene' gwni'a.

Diosen' chapši'e xi'ine' ca'

(Lc. 12:22-31)

²⁵ 'Da'n'an' žia' le'e, bi gacžejlaže'le bi da' ye'ej gagwle šlac mbanle, na' lecze ca' bi gacžejlaže'le che xalana'le. Zaca'ch yela' mban chelen' ca' yela' guagw. Lecze ca' cuerp chelen', zaca'chen ca' xalana'le.

²⁶ Le gon xbab ca' nac be ca' zjažia xil ben' chesaš lo be', bitw chesazba', bitw cheselapba', neca zoa da'a xoa' chegacba', perw na' Xacho Diosen' ben' zoa yaba chguagwcz'e'ba'. iNacchle zaca' le'e ca' be ca' zjažia xilen'!

²⁷ Na' ne tole bi gac yoston cuinle gašje metr še con cue' yichjle tonle.

²⁸ 'Na' žbixchen' chbec yichjle xalana'le? Le gon xbab ca' nac yej ca' da' zjaze yiže' chesecha'oczen'. Bibi žin chesonon, neca chesaljen do.

²⁹ Na' žia' le'e, da' rey Salomón gocue' lache' güen juisyw, perw bitw bežinlaže' xalane'na' ca' yela' xdan che yej ca'.

³⁰ Diosen' none' xdan da' ca' ze yixen' la'czla' to chop žaze nitan' na' chosozeyen'. Nacchxe gon Diosen' len le'e gwlecze yichje' gone' yogo' da' chyažjele, le'e late' lasze chejle'le che'.

³¹ Da'n'an' bitw cuec yichjle che bi dan' chyažjele, nale': "žBin' ye'ej gagwcho na' bin' gacwcho?"

³² Bene' ca' bi chesonxene' Diosen' con chesoe'laže' bi da' gata' yese'ej yesagüe' na' che xalana'gaque'. Perw Xacho Diosen' ben' zoa yaban' nezczede' bi da' ca' chyažjele.

³³ Cheyala' güe'laže'le gwzenagle che Diosen' cont nabi'e yichjlažda'olen' na' cont gacle bene' güen len le', lenna' naquen da' žialaoch, na' yogo' da' ca' chyažjele, goncze Diosen' len.

³⁴ Bitw cuec yichjle che bi dan' gac gwxe güižj, le decze da' cuec yichjcho tža tža. Da'n'an' to to ža con cuec yichjcho che dan' chac ca hora'.

7

Bitw zaca'cho nacho zjanap bene' doła'

(Lc. 6:37-38, 41-42)

¹ Bitw gonle xbab zaca'le nale bene' zjanape' doła'. Še nale che bene' zjanape' doła', ca'cze Diosen' ne' le'e nape doła'.

² Can' chosbaga'le bene' žale zjanape' doła', lecze can' yosbaga' Diosen' le'e ne' nape doła'. Con can' chonle len bene', lecze can' gon Diosen' len le'e.

³ žBixchen' chna'le beb dao' dan' yo'o lo' yejlaol bene' lježle na' bi chacbe'ele naquech beb xen dan' yo'o lo' yejlaolen'?

⁴ Na' še le'e yo'o to da' xench lo' yejlaolen' žnacxechen' che'le bene' lježlen': "Ben' yebeja' beb dao' dan' yo'o lo' yejlaolon'?"

⁵ ;Bene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlaol bene' lježle.

⁶ 'Perw bitw güe'tezle xtiža' Diosen' len bene' ca' cheson yichjlaogüe' cbi chesaclaže' yosozenaguen', le xož yesonde' le'e znia ca' cheson bał beco' še bi chazlaže'ba' bi da'

chosonežjue'ba'. Na' še güe'tezle xtiža' Diosen' len bene' ca' cheson yichjlaogüe', xož yosolej yosošože' diža' dan' güe'lenlene'. Ca' cheson coš len da' cbi chesaclaže'ba' yesagwba'.

Le nabe Diosen' bi dan' nabelene', le gonczen'

(Lc. 11:9-13; 6:31)

⁷Še žan bi da' chyažecho, chnabchon. Še žan to da' chaclaže'cho želecho, chyiljwchon. Še žan chaclaže'cho saljw bene' puert che' na' necho cho'a puerta' cont saljue'. Na' ca'cze cheyala' ye'le Diosen' cate' bi da' chyažjele, o bi da' chaclaže'le gone'.

⁸Na' note'tezle še bi da' chnabelene', gonczen'. Na' še bi dan' che'nele nezele, gwzejni'iczen' le'e. Na' še žan chaclaže'le gac to da' gac, yoļ güižle Diosen' can' chon to bene' chnie' cho'a puert, nach Diosen' gone' cont gacczen.

⁹Na' le'e xa bidao', še xi'inle nabebe' le'e yetextil čgwnežjwlebe' to yej?

¹⁰Na' še nabbe' yid beļ gagwbe', čgwnežjwlebe' to be xigüe'?

¹¹La' nacle bene' mal, nezele chnežjo xi'inle to da' güen. Nacchxe güen gon Xacho Diosen' ben' zoa yaban' len bene' chnab lagüe'na' bi dan' chyažide'.

¹²Na' con yogo' da' güen da' chaclaže'le yeson benachen' len le'e, lecze ca' cheyala' gonle len legaque', le can' zejen da' nyoj le'e ley dan' bzoj da' Moisésen' na' dan' bosozoj da' bene' ca' goso'e xtiža' Diosen' cani'.

Nez da' yežin yaban' zaca'leben ca to nez las

(Lc. 13:24)

¹³⁻¹⁴Lao yeļa' mban čecho čhope nez de, to nez güen na' to nez mal. Nez malen' zaca'leben ca to nez yo to nez laga' dan' chaquele leca mba naquen cont talen, na' bene' zan cheseque'en. Perw cheyala' gonle byen šo'le nez güenna' la'czļa' chaquele naquen ca to nez las, to nez zdebe, le nez malen' chežinen gabil gan' saca'zi'le toļi tocaņe. Na' nez güenna' chežinen yaba ga banle toļi tocaņe.

Dan' choncho chlo'en bin' yo'o lo' yichjlažda'och

(Lc. 6:43-44)

¹⁵Cheyala' gwsaca'le cont bi šejle'le xtiža' bene' ca' chesonlaže' chesene' xtiža' Diosen' cheseyixjue'ede'. Xdanchgua cheso'e dižan', le chesaclaže' gonle xbab zjanaque' bene' güen. Perw zjanaque' bene' laždao' xi'a na' chesaclaže' yosožiaye'e le'e.

¹⁶Con can' nac da' chbia to to yaguen' nezecho bi yaga'. Ca nac yag yeše' bitw chbian uvas na' neca yag lay chbian yixgüigw. Ca'czen' cheyala' gacbe'ele bene' ca' yeseziye'e le'e cate' le'ele dan' chesone'na'.

¹⁷Yag dan' nac yag güen, frut güencze chbian, na' yag da' bi nac güen, lecze frut da' bi nac güen chbian.

¹⁸Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen.

¹⁹Na' yogo'te yag frut da' bibi chbia, čhog xan yaga' len na' gwzeyen'.

²⁰Na' can' nac dan' cheson to to bene', nezecho še zjanaque' bene' güen o bene' mal.

Gague yogo' bene' yesyežine' gan' zoa Diosen' chnabi'e

(Lc. 13:25-27)

²¹Bene' zan chese'e neda: "Naco' Xana'", perw gague yogüe' yesyežine' yaban' gan' zoa Diosen' chnabi'e. Bene' ca' cheson can' chazlaže' Xa' Diosen' ben' zoa yaban', legaczen' yesyežine' yaban' gan' zoe'na'.

²²Cate' žin ža yosodie' cuent lao Diosen', bene' zan yesi'e neda: "Xana', goclen neto' na'a, le ba gwdixjue'eto' xtižo'na'. Na' lecze ca' bza' bzetjto' lao' bebejto' da' xigüe' ca' zjajo'o zjanyaz yichjlaždao' bene'. Na' lecze bza' bzetjto' lao'na' bento' da' zan yeļa' guac."

²³Perw na' yapa' legaque': "Bitw nombi'a le'e. Le šjaya'ac ca'ale le'e bene' güen da' xinj."

Čhope bene' na' yo'o da' chon to toe'

(Mr. 1:22; Lc. 6:47-49)

²⁴Bene' chzenag xtiža'na' na' chone' can' žia'na' zaca'lebde' ca to bene' sina' bene' ben liže' na' gwdixjue' lenen len yej gual.

²⁵Na' goc yejw zil juisyw na' betj yegw gwyečhen liže'na' na' gwyečhj be' bdon'o. Perw bitw gosezoen yosochixen len dan' gwdixjue' lenen de yej.

²⁶Na' bene' chzenag xtiža'na' perw bitw chone' can' žia'na', zaca'lebde' ca to bene' tont bene' bzoa ližen' lo yox.

²⁷Na' goc yejw zil juisywna' na' betj yegon' gwyečhen liže'na' na' gwyečhj be' bdon'o. Nach ližen' bebixen gwžiayin'.

²⁸Na' cate' beyož be' Jesús'en diža' ca', bene' ca' že' na' besyebande' can' bsd blo'eden'.

²⁹Le can' bzejni'ide' nacbja' nezde' cayanen' nac xbab che Diosen', gague bzejni'ide' can' chosozejni'i bene' ca' chososed chosolo'e ley dan' bzoj da' Moisésen'.

8

Jesúsen' beyone' to bene' che'ede' yižgüe' dan' nzi' lepra

(Mr. 1:40-45; Lc. 5:12-16)

¹ Bene' zan zesyenagüe' Jesúsen' cate' beyetje' ya'ana'.

² Nach to bene' che'ede' yižgüe' dan' nzi' lepra gwbigue' lao Jesúsen' na' bzoa xibe' lagüe' na' gože'ne':

—Xana', še chaclažo' guac yeca'o yižgüe' dan' che'eda'.

³ Nach Jesúsen' bli ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' beyactie' ca nac yižgüe' dan' che'ede'.

⁴ Nach Jesúsen' gože' le':

—Notno yo'o can' ba beyona' le'. Con gwyej jana' bxoza' cont le'ede' bačh beyacdo'. Na' bnežw da' cheyla' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yeseņezde' ba beyacdo'.

Jesúsen' beyone' xmos to soldadw

(Lc. 7:1-10)

⁵ Na' cate' bežin Jesúsen' Capernaum to xan soldadw bene' Roma la' bšagte' le'. Na' gota'yoede' Jesúsen',

⁶ gože'ne':

—Xana', xmosan' die' ližan' chadženchgüede'. Natsi' cuerp chen' na' chžaglaochgüe'.

⁷ Nach Jesúsen' gože' xan soldadoa':

—Sa'lena' le' na' yeyona'ne'.

⁸ Perw na' xan soldadoa' gože'ne':

—Xana', bitw naca' bene' zaque' par sa'o liža'na'. Ngateze ben mandadw yeyac xmosan' na' yeyacze'.

⁹ Neda' zoa bene' chnabi'e neda', perw lecze nita' soldadw chia' na' chnabia'gaca'ne'. Cate' chapa' toe': "Gwyej", na' cheje', na' cate' chapa' yetoe': "Da", na' chide', na' cate' chapa' xmosa': "Da' nga gono'", na' chonen'. Nan' nezda' con nao' yeyac xmosan' na' yeyacze'.

¹⁰ Na' Jesúsen' cate' bende' xtiža' xan soldadoa' bebande' na' gože' bene' ca' zjanagüe' le'na': —Da' licze žia' le'e, ne toze bene' Israel bina' šejnilaže' chgüe' neda' ca benga bi naque' bene' Israel.

¹¹ Žia' le'e, bene' zan za'ac doxen yežlion' šjasyenite' txen len da' xozxta' ocho Abraham, Isaac na' Jacob yaban' gan' zoa Diosen' chnabi'e na' yesebi'e cho'a mes yesagüe'.

¹² Na' ca nac bene' naciön Israelen' ben' gwlej Diosen' cont yesenite' len le', choj bene' zan bitw yesejnilaže' neda'. Da'nan' sele' legaque' lo' yi' gabil' gan' nac choj na' yesebežyaše' na' yesagwxejte laye' dan' yesežaglaochgüe'.

¹³ Beyož gwna Jesúsen' ca' nach gože' xan soldadoa':

—Guac yeyejo'. Yeyaque xmoso'na', con can' chejli'o gac che'.

Na' xmos xan soldadoa' la' beyactede'.

Jesúsen' beyone' taobi'in che Pedroa'

(Mr. 1:29-31; Lc. 4:38-39)

¹⁴ Na' gwyej Jesúsen' liž Pedroa', na' ble'ede' taobi'in che Pedroa' die' yo'e da' la.

¹⁵ Jesúsen' bežue' ne'e na' la' bechojtie' da' lan'. Nach la' gwyaste no'olen' bsini'e da' gose'ej gosagüe'.

Jesúsen' beyone' bene' zan

(Mr. 1:32-34; Lc. 4:40-41)

¹⁶ Na' cate' ba gwxin, besežin bene' gan' zoa Jesúsen' zjanchi'e bene' zan zjayo'o zjanyaz da' xigüe' yichjlažda'ogaquen'. Jesúsen' con bene' mandadw na' besyechoj da' xigüe' ca'. Lecze beyone' yogo' bene' ca' chesacšene.

¹⁷ Bene' ca' cont goc can' ža Xtiža' Diosen' dan' bzoj da' Isaías che' cani', žan: "Le'na' yeque'e yela' chžaglaog checho na' yeque'e yogo' yižgüe' chechon'."

Can' gož Jesúsen' bene' ca' gosaclaže' yesa'ogüe' le'

(Lc. 9:57-62)

¹⁸ Gwde na' ble'e Jesúsen' ba besežin bene' zan zjanyechjde' le', nach bene' mandadw len bene' ca' zjanaque' le' txen cont yeselague' yešla'a nesdaon'.

¹⁹ Na' bchoj to bene' chsd chlo'ede' dan' bzoj da' Moisésen' nach gwbigue' lao Jesúsen' na' gože'ne':

—Maestrw, sa'lena' le' gate'tez šejo'.

²⁰ Nach gož Jesúsen' le':

—Nita' xišna' beza' na' lecz chesyěžin xišna' be dao' ca' zjazoa xil, be chaš le'e yaba, perw bibi xišna' neda' de ga yezi'laža', neda' naca' ben' gwsela' Diosen' golja' beṇačh.

²¹ Na' bchoj yeto ben' naque' Jesúsen' txen na' gože'ne':

—Xana', sa'lena' le' perw za' got xa'. Beṇšca latje zgua'tec šjajcuaša'ne'.

²² Jesúsen' gože'ne':

—Yo'o len neda'. Beṇe' ca' zjanac yichjlažda'ogüe' ca che beṇe' guat, legaque' guaccze yosocuaše' yezi'ca'chle beṇe' guat.

Jesúsen' bcueze' to be' bdono' lo nisdao'

(Mr: 4:35-41; Lc: 8:22-25)

²³ Beyož be' Jesúsen' diža' ca', gwyo'e lo' barcon' len beṇe' ca' zjanaque' le' txen.

²⁴ Na' šlac zej barcon' lo nisen' gwzoloa gwyečhj to be' bdono' na' nisdaon' leze chas chatan' na' gwzoloa cheyož nis lo' barcon', perw ba chtas Jesúsen'.

²⁵ Nach bosyosbane' le' gosi'ene':

—jXanto'! jBosla chio'! jBach chbiayi'cho!

²⁶ Nach Jesúsen' gože' legaque':

—jBixčhen' chžebtecle ca'? jNacxečhen' bi chejle'le chia'?

Na' gwyase' na' gwdi'e be' bdonon' len nisdaon', na' la' gosebe'žiten.

²⁷ Na' beṇe' ca' zjanaque' Jesúsen' txen besyebande' can' bene'na', nach gose' lježgaque':

—jNoxe benga? lente be' bdono' na' len nisdaon' chosozenaguen che da' že'.

Chope beṇe' Gadara zjajo'o zjanyaze' da' xigüe'

(Mr: 5:1-20; Lc: 8:26-39)

²⁸ Na' besežine' yešla'a nisdaon' gan' chi' laž beṇe' Gadara ca'. Na' cate' bechoj Jesúsen' lo' barcoa' bosošag chope beṇe' le', beṇe' zjajo'o zjanyaz da' xigüe' yichjlažda'ogaque'. Beṇe' quinga ba nite' capsantw na' gosacchgüe' beṇe' znia juisyw len beṇe' chesyěžague' na' gague no chac ta tnez.

²⁹ Na' bososye'e gose'e Jesúsen':

—jBixčhen' chgoša' chlaže' chio' len neto', Jesús? Naco' dogualje Xi'in Dios. jZao' gwsaco' neto' na'a cate' bi'na' žin ža si'to' castigw?

³⁰ Na' gala'ze chesaš zan coš chesagwba'.

³¹ Nach da' xigüe' ca' gosata'yoen Jesúsen' gose'en le':

—Še yebejo' neto' yichjlaždao' beṇe' quinga, gwsela' neto' gan' nita' coš ca' na' beṇ latje šjajo'oto' yichjlažda'oban'.

³² Nach gož Jesúsen' legaquen:

—Le šjajo'o.

Nach besyechojen yichjlaždao' beṇe' ca' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ban', na' jasełažo'ba' lo' nisdaon' ga gosatba' gose'ejba' nis.

³³ Na' beṇe' ca' chosoyoe' cošen' besele'ede' dan' ba goquen na' bosyoxonje' jasyeyeže' beṇe' lagüe' yež yogo' can' ba goquen' na' can' ba besyeyac beṇe' ca' goso'o gosaz da' xigüen' yichjlažda'ogaquen'.

³⁴ Nach yogo' beṇe' ca' že' yeža' jasešague' Jesúsen' na' cate' besele'ede'ne' gosata'yoede' le' yeze'e lažgaquen'.

9

Jesúsen' beyone' to beṇe' bi chda šla'a ni'a ne'e

(Mr: 2:1-12; Lc: 5:17-26)

¹ Nach Jesúsen' beyo'e lo' barcon' len beṇe' ca' zjanaque' le' txen besyelaque' yešla'a nisdaon' par besyěžine' Capernaum gan' ba gwzoacze' šša.

² Na' besežin xonj beṇe' zjanlene' to beṇe' xinj beṇe' bi chda šla'a ni'a ne'e, zjanxoe' le' to lo cam dao'. Cate' gočbe'e Jesúsen' le gosejnilaže'ne' nach gože' beṇe' güe'na':

—Bebe xi'ina'. Ba bezi'xena' xtolon'.

³ Na' baḷ beṇe' ca' chososed chosolo'ede' dan' bzoj da' Moisésen' gosende' dan' gož Jesúsen' beṇe' güe'na' na' gosone' xbab lo' yichjlažda'ogaquen' gosene': "Benga chnie' diža' bya' che Dios chne' ca', le chon cuine' ca Dios."

⁴ Jesúsen' gočbe'ede' ca nac da' cheseza'laže', na' gože' legaque':

—jBixčhen' chza'laže'le ca' lo' yichjlažda'olen'?

⁵ Še yapa'ne': "Ba bezi'xena' xtolo'na'," bi nezele še napa' yela' gwnabia' cont yezi'xena' xtolen'. San še yapa'ne': "Gwyas na' gwda", na' nacia' še napa' yela' guac gac can' gwnian'.

⁶ Perw neda' naca' beṇe' gwsela' Dios golja' beṇačh gwlo'eda' le'e na'a zoa' yežlio nga napa' yela' gwnabia' cont yezi'xena' xtoła' beṇačhen'.

Nach gože' beṇe' xinja':

—Beyas, beyoa' xcamon' na' beyej ližo'.

⁷ Na' beyas bena', beze'e zjayde' liže'.

⁸ Na' beñe' ca' besele'ede' can' goquen' besežebchgüe'. Na' gosonxene' Diosen' dan' be' yela' guac che Jesúsen'.

Jesúsen' gwleje' Mateo cont goque' txen len le'

(Mr. 2:13-17; Lc. 5:27-32)

⁹ Na' Jesúsen' gwdie' latje gan' chi' Mateo chchixjue' impuesto. Na' cate' ble'ede' le' na' gože'ne':

—Da len neda'.

Na' gwzoža' Mateon' gwyejlene' le'.

¹⁰ Ca' goquen' ba chi' Jesúsen' liž Mateon' ba che'ej chagüe' txen len zan beñe' güechixjw na' len yebale beñe' güen da' xinj' na' len beñe' ca' zjanaque' txen len le'.

¹¹ Na' beñe' fariseo ca' cate' besele'ede' chi' Jesúsen' txen len beñe' ca', gose'e beñe' ca' zjanaque' le' txen:

—¿Nacxečen' ben' chsed chlo'ede' le'e che'ej chagwlene' txen beñe' güechixjw na' yebale beñe' güen da' xinj'?

¹² Na' cate' Jesúsen' bende' xtiza'gaquen' na' gože' legaque':

—Beñe' cbi chesacšene bitw cheseyažjde' beñe' güen rmed. Beñe' chesacšende', legaquen' cheseyažjde' beñe' güen rmed.

¹³ Le šjased bi zeje Xtiza' Diosen' dan' nyojen žan: “Chaclaža' yeyaše' yeži'ilaže'le beñe', gague con gotle beyixe' gonxenle neda'.” Gague beñe' ba zjanaque' beñe' güen len Diosen' zedeneyoeda' cont yesyetinjde' xtolen', san beñe' güen da' xinjjen'.

Goseñabde' Jesúsen' bixchen' beñe' ca' zjanaque' le' txen bi gosone' gwbas

(Mr. 2:18-22; Lc. 5:33-39)

¹⁴ Nach beñe' ca' chesone' txen len Juan ben' bzoe' beñe' nis gosebigue' lao Jesúsen' na' gose'ene':

—Neto' na' len beñe' fariseo ca' chonchguato' gwbas, perw beñe' ca' zjanaque' le' txen bi chesone' gwbas. ¿Bixchen'?

¹⁵ Nach gož Jesúsen' legaque':

—¿Guac yesezoa beñe' yela' güine' beñe' chesaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan' bi gac yesezüine'de'. Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len beñe' ca' zjanaque' neda' txen.

¹⁶ Nono zoa beñe' chchine' lache' cobe cont yoda' xe' da' de'exo', le lache' coben' yeben' cate' čiben' na' čezan' lache'exon', na' gan' nchezan' gacchen da' xen.

¹⁷ Na' lecze neca zoa beñe' chgue'e vino cobe lo' bzod yide'exo', le vino coben' chšon' yide'exon' na' laje vino na' yesebiayi' chopen. San chesegue'e vino coben' lo' yid cobe cont bitw cuiayi' vinon' len yiden'.

Jesúsen' beyone' xi'in Jairo na' beyone' yeto no'ole beñe' gwdane' xe'

(Mr. 5:21-43; Lc. 8:40-56)

¹⁸ Na' ne' choe'te Jesúsen' dižan', bžin to beñe' gwnabia' bzoa xibe' lao Jesúsen' na' gože'ne':

—Za' gotte to xi'ina' no'ole. Yo'ošca xoa taco' yichjbe' cont yebambe'.

¹⁹ Na' gwzoža' Jesúsen' na' gwče'e beñe' ca' zjanaque' le' txen ja'aclene' beñe' gwnabian'.

²⁰ Na' šlac zja'aque' liž beñe' gwnabian' zej to no'ole nagüe' legaque', beñe' ba goc šižinjw iz chzoe' gwbaol', na' bene' byen gwbigue' cože' Jesúsen' gwdane' lox xen'.

²¹ Le bene' xbab lo' yichjlažda'ogüen', gwne': “Con še ba gwdana' xen' nach yeyacda'.”

²² Na' gwyečj Jesúsen' ble'ede' no'olen', gože'ne':

—Bendiplažo' xi'ina'. Ba beyacdo' dan' chejnilažo' neda'.

Na' la' beyactede'.

²³ Cate' bžin Jesúsen' liž beñe' gwnabian' na' ble'ede' beñe' zan zjaže' chesone' ššag chesebežchgüe' na' ba nita' beñe' chosocuež bžejo par yosocuaše'be'.

²⁴ Na' gože' legaque':

—Le yechoj ngale. Bi' no'ole daon' biñ'a gatbe', san chtasben'.

Na' beñe' ca' bosoxiže' gosonle' che'.

²⁵ Na' beyož bešaše' yogo'loj beñe' ca', nach gwyo'o Jesúsen', bežue' taca' bi' no'ol guaten', na' beyasbe'.

²⁶ Na' ca' nac yela' guac dan' ben Jesúsen', gwxoax diža' čhen yogo' yež dan' zjachi' do na'.

Jesúsen' beyone' čhope beñe' lčhol

²⁷ Cate' beza' Jesúsen' len beñe' ca' zjanaque' le' txen, ja'aclen čhope beñe' lčhol legaque' na' gosone' zižje:

—Le' naco' xi'in diaža che da' rey David, beyaše' laže'šca neto'.

²⁸ Na' cate' Jesúsen' len bene' ca' zjanaque' le' txen besežine' yo'o gan' zjanite' na' besyeyo'e, na' lecze goso'o bene' lchol ca'. Nach Jesúsen' gože' legaque':

—¿Chejle' le guac gona' cont yele'ele'?

Nach gose'ene':

—Chejle'to' Xanto'.

²⁹ Nach Jesúsen' gwdane' yejlaogaquen', na' gože' legaque':

—Yele'ele, le chejnlaže'le neda'.

³⁰ Nach besyeyac yejlaogaquen' besyele'ede'. Na' Jesúsen' gože' legaque' bicze yeso'e diža' can' goc besyeyac yejlaogaquen'.

³¹ Na' besyeya'aque' na' gate'tez ja'aque' doxen distritw Galilean' goso'e diža' ca' nac dan' ben Jesúsen' len legaque'.

Jesúsen' beyone' to bene' bi goc nie'

³² Na' cate' besyeya'ac bene' ca', la' besežinte bene' yoble zjanči'e to bene' bi goc nie', na' yo'o yaz da' xigüen' yichjlažda'ogüen'.

³³ Jesúsen' bebeje' da' xigüen' na' la' benete bena'. Na' bene' zan besele'ede' can' goquen' besyebanchgüede', na' gosene':

—Chio' bene' Israel, da' nechon' za' ble'echo yela' guac dan' nac ca'.

³⁴ Perw na' bene' fariseo ca' gosene':

—Satanás dan' nac xan da' xigüe' ca' chaclenen le' cont chebeje' da' xigüen' zjajo'o zjanyaz yichjlaždao' bene'.

Jesúsen' cheyaše' cheži'ilaže'de' benachen'

³⁵ Na' Jesúsen' len bene' ca' zjanaque' le' txen ja'aque' to to yež na' to to ciuda da' zjachi' do na' bzejni'ide' bene' Israel lo' yodao' chegaque' ca', gwdixjue'ede' diža' güen can' nabia' Diosen' yichjlaždao' bene' yosozenag che'. Na' Jesúsen' beyone' bene' ca' chese'e bite'teze yizgüe' na' bite'teze da' chesac chegaque'.

³⁶ Na' ble'ede' ba besežag bene' zan na' beyaše' beži'ilaže'de' legaque', le goche'ede' chesaczejlaže' nac yesone' na' gague no zoa yesaclen legaque' len yogo' dan' chesežaglaogüe'. Nite' ca nita' no xila' be nono de gwyoe legacba'.

³⁷ Nach gože' bene' ca' zjanaque' le' txen:

—Chyažje bene' zan yeseyixjue'ede' xtiža' Diosen', perw to chopga bene' nita' yeseyixjue'eden'. Na' bene' yosozenague' che Diosen' zjazacalebe' ca to coseš xen da' chyažjen yedoben.

³⁸ Da'n nan' le nabe Xancho Diosen' seła'che' bene' yesaclene' chio' yotobcho coseš chen'.

10

Jesúsen' gwleje' bene' šižinw ca' gosaque' txen len le'

(Mr. 3:13-19; Lc. 6:12-16)

¹ Jesúsen' botobe' bene' šižinw ca' zjanaque' le' txen na' bnežjue' legaque' yela' gwnabia' cont besyebeye' da' xigüe' lo' yichjlaždao' bene', na' cont besyeyone' bene' bite'teze yizgüe' da' chese'ede' na' bite'teze da' chesac chegaque'.

² Quinga zjale bene' šižinw ca': Simón ben' lecze le' Pedro ben' goque' bene' blao, na' Andrés bene' biše' Pedroa', na' xi'in Zebedeon' Jacobo len Juan,

³ na' Felipe, na' Bartolomé, na' Tomás, na' Mateo ben' goc bene' güechixjw, na' Jacobo xi'in Alfeo, na' Lebeo ben' lecze le' Tadeo,

⁴ na' Simón ben' ben txen len partidw cananista, na' Judas Iscariote ben' bdie' Jesúsen' lo' na' ben' besegue'ede' le'.

Jesúsen' gwsele' bene' šižinw ca' jasedixjue'ede' xtiža' Diosen'

(Mr. 6:7-13; Lc. 9:1-6)

⁵ Na' Jesúsen' gwsele' bene' šižinw ca' jasedixjue'ede' xtiža' Diosen', gože' legaque':

—Bitw šejle laž bene' cbi zjanaque' bene' Israel, na' neca šejle yež ca' zjachi' distritw Samaria.

⁶ Le šja'ac gan' že' bene' Israel bene' ba zjambiayi' dan' bitw na' yesombi'e Diosen'.

⁷ Le šja'ac le šjatixjue'ede' ba bžin ža Diosen' ben' zoa yaban' nabi'e yichjlaždao' bene' yosozenag che'.

⁸ Le yeyon bene' chesacšene, le yeyon bene' ca' chese'e yizgüe' dan' nzi' lepra, le yosban no bene' ba gosat, na' le yebej da' xigüe' ca' zjajo'o zjanyaz lo' yichjlaždao' bene'. Diosen' bibi bchixjue' le'e da' ba bene' le'e yela' guac chen' cont gonle' da' quinga, da'n nan' le gaclen bene' na' bibi gwchixjwlene'.

⁹ Bitw gua'le mechw de oro, de plata o de cobre šlac co'ole nez.

¹⁰ Na' nēca gua'le bzod, o yeto xcamisle, nēca gua'le yel, na' nēca gox'e'le xis da' gwčhiš'e'le. Ca nac le'e chonle xšinan' zaca'le par gon bene' da' ye'ej da' gagwle gan' sela' le'ena'.

¹¹ 'Na' gate'tez ciuda o yež ga žinle, le nab še zoa to bene' güen bene' yebede' gwlebe' le'e ližen'. Na' še gwlebe' le'e, na'teze soale. Cate'ch žin ža šejle ga yoble, cana'ch yeza'le.

¹² Na' cate' žinle liže'na', le gwguape' tiox, na' le nāblaže' soa cueze' binlo len yichjlažda'ogüe'.

¹³ Na' še nita' bene' chesaclaže' yesezoa yesebeze' binlo len yichjlažda'ogaquen', na' gac can' gwnāblaže'le par yesezoa yesebeze' binlo. Perw še nono zoa bene' chesaclaže' yesezoa yesebeze' binlo len yichjlažda'ogaque', bi gac dan' ba gwnāblaže'len'.

¹⁴ Na' še zoa ga bi yosolebe' le'e nēca yosozenague' chele, cate' yeza'le na', le cuibe ni'alen' yo bište cont nachbia' bi checa'ale čegaque'.

¹⁵ Da' mal xēn goson bene' ciuda Sodoma na' bene' ciuda Gomorra cani', perw da' li žia' le'e, cate' žin ža gac juisyw bene' ca' bi bosolebe' le'e ližen' yesa'le'chde' clēl ca bene' Sodomān' na' bene' Gomorran'.

Gac da' saca'zi'cho

¹⁶ 'Neda' sela' le'e šjatižjue'ele xtižan' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. Da'nān' cheya'la' gacle bene' yo'ochgua xbab na' bene' xenlaže' len legaque'.

¹⁷ Le gwsaca' len bene' ca' chesegue'ede' le'e. Nita' bene' yesone' le'e lo na' bene' gwnābia' ca' cont yesot yesevine' le'e lo' yodao' čegaquen'.

¹⁸ Nach lecze dan' chejnilaže'le neda' nita' bene' yeseče'əxoxje' le'e do lao rey, do lao nochle bene' gwnābia'. Na' can' güe'lenle legaque' xtižan', lecze can' güe'lenle xtižan' len bene' bi zjanaque' bene' Israel.

¹⁹ Perw cate' yesezene' le'e na' yeseče'e le'e lao bene' ca', bi cuec yichjle nac yoži'ile xtiža'gaquen' o nacle nāle. Lo hor na'teze Diosen' gwzejni'ide' le'e bin' cheya'la' nāle.

²⁰ Le gague le'eczen' nele, san Spiritw čhe Xacho Diosen' gonen ga nāle bin' cheya'la' nāle.

²¹ 'Cana' ba' benač yesečje' yesone' bene' biše' golje' lo na' bene' yesote' legaque', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne'e lo na' bene' yesote' legaque'.

²² Yogo'ze bene' yeseque'ede' le'e dan' chejnilaže'le neda', perw note'tez le'e gwyo gwchejaže'le cont bi cuejyichjle dan' chejnilaže'le neda' žinten gatle, nach šjazyoale len Diosen'.

²³ Še bene' že' to yež yosyolague' le'e, le yeza'teze na' yeyejle ga yoble. Biņa' yeyož šjatižjue'ele xtižan' yogo' yež gan' že' bene' Israel ca' cate' yida' da' yoble, neda' naca' ben' gwse'la' Diosen' golja' benač.

²⁴ 'Ca nac cate' to bene' chsede' len to maestrw, bitw nācho naque' bene' blaoch ca maestroa'. Na' to mos bitw naque' blaoch ca xānen'.

²⁵ Con cheya'la' čazlaže' ben' chseda' še yežinlaže' gaque' ca maestrw čhe' na' cheya'la' čazlaže' mosen' še yežinlaže' gaque' ca xānen'. Neda' naca' xānle, na' bene' chesegue'ede' neda' chesene' chona' txen len Beelzebú dan' nac xān yogo' da' xigüe', na' naquechxe yesene' čhe le'e nacle neda' txen.

Cheya'la' žebcho castigw dan' gon Diosen' čhe bene' güen da' xinj

(Lc. 12:2-9)

²⁶ 'Bitw žeble bene' bite'teze da' yesonde' le'e, le bitwbi de da' ngaše' da' nācho cbi gwlo'elaon, nēca de da' nono nā' neze da' nācho cbi yesenezden'.

²⁷ Da' zan dan' chsd chlo'eda' le'e dan' bi chsd chlo'eda' yeziča'chle bene'. Na' le'e le gwsed le gwlo'en yogo'lo'j bene', na' le gon cont bene' zan yesejni'iden'.

²⁸ Bitw cheya'la' žeble bene' ca' yesot le'e. Legaque' bitw gac bi yesonde' yichjlažda'olen'. Cheya'la' žeble Diosen', le len' nape' yela' gwnābia' cont gwžiaje'e cuerp čhelen' len yichjlažda'olen' lo yi' gabilen'.

²⁹ 'Nezecho byiņe dao' ca' bitw bi zjazaca'tecba', perw bitw nācho toba' gat sin cbi güe' Xacho Diosen' latje.

³⁰ Na' ca nac chio', chaquechgüe Diosen' chio' na' neztede' ba'j yiša' yichj to tocho žia.

³¹ Da'nān', bitw žeble, le zaca'chle clēl ca zan byiņ dao' ca'.

Cheya'la' güe'cho diža' len bene' ye'cho legaque' nombia'czcho Jesucriston'

(Lc. 12:8-9)

³² 'Na' note'teze bene' še cho'e diža' len benačhen' che'ene' chejle'e čhia', lecze ca' neda' gua' diža' len Xa' ben' zoa yaban' yapa'ne' bēna' naque' neda' txen.

³³ Na' note'teze bene' še cho'e diža' len benačhen' che'ene' bitw chejle'e čhia', lecze ca' neda' gua' diža' len Xa' ben' zoa yaban' yapa'ne' bēna' bi naque' neda' txen.

Yesedile bene' neche dan' bid Jesusen'

(Lc. 12:51-53; 14:26-27)

³⁴ Bitw gonle xbab bene' ze' yežlio nga yesezoa yesebeze' binlo len lježgaque' na'a ba bida'. Bitw yesezoa yesebeze' binlo san yesedile'.

³⁵ Lagüe dan' ba bida' yesedil bene' byo len xe' na' no'olen' len xne'e, na' yesedil xo'oliz no'ole len le'.

³⁶ Bene' lo' yo'oze yesegue'e lježe'.

³⁷ Note'tez bene' še chaquechde' xe' o xne'e clcl ca chacde' neda', bitw zaque' gone' txen len neda'. Lecze ca' še chaquechde' xi'ine' clcl ca neda' bitw zaque' gone' txen len neda'.

³⁸ Na' note'teze' še bi chzenague' chia' lagüe' dan' chacde' yosoči yososaca' bene' le', bitw zaque' cont gaque' neda' txen še ca'.

³⁹ Note'teze bene' chacde' gone' cont bi či saque' o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda, ba de yela' mban che' toli tocaņe.

Bene' ca' yesenita' mbalaz cate' yesyežine' yaba

(Mr. 9:41)

⁴⁰ Note'teze bene' chosolebe' le'e chosolebe' neda', lecze chosolebe' Dios ben' gwsele' neda'.

⁴¹ Na' note'teze bene' yebede' gwlebe' bene' cheso'e xtiža' Diosen', mbalaz soe' cate' yežine' yaban' lecze ca mbalaz soa ben' cheso'e xtiža' Diosen'. Na' mbalaz gac che bene' ca' cheson can' chazlaže' Diosen' caten' yesyežine' yaban'. Na' note'teze bene' yebede' gwlebe' legaque' da' chesone' can' chazlaže' Diosen', lecze mbalaz soe' caten' yežine' yaban'.

⁴² Note'teze bene' gwnežjue' la' to xiga'ze nis ye'ej bene' chejnilaže' neda', la' gwnežjuen' bene' bi naque' bene' blao, da' licze gona' cont soe' mbalaz caten' yežine' yaban'.

11

Juanna' gwsele' chope bene' zjanaque' txen len le' gan' zoa Jesusen'

(Lc. 7:18-35)

¹ Cate' beyož ben Jesusen' mandadw can' yeson bene' šižinw ca' gwleje' cont gosaque' le' txen, beze'e latjen'. Na' gweje' yež ca' zjachi' do na' jased jalo'ede' xtiža' Diosen' len bene' ca' že'na'.

² Juanna' ben' bzoe' bene' nis, cana' ba die' ližya. Na' bende' diža' che yogo' dan' chon Criston' ben' gwseła' Diosen' cont yedenabi'e. Nach Juanna' gwsele' chope bene' zjanaque' txen len le' gan' zoa Jesusen',

³ jaseže'ne':

—čLen' naco' ben' chbezto' seła' Diosen', še cheyała' cuezchto' yid bene' yoble?

⁴ Nach Jesusen' gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele.

⁵ Ba ble'ele chona' cont chesyle'e no bene' lchoł, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele hosbana' no bene' guat, na' ba benele choa' diža' güen chia' len bene' yaše' ca'.

⁶ Mbalaz zoa bene' chejle'e chia' na' bi chdebde'.

⁷ Na' cate' besyeya'ac bene' ca' zjanaque' txen len Juanna', nach Jesusen' be'lene' bene' ca' zjandoben' xtiža' Juanna', gože' legaque':

—čNaxce nac ben' jale'ele latje dašen'? čChaque' quil ca'ale? Bi naque' ca'.

⁸ čNac naque' caten' jale'elne'? čNyaze' lache' šagüe'? čše bitw? le bene' zjanyaz lache' šagüe' nite' yo'o güenchgua ca no liž bene' gwnabia'.

⁹ čNoxen' jale'ele? čto ben' choe' xtiža' Diosen'? Da' li cho'e xtiža' Dios, perw žia' le'e, zaca'che' ca note'teze bene' choe' xtiža' Diosen'.

¹⁰ Čhe benga nyojen le'e Xtiža' Diosen', žan:

Neda' Dios seła' to bene' cuialagüe' laguo' güe'e xtižon' cont cate' šejo' ba zjanita' bene' yosozenague' čhio'.

¹¹ Da' li žia' le'e notoch no beņač na' soa bene' naquech bene' blao ca Juanna' ben' bzoe' bene' nis. Perw na' note'tez bene' chzenague' che Diosen' cont nabia' Diosen' yichjlažda'ogüen', la'czla' naque' bene' la'zelagüe bene' bibi zaca', ba chejni'ichde' chia' clcl ca Juanna'.

¹² 'Gwzolaon caten' Juanna' gwduxjue'ede' xtiža' Diosen' na' bzoe' bene' nis na' chžinten na'a, bene' zan chesone' ga zelao chesezaquede' cont nabia' Diosen' yichjlažda'ogaque'.

¹³ Na' lecž gwzolaon cani'te bžinten cate' bla' Juanna' gwduxjue'ede' xtiža' Diosen', ley dan' bzoj da' Moisés na' dan' bosozoj yezica'chle bene' goso'e xtiža' Diosen' bzejni'in chio' che yela' gwnabia' che Diosen'.

¹⁴ Na' Xtiža' Diosen' dan' nyojen žan yid yeto bene' yedeyene' can' ben Elías ben' be' xtiža' Diosen' cani'. Che Juanna' žan ca', con še šejle'le.

¹⁵ Le'e žia nagle da' chene, le gwzenag xtiža'na'.

¹⁶ ¿No gwsaca'lebda' le'e zoale na'a? Gwsaca'lebda' le'e ca bidao' dan' bicze bi chlebele. Nacle ca bidaon' nita' gan' chac ya'a chese' lježbe':

¹⁷ "Ba bcuežto' bžejo, neca bya'ale, na' ba bilyaše'to', neca gwchežle."

¹⁸ Juan ben' bzoe' bene' nis bide' laole nga, bitw güe'ej gwdagwšagüe' can' chese'ej chesagw bene' yoble, nach gw nale che': "Yo'o yaz da' xigüen' yichjlažda'ogüe'."

¹⁹ Na' neda', Diosen' gwsele' neda' golja' benach, na' chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw. Na' lecze žale chia' naca' xmigw bene' güe'chixjw ca' na' xmigw yezica'chle bene' güen da' xinj. Perw nachbia' yela' sina' che Diosen' dan' napt'o' naquen da' güen, le ba ble'eczele can' chon neto' napt'on'.

Yež ca' gan' bitw bosozenague' che Jesúsen'

(Lc. 10:13-15)

²⁰ Nach Jesúsen' be'e xtiža' bene' ca' že' yež ca' gan' bene' da' zan da' zaca' yesyebande', na' gwdi'e' le'gaque' dan' bitw besyetingjde' xto'la'gaquen'. Nach gwne':

²¹ —¡Nyaše'chguaze gac che le'e bene' Corazín! ¡Nyaše'chguaze gac che le'e bene' Betsaida! Bene' ca' nita' Tiro na' Sidón ba besyetingjde' xto'la'gaque' šaca' blo'egacda'ne' yela' guac chia' ca dan' ba blo'eda' le'e. Na' bosoe'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogaquen'.

²² Žia' le'e, saca'zi'chle clel ca bene' že' Tiro na' Sidón cate' žin ža gac juisyw.

²³ Na' le'e nita'le Capernaum chonle xbab šeca Diosen' gone' gacxenchgual'e cate' yežinle yaba gan' zoe'na'. Bi gone' ca', san se'le' le'e lo yi' gabil. Šeca' bena' da' zaca' yesyebane bene' ca' gwnita' Sodoman' can' ba bena' laole nga, zesyetingjde' xto'la'gaquen', na' ne' chi' ciudad' šeca'.

²⁴ Žia' le'e, ga'le'chle clel ca bene' Sodoman' cate' žin ža gac juisyw.

Bene' ca' yesejnilaže' Jesúsen' nite' mbalaz

(Lc. 10:21-22)

²⁵ Nach Jesúsen' bol güiže' Diosen', gwne':

—Xa', le' naco' Xan yežlio nga na' Xan yaba, chnabi'o doxen. Na' chona' yela' choxclen chio' ba bzejni'ido' bal' bene' diža' güen chio' quinga. Bzejni'ido' bene' ca' gosacbe'e cheseyažjde' no gwsed gwlo'e le'gaque'. Na' bitw bzejni'ido' bene' ca' cheson xbab zjanaque' bene' sina' na' bene' zjanajni'.

²⁶ Beno' ca' Xa', le can' gwnalažo'.

²⁷ Na' gože' bene' ca' že'na':

—Xan' ba bene' lo na' gona' cont chombia' bene' le'. Le' nombia'ya'ne' neda', na' neda' nombia'ya'na' le'. Na' bene' ca' ba gwleja' ba zjanombi'e Xan'. Na' noch no zjanita' bene' zjanombi'e Xan', ne neda' ca' zjanombi'e.

²⁸ Le'e chjaxaque'laže'le na' chacayaše'laže'le da' chaquale nac gonle cont soale binlo len Diosen', chata'yoeda' le'e, le šejnilaže' neda'. Neda' gona' ga soale mbalaz.

²⁹ Le gwzenag chia' na' gwzejni'ichda' le'e. Neda' naca' bene' xenlaže' na' bene' šagüe' na' gona' ca soale mbalaz lo' yichjlažda'olen'.

³⁰ Dan' žia' cheya'la' gonle bitw naquen zed, na' can' chsed chlo'eda' bitw naquen zdebe.

12

Ža che Dios bene' ca' zjanaque' Jesúsen' txen goselechje' trigon' da' gosagüe'

(Mr. 2:23-28; Lc. 6:1-5)

¹ Ca tiempen' gozac to ža che Diosa' cate' Jesúsen' gwdie' len bene' ca' zjanaque' le' txen gan' nyaž trigw. Nach bene' ca' gosedone', na' goselechje' dao che trigon' cont gosagüe' xsenna'.

² Na' besele'e bene' fariseon' can' gosone', na' gosi'e Jesúsen':

—Gwnašc žibixchen' bene' ca' zjanaque' le' txen chesone' žin da' bi de šens goncho ža che Dios?

³ Na' Jesúsen' gože' le'gaque':

—¿Bina' gwlable can' ben da' rey Davin' to ža cate' le' na' bene' lježe' ca' gosedone'?

⁴ Gwyo'o Davin' ga nac liž Dios na' gwdagüe' yetextil da' nac che Dios da' bi chac gagw bene' bi nac bžoz, na' lecze bnežjue' che bene' zja'ac len le'.

⁵ Na' žbina' gwlable le'e ley dan' bžoj da' Moisés gan' žan bžoz ca' chesoncze' mandadw che yodao' blaon' yogo' ža che Diosen'? Na' bitw nacho zjanape' dola' dan' chesone' žin ža che Diosen'.

⁶ Žia' le'e, neda' zoa' nga zaca'cha' clel ca yodao' blaon'.

⁷ Xtiža' Diosen' dan' nyojen žan: “Chaclaža' yeyaše' yeži'ilaže'le bene', gague con gotle beyixe' par gonxenle neda'.” Šaca' chejni'ile bi zejenña' žan ca', bilja nale bene' quinga zjanape' dola', le bibi da' mal chesone'.

⁸ Žia' le'e, naquen' lo na' nia' bi da' nac güen goncho cate' nac ža che Diosen', neda' naca' ben' gwseła' Diosen' golja' benach.

Bejac to bene' nxo'on šla'a taque'

(Mr. 3:1-6; Lc. 6:6-11)

⁹ Na' cate' Jesúsen' beze'e latjen', na' gwyo'e to lo' yodao' che chio' bene' Israel.

¹⁰ Na' lo' yodaon' zoa to bene' nxo'on šla'a taque', nach bene' fariseo ca' gose'e Jesúsen':

—¿De ľsens yeyoncho bene' xinj ža che Diosen'?

Gose'ene' ca' cont de da' yosode'ede' yesagüe' xya.

¹¹ Nach Jesúsen' gože' legaque':

—Še nita' xila' dao' chele na' lažo' toba' to lo' yechw zitjw ža che Diosen' cate' bi de ľsens goncho žin, žcbi la' yebejteleba' lo' yechon' lo žana'?

¹² Da'na'na' žia' le'e de ľsens gaclencho bene' ža che Diosen'. Le zaca'ch to bene' clcl ca to xila' dao'.

¹³ Nach Jesúsen' gože' ben' nxo'on taque'na':

—Bli naon'.

Na' blien' na' taquen' beyaquen binlo can' nac dan' yešla'a.

¹⁴ Nach bene' fariseo ca' besyežaše' yodaon' na' bosoxi'e nacle yesone' yesote' Jesúsen'.

To dan' bzoj da' Isaías che Jesúsen'

¹⁵ Gocbe'e Jesúsen' can' bosoxi'a bene' fariseo ca' na' gwze'e gwyeje' ga yoble. Bene' zan ja'aclene' le', nach beyone' yogo' bene' ca' chesacšene.

¹⁶ Na' bene' mandadw nono yesoe'lene' diža' non' beyon legaque'.

¹⁷ Bene' ca' cont goc can' ža Xtiža' Diosen' dan' bzoj da' Isaíasen', žan:

¹⁸ Bengan' naque' xmosa', ben' gwleja' cont gone' can' chazlaža'.

Chacchgüeda' le', na' chbeda' che'.

Na' neda' seła' Spiritw chian' soateze soan len le'.

Na' chixjue'ede' yogo'lol bene' can' chazlaža' yesone'.

¹⁹ Bitw gacyože' len bene', neca yosye'e,

na' neca nie' zižjo lo nez cont yesene bene' bin' že'.

²⁰ Bi gwzoe' ca'ale bene' chesejnilaže' le' late' lasze.

Soe' gaclene' legaque'.

Nach žin ža gone' cont gac con da' zej to ľicha lo yežlion'.

²¹ Na' bene' že' yogo' naciónna' yesebeze' gaclene' legaque'.

Gosene' Jesúsen' bebeje' da' xigüe' len yela' guac che Beelzebú

(Mr. 3:19-30; Lc. 11:14-23; 12:10)

²² Na' zoa to bene' ľchol na' neca goc nie', na' yo'o nyaz da' xigüe' yichjlažda'ogüe' na' jasesane'ne' lao Jesúsen'. Na' Jesúsen' bebeje' da' xigüen' yo'o nyaz yichjlaždao' ben' na' la' bele'etede' na' gocte bene'.

²³ Na' yogo' bene' ca' besele'ede' can' goca' besyebanchgüeda'. Nach gose'e ľježe':

—¿Nac benga ben' chbezcho yide' lao diaža che da' rey David?

²⁴ Perw cate' bene' fariseo ca' gosende' diža' quinga gosene':

—Bitwbi yela' guac nap benga. Le Beelzebú dan' nac xan da' xigüe' ca' chaclenen ľe' cont chebeje' da' xigüe' zjajo'o zjanyaz yichjlaždao' bene'.

²⁵ Gocbe'e Jesúsen' can' goson bene' fariseo ca' xbanen', nach gože' legaque':

—Note'teze gobiern še choje' chop šon cuen na' yeyoža' yesedile' legacze', cuiayi' gobierna'. Na' ľecze še bene' že' bite'teze yež yesaque' chople na' yesedile' legacze', ľecze bi sibia' yež čhegaquen' še ca'. Na' še bene' lo' bite'teze yo'o yesechoje' chople na' yesedile' legacze', gague sša yesenite' txen.

²⁶ Ľecze ca' še Satanásen' yebejen yeto da' xigüe' yo'o nyaz yichjlaždao' bene', cuiayi' yela' chnabia' chen, le chdillen cuinen še ca'.

²⁷ Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', ľecze zejen Beelzebú dan' chnabia' da' xigüen' chaclenen bene' ľježle chesybeje' da' xigüe' zjajo'o zjanyaz yichjlaždao' bene'. Na' bene' ľježle ca'ze chosolo'e cleden' chnele.

²⁸ Spiritw che Diosen' choñen neda' yela' guac cont chebeja' da' xigüe' ca', na' da' chona' ca' chlo'en ba bžin ža nabia' Diosen' yichjlaždao' bene' yosozenag che'.

²⁹ ¿Nac gac šo' bene' gwban liž to bene' gual na' que'e bi da' de che' še bi zgua'tec gwcheje' bene' guala'? Ľete gone' ca' nach gac que'e bi da' de che'.

³⁰ Beñe' bi chone' neda' txen, chone' contr neda'. Na' beñe' bi chaclene' cont yosozenag beñe' yoble chia', zeje diža' chone' par bi yosozenague' chia'.

³¹ 'Da'nan' žia' le'e, yogo' da' xinj da' chon beñach, na' yogo' diža' bya' dan' chesene' che Diosen', Diosen' yezi'xene' čhen, perw note'teze beñe' chñe' yela' ya' čhe Spiritw čhe Diosen', gwbat yezi'xen Diosen' čhe'.

³² Na' note'teze beñe' še ne' yela' ya' chia' neda' naca' ben' gwsela' Diosen' golja' beñach, Diosen' yezi'xene' čhe', perw note'teze beñe' še ne' yela' ya' čhe Spiritw čhe Diosen', gwbat yezi'xen Diosen' čhe' ña'a na' bate'teze.

Diža' da' güe'cho chlo'en bin'yo'o lo' yichjlažda'ochon'

(Lc. 6:43-45)

³³ 'Ca' nac yag frut ca', yag dan' nac yag güen, frut güencze chbian, na' yag da' bi nac yag güen, lečze frut da' bi nac güen chbian. Con can' nac da' chbia to to yaguen' nezecho bi yaga'.

³⁴ Na' ca'czen' nac len le'e nacchgualo beñe' zgot na' beñe' gwxiye'. Bitw gac güe'le diža' šagüe' dan' nacle beñe' laždao' xi'a. Le yogo'te diža' da' chchoj cho'achon', lo' yichjlažda'ochon' nan' za'aquen.

³⁵ To beñe' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to beñe' laždao' xi'a cho'e diža' xi'a, le can' ža lo' yichjlažda'ogüen'.

³⁶ Na' žia' le'e, cate' žin ža gon Diosen' yesežaglaog' yogo' beñe' cheson da' xinj toli tocane, cana' yogo'loj beñe' yosodie' cuent čhe yogo' diža' dan' ba gosoe' da' bitwbi zjazacan'.

³⁷ Na' con ca diža' dan' choe'le, Diosen' čhoglagüen' chele še naple doła' o še bi naple doła'.

Beñe' bi bosozenag čhe Diosen' gosenabe' gon Jesúsen' to yela' guac

(Mr. 8:12; Lc. 11:29-32)

³⁸ Nach bał beñe' ca' chososed chosolo'e dan' bzoj da' Moisés, na' beñe' fariseo ca' gosoe' Jesúsen':

—Maestrw, chaclaže'to' gono' to yela' guac da' le'eto' cont nezeto' še da' licze Diosa' gwsele' le'.

³⁹ Nach Jesúsen' gože' legaque':

—Le'e zoale ña'a nacchgualo beñe' laždao' xi'a na' ba gwlejjichjle Diosen'. Na' chñable gona' yeto yela' guac da' le'ele cont nezele še Diosa' gwsele' neda', perw bi gona' can' chñablana', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonás ben' be' xtižen' cani'.

⁴⁰ Cate' za' šej Jonásen' Nínive, Diosen' bene' cont to beł xen be yo'o lo' nisdaon' gwdebba' le' na' šone ža šone yel gwyo'e lo' le'eban'. Na' ca' nac neda', gata' na' gaša', na' yeyoža' šo'a lo' ba šone ža šone yel.

⁴¹ Na' cate' žin ža gon Diosen' cont yogo' beñe' cheson da' mal yesežaglagüe' toli tocane, žana' beñe' Nínive beñe' ba gosat yedescuiše' le'e mbanle' ña'a lao Diosen', le' legaque' besyetiñjde' xtolen' cate' da' Jonásen' gwđixjue'ede' xtiža' Diosen' len legaque'. Na' neda' zoa' nga naccha' beñe' blao clel ca da' Jonásen', na' bitw chzenagle' chia'.

⁴² Na' lečze žana' cate' gon Diosen' cont yogo' beñe' cheson da' mal yesežaglaogüe' toli tocane, da' no'olen' gwnabia' beñe' Seba ca' yedecuiše' le'e mbanle' ña'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' beñe' blao clel ca da' rey Solomónna', na' bitw chzenagle' chia'.

Da' xigüen' cheyo'on da' yoble lo' yichjlaždao' beñe'

(Lc. 11:24-26)

⁴³ 'Na' še to da' xigüe' da' yo'o nyaz lo' yichjlaždao' beñe' yechojen, nach lažen nile naye yeyiljon ga soan mbalaz. Na' še bibi latje zelen, nach nan:

⁴⁴ 'Da' yoble šjajo'a lo' yichjlaždao' ben' gan' ba gwyo'a." Nach yeyejen da' yoble gan' zoa ben'. Cate' le'en bačh beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble,

⁴⁵ nach šjajtoben yegaže' da' xigüe' da' zjanaquech mal ca len, na' txen yeso'on lo' yichjlažda'ogüen'. Na' še ba gosonen ca', na' gaquech mal čhe bena' clel ca goc čhe' cana'. Can' goc čhe' bena', lečze ca' gac čhe' le'e mbanle' ña'a dan' nactecle beñe' laždao' mal.

Xña' Jesúsen' len beñe' biše' ca' besežine' ga zoe'

(Mr. 3:31-35; Lc. 8:19-21)

⁴⁶ Ne' choe'te Jesúsen' diža' len beñe' quinga, cate' bžin xñe'e len biše' ca'. Gosaclaže' yesoe'lene' yesoe'lene' le' diža' na' beñe' zan nita' lagüe' na'ate.

⁴⁷ Beñe' ca' že' na', toe' gože' Jesúsen':

—Xña'o len beñe' bišo' ca' zjanite' chy'o' na' chesaclaže' yesoe'lene' le' diža'.

⁴⁸ Nach Jesúsen' gože' le':

—¿Nezele no nac xña'a na' no zjanac biše' lježa'?

⁴⁹ Nach bli ne'e blo'e beñe' ca' zjanaque' le' txen na' gože' bena':

— Bene' quinga zjanaque' xña'a na' zjanaque' biše' lježa'.

⁵⁰ Le note'teze beñe' chone' da' chnaláže' Xa' Diosen' ben' zoa yaban', bena' nac beñe' biša', beñe' zana', lecze naque' xña'a.

13

Jempl che beñe' goz trigon'

(Mr: 4:1-9; Lc: 8:4-8)

¹ Na' lo žana' gwza' Jesúsen' yo'o gan' zoen' jači'e cho'a nisaon'.

² Nach catec beñe' zan juisyw besedobe' gan' či'en' na' benten byen gwyo'e gwchi'e to lo' barcw. Na' yogo' beñe' ca' besedoben' gosenite' cho'a nisaon' ga nac yo biž.

³ Nach da' zan da' bsd blo'e Jesúsen' legaque' len jempl da' bi'e. Na' be'e to jempl, gwne':

— To beñe' güen žin jeze' trigw,

⁴ na' šlac zej chose' trigon' late' biñ che trigw dan' chazen' jasechazen chanez, nach be ca' žia xil be chaš le'e yaba gosagwban'.

⁵ Yelaten' jasechazen ga nac lo yej ga bibi yotec zoa, na' da' nga byob blan' le bi jasechazen ga nac sitjw.

⁶ Perw na' cate' bla' gwbiža' na' bzeyen len na' gosebizen, le gague zjajo'otec loenna' sitjw.

⁷ Yelaten' jasechazen ga nac lo yag yeše', na' yag yešen' gosecha'on na' bosololen len.

⁸ Perw na' yelaten' jasechazen ga nac yo šagüe' na' beselan'. Na' balen' gosebian to gayoa güeje to ton, na' yebalen gosebian gayon güeje, na' yebalen šichoa güeje.

⁹ Le'e žia nagle da' chene, le gwzenag xtižan'.

Jesúsen' be'e diža' bixchen' bzejni'ide' beñe' jempl

(Mr: 4:10-12; Lc: 8:9-10)

¹⁰ Nach beñe' ca' zjanaque' Jesúsen' txen gosebigue' lagüen', na' gose'ene':

— Ž Bixchen' chsd chlo'edo' beñe' quinga len jempl?

¹¹ Na' gož Jesúsen' legaque':

— Nono na' ñeze can' nac yela' gwnabia' che Diosen', na' ba chone' cont le'e chejnilaže'lene' ñezelen. Perw bi chon Diosen' ca' len beñe' bi chesclaže' yesejnilaže'ne'.

¹² Note'teze beñe' chosozenague' xtiža' Diosen', gwzejni'ich Diosen' legaque' cont šanch dan' yesejni'ide'. Perw na' note'teze beñe' bi chosozenague', da' daon' ba zjanezde', yeca'a Diosen' len.

¹³ Da'n'an' chsd chlo'eda' beñe' quinga len jemplen', le chesele'ede' dan' chona' perw bitw chesache'ede' bi zejen, na' chesende' xtižan' perw bitw chesejni'iden'.

¹⁴ Len beñe' quinga ba chac can' bzoj da' Isafas, žan:

Da' li yenele, perw bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

¹⁵ Nacle beñe' güedenag na' bačh natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle beñe' güedenag.

Šaca' bi nacle beñe' güedenag, šejni'ile bi zejen dan' chenele na' dan' chle'ele.

Nach yetinjele xtoła'le cont yeca'an na' yocoba' yichjlažda'olen'.

¹⁶ Perw le'e nacle neda' txen, leca mbalaz zoale dan' chle'ele da' ca' chona' na' chache'ele bi zejen, na' chzenagle xtižan' na' chejni'ilen.

¹⁷ Da' li žia' le'e, zan da' beñe' ca' gosoe' xtiža' Diosen' cani' na' zan da' beñe' ca' yezica'chle beñe' bosozenag che Diosen' cani', gosaclaže'chgüe' yesele'ede' dan' chle'ele na'a, perw bitw gola' yesele'eden'. Na' gosaclaže'chgüe' yesende' dan' chenele na'a, perw bitw gola' yesenden'.

Jesúsen' bzejni'ide' bi zejen jempl che ben' goz trigon'

(Mr: 4:13-20; Lc: 8:11-15)

¹⁸ Na' le gwzenag, quinga zejen jempl che ben' goz trigon'.

¹⁹ Ca dan' byažen zejen xtiža' Dios da' chzejni'i che yela' gwnabia' che'. Na' biñ dan' beselažo' chanezen', zejen beñe' ca' chesende' xtiža' Diosen' perw bi chesejni'iden'. Na' ca cheyoža' chžin gwxiy'en' chebejen xtiža' Diosen' lo' yichjlažda'ogaquen'.

²⁰ Na' biñ dan' beselažo' ga nac lo yej na' bi ben loen, zjanaquen ca beñe' la' chesyebetede' xtiža' Diosen' cate' chesenden',

²¹ perw zjanaque' ca da' bibi loe chontec, šložga cheseje'le'e che xtiža' Diosen', na' cate' chac bi da' mal chegaquen' o cate' chesegue'e beñe' legaque' dan' chosozenague' xtiža' Diosen', la' chesebjichjte' xtižen'.

²² Na' biñ dan' beselažon' ga nac lo yag yeše', zejen ca bene' ca' ba zjanende' xtiža' Diosen', perw šlac zjambane' chesyelał chesyžejde' na' da' chesacłaže' yeseni'e chziye'en legaque'. Yogo' da' qui bi choen' latje yega'an xtiža' Diosen' lo' yichjlažda'ogüen', na' da'nan' bi chesejnilaže' le' ca cheyala'.

²³ Na' biñ dan' beselažo' lo yo šagüe' zejen ca bene' chesende' xtiža' Diosen' na' chesejni'iden' na' chosozenaguen'. Bałen gosebian to gayoa güeje, na' yebałen gosebian gayon güeje, na' yebałen šichoa güeje.

Jempl che trigon' na' yixe'

²⁴ Na' gozoe'len Jesúsen' bene' ca' yeto jempl, goze'e legaque':

—Yela' gwnabia' che Diosen' ben' zoa yaban' zaca'leben ca dan' goquen' cate' to bene' jeze' trigw lo yežlio che'na'.

²⁵ Na' do šeže'le gwyej to bene' chgue'e le' šlac chesetas bene' ca' yezica'chle na' jeze' xsa yixe' gan' ba naz xan yežlion' trigon', nach beze'e.

²⁶ Na' to ši'ize trigon' len yixe' ca' beselan', na' trigon' gwzolao chbian.

²⁷ Na' bene' güen žin che xan yežlion', cate' gosacbe'ede' nach jaya'aque' gan' zoa xangaque' jasyeyeže'ne': "Bene', čgague biñ trigon' goz yežlio čhion'? čBixčhen' nčhixen len yixe'?"

²⁸ Nach xangaquen' gože' legaque': "To bene' chgue'e neda' jen ca'." Nach xmosen' gose'ene': "čChe'ndo' lažo'to' yixen'?"

²⁹ Na' gože' legaque': "Bitw lažo'len. Le xož lažo'le lente trigon'.

³⁰ Jaseyenna'. Guac yesecha'on txen. Na' cate' ba gole' yotoble cosešen', cana' gona' mandadw zgua'tec lažo'le yixen' na' gonlen manoj cont yeseyen. Nach šjajyoble trigon' co'ošagüe'len."

Yela' gwnabia' che Diosen' naquen ca biñ che xomdas

(Mr. 4:30-32; Lc. 13:18-19)

³¹ Nach gozo'e yeto jempl, gozne':

—Šanch bene' yosozenag che Diosen' cont nabi'e yichjlažda'ogaque'. Da'nan' yela' gwnabia' che Diosen' ben' zoa yaban' zaca'leben ca to biñ che xomdas dan' goz to bene' yežlio chen'.

³² Biñ che xomdasen' chnabia' nac da' dao' len biñ ca' chazcho. Perw na' cate' chlan' chcha'očen ca bichle yixe' cuan na' chaquen ca to yag cha'o, nach byin' dao' ca' chjasen ližda'ogacba' lo xozenna'.

Yela' gwnabia' che Diosen' naquen ca levadura

(Lc. 13:20-21)

³³ Nach gozoe' Jesúsen' yeto jempl, gozne':

—Yela' gwnabia' che Diosen' ben' zoa yaban' zaca'leben ca levadura dan' gwlec no'olen' len to rob yezj cont gwcha'o doxenen.

Jesúsen' bzejni'ide' bene' len jempl

(Mr. 4:33-34)

³⁴ Yogo' da' quinga bsd blo'e Jesúsen' bene' ca' besežag gan' zoe'na'. Bsd blo'ede' legaque' be'e jempl, bitwbi bzejni'ide' legaque' sin ca be'e jempl.

³⁵ Bene' ca' cont goc can' bzoj da' bene' be' xtiža' Diosen' cani', žan:

Gwsed gwlo'egacda'ne' len jempl,

na' yapegaca'ne' dan' nono na' neze da' ba ngaše' cate' gwxcete yežlion'.

Jesúsen' bzejni'ide' bi zeje jempl che trigon' na' yixe'

³⁶ Nach beyož bsd blo'e Jesúsen' bene' ca' zjaže' na', beze'e txen len bene' ca' zjanaque' le' txen jaya'aque' yo'o gan' nite'na'. Na' cate' ba besyeyo'e lo' yo'on' bene' ca' zjanaque' le' txen gosebigue' cuite'na' gose'ene':

—Bzejni'isque neto' bi zejen jempl che trigon' na' yixen'.

³⁷ Nach Jesúsen' gože' legaque':

—Quinga zejen: Diosen' gwsele' neda' golja' beñach na' zaca'lebda' ca ben' goze' biñ che trigon'.

³⁸ Na' doxen yežlio nga zaca'leben ca pedas yežlio gan' goze' trigon'. Na' bene' ca' chosozenague' che Diosen' cont nabi'e yichjlažda'ogaque' zaca'lebde' ca biñ che trigon'. Na' bene' ca' chosozenague' che Satanás dan' chnabia' da' xigüe' ca' zjazaca'lebde' ca xsa yixen'.

³⁹ Satanásen' zaca'leben ca bene' chxi'a ben' goze' xsa yixen'. Na' žan' gac juisyw zaca'leben ca žan' yosyotobe' trigon'. Na' angl ca' zaca'lebegaque' ca bene' ca' yosyotobe' cosešen'.

⁴⁰ Na' can' šey yixen' yosyotoben', can' gac che bene' ca' chosozenag che Satanásen' cate' žin ža gac juisyon'.

⁴¹ Diosen' gwsele' neda' golja' beṇaḥ na' cate' žin ža, neda' seļa' angl chia' ca' cont yosyotobe' yogo' bene' ca' chesego'oyele' bene' yoble yesone' da' mal na' lecze yosyotobe' yezica'chle bene' cheson da' mal. Na' angl ca' yesyebeje' legaque' cont bich yesenite' txen len bene' ca' chosozenague' che Diosen' cont nabi'e yichjlažda'ogaquen'.

⁴² Nach yesesele' legaque' lo' yi' gabil' gan' yeseye' toli' tocane. Na' yesebežyaše' yesagwxejte laye' tantw yesežaglaochgüe'.

⁴³ Cana'ch Xacho Diosen' gone' cont bene' ca' cheson da' güen nite' len le', le zjanaque' xi'ine' na' yesaque' ca' be'ni' che gwbižen' cate' yesežine' yaban' gan' zoa Diosen' chnabi'e. Le'e žia nagle da' chene, le gwzenag xtiža'na'.

Jempl che mechw xen dan' ngaše' lo' yo

⁴⁴ Yela' gwnabia' che Diosen' ben' zoa yaban' naquen ca to mechw xen dan' ngaše' lo' yo. To bene' bželde' mechw xen dan' ngaše' to lo' yežlio. Nach bocuašen' da' yoble lecze na'ze na' chebechgüede' beze'e jayete' yogo'lo' bi da' de che' cont gwxi'e yežlion' gan' ngaše' mechua'.

Jempl che to perla da' zaca'chgua

⁴⁵ Na' yela' gwnabia' che Diosen' ben' zoa yaban', lecze zaca'leben ca da' nga goc. Zoa to comerciant bene' cha'o perla dan' zjanacchgua xdan.

⁴⁶ Na' bželde' to perla da' leca zacan'. Na' beyote' yogo'lo' bi da' de che' na' gwxi'e perlan'. Ca'czen' zaca'lebe bene' ca' chesacbe'e zaca'chguan yosozenague' che Diosen'.

Jempl che yixjw bel

⁴⁷ Na' yela' gwnabia' che Diosen' ben' zoa yaban' zaca'leben ca da' nga goc. Gwnita' bal bene' gwxen bel na' bosozale' yixjw bel chegaquen' lo' nisdaon' na' gwixenen zan cuen bel.

⁴⁸ Nach cate' ba gwža' lo' yixjon', besyebejen' yo biž, na' gosebie' be ca' zjanac güen par yesagüe' na' gosegüe'eba' lo' žome. Na' be ca' bi zjanac güen, gosecho'one'ba'.

⁴⁹ Ca'czen gac che yogo' bene' cate' žin ža te che yežlion'. Angl ca' yesebeje' bene' mal ca' ladjo bene' ca' zjanaque' bene' güen lao Diosen'

⁵⁰ Na' yosozale' legaque' lo' yi' gabil' gan' yesebežyaše' na' yesagwxejte laye' dan' leca yesežaglagüe'.

Xtiža' Diosen' dan' byoj cani' len da' chsed chlo'e Jesúsen'

⁵¹ Nach Jesúsen' gože' bene' ca' zjanaque' le' txen:

—¿Zyejni'ile yogo' da' ca' ba blo'eda' le'e?

Nach gose'ene':

—Zyejni'iton'.

⁵² Nach gož Jesúsen' legaque':

—Note'tezle še chac chsed chlo'ele Xtiža' Diosen' dan' byoj cani', še lecze chzenagle can' chsed chlo'eda' che yela' gwnabia' che Diosen', nachen' zaca'leble ca to xan yo'o bene' nape' yogo'lo' da' zaca' dan' chyažj chchinde', balen zjanaquen da' cobe na' balen zjanquen da' gole.

Bene' yež Narzaret bi gosejle'e che Jesúsen'

(Mr: 6:1-6; Lc: 4:16-30)

⁵³ Nach cate' beyož be' Jesúsen' jempl ca', beze'e latjen' len bene' ca' zjanaque' le' txen

⁵⁴ jaya'aque' laže'. Na' jaysed jaylo'ede' bene' gualaž che' ca' lo' yodao' chegaquen'. Na' leca besyebande' len xtižen' na' gose' lježe':

—¿Ga jasede' yela' sina'? na' ¿nacxechen' chac chone' yela' guac ca'?

⁵⁵ Nombia'chone', le naque' xi'in ben' chonšagüe' yag. Na' xne'ena' lie' María, na' Jacobo, José, Simón na' Judas zjanaque' bene' biše'.

⁵⁶ Na' lecze bene' zane' ca' nite' lažcho nga. ¿Nacxe chaquen' cho'e diža' ca' na' chacte' chone' yela' guac?

⁵⁷ Na' dan' gosone' xbab nac Jesúsen' con to bene' gualaž chegaque', bi gosaclaže' yesejle'e che'. Na' gož Jesúsen' legaque':

—Yogo'ze bene' chonla'ane' bene' choe' xtiža' Diosen', perw bene' gualaž che' na' bene' lo' yo'o che' bi chesonla'ane' le'.

⁵⁸ Na' to chopez yela' guac ben Jesúsen' Nazareten' dan' bitw gosejle'e che'.

14

Quingan' goc gosote' Juan ben' bzoa bene' nis

(Mr: 6:14-29; Lc: 9:7-9)

¹ Na' ca tiempen' Herodes ben' naque' gobernador che distritw Galilean', bende' diža' ca nac yogo'lo' dan' chon Jesúsen'.

² Nach gože' xmose' ca':

—Bengan' da' Juanna', ben' bzoa bene' nis. Ba bebane' ladjo bene' guat ca', da' nan' chaque' chone' yela' guac.

³⁻⁴ Herodesen' gwne' ca' dan' bene' mandadw gosote' da' Juanna'. Quingan' goc: Herodesen' beque'e Herodias ca' xo'ole' la'czla' Herodias naque' xo'ole' bene' biše' Felipe. Na' Juanna' gože' Herodesen':

—Bi cheyala' soalen no'ol che bene' bišon'.

Na' dan' gož Juanna' Herodesen' ca', da' nan' Herodesen' bene' mandadw gosezene' Juanna' na' bosocheje' ni'a ne'e len gden lo' ližya gan' gosegüe'ene'.

⁵ Herodesen' goclaže' gote' Juanna', perw bitwbi bende' le', le gwnezde' bene' zan chesejle'e Juanna' cho'e xtiža' Diosen', na' bžebe' bi yeson bene' ca'.

⁶ Perw na' cate' gosone' ĩnin' ža la Herodesen', bi' no'ol che Herodias bya'abe' lao bene' ca' ja'ac ĩnin'. Na' leca bebe Herodesen' can' bya'a no'ol güegon',

⁷ na' bzoe' Diosen' testigw che' gwnežjue'be' bite'teže nabebe' le'.

⁸ Na' gwlo'oyela' xna'ben' lebe' cont gožbe' Herodesen':

—Ben neda' to lo' platw yichj Juan ben' chzoa bene' nis.

⁹ Ne late'ze bi gwyazlaže' rey Herodesen' gone' can' gož no'ol güegon' le', perw bačhle bzoe' Diosen' testigw che' lao bene' ca' jasa'ac ĩnin' gwnežjue'be' bite'teže nabebe' le', da' nan' benšaze' mandadw gac can' gwñabebe' le'.

¹⁰ Ca' goquen' bene' mandadw jasechogue' yen Juanna' lo' ližya gan' yo'ena'.

¹¹ Na' bosožie' yichjen' to lo' platw cont bosonežjuen' no'ol güegon' na' lebe' bnežjwben' xna'be'.

¹² Nach bene' ca' zjanaque' txen len da' Juanna' jasyexi'e cuerp čhen' na' jasecuašen'. Gwde na' ja'aque' gan' zoa Jesúsen' jaseže'ne' can' ba goquen'.

Bguagw Jesúsen' gayo' mil bene'

(Mr. 6:30-44; Lc. 9:10-17; Jn. 6:1-14)

¹³ Na' cate' bene' Jesúsen' can' goc che' da' Juanna', beže'e latjen' len bene' ca' zjanaque' le' txen na' besyeyo'e to lo' barcw par ja'aque' to latje daš na' nono nochle ja'aclen legaque'. Perw bene' ca' že' yež ca' zjachi' cho'a nisdakon' cate' gosende' ba zjada Jesúsen', na' gosa'ac lažgaque' ja'aque' yo' biž jasešague' Jesúsen'.

¹⁴ Na' cate' bžin Jesúsen' cho'a nisdakon', ble'ede' nita' bene' zan na' beyaše' beži'ilaže'de' legaque'. Na' beyone' yogo' bene' ca' chesacšene'.

¹⁵ Na' cate' ba chxoa gwbiž gosebiga' bene' ca' zjanaque' le' txen lagüen', na' gose'ene': —Zoacho to latje ga bibi de, na' ba nac bagwže' par gagwcho xgüe. Bze bene' quinga diža' cont šjaya'aque' yež dao' ca' dan' zjachi' gała'ze šjasediljue' da' yese'ej yesagüe'.

¹⁶ Nach Jesúsen' gože' legaque':

—Bitw cheyala' šjaya'aque', san le'e güe'elne' da' yesagüe'.

¹⁷ Nach gose'ene':

—Chopga beł ya'a čechon' de na' gayo'ga yetextil dao'.

¹⁸ Nach Jesúsen' gože' legaque':

—Le šjaxin' ni.

¹⁹ Nach ben Jesúsen' mandadw gosebe' bene' zan ca' lo' yixyen'. Na' gwxi'e yetextil ca' gayo' na' beł ya'a ca' čhope, na' gwne'e yabale be'e yela' choxclen che Diosen', na' bzoxjen' be'en bene' ca' zjanaque' le' txen cont goseyisen' len to to bene' ca'.

²⁰ Na' yogüe' gosagüen' na' goseljde'. Na' bososše'e šižinw žome len yetextil bixjw len late' güeje beł dan' bega'anna'.

²¹ Na' bene' ca' gosagw da' ca' zjanaque' ca' do' gayo' mil bene' byo, bi cuent no'ol ca' len bidao'.

Jesúsen' gwze'e lo' nisdakon'

(Mr. 6:45-52; Jn. 6:16-21)

²² Gwde na' Jesúsen' bene' byen besyeyo'o bene' ca' zjanaque' le' txen lo' barcon' cont gosebialagüe' besyelaque' yešla'ale nisdakon' šlac bega'an le' besele' bene' ca' ližgaque'.

²³ Na' beyož besele' bene' ca' ližgaque', gwlo'e' to lo' ya'a jał güiže' Diosen' tože'. Na' cate' gol, toz Jesúsen' zoe' lo' ya'an.

²⁴ Na' ca' nac barcon' gan' zeseyo'o bene' ca' zjanaque' Jesúsen' txen, ba zejen do gachol nisdakon' nžiga'ses nisen' len dan' chas chata' nisdakon', le' ben' chechjen' clele.

²⁵ Na' do šbal beyetj Jesúsen' ya'ana' na' gwze'e lo' nisdakon' na' ba zejgale' gan' zja'aquen'.

²⁶ Nach cate' besele'ede' le' zeje' lo' nisdakon' leca besežebe', na' bososye'e gosene':

—jše da' chda chelen' chle'echo!

²⁷ Na' la' boł güižte Jesúsen' legaque', gože'ne':

—Le gončhach laže'le. Neda'na'. Bitw žeble.

²⁸ Nach Pedroa' gože'ne':

—Xanto', še da' li le'na', ben mandadw sa'a lo nisaon' yida' gan' zon'.

²⁹ Nach gož Jesúsen' le':

—Da, Pedro.

Na' la' bchojte Pedroa' lo' barcon' gwzolao gwze'e lo nisaon' zeje' gan' zoa Jesúsen'.

³⁰ Perw na' cate' gocbe'ede' chehjhchgua ben', bžebe' na' gwzolao chebe' lo' nisen'. Nach bosye'e, gože' Jesúsen':

—Xana', bosla neda'.

³¹ Na' la' blite na' Jesúsen' beḡue'ne', na' gože'ne':

—¿Bixchen' chac chopdo'? Gwyejle'ch chia'.

³² Nach cate' beyo'o Jesúsen' len Pedroa' lo' barcon', la' gwlezte be'na'.

³³ Na' bene' ca' že' lo' barcon' bosozoa xibe' lao Jesúsen' gosonxene'ne', gose'ene':

—Da' licze len' naco' doguale Xi'in Diosen'.

Jesúsen' beyone' bene' chesacšene ben' nita' Genesaret

(Mr: 6:53-56)

³⁴ Na' goselague' nisaon' na' besežine' yežlio gan' nzi' Genesaret.

³⁵ Na' cate' bene' Genesareten' besyeyombi'e Jesúsen', goseyise' diža' yogo' yež ca' dan' zjachi' gala'ze cont gosenezde' ba bžin Jesúsen' lažgaque'. Na' bene' ca' že' yež ca' goseche'e yogo' bene' chesacšene lao Jesúsen'.

³⁶ Na' goseneyoede' Jesúsen' gwnežjue' latje yesoḡe' la'ch late'ze xni'a xen'. Na' yogo' bene' gosoxen' besyeyaquede'.

15

Diža' mal dan' chchoj cho'achon' chonen cont lažda'ochon' bi naquen xilaže' len Diosen'

(Mr: 7:1-23)

¹ Na' bał bene' fariseo ca' na' bene' ca' chososed chosolo'e dan' bzoj da' Moisésen' gosa'aque' Jerusalénna' na' besežine' gan' zoa Jesúsen', na' gose'ene':

² —¿Bixchen' bene' ca' zjanaque' le' txen bitw zjana'ogüe' da' cheson bene' gol ca'? ¿Bixchen' cbi chosyone'e zan ni'a cate' za' yesagüe'?

³ Nach Jesúsen' gože' legaque':

—Na' le'e ¿bixchen' chbeyjichjle cbi chonle can' ža Diosen' cheyała' goncho san chonxen costumbr chelen'?

⁴ Diosen' none' mandadw can' goncho, gwne': "Le gap bala'an ḡaxna'le", na' "Note'teze' še chnešaše' len ḡaxne'e cheyała' gate'."

⁵ Perw le'e žale guaque ye' to bene' ḡaxne'e: "Bibi de goḡa' gaclena' le'e, le yogo' da' de chia' ba bnežjuan' lo' na' Dios."

⁶ Na' žale bich bi cheyała' gwnežjue' ḡaxne'en še ca'. Na' dan' žale ca', chzoale ca'ale dan' ža Diosen' na' con na'ole costumbr gole che da' xozxta'ole ca'.

⁷ Le'e nacle bene' gwxiye'. Chonle cayanen' bzoj da' Isaíasen' chele, gan' žan:

⁸ Bene' qui chesonxene' neda' len diža' cho'a, perw bi chesonxene' neda' len lažda'ogaque'.

⁹ Bibi zejen dan' chesonxene' neda',

le dan' chososed chosolo'eden' naquen da' chnalaže' benaḡche.

¹⁰ Nach Jesúsen' bozoł güiže' bene' ca' zjanžaguen' cont gosebigue' lagüen' na' gože' legaque': —Le gwzenag da' nga nia' le'e na' le šejni'i.

¹¹ Bitw nacho dan' che'ej chagw benachen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenna' chonen cont lažda'ogüen' bi naquen xilaže'.

¹² Nach gosebiga' bene' ca' zjanaque' Jesúsen' txen lagüen' gose'ene':

—¿Bi gocbe'edo' bene' fariseo ca' beseže'e cate' gosende' txižo'na'?

¹³ Na' gož Jesúsen' legaque':

—Gwžin ža cate' Xa' Diosen' ben' zoa yaban' gwžiaye'e yogo'loł bene' bi chosozenag che'. Gwžiaye'e legaque' can' choncho cate' chlažo'cho yiḡe' ca' chesela'ac lo' yel.

¹⁴ Jaseye bene' fariseo ca'. Zjanaque' ca' to bene' lchol bene' che'nde' cue'e nez yeto bene' lchol. Nezecho to bene' lchol bitw gac cue'e nez yeto bene' lchol, le txen šjasebiḡe' to lo' yechw.

¹⁵ Nach Pedroa' gože' Jesúsen':

—Bzejni'išque neto' bi zejen can' gwnaon'.

¹⁶ Nach gož Jesúsen' legaque':

—¿Lencze le'e bitw chejni'ile da' quinga ba gwnia'?

¹⁷ ¿Bi nezele yogo' dan' che'ej chagw benachen' cho'on lo' li'e na' chžin hor cheden?

¹⁸ Perw yogo' diža' dan' chesoe' benachen' chesechojen lo' yichjlažda'ogüen'. Na' še choe' bene' diža' mal, len chonen cont bi nac lažda'ogüen' xilaže' len Diosen'.

¹⁹ Le lo' yichjlaždao' beñachen' nan' chchoj yogo' xbab mal cate' žan yesone' da' mal quinga: yesote' bene', yesata'lene' no'ol bi nac xo'olgaque' o bene' byo bi nac bene' chegaque', na' yesone' gwban, yeso'e diža' güenlaže' che lježgaque', na' yesene'e che bene'.

²⁰ Xbab mal ca' chesonen' cont bi nac laždao' bene' xilaže' len Diosen', gague dan' bi chone'e zan ni'a cate' za' gagüe'.

To no'ole bi naque' bene' Israel chejnilaže' Jesúsen'

(Mr. 7:24-30)

²¹ Beza' Jesúsen' latjen' len bene' ca' zjanaque' le' txen jaya'aque' distritw Galilea gala'ze gan' mbane ciuda Tiro na' ciuda Sidón.

²² Na' to no'ole zoa do na', ben' bi naque' bene' Israel, gwze'e laže' cont bžine' gan' zoa Jesúsen' na' jašague' ne'. Na' gwne' zižje, gože'ne':

—Xana', le' naco' xi'in diaža che da' rey David. Beyaše'sque neto'. To bi' no'ol chia' yo' o nyaz da' xigüe' yichjlažda'obe' na' leca chžaglaobe'.

²³ Perw Jesúsen' bitw boži'e xtiža' no'olen'. Nach bene' ca' zjanaque' Jesúsen' txen gosebigue' cuite'na' na' gosata'yoede' le' gose'ene':

—Boži'išca no'olen', le con nagüe' chio' choł güiže' le' zižje cont gacleno'ne'.

²⁴ Nach gož Jesúsen' legaque':

—Diosen' gwsele' neda' cont chaclena' bene' Israel gualaž checho na'ze, le legaque' zjazaca'lebe' ca xila' dao' be zjanaczje.

²⁵ Nach no'olen' gwbigue' bzoa xibe' lao Jesúsen', na' gože'ne':

—Xana', goclenšca neda'.

²⁶ Nach gož Jesúsen' le':

—Bitw naquen güen yeca'acho yela' guagw che xi'incho na' gwnežjwchon gagw beco' ca'.

²⁷ Nach gože'ne':

—Leczdo' Xana'. Perw beco' ca' guac yesagwba' bla'a dao' da' cheselažo' lo yo.

²⁸ Nach Jesúsen' gože'ne':

—No'ole, leca chejnilažo' neda'. Guaclencza' le' can' chaclažon'.

Na' la' beyacte xi'in no'olen'.

Jesúsen' beyone' bene' zan bene' chesacšene

²⁹ Beza' Jesúsen' latjen' len bene' ca' zjanaque' le' txen goso'e nezen' dan' chde gala'ze cho'a nisdao' Galilean'. Nach gosepe' to lo ya'a jasechi'e lo ya'ana'.

³⁰ Na' besežin bene' zan lo ya'a gan' zoa Jesúsen' len bene' ca' zjanaque' le' txen. Zjanche'e no bene' nxinj ni'e, bene' lchoł, bene' bi chac nie', bene' bi zoa ni'a na'gaque', na' len bene' chese'e gwde gwdele yižgüe', na' bosonite' legaque' xni'a Jesúsen'. Na' Jesúsen' beyone' yogüe'.

³¹ Na' leca besyebane bene' ca' cate' besele'ede' can' besyene' bene' ca' bi gosac yesene, na' besyeyac bene' bi zjazoa ni'a na'gaque', na' besyeda bene' nxinj ni'e, na' besele'e bene' lchoł ca'. Nach gosonxene' Diosen' ben' chonxen chio' bene' Israel.

Jesúsen' bguagüe' tap mil bene'

(Mr. 8:1-10)

³² Gwde na' Jesúsen' goxe' bene' ca' zjanaque' le' txen na' gože' legaque':

—Cheyaše' da' bene' qui, le ba goc šone ža zjanite' nga len neda', na' bibi de da' yesagüe'. Na' bi chaclaža' yosa'ane' sin cbi yesagüe' cont bi yesečholde' chanez.

³³ Nach legaque' gose'ene':

—Gan' zoacho nga naquen to latje daš ga bibi de. ¿Gaxe želecho da' yesagw yogo' bene' quinga?

³⁴ Nach gož Jesúsen' legaque':

—¿Gaca' yetextilen' de chele?

Nach gose'ene':

—Gažga yetextil dao' zjade na' to chopga beł ya'a dao'.

³⁵ Nach Jesúsen' bene' mandadw yesebe' bene' zan ca' lo yon'.

³⁶ Na' gwxi'e yetextil ca' gaže na' len beł ya'a dao' ca', nach be'e yela' choxclen che Diosen', nach bzojxen' bnežjuen' bene' ca' zjanaque' le' txen na' legaque' bosonežjue' che yogo' bene' nita' na'.

³⁷ Na' yogüe' gosagüe' goseljde'. Gwdena' bososse'e yegaže žome len late' güeje yela' guagw dan' bega'anna'.

³⁸ Na' bene' ca' gosagw yetextilen' len bełen' nac tap mil bene' byo, na' bi cuent no'ole ca' len bidao' ca'.

³⁹ Nach beyož besela' Jesúsen' bene' ca' ližgaque', na' beyo'e to lo' barcw len bene' ca' zjanaque' le' txen na' ja'aque' distritw gan' nzi' Magdala.

16

Gosenabde' Jesúsen' gone' to da' yesele'ede' le'e yaba

(Mr. 8:11-13; Lc. 12:54-56)

¹ Na' goquen' bal bene' fariseo ca' na' bene' saduceo ca' gosebigue' gan' zoa Jesúsen', na' cont yesagüe' xya che' gosenabe' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'.

² Nach Jesúsen' gože' legaque':

—Cate' chle'ele chexna le'e yaban' šeže'le nach žale: “Yeža'a gwxe dan' chexna le'e yaban'.”

³ Na' cate' chle'ele zete bejw xna le'e yaban' do cheni' nach žale: “Guac yejw zag, le ze bejw xna le'e yaban'.” Nacle bene' gwxiye', le nezele še guac yejw zag o še guac zeye' caten' chle'ele can' nac le'e yaban', perw bi chache'ele bi zejen da' ca' chon Diosen' tiemp nga zoacho na'a.

⁴ Le'e zoale na'a nacchguale bene' laždao' xi'a na' ba gwlejyichje Diosen'. Da'nan' chnabile gona' yeto yela' guac da' le'ele cont nezele še Diosen' gwsele' neda'. Perw bitw gona' can' chnablen', le ba ble'ele da' chona'. Dan' gon Diosen' len neda' cont nezele le'na' gwsele' neda' naquen ca dan' bene' len da' Jonás ben' be' xtiža' Diosen' cani'.

Nach beyož gwna Jesúsen' ca', beže'e len bene' ca' zjanaque' le' txen gan' nita' bene' ca'.

Dan' chsed chlo'e bene' fariseo ca' na' bene' saduceo ca' zaca'leben ca levadura

(Mr. 8:14-21)

⁵ Na' cate' besežine' yešla'a nisdao' Galilean', bene' ca' zjanaque' Jesúsen' txen gosache'ede' gosanlaže' yetextil da' yesagüe'.

⁶ Nach Jesúsen' gože' legaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

⁷ Nach gose' lježgaque':

—Gwne' ca' le gague bi yetextilen' noa'chon'.

⁸ Na' Jesúsen' gocbe'ede' xbab dan' gosone', na' gože' legaque':

—¿Bixchen' chaczejlaže'le da' bibi yetextil de? ¿Bi chejle'le napa' yela' guac par gwguagua' le'e?

⁹ ¿Bina' šejni'ile? na' žba gonlaže'le can' bguagua' gayo' mil bene' byo len gayo'ze yetextil dao'? na' lecze žbitw zalaže'le do yebał žome pedas yetextil botoble dan' becho'onen?

¹⁰ Na' ¿chixe tap mil bene' byo ca' bguagua' len gažze yetextil dao'? ¿Zalaže'le yebał žome pedas yetextil can' botoble dan' becho'onen?

¹¹ ¿Bixchen' con benje xbab che yetextilen' cate' gwnia' le'e gwsaca'le len levadura che bene' fariseo ca' na' che bene' saduceo ca'?

¹² Nach bene' ca' zjanaque' Jesúsen' txen gosache'ede' gague be'e diža' che levadura dan' chosochine' par chcha'o yetextilen' san be'e dižan' ca' cont bi yosozenague' che dan' chosed chosolo'e bene' fariseo ca' na' bene' saduceo ca'.

Pedroa' gwne' Jesúsen' naque' bene' gwsela' Diosen' cont nabi'e

(Mr. 8:27-30; Lc. 9:18-21)

¹³ Nach Jesúsen' len bene' ca' zjanaque' le' txen besežine' gała'ze to ciuda dan' nzi' Cesarea de Filipino. Nach Jesúsen' gože' bene' ca' gosa'aclene' le':

—Diosen' gwsele' neda' golja' beñač. Perw žbi chesena bene'? žnon' naca' neda'? žBi chesene'?

¹⁴ Na' gose'ene':

—Bałe' chesene' naco' da' Juan ben' bzoa bene' nis. Na' yebałe' chesene' naco' Elías ben' be' xtiža' Diosen' cani'. Na' yebałe' chesene' naco' da' Jeremías o yeto bene' be' xtiža' Diosen' cani'te.

¹⁵ Nach gože' legaque':

—¿Chixe le'e? ¿No žale naca'?

¹⁶ Nach Simón Pedroa' gože'ne':

—Len' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocané.

¹⁷ Nach Jesúsen' gože'ne':

—Simón xi'in Jonás, mbalaz zo' dan' gwnao' ca'. Notno beñač bzejni'i le' nao' ca'. Toz Xa' Dios ben' zoa yaba, len' ba bzejni'iden' le'.

¹⁸ Na' neda' žia', len' lio' Pedro na' zeje dižan' yej. Na' ca to bene' güen yo'o chbeje' yej gual cont gonen žin cate' cueque' len yo'on, ca'cze chbeja' le' gono' xšina', gaco' bene' nechw yotobo' bene' yesonxene' neda'. Na' bitwbi gac yeson da' xigüe' ca' yosolej yosošošen bene' ca' yesonxene' neda'.

¹⁹ Na' gona' lo nao' zgua'tec le' go'o xtižan' len bene' zan cont yosozenague' che Dios ben' zoa yaban' na' nabi'e yichjlažda'ogaque'. Na' lecze naquen lo nao' yo'o bene' ca' yesonxene'

neda' bica' da' ca' nac güen yesone' na' bica' da' ca' chi nac güen yesone'. Na' Diosen' gwzejni'ide' le' naquen' ye'gaco'ne' cont yežaguen len dan' ža Diosen'.

²⁰ Nach Jesúsen' gože' legaque' nono yese'e še naque' Cristo ben' gwlej Diosen' cont nabi'e.

Jesúsen' gwdixjue'ede' gate'

(Mr. 8:31-9:1; Lc. 9:22-27)

²¹ Na' žana' Jesúsen' gwzologüe' bzejni'ide' bene' ca' zjanaque' le' txen cheyała' šeje' Jerusalénna'. Na' gože' legaque' bene' gole blao ca' chesenabi'e nación chechon', na' bžoz gwnabia' ca' na' bene' ca' chososed chosolo'ede' dan' bžoj da' Moisés yosoči yososaque' le' na' yesote' le'. Perw yeyon ža yebane' ladjo bene' guat ca'.

²² Nach Pedroa' gwčhe'e Jesúsen' gan' nac lchojže' na' gwzologüe' be'lene' le' diža' gwdiľe' le', gože'ne':

—Žana', Diosen' gaclene' le'. Bitw gac čhio' ca' dan' žo' nga.

²³ Perw Jesúsen' gwyechje' gwne'e Pedroa' gože'ne':

—jGwcuas ca'ale Satanás! Čho'oyelo' neda' bi gona' can' nžia bia' Diosen' gona'. Bi nsa'o xbab čhe Dios, san nsa'o xbab čhe beňach.

²⁴ Gwde na' Jesúsen' gože' bene' ca' zjanaque' le' txen:

—Note'teze bene' še chaclaže' gaque' neda' txen, cheyała' cuejyichj cuine' la'czla' žaglagüe' na' con gone' can' nia' neda'.

²⁵ Note'teze bene' chacde' gone' cont bi žaglagüe' o cont nono yesot le', benan' cuiayi'. Na' note'teze bene' chzanlaže' cuine' žaglagüe' o gate' ne' čhia' neda', ba de yela' mban čhe' toľi tocaňe.

²⁶ žBixe zejenna' to bene' nabi'e doxen yežlion' na' cuiaye'e bi gata' yela' mban čhe' toľi tocaňe? Le bi zoa nacle gon benachen' chixjue' cont gata' yela' mban čhe' toľi tocaňe.

²⁷ Diosen' gwseľe' neda' golja' beňach na' cate' yida' yežlio nga da' yoble nsa'a yela' zaca' juisyw čhe Xa' Diosen' na' nchi'a angl čhia' ca', cana'ch gona' cont to to beňachen' nite' mbalaz o yesezaca'zi'e neče da' goson to toe'.

²⁸ Na' da' li žia' le'e, balle nita' le nga na'a bina' gatle cate' žin ža le'ele neda' yida' gwlo'a yela' gwnabia' čhian', neda' naca' ben' gwseľa' Diosen' golja' beňach.

17

Jesúsen' goque' ca to be'ni'

(Mr. 9:2-13; Lc. 9:28-36)

¹ Gwde xop ža Jesúsen' gwčhi'e Pedroa' len Jacobo na' Juan bene' biše' Jacobo na' ja'aque' to lo ya'a sibe. Na' nono nochle ja'acľen legaque'.

² Na' lao legaque' bža' ca goc Jesúsen', cho'alagüen' goctiten ca gwbiž, na' xalanen' beyaquen šiš xila' ca be'ni'.

³ Na' concze besele'ede' da' Moísesen' len da' Eliásen' na' chosošalje' len Jesúsen'.

⁴ Nach Pedroa' gože' Jesúsen':

—jXanto', leca güenna' zoacho nga! Še chaclažo', gonto' šoňe ranšw, to čhio', na' to čhe Moisés, na' yeto čhe Eliás.

⁵ Ne' choe'te Pedron' dižan' ca' cate' to bejw da' chactiten gwyechjen legaque' na' ladjo bejon' gosende' gwna Diosen':

—Benga Xi'ina' ben' chacda'. Čhbe chezaquelaže'čhgüeda' čhe'. Le gwzenag čhe'.

⁶ Na' cate' bene' ca' nče'e Jesúsen' gosende' diža' ca' besežebčgüe', con gosaze' cosčo'ale lo yon'.

⁷ Nach gwbiga' Jesúsen' gwžoa ne'e yichjgaquen' na' gože'ne':

—Le yeyas. Bitw žeble.

⁸ Na' cate' besyechis lagüen', noch no besele'ede' san toze Jesúsen' zie'.

⁹ Na' gwde na' šlac chesyeyetje' lo ya'an Jesúsen' gože' legaque':

—Nono ye'le can' nac dan' ba ble'ele nga. Cate'ch ba bebana' ladjo bene' guat ca', neda' naca' ben' gwseľa' Diosen' golja' beňach, cana'ch güe'le diža' čhen.

¹⁰ Nach bene' ca' zja'acľen Jesúsen' gose'ene':

—Bene' ca' chososed chosolo'e dan' bžoj da' Moísesen' chososedde' neto' chesene' zgua'tec da' Eliás ben' gwzoa cani' cheyała' yide' da' yoble cate' za' yedenabia' ben' seľa' Diosen'. žBixčhen' chesene' ca'?

¹¹ Nach Jesúsen' gože' legaque':

—Da' licze zgua'tec yid da' Eliásen' na' yeyonšagüe' yogo'lol.

¹² Perw žia' le'e, Eliás ba bide' na' bi gosacbe'e bene' še nac le'. Na' gosonde' le' con ca gosaclaže'. Na' ca'czen' yosoči yososaque' neda' naca' ben' gwseľa' Diosen' golja' beňach.

¹³ Nach bene' ca' zja'aque' len Jesúsen' gosacbe'ede' cho'e diža' čhe da' Juan ben' bžoe' bene' nis.

Beyon Jesúsén' to bi' chazbe' šon

(Mr. 9:14-29; Lc. 9:37-43)

¹⁴ Na' cate' besežine' gan' zjanžag bene' zan, to bene' bšague' Jesúsén' na' bzoa xibe' lagüe' na' gože' ne':

¹⁵ —Xana', beyaše' laže' šca xi' ina' nga. Chazbe' šon na' leca chžaglaobe' len len. Na' zan ni'a ba jačazbe' lo yi' na' lecze zan ni'a ba blažo' be' lo nis.

¹⁶ Ba bedesana' be' lao bene' ca' zjanaque' le' txen, perw bitw gosaque' yesyeyone' be'.

¹⁷ Nach Jesúsén' gože' bene' ca' že' na':

—Je' e' bene' bi chejnilaže', chonchguale clele! ¿Batca' zelao na' lagua' le' e'? Bedesan bidaon' ni.

¹⁸ Nach Jesúsén' bene' mandadw yechoj da' xigüen' yo' o nyazen yichjlaždao' bidaon' na' la' bechojten. Na' la' beyaquetebe'.

¹⁹ Na' gwde goc ca', bene' ca' zjanaque' Jesúsén' txen gosebigue' lagüen' cate' zoe' toze', na' gose' ene':

—¿Bixčhen' bi goc neto' yebejto' da' xigüen'?

²⁰ Jesúsén' gože' legaque':

—Bitw goc yebejen dan' bitw gwyejle' le Diosen' gone' yechojen. Xsa xomdasen' naquen da' dao' riz. Na' da' li žia' le' e, la' cžla' dan' chejnilaže' le Diosen' naquen ca' to xsa xomdas lagüe dan' bi chejnilaže' teclene', še šejnilaže' lne', guaque ye' le ya' a nga: "Gwcuas nga, na' jayzoa na' ate", na' gac can' nalen'. Bitw bi de dan' bi gac gonle con še chejle' le Diosen' gone' gaquen.

²¹ Na' cont yebejle da' xigüe' ca' dan' zjanac ca' dan' bebeja' yichjlaždao' bidao' na', cheyala' gwyo gwchejle gonle gwbas na' zoatezle yol güžle Diosen'.

Da' yoble Jesúsén' gwdixjue' ede' gate'

(Mr. 9:30-32; Lc. 9:43-45)

²² Na' šlac zjayda Jesúsén' len bene' ca' zjanaque' le' txen do gan' mbane distritw Galilea, Jesúsén' gože' legaque':

—Diosen' gwsele' neda' golja' beñač, na' yosodie' neda' lo na' bene' chesegue' ede' nda',

²³ na' yesote' nda'. Perw na' yeyon ža yosban Diosen' neda' ladjo bene' guat ca'.

Nach bene' ca' zjanaque' Jesúsén' txen cate' gosende' txiže' na' gosacyaše' chgüede'.

Jesúsén' gwdixjue' da' chosočixjue' che yodao'

²⁴ Na' cate' besyežine' Capernaum, bene' ca' chosočixjue' che gastw che yodao' blao che chio' bene' Israel ja' aque' lao Pedroa'. Na' gose' ene':

—¿Bi chyixjw maestrw chelen' da' cheyala' čixjue' che yodaon'?

²⁵ Nach gož Pedroa' legaque':

—Chyixjuen'.

Gwde gwna Pedroa' ca' gwyo' e lo' yo' ona'. Nach Jesúsén' la' gožtie' le':

—¿Bi xbab chono', Simón? Ca' nac bene' gwnabia' ca' nita' yežlio nga, ¿non' chacdo' chosočixjue'/? ¿bene' gualaž che' o še bene' zito'?

²⁶ Nach Pedroa' gože' ne':

—Chosočixjue' bene' zito'.

Nach Jesúsén' gože' le':

—Bene' zjanaque' biše' lježe' bitwbi cheseyixjue'. Na' chio' naccho xi' in Dios ben' zoa yaba chnabi' e, bitw cheyala' čixjwcho che yodaon'.

²⁷ Perw cont nono yeson xbab chgue' echo yodao' blaon', na' čixjwcho. Gwyej cho' a nisdan', na' bžala' yixjw chion' na' bej nechw be seno', lo cho' aba' na' želdo' to mechw. Na' yeyoxon' šjadixjo' chechon'. Guaqueczen par šjadixjo' che čopcho.

18

Gosacyož bene' ca' zjanaque' Jesúsén' txen noe' nach blao

(Mr. 9:33-37; Lc. 9:46-48)

¹ Nachen' bene' ca' zjanaque' Jesúsén' txen gosebigue' cuite' na', na' gose' ene':

—¿No neto' gacchto' blao cate' Diosen' ben' zoa yaban' gone' cont nabi' o?

² Na' Jesúsén' goxe' to bidao' na' bzeche' be' gachol' legaque'.

³ Na' gože' ne':

—Da' li žia' le' e, note' tezle še bi gwša' xbab chelen' cont gwzenagle che Diosen' ca' chon to bidao' cate' chzenagbe' che xaxna' be', gwbat nabia' Diosen' ben' zoa yaban' yichjlažda' ole.

⁴ Na' note' teze bene' še yeyaque' ca' bidao' nga na' gwzexjwlaže' lao Diosen', nach gaque' bene' blao len neda' cate' Diosen' ben' zoa yaba gone' cont solao nabi' a.

⁵ Note' teze bene' chone' güen len to bidao' ca' bi' nga neče' da' chejnilaže' neda', choncze' güen len neda'.

Bitw cheyała' goncho cont gon bene' da' xinj

(Mr. 9:42-48; Lc. 17:1-2)

⁶ 'Note'teze bene' chon cont lažo' to bene' za' gwzologüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nisdaon' clcl ca da' gone' cont lažo' bene' yoble gone' da' xinjen'.

⁷ Nyaše'chguaze gac che benachen' da' zjade da' zan yežlio nga da' chesonen cont yesone' da' xinj. Bia'cze gata' dan' yeson cont lažo' bene' yesone' da' xinj, perw nyaše'chguaze gac che bene' chon cont lažo' bene' yoble gone' da' xinjen'.

⁸ 'Na' da' li žia' le'e, še ni'a na'len' chonen cont gonle da' xinj, cheyała' cuejyichjle da' malen' chonle. Yejni'a bibi ni'a na'len' soa clcl ca gonle da' xinjen' len len. Na' yejni'a šjayzoale len Diosen' toli tocane bi zoa šla'a taca'len' o nchog šla'a ni'alen' clcl ca yeyejle lo yi' gabil nya' cuerp chelen'.

⁹ Na' še yejlaolen' chonen cont gonle da' xinjen', cheyała' cuejyichjle da' malen' chonle. Yejni'a bibi yejlaolen' cuia clcl ca gonle da' xinjen' len len. Na' yejni'a šjayzoale len Diosen' toli tocane zoa šla'a'aze yejlaole clcl ca yežinle lo yi' gabil žia chop la'a yejlaolen'.

Jempl che xila' be gočzeje

(Lc. 15:3-7)

¹⁰ 'Bi gonle note'teze bene' chejnilaže' neda' ca bene' bibi zaca'tec, la'czla' bitec zaque' len benach. Žia' le'e, angl ca' chesape' legaque' lecze nite' lao Xa' Diosen' yaban' gan' zoe'na'.

¹¹ Na' ca naca' neda', Diosen' gwsele' neda' golja' benach cont gwnežjua' yela' mban toli tocane che bene' ba zjambiayi'.

¹² 'žBixe chonle xbab? Še nita' to gayoa xila' chele na' yejw toba' žbi yocua'anle be ca' yetapalaj togalj do lo ya'a na'ze na' šjaydiljwle ben' bejua'?

¹³ Na' da' li žia' le'e, cate' yeželeleba' yebechle dan' beželban' clcl ca can' chebele che be ca' tapalaj togalj ben' bi gosaczeje.

¹⁴ Ca'czen' naquen len bene' ca' chesejnilaže' neda' bene' ca' bitec bi zjazaque' len benachen'. Xacho Diosen' ben' zoa yaban' bitw che'nde' cuiayi' ne toe'.

Cheyała' yezi'xencho che bene' lježcho bene' chesejnilaže' Diosen'

(Lc. 17:3)

¹⁵ 'Še to bene' lježle gone' mal contr to le'e, šejle šje'elenlene' diža' chopzle can' nac dan' chonen' cont yetinjen'. Na' še gwzenague' diža' dan' šje'elenlenen', yezoe' binlo len Diosen' da' yoble.

¹⁶ Perw še bi gwzenague' diža' dan' šje'elenlenen', güench che'ele yeto o yečhope bene' lježle cont yesaque' testigw ba gota'yoel ben' yoša' xbab chen'.

¹⁷ Na' še bitwcz gwzenague' chele, le güe' diža' can' chonen' lao yogo'le gan' chdop chžagle chonxenle Diosen'. Na' še neca gwzenagcze' che yogo'le, chich gonle' cuent len le'e chdop chžagle chonxenle Diosen'. Perw le gon cuent naque' txen len bene' ca' bi chesejnilaže' Diosen', ca no bene' güečixjw bene' chesonchgüa da' xinj.

¹⁸ 'Da' li žia' le'e, naquen lo na'le ye'le bene' ca' yesonxene' neda' bica' da' nac güen yesone' na' bica' da' ca' bi nac güen yesone'. Na' Diosen' gwzejni'ide' le'e naquen' ye'gaclene' cont yežaguen len dan' ža Diosen'.

¹⁹ 'Na' da' yoble žia' le'e, še čople nita'le yežlio nga gwxi'ale bin' nabele Diosen', Xa' Diosen' ben' zoa yaban' goncze' dan' nabelenen'.

²⁰ Na' gan' nžag chope šonle chonxenle neda', zoacza' txen len le'e.

²¹ Nach Pedroa' gwbigue' gože' Jesúsen':

—Xana', še bene' lježa' chone' da' mal contr neda', žbal ni'a cheyała' yezi'xena' che'? žzelao do gaž ni'a?

²² Nach Jesúsen' gože'ne':

—Žia' le', gague cheyała' yezi'xen che lježle zelao do gaž ni'a, san yogo'te ni'a cheyała' yezi'xen che lježle.

Jempl che ben' bi bezi'xene' che dan' čala' bene' lježe'

²³ 'Na' yela' gwnabia' che Diosen' ben' zoa yaban' zaca'leben ca da' nga goc. Zoa to bene' gwnabia' ben' chesala' xmose' ca' xmechue'. Na' goclaže' yebeje' cuent len legaque'.

²⁴ Na' cate' gwzologüe' bezi'e cuent che to toe', da' nechw bžin to xmose' ben' čala' zan millón.

²⁵ Na' mosen' bitwbi xmechue' gota' par yonežjuen'. Da'nan' bene' gwnabian' bene' mandaw ta'ogaque' len xo'ole', len xi'ine' ca' na' len doxen da' zjade che' cont yeyaxjw dan' čale' chen'.

²⁶ Nach mosen' bzoa xibe' lao bene' gwnabian' gota'yoede' le' gože'ne': "Xana', gwdapešca yela' chxenlaže' len neda', na' yeyona' doxen dan' čala' čhion'."

²⁷ Nach bene' gwnabian' beyaše'de' le' na' bezi'xene' che doxen dan' čala' na' bsane' le'.

²⁸ Perw na' cate' bechoj mosen' liž xanen', la' bežagtie' yeto mos lježe' bene' čala' late' xmechue'. Nach la' gwnizte' yene' gože'ne': "Yeyono' dan' čalo' čhian' netec na'a."

²⁹ Nach mos lježen' la' bzoate' xibe' lagüen', gože'ne': "Gwdapešca yela' chxenlaže' čhia' na' yeyona' doxen dan' čala' čhion'."

³⁰ Perw na' mos nechon' bitw bzenague' che mos lježen'. La' gweyjte' jene' mandadw goseyixjue'ne' ližya na' bi yechoje' še bina' yonežjue' dan' čala' čhen'.

³¹ Na' mos ca' yezica'chle cate' beše'ede' can' ben' mos nechon', leca gosacde' zi'. Na' ja'aque' lao bene' gwnabian' jaseže'ne' yogo'lo' can' goca'.

³² Nach bene' gwnabian' goxe' mos nechua' da' yoble lagüe'na', gože'ne': "Le' naco' to bene' xi'achgua. Neda' bezi'xena' čhio' doxen dan' čalo' čhian' dan' gota'yoedo' neda' yezi'xena' čhion'."

³³ ¿Bixchen' bi beyaše'do' mos lježo' ben' čala' čhion' can' beyaše'da' le'?"

³⁴ Na' bža'achgua bene' gwnabian' na' bdie' le' lo' na' bene' goseyixjue'ne' ližya ga žaglaogüe', na' bi yechoje' še bina' yeyixjue' doxen dan' čala' čhen'.

³⁵ Nach Jesúsen' gože' bene' ca' zjanaque' le' txen:

—Can' gon Xa' Diosen' ben' zoa yaban' len note'tezle še bi chezi'xenle che lježle do yichj do laže'le bite'teze dan' chesonde' le'e.

19

Bi cheyała' yela'acho len no'ol čechon' cont soalencho no'ole yoble

(Mr. 10:1-12; Lc. 16:18)

¹ Na' Jesúsen' cate' beyož gwne' da' ca' beze'e distritw Galilean' na' gwlague' yegw Jordánna' beyeje' gan' mbane distritw Judean'.

² Na' bene' zan ja'aclen le', na' beyone' bene' ca' chesacšene.

³ Na' bał bene' fariseo ja'aque' gan' zoe'na', le gosaclaže' yesebeje'ne' diža' da' yosočhine' cont gosožie'ne' xya čhoł, nach gose'ene':

—¿Guac to bene' nšagna' yele'e len xo'ole' še bite'teze dan' chone' cbi cholaže' bene' čhen'?"

⁴ Nach gože' legaque':

—¿Bina' gwlable can' nyoj Xtiza' Diosen'? Žan cate' gwxe yežlion' Diosen' bene' bene' nechw ca' to bene' byo na' to no'ole.

⁵ Na' gwna Diosen': "Da'n'an' bene' byon' gwsane' xaxne'e cont soalene' no'ole čhen' na' chope' yesaque' ca' toz bene'."

⁶ Na' ca' bich yesac chope' san toze'. Da'n'an' bi cheyała' yesyele'e, le Diosen' ba bcode' legaque'.

⁷ Nach gose'ene':

—Še naquen ca' ¿bixchen' ben da' Moisésen' mandadw cate' to bene' yele'e len no'ol čhen' cheyała' chas to yiš da' gwnežjue' no'ol čhen' ga güen' diža' besyele'ena'?"

⁸ Jesúsen' gože' legaque':

—Da' Moisésen' be'e latje yela'ale len no'ol čele lagüe dan' nacle bene' güedenag len Diosen'. Perw cate' Diosen' bene' bene' nechw ca' bitw načo goclaže' yesyele'e.

⁹ Žia' le'e, note'teze bene' čele'e len no'ol che' na' cheque'e no'ole yoble, len neztede' no'ol čhen' bitw naque' to no'ole chzoa xtoe', toz ca' da' xinjen' chone' ca' nac dan' chon ben' chata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca' da' xinj gone' ca' nac da' chon bene' chata'lene' no'ol che bene' yoble.

¹⁰ Nach bene' ca' zjanaque' Jesúsen' txen gose'ene':

—Še can' naquen che bene' byo na' no'ole, güenčh nono gwšagna'.

¹¹ Jesúsen' gože' legaque':

—Gague yogo' bene' yesejni'ide' da' nga, šinze bene' ca' ba bzejni'i Diosen' legaque' bi zejen.

¹² Nita' bene' bi žan yosošagne'e dan' gosalj'e bi zjanya' cuerp che', na' lecze nita' bene' bi chosošagne'e lagüe dan' gosone bene' legaque' cont bi zjanya' cuerp chegaque'. Na' lecze ca' nita' bene' cbi chosošagne'e lagüe dan' chesazlaže'che' yesone' xšin Diosen' ben' zoa yaban' chnabi'e. Le gwzenag che dan' ba gwnian' še ba ben Diosen' cont chejni'ilen.

Jasesane' bidao' lao Jesúsen'

(Mr. 10:13-16; Lc. 18:15-17)

¹³ Na' ja'ac bene' jasesane' bidao' lao Jesúsen' cont xoa ne'e yichjgacbe' na' nabe' lao Diosen' gaclene' legacbe'. Perw bene' ca' zjanaque' le' txen gosedi'e bene' ca' zjanche'ebe'.

¹⁴ Nach Jesúsen' gože'ne':

—Le güe' latje yesid bidao' ca' lagua' nga, na' bi gwžonle, le bene' ca' zjanac ca' bidao' quinga, legaque' chosozenague' che Diosen' ben' zoa yaba cont chnabi'e yichjlažda'ogaque'.

¹⁵ Na' beyoż gwꞥoa na' Jesúsen' yichjgacbe' gwꞥabe' lao Diosen' gaclene'be', nach gwyje' ga yoble.

Beñe' güego' beñe' goc beñe' gwni'a
(Mr. 10:17-31; Lc. 18:18-30)

¹⁶ Na' goquen', to beñe' güego' bžine' gan' zoa Jesúsen', na' gože'ne':
—Maestrw, le' naco' beñe' güen. ¿Bi da' güen cheyała' gona' cont gata' yela' mban čhia' toli tocañe'?

¹⁷ Nach Jesúsen' gože'ne':
—¿Bixchen' žo' naca' beñe' güen? Toz beñe' güen zoa, na' len' naque' Dios. Perw na' še chaclažo' gata' yela' mban čchio' toli tocañe, cheyała' gono' can' non Diosen' mandadw goncho.

¹⁸ Nach gože' Jesúsen':
—¿Bica' da' ca'?
Nach Jesúsen' gože' le':
—Nono gotle, bi gata'lenle no'ol bi nac no'ol čhele o beñe' byo beñe' bi nac beñe' čhele, bi cuanle, bitw güe'le diža' güenlaže' che beñe' lježle.

¹⁹ Le gap bala'an ẏaxna'le, na' le gaque lježle can' chaque cuinle.

²⁰ Nach beñe' güegon' gože' Jesúsen':
—Yogo'lol da' quinga gwzolagua' chonczan' cate' ñe' nactia' bidao'. ¿Bixe dan' chyažjeh gona'?

²¹ Jesúsen' gože'ne':
—Še chaclažo' gaco' cayanen' chazlaže' Diosen', jayete' yogo' da' de čchio', na' da' le'edo' čhen bnežjon beñe' yaše'. Nach še gono' ca', cate' yežino' yaba gan' zoa Diosen', da' zaca'ch gata' čchio'. Na' še ba beyoż beno' can' žia' le', nach sao' gaco' neda' txen.

²² Perw na' beñe' güegon' cate' beyoż bende' diža' can' gož Jesúsen' le', beza'yaše', le beñe' gwni'achgua goque'.

²³ Gwde na' Jesúsen' gože' beñe' ca' zjanaque' le' txen:
—Da' li žia' le'e, leca zdebe naquen to beñe' gwni'a gwzenague' che Dios ben' zoa yaba cont Diosen' nabi'e yichjlažda'ogüe'.

²⁴ Da' yoble žia' le'e, bedao'ch te to be xen be nzi' camello to lo' nag yeše' clcl ca to beñe' gwni'a gwzenague' che Dios cont Diosen' nabi'e yichjlažda'ogüe'.

²⁵ Na' beñe' ca' zjanaque' Jesúsen' txen leca besyebande' cate' gosende' xtizen', nach gosene':

—¿Noxen' šjayzoa len Diosen' še ca'?

²⁶ Jesúsen' gwñe'e legaque', nach gože'ne':
—Bibi de da' gac yeson beñachen' cont šjasyenite' len Diosen', perw bi zoa da' ñacho da' bi gac gon Dios.

²⁷ Nach Pedroa' gože' Jesúsen':
—Neto' ba gwlejyichjto' yogo' da' de čcheto' cont nacto' le' txen. ¿Bi da' güen gata' čcheto' dan' ba gwlejyichjto' da' ca'?

²⁸ Jesúsen' gože' legaque':
—Da' li žia' le'e, Diosen' gwsele' neda' golja' beñach na' cate' yocobe' yežlion', neda' cui'a nabi'a güen juisyw can' čnabia' Dios ben' zoa yaba. Na' le'e šižinwle cue'le cuita'na' nabi'a'le šižinw cuen beñe' ca' zjanaque' xi'in diaža che da' Israel.

²⁹ Na' note'teze beñe' ba gwlejyichje' liže', biše', zane', ẏaxne'e, xo'ole', xi'ine' o yežlio che', dan' chzenague' čhia', Diosen' gwnežjue' le' da' zaca'ch da' xench ca yogo' da' ca'. Na' leczce gata' yela' mban čhe' toli tocañe.

³⁰ Perw zan beñe' zjanaque' beñe' žialao na'a, gwžin ža cate' yesaque' beñe' bzebe. Na' beñe' zjanaque' beñe' bzebe na'a, gwžin ža cate' yesaque' beñe' žialao.

20

Jempl che beñe' güen žin ca'

¹ Nach Jesúsen' gože' legaque': —Yela' gwnabia' che Diosen' ben' zoa yaban' zaca'leben ca da' nga goc. To beñe' nape' to yežlio gan' že'chgua yag uvas. Na' gwze'e ližen' to zil do čheni' gwyje' gan' chac ya'a jatiljue' beñe' güen žin cont yesone' žin yežlio čhen' žana'.

² Na' gosxenlaže' beñe' güen žin ca' to denario čhixue' to toe' cont ca chac mosen' tža žin. Nach gwsele' legaque' gan' jasene' žinna'.

³ Na' do cheda ga gozeje' gan' chac ya'an, na' ble'ede' nita'ch beñe' bibi žin de yesone'.

⁴ Na' gože' legaque': “Lencze le'e le šja'ac gan' že' yag uvas čhian' le šjen žin na' čhixjwcz'a le'e ca cheyała'.” Nach ja'ac beñe' ca'.

⁵ Na' da' yoble gwyeje' do guagwbiž na' do cheda šone. Bezle'ede' nita'ch bene' bibi žin chesone' nach gwselē' legaque' cont yesone' žin gan' žē' yag uvas chen'.

⁶ Na' ca do cheda gayo' šeže'le gozeje' da' yoble ble'eczde' nita'ch bene' bibi žin chesone'. Na' gože' legaque': "¿Bixchen' bi gwyejle žin?"

⁷ Nach gose'ene': "Notno gwne' neto' šjento' xšine!." Nach goze'e' legaque': "Lencze le'e le šja'ac le šjen žin gan' žē' yag uvas chian'. Na' chixjwca' le'e ca cheyala'." Nach ja'ac bene' ca'.

⁸ Na' cate' bžin hor bosa' xan yag uvasen' bene' güen žin ca', nach gože' mos blao chen': "Beyax bene' güen žin ca' cont chixjo'ne', solao chixjo' bene' ca' besela'ac bzebe, na' yeyožle len bene' ca' besela'ac da' nechw'."

⁹ Nach mos blaon' zgua'tec gwduxjue' bene' ca' gosezolağüe' gosone' žin cheda gayo' šeže'le tgüje denario to toe'.

¹⁰ Na' cate' gwduxjue' bene' ca' gosezolağüe' gosone' žin šezildao', gosacde' chixjochē' legaque' da' zcha'och dan' gosezolağüe' gosone' žin šezildao'. Perw tozcze can' gwduxjue' yogo'lolte'.

¹¹ Na' cate' beyož gosezi' laxjw bene' ca' gosezolağ žinna' šezildao', gosadoe' diža' xan žinna'.

¹² Gose'ene': "Do ža bžaglaochguato' lo da' zeye' bento' žin chion'. Na' tozcze can' gwduxjo' neto' len bene' ca' besela' bzebe, len to hor güejgan' gosone' žin."

¹³ Perw na' xan žinna' gože' toe': "Migw chia', bitwbi da' mal chona' len le'. ¿Gague gwxenlažo' to denario chixjua' to tole?"

¹⁴ Laxjon' ba gwxi'o, guac yeyejo'. Chaclaža' gwnežjua' bene' ca' to denario güje con can' bēna' le'e la'czla' besela'aque' bzebe.

¹⁵ ¿Bixchen' chxi'o neda' neče dan' naca' bene' šagüe'? Naquen lo na' gona' con ca chaclaža' len da' de chia'."

¹⁶ Nach Jesúsen' gože' bene' ca' bosozenag jemplen':

—Can' naquen, nita' bene' zjanaque' bene' bzebe na'a, perw ľeczze gwžin ža cate' legaque' yesaque' bene' žialao. Na' nita' bene' zjanaque' bene' žialao na'a, perw gwžin ža yesaque' bene' bzebe. Diosen' chaxe' yogo'lo' bene' cont yeseje'le' che', perw ba' guen' chosozenague' che', na' ľegacze' chbeje' cont chesaque' xi'ine'.

Da' yoble chyixjue' e Jesúsen' gate'

(Mr 10:32-34; Lc 18:31-34)

¹⁷ Jesúsen' len yezan bene' zja'aque' Jerusalenna'. Na' šlac zjangüe'e nezen' gwlejiže' bene' šiziw ca' gwleje' cont zjanaque' txen len le' na' gože' legaque':

¹⁸ —Na'a ba zejcho Jerusalenna' gan' yesone' neda' lo na' bžoz gwnabia' ca' na' lo na' bene' ca' chososed chosolo'ede' dan' bžoj da' Moisés, na' yesecholağüen' chia' yesote' neda', neda' naca' ben' gwsela' Dios golja' bēnach.

¹⁹ Na' yesone'nda' lo na' bene' bi zjanaque' bene' Israel cont yesonle' chia', na' yesot yeseyine' neda', na' yesote'nda' yosode'e neda' le'e yag cruz, perw yeyon ža yebana' ladjo bene' guat ca'.

Xna' Jacobo na' Juanna' gwnabe' yesebe' xi'ine' ca' cuit Jesúsen' gan' nabi'ena'

(Mr 10:35-45)

²⁰ Na' ja'ac xi'in Zebedeo, Jacobo len Juan, na' len xna'gaque' lao Jesúsen'. Na' xna'gaquen' bzoa xibe' lao Jesúsen' gože'ne':

—Chnabda' le' to goclen.

²¹ Nach Jesúsen' gože'ne':

—¿Bi goclen chaclažo' gona'?

Nach xna'gaquen' gože'ne':

—Chaclaža' gono' cont xi'ina' quinga yesebi'e šla'a güje cuito'na' cate' žin ža nabi'o.

²² Jesúsen' gože' Jacobo na' Juanna':

—Le'e cabi nezele bi dan' chñable. ¿Gwčhejlaže'le tele yela' zi' yela' ya' ca dan' tia' neda' na' gac chele can' gac chia'?

Nach bosyoži'e xtižen' gose'ene':

—Gwčhejlaže'to'.

²³ Nach Jesúsen' gože' legaque':

—Da' ľicze tele yela' zi' yela' ya' ca dan' tia' neda' na' gac chele can' gac chian', perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Xa' Diosen' gaquen' che'.

²⁴ Nach cate' yeši bene' ca' zjanaque' le' txen gosende' can' gosena bene' ca' chope, beseloque' legaque'.

²⁵ Nach Jesúsen' goxe' yogüe' cont gosebigue' lağüen' na' gože' legaque':

—Nezezele bene' gwnabia' che to to nación na' bene' blao ca' chesone' byen chosozenag bene' chegaque'.

²⁶ Perw bi naquen ca' len le'e. San note'tezle chaclaže'le gacle bene' blao, cheyała' gwzeɣjwlaže'le gaclen bene' lježle.

²⁷ Na' še note'tezle chaclaže'le gacle bene' žialao, cheyała' gon cuinle ca xmos bene' lježle.

²⁸ Ca'cze naquen len neda' naca' ben' gwseła' Diosen' golja beñač. Gague za'a cont yesaclen bene' neda' san za'a cont gaclena' bene', na' chzanlaže' cuina' yesote' neda' neče xtoła' beñačen'.

Jesúsen' bene' cont čope bene' lčhoł besyele'ede'

(Mr. 10:46-52; Lc. 18:35-43)

²⁹ Nach cate' besyeya'aque' ciuda Jericó, bene' zan zjasenagüe' Jesúsen' len bene' ca' zjanaque' le' txen.

³⁰ Na' čope bene' lčhoł zjachi' chanez gan' zjajda Jesúsen'. Na' cate' gosache'ede' Jesúsen' zej gan' zjachi'ena' nach chososya'adie' gose'e le':

—Xanto', len' naco' xi'in diaža che da' rey Davin'. Beyaše'laže'sca neto'.

³¹ Nach bene' ca' chesyede gan' zjachi'ena' gosediłe' legaque' cont yesenite' šize. Perw na' gosene' zižjech gose'ene':

—iXanto', len' naco' xi'in diaža che da' rey Davin', beyaše'laže'sca neto'!

³² Jesúsen' gwleze' gan' nite'na', nach goxe' legaque' gosebigue' lagüen'. Nach gože'ne':

—iBin' chaclaže'le gonda' le'e?

³³ Nach gose'ene':

—Xanto', chaclaže'to' ye'e'eto'.

³⁴ Jesúsen' beyaše'laže'de' legaque' na' gwdane' yejlaogaquen', nach la' besyele'etede', na' gosa'ogüe' le'.

21

Gosonxene' Jesúsen' cate' beyo'e Jerusalén

(Mr. 11:1-11; Lc. 19:28-40; Jn. 12:12-19)

¹ Na' cate' ba zoa yesežine' Jerusalénna' besežine' gan' chi' yež Betfagé, gan' zoa ya'a dan' nzi' Ya'a Olivos. Na' Jesúsen' gwsele' mandaw čope bene' ca' zjanaque' le' txen,

² gožgaque'ne':

—Le šja'ac yež dan' chi' gała'ze, na' cate' žinlen' na' yeže'le to burr be no'ole da'ba' yag na' nče'te to xi'inda'oba'. Le sežgacba' na' le che'gacba' nga.

³ Na' še bi ye' bene' le'e na' ye'le'ne': "Xanto'na' chyažjde' legacba'." Na' la' yedyesantecze'ba' len le'e.

⁴ Goc yogo' da' qui cont goc can' bzoj to ben' bzoj Xtiža' Diosen' cani', gwne':

⁵ Gož bene' ca' nita' Jerusalénna':

"Le na'šc, ba za' rey chelen', žie' cože' to burr dao', xi'in beyixe' be choa' yoa'. Ze'e ca to bene' bi naque' bene' blao.

⁶ Na' ja'ac bene' ca' yež dao' dan' gož Jesúsen' legaque' ca', na' gosone' can' ben' Jesúsen' mandaw.

⁷ Na' besyeče'e burroa' len xi'inba' lao Jesúsen' na' gosexo'a no xagaque' cože'ban' na' gwžia Jesúsen' be daon' cont gwyje' Jerusalénna'.

⁸ Na' bene' zan gosonxene' Jesúsen' goseyixjw no xagaque' lo nez cont blej burron' len na' yebale' gosečogue' xoze' yag na' goseyixjuen' lo neza'.

⁹ Na' bene' zjažialao na' lecze bene' za'ac cože' bososye'e gosene':

—iLeca bene' zaca' benga nac xi'in diaža che da' rey David! iMbalaz ben' za' nga gwseła' Xancho Diosen' le' cont nabi'e! iLeca bene' zaca' ben' zoa yaban'!

¹⁰ Na' cate' bžin Jesúsen' Jerusalénna' yogo' bene' ca' že' ciudan' besyebande', na' gosene':

—iNo benga bla' nga?

¹¹ Na' bene' ca' nžag Jesúsen' bosyoži'e xtiža'gaque' gosene':

—Bengan' Jesús bene' za' yež Nazaret gan' mbane' distritw Galilea na' cho'e xtiža' Dios.

Jesúsen' bebeje' bene' ca' cheson ya'a yodao' blaon'

(Mr. 11:15-19; Lc. 19:45-48; Jn. 2:13-22)

¹² Na' Jesúsen' gwyo'e chyo'o yodao' blaon' na' bešaše' yogo' bene' ca' chesote' na' bene' chesa'o na'. Nach bchixe' xmes bene' ca' chosoša' mechw, na' yag ga chesebe' bene' ca' chesote' ngolbex.

¹³ Na' gože' legaque':

—Nyojcz Xtiža' Diosen' žan: "Yesene' ližan' naquen to latje gan' yesoł giüž bene' neda'", perw le'e chonlen ca to latje ga že' bene' gwban.

¹⁴ Na' bene' lčhoł ca' na' len bene' ca' nxinj ni'e gosebigue' lao Jesúsen' šlac zoe' chyo'o yodaon'. Nach beyone' legaque'.

¹⁵ Perw na' bꞥoz gwnabia' ca' na' bene' ca' chososed chosolo'e dan' bꞥoj da' Moisésen' leca beseže'e cate' besele'ede' yela' guac ca' dan' ben Jesúsén'. Na' lecze beseže'e cate' gosende' can' bososya'a bi' bixjw ca' chyo'o yodao' blaon', gosenabe': "Leca bene' zaca' benga nac xi'in diaža che da' rey David."

¹⁶ Nach gose'e Jesúsén':

—¿Zendo' bin' gosena bidao' ca'?

Jesúsén' boži'en gože' legaque':

—Zenda'. ¿Bina' gwlable can' nyoj Xtiža' Diosen'?, žan:

Ba beno' cont bi' bixjw ca' na' len bi' ne' chesaže' chesonxembe' le'.

¹⁷ Na' bechoje' gan' nita' bene' ca' na' beze'e ciudan'. Na' že'na' jayga'ane' Betania.

Ben Jesúsén' cont gwbiž yag yixgüigw

(Mr. 11:12-14, 20-26)

¹⁸ Na' žil beteyo besyeya'aque' Betanian' jaseya'aque' Jerusalénna' da' yoble. Na' šlac zjangüe'e nezen' gwdon Jesúsén'.

¹⁹ Na' ble'ede' to yag yixgüigw zoan cho'a nezen' na' jañe'e še žia yaguen' yixgüigw. Perw bibi bželde', con xlaguen' na'ze žia. Nach gožen':

—Bich bi yixgüigon' cuio'.

Na' la' gwbižte yaguen'.

²⁰ Nach bene' ca' zjanaque' le' txen besyebande' cate' besele'ede' can' goquen', nach gose'ene':

—¿Nac goquen' la' gwbižte yaguen'?

²¹ Na' Jesúsén' gože' legaque':

—Da' li žia' le'e, še chejnilaže'le Diosen' na' bitw gacžejlaže'le, guaque gonle can' ba benan' cont gwbiž yaguen'. Na' lecze ca' guac ye'le ya'a nga: "Gwcuase nga na' jaso'a lo' nisaon'", na' gac can' nalen'.

²² Na' še chejnilaže'le Diosen', bite'teze dan' nabelene' cate' yoł güižlene', gonczen' le'e.

Yela' chnabia' che Jesúsén'

(Mr. 11:27-33; Lc. 20:1-8)

²³ Nach Jesúsén' gozeje' yodao' blaon' da' yoble. Na' šlac chsed chlo'ede' bene' ca' že' na', bꞥoz gwnabia' ca' na' bene' gole blaon' ca' chesenabi'e nación chechon' gosebigue' cuit Jesúsén'. Nach gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chono' da' qui?

²⁴ Nach Jesúsén' boži'e xtiža'gaquen', gwne':

—Lecze de to da' nabda' le'e. Še yoži'ile xtižan' nach ni'a le'e bi yela' gwnabia' chonlendan'.

²⁵ Le našč neda': ¿non' gwseła' da' Juanna' bzoe' bene' nis? ¿Dios nan' gwsele'ne', še benačhen'?

Nach legacze' gose' lježe':

—Še ye'chone' Dios gwseła' le', na' ye'e chio': "¿Bixchen' ca' gwyejle'le che'?"

²⁶ Na' bi gac ye'chone' benač gwseła' le', le yogo'te bene' že' nga chesejle'e Diosen' gwsele' da' Juanna' be'e xtiže'na', na' xož bi yesonde' chio'.

²⁷ Nach gose'e Jesúsén':

—Bi nezeto'.

Nach gože' legaque':

—Lecze neda' bi yapa' le'e bi yela' gwnabian' chonlenda' da' ca'.

Jempl che chope xi'in bene'

²⁸ Na' Jesúsén' gože' legaque':

—Le gon xbab bi zeje jempl nga: Gwzoo to bene' gwnita' chope xi'ine'. Na' gože' tobe': "Xi'ina', chaclaža' šejo' güen žin na'aža gan' že' yag uvas chia' ca'."

²⁹ Nach xi'inen' gožbe' le': "Bitw ša'a." Perw gwdele beyombe' xbab nach gwyejbe'.

³⁰ Nach gozeje' gan' zoa xi'inen' yeto, na' ježe'be' can' gože' bi' biše'ben'. Na' la' gožte bin' le': "Guacze, na' ša'a." Perw bitw gwyejbe'.

³¹ Gwnašč neda', ¿no bi' ca' chope ben can' gwnalaže' xabe'?

Nach gose'ene':

—Bi' nechoa'.

Nach Jesúsén' gože' legaque':

—Ca'cze naquen. Na' da' li žia' le'e, bene' güečhixjw ca' na' no'ole ca' chja'aclen note'teze bene' byo yobech yosozenague' che Diosen' cont nabi'e yičhjažda'ogaque' clcl ca' le'e.

³² Ca' nac Juanna' ben' bzoe' bene' nis, bide' laolen' na' gwdixjue'ede' le'e naquen' cheyała' gonle cont yebe Diosen' le'e. Perw bitw gwyejle'le che'. Na' bene' güečhixjw ca' na' no'ole

zle' ca' gosejle'e che'. Na' cate' gocbe'ele bene' ca' ba gosejle'e che', bitw betinjlele xtoŀa'le ca' cont šejle'le che dan' bsede da' Juanna'.

Jempl che mos mal ca'

(Mr. 12:1-12; Lc. 20:9-19)

³³ Le gwzenag yeto jempl nga. Gwzoa to bene' na' goze' to cue' xen yag uvas lo yežlio che' na' gwlo'en le'ej. Na' na'teze bene' to ga yesesie' uvasen' cont choj xisen'. Na' lecze bene' to da' sibe ca to campanaryw ga yesecua' bene' yosogüia yesene'e yag ca'.

Na' bcua'ane' yežlion' lo nac' bene' yesonši'e yag uvasen' na' gwze'e gwyeje' zito'.

³⁴ Cate' bžin ža yosyotobe' cosešen', gwsele' to chope xmore' gan' že' bene' ca' nac lo na'gaque' yag uvasen' cont šjasyexi'e to tlaw cosešen' dan' cheyala' si'e.

³⁵ Perw na' bene' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosozie'ne' yej, nach yetoe' gosote'ne'.

³⁶ Nach gossela' xan yag uvasen' mos zanch clel ca bene' ca' gwsele' da' nechw, perw lecze can' gosonde' bene' nechw ca', lecze ca' gosonde' legaque'.

³⁷ Nach gwdena' xan yežlion' gwsele' cuincze xi'inen', gocde' yesezi'e xtižen'.

³⁸ Perw na' bene' ca' nac lo na'gaque' yag uvasen' cate' besele'ede' xi'ine'na', nach gose' lježe': "Bengan' yega'anlene' yežlio nga cate' gat xen'. Le šo'o gotchone' cont yega'anlenchon."

³⁹ Nach gosezene'ne', besyebje'ne' gan' že' yag ca' na' gosote'ne'.

⁴⁰ Beyož be' Jesusen' jempl nga, gozne':

—žNacxe chaquele gon xan yežlion' len bene' ca' bocua'anlene' yag uvas chen' cate' yežin cuine'?

⁴¹ Nach bosyoži'e xtižen' gosene':

—Šeje' šjetoe' bene' mal ca', na' yodie' yežlion' lo na' bene' yoble bene' yeson güen yosyonežjue'ne' to tlaw cosešen' cate' žin ža yosyotoben'.

⁴² Jesusen' gože' legaque':

—Ca'czen'. žBina' gwlable ga nyoj Xtiža' Diosen', žan quinga?:

Yej dan' bi gosaclaže' bene' güen yo'o ca' yosochine', len ba naquen yej squin.

Da' nga ben Xancho Diosen',

na' naquen to da' yežejecho.

⁴³ Da'nar' žia' le'e, da' bi chzenagle che Diosen', cuejyichje' le'e na' cueje' bene' yoble bene' yosozenag che' cont nabi'e yichjlažda'ogaque'.

⁴⁴ Na' ca' nac yejen', note'teze bene' lažo' lo yeja' na' cue'žošje', na' note'teze bene' chiže' yeja' cate' lažon' na' gwšošjen le'.

⁴⁵ Na' bžox gwnabia' ca' na' bene' fariseo ca', cate' gosende' jempl ca' dan' be' Jesusen', gosache'ede' be'e diža' che legaque' dan' bi chesejnlaže' le'.

⁴⁶ Nach gosaclaže' yesezene' le', perw besežebe' bi yesone bene' ca' nžague' legaque', le yogüe' gosejle'e gwsele' Diosen' Jesusen' cont cho'e xtiže'na'.

22

Jempl che ben' bene' ĩni cate' bšagna' xi'ine'

¹ Na' da' yoble bsede blo'e Jesusen' bene' ca' len jempl, gozne':

² —Yela' gwnabia' che Diosen' zaca'leben ca da' nga goc. Gwzoa to bene' gwnabia' na' bene' gawt cate' bšagna' xi'ine'.

³ Na' cate' bžin hor solao ĩnin' gwsele' xmore' ca' cont jasexi'e bene' ca' ba boŀ güiže' šja'ac ĩnina', perw notno goclaže' šja'ac ĩni chen'.

⁴ Nach gože' yeto xonj xmore' ca': "Le šjež bene' ca' ba boŀ güižan' ye'ine' ba bsini'a dan' gagwchona'. Ba betua' be dao' be chesane' na' ba bsini'a dan' gagwcho lo ĩnin'. Na' ye'ine' yeside' gagwcho dan' ba bsini'an'."

⁵ Perw bene' ca' ba gosata'yoede' cont šja'aque', bitw gosone' cuent dan' gose' mos ca' legaque'. Toe' gwyeje' ja'ne'e yežlio che', na' yetoe' gwyeje' jene' negosyiw.

⁶ Na' yebale' gosenize' mos ca' gwsele' bene' gwnabian' na' gosonde' legaque' zi' na' gosote' legaque'.

⁷ Na' lecabža'a bene' gwnabian'. Na' gwsele' soldadw che' ca' jasete' bene' ca' gosot xmosen' na' bosozeye' lažgaquen'.

⁸ Nach bene' gwnabian' gože' xmosen': "Ba bsini'a dan' gagwcho lo ĩnin', perw bene' ca' ba boŀ güiža' nachbia' bitw zjazaque' yeside'.

⁹ Le šja'ac le šjata yogo' nez na' ye'le yogo' bene' yežagle yeside' ĩnin'!"

¹⁰ Na' mos ca' ja'aque' yogo' nez na' jasetobe' con yogo' bene' besežague', no bene' naque' bene' güen na' no bene' naque' bene' mal, cont beža' yo'o gan' chac ĩnin'.

¹¹ Perw cate' gwyo'o bene' gwnabian' jañe'e bene' ca' že'na' na' ble'ede' to bene' bi nyaze' lache' da' bnežue' yesaze' lo ĩnin'.

¹² Nach gože' le': "Migw chia', ĩnac goquen' gwyo'o nga bitw nyazo' lache' dan' bena' ĩchazo'?" Nach bena' bitw beželde' bi ye'ene'.

¹³ Nach bene' gwnabian' bene' mandadw yosoĉej xmoše' ca' ĩn'a na' bena' cont yesye-beje'ne' na' yesebeque'ne' gan' nac choĭ, ga cuežyaše' na' gan' gagwxejte ĩaye' tantw žaglagüe'.

¹⁴ Can' naquen, Diosen' chaxe' yogo' bene' cont yesejle'e ĩe', perw baĭ guen' chosozenague' ĩe' na' ĩegacze' chbeje' cont yesaque' xi'ine'.

Ca nac dan' cheyaĭa' gaxjw

(Mr. 12:13-17; Lc. 20:20-26)

¹⁵ Nach bene' fariseo ca' besežague' na' bosoxi'e naclen' yesone' cont yesebeje' Jesúsen' diža' da' yosode'ede' cont yesagüe' xya ĩe'.

¹⁶ Na' bene' fariseo ca' gosesele' baĭ bene' zjanaque' txen len ĩegaque' na' yebaĭ bene' chesone' txen len Herodesen' cont jaseže' Jesúsen'.

—Maestrw, nežeto' zoatezo' cho'o diža' ĩi. Na' nežeto' diža' ĩi cho'o chsed chlo'edo' bene' can' chazlaže' Diosen' goncho. Na' bi chono' cuent bi ža bene', ĩe toz can' chono' len note'teze bene'.

¹⁷ Da'nan' zedenabeto' le' cont nao' neto' can' chacdo' cheyaĭa' gonto'. ĩNaquen binĭo no ĩchixjw da' cheyaĭa' ĩchixjwcho lao ben' nac la'zelagüe bene' gwnabia' ben' ĩi' Roma, še bi?

¹⁸ Jesúsen' gocbe'ede' yeĭa' xi'a ĩhegaquen', nach gože' ĩegaque':

—ĩNacle bene' gwxiye'! ĩBixĉen' chaclaže'le yoslaže'le neda' len xtižan'?

¹⁹ ĩE gwlo'e neda' to mechw dan' ĩchixjwle ĩhe gobiernen'.

Nach gosone' to mechw dan' nzi' denario.

²⁰ Nach Jesúsen' gože' ĩegaque':

—ĩNo lao dan' da' le'e mechw nga? na' ĩno la da' nyoj ĩe'en ni?

²¹ Nach gose'ene':

—ĩChe César ben' nac la'zelagüe bene' gwnabia' ben' ĩi' ciuda Roman'.

Nach Jesúsen' gože' ĩegaque':

—ĩE gwnežjo bene' gwnabian' da' nac ĩe bene' gwnabia', na' ĩe gwnežjo Dios da' nac ĩe Dios.

²² Nach cate' gosende' xtiža' Jesúsen' besyebande'. Nach besyeya'aque' gan' zoe'na'.

Cate' yesyeban bene' guat ca'

(Mr. 12:18-27; Lc. 20:27-40)

²³ Na' ĩo ža na'teze besežin baĭ bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosena'be' le', gose'ene':

²⁴ —Maestrw, da' Moisésen' gwne': "Še to bene' byo nšagne'e na' gate' sin nono xi'ine' zoa, bene' biše' ben' ba goten' cheyaĭa' yošagna'lene' no'ol güezeba' cont yesenita' xi'ĩn diaža ĩe da' bišen'.

²⁵ Na' len neto' gosanita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. Na' bene' gwchopen' bošagna'lene' no'ol güezeba'.

²⁶ Na' ĩecze gote' nono xi'ine' gwnita'. ĩEczze ca' goc len bene' gwyona', bžinten bene' gaža' yogo'lole' gosac ĩe' ca'.

²⁷ Na' gwde gosat yogo'loĭ bene' ca', nach got len no'ola'.

²⁸ Na' cate' yesyebane' ladjo bene' guat ca', ĩnox bene' ca' soalene' no'ola' ca' xo'ole'?, ĩe ĩyguen' bosyošagna'lene' ĩe'.

²⁹ Na' gož Jesúsen' ĩegaque':

—ĩCelen' chonĭe xbab dan' žale ca', ĩe bi nezele can' ža Xtiža' Dios dan' nyojen, neca nombia'le yeĭa' guac ĩen'.

³⁰ Caten' yesyeban bene' guat ca', bich yosošagne'e, neca yosonežjo xi'ine' no'ol gwšagne'e, ĩe yesaque' ca' angl bene' žjazoa yaba.

³¹ Na' ca' nac dan' yesyeban bene' guat ca', ĩbiña' gwlable da' nga can' nyoj Xtiža' Diosen'? žan:

³² "Neda' naca' Dios ben' chonxen Abraham, ben' chonxen Isaac na' ben' chonxen Jacob". Bene' guat ca' bi chesonxene' Diosen', san bene' žjamban.

³³ Na' bene' ca' zjanžaguen' besyebande' cate' gosende' diža' dan' bsed blo'ede' ĩegaque'.

Dan' nac da' blaoch dan' ža Diosen' cheyaĭa' goncho

(Mr. 12:28-34)

³⁴ Na' cate' gosene bene' fariseo ca' can' bzoaži Jesúsen' bene' saduceo ca', nach besedobe' jasa'aque' ĩagüen'.

³⁵ Na' to ben' nsedchgüe' ley dan' bzoj da' Moisés ľecze goclaže' cueje' Jesúsen' diža' da' gwchine' contr le', gože'ne':

³⁶ —Maestrw, lo ley che Diosen', ĺnon' nacch da' žialao da' zjanyojen da' ža Diosen' cheyała' goncho?

³⁷ Nach gož Jesúsen' ľe':

—“Cheyała' gaquecho Xancho Diosen' con ca zelao chejni'icho do yichj do laže'cho.”

³⁸ Lenŋa' naquen da' žialaoch na' da' blaoch lagüe da' ca' ža Diosen' cheyała' goncho.

³⁹ Na' da' gwchopen' zejgalan' ca', žan: “Cheyała' gaque ľježcho ca chaque cuincho.”

⁴⁰ Chope da' ca' ža Diosen' cheyała' goncho chzejni'in chio' can' zeje doxen dan' bzoj da' Moisésen' na' dan' bosozoj beŋe' ca' gosoe xtiža' Diosen' cani'.

Criston' naque' xi'in diaža che da' rey David

(Mr. 12:35-37; Lc. 20:41-44)

⁴¹ Na' šlac ne' zjanžag beŋe' fariseo ca',

⁴² Jesúsen' gože' ľegaque':

—ġBixe xbab chonle che Criston' ben' gwlej Diosen' cont yedenabi'e? ĺNo xi'in diaža che naque'?

Na' gose'ene':

—Xi'in diaža che da' rey Davin'.

⁴³ Nach Jesúsen' gože' ľegaque':

—Še ca' naquen, ĺbixchen' cate' da' David bzoje' can' blo'e Spiritw che Diosen' ľe', gwne' Criston' naque' Xane'? Quinga bzoje':

⁴⁴ Xancho Dios gože' Xanan':

“Gwche'edo' cuita' nga nabia'cho txen,

na' gona' cont yogo' no chesegue'e le' yosozexjw yichje' yosozenague' chio'.”

⁴⁵ ĺNacxe gac nacho Criston' xi'in diaža che da' rey David? ľe cuin Davin' gože' ľe': “Xana”.

⁴⁶ Na' notoch no goc yosyoži'e xtižen'. Na' gwzolao žana' notoch no besyeyaxje bi yesenabde' Jesúsen'.

23

Xtola' bene' fariseo ca' na' bene' ca' chososed chosolo'e leyna'

(Mr. 12:38-40; Lc. 11:37-54; 20:45-47)

¹ Nach Jesúsen' gwzolao be'ne' de' diža' len beŋe' ca' zjanaque' ľe' txen na' len beŋe' ca' zjanžague' gan' zoe'na', gwne':

² —Beŋe' ca' chososed chosolo'e ley na' beŋe' fariseo ca' ba zjanłane' xłatje da' Moisésen' cont chosozejni'ide' beŋe' ley che Diosen'.

³ Na' da'nan' cheyała' gwzenagle chegaque' cate' chosozende' le'e can' ža leyna', na' cheyała' gonle can' chosozejni'ide' le'e. Perw bitw gonle can' cheson ľegaque', ľe ľegaque' bitw chesone' dan' chesene' cheyała' gac.

⁴ ĺegaque' chosozanche' dan' ža leyna'. Chesonen' ca to yoa' da' nono soe gua' na' chesaclaže' gua' beŋe' yoble len na' bitw chesaclaže' yeso'en ľegaque'.

⁵ Ca nac beŋe' ca', yogo' dan' chesonen', chesonen' ga yesele'e beŋe' can' chesonen' contze yesonxene' ľegaque'. Chio' beŋe' Israel nchejcho caj dao' de yid do na'cho na' do loxgacho na' lo' caj dao'na' chgo'ošagüe'cho to pedas yiš gan' nyoj late' güeje Xtiža' Diosen'. Perw ca nac beŋe' ca' chososed chosolo'e ley che Diosen' na' beŋe' fariseo ca', zjanonche' caj dao' chegaque' da' xench ca yezica'chle beŋe'. Na' ľecze chesone' lox xagaque' da' toŋech clal ca che beŋe' yezica'chle.

⁶ Chesyebede' chesebi'e gan' chesebe' beŋe' blao cate' chja'aque' gan' chac no ľni na' cate' chja'aque' yodao' chegaque'.

⁷ Chesyebede' chesap beŋe' ľegaque' bala'an cate' chesyěžague' lagüe ya'a. Na' chesyebede' yese' beŋe' ľegaque' maestrw.

⁸ Perw žia' le'e, bi gonle byen ye' beŋe' le'e maestrw, ľe toz neda' Cristo naca' Maestrw chele. Na' yogo' le'e chejnilaže'le neda' nac biše' ľježle tole yetole.

⁹ Na' ľecze bitw gonxenle note'teze beŋe' blao ye'ľne': “Xato”. Toze Diosen' ben' zoa yaba naque' Xacho.

¹⁰ Na' bitw güe'le latje ye' beŋe' le'e: “Xana”, ľe toz neda' Cristo naca' Xanle.

¹¹ Še no le'e nacle beŋe' blaoch, cheyała' gwzexjw yichjle gaclen ľježle.

¹² ĺe note'teze beŋe' chonxen cuine', Diosen' gone' cont si'e zto' lagüen'. Na' note'teze beŋe' chzexjwlaže' lagüen', Diosen' gone' cont gacxene'.

¹³ ĺNyaše'chguaze gac che le'e chsed chlo'ele ley dan' bzoj da' Moisésen' na' le'e beŋe' fariseo! Chziye'le beŋe' cont bi yosozenague' che Diosen', ľe bi chaclaže'le nabia' Diosen' yichjlažda'ogaque', na' ľecze le'e bi chzenagle che Diosen' cont nabi'e yichjlažda'olen'.

14 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! Chziye'le no no'ole güezebe cont checa'ale yo'o chegaque'. Na' cate' chol' güizle Diosen', sša choe'le diža' cont yesaque bene' leca chonxen'ne'. Gacchle castigw c'el ca yezica'chle bene' güen da' xinj.

15 'iNyaše'chguaze gac che le'e chsed chlo'ele ley dan' bzoj da' Moisésen' na' le'e bene' fariseo! iNacle bene' gwxiye'! Chejtez chejle chjatiljwle bene' zito' bene' yeson' txen len dan' chsed chlo'elen'. Na' cate' chželelene' chzejni'ile' cont yesaque' bene' xi'ach c'el ca le'e.

16 'iNyaše'chguaze gac che le'e! iNacle ca bene' l'chol' bene' chesacde' guac yesegüe'e nez bene' yoble! Žale note'teze bene' še ne': "Yodao' blaon' zoan testigw čhia' gona' can' ba gwnia'", bitwbi zejen dan' chnen'. Perw še že': "Oro dan' de lo' yodaon' zoan testigw čhia' gona' can' ba gwnia'", nach cheyała' gone' can' gwnen'.

17 iLe'e nacle ca to bene' l'chol' na' bitw chejni'ile! Oron' bitec bi zacan'. Yodao'na' gan' yo'o oron' lenna' zaca'chen, le dan' yo'o oron' lo'ennan', da'nan' oron' naquen che Dios.

18 Na' lecze žale še to bene' že': "Mes gan' chosozeye' beyixe' ca' chesonxene' Diosen', zoan testigw čhia' gona' can' ba gwnia'", bitwbi zejen txižen'. Perw na' še že': "Dan' xoa lo' mes lo' yodaon' zoan testigw čhia' gona' can' ba gwnia'", nachen cheyała' gone' can' gwnen'.

19 iLe'e nacle ca bene' l'chol' na' bitw chejni'ile! Dan' chosozeye' chesonxene' Diosen' bitec bi zacan'. Mes gan' chesexoe' dan' chosonežjue' Diosen', lenna' zaca'chen, le naquen che Dios.

20 Še bene' že': "Mes dan' zoa lo' yodaon' zoan testigw čhia' gona' can' ba gwnia'", lencze dan' xoa lo' mesen' zoan testigw che'.

21 Na' še bene' že': "Yodaon' zoan testigw čhia' gona' can' ba gwnia'", lecze zejen Diosen' naque' testigw che', le yodaon' naquen che Dios na' nan' zoe'.

22 Na' še bene' že': "Yaban' zoan testigw čhia' gona' can' ba gwnian'", zejen Diosen' naque' testigw che', le nan' zoa Diosen' chnabi'e.

23 'iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye'! La'czla' chnežjwle Diosen' to part lao ši part che yixegüej, che oreg, che comin, na' che bichle cuan chele, bibi zejen dan' bitw chzenagle che da' ca' zjanac da' žialaoch dan' ža leyna'. Leyna' žan cheyała' gonle da' nac güen lao Diosen', na' cheyała' yeyaše'laže' ljež benachle na' cheyała' gonle can' ba gwlo'o cho'ale gonle. Da' ca' zjanaquen da' zejehen gonle, perw lecze bitw cheyała' cuejyichjle bi gwnežjwle da' ca' chnežjwle Diosen'.

24 iNacle ca to bene' l'chol' bene' chesacde' guac yesegüe'e nez bene' yoble! Zaca'lebele ca to bene' chebej yogo' beb dao' riz da' nchixe da' che'eje' perw bitw chache'ede' še yo'o to da' xen juisyw da' zaca' yebeje'. Le chi' yichjle che da' ca' bitec bi zaca' da' ža ley chechon' cheyała' goncho, na' bi chonle da' ca' zjzaca'chguan.

25 'iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye'! Zaca'leble ca ye'en dan' chch'in bene' na' chyibe' cožen' perw bi chyibe' lo'en. Chonle cont chesaque bene' nacle bene' güen, perw leca chzelaže'le bi da' de che bene' na' chbechgüele chca'al'en.

26 iLe'e bene' fariseo, nchol' yichjlažda'olen'! Le yetinje xtoła'le cont da' licze gacle bene' güen can' chaclaže'le yeson bene' xbab nacle. Nach gacle ca to ye'en dan' nyibe' cožen' na' lo'en.

27 'iNyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! iNacle bene' gwxiye'! Zaca'leble ca to ba dan' zjanone' xdanchgua lagüen perw lo'en že' žit che bene' guat na' chi'chgua da' zban.

28 Chonle cont chesaque bene' nacle bene' güen, perw len yichjlažda'olen' nacle bene' gwxiye' na' bene' malchgua.

29 'iNyaše'chguaze gac che le'e chsed chlo'ele ley da' bzoj da' Moisés na' le'e bene' fariseo! iNacle bene' gwxiye'! Chonšagüe'le cho'a ba che da' bene' goso'e xtiža' Diosen' cani', na' chonšagüe'le cho'a ba che yezica'chle bene' goson da' güen.

30 Na' žale: "Šaca' chio' ba zoacho che da' xozxta'ocho ca', bitw bencho txen len legaque' cate' gosote' bene' ca' goso'e xtiža' Diosen' cani'."

31 Perw na' yogo'lołte dan' chonle chlo'en tozce can' nacle len da' xozxta'ole ca' bene' gosot da' bene' ca' goso'e xtiža' Diosen' cani'.

32 Le gwzalaošaze le gon bica'ch da' zgot dan' bitw goła' yeson da' xozxta'ole ca'.

33 'Le'e naccchguale bene' zgot na' bene' gwxiye'. Bitw gac yelale lao castigw dan' gon Diosen' le'e, le sele' le'e lo' yi' gabilen'.

34 Na' da' gona', neda' sela' no bene' yeso'e xtiža'na' len le'e na' no bene' sina' na' nochle bene' yososedde' le'e xtižan'. Na' gotle bałe' gwda'gaclene' to le'e yag cruz, na' yebałe' činle do lo' yodao' chelen', na' yebałe' gwglaglene' gate'teze yež šja'aque'.

³⁵ Na' dan' gonle ca' gaple doła' che yela' got che yogo' bene' ca' goson da' güen, ben' gosot da' xozxta'ole ca' gwzolaozen len da' Abel ben' naque' bene' güen lao Diosen' na' beyožen len da' Zacarías xi'in da' Berequías. Zacaríasen' gosote'ne' do gan' zoa yodao' blaon' na' do gan' ze mes gan' chosozeye' beyixe' chesonxene' Diosen'.

³⁶ Na' da' li' zia' le'e, le'e mbanle' na'a si'le castigw che yela' got che yogo' bene' ca' gosot da' xozxta'ole ca'.

Begüine' Jesúsen' che xtoła' bene' Jerusalén

(Lc. 13:34-35)

³⁷ 'Le'e bene' Jerusalén, chotle bene' ca' chsela' Diosen' cont chesoelene' le'e xtižen' chchellene' yej. Zan ni'a ba goclaza' yotoba' le'e ca to jed xcaca' ben' nche' xi'in na' chyežba' legacba', perw bitw goclaze'le.

³⁸ Na' na'a ba gwlejyichj Diosen' le'e.

³⁹ Na' zia' le'e, bich le'ele neda' na'a, perw cate'ch žin ža le'ele neda' yeto nach nale: "Mbalaz ben' za' nga nsel'a Xancho Diosen' le' nabi'e".

24

Gwžin ža yosyočinje' yodao' blaon'

(Mr. 13:1-2; Lc. 21:5-6)

¹ Na' ba cheza' Jesúsen' yodao' blaon' šeje' ga yoble cate' bene' ca' zjanaque' le' txen gosebigue' gan' zoe'na' na' gosezolagüe' goso'e diža' catec xdan nac yodaon' na' lecze ca' yo'o ca' zjanyechjen.

² Nach Jesúsen' boži'e xtiža'gaque' gwne':

—Ca nac yogo' da' quinga chle'ele, da' li' zia' le'e, ne to yej da' zjancua' nga ca yega'an zjancua' cože' lježen. Yogon' yosyočinje'.

Dan' gac cate' ba za' bagwe yeyož yežlio nga

(Mr. 13:3-23; Lc. 21:7-24; 17:22-24)

³ Na' ja'aque' Ya'a Olivos. Na' cate' Jesúsen' ba chi'e lo ya'an, bene' ca' zjanaque' le' txen gosebigue' lagüen' gose'ene' šižize:

—Che'neto' nao' neto' batcan' gac da' ca'. Na' žnac gac nezeto' cate' ba zoa bagwe yido' na' ba zoa yeyož yežlion'?

⁴ Nach Jesúsen' boži'e xtiža'gaquen' gwne':

—Le gwsaca' cont notno siye' le'e.

⁵ Le zan bene' yesaš yežlio nga bene' yesaclaze' yosołane' xlatja' nga. Na' yesene': "Nedan' Cristo ben' gwlej Diosen' cont nabi'e." Na' yeseziye'e bene' zan.

⁶ Na' yenele chac gwdiłe nile nale, na' yenele guac gwdiłe, perw bi žeble, le can' cheyała' gac. Perw gague lenna' nacho ba bžin ža yeyož yežlion'.

⁷ Le yesedil to yež len yuen ga xo'chgua lo yežlion'.

⁸ Perw na' yogo' da' qui gac cate' za' solao gata' yela' zi'.

⁹ 'Nach bene' ca' že' yogo' nación yesegue'ede' le'e dan' chejnilaže'le neda' na' yesone' le'e lo na' bene' ca' chesegue'e le'e na' yososaca'zi'e le'e nach yesote' le'e.

¹⁰ Cana' bene' zan bene' ba chesejnilaže' neda' yesebejyichje' bich yesejnilaže' neda'. Na' legacteze' yesechje' yeson lježgaque' lo na' bene' da' chesegue'ede' legaque'.

¹¹ Na' bene' zan yesonlaže' yesene' xtiža' Diosen' cheseyixjue'ede' na' yeseziye'e bene' zan.

¹² Na' lagüe dan' šanch bene' ca' yeson da' malen', bene' zan juisyw bene' ba chesejnilaže' neda' bich yesacde' lježe'.

¹³ Perw na' note'tezle gwyo gwchjejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'.

¹⁴ Na' šja'ac bene' doxen lo yežlion' yesejixjue'ede' diža' güen cont yeseneze benačnen' cheyała' yosozenague' che Diosen' nach nabi'e yichjlažda'ogaque'. Na' cate' bene' že' yogo' nación ba zjanезде' da'na', cana'ch yeyož yežlion'.

¹⁵⁻¹⁶ 'Da' Daniel ben' gwđixjue'ede' xtiža' Dios cani' bzoje' che da' zbanchgua da' gwxiñjen latje gan' chonxencho Diosen'. Na' cate' le'e le'ele ba zoa dan' gan' zoa yodao' blao, cana' bene' yesenita' distritw Judea cheyała' yosoxonje' šja'aque' do ya'adao'. (Bene' gwlaben' cheyała' šejni'iden'.)

¹⁷ Na' bene' chda do yichjo'o che ližen', bi yeyetje' yotobe' xšinlaže' že' ližen', con yoxonje'.

¹⁸ Na' bene' chda yixe' bi yeyej liže' šjayxi'e xalane'.

¹⁹ 'Nyaše'chguaze zjanac no'ol ca' zjanao' xi'in na' no'ol ca' ne' chosoguaže' bidao' lo ža ca'!

²⁰ Na' le' nab lao Dios bi yažjen gwxonje' cate' chac zag o lo ža che Dios.

²¹ Le yesaquen ža da' leca yesale' bene'. Cate' gwxete yežlion' na' ža na'aža nono na' gale' ca', neca žinlažen' yesale'de' ca' da' yoble.

²² Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

²³ Cana' še no ye' le'e: "Le na'šc, nga zoa Criston' ben' gwlej Diosen' cont nabi'e", o "Le na'šc, na' zoe'", ne ca'cze bi šejle'le.

²⁴ Yesaš bene' gwxiye' bene' yesaclaže' yosołane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaue'. Na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaue'.

²⁵ Ba nezele can' gac, le ba gwduxjue'eda' le'e yogo' can' gac.

²⁶ Na' še yesele' le'e: "Zoa Criston' latje dašen'", bitw gwzenagle čegaue', bitw šejle. Na' še yesele' le'e: "Zoa Criston' lo' yo'ona'", bitw šejle'le čegaue'.

²⁷ Can' chac cate' chep yes chšenin' doxen le'e yaban' zejzenez, lecze can' gac cate' žin ža yida' da' yoble, Diosen' gwsele' neda' golja' beňach. Yida' zejzenez na' yogo'loł bene' yesele'ede' neda'.

²⁸ Nga chonen che ben' že': "Gan' de be guat nan' chesežag šod ca'."

Can' gac caten' yid Jesucriston' da' yoble

(Mr. 13:24-37; Lc. 21:25-33; 17:26-30, 34-36)

²⁹ Na' cate' la' yeyošte saca'zi' beňachen', gwbižen' yeyaquen čol, na' bion' bich gwšenin'. Nach beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'.

³⁰ Na' cana'ch bene' že' yežlion' yesele'ede' neda' naca' ben' gwseła' Diosen' golja' beňach za'a ladjo bejon' len yela' guac xen na' yela' bene' zaca' juisyw chia'. Na' bene' že' yogo' naciön che yežlion' yesebežyaše', bene' bi gosejnilaže' neda'.

³¹ Na' caten' yida', to trompeta' cuežen žižje, na' seła' angl chia' ca' doxen yežlion' yosyotobe' bene' ca' ba gwleja' cont zjanaque' neda' txen gate'teze nite' doxen lo' yežlio ga zelao nac zito'.

³² Le gwzenag che jempl nga che yag yixgüigw: Cate' ba chzolao chebešjw yaguen' na' chelan' laga' che'en dao', chacbe'ele bach zoa yela' tiemp yejon'.

³³ Na' lecze cate' le'ele ba chac da' mal ca' ba gwnian', cana'ch nezele ba za' juisyw, ba zoa gala'.

³⁴ Da' li žia' le'e, bina' yenit diaža che le'e nita'le na'a cate' ba goc yogo'loł da' ca'.

³⁵ Le'e yaba na' yežlion' yesede čen, perw ca' nac xtižan', gague da' te cbi gac can' žanna'.

³⁶ Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nežda'. Toz Xa' Dios neze.

³⁷ Diosen' gwsele' neda' golja' beňach, na' can' goc tiemp che da' Noé, lecze can' gac caten' neda' yida' da' yoble.

³⁸ Bene' ca' gosenita' tiemp che da' Noén' gosenite' chese'ej chesagüe' na' chosošagne'e na' chosošague' na' no xi'ingaque'. Ne' chesonte' ca' caten' bžin ža gwyo'o Noén' lo' barcon'.

³⁹ Bitw gosache'ede' bin' gac. Cate'ch goc yejw sio' juisywa na' bia' nisen' yogo'lole' cana'ch gosache'ede'. Lecz can' gac, con cate'ch yida' da' yoble cana'chen' yesache'e bene' bin' gac.

⁴⁰ Quingan' gac caten' yida' da' yoble: Čhope bene' nite' do yixe', toe' yezi' yeca'a, na' yetoe' yocua'ana'.

⁴¹ Na' čhope no'ole nite' chesote', toe' yezi' yeca'a na' yetoe' yocua'ana'.

⁴² Da'n'an' le soa le cueze, le bi nezele bi ža bi horen' yida' da' yoble, neda' naca' Xanle.

⁴³ Le gon xbab che da' nga, šaca' neze xan' yo'on' do bi hor lo' yelen' žin bene' gwbanňa' ližen', na'ze' cont bitw güe'e latje šo' ben' ližen' cuane' xšinlazen'.

⁴⁴ Da'n'an' le soa le cueze batcan' yida' da' yoble, le cate' bi chonle xbab yida', cana' yida', neda' naca' ben' gwseła' Diosen' golja' beňach.

Mos ben' chon güen, na' mos ben' bi chon güen

(Lc. 12:41-48)

⁴⁵ Note'tezle še zoale lez bate'teze, zaca'leble ca' to mos bene' naque' bene' sina' na' bene' chon da' cheyala' gone'. Na' še to bene' mos chonchgüe' güen, nach xanen' cue'e lo' ne'e ližen' cate' se'e cont mosen' gwnežjue' da' yesagw yogo' mos ca' cate' ba gole' yesagüe' tža tža.

⁴⁶ Še to bene' mosen' chonteze' can' gož xanen' le', mbalaz soe' cate' yežin xanen'.

⁴⁷ Da' li žia' le'e, xanen' cue' lo' na' mosen' yogo'loł da' de che'.

⁴⁸ Perw še mosen' naque' bene' zgot na' gone' xbab ne': "Ba gwže xanan'".

⁴⁹ Nach solagüe' tile' mos ca' yezica'chle na' ye'ej gagwxate' len no bene' borrašw,

⁵⁰ nach xane'na' yežine' to ža senyale' le' to hor bi nache'ede'.

⁵¹ Na' dan' bi chon mosen' ca' cheyala' gone', xane'na' chinchgüe' le' ca' gatte'. Gac che' can' chac che note'teze bene' gwxiye', chjaya'aque' gabilen' gan' chesebežyaše' na' chesagwxetje laje' dan' leca chesežaglägie'.

25

Jempl che ši no'ole güego' ja'aque' to yela' güešagna'

¹ Nach Jesúsen' goze'e bene' ca' zjanaque' le' txen:

—Cheyala' soale lez batcan' yedenabi'a, can' gwnita' no'ole chesejni'i no'ol ca' za' gua'a diža' chen'. Goc to yela' güešagna', na' nita' ši no'ol güego' zjanaque' migw che bene' ca' chosošagnan'. Na' zjanxobe' lintern chegaque' ja'aque' jaseleze' yesyechoj bene' ca' liž no'olen' par šja'aque' liž bene' byon' txen.

² Na' gayo' no'ol ca' gosaque' bene' chejni'i na' yegayoe' bibi xbab gosone'.

³ Cate' no'ol ca' bibi xbab goson gosa'ac liže', zjanxobe' lintern chegaquen', perw bitw gosoxe' botey gan' yože set dan' yosochine' cate' yebiž dan' yože lo' lintern chegaquen'.

⁴ Na' no'ol ca' chesejni'i, zjanxobe' lintern chegaque' lente botey seten' dan' yosochine' cate' yebiž dan' yože lo' lintern chegaquen'.

⁵ Na' bene' güešagna' ca' gosežede' na' no'ole ca' gosebeze' legaque' gosetase' šlac chesebeze'ne'.

⁶ Na' do chel, to bene' gwne' zižje, gože' legaque': "Ba chesyechoj bene' güešagnan'. Le šo'o šjašagchone!"

⁷ Na' cate' gože' legaque' ca', yogo' no'ol ca' gosezeche' na' gosechogue' mešw dan' gwyey che lintern'a na' bosyogualen' da' yoble.

⁸ Na' no'ol ca' bibi xbab cheson gose'e no'ol ca' yegayo': "¿Bi gonle late' dan' yože botey chelen' neto'? le ba chebiž cheton'."

⁹ Nach no'ol ca' gose'e legaque': "Bitw gac gonto' late' chele, le dan' de cheton' bitw gaquen par yogo'cho. San le šja'ac le šjaxi' chelen' ga choten'."

¹⁰ Nach no'ol ca' bi goson xbab ja'aque' jasexi'e seta'. Na' šlac zja'aque' besyežin bene' ca' chosošagna' liž bene' byon'. Na' no'ol ca' gosaque' bene' chejni'i, gosoe' txen len bene' ca' chosošagnan' lo' yo'o gan' chesone' ĩnin'. Nach mos ca' bososeyjue' puerten'.

¹¹ Na' cate' besyežin no'ol ca' bi goson xbab, gosene' cho'a puerten', gose'e ben' zoa lo' yo'on: "Bene', gwsaljwšca puerta' cont šo'to'."

¹² Perw na' gože' legaque': "Da' li žia' le'e, bitw saljua' šo'le le bitw nombi'a le'e."

¹³ Nach gož Jesúsen' bene' ca' zjanaque' le' txen:

—Ca'czen' cheyala' soale lez batcan' yedenabi'a, le bitw nezele bi ža bi hor yida' yežlio nga da' yoble, neda' naca' ben' gwseła' Diosen' golja' benach.

Jempl che ben' bocua'anlene' xmose' ca' mechon'

¹⁴ Na' dan' yida' yežlio nga da' yoble yedenabi'a zaca'leben ca' da' nga goc. To bene' gwyeye' nación zito'. Na' za' se'e gexe' mos che' ca' na' gwlo'e lo' na'gaque' xmechue' cont gosone' delgens.

¹⁵ Toe' bocua'anlene' gayo' mil. Na' yetoe' bocua'anlene' chop mil. Na' yetoe' bocua'anlene' to mil. Bnežjue' legaque' con ca' ble'ede' da' chac yeson to toe'. Beyož bene' ca' na' gwze'e.

¹⁶ Na' ben' bocua'anlene' gayo' mil la' gwzolaote chone' delgens len mechon' na' bene' gan lecze gayo' mil.

¹⁷ Lecze ca' ben ben' bocua'anlene' chope mil, na' bene' gan yechope mil.

¹⁸ Na' ben' bnežjue' to mil gwyeye' jacuaše' xmechw xanen' to lo' yechw da' gwche'ene' lo' yo.

¹⁹ Goc šsa gwza' xan mos ca' cate' bežine', nach bene' mandadw ja'ac xmose' ca' lagüen' cont bosyodie' cuent.

²⁰ Mosen' ben' bocua'anlene' gayo' mil bžine' lagüen' na' gože'ne': "Xana', ni de da' gayo' mil dan' beno' neda'. Na' ba bena' gan yegayo' mil."

²¹ Na' xane'na' gože'ne': "Ba beno' da' güen. Naco' mos güen na' ba beno' ca' cheyala' gono'. Na' dan' beno' can' cheyala' gonon' len da' daon' bocua'anlena' len', da'n'an' gona' lo' nao' da' xench. Gwyo'o cont so' mbalaz len neda'."

²² Nach cate' bžin ben' bocua'anlene' chope mil, bena' gože'ne': "Xana', ni de da' chope mil dan' bocua'anleno' neda', na' ba bena' gan yechope mil."

²³ Nach gož xanen' le': "Ba beno' da' güen. Naco' mos güen na' ba beno' ca' cheyala' gono'. Na' dan' beno' can' cheyala' gonon' len da' daon' bocua'anlena' le', da'n'an' gona' lo' nao' da' xench. Gwyo'o cont so' mbalaz len neda'."

²⁴ Nach cate' bezžin ben' bocua'anlene' to mil, nach gože' xane'na': "Nga de xmecho' dan' bocua'anleno' neda'. Nezda' naco' to bene' znia. Chelapo' da' gosaz bene' yoble, na' chotobo' coseš ga goson bene' yoble žin.

²⁵ Da'n'an' gwya'a jače'ena' to yechw na' bcuaša' xmechon', le bžeba' še gwñitan'. Na' na'a bežišcan'."

²⁶ Nach xanen' gože' le': "iNaco' mos mal, na' naco' xagüed! Nezdo' chelapa' ga gosaz bene' yoble, na' chotoba' coseš ga goson bene' yoble žin.

²⁷ Na' lagüe da' ñezdo' chona' ca' çbixchen' bi gwlejo' xmechuan' bene' yoble cont yezi'an len yichjen na'a ba bela'a?"

²⁸ Nach gože' xmosë' ca' yezica'chle: "Yeca'ale mechon' dan' bocua'anlena' bengä na' gwnežjwlen ben' ba noxe' ši mil.

²⁹ Can' naquen, note'teze bene' chon güen len dan' chnežjo xanen' le', xanen' gwnežjochcze' çe', cont gata' da' zcha'och çe'. Perw na' note'teze bene' bi chgone' žin dan' chnežjo xanen' le', yeca'a xanen' da' daon' noxe'na'.

³⁰ Na' ca' nac mos xagüed nga, le yebeje' le çe'exoxje' gan' nac chol' na' cuežyaše' na' gagwxejte laye' dan' leca žaglagüe'."

Can' gac cate' Jesúsen' gone' yela' justis çe yogo' nación

³¹ "Diosen' gwsele' neda' golja' benach, na' cate' yida' da' yoble nsa'a yela' zaca' juisyw chia' na' nchi'a yogo' angl chia' ca', cana'ch cui'a nabi'a güen juisyw can' chnabia' Dios ben' zoa yaba.

³² Na' yapa' yogo' bene' çe yogo' nación ca' yeside' laguan'. Na' cate' ba nita' yogüe' na' la'ane' can' chon to bene' güeye xila' cate' chebeje' partle xila' ca' na' partle šib ca'.

³³ Na' bene' ca' zjanac bene' güen lao Diosen' dan' ba gosejnilaže' neda', gwnita' legaque' cuitan' šla'a licha. Perw bene' mal ca', gwnita' legaque' cuitan' šla'a robes.

³⁴ Na' neda' naca' rey yapa' bene' ca' nita' šla'a lichan': "Ba ben Xa' Diosen' cont le'e soale mbalaz. Le da nga cont gona' nabi'a'le txen len neda' can' ba nžia' bia' Diosen' cate' gwxtete yežlio.

³⁵ Gona' cont nabi'a'cho txen, le cate' gwdona' le'e benle dan' gwdagua'. Na' cate' gwbiłda' nis, le'e benle da' güe'aja'. Na' cate' goca' ca' bene' zito' le'e bleble neda' ližlen'.

³⁶ Na' cate' bi gota' da' çhaza', le'e benle da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bedena'le neda'."

³⁷ Na' bene' güen ca' yese'e neda': "Xanto', çbaten' ble'eto' le' gwdono' na' bento' da' gwddago? Na' çbaten' gwbiłdo' na' bento' da' güe'ajo'?"

³⁸ Na' çbaten' goco' ca' bene' zito' na' blebto' le'? Na' çbaten' ble'eto' le' bi de da' çhazo' na' bento' da' gwyazo'?"

³⁹ Na' çbaten' gocšendo' o goto' ližya na' bedena'to' le'?"

⁴⁰ Na' neda' naca' rey yape'gaca'ne': "Da' li žia' le'e, bene' ca' chesejnilaže' neda' zjanaque' ca' biša' na' ca' zana'. Na' yogo' ni'a cate' beyaše'laže'le' legaque', la'czla' bitec bi zjazaque' len benachen', lencze nedan' beyaše'laže'le'."

⁴¹ "Nach bene' ca' nita' šla'a robesle, bene' mal ca', yape'gaca'ne': "Le cuas ca'ale. Ba žia' bia' chele cuiayi'le yela' güen da' mal chelen'. Le šja'ac lo yi' gabił dan' bi cheyol, yi' dan' bxn Diosen' cont saca'zi' Satanás toli tocaņe len da' xigüe' ca' cheson xšinen.

⁴² Le šja'ac lo yi' gabiłen', le cate' gwdona' bitw benle dan' gagua'. Cate' gwbiłda' bitw benle da' ye'aja'.

⁴³ Cate' goca' ca' bene' zito' bitw bleble neda' liže. Cate' bi gota' da' çhaza' bitw benle da' çhaza'. Cate' gocšenda' na' cate' gota' ližya, bitw bedena'le neda'."

⁴⁴ Nach legaque' lecze yosoži'e xtižan' yesene': "Xanto', çbaten' bi beyaše'to' le' cate' gwdono' o gwbiłdo', o goco' bene' zito', o bi gota' da' çhazo', o gocšendo', o goto' ližyan'?"

⁴⁵ Na' yeyož yese'e neda' ca' nach yape'gaca'ne': "Lagüe' dan' bi beyaše'laže'le' bene' ca' chesejnilaže' neda', la'cze bibi zjazaque' len benachen', da'nan' lencze nedan' bi beyaše'laže'le'."

⁴⁶ Nach bene' mal ca' yesezaca'zi'e toli tocaņe. Perw bene' ca' chesone' güen lao Diosen' yesezoe' mbalaz toli tocaņe.

26

Bosoxi'e nac yesone' yesezene' Jesúsen'

(Mr. 14:1-2; Lc. 22:1-2; Jn. 11:45-53)

¹ Cate' beyož be' Jesúsen' diža' ca', gože' bene' ca' gwleje' cont zjanaque' txen len le':

² —Ba ñezele yechope žazen' gała' ĩni pascw chechon'. Na' cana' gaca' lo na' bene' ca' chesegue'ede' neda' na' yesote' neda' yosode'e neda' to le'e yag cruz, neda' naca' ben' gwseła' Diosen' golja' benach.

³ Nach bxož gwnabia' ca' na' bene' ca' chososed chosolo'e dan' bzoj da' Moisésen' na' bene' gole blao ca' chesenabi'e nación Israel chechon' besedobe' chyo' o liž bxož blao ben' le Caifás.

⁴ Na' cheseyiljwlaže' naclen' yesone' yeseziye'e Jesúsen' cont yesezene'ne' yesote'ne'.

⁵ Na' gosene':

—Bi senchone' lo ĩnin' cont ca yesebec bene' žaš.

To no'ole bzoe' set zix yichj Jesúsen'

(Mr. 14:3-9; Jn. 12:1-8)

⁶ Nach goquen' Jesúsen' len bene' ca' gwleje' cont zjanaque' txen len le' nite' Betania liž Simón ben' güe'e yižgüe' da' nzi' lepra.

⁷ Na' šlac chi' Jesúsen' cho'a mesen', bžin to no'ole noxe' to de yejese ga chož set da' chl'a zix' da' leca chzaca' la'ay. Na' no'olen' bzoachochje' seten' yichj Jesúsen'.

⁸ Na' bene' ca' zjanaque' txen len Jesúsen' cate' besele'ede' can' ben no'olen' beseže'e na' gosene':

—¿Bixchen' con benditjde' set zix' nga?

⁹ Ša no bete' len, yesonen mechw xen na' yosonežjuen' gaclenen bene' yaše'.

¹⁰ Jesúsen' goche'ede' bin' gosene' nach gože' legaque':

—¿Bixchen' chnele che no'olen'? Dan' bene' len neda' nga naquen güen.

¹¹ Le bene' yaše' ca' bate'teze nita'cze' len le'e, san nedan' bich soa' yesša len le'e.

¹² Dan' bguazje'nda' set zixen' bene' dan' cheyla' yesone' len neda' cate' gaša'.

¹³ Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de yesene' can' ben no'ol nga, cont šjasyeze'ede'ne'.

Judas Iscariote bene' Jesúsen' lo na' bene' chesegue'ede' le'

(Mr. 14:10-11; Lc. 22:3-6)

¹⁴ Gwde da' quinga, Judas Iscariote ben' goque' txen len bene' šižinw ca' ben' gwlej Jesúsen' cont zjanaque' txen len le', gwyeje' jañe'e bxož gwnabia' ca'.

¹⁵ Na' ježe' legaque':

—¿Gaca'te' gonle neda' cont gwdia' Jesúsen' lo na'le'?

Nach bosoxi'a bene' ca' yosonežjue'ne' šichoa mechw plata na' bosonežjue'nen'.

¹⁶ Nach cana' Judasen' gwzologüe' gwđiljwlaže' nac gone' gwdie' Jesúsen' lo na'gaquen'.

Jesúsen' blo'ede' legaque' can' yesone' šjasyeza'laže' yela' got chen'

(Mr. 14:12-25; Lc. 22:7-23; Jn. 13:21-30; I Co. 11:23-26)

¹⁷ Na' bžin ža čala' lni' caten' chesagüe' yetextil dan' bibi levadura yo'o, na' ža nechw che lnin' bene' ca' zjanaque' Jesúsen' txen ja'aque' gan' zoe' na' gose'ene':

—¿Gan' che'ndo' šjasini'ato' cont gagwcho xše' che pascon'?

¹⁸ Nach Jesúsen' gože' legaque':

—Le'e šja'ac ciudan' gan' zoa to bene' byo ben' nombia'cho na' ye'lne': "Maestron' že' ba zoa žin ža gac da' cheyla' gac che', na' ližo' nga che'nde' gagwleno'ne' xše' lni' pascon'."

¹⁹ Nach bene' ca' gosone' can' gož Jesúsen' legaque', jasesini'e xše' že' lina'.

²⁰ Na' cate' beyož gwxoā gwbiž, Jesúsen' len bene' šižinw ca' gwleje' cont zjanaque' le' txen gosebi'e cho'a mesen' gosagüe'.

²¹ Na' šlac chesagüen' gož Jesúsen' legaque':

—Da' li žia' le'e, to le'e gwdele neda' lo na' bene' ca' chesegue'e neda'.

²² Nach legaque' besyeyaše'laže'de', nach gosezologüe' tgüeje tgüeje' gosenabde' le' gose'ene':

—Xana', žnedan' gona' ca'?

²³ Nach gože' legaque':

—To ben' chagw len neda' txen toz lo' ye'en, le' gwdie' neda' lo na' bene' ca'.

²⁴ Na' gac chia' can' nyoj le'e Xtiža' Diosen', neda' naca' ben' gwšela' Diosen' golja' beñach, perw nyaše'chguaze nac ben' gwdie' neda' lo na' bene' ca'. Yejni'acle ša bi golje'.

²⁵ Nach Judasen' ben' za' gwdie' Jesúsen' lo na' bene' ca' gože'ne':

—Maestrw, žnedan' gwdia' le' lo na' bene' ca'?

Jesúsen' gože'ne':

—Le len'.

²⁶ Na' šlac chesagüen', Jesúsen' gwxi'e to yetextilen' na' beyož be'e yela' choxcen che Dios, bzojxen' na' bnežjuen' bene' ca' zjanaque' le' txen, gože' legaque':

—Le gagon'. Lenña' cuerp chian'.

²⁷ Nach bexue' to vas gan' yože nis uvasen', na' beyož be'e yela' choxcen che Dios boznežjuen' legaque', goze'ene':

—Yogo'le, le ye'ej late' güeje dan' yože lo' vas nga.

²⁸ Da' nga xčhena' na' čhazan' laljen neche xtola' yogo'lol beñach. Na' laljen cont solao gac da' cob dan' gwna Diosen' gone' gaclene' beñachen'.

²⁹ Čhnia' le'e, bich ye'aja' nis uvas na'a. Cate'ch žin ža ba zoacho txen gan' zoa Xa' Diosen' čhnabi'e, cana' ye'ejan' da' yoble.

Jesúsen' gwne' Pedroa' bi chebe' še nombi'e le'

(Mr. 14:26-31; Lc. 22:31-34; Jn. 13:36-38)

³⁰ Na' beyož gosonxene' Diosen' len to da' gosole', nach gosa'aque' ja'aque' Ya'a Olivos.

³¹ Na' šlac zjangüe'e nezen' Jesúsen' gože' legaque':

—Na'aže' yogo'le cuejyichje neda' neche dan' gac chian'. Le nyojczen le'e Xtiza' Diosen' žan: "Gota' bene' güeye' xilan' na' xila' ca' yesaslasba'."

³² Perw na' cate' yosban Diosen' neda' ladjo bene' guat ca', yobch yeya'a Galilea ca le'e.

³³ Nach Pedroa' gože' Jesúsen':

—La' yogo' bene' quinga yesebejyichje' le', neda' gwbat gona' ca'.

³⁴ Jesúsen' gože' le':

—Da' li žia' le', biña' cuež jean' na'aže' cate' gac šon' ni'a bi chčebo' še nombi'o neda'.

³⁵ Nach Pedroa' gwne':

—La'czla' še chonen byen guatlencza' le', gwbat nia' bi nombi'a le'.

Na' lecze ca' yogo' bene' šižinw ca' zjanaque' Jesúsen' txen gosene' ca'.

Jesúsen' bol güiže' Diosen' to latje dan' nzi' Getsemani'

(Mr. 14:32-42; Lc. 22:39-46)

³⁶ Nach besežine' latje gan' nzi' Getsemani', na' Jesúsen' gože' bene' ca' zjanaque' le' txen:

—Ngaze le cue' šlac ša'a na'le šjal güiža' Diosen'.

³⁷ Na' gwčhe'e Pedroa' len chop xi'in Zebedeo, Jacobon' len Juanna'. Na' Jesúsen' gwzolao gocyase'chgüede', na' benchgüe' xbab.

³⁸ Nach gože' legaque':

—Lo' yichjlažda'oguan' chacyaše'chgüeda', chacda' con gatcza' catequen' chžaglagua'. Nga le yega'an bi tasle, le na' txen len neda'.

³⁹ Nach Jesúsen' gwžialagüe' yelate' na' jachaze' lo yon' coscho'ale nach bol güiže' Diosen', gwne':

—Xa', še guac ten ca'ale, benšca cont bi saca'zi'a na' bi yesote'nda' can' ba zoa gaca'. Perw bi chnaba' gac da' nia' neda', san gac can' nao' le'.

⁴⁰ Nach beyeje' gan' nita' bene' ca' šone na' ble'ede' zjanite' chesetase'. Na' gože' Pedroa':

—¿Ne šlož dao' ca goc cuejle bišgal len neda'?

⁴¹ Bi tasle na' le yoł güiž Dios cont bi gon gwxyien' le'e gan'. Nežda' che'nele na'zle len neda' perw bi chzoele.

⁴² Na' gosze'e gan' nite' na' da' yoble jał güiže' Diosen', gwne':

—Xa', še gac ten ca'ale, benšca cont bi saca'zi'a na' bi yesote'nda', perw gac con can' che'ndo' le'.

⁴³ Na' bezeyeje' gan' niten' na' da' yoble ble'ede' chesetase' le ba chesežode' yejlagüen' bišgal.

⁴⁴ Na' gwze'e da' yoble gan' nite'na' jał güiže' Diosen' da' gwyone ni'a, na' goznacze' da' yoble can' ba gwnen'.

⁴⁵ Na' bezžine' gan' nita' bene' ca' šone nach gože' legaque':

—Na'ach guaque tasle na' yezi'laže'le. Ba gole gwde to bene' neda' lo na' bene' güen da' xinj ca', neda' naca' ben' gwseła' Diosen' golja' benačh.

⁴⁶ Le chas. Le yeyo'o. Ba za' ben' gon neda' lo na'gaque'.

Judasen' bdie' Jesúsen' lo na' bene' chesegue'ede' le'

(Mr. 14:43-50; Lc. 22:47-53; Jn. 18:2-11)

⁴⁷ Ne' choe'te Jesúsen' dižan' ca' cate' bžin Judas ben' goque' txen len bene' šižinw ca' gwlej Jesúsen' cont zjanaque' le' txen. Na' zan bene' zja'ac len le' zjanoxe' no yag, no spada, bene' goseseła' bžoz gwnabia' ca' na' bene' gole blao ca' chesenabi'e nación Israel chechon'.

⁴⁸ Na' Judas ben' bdie' le' lo na' bene' ca', gože' legaque' nac yesežežde' non' yesezene', gwne':

—Ben' gwnopa' xague', le'na' Jesús. Le sene'.

⁴⁹ Nach la' gwbiga'te' cuit Jesúsen', gože'ne':

—Patiox, Maestrw.

Na' bnope'ne'.

⁵⁰ Jesúsen' gože'ne':

—Migw chia', žbixčhen' zao' nga?

Nach la' gosebiga'te' bene' ca' gosezene' Jesúsen' na' goseče'ene'.

⁵¹ Na' to ben' nac txen len Jesúsen' gwleje' spada čhen' na' gwদিনen' mos čhe bžoz blaon' gwčhogte' šla'a nagen'.

⁵² Nach Jesúsen' gože'ne':

—Bego'o spada chion' lo' liženna', le yogo' bene' chesote' bene' len spada, lecze len chesatlene'.

⁵³ ŽBi neždo' guac nabda' Xan' cont la' seła'te' angl zan juisjw bene' yesaclene' neda'?

⁵⁴ Perw še gona' ca' žnacxe gac dan' cheyala' gac dan' nyoj Xtiza' Diosen' žan quinga gaquen'?

⁵⁵ Nach Jesúsen' gože' bene' ca' zjasezen le':

—¿Bixchen' nonle neda' ca to bene' gwban za'acle zedexi'le neda' len spada len yag? Yogo' ža gwchi'a chyo'o yodao' blaon' bsed blo'eda' bene' že'na' na' bi gwzenle neda'.

⁵⁶ Perw chac da' qui cont chac can' ža Xtiža' Diosen' dan' bosozoj da' bene' goso'e xtižen' cani'.

Nach yogo' bene' ca' zjanaque' Jesúsen' txen bosoxonje' gosebejyichje'ne'.

Goseche'e Jesúsen' lao bene' ca' chesenabia' nación Israelen'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Na' bene' ca' gosezen Jesúsen' goseche'ene' lao Caifás ben' nac bħoz blaon' gan' ba zjanžag bene' ca' chososed chosolo'e dan' bzoj da' Moisésen' na' len bene' gole blaon' ca' chesenabi'e nación chechon'.

⁵⁸ Nach Pedroa' na'ogüe' Jesúsen' zito' zito'le bžinte' liž bħoz blaon', na' gwyo'e chyo'ona' gwchi'e len bene' ca' chesape' yodao' blaon', le goclaže' le'ede' naquen' zelao gac che Jesúsen'.

⁵⁹ Nach yogo' bħoz gwnabia' ca' na' yezica'chle bene' gole blaon' ca' chesenabi'e nación chechon' cheseyiljwlaže' bi diža' güenlaže' yeso'e che Jesúsen' cont yesote'ne'.

⁶⁰ Perw goc sša bitw besyeželde' bi diža' güenlaže' yosode'ede' le' cont gosožie'ne' xya la'czla' bene' zan gosenite' gosene' diža' güenlažen' contr le'. Gwde na' besechoj yečhope bene' na' bedilen can' gosenen'.

⁶¹ Quinga gosene':

—Benga gwne': "Neda' guac yochinja' yodao' blaon' gan' chonxenko Diosen', na' šone žaze yeyonan'."

⁶² Nach gwzoža' bħoz blaon' gože' Jesúsen':

—¿Bibi de bi nao' ca' nac da' nga chosocuiš bene' quinga le'?

⁶³ Bitwbi gwna Jesúsen'. Nach gož bħoz blaon' le':

—Chnia' le' gwna neto' še le len' Cristo ben' nac dogualje Xi'ın Diosen', ben' gwleje' cont yedenabi'e. Na' Diosen' ben' zoa toli' tocane cue'e da' bałi še ledo' can' žon'.

⁶⁴ Jesúsen' gože'ne':

—Le can' žale nan' naca'. Diosen' gwsele' neda' golja' benach. Na' chnia' le'e, gwžin ža le'ele neda' chi'a cuít Diosen' ben' nape la'zelagüe yela' guac xen, na' nabi'a txen len le', na' le'ele yetja' yaban' to lo' bejw.

⁶⁵ Cate' bene bħoz blaon' xtiža' Jesúsen', gwšo' gwčeza'te xen', le par le' da' mal juisyon' gwna Jesúsen' cui'e cuít Diosen' nabi'e. Nach gwne':

—Ba benecho na'a ba gwne' che Diosen' dan' gwne' ca'. Noch no chyažje no gagw xya che'.

⁶⁶ ¿Nac žale che'?

Nach bene' ca' bosyoži'en gose'ene':

—Cheyala' gate' dan' chon cuine' ca' Dios.

⁶⁷ Nach bosožie' xene' cho'alao Jesúsen', na' gosebaže'ne', na' bale' gosegape' xague'na'.

⁶⁸ Nach gose'ene':

—Še len' naco' Criston', gwneya'ašč, gwna neto', žnon' chgapa' le'?

Pedroa' bi gwchebe' še nombi'e Jesúsen'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' šlac chac da' quinga, chi' Pedroa' chyo'ona', cate' bžin to no'ole güen žin che Caifásen', gože'ne':

—Lencze le' naco' txen len Jesús bene' Galilean'.

⁷⁰ Na' lao yogo' bene' ca' že'na', Pedroa' bitw gwchebe' še naque' txen len Jesúsen', na' gože' no'olen':

—Bi nežda' bi dižan' cho'o.

⁷¹ Gwde beyož gože' no'olen' ca' beyeje' cho'a puert na'le, na' bezle'e yeto no'ole güen žinna' le', na' goze'e bene' ca' že'na':

—Lecze len benga naque' txen len Jesús bene' Nazareten'.

⁷² Da' yoble bitw gwchebe' še naque' txen len Jesúsen', nach gwne':

—Na' zoa Diosen' cue'e da' bałi bitw nombi'a bena' žo' ca'.

⁷³ Na' goccze šlož, gosebiga' bene' ca' že'na' goseze'e Pedroa':

—Da' licze, naco' txen len legaque', le nacia' chnio' can' chesene bene' Galilea ca'.

⁷⁴ Nach Pedroa' čop šone ni'a gwne':

—Diosen' gone' ga saca'zi'a še chonlaža' dan' žia' bi nombi'a bena'.

Na' la' gwchežte to jea.

⁷⁵ Nach jayze'e Pedroa' can' gož Jesúsen' le': "Biņa' cuež jean' cate' gac šone ni'a bi chchebo' še nombi'o neda'." Nach beze'e leca gwchežyaše'.

27

*Goseche'e Jesúsen' lao Pilaton'**(Mr. 15:1; Lc. 23:1-2; Jn. 18:28-32)*

¹ Na' cate' gwyeni', yogo' b̄xoz gwnabia' ca' na' bene' gole blao ca' chesenabia' nación chechon' besyedobe' na' gosechoglagüen' yesote' Jesúsen'.

² Nach bosocheje'ne' na' goseche'ene' jasesane'ne' lo' na' gobernador Poncio Pilato.

Judasen' beyot cuine'

³ Na' Judasen' ben' bdie' Jesúsen' lo' na' bene' ca', cate' gocbe'ede' ba gosechoglagüen' yesote' Jesúsen', betinjde' dan' bdie' le' lo' na' b̄xoz gwnabia' ca' na' bene' gole blao ca'. Nach gwyeje' laogaquen' par bonežjue' legaque' šichoa mechw platan'.

⁴ Nach gože' legaque':

—Malen' bena' bdia' lo' na' len' to bene' bi nape' doła'.

Na' gose'ene':

—Bitwbi doła' nap neto' dan' beno' ca'.

⁵ Nach Judasen' bozale' mechw ca' lo' yodao' blaon', nach beze'e na' jaylo'o do yene' beyot cuine'.

⁶ Beyož beza' Judasen', b̄xoz gwnabia' ca' bosyotobe' mechon'. Na' gose' lježe':

—Bitw gac co'ochon lo' caj gan' yo'o mechw che yodaon', le naquen mechw dan' gwdixjwcho cont yega'a yela' mban che to bene'.

⁷ Na' bosoxi'e yesezi'e len mechon' to yežlio dan' de che to bene' güen yeso'. Na' gosezi'en par to capsantw ga yosocuaše' bene' zito'.

⁸ Na' yežlion' ne' nzin' Yežlio Chen ža na'aža, le gosezi'en len mechw dan' goseyixjue' cont gosote' Jesúsen'.

⁹ Can' goc cont goc can' bzoj da' Jeremías ben' be' xtiža' Diosen' cani', gan' žan: "Besyezi'e šichoa mechw platan', dan' gosena bene' Israel zaca' bena'.

¹⁰ Na' gosezi'e yežlio che to bene' güen yeso', can' gwna Xancho Diosen' neda'."

*Bosocuiše' Jesúsen' lao Pilaton'**(Mr. 15:2-5; Lc. 23:3-5; Jn. 18:33-38)*

¹¹ Na' goseche'e Jesúsen' lao gobernadore' na' šlac zeche' lagüen', gobernadore' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

¹² Na' cate' b̄xoz gwnabia' ca' na' bene' gole blao ca' chesenabia' nación chechon' bosocuiše' Jesúsen', bitw bi gwne'.

¹³ Nach Pilaton' gože'ne':

—¿Bi chendo' catec da' zan xya nga chesagüe' chio'?

¹⁴ Perw Jesúsen' ne to xtiže'na' bitw boži'e, na' bebanechgüe gobernadore'.

*Gosechoglagüen' yesote' Jesúsen'**(Mr. 15:6-20; Lc. 23:13-25; Jn. 18:38-19:16)*

¹⁵ Na' gota' costumbr, gobernadore' gwsane' to bene' de ližya cate' čala' lni pascw checho, con bene' yesenab bene' gualaž chechon'.

¹⁶ Na' ližya na' de to bene' chzechgua che' naque' bene' güen da' xinj, na' le' Barrabás.

¹⁷ Nach Pilaton' gože' bene' ca' zjanžaguen':

—Noe' bene' quinga chaclaže'le gwsana'? ¿Gwsana' Barrabás še Jesús nga ben' chesene' naque' Cristo ben' gwlej Diosen' cont yedenabi'e?

¹⁸ Gocbe'e Pilaton' dan' chesacxi'a b̄xoz gwnabia' ca' Jesúsen', da'nan' bosodie' le' lo' ne'en.

¹⁹ Ca' čhi' Pilaton' gan' chone' yela' justisen', cate' bžin to rson da' gwsela' no'ol čen', gože'ne': "Bitw bi gondo' bena', le bibi doła' nape'. Nže'e gwñeda'ne' yel na' bžaglachgua' neče dan' chac che bena'."

²⁰ Na' b̄xoz gwnabia' ca' na' bene' gole blao ca' chesenabi'e nación chechon' gosego'oyele' bene' ca' že'na' cont yesenabe' gwsane' Barrabásen' na' yesenabe' yesote' Jesúsen'.

²¹ Nach gobernadore' gože' legaque' da' yoble:

—¿No bene' quinga čope chaclaže'le gwsana'?

Nach gose'ene':

—Barrabásna'.

²² Pilaton' gože' legaque':

—¿Bixe gona' len Jesús nga ben' chesene' naque' Cristo ben' gwlej Diosen' cont yedenabi'e?

Na' yogüe' gose'ene':

—¿Bde' le'e yag cruz!

²³ Nach gož gobernadore' legaque':

—¿Bixe da xinj nonen'?

Na' legaque' da' yoble bososya'achgüe' gose'ene':

—jBde'e le'e yag cruz!

²⁴ Gocbe'e Pilaton' bicze bi gac gone'. Ba chyała'ch chesone' žaš juisyw. Nach gwsele' to bene' jaxi'e nis cont bone'e lao bene' ca' že'na' na' gože' legaque':

—Bibi da' xinj non benga. Bitw naquen xbaga' dan' gotlene', xbaga' le'e naquen še ba betwlene'.

²⁵ Nach yogo' bene' ca' gose'ene':

—Xbaga' neto' na' xbaga' xi'into' naquen che yela' got che benga.

²⁶ Nach bsan Pilaton' Barrabásen' can' gosenaben'. Perw na' bene' mandadw gosot goseyin soldadw che' ca' Jesúsen', nach bene' le' lo na'gaque' cont yosode'ene' le'e yag cruzen'.

²⁷ Nach soldadw che gobernadore' goseche'e Jesúsen' lo' yo'o che gobernadore', nach bosyotobe' yogo' soldadw ca'.

²⁸ Na' goseyine' xalana' Jesúsen' na' bosoguacue'ne' to lache' xna ca dan' chesaz rey ca'.

²⁹ Na' gosone' to corona de xis yeše' bosozoen' yichjen', na' ne'e licha bosogoxe'ne' to xis. Na' bosozoa xibe' lagüen' par gosonle' che', nach gose'ene':

—jViva rey che bene' Israel!

³⁰ Nach bosoži'ene' xene', na' besyeque'e xis dan' noxen' na' bosozeten' yichje'.

³¹ Na' beyož gosonle' che', besyeque'e lache' xnan' dan' bosoguacue'nen' na' bosyoguacue'ne' xacze'. Nach goseche'ene' cont jasede'ene' le'e yag cruzen'.

Bosode'e Jesúsen' le'e yag cruzen'

(Mr. 15:21-32; Lc. 23:26-43; Jn. 19:17-27)

³² Nach besechoje' ciudan' na' besyežague' to bene' Cirene le Simón na' gosone' byen bosogüe'ene' yag cruz che Jesúsen'.

³³ Na' besežine' to latje gan' nzi' Gólgota, zeje diža' latje che žit yichj bene' guat.

³⁴ Na' bosonežjue' Jesúsen' vino da' nchixe to da' zła' par ye'ejen', perw le' con bnixen', bitw güe'ejen'.

³⁵ Na' cate' beyož bosode'ene' le'e yag cruzen', soldadw ca' gosone' rifa cate' besyele'e xalane' cont gota'bia' noe' yechelen'. Na' dan' gosone' ca' goc can' bzoj da' ben' be' xtiža' Diosen' cani', gwne': "Yesyele'e xalanan' na' yesezi' che che', yesonen' rifa."

³⁶ Nach gosebi'e gosape'ne'.

³⁷ Na' yichj yag cruzen' gan' de'ena' bosozoje' dan' bcuiš le', na' žan: "Benga Jesús rey che bene' Israel ca'."

³⁸ Na' lecze cana' bosode'e chope bene' gwban le'e yečhope yag cruz. Toe' gwda' cuit Jesúsen' licha na' yetoe' cuite' robes.

³⁹ Na' bene' ca' gosede gan' da' Jesúsen' goson yichjlagüe' dan' leca besegue'ede' le', na' gosezi'diže' le'.

⁴⁰ gose'ene':

—Len' gwnao' yochinjjo' yodao' blaon' na' šone žaze yeyonon', bosla cuino'. Še len' naco' doguale Xi'in Diosen', beyetj le'e yag cruzen'.

⁴¹ Na' len bxož gwnabia' ca' na' len bene' ca' chososed chosolo'e dan' bzoj da' Moisésen' na' len bene' fariseo ca', na' len bene' gole blao ca' chesenabi'e nación chechon', yogüe' gosezi'diže'ne' na' gosene':

⁴² —jYezica'chle bene' bosle' na' bi chac yosla cuine'! Še naque' rey che chio' bene' Israel, yeletj cuine' le'e yag cruzen' na'a na' šejle'cho che'.

⁴³ Le' chejnilaže' Diosen', le gwne': "Dogualje Xi'in Dios neda'." jNa' le'echo yosla Diosen' le' na'a še chacde' le'!

⁴⁴ Na' bene' gwban ca' zjada' le'e yag cruzen' chop la'a cuiten', lecze gosezi'diže' le'.

Can' goc cate' got Jesúsen'

(Mr. 15:33-41; Lc. 23:44-49; Jn. 19:28-30)

⁴⁵ Na' do guagwbiz doxen yežlion' goc chol bžinte cheda šone.

⁴⁶ Na' do cheda šone Jesúsen' bosye'e zižje gwne':

—Elí, Elí, ¿lama sabactani? (Zeje diža': Dios chia', Dios chia', ¿bixchen' ba gwlejjichjo' neda'?)

⁴⁷ Na' bał bene' ca' zjanita' na' gosende' na' gosene':

—Le gwzenag, benga chol güiže' da' Elías ben' be' xtiža' Diosen' cani'.

⁴⁸ Nach la' bchojte to bene' gwyejsese' jaxi'e to esponja na' bzažeden' vino zichj na' bzoen' to lao xis tone nach jažiguen' cho'a Jesúsen' cont xopen'.

⁴⁹ Na' yebałe' gose'e bena':

—Cuezcho, yeše še güide Elíasen' yosle'ne'.

⁵⁰ Nach da' yoble Jesúsen' bosye'e zižje na' gote'.

⁵¹ Na' ca hora' lache' da' ze lo' yodao' blaon' bcheza' gachoŕen gwza'te yichjen bžinte che'ele. Na' gwxo'chgua gosoxjite vej ca'.

⁵² Na' ľecze beseyaljo ba che bene' ba gosat. Na' zan da' bene' ca' gosejnilaže' Diosen' beseybane' ladjo bene' guat ca'.

⁵³ Nach caten' ba beban Jesúsen' ladjo bene' guat ca', besyechoje' lo' ba chegaquen' na' jaya'aque' jaselo'elagüe' ciuda Jerusalén. Na' zan bene' besele'ede' ľegaque'.

⁵⁴ Na' ca nac xan soldadw ca' na' bene' ca' nche'e, bene' nita' chesape' Jesúsen', cate' besele'ede' can' gwxo' na' bichle da' ca' goc, besežebchgüe', na' gosene':

—Da' ľi ľe benga goc dogualje Xi'in Dios.

⁵⁵ Na' ľecze nita' zan no'ole ladjo bene' ca' na' goseze' zito' chesene'e can' chaquen'. No'ol ca' gosa'ogüe' Jesúsen' cate' beze'e distritw Galilean' par chesaclene' ľe' len bi da' chyažjde'.

⁵⁶ Na' len no'ol ca' María bene' Magdala, na' ľecze María ben' nac xna' Jacobo na' José, na' ľecze ca' xna' Jacobo na' Juan, xi'in Zebedeo.

Bosocuaše' Jesúsen'

(Mr. 15:42-47; Lc. 23:50-56; Jn. 19:38-42)

⁵⁷ Na' gwzoo to bene' gwñi'a bene' ciuda Arimatea le' José na' ba gwzoo chzenague' che Jesúsen'. Na' cate' ba chxoa gwbiž

⁵⁸ Josén' gweje' lao Pilaton' jaynabe' cuerp che Jesúsen'. Na' Pilaton' bene' mandadw bosonežjue'ne' cuerp chen'.

⁵⁹ Nach Josén' bego' o lo' ne'e cuerp che Jesúsen' na' blaže'ne' to lache' xen da' nyach.

⁶⁰ Na' gwlo'e cuerp chen' to lo' bloj cobe che' da' gwche'ene' ľe'e vej. Na' bloľe' to vej xen cho'a blojen' cont bseyjon ľen. Nach beze'e.

⁶¹ Na' María bene' yež Magdalan' na' yeto María yoble jasechi'e cho'a blojen'.

Bosozoe' bene' chesape' gan' jasecuaše' Jesúsen'

⁶² Na' beteyo, gwde žan' caten' chososiñi'e par ža che Diosen', besedobe bžox gwnabia' ca' na' bene' fariseo ca' na' ja'aque' gan' zoa Pilaton'.

⁶³ Na' gose'ene':

—Bene', ba jaysalaže'to' can' gwna da' bene' gwxiyen' cate' ne' mbane', gwne': “Yeyon ža yebana' ladjo bene' guat ca'.”

⁶⁴ Da'nan' gwseľa'šca bene' šjasedape' cho'a blojen' gan' jasecuaše'nen' cont bi šja'ac bene' ca' gosaque' Jesúsen' txen šeže'le šjasyeleje' cuerp chen' na' yese'e bene' ľe' bebane' ladjo bene' guat ca'. Le še yesaque bene' ba bebane' ladjo bene' guat ca', gonchen malech clcl ca' len diža' dan' gwđise' gwne' Diosen' gwseľe' ľe'.

⁶⁵ Nach Pilaton' gože' bene' ca':

—Goña' ľe'e soldadw ca'. Le che'e cont yesape' ga zelao yesezoede'.

⁶⁶ Nach ja'aque' len soldadw ca' na' bosochiše' sey ľe'e vej dan' da' cho'a blojen', na' bosonite' soldadw ca' gosapen'.

28

Jesúsen' bebane' ladjo bene' guat ca'

(Mr. 16:1-8; Lc. 24:1-12; Jn. 20:1-10)

¹ Na' cate' beyechj ža che Dios, baľ dmigw María bene' Magdala len María ben' yeto ja'aque' jasene'e gan' bosocuaše' Jesúsen'.

² Na' ľeca gwxo', le angl che Xanchon' betje' yaban', na' bžine' gwque'e vej dan' nseyjw cho'a blojen', na' gwch'i'e lo' yeja'.

³ Na' anglen' ľeca chactit cho'alagüen' cacze ga chep yes na' xalanen' naquen šiš xila' juisjyw ca' nac beye'.

⁴ Na' cate' besele'e bene' gop ca' ľe', ľeca gosexize' besežebe' na' gosebixe' gosatte' šlat.

⁵ Perw na' anglen' gože' no'ol ca':

—Bitw žeble. Neda' nežda' Jesúsen' ben' bosode'e ľe'e yag cruz nan' cheyjľwle.

⁶ Nono de nga. Ba bebane' ladjo bene' guat ca', can' gwnacze'. Na' ľe da, ľe na' latje nga gan' gosegüe'e cuerp chen'.

⁷ Bedao' le šjaya'ac le šjaidjuxe' bene' ca' zjanaque' Jesúsen' txen ye'gaclene' ba bebane' ladjo bene' guat ca'. Na' ye'gaclene' gwyobech Jesúsen' yežine' Galilean' clcl ca' ľegaque', na' Galilean' na' yesele'ede'ne'. Can' gwna Diosen' zedetixjue'eda' ľe'e.

⁸ Nach no'ol ca' ľa' besyeya'actie' cho'a blojen' do chesežebze' perw ľeca chesyebede', žjaya'acese' žjasyedixjue'ede' bene' ca' zjanaque' Jesúsen' txen can' goca'.

⁹ Na' šlac žjaya'aque' besyežague' Jesúsen' chanež. Nach bguape' ľegaque' tiox.

Na' no'ol ca' gosebigue' gan' zoa Jesúsen' bosozoo xibe' lagüen', na' goseyeľe' ni'e tantw besyebede', na' gosonxene' ľe'.

¹⁰ Jesúsen' gože' ľegaque':

—Bitw žeble. Le šjaydixjue'e bene' lježcho ca', cheyała' šjaya'aque' Galilean' cont yesele'ede' neda'.

Bene' gop ca' jasyedixjue'ede' bħoz ca' can' ba goca'

¹¹ Na' šlac zjaya'ac no'ol ca' ciudan', bał soldadw ca' bene' ca' gosape' gan' bosocuaše' Jesúsen' jaya'aque' ciudan' jasyedixjue'ede' bħoz gwnabia' ca' doxen can' ba goquen'.

¹² Nach besedobe bħoz gwnabia' ca' len bene' gole blao ca' chesenabia' nación chechon' na' bosoxi'e nac yesone' ca' nac dan' gose' soldadw ca' legaque'. Na' bosonežjue' soldadw ca' da' zcha'o mechw.

¹³ Gose'e legaque':

—Še no nabe le'e bin' goquen', na' ye'gaclene' šeže'le šlac chtasle bene' ca' gosaque' le' txen besyebeje' cuerp chen' lo' blojen' na' besyeyo'en ga yoble.

¹⁴ Na' še gobernadore' yende' diža' quinga, neto' šjašaljento'ne' cont bi že'e le'e na' cont bi gote' le'e.

¹⁵ Na' soldadw ca' gosezi'e mechon' dan' bosonežjue' legaquen', nach gosone' con can' gose'e legaque'. Na' ža na'aža yogo' can' gosena soldadw ca' ne' chesene' doxen gan' nita' bene' Israel gualaž chechon'.

Jesúsen' gože' legaque' yeso'e xtiže'na' yogo' nación

(Mr. 16:14-18; Lc. 24:36-49; Jn. 20:19-23)

¹⁶ Nach bene' ca' zjanaque' Jesúsen' txen, bene' ca' šnej, jaya'aque' Galilean' cont jasyešague' Jesúsen' to lo ya'a gan' gože' legaque' yesyežague'.

¹⁷ Na' cate' besele'ede' Jesúsen' gosonxene'ne'. Perw bia'cze to chope' gosacžejlaže' še le'na'.

¹⁸ Nach gwbiga' Jesúsen' gan' nite'na' na' gože' legaque':

—Ba ben Diosen' lo' na' doxen yeła' chnabian' dan' de yaban' na' yežlion'.

¹⁹ Da'nana' le šja'ac le šjased le šjalo'e bene' ca' že' yogo'lol nación cont yesejnilaže' neda'. Na' le gwzoe' nis cont yosolo'e le chesejnilaže' Xacho Diosen', na' chesejnilaže' neda' naca' dogualje Xi'ine', na' lencze Spiritw che'na'.

²⁰ Na' gwsed gwlo'elne' cont yesone' yogo'lol dan' ba bena' mandadw gonle. Neda' zoacza' len le'e yogo' ža, na' ca'cze ne' soa' len le'e cate'ch te che yežlion'. Da' na'zen' chzoja' na'a.

DIŽA' GÜEN DAN' BZOJ SAN MARCOS

Juan ben' bzoa bene' nis gwdixjue'ede' diža' güen che Diosen' latje daš
(Mt. 3:1-12; Lc. 3:1-9, 15-17; Jn. 1:19-28)

¹ Qui goc cate' gwxe xtiža' Jesucristo ben' nac dogualje Xi'in Dios.

² Da' Isaias ben' be' xtiža' Diosen' cani' bzoje' da' nga, žan:

Chšela' to bene' cuialagüe' laoguoñ' güe'e xtižon',
cont ba zjanita' bene' yosozenague' chio' cate' šejo'.

³ Bena' chne' zižje latje dašen' že':

"Le gonšagüe' yichjlažda'olen' cont gwzenagle che Xanchoñ' cate' yide';
le cuejyichj da' malen' chonle cont yichjlažda'olen' gaquen ca to nez da' ba gosonšagüe'."

⁴ Ca' goquen', Juan ben' chzoa bene' nis bžine' latje dašen' na' gože' bene' ca' besežag na'
cheyala' yesyetiñjde' xtoła'gaque' na' yesezoe' nis cont nitloa xtoła'gaque'.

⁵ Zan bene' za'ac do distritw Judea na' ciuda Jerusalén bosozenague' che diža' dan'
chyxjue'ede'. Na' cate' gosexoadole' bi da' xinj zjanone', Juanna' bzoje' legaque' nis lo' yegw
Jordán.

⁶ Xalana' Juanna' goquen de yiša' xa camello na' da' bchej šsine' goquen de yid, na'
gwdagüe' biše'zo len šina' beser yiže'.

⁷ Na' gwdixjue'ede' bene' xtiža' Diosen', gwne':

—Coža' na' za' za' to bene' zaca'che' ca neda', na' da' nacchgüe' bene' zaca', bi zaca' gona'
xmandadoe' lechja' no xele'.

⁸ Neda' ba bzoa' le'e nis, perw ben' za' zan' gone' cont soa Spiritw che Diosen' lo'
yichjlažda'olen' nabian' xbab chele.

Jesúsen' gwzoe' nis
(Mt. 3:13-17; Lc. 3:21-22)

⁹ Ca tiempa' Jesúsen' gwze'e lagüe yež Nazaret da' chi' ga mbane distritw Galilea, na'
Juanna' bzoje' le' nis lo' yegw Jordán.

¹⁰ Na' šlac chechoj Jesúsen' lo' nisen', Jesúsen' ble'ede' byaljw yaban' gan' zoa Diosen', na'
Spiritw che Diosen' betjen jasoan len le', na' ca hora' Spiriton' naquen ca nac ngolbex.

¹¹ Na' gosende' gwne' Dios ben' zoa yaba gwne':

—Len' naco' Xi'ina' bene' chacchgüeda', na' chebe chezaque'laže'chgüeda' chio'.

Satanásen' goclažen' co'oyelan' Jesúsen' cont gone' da' mal
(Mt. 4:1-11; Lc. 4:1-13)

¹² Nach Spiritw che Diosen' benen cont la' gwyejte Jesúsen' latje daš.

¹³ Na' gwzoe' latje dašen' choa ža ladjo be znia ca'. Na' Satanás dan' chnabia' da' xigüe' ca'
goclažen' co'oyelan' le' cont gone' da' mal. Nach beyoža' jasadlen angl che Diosen' le'.

Jesúsen' gwzoloa chyxjue'ede' xtiža' Diosen' distritw gan' nzi' Galilea
(Mt. 4:12-17; Lc. 4:14-15)

¹⁴ Beyož gosegüe'e Juanna' ližya, Jesúsen' beze'e beyeje' Galilea gan' jatixjue'ede' diža'
güen, gwne' Diosen' nabi'e yichjlaždao' bene' ca' yosozenag che'.

¹⁵ Jesúsen' gwne':

—Ba bžin ža cate' Diosen' nabi'e yichjlaždao' bene' yosozenagüe' che'. Le yetinje xtoła'len'
na' le šejle' diža' güen che Diosen' da' chyxjue'eda'.

Jesúsen' goxe' tap bene' gwxen beļ šja'aclene' le' txen
(Mt. 4:18-22; Lc. 5:1-11)

¹⁶ Jesúsen' chde' do cho'a nisdao' che Galilean' cate' ble'ede' chope bene' gwxen beļ, Simón
na' bene' biše' Andrés. Na' zjanite' chosožale' yixjw dan' chesezende' beļen' lo' nisa'.

¹⁷ Na' gož Jesúsen' legaque':

—Le šo'o len neda'. Nacle bene' gwxen beļ na' chbejle beļen' lo' nisen', perw na'a gona'
cont gaxle bene' yesyechoje' lo' da' malen'.

¹⁸ Nach la' bosocua'ante yixjw chen' na' jasa'aclene' le'.

¹⁹ Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan,
zjajo'e lo' barcw chesyeyonšagüe' yixjw chegaquen'.

²⁰ Na' Jesúsen' lecze goxe' legaque' šja'aclene' le' na' bosocua'ane' Zebedeon' ben' nac
xagaque lo' barcon' len bene' ca' chesaclen le', nach ja'aque' len Jesúsen'.

To bene' gwyo'o gwyaze' da' xigüen'
(Lc. 4:31-37)

²¹ Besežine' yež da' nzi' Capernaum, na' ža che Dios Jesúsen' gwyo'e lo' yodao' da' zoa na' na' gwzologüe' bsd blo'ede'.

²² Bene' ca' že' na' besyebande' can' bsd blo'ede', le can' bzejni'iden' nachbia' nezde' cayanen' nac xbab che Diosen', gague bzejni'ide' can' chosozejni'i ben' chosolo'e ley dan' bzoj da' Moisés.

²³ Na' lo' yodaon' zoa to bene' yo'o nyaze' da' xigüen', na' bosye'e gwne':

²⁴ —¿Bixchen' chgoša' chlaže' chio' len neto', Jesús bene' Nazaret? ¿Zedežiayo' neto'? Neda' nombi'a le' na' nezda' naco' bene' laždao' xilaže' juisyw bene' gwseļa' Dios.

²⁵ Nach Jesúsen' gože' da' xigüen':

—jššago', bechoj lo' yichjlaždao' benga!

²⁶ Na' da' xigüen' benen cont gwčhoļe bena', nach chosya'adiachguan bechojen lo' yichjlažda'ogüen'.

²⁷ Yogo' bene' ca' že' na' besyebande' na' gose' lježe':

—¿Bixen' chac? ¿Bixe da' coben' chlo'e benga? ¡Nachbia' nape' yela' chnabia' na' yela' guac, le da' xigüe' ca' chesonen da' že'!

²⁸ Na' ca' nac dan' ben Jesúsen' bedao'nez gos gwłalje dižan' doxen lagüe yež ca' gan' mbane Galilea.

Jesúsen' beyone' taobi' in che Simón Pedro

(Mt. 8:14-15; Lc. 4:38-39)

²⁹ Cate' besyechoje' lo' yodaon', Jesúsen' len Jacobo na' len Juan ja'aque' liž Simón na' Andrés.

³⁰ Na' taobi' in che Simónna' die' che'ede' xļa; na' gose'e Jesúsen':

—Benga die' che'ede'.

³¹ Nach jabiga' Jesúsen' na' bežue' taquen' gwłise'ne'. Na' ļa' beyactede', nach bsini'e da' gose'ej gosagüe'.

Jesúsen' beyone' zan bene' chese'ede'

(Mt. 8:16-17; Lc. 4:40-41)

³² Cate' ba gwxa gwbizen' na' ba gwxin, jasesane' lao Jesúsen' zan bene' chese'ede' na' bene' zjajo'o zjanyaze' da' xigüen'.

³³ Na' do yež bene' besedop besežague' cho'a yo'o gan' zoa Jesúsen'.

³⁴ Na' Jesúsen' beyone' bene' chese'ede' gwde gwdele yižgüe' na' bebeje' zan da' xigüe' da' zjajo'o zjanyaz bene', perw bitw bi'e latje bi yesenan, le legaquen zjaņezen non' nac le'.

Jesúsen' chyixjue'ede' xtiža' Diosen' Galilea

(Lc. 4:42-44)

³⁵ Šbaļ cate' ne' nac choļjesúsen' gwyase' na' gwze'e gwyeye' ga nono nļa' na' boļ güiže' Diosen'.

³⁶ Simón na' bene' lježe' ca' ja'aque' jasyediljue'ne'.

³⁷ Na' cate' besyeželde'ne' gose'ene':

—Yogo'ze bene' chesyeyiljue' le'.

³⁸ Perw Jesúsen' gože'ne':

—Le šo'o ga yoble ga nac gaļa'ze cont lecze šjatixjue'eda' xtiža' Diosen' na', le da'nana' ba gwza'a.

³⁹ Can' goc, Jesúsen' gwde' doxen gan' mbane Galilea gwduxjue'ede' xtiža' Diosen' to to yodao' che neto' bene' Israel, na' bebeje' da' xigüe' da' yo'o nyaz bene'.

Jesúsen' beyone' to bene' che'ede' lepra

(Mt. 8:1-4; Lc. 5:12-16)

⁴⁰ To bene' che'ede' yižgüe' dan' nzi' lepra jabigue' gan' zoa Jesúsen' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

⁴¹ Na' Jesúsen' beži'ilaže'de' le' na' bežue'ne' gwne':

—Chaclaža' yeyacdo'. Beyaque.

⁴² Cate' gwne' ca' ļa' bega'ate yižgüen' na' beyacde'.

⁴³ Nach Jesúsen' beseļe'ne' liže', bene' mandadw, gože'ne':

⁴⁴ —Notno yo'o can' ba beyona' le', con gwyej jana' bxoza' cont le'ede' bach beyacdo', na' bnežjw da' cheyaļa' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenežde' ba beyacdo'.

⁴⁵ Perw ben' bi bchejde', yogo'ze bene' gože' can' goca'. Da'nana' Jesúsa' bich goc šeje' con ca nļa'ze gate'teze yež, san con gwde' do yiže', na' bia'cze bene' za'ac yogo'ze yež jasene'e le'.

2

Jesúsen' beyone' to bene' bi chda śla'a ni'a ne'e

(Mt. 9:1-8; Lc. 5:17-26)

¹ Gwde to chop ža, Jesúsen' beyeje' da' yoble yež dan' nzi' Capernaum, na' bene' Capernaum ca' gosenezde' bežine' to yo'o ga ba gwzoacze'.

² Na' bedao' nez besežag bene' zan, ņecach gosezaque' yesenite' lo' yo'ona' ņe cho'a yo'on, nach Jesúsen' gwdixjue'ede' xtiža' Diosen' len legaque'.

³ Nach besežin xonj bene' cont jasesane' lao Jesúsen' to bene' xinj bene' bi chda śla'a ni'a ne'e; tap bene' zjano'ene'.

⁴ Perw bi chac yesežine' gan' zoa Jesúsen' catec chyi. Nach goseque'e tej dan' ncu'a yičj yo'on na' beseletje' le' na'le to lo cam dao'.

⁵ Na' cate' Jesúsen' goche'ede' can' chesejnilaže'nen', gože' bene' güe'na':

—Xi'ina', ba bezi'xena' xtolon'.

⁶ Bał bene' chososed chosolo'e ley dan' bzoj da' Moisésen' zjachi'e na', na' gosone' xbab:

⁷ “¿Bixčhen' chna benga ca'? le chon cuine' ca Dios. Nono zoa bene' gac yezi'xene' xtol'a' beňach. Toz Diosen' gac yezi'xenen'.”

⁸ Perw Jesúsen' chache'eczede' can' nac xbab čhegaquen', na' gože' legaque':

—¿Bixčhen' chza'laže'le ca'?

⁹ Še yapa'ne': “Ba bezi'xena' xtolona'”, bi ņezele še napa' yela' gwnabia' cont yezi'xena' xtol'e'na', san še yapa'ne': “Gwyas, beyoa' xcamon'”, na' nacbia' še napa' yela' guac gac can' gwnian'.

¹⁰ Perw neda' naca' ben' gwseła' Dios golja' beňach, gwlo'eda' le'e na'a zoa' yežlio nga napa' yela' gwnabia' cont yezi'xena' xtol'a' beňach.

Nach gože' bene' xinja':

¹¹ —Chapa' le', beyas, beyoa' xcamon' na' beyej ližo'.

¹² Ła' beyaste bene' xinja' cheseňa'te bene' ca' nita'na' na' beyoa' xcamen'. Da'nan' yog'o' bene' ca' besyebande' na' goso'e yela' choxclen čhe Diosen', gosene':

—Biňa' le'echo yela' guac dan' nac ca'.

Jesúsen' goxe' Leví cont gwyeljene'ne'

(Mt. 9:9-13; Lc. 5:27-32)

¹³ Da' yoble gwyej Jesúsen' cho'a nisdao' na' bene' zan besedobe' gan' zeje' na' bsd blo'ede' legaque' xtiža' Diosen'.

¹⁴ Na' Jesúsen' gwdie' latje gan' chi' Leví xi' in Alfeo chčhixjue' impuesto, na' cate' ble'ede' le' na' gože'ne':

—Da len neda'.

Nach gwzoža' Levin' na' gwyeljene'ne'.

¹⁵ Na' gwdena' goquen' chi' Jesúsen' liž Levin' na' güe'ej gwgdagwlene'ne' txen len zan bene' güečhixjw na' len yebał bene' güen da' xinj, na' len bene' ca' zjanaque' Jesúsen' txen, le zan bene' zja'ac zjanao' le'.

¹⁶ Perw na' bene' ca' chososed chosolo'e ley dan' bzoj da' Moisés na' bene' fariseo ca' cate' besele'ede' che'ej chagüe' txen len bene' ca', gose'e bene' ca' zjanaque' Jesúsen' txen:

—¿Nacxečhen' ben' chsd chlo'e le'e che'ej chagwlene' txen bene' güečhixjw na' yebał bene' güen da' xinj ca'?

¹⁷ Cate' Jesúsen' bende' can' gosene' na' gože' legaque':

—Bene' bi chesacšene bi cheseyažjde' bene' güen rmed. Bene' chesacšende', legaquen' cheseyažjde' bene' güen rmed. Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xinj. Legaquen' zjazaca'lebe' ca' bene' cheseyaže' bene' güen rmed.

Gosenabde' Jesúsen' bixčhen' bene' zjanaque' le' txen bi chesone' gwbas

(Mt. 9:14-17; Lc. 5:33-39)

¹⁸ To ža cate' bene' ca' zjanaque' txen len Juanna' na' bene' zjanaque' txen len bene' fariseo ca' gosezoe' gwbas, bał bene' jasa'aque' jaseňabde' Jesúsen':

—Bene' ca' zjanaque' txen len Juanna' na' bene' ca' zjanaque' txen len bene' fariseo ca' chesone' gwbas, na' bene' ca' zjanaque' txen len le' bi chesone' gwbas. ¿Bixčhen'?

¹⁹ Na' Jesúsen' gože' legaque':

—¿Guaque yesezoa gwbas bene' chaxe' to ga chac yela' güešagna' ślac ben' bšagnan' zolene' legaque'? Še zoa ben' bšagnan', bi gac yesone' gwbas.

²⁰ Perw žin ža cate' bich zoe' len legaque', cana'ch yesone' gwbas. Na' ca'czen' naquen len neda' na' len bene' ca' zjanaque' neda' txen.

²¹ 'Nono zoa bene' yode'e to lache'exo' na' yezoen' to lache' cobe, le lache' coben' yeben' cate' chiben' na' šon' lache' golen', na' gan' žon'na' gacchen da' xen.

²² Neca zoa bene' chgue'e vino cobe lo' bzod yide'exo', le vino coben' chšon' yide'exon' na' chbiayi' vinon' len yida'. San chesegue'e vino coben' lo' yid cobe cont bibi gaquen.

Bene' ca' zjanaque' Jesúsen' txen chesalje' dao ža che Dios

(Mt. 12:1-8; Lc. 6:1-5)

²³ To ža che Dios Jesúsen' gwdie' to ga nyaž trigw, na' bene' ca' zjanaque' le' txen gosezolagüe' chesalje' dao che trigon' šlac gosiedie' gan' nyaženŋa'.

²⁴ Nach bene' fariseon' gose'e le':

—Gwŋa'šc žbixčhen' cheson bene' ca' zjanaque' le' txen žin da' bi cheyała' yesone' ža che Dios?

²⁵ Na' Jesúsen' gože' legaue':

—žBiŋa' gwlable can' ben da' rey David to ža cate' le' na' bene' lježe' ca' gosedone'?

²⁶ Gwyo'o Davin' ga nac liž Dios cate' da' Abiatar goque' bžoz blaó, na' gwdagüe' yetextil da' nac che Dios da' bi chac gagw bene' bi nac bžoz, na' ľecze bnežjue' che bene' zja'ac len le'.

²⁷ Lecze gož Jesúsen' legaue':

—Diosen' gwleje' to ža cate' bi yeson benačhen' žin cont gaclenen benač, gague gwleje' benačhen' cont yesonxene' ža čhen'.

²⁸ Da'nan' naquen lo' na' nia' bi da' nac güen goncho lente cate' nac ža che Dios, neda' naca' ben' gwseła' Diosen' golja' benač.

3

Jesúsen' beyone' to bene' nxo'on' šla'a taque'

(Mt. 12:9-14; Lc. 6:6-11)

¹ Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' nxo'on' šla'a taque'.

² Na' bene' ca' že' lo' yodao'na' chosogüia chesene'e Jesúsen' še yeyone' bena' žan' nac ža che Dios cont de da' yosode'ede' yesagüe' xya che'.

³ Nach Jesúsen' gože' ben' nxo'on' taquen':

—Gwzoža' na' gwzecha nga.

⁴ Nach gwŋabde' bene' ca' yezica'chle:

—žBi da' cheyała' goncho ža che Dios? žGoncho da' güen, še goncho da' mal? žCheyała' yoslacho bene', še cheyała' gotchone'?

Perw na' legaue' gosenite' šižize.

⁵ Nach Jesúsen' gwŋe'e legaue', bže'e can' gosone' xbab, na' ľecze gocyaše'laže'de' dan' bi gosejle'e che', nach gože' ben':

—Bli naon'.

Na' blien', na' taquen' beyaquen binlo.

⁶ Nach besyežaš bene' fariseo ca' na' gosezolagüe' chosoxi'e len bene' ca' zjada' Herodes naquen' yesone' yesote' Jesúsen'.

Zan bene' nita' cho'a nisdaon'

⁷ Nach Jesúsen' gwyeje' cho'a nisdaon' len bene' ca' zjanaque' le' txen, na' zan bene' Galilea ja'ac len le'.

⁸ Na' zan bene' za'aque' Judea, na' Jerusalén, na' Idumea, na' yešla'a yegw Jordán, na' gan' mbane Tiro na' Sidón goside' bedesene'e le' cate' gosenezde' yela' guac da' chonen'.

⁹ Da'nan' Jesúsen' gože' bene' ca' zjanaque' le' txen yeseyiljue' to barcw dao' gan' cuie' cont bi yosoči bene' ca' zjanžaga' le',

¹⁰ le bene' zan ba beyone', na' bene' ca' ne' chese'ede' chosožiga' lježe' nac gac yesoxe'ne'.

¹¹ Na' bene' ca' zjayo'o zjanyaz da' xigüen' cate' chesele'ede' Jesúsen' chosozoa xibe' lagüen' na' da' xigüe' ca' chososya'an chese'en le':

—Len' naco' dogualje Xi'in Dios.

¹² Perw Jesúsen' gwdiľe' legaquen na' bene' mandadw bi yesenan no nac le'.

Jesúsen' gwchie' bene' šižinw ca' gosaque' txen len le'

(Mt. 10:1-4; Lc. 6:12-16)

¹³ Beyoža' Jesúsen' gwloe' to lo' ya'a na' goxe' baľ bene' goclaže' šja'aclene' le', nach gosa'aque' ja'aque' gan' zoen'.

¹⁴ Nach gwleje' šižinw bene' yesenita' len le', cont seľe' legaue' šjasedixjue'ede' xtižen'.

¹⁵ Na' bnežjue' legaue' yela' guac cont yeseyone' bene' güe' na' yela' gwŋabia' cont yesyebeje' da' xigüe' da' yo'o nyaz bene'.

¹⁶ Šižinw bene' quin' gosac: Simón ben' ľecze gože'ne' Pedro;

¹⁷ Jacobo len bene' biše' Juan bene' ca' zjanac xi'in Zebedeo, na' bsi'e legaque' Boanerges, zeje diža' bene' zjanac ca' yi' gwzio' cate' chašjw chtinen;

¹⁸ nach Andrés, na' Felipe, na' Bartolomé, na' Mateo, na' Tomás, na' Jacobo xi'in Alfeo, na' Tadeo, na' Simón ben' gwde'e bene' ca' zjanzi' cananista,

¹⁹ na' Judas Iscariote ben' gwdechle bdie' Jesúsen' lo' na' bene' ca' chesegue'ede' le'.

Gosene' Jesúsen' bebeje' da' xigüe' len yela' guac che Beelzebú

(Mt. 12:22-32; Lc. 11:14-23; 12:10)

Beyoža' Jesúsen' len bene' ca' zjanaque' le' txen goso'e lo' yo'o gan' zoe' ca hora',

²⁰ na' da' yoble besežagchgua bene', neca goc yese'ej yesagw Jesúsen' len bene' ca' zjanaque' le' txen.

²¹ Na' cate' goseneze biše' ljež Jesúsen', ja'aque' cont yesyeche'ene', le gosene' chactonte'.

²² Nach bene' ca' hososed bosolo'ede' ley dan' bzoj da' Moisés gosa'aque' Jerusalén na' ja'aque' distritw Galilea gan' chsed chlo'e Jesúsen' na' gose'e bene' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún' chaclenen le' cont chebeje' da' xigüe' zjajo'o zjanyaz bene'.

²³ Nach Jesúsen' goxe' bene' ca' na' bsd blo'ede'ne' gwne':

—¿Nac gon Satanás dan' chnabia' da' xigüe' ca' yebejen lecze da' xigüe'?

²⁴ Še to gobiern choje' chop šon cuenle na' yeyoža' yesedile legacze', gobiernna' bi sibi'e.

²⁵ Na' še bene' že' toz yo'o yesechoje' chople na' yesedile legacze', gague sša yesenite' txen.

²⁶ Na' še Satanásen' len da' xigüe' chen yesechojen chople na' yesedilen, lecze bi sibian', san na' yeyož yedon.

²⁷ Nono gac šo'e lo' yo'o che to bene' gual na' que'e bi da' de che' še chi zgua'tec gwcheje' bene' gual na', lete gone' ca' nach gac que'e bi da' de che'.

²⁸ 'Da' li žia' le'e, yogo' da' xinj da' chon benach na' yogo' diža' bya' da' yesene', Diosen' yezi'xene' chen še yesyetingde'.

²⁹ Perw note'teze bene' ne' yela' ya' che Spiritw che Dios, gwbat yezi'xen Diosen' che', san de dola' che' toli' tocañe.

³⁰ Gwne' ca' dan' gosene' che' yo'o nyaze' da' xigüe'.

Xna' Jesúsen' na' bene' biše' gosaxe'ne'

(Mt. 12:46-50; Lc. 8:19-21)

³¹ Na' bžin xna' Jesúsen' len bene' biše', na' gosenite' chyo'ole gosaxe' le'.

³² Na' bene' ca' zjanita' cuit Jesúsen' gose'ene':

—Xna'o len bene' bišo' ca' zjanite' chyo'o na' chesyeyiljue' le'.

³³ Nach Jesúsen' gože' legaque':

—¿Nezele non' nac xna'a na' no zjanac biše' lježa'?

³⁴ Nach gwne'e bene' ca' zjachi' cuite'na', na' gwne':

—Bene' quin' zjanac xna'a na' zjanaque' biše' lježa'.

³⁵ Le note'teze bene' chone' da' chna'laže' Dios, bena' nac bene' biša', bene' zana', lecze naque' xna'a.

4

Jempl che bene' goz trigo

(Mt. 13:1-9; Lc. 8:4-8)

¹ Yeto ža yoble gwzolo' Jesúsen' chsed chlo'ede' cho'a nisaon', na' besežagchgua bene' zan juisyw gan' chi'ena'. Na' da' besežagchgua bene' zan, benten byen gwyo'o Jesúsen' to lo' barcw dao' da' chda' lo' nisaon' cho'a yo bižen' na' gwchi'e lo'enna', na' yogo' bene' ca' gosenite' cho'a nisaon' ga nac yo biž.

² Nach da' zan da' bsd blo'ede' legaque' len jempl da' bi'e. Na' bzejni'ide' legaque', gwne':

³ —Le gwzenag da' nga: To bene' güen žin jeze' trigw.

⁴ Na' šlac zeje' chose' trigon', late' bin che trigw dan' chazen' jasechazen chanez nach be ca' žia xil be chaš le'e yaba gosagwban'.

⁵ Yelaten' jasechazen ga nac lo' yej, ga bibi yotec zoa, na' da' nga byob blan' le bi jasechazen ga nac sitjw.

⁶ Perw cate' bla' gwbiža' na' bzeyen len na' gwbižen, le gague yo'otec loenna' sitjon'.

⁷ Yelaten' jasechazen ga nac lo' yag yeše', na' yag yešen' gosecha'on na' bosolo'len' len, na' bibi gosebjan.

⁸ Perw na' yelaten' jasechazen ga nac yo šagüe'. Da' nga beselan' na' gosecha'on na' leca güen gosebjan, balen gosebjan do šichoa güeje to ton, balen gayon, na' yebalen do to gayoa.

⁹ Na' gože' legaque':

—Le'e žia nagle da' chene, le gwzenag xtiža'na'.

Biçhen' bzejni'ide' bene' len jempl

(Mt. 13:10-17; Lc. 8:9-10)

¹⁰ Gwdena' cate' ba besyeya'ac bene' zan ca', bene' ca' zjanita' gala'ze len le' na' len bene' šižinw ca' zjanaque' le' txen, gosenabde' le' bi zejen jempl dan' bi'en.

¹¹ Na' gože' legaque':

—Nono na' neze can' nac yela' gwnabia' che Diosen', perw ba chone' cont le'e chejni-laže'lene' nezellen. Na' bene' bi chesaclaže' yesejnilaže' Diosen', choe'lengaca'ne' xtižen' len jempl.

¹² Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden', na' neca yesyetiñide', neca yezi'xen Diosen' xtolen'.

Jesúsen' bzejni'ide' bi zejen jempl che ben' ben goza'

(Mt. 13:18-23; Lc. 8:11-15)

¹³ Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e?

¹⁴ Ben' ben goza' naque' ca ben' choe' xtiža' Dios'a'.

¹⁵ Na' bał bene' zjanaque' ca biñ dan' beselažo' chanez, le chosozenague' cate' chas chlalde xtiža' Diosen', na' ca cheyoža' la' chžinte Satanásen' dan' chnabia' da' xigüe' ca' na' chebejen xtiža' Diosen' dan' ba yo'o yichjlažda'ogüen'.

¹⁶ Yebał bene' zjanaque' ca biñ dan' beselažo' ga nac lo yej na' bi ben loen. Legaque' chesyebede' chosozenague' xtiža' Diosen',

¹⁷ perw šložga chesežibi'e, na' cate' chesac bi da' mal čegaque' o bichle chesone bene' legaque' neche da' chosozenague' xtiža' Diozen', la' chesebejyichjten'.

¹⁸ Na' yebał' zjanaque' ca biñ dan' besego'onen ga nac lo yag yeše'. Chosozenague' xtiža' Diosen',

¹⁹ na' šlac zjambane' chesyelał chesyeyežide', na' da' chesaclaže' yeseni'e chziye'en legaque' na' chesezelaže' yogo'ze da' de yesata' che'. Yogo' da' qui bi choen' latje yega'an xtiža' Diosen' lo' yichjlažda'ogüen' na' da'n'an' bi chesejnilaže' le' ca cheyała'.

²⁰ Perw na' nita' bał bene' chosozenague' xtiža' Dios'a' na' chesejnilaže' le' do yichj do laže', bene' qui zjazaca'lebde' ca biñ dan' beselažo' lo yo šagüe'. Bał' zjanaque' ca biñ dan' gosebjan šichoa güeje to ton, na' yebał' ca da' ca' hexoen' gayon, o ca no da' ca' hexoen' to gayoa güeje to ton.

Jempl che yi' dan' chguala'cho

(Lc. 8:16-18)

²¹ Lecze gože' legaque':

—Cate' chguala'cho to yi' ¿gwadosa'chon to caj o gwzoachon xan cam? Bi choncho ca', san chguala'cho yin' na' chzoachon sibe cont gwsen'in'.

²² Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yesenzeden'.

²³ Le'e žia nagle da' chene, le gwzenag xtižan'.

²⁴ Lecze gože' legaque':

—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchcze' cont soachle mbalaz da' chzenagle che'.

²⁵ Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže'len.

Jempl che biñ dan' chlan' na' chcha'on

²⁶ Lecze gwna Jesúsen':

—Yela' gwnabia' che Diosen' zaca'leben ca dan' chac cate' to bene' chaze' bite'teze biñ lo yo.

²⁷ Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi nežde' naquen' chac.

²⁸ Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheyała' cuian.

²⁹ Na' cate' ba goł dan' chbianna' na' chja'aque' chjasyexi'en, le ba bžin cho'a gwlap.

Jempl che biñ che xomdas

(Mr. 13:31-32; Lc. 13:18-19)

³⁰ Nach lecze gwna Jesúsen':

—Gonchcho xbab bi ca da' zaca'lebe yela' gwnabia' che Diosen' na' güe'cha' jempl cont nezele šanch bene' yosozenag che' cont nabi'e yichjlažda'ogaque'.

³¹ Naquen ca to biñ che xomdas da' chyaž lo yo. Len chnabia' nac da' dao' len biñ ca' chazcho lo yežlion'.

³² Perw cate' bach nyažen, chcha'on na' chaquen da' xench lao yixe' cuan ca', na' da' xenchgua chac xol che xozenna', na' lente byin dao' ca' chesyenzi'laže'ba' lo xozenna'.

Jesúsen bgone' zin jempl
(Mt. 13:34-35)

³³ Can' blo'e Jesúsen' xtiža' Diosen' yogo' ni'a, bi'e zan jempl ca' che ben' goza' na' che bin ca', con ga zelao goc gosejni'ide'.

³⁴ Bitwbi bzejni'ide' legaque' sin ca be'e jempl, nach cate' bich nita' bene' zan ca', bzejni'ide' bene' ca' zjanaque' le' t xen bi zejen yogo' da' ca'.

Jesúsen' bebecžie' be' bđono' len nisdao'
(Mt. 8:23-27; Lc. 8:22-25)

³⁵ Leze lo žana' cate' gwxin, Jesúsen' gože' bene' ca' zjanaque' le' t xen:
—Le šo'o laga'cho yešla'a nisdaon'.

³⁶ Nach bosyocua'aŋe' yezica'chle bene' ca' že' gan' ba bsed blo'ede' na' gosa'aque' lo' barcw daon' gan' ba yo'ocze Jesúsen'. Na' yebał bene' lecze ja'aclene' legaque' len yeto čhop barcw dao'.

³⁷ Na' gwzoloa gwyechjchgua to be' bđono' na' nisdaon' leze chas chatan', na' gwzoloa cheyož nis lo' barcon'.

³⁸ Jesúsen' ba chtase' xante barcon' to lo xcogue' caten' goc ca'. Na' bosyosbane' le' gose'ene':

—iMaestro! žBibi de chza'lažon' še ba gwdebe nisdaon' chio'?

³⁹ Nach gwyas Jesúsen' na' gwdile' be' bđonon' na' gože' nisdaon':

—iŠizize! iŠizize!

Na' bebe'ži be' bđonon' na' beyata'ži nisdaon'.

⁴⁰ Nach Jesúsen' gože' bene' ca' zjanaque' le' t xen:

—žBixchen' chžebtecle? žNacxechen' bi chejle'le chia'?

⁴¹ Legaque' besežebchgüe' na' gose' lježe':

—žNoxe benga? lente be' bđono' na' len nisdaon' chosozenaguen che da' že'.

5

Bene' Gadara yo'o nyaze' da' xigüe'
(Mt. 8:28-34; Lc. 8:26-39)

¹ Besežine' šla'a nisdaon' gan' mbane Gadara,

² na' cate' bechoj Jesúsen' lo' barcon' to bene' yo'o nyaz da' xigüen' bchoje' lo' capsantw na' jašague' le'.

³ Bena' ba zoacze' capsantw na'le na' nono chzoe goxe' le', ne len gden ca gosezoede' le'.

⁴ Da' zan ni'a bosocheje' ni'a ne'e gden, perw bia'cze gwčhoguen', con bzoxt btinen', na' nono gwzoe le'.

⁵ Yogo' ža yogo' yel gwde' bosya'adie' do lo ya'a na' do ladjo ba ca' na' tža tža chone' zi' cuine' len yej.

⁶ Na' cate' ble'ede' Jesúsen' zito' gwyejseje' jazoa xibe' lagüen',

⁷ na' da' xigüen' benen cont bosya'adie' gože' le':

—žBixchen' chgoša' chlaže' chio' len neda', Jesús? Naco' dogualje Xi'in Dios bene' nape la'zelagüe yela' chnabia' xen. Neče Dios chneyoeda' le' bi gwsaco' neda'.

⁸ Da' xigüen' benen cont gwna ben' ca' dan' gož Jesúsen' len:

—Da' xigüe', bsan benga.

⁹ Na' gwñabe Jesúsen' len:

—žBi lio'?

Na' boži'in xtižen':

—Legión lia', le nac zanto'.

¹⁰ Na' goseneyoen Jesús'a' bi yeselen' zito' cate' yesyežašen' yichjlaždao' ben'.

¹¹ Na' gala'ze lo ya'ana' chesaš zan coš chesagwba'.

¹² Nach da' xigüen' goseneyoen le':

—Gwseła' neto' gan' nita' coš ca' na' beñ latje šjajo'oto' lo' yichjlažda'oban'.

¹³ Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do čhop mil cošen'. Na' besyeyetjses coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'ejba' nis.

¹⁴ Nach bene' ca' chosoyoe' cošen' bosyoxonje' jasyeyeže' bene' lagüe yež len bene' chaš yixe' can' goca'. Na' ja'ac bene' jasene'e bixen' goc.

¹⁵ Cate' besežine' gan' zoa Jesúsen' besele'ede' ben' ba gwoyo' gwyaz da' xigüen', na' na'a ba chi'e nyaz xalane' na' ba bezoa yichjlažda'ogüen' binlo. Na' besežebe'.

¹⁶ Na' bene' ca' besele'ede' can' goquen' goso'e diža' che dan' goc len ben' gwoyo' gwyaz da' xigüen', lez ca' dan' goc len coš ca'.

¹⁷ Nach gosezolagüe' gosata'yoede' Jesúsen' yeze'e lažgaquen'.

¹⁸ Na' cate' beyo'o Jesúsen' lo' barcon' ben' ba gwoyo' gwyaz da' xigüen' gota'yoede' Jesúsen' šejlene' le'.

¹⁹ Perw Jesúsen' bi be'e latje, san gože' le':

—Beyej ližo' na' jayež bene' lo' yo'o chio' na' no bene' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

²⁰ Na' beza' ben' na' gwzologüe' cho'e diža' yež ca' gan' mbane distritw Decápolis yogo' can' ben Jesúsen' len le', na' yogo' bene' gosene xtižen' besyebande'.

Bi' no'ol che Jairo, na' no'ol ben' gwdane' xa Jesúsen'

(Mt. 9:18-26; Lc. 8:40-56)

²¹ Cate' bežin Jesúsen' cho'a nisdakon' zeze'e lo' barcw daon' dan' zeza' šla'a nisdakon', bene' zan ja'aque' gan' bežinen', na' Jesúsen' bega'ane' cho'a nisdao' na'ze.

²² Nach bžin to ben' nac bene' gwnabia' che yodao' che yežna', lie' Jairo. Cate' ble'ede' Jesúsen' bzoa xibe' lagüen'

²³ na' gota'yoehgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco' yičhje' cont yeyaquebe' na' bi gatbe'.

²⁴ Nach Jesúsen' gwejlene' le'. Na' bene' zan ja'acch, na' bosochichgüe' le'.

²⁵ Ladjo bene' ca' len to no'ol che'ede', ba goc šižinw iz chzoe' gwbao'.

²⁶ Ba bžaglaochgüe' jen cuine' rmed len zan bene' güen rmed ca', na' ba benditje' yogo' xmechue' da' de, perw bitwbi gwxi'czen, san chya'alen.

²⁷ Cate' bende' cheso'e xtiža' Jesúsen', no'olna' gwdie' ladjo bene' ca' na' bžine' cože'le' Jesúsen' na' gwdane' xen'.

²⁸ Le bene' xbab, gwne': "Con še ba gwdana' xen' nach yeyactecza'."

²⁹ Na' da' li cate' gwne' xen' la' gwlezte gwbao' dan' zoen', na' no'olen' gocbe'ede' ba bega'a yižgüe' chen'.

³⁰ Na' Jesúsen' la' gocbe'etede' to bene' ba beyacde' len yela' guac chen', nach gwyechje' gwne'e bene' ca' nita' cože'le, na' gwñabde' legaque':

—¿Non' gwdan xan'?

³¹ Nach bene' ca' zjanaque' Jesúsen' txen gose'ene':

—Ba ble'eczodo' ca chosočhie' le', ¿bixchen' chñabo' non' gwdan xaon'?

³² Perw Jesúsen' chne'e nile na'le cont le'ede' non' gwdan xen'.

³³ Nach no'olen' nezde' can' ba goc che' na' do chaž chžebe' gwyeye' jazoa xibe' lagüen' na' gože'ne' yogo' da' li.

³⁴ Na' Jesúsen' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

³⁵ Ne' choe'te Jesúsen' dižan' ca' cate' besežin bene' gosa'ac liž xan yodaon', na' gosi'e xa bi' no'ol daon':

—Ba got bi' chion', ¿bixchen' choncho' zed Maestro nga?

³⁶ Perw Jesúsen' bi bene' cuent dan' chesena bene' ca', na' gože' xan yodaon':

—Bitw žebo', con gwejle' chia'.

³⁷ Na' bi bi'e latje šja'aclen bene' zan le' gan' xoa bi' no'olen', san Pedro, Jacobo na' Juan bene' biše' Jacobo, bene' ca'ze ja'aclen le'.

³⁸ Na' cate' besežine' liž xan yodaon', ble'ede' ba chi' žaš chesosye'e chesebeže'.

³⁹ Nach gwoyo'e na' gože' legaque':

—¿Bixchen' mbeclé žaš chbežle? Bi no'ol daon' biña' gatbe', san chtasben'.

⁴⁰ Perw bosoxiže' gosonle' che'. Nach Jesúsen' bešaše' yogo'lole', na' gwčhe'e xaxña'be' na' bene' ca' zja'aclen le' na'ze na' goso'e len le' gan' de bi' no'ol daon'.

⁴¹ Na' bežue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

⁴² Nach bi' no'ol daon' la' beyastebe' na' goc beza'be', le šižinw izegueben'. Na' bene' ca' besele'e leca besyežejde' can' goca'.

⁴³ Perw Jesúsen' gože' legaque' nono yese'e ca', na' gože' legaque' yeso'e bi' no'ol daon' da' gagwbe'.

6

Jesúsen' bežine' distritw gan' chi' yež Nazaret
(Mt. 13:53-58; Lc. 4:16-30)

¹ Na' beza' Jesúsen' na' bežine' laže', na' beñe' ca' zjanaque' le' txen ja'aclene' le'.

² Na' cate' bžin ža che Dios, Jesúsen' gwzolağüe' bsed blo'ede' lo' yodaon'. Na' beñe' zan beñe' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi yela' sinan' nezde'? na' ¿nacxeçhen' chac chone' yela' guac ca'?

³ Benga chonšagüe' yag na' naque' xi'in María. Nombia'chwne' na' beñe' biše' Jacobo, José, Judas na' Simón, na' lecze beñe' zane' ca' nite' lažcho nga.

Na' da' zjanombi'ene' nan' bi gosaclaže' yesejle'e che'.

⁴ Nach Jesúsen' gože' legaque':

—Yogo'ze beñe' chesonxene' beñe' choe' xtiža' Diosen', perw beñe' gualaž che', beñe' biše' lježe' na' beñe' lo' yo'o che' bi chosozenague' che'.

⁵ Na' ne to yela' guac ca goc gone' na', lete gwᵛoa taquen' yichj to chop beñe' güe' na' beyone' legaque'.

⁶ Na' bebande' dan' bi gosejle' beñe' che'. Na' gwdechle gwda Jesúsen' bsed blo'ede' to to yež dao' ca' nita' gala'ze.

Jesúsen' gwsele' beñe' ca' zjanaque' le' txen jasedixjue'ede' xtiža' Diosen'

(Mt. 10:5-15; Lc. 9:1-6)

⁷ Na' goxe' bene' šižinw ca' na' gwsele' chop güeje' to to yež, na' bežjue'ne' yela' gwnabia' cont goc besyebaje' da' xigüe' lo' yichjlaždao' beñe'.

⁸ Na' cate' za' yesa'aque' gože' legaque' bibi yesoᵛe' chanez, ne bzod, ne yetextil, ne mechw, con yesoᵛe' to xis da' yosoçhiše'.

⁹ Na' yosoleje' yel perw bi yesoe' yeto xcamise'.

¹⁰ Na' lecze gože' legaque':

—Cate' žinle to liž beñe', na'ze yega'anle šlac zoale lağüe yeža', cate'ch yeža'le yeža' cana'ch yeža'le latja'.

¹¹ Na' še zoa ga bi yosolebe' le'e neca yosozenague' chele, cate' yeža'le na' le cuibe ni'alén' yo bište cont nacia' malen' chesone' bi chosozenague' xtiža' Diosen'. Da' li žia' le'e cate' žin ža gac juisyw bene' ca' bi yosolebe' le'e yesacche' castigw clél ca bene' Sodoma na' beñe' Gomorra.

¹² Nach gosa'aque', na' goseyixjue'ede' cheyała' yesyetinge xtola' benachen'.

¹³ Leze besyebaje' da' xigüe' da' yo'o nyaz beñe', na' zan beñe' güe' goseyebene' set na' besyeyacde'.

Gosote' Juan ben' bzoe' beñe' nis

(Mt. 14:1-12; Lc. 9:7-9)

¹⁴ Na' ca nac rey Herodes, gwnežde' can' chesone', le yogo'ze beñe' gosende' can' ben Jesúsen'. Na' Herodesen' gwne':

—Juan ben' bzoe' beñe' nisen' ba beban ladjo beñe' guat ca'. Da'nán' chaque' chone' yela' guac.

¹⁵ Yebałe beñe' gosene':

—Naque' ben' be' xtiža' Diosen' cani', ben' le Elías.

Na' yebałe' gosene':

—Naque' con to beñe' choe' xtiža' Dios ca beñe' ca' gosoe' xtiža' Diosen' cani'te.

¹⁶ Cate' Herodesen' bende' dižan' nac ca' na' gwne':

—Bengan' Juan ben' gwçhogbi'an goseçogue' yene', na' na'a ba bebane' ladjo beñe' guaten'.

¹⁷⁻¹⁸ Le Herodesen' beque'e Herodías na' gwzoalene' le' goque' xo'ole' la'czła' Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyała' soalen no'ol che beñe' bišon'.

Da'nán' Herodesen' gwçhogbi'en gosezene' Juanna' na' bosoçheje'ne' len gden lo' yo'o ližya gan' gosegüe'ene'.

¹⁹ Can' goc Herodíasna' bgue'ede' Juanna' na' godlaže' gote'ne', perw bi goc.

²⁰ Le Herodesen' gwnežde' Juanna' naque' to beñe' chon da' zej to liča na' to beñe' yo'o lo na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czła' bi gwejni'iteque Herodesen' dan' bšalj Juanna', con bebede' bzenague' che'.

²¹ Perw Herodíasen' beyiljwlaže' nac bene' cate' ben Herodesen' lni goła' ža le', bšini'e xše' da' gwdagüe' len beñe' gwnabia' che' ca' na' no xan soldadw ca' na' nochle beñe' blaó že' distritw Galilean'.

²² Bi' no'ol che Herodíasen' gwyo'obe' bya'abe' gan' gosagüe' xšen' na' beca'a Herodesen' can' bya'aben', lez ca' ben' gosagw len le' xšen'. Na' reyna' gože' bi' no'ola':

—Gwᵛabe neda' con da' žan çhio' na' goᵛan'.

²³ Na' lecze gože'be':

—Diosen' naque' testigw chia' goṇa' le' con da' ṇabdo'nda', la' gašjo yež ca' gan' mbanda' chnabi'a.

²⁴ Na' bechojbe' na' gožbe' xṇa'ben':

—¿Bi ṇabda'ne'?

Na' le' gože'be':

—Gwṇab yičj Juan ben' chzoe' bene' nis.

²⁵ Na' la' beyo'otebe' gan' chi' reyna' na' gožbe'ne':

—Che'nda' netecṇa'a goṇo' neda' to lo' platw yičj Juan ben' chzoa bene' nis.

²⁶ Na' ne late'ze bi gwyazlaže' reyna' gone' can' gož no'ol güegon' le', perw bačhle gwne' lao bene' ca' jasa'ac ṇin' Diosen' naque' testigw che' gwnežjue'be' bite'teze ṇabebe' le', da'nan' bi bžone' gac dan' gwṇabebe' le'.

²⁷ Nach la' gwsela'te reyna' to soldadw na' gože'ne' šjaxi'e yičj Juanna'.

²⁸ Na' gwyej soldadon' lo' yo'o ližyan' na' jačogue' yen Juanna', na' bžie' yičjje' to lo' platw jasanen' bnežjuen' bi' no'ola', na' bi' nga bnežjwben' xṇa'ben'.

²⁹ Cate' gosenēze bene' ca' zjanaque' t xen len Juanna', jasexi'e cuerp chen' cont bosocuaše'ne'.

Jesúsen' bguagüe' gayo' mil bene'

(Mt. 14:13-21; Lc. 9:10-17; Jn. 6:1-14)

³⁰ Beyoža' postlw ca' besyežague' len Jesúsen' na' gose'ene' bica' da' ba gosone' na' da' ba bosolo'ede'.

³¹ Na' Jesúsen' gože'ne':

—Le da, le šo'o ga nac lchojiže' yezi'laže'cho late'.

Gwne' ca' le chep chetj chac bene', neca chac latje yesagüe'.

³² Nach Jesúsen' len postlw che' ca' gosa'aque' ja'aque' legače' to lo' barcw, ja'aque' ga nac lchojiže'.

³³ Perw zan bene' besele'ede' gosa'aque' na' besyeyombi'e Jesúsen', na' zan yež bene' ca' bosoxonjsese' na' byobch besežine' ca' Jesúsen'.

³⁴ Na' cate' Jesúsen' bchoje' lo' barcon' ble'ede' ba besežag bene' zan na' beyaše' beži'ilaže'de' legaque', le nite' ca nita' no xila' be nono de gwyoeba'. Nach gwzolaogüe' bsd blo'ede' legaque'.

³⁵ Cate' ba zoa xin, bene' ca' zjanaque' le' t xen gose'ene':

—Ba zoa xin, na' latj gan' zoacho nga naquen latj daš.

³⁶ Na' besela' bene' quinga cont šja'aque' ga že' bene' do ranšw na' do yež dao' ca' dan' nyechj mbi'i šjasexi'e da' yesagüe', le bibi de yesagüe'.

³⁷ Na' Jesúsen' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' che čhop gayoa ža žin cont šjaxi'to' da' güe'to' legaque' yesagüe'.

³⁸ Jesúsen' gože'ne':

—¿Gaca' yetextilen' de chele? Le šja'ac le šjana'.

Cate' gosenēzde' na' gose'ene':

—De gayo' yetextil na' yechop bel ya'a.

³⁹ Nach gože' bene' ca' yesebi'e to xonj güeje' lo yixyen'.

⁴⁰ Na' gosebe' to gayoa güeje' na' yebale' šiyon güeje'.

⁴¹ Nach Jesúsen' gwxi'e yetextil ca' gayo' na' bel ya'an chope, na' gwne'e le'e yaba bi'e yela' choxclen che Dios na' bzoxye' yetextilen' bi'en bene' ca' zjanaque' le' t xen cont goseyisen' len bene' ca'. Leze gwdisē' bel ya'a ca' čhop lao yogo'lol bene' ca'.

⁴² Na' yogüe' gosagüen' na' goseljde'.

⁴³ Beyoža' bososše'e yešizṇw žome yetextil bixjw na' len late' güeje' bel da' bega'an.

⁴⁴ Na' bene' ca' gosagw yetextilen' gosaque' gayo' mil bene' byo, bi cuent no'ol ca' len bidao'.

Jesúsen' gwze'e lo nis

(Mt. 14:22-27; Jn. 6:16-21)

⁴⁵ Gwdena' Jesúsen' bene' byen besyeyo'o bene' ca' zjanaque' le' t xen lo' barcon' cont yesyelaga'zegue' nisdaon' na' yesežine' Betsaida, šlac le' za' chesele' bene' ca' žena' ližgaque'.

⁴⁶ Na' cate' beyož bzede' bene' ca' diža', gwyeye' lo ya'an bol güiže' Dios.

⁴⁷ Na' ca' nac barcon', cate' goc čhol ba zejen gachol nisdaon', na' toze Jesúsen' ne' zie' ga nac yo biž.

⁴⁸ Na' ble'ede' bi chac yosyose'en binlo, le ben' chechjen clele na' bi choen' latje sa' barcon'. Na' šbal beyetj Jesúsen' ya'ana' na' gwze'e lo nisen' ba zej gałe' gan' zja'aquen', na' ba zoa teze' gan' zjaya'aquen'

⁴⁹ cate' besele'ede' le' chze'e lo nisen'. Na' gosacde' še da' chda chelen'. Na' bososye'e.

⁵⁰ Le yogüe' besele'ede'ne' na' besežebe'. Perw le' la' bol güjzte' legaque', gože'ne':

—Le gonchach laže'le; nedan', bitw žeble.

⁵¹ Nach gwyo'e lo' barcw gan' zjaya'ac bene' ca', nach gwche'ži ben'. Na' legaque' leca besyebande' na' besyežejde',

⁵² le bi gosejni'ide' dan' bene' yela' guac len yetextil ca', na' biña' yesejnilaže' le'.

Jesúsen' beyone' bene' güe' ca' že' Genesaret

(Mt. 14:34-36)

⁵³ Na' gosełague' nisdaon' na' besežine' yežlio gan' nzi' Genesaret, na' bosocheje' barcon' cho'a nisdaon'.

⁵⁴ Na' cate' beyož besyechoje' lo' barcon' bene' ca' la' besyeyombia'te' Jesúsen'.

⁵⁵ Na' ja'acese' doxen gan' mbane Genesaret, na' do lo cam dao' zjanxoe' bene' güe' ca' jasesane'ne' gan' zjanexde' zoa Jesúsen'.

⁵⁶ Na' gate'teze gwwey' Jesúsen', do yixe', do yež, con goseyixjue' bene' güe' ca' do chanez na' goseneyode' Jesúsen' gwnežjue' latje yesoxe' la'ch late'ze xni'a xen', na' yogo' bene' gosoxen' besyeyacde'.

7

Dan' chchoj lo' laždao' beňachen' chonen cont laždagüen' bi naquen xilaže' len Diosen'

(Mt. 15:1-20)

¹ Nach bene' fariseo ca' na' len bene' ca' bososed bosolo'e dan' bzoj da' Moisés gosa'aque' Jerusalenna' na' ja'aque' gan' zoa Jesúsen'.

² Na' besele'ede' bał bene' ca' zjanaque' Jesúsen' txen con gosagüe' nca bosyone'e zan ni'a can' chesacde' cheyala' yesone', na' da'nan' gosezi diže' legaque'.

³ (Le bene' fariseo ca' na' yogo' bene' Israel gualaž cheto' ca' chesonxene' costumbr ca' da' bosyocua'anlen da' xoxxta'oto' ca' neto' bi yesagüe' še biña' yosyone'e zan ni'a.

⁴ Na' cate' yesyežine' lagüe ya'a, bi yesagüe' še biña' yosyone'e, na' da' zanch costumbr da' zjana'ogüe', ca no yeseyibe' xiga' ga chese'eje' nis, no yeso' xguague, no yeso' ya na' no xcame'.)

⁵ Nach bene' fariseo ca' na' bene' ca' bososed bosolo'ede' dan' bzoj da' Moísesen' gosenabde' le':

—;Bixchen' bi cheson bene' ca' zjanaque' le' txen can' goson bene' gol ca'? san con chesagüe' sin cbi chosyone'e zan ni'a.

⁶ Jesúsen' gože' legaque':

—Chonle cayanen' bzoj da' Isaiasen' che le'e nacle bene' gwxiye' gan' bzoje', žan':

Bene' qui chesonxene' neda' len diža' cho'a, perw bi chesonxene' neda' len lažda'ogaque'.

⁷ Bibi zejen dan' chesonxene' neda',

le dan' chososed chosolo'eden' naquen da' chnalaže' beňachze.

⁸ Bi chonle ca' chnalaže' Dios, san na'ole can' ža beňachen' cheyala' gonle, chyible no yeso' xguague, no xiga' ga che'eje' nis, na' da' zanch da' chonle.

⁹ Qui gožch Jesúsen' legaque':

—Chbejyichjle da' non Diosen' mandadw gonle cont na'ole costumbr che beňach.

¹⁰ Da' Moísesen' gwne': "Le gap bala'an xaxna'le", na' "Note'teze' še chžia chnite' xaxne'e, cheyala' gate'."

¹¹ Perw le'e žale to bene' guac ye'e xaxne'e: "Bibi de gona' gaclena' le'e, le yogo' da' de chia' naquen Corbán" (zeje diža', ba bnežjuen' lo na' Dios).

¹² Na' žale cate' to bene' že' ba naquen lo na' Diosen' nach bich cheyala' gaclen xaxne'e.

¹³ Dan' žale ca' chzoale ca'ale dan' ža Diosen' na' con chonxenle costumbr gole che da' xoxxta'ole ca'. Na' da' zanch dan' nac ca' chonle.

¹⁴ Da' yoble gox Jesúsen' bene' ca', na' gože' legaque':

—Yogo'le le gwzenag chia', na' le šejni'.

¹⁵ Bite'teze da' ye'ej gagw beňachen', bi nacho len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenna' chonen cont lažda'ogüe' bi naquen xilaže' len Diosen'.

¹⁶ Le'e žia nagle da' chene, le gwzenag xtiža'na'.

¹⁷ Cate' bsan Jesúsen' bich bšaljlene' bene' ca' na' beyo'e lo' yo'o, nach bene' ca' zjanaque' le' txen gosenabde' le' bi zejen dan' gože' legaque'.

¹⁸ Na' Jesúsen' gože' legaque':

—;Łecze len le'e bi chejni'ile? ;Bi chejni'ile gague da' ye'ej gagw beňachen' chonen cont lažda'ogüe' bi naquen xilaže' len Diosen'?

¹⁹ Le da' che'ej chagw beṇachen' gague cho'on lo' lažda'ogüen', san lo' li'en cho'on, na' chžin hor cheden.

Na' da' gwne' ca' zeje diža' bite'teze yela' guagw nacczen xilaže'.

²⁰ Na' lecze gwne':

—Xbab da' yo'o lo' yichjlaždao' beṇachen', lenṇa' chonen cont lažda'ogaque' bi zjanaquen xilaže' len Diosen'.

²¹ Le lo' yichjlaždao' beṇachen' chchoj xbab mal ca da' žan yesone' da' quinga: yesata'lene' no'ole bi nac xo'olgaque' o bene' byo bi nac bene' chegaque', gwzoo xtogaque', yesote' bene',

²² yesone' gwban, yesezelaže' gata' chegaque' da' de che bene' yoble, yesone' da' mal, yeseziye'e bene', yesone' bichle da' nac da' yela' zto', yesacxi'ede' bene', yeseneye'e che bene', yesaque' bene' ya'laže', yesone' xbab da' bi zaca'.

²³ Yogo' da' mal qui chesechojen lo' laždao' beṇach na' chonen cont bi nac lažda'ogaque' xilaže' len Diosen'.

To no'ol zito' gweyjnilaže' Jesúsen'

(Mt. 15:21-28)

²⁴ Na' beza' Jesúsen' na' gweyje' distritw gan' mbane ciuda Tiro na' ciuda Sidón. Na' gwyo'e to lo' yo'o na' goclaže' nono neze, perw bi goc gone' cont bi gosenezde'.

²⁵ Cate la' gwnezetee xṇa' to bi' no'ole bi' yo'o nyazbe' da' xigüen', na' gweyje' na' bzoo xibe' xṇi'a Jesúsen'.

²⁶ No'olen' goque' bene' zito', no'ole Sirofenicia. Gweyje' gwṇabde' Jesúsen' yebeje' da' xigüe' yo'o nyaz bi' no'ol chen'.

²⁷ Na' Jesúsen' gože'ne':

—Yogo'ze bene' zgua'tec chnežjue' da' chagw xi'ine'. Bi naquen güen yeque'e yela' guagw che xi'ine' na' gwnežjue' yesagw beco' ca'.

²⁸ Na' no'olen' gože'ne':

—Leczedo' can' gwnaon' Xana', perw lecze guaque gagw beco' be chi' xan mes bla'a da' chlažo' lo' yo'.

²⁹ Nach Jesúsen' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol chion'.

³⁰ Cate' bežin ližen' ble'ede' de bi' no'ol daon' to lo' cam, na' ba bechoj da' xigüen' yo'o nyazbe'.

Jesúsen' beyone' to bene' cuež, bene' lecze bi goc nie'

³¹ Jesúsen' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea.

³² Na' jasesane' to bene' byo bene' cuež na' bi goc nie', na' gosenabe' xoo na' Jesúsen' yichje'.

³³ Nach Jesúsen' gwche'ene' late' lchojize' ga nono bene' nita', na' bde xbene' lo' nague' na' bži'en xene' na' gwdane' ložen'.

³⁴ Nach gwne'e le'e yaba, bebande', na' gwne':

—¡Efata! —zeje diža': ¡Byaljo!

³⁵ Nach nag bena' besyeyaljon na' goc bende', na' lecze beyac ložen' na' goc gwnie' binlo.

³⁶ Na' Jesúsen' gože' bene' ca' nono yes'e ca', perw la'czla' gože' legaque' ca', nachle gosoo diža' can' goca'.

³⁷ Na' leca besyebande', na' gosene':

—Yogon' chone' binlo; chacte chone' cont chesyeyene bene' cuež ca' na' bene' ca' bi chac yesene' chesyenie'.

8

Jesúsen' cho'e da' chagw tap mil bene'

(Mt. 15:32-39)

¹ Ca tiempa' besežagchgua bene' zan na' bibi de yesagüe'. Nach Jesúsen' goxe' bene' ca' gwleje' cont zjanaque' txen len le' na' gože' legaque':

² —Cheyaše' da' bene' qui, le ba goc šone' ža zjanite' nga len neda' na' bibi de yesagüe'.

³ Še yesela'ne' ližgaque' na' biṇa' yesagüe', chanež yesego'one' yesecholde', le ba'le' za'aque' zito'.

⁴ Nach bene' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono bene' nita'?

⁵ Na' Jesúsen' gwṇabde' legaque':

—¿Gaca' yetextilen' de chele?

Na' legaque' gose'ene':

—Gažen.

⁶ Nach bene' mandadw yesebe' yogo'loł ben' nitan' lo yo, na' gwxi'e da' gaž yetextil ca' na' be'e yela' choxclen che Dios, nach bzojxen' bnežjuen' bene' ca' zjanaque' le' txen na' legaque' goseyisen' che yogo'loł bene' nita' na'.

⁷ Leze zjano'e to chop bel ya'a, na' Jesúsen' be'e yela' choxclen che Diosen' che bel ya'a ca' na' leze goseyisen' che yogo'loł bene'.

⁸ Na' yogüe' gosagüe' na' goseljde'. Gwdena' bososše'e yegaže žome len late' güeje yela' guagw da' bega'an.

⁹ Bene' ca' gosagon' zjanaque' ca do tap mil bene'. Cate' ba besyedagüe', Jesúsen' gože' legaque': —“Nayežagcho”,

¹⁰ Na' gwyo'e lo' barcon' len bene' ca' zjanaque' le' txen na' gwyeje' do gan' mbane yež da' nzi' Dalmanuta.

Bene' fariseo ca' gosaclaže' gon Jesúsen' to yela' guac da' yesele'ede' le'e yaba
(Mt. 16:1-4; Lc. 12:54-56)

¹¹ Na' bene' fariseo ca' gosezolağüe' chesediłdiže' len Jesúsen'. Na' da' gosaclaže' yesagüe' xya che' nach gosenabde'ne' gone' to yela' guac da' yesele'ede' le'e yaba cont yesenezde' še da' licze Diosa' gwsele' le'.

¹² Jesúsen' bebanchgüede' na' gwne':
—Ba ble'ele chona' yela' guac. ¿Bixchen' chñable to yela' guac da' le'ele cont nezele še Diosen' gwsele' neda'? Da' li žia' le'e, bitwbi gona' da' le'ele.

¹³ Nach bcua'ane' legaque' na' beyo'e lo' barcon' beze'e beyeje' yešla'a nisaon'.

Levadura che bene' fariseo ca'
(Mt. 16:5-12)

¹⁴ Bene' ca' zjanaque' Jesúsen' txen gosanjlaže' yeso'e da' yesagüe', na' totec yetextil zjano'e lo' barcon'.

¹⁵ Na' Jesúsen' gože' legaque':
—Le gon xbab, le gwsaca' len levadura che bene' fariseo ca' na' len levadura che Herodes.

¹⁶ Nach gosenabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

¹⁷ Jesúsen' gocbe'ede' xbab dan' chesone' na' gože'ne':

—¿Bixchen' chaczejlaže'le da' bibi yetextil de? ¿Biña' šejni'ile, neca chache'ele? ¿Nac chach lažda'olen' bi chejle'le?

¹⁸ ¿Bi chle'ele len yejlaole, neca chenele len nagle? ¿Bi chjayze'ele?

¹⁹ Gwdisa' gayo' yetextil na' goquen che gayo' mil bene', na' ¿bi chjayze'ele yebałe žome goc da' becho'onen da' botoble?

Na' legaque' gosene':

—Šižinw žome becho'onen da' botobto'.

²⁰ —¿Chixe caten' gwdisa' gaže yetextilen' lao tap mil bene'? ¿Yebałe žome gwža'te dan' botoblen'?

Na' gosene':

—Gaže žomen'.

²¹ Nach gože' legaque':

—¿Biña' šejni'iczele na'a cho'a diža' che dan' chososed chosolo'e bene' fariseo ca'?

Jesúsen' beyone' to bene' lchol bene' Betsaida

²² Gwdechle besežine' Betsaida na' jasesane' to bene' lchol lao Jesúsen', na' gosata'yoede' le' yeyone' le'.

²³ Na' bežue' taca' bene' lchola' na' gwleje'ne' yež. Nach gwdebe' xene' yejlagüen' na' gwxoā taquen' yichje' na' gwñabde'ne' še chle'ede' late'.

²⁴ Bene' lchola' gwne'e na' gwne':

—Chle'eda' bene', na' chle'eda'ne' ca yag, perw chesa'aque'.

²⁵ Nach Jesúsen' bežoa taque' yejlagüen' da' yoble, na' gwñayane' ben' na' beyaque', bele'etede' yogo' binlo.

²⁶ Nach Jesúsen' besele' le' liže', gože'ne':

—Bi yeyo'o lağüe yežen', neca no yo'o da' nga.

Pedron' gwne' Jesúsen' naque' Cristo ben' gwlej Diosen' cont nabi'e
(Mt. 16:13-20; Lc. 9:18-21)

²⁷ Gwdena' gwyej Jesúsen' len bene' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipino. Na' chanez gwñabde' bene' ca' zja'aclen le':

—¿Bi chesena bene'? ¿Non' naca' neda'?

²⁸ Legaque' gose'ene':

—Baḷe' chesene' naco' Juan ben' bzoa bene' nis, yebaḷe' chesene' naco' Elías, na' yebaḷe' chesene' naco' yeto bene' be' xtiža' Dios cani'.

²⁹ Na' gwnabde' legaque':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosen' cont nabi'o.

³⁰ Nach Jesúsen' gože' legaque' nono yese'e ca'.

Jesúsen' gwdixjue'ede' gate'

(Mt. 16:21-28; Lc. 9:22-27)

³¹ Na' gwzola' Jesúsen' bzejni'ide' legaque' can' gac chen', gože'ne':

—Da' zan da' saca'zi'a neda' naca' ben' gwsela' Diosen' golja' benach. Na' bene' blao ca' chesenabia' nación chechon' na' bžoz gwnabia' ca' na' bene' ca' chososed chosolo'e dan' bžoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šone ža yebana' ladjo bene' guat ca'.

³² Da' nga gwnen' zaca'laon. Na' Pedron' gwche'e Jesúsen' ga nac lchojiže' na' gwzola'güe' chdile' le' dan' gwne' ca'.

³³ Perw Jesúsen' gwyechje' na' gwne'e bene' ca' zjanaque' le' txen, na' gwdiḷe' Pedron', gože'ne':

—jGwcuase ca'ale Satanás! Bi nsa'o xbab che Diosen' san nsa'o xbab che benach.

³⁴ Nach Jesúsen' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gaque' neda' txen, cheyaḷa' chojyichj cuine', la'czla' saca'zi'e, na' gone' can' nia' neda'.

³⁵ Note'teze bene' chacde' gone' cont bi saca'zi'e o cont nono yesot le', benan' cuiayi', na' note'teze bene' chzanlaže' cuine' saca'zi'e o gate' ne chia' neda' o neche xtiža' Diosen', ba de yela' mban che' toḷi tocaṇe.

³⁶ ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toḷi tocaṇe'?

³⁷ Le bi zoa nacle gon benachen' chixjue' cont gata' yela' mban che' toḷi tocaṇe.

³⁸ Bene' ca' že' na'a bi chesejnilaže' Diosen' na' chesonchgüe' da' xinj. Na' note'teze bene' še cheto'ede' par ye'e lježe' chejnilaže' neda', na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Dios golja' benach. Yeto'eda' che' cate' yida' da' yoble nsa'a yela' zaca' juisyw che Xa' Diosen' na' nchia' bene' ca' zjanac angl che'.

9

¹ Lecze gož Jesúsen' legaque':

—Da' li žia' le'e, baḷle nita'le nga na'a biṇa' gatle cate' žin ža le'ele Diosen' gwlo'e yela' guac xen chen' can' chnabi'en'.

Bša' Jesúsen' ca goque'

(Mt. 17:1-13; Lc. 9:28-36)

² Gwde žop ža, Jesúsen' gwche'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaque'. Na' nite' besele'ede' bža' ca goc Jesúsen'.

³ Xaḷane' goquen da' šiš xila', gocten ca da' chactite; la' chibcho lache' yežlio nga bi yechojen gaquen šiš xila' catequen' goc xaḷanen'.

⁴ Na' concze besele'ede' da' Elías na' da' Moisés chosošalje' len Jesúsen'.

⁵ Nach Pedron' gože' Jesúsen':

—Maestro, jleca güenna' zoacho nga! Gonto' šone ranšw, to chio', to che Moisés, na' yeto che Elías.

⁶ Le bene' ca' zja'aclen Jesúsen' besežebchgüe', na' Pedroa' bi chacbe'ede' bin' že'.

⁷ Nach gwche' to bejw gan' niten' gwyechjen legaque', na' lo' bejon' gosende' gwna Diosen': —Bengan' Xi'ina' bene' chacda'; le gwzenag che'.

⁸ Na' cate' gosene'e cue'ej cuiten' notno besele'ede', san toze Jesúsen' zie'.

⁹ Na' šlac chesyeyetje' lo ya'an, Jesúsen' gože' legaque' notno yesi'e ca nac dan' besele'eden'. Gože'ne':

—Cate'ch ba bebana' ladjo bene' guat ca', nedan' naca' ben' gwsela' Dios golja' benach, cana' güe'le diža' chen.

¹⁰ Da'n'an' gosezoe' šize, nono gose'e ca', perw na' gosenabe lježe' bi zejen dan' gwne' yebane' ladjo bene' guat ca'.

¹¹ Nach gose'e Jesúsen':

—Bene' ca' chososed chosolo'e dan' bzoj da' Moisés chososedde' neto' chesene' zgua'tec da' Elías ben' gwzoa caní cheyala' yide' da' yoble cate' za' yedenabía' ben' sela' Diosen'. ¿Bixchen' chesene' ca'?

¹² Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo'loł da' de yežlio nga. ¿Nezele bin' ža gan' nyoj Xtíža' Diosen' chia' neda' naca' ben' gwsela' Dios golja' benach? Žan saca'zi'a na' bene' zan bi yesejnilaže' neda'.

¹³ Na' žia' le'e, Elías ba bide' na' gosonde' le' con ca gosaclaže', can' nyoj le'e Xtíža' Diosen' žan can' cheyala' gac che'.

Jesúsen' beyone' to bi' yo'o nyazbe' da' xigüe'

(Mt. 17:14-21; Lc. 9:37-43)

¹⁴ Gwdena' besyežine' gan' nita' yezica'chle bene' ca' zjanaque' Jesúsen' txen, na' be-sele'ede' bene' zan zjanita' zjanyechjde' legaque', na' len bene' ca' chososed chosolo'ede' dan' bzoj da' Moisés chesedildiže' len legaque'.

¹⁵ Na' cate' bene' ca' be-sele'ede' Jesúsen', yogüe' besyežejde' na' ja'acsese' bosoguape' le' tiox.

¹⁶ Nach gwñabde' legaque':

—¿Bin' chdildiža' le len bene' ca'?

¹⁷ Na' to bene' nchixe bene' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi chac nebe'.

¹⁸ Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz chebe'. Na' ba gwñaba' lao bene' qui zjanaque' le' txen yesyebeje' da' xigüe' yo'o nyazbe', perw bitw gosaque'.

¹⁹ Na' Jesúsen' gože' bene' ca' že'na':

—¿Le'e bene' bi chejnilaže'! ¿Šna chyažjen soalena' le'e cont šejnilaže'le? ¿Batca' zelao ña'lagua' le'e? Le yedesambe' nga.

²⁰ Na' jasesane'be', na' cate' da' xigüen' ble'en Jesúsen', benen gwyazbe' šon, na' gwbižbe' lo yo, chbiž chtolbe' na' chbia bžina' cho'abe'.

²¹ Nach Jesúsen' gwñabde' xaben':

—¿Bał iz ba goc chacbe' ca'?

Na' xaben' gwne':

—Cate' nache' bida'ote gwzolao chacbe' ca'.

²² Na' zan ña' da' xigüen' chžalan' lebe' lo yi' na' lo nis cont goten lebe'. Da'n'an' še guac yeyono'be', beyaše'šque neto' na' beyombe'.

²³ Jesúsen' gože'ne':

—Cheyala' šejnilažo' neda', le yogo' da' chzelaže' bene' chesejnilaže' neda' chaquen.

²⁴ Nach xaben' gwne' žižje:

—¿Chejnilaža' le', goclen neda' šejnilaže'cha'!

²⁵ Na' cate' Jesúsen' ble'ede' chesežagchgua bene', gwdiłe' da' xigüen' gožen':

—Da' xigüe', le' chono' cont bi' nga bi chenebe' na' bi chac nebe', neda' žia' yechojo'. Bsan bi' nga, na' bich yeyo'o yichjlažda'oben'.

²⁶ Na' da' xigüen' benen ga bosya'abe' na' benen ga gwyazbe' ca yeto šon, nach bechojen. Na' bin' bega'añbe' ca bi' guat, na' zan bene' gosene' gotben'.

²⁷ Perw Jesúsen' bežue' taca'ben' cont beyasbe', nach gwzechabe'.

²⁸ Nach cate' Jesúsen' gwyo'e to lo' yo'o, bene' ca' zjanaque' le' txen gosebeje' le' ca to lchojiže' na' gosenabde' le':

—¿Bixchen' bi goc neto' yebejto' da' xigüen'?

²⁹ Na' gože'ne':

—Cont yechoj da' xigüen' nac ca' cheyala' gonle gwbas na' soatezle yol güižle Dios.

Da' yoble Jesúsen' gwne' gate'

(Mt. 17:22-23; Lc. 9:43-45)

³⁰ Cate' besyeya'aque' na', besyedie' distritw Galilea. Na' Jesúsen' goclaže' nono yeseneze, ³¹ le chzejni'ide' bene' ca' zjanaque' le' txen, che'e legaque':

—Nedan' naca' ben' gwsela' Dios golja' benach, yosodie' neda' lo na' bene' yesote'nda', perw yeyon ža yebana' ladjo bene' guat ca'.

³² Perw bi gosejini'ide' bin' gože' legaque', na' besežebe' yesenabde'ne'.

Gosedildiže' gosene' noen' nac bene' blaoch

(Mt. 18:1-5; Lc. 9:46-48)

³³ Na' besežine' ciuda da' nzi' Capernaum, na' cate' besežine' yo'o gan' zoa Jesúsen' gwñabde' legaque':

—¿Bixchen' chdiłdiža'le chanez?

³⁴ Perw con gosenite' šižize, le chanezan' gosediłdiže' gosene' noen' nac bene' blaoch.

³⁵ Nach Jesúsen' gwchi'e na' goxe' bene' šižinw ca' zjanaque' le' txen, na' gože' legaque':

—Še no le'e chaclaže'le gacle bene' žialao, cheyała' gonle xbab bibi zaca'teclé, na' cheyała' gon cunle ca xmos yogo' bene' lježle.

³⁶ Nach bexae' to bidao' na' bzeche'be' gachol'legaque', na' gwlene'be' na' gože' legaque':

³⁷ —Note'teze bene' chone' güen len to bidao' ca bi' nga neche da' chejnilaže' neda', choncze' güen len neda'; na' noteze' chon güen len neda', choncze' güen len Dios ben' gwsela' neda'.

Bene' bi chon chio' contr; txencza' chone' chio'

(Mt. 10:42; Lc. 9:49-50)

³⁸ Nach Juanna' gože'ne':

—Maestro, bežagto' to bene' cho'e lao' na' chebeje' da' xigüe' da' yo'yo nyaz bene', na' bžonto' gone' ca', le bi chone' chio' txen.

³⁹ Na' Jesúsen' gwne':

—Bi gwžonle gone' ca', le gague zoa to bene' gone' yela' guac cho'e lan', yeyoža' ne' yela' ya' chia'.

⁴⁰ Le bene' bi chone' chio' contr; txencza' chone' chio'.

⁴¹ Chnia' le'e to da' zejen, note'teze bene' gone' le'e la' to xiga'ze nis da' ye'ejle neche chejnilaže' neda' na' neche nezde' le'e nacle txen len neda', Diosen' gone' cont soacze' mbalaz da' ba goclene' le'e.

Bitw co'yela'cho bene' gone' da' xinj

(Mt. 18:6-9; Lc. 17:1-2)

⁴² Note'teze bene' chon cont lažo' to bene' za' gwzologüe' chejnilaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nisdaon' clél ca da' gone' cont lažo' bene' yoble gone' da' xinjen'.

⁴³ Na' še yena'len' chonen cont gonle da' xinj, cheyała' cuejyichjle da' malen' chonle. Yejni'a bibi na'le zoa clél ca gonle da' xinjen' len len. Na' yejni'a šjayzoale len Diosen' toli tocane bi zoa šla'a taca'le clél ca yeyejle lo' yi' gabil dan' bi cheyol chenit nya' cuerp chelen'.

⁴⁴ Na' gabilen' neca chesat bzogan', neca cheyol yin'.

⁴⁵ Na' še ni'alen' chonen ga gonle da' xinj, lecze cheyała' cuejyichjle da' malen' chonle. Yejni'a bibi ni'alen' zoa clél ca gonle da' xinjen' len len. Na' yejni'a šjayzoale len Diosen' toli tocane bi zoa šla'a ni'alen', clél ca yeyejle lo' yi' gabil dan' bi' cheyol chenit nya' cuerp chelen'.

⁴⁶ Ca nac gabilen', bi chesat bzogan', neca cheyol yin'.

⁴⁷ Na' še yejlaolen' chonen cont gonle da' xinj, cheyała' cuejyichle da' malen' chonlen'. Yejni'a bibi yejlaolen' žia clél ca gonle da' xinjen' len len. Na' yejni'a šjayzoale len Diosen' toli tocane zoa šla'aze yejlaole clél ca yežinle lo' yi' gabilen' žia chop la'a yejlaolen'.

⁴⁸ Ca nac gabilen', bi chesat bzogan', neca cheyol yin'.

⁴⁹ Le dan' chyi chzaca'le yežlio nga chzejni'in le'e cont bi yeyejle lo' yi' gabil. Na' da' chyi chzaca'le zaca'leben ca zede' da' cheyała' chixe' yezj yogo' ni'a cate' chjasesane' yezj lao Diosen'.

⁵⁰ Na' zeden' naquen güen, perw še bich bi zxi' naquen, žnacxe goncho cont yeyaquen zxi' da' yoble? Na' le'e cheyała' gwyo gwchejlaže'le dan' chyi chzaca'le na' cheyała' soale binlo' tole yetole, na' še soale ca', zaca'leble ca to yela' guagw da' yo'yo zede'.

10

Jesúsen' bzejni'ide' bi cheyała' yela'acho len no'ol checho

(Mt. 19:1-12; Lc. 16:18)

¹ Jesúsen' beze'e Capernaum na' gwyejche' gan' mbane distritw Judean' na' yešla'a yegw Jordanna'. Na' da' yoble besežag bene' zan gan' zoen' na' lecze da' yoble bsd blo'ede' legaque' con can' choncze'.

² Nach bał bene' fariseo ca' ja'aque' gan' zoa Jesúsen' gosaclaže' yesebeje'ne' diža' da' yosochine' cont yosožie'ne' xya chol, na' gosenabde'ne' še guac to bene' yele'e len no'ol che'.

³ Na' Jesúsen' boži'e xtižen', gwne':

—Ca nac dan' bzoj da' Moisésen', žnac bene' mandadw gonle?

⁴ Legaque' gosene':

—Moisésen' gwne' cate' to bene' yele'e len no'ol chen' cheyała' chas to yiš da' gwnežjue' no'ol che' ga güe'en diža' besyele'ena'.

⁵ Nach Jesúsen' gože' legaque':

—Moisésen' gwne' gac gonle ca' lagüe dan' nacle bene' güedenag len Diosen'.

⁶ Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: "Bene' legaue', to bene' byo na' to no'ole."

⁷ "Da'nan' bene' byon' gwsane' xaxne'e cont soalene' no'ol čhen',

⁸ na' chope' yesaque' ca toz bene'." Na' ca' bich yesac chope' san toze'.

⁹ Da'nan' bi cheyala' yesyele'e, le Diosen' ba bcode' legaue'.

¹⁰ Cate' besyežine' yo'o, bene' ca' zjanaque' le' txen da' yoble gosēnabde'ne' bi zejen dan' ba gwne'.

¹¹ Na' Jesúsen' gože' legaue':

—Note'teze bene' chele'e len no'ol čhe' na' cheque'e no'ol yoble, chone' da' xinj, le toz ca naquen šaca' gata'lene' no'ol čhe bene' yoble.

¹² Na' še no'olen' chsane' bene' čhen' na' cheque'e bene' yoble, leče toz can' nac da' xinj da' chonen'.

Jesúsen' gwñabde' Diosen' gac güen čhe bidao' ca' besežag

(Mt. 19:13-15; Lc. 18:15-17)

¹³ Nach jasesane' bi' bixjw lao Jesúsen' cont xoa ne'e yichjgacbe', perw bene' ca' zjanaque' le' txen gosēdile' bene' ca' zjančhe'ebe'.

¹⁴ Na' cate' ble'e Jesúsen' can' gosonen' na' bže'e legaue' na' gože'ne':

—Le güe' latje yesid bidao' ca' lagua' nga na' bi gwžonle, le bene' ca' zjanac ca bidao' quinga, legaue' chosozenague' čhe Diosen' cont čhnabi'e yichjlažda'ogaue'.

¹⁵ Da' li žia' le'e, note'teze bene' cheyala' yosozenague' čhe Diosen' ca' cheson bidao' cate' chosozenagbe' čhe xaxna'be', le bene' bi yosozenague' ca', gwbat nabia' Diosen' yichjlažda'ogaue'.

¹⁶ Nach gwlene' to to bidao' ca' na' gwñabde' Diosen' gac güen čhebe', gwxoā taquen' yichjbe'.

To bene' güego' bšajlene' Jesúsen'

(Mt. 19:16-30; Lc. 18:18-30)

¹⁷ Cate' Jesúsen' gwze'e ngüe'e nez, chxonjses to bene' jazoa xibe' lagüen' na' gwñabde'ne':

—Maestro, le' naco' bene' güen. ĆBi cheyala' gona' cont gata' yela' mban čhia' toli tocañe'?

¹⁸ Jesúsen' gože'ne':

—ĆBixčhen' žo' naca' bene' güen? Toze bene' güen zoa, na' len' Dios.

¹⁹ Le' neždo' da' none' mandadw goncho: "Bi gata'lenle' no'ol bi nac no'ol čhele o bene' byo bene' bi nac bene' chele; nono gotle; bi cuanle; bi güe'le diža' güenlaže' čhe bene' lježle; bi siye'le bene'; le gap hala'añ xaxna'le."

²⁰ Na' boži'e xtižen':

—Maestro, yogo' da' quinga chzenaga', gwzolagua' chonczan' cate' ne' nactia' bidao'.

²¹ Jesúsen' gwne'e bene' güegon' na' chacde' le', na' gože'ne':

—Zoa to da' ne' čhyažjen gono': šjayeto' yogo' da' de čhio' na' da' le'edo' čhen bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' čhio'. Na' še ba beyož beno' can' žia' le', nach yo'o gaco' neda' txen la' saca'zi'o.

²² Na' cate' bene ben' dan' gwna Jesúsen', gocde' leca zdebe naquen gone' can' gože'ne', na' beza'yaše', le bene' gwñi'achgua goque'.

²³ Nach Jesúsen' gwne'e do cue'e'j cuite' na' gože' bene' ca' zjanaque' le' txen:

—Leca zdeb naquen to bene' gwñi'a gwzenague' čhe Diosen' cont Diosen' nabi'e yichjlažda'ogüe'.

²⁴ Na' bene' ca' zjanaque' le' txen besyebande' can' gwnen', perw Jesúsen' goze'e legaue':

—Xi'ina', bene' chesacde' zaca'chgua yela' gwñi'a čhegaquen', leca zdebe naquen yosozenague' čhe Diosen' cont nabi'e yichjlažda'ogaquen'.

²⁵ Bedao'č te to be xen be nzi' camello to lo' nag yeše' clcl ca to bene' gwñi'a gwzenague' čhe Dios cont Diosen' nabi'e yichjlažda'ogüe'.

²⁶ Cate' gosende' dan' gwne', leca besyebande' na' gose' lježe':

—ĆNoxen' šjayzoā len Diosen' še ca'?

²⁷ Jesúsen' gwne'e legaue' na' gože'ne':

—Bibi de da' gac yeson benačhen' cont šjasyenite' len Diosen', perw Diosen' guac gonen'; le bi zoa da' načo da' bi gac gon Dios.

²⁸ Nach Pedron' gože'ne':

—Neto' ba gwlejšyichjto' yogo' da' de čheto' cont nacto' le' txen.

²⁹ Jesúsen' boži'e xtižen':

—Da' li žia' le', note'teze bene' ba gwlejšyichje' liže', bene' biše', zane', xe', xne'e, no'ol čhe', xi'ine', o yežlio čhe' ne čhia' neda' na' neče chzenague' xtižan',

³⁰ yežlio nga yonežjo Diosen' le' to gayoa ca'te'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yela' mban' čhe' toli tocañe'.

³¹ Perw zan bene' zjanaque' bene' žialao na'a, gwžin ža cate' yesaque' bene' bzebe; na' bene' zjanaque' bene' bzebe na'a, gwžin ža cate' yesaque' bene' žialao.

Da' yoble Jesúsen' gwne' yesote'ne'

(Mt. 20:17-19; Lc. 18:31-34)

³² Zjangüe'e nez zja'aque' bso dan' zoa gała'ze Jerusalenna' na' Jesúsen' žialagüe' lao bene' ca' zjanaque' le' txen. Legaque' chesyebande' na' do chesežebze' zjana'ogüe' le'. Nach da' yoble Jesúsen' goxe' bene' šižinw ca' ca'ale ga nac lchojiže' na' gože' legaque' can' gac čhen'.

³³ Gože'ne':

—Na'a ba zejcho Jerusalén gan' yesone' neda' lo na' bxoz gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesechoglagüen' čhia' yesote' neda' na' yesone'nda' lo na' bene' bi zjanaque' bene' Israel, nedan' naca' ben' gwseła' Dios golja' benach.

³⁴ Yesezi'diže' neda', yesot yeseyine' neda', gosozhi'enda' xene', na' yesote' neda', perw yeyon ža yebana' ladjo bene' guat ca'.

Jacobo na' Juan gosenabe' to goclen lao Jesúsen'

(Mt. 20:20-28)

³⁵ Nach Jacobo len Juan, bene' ca' zjanac xi'in Zebedeo, gosebigue' cuit Jesúsen' na' gose'ene':

—Maestro, chaclaže'to' gono' to goclen da' nabto'.

³⁶ Na' gwñabe Jesúsen' legaque':

—¿Bi che'nele gona'?

³⁷ Na' gose'ene':

—Ben cont cue'to' šla'a güeje cuito'na' cate' solao nabi'o.

³⁸ Nach Jesúsen' gože'ne':

—Le'e cabi nezele bi dan' chñable. ¿Gwčhejlaže'le tele yela' zi' yela' ya' ca dan' tia' neda' na' gac čhele can' gac čhia'?

³⁹ Legaque' gose'ene':

—Gwčhejlaže'to'.

Na' Jesúsen' gože' legaque':

—Da' licze tele yela' zi' yela' ya' ca dan' tia' neda' na' gac čhele can' gac čhian'.

⁴⁰ Perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Diosen' gaquen che'.

⁴¹ Cate' yeši bene' ca' zjanaque' le' txen gosende' xtiža'gaquen', beseloque' Jacobon' na' Juanna'.

⁴² Perw Jesúsen' goxe' yogüe' cont gosebigue' laogüen' na' gože' legaque':

—Nezeczzele bene' zjambeje' cont chesenabi'e to to naciön na' bene' blao ca' chesone' byen chosozenag bene' čhegaque'.

⁴³ Perw bi naquen ca' len le'e. San note'tezle chaclaže'le gacle bene' blao, cheyała' gwzexjwlaže'le gaclenle bene' lježle.

⁴⁴ Na' note'tezle chaclaže'le gacle bene' žialao, cheyała' gon cuinle ca xmos yogu' bene' lježle.

⁴⁵ Le lencze neda', gwseła' Diosen' neda' golja' benach, gague za'a cont yesaclen bene' neda', san za'a cont gaclena' bene', na' gwnežjw cuina' yesote' neda' neče xtoła' benachen'.

Jesúsen' beyone' to bene' lchoł ben' gože' Bartimeo

(Mt. 20:29-34; Lc. 18:35-43)

⁴⁶ Nach besežine' Jericó. Na' cate' Jesúsen' ba beze'e ciudan' len bene' ca' zjanaque' le' txen na' len yezanch bene', do cho'a ciudan' chi' to bene' lchoł chanez chnabe' yosonežjo bene' le' con gaca' da' chesezande'. Bena' le' Bartimeo na' naque' xi'in to bene' le' Timeo.

⁴⁷ Na' bene' lchoła' cate' gocbe'ede' gwde Jesús bene' Nazaret gan' čhi'ena', gwzologüe' gwne' zizje gwne':

—Jesús, xi'in diaža čhe da' rey David, beyaše'laže'šca neda'!

⁴⁸ Bene' zan gosediłe' le' cont bich yosye'e, perw bosya'adiache' gwne':

—¿Xi'in diaža čhe da' rey David, beyaše'laže'šca neda'!

⁴⁹ Nach Jesúsen' gwleze' na' gwne':

—Le gaxe'.

Nach gosaxe' bene' lchoła' na' gose'ene':

—Benčhachlažo', gwzoža', le chaxe' le'.

⁵⁰ Nach gwcho'one' lache' da' nřoa čože' na' bxite' jabigue' lao Jesúsen'.

⁵¹ Nach Jesúsen' gwñabde' le':

—¿Bi chaclažo' gonda' le'?

Beñe' lçhola' boži'e xtižen':

—Maestro, che'nda' yele'eda'.

⁵² Nach Jesúsen' gože'ne':

—Guac yeyejo'. Dan' chejnilažo' neda' ba beyac yejlagon'.

Na' la' bele'ete bene' lçhola', na' gwda'ogüe' Jesúsen'.

11

Jesúsen' gwyo'e ciuda Jerusalén

(Mt. 21:1-11; Lc. 19:28-40; Jn. 12:12-19)

¹ Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesúsen' gwsele' chop bene' ca' zjanaque' le' tñen mandadw,

² gožgaque'ne':

—Le šja'ac yež dan' chi' gala'ze, na' cate' žinlen' na' yeželete to burr dao' da'ba' yag be nono na' cuia. Le sežba' na' le che'ba' nga.

³ Na' še no chñab biçhen' chonle ca', le ye'e: "Xanto' chyažjde'ba'", na' la' gwzantecze'ba'.

⁴ Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

⁵ Na' bał bene' ca' nita' na' gose'ene':

—¿Bixen' chonle? ¿Bixchen' chsežle burron'?

⁶ Nach bosyoži'e xtižen' can' gož Jesúsen' legaque', na' goso'e latje goseseže'ba' cont goseche'eba'.

⁷ Nach goseche'e burron' lao Jesúsen' na' gosexoa xagaque' cože'ban' na' gwžia Jesúsen' leba'.

⁸ Na' bene' zan gosonxene' Jesúsen' goseyixjw no xagaque' lo nez cont blej burron' len na' yebale' gosechogue' xoze' yag na' goseyixjuen' lo neza'.

⁹ Bene' zjažialao na' lecze bene' za'ac cože' gosezolagüe' bososye'e, gosene':

—¿Leca zaca'chgua bengal' iMbalaz ben' za' nga nsela' Xancho Diosen' le' cont nabi'e!

¹⁰ iMbalaz yela' gwnabia' che' da' nse'e, le' nabi'e ca' da' xozxta' ocho David! iLeca zaca'chgua Dios ben' zoa yaban'!

¹¹ Can' goc, Jesúsen' gwyo'e Jerusalén, na' lecze gwyo'e chyo'o che yodao' blaon'. Na' beyož gwne'e yogo'lol da' de na', beyeje' Betania len bene' šižinw ca' ba gwleje' cont zjanaque' le' tñen, le ba zoa gal.

Jesúsen' gwne' gacxi'a yag yixgüigw da' bibi žia

(Mt. 21:18-19)

¹² Beyechj ža cate' besyeya'aque' Betania, Jesúsen' gwdone'.

¹³ Na' zito' ble'ede' to yag yixgüigw da' žia laga', na' jane'e še žia yaguen' yixgüigw, na' bibi bželde', san laga'ze ca' da' žian, le gague canan' chesebia yixgüigon'.

¹⁴ Nach Jesúsen' bol güiže' yag yixgüigon', gožen':

—Noch no gagw da' chbio' le'.

Na' bene' ca' zjanaque' le' tñen gosende' can' gwnen'.

Jesúsen' bešaše' bene' ca' cheson ya'a chyo'o yodaon'

(Mt. 21:12-17; Lc. 19:45-48; Jn. 2:13-22)

¹⁵ Gwdena' besežine' Jerusalén. Na' cate' gwyo'o Jesúsen' chyo'o yodao' blaon', gwzolagüe' bešaše' bene' ca' chesote' na' bene' chesa'o na'. Na' bchiçe' xmes bene' ca' chosoša' mechw na' yag ga chesebe' bene' ca' chesote' ngolbex.

¹⁶ Na' bi be'e latje yesežoa xnez bene' zjanao' yoa' chyo'o yodaon'.

¹⁷ Na' bsd blo'ede' bene' ca' že' na', gože'ne':

—Nyojcze Xtiža' Diosen' žan: "Yesene' ližan' naquen latje gan' šja'ac bene' yogo' nación yosol güiže'nda'", perw le'e ba benlen ca to latje ga že' bene' gwban.

¹⁸ Na' bžoz gwnabia' ca' na' bene' ca' chososed chosolo'e dan' bžoj da' Moisés gosende' can' gwnen', na' goseyiljwlaže' nacle yesone' yesote'ne'. Ba chesežebe' Jesúsen', le yogo' bene' besyežejde' can' bsd blo'eden'.

¹⁹ Perw na' cate' goł, Jesúsen' beže'e ciudan'.

Gwbiž yag yixgüigon'

(Mt. 21:20-22)

²⁰ Beyechj ža šezil, gosodie' na' besele'ede' yag yixgüigon' ba gwbižen lente loen.

²¹ Nach Pedron' jayze'ede' na' gože' Jesúsen':

—Maestro, gwna' yag yixgüigw dan' gwnao' gacxi'an, ba gwbižen.

²² Jesúsen' boži'e xtižen':

—Le šejnilaže' Dios.

²³ Da' li žia' le'e, note'teze bene' ye'e ya'a nga: "Gwcuase nga na' jayzoa lo' nisdao", še bi chacžejlaže' lo' yichjlažda'ogüe', san chejnilaže' Diosen', guacczen.

²⁴ Da'n'an' žia' le'e, yogo'te da' nable cate' choļ güižle Dios, le šejle' guaquēczen, na' le gacczen.

²⁵ Na' cate' choļ güižle Dios, še zoa da' chac chele len bene' yoble, le yezi'xen che', cont lecze ca' Xacho Dios ben' zoa yaba yezi'xene' che xtoļa'le.

²⁶ Perw še le'e bi yezi'xenle che bene', Xacho Dios bene' zoa yaba bi yezi'xene' che xtoļa'le.

Yela' gwnabia' che Jesúsen'

(Mt. 21:23-27; Lc. 20:1-8)

²⁷ Nach ja'aque' Jerusalén da' yoble, na' šlac chda Jesúsen' chyo'o yodao' blaon' jasebiga' bꝑoz gwnabia' ca' na' bene' ca' chososed chosolo'e dan' bzoj da' Moisés na' len bene' gole blao' ca' chesenabi'e naciõnna'.

²⁸ Na' gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chonon'?

²⁹ Jesúsen' boži'e xtižen', gwne':

—Leze de to da' nabda' le'e na' še yoži'ile xtižan', nach nia' le'e bi yela' gwnabia' chonlenda'.

³⁰ ¿No gwseļa' da' Juanna' bzoe' bene' nis? ¿Dios nan' gwseļe'ne' še benačhen'? Le yoži'i xtižan'.

³¹ Nach legacze' gose' lježe':

—Še ye'chone' Dios gwseļe' le', na' ye'e chio': "¿Bixčhen' ca gweyļe'le che'?"

³² Bi gac ye'chone' benač gwseļa' le'.

Gosene' ca' da' besežebe', le yogo'te bene' že' na' goseļe'e Diosen' gwseļe' da' Juanna' be'e xtiže'na'.

³³ Nach gose'e Jesúsen':

—Bi ņezeto'.

Nach Jesúsen' gože' legaque':

—Lecze neda' bi yapa' le'e bi yela' gwnabian' chonlenda' da' ca'.

12

Jempl che bene' güen žin ben' gosaque' bene' mal

(Mt. 21:33-46; Lc. 20:9-19)

¹ Nach Jesúsen' gwzologüe' choe'lene' legaque' diža' chzoe' jempl, na' gože' legaque':

—Gwzoa to bene' goze' to cue' xen yag uvas na' gwlo'en le'ej. Na' bene' to ga yesesie' uvasen' cont choj xisen', na' bene' yeto da' sibe ca to campanario ga yesecua' bene' yosogüia yesene'e yag ca'.

Nach buca'ane' yežlion' lo na' bene' yesonši'e yag uvasen', na' gwze'e gweyje' zito'.

² Na' cate' bžin ža yosyotobe' cosešen', gwseļe' to xmose' lao bene' ca' nac lo na'gaque' yag uvasen' cont yosonežjue'ne' to tlaw coseš dan' yesyezi'en.

³ Perw na' bene' ca' gosezene' mosen' gosot goseyine'ne', na' to ga'alze' bosyose'ene' bibi gosone'.

⁴ Nach xan yežlion' da' yoble gwseļe' yeto xmose'; perw benga bosozie'ne' yej, gosone' güe' yichje' na' gosonde' le' zgot.

⁵ Nach xan yežlion' gwseļa'che' yetoe', na' benga gosottecze'ne'. Gwdena' gwseļa'che' bene' zan, na' bale' gosot goseyine' le' na' yebale' gosottecze'ne'.

⁶ Ne' zoa yeto bene' bina' sele', bena' xi'ine' bene' chacchgüede', na' bzebte gwseļe' le', le bene' xbab: "Yesezi'e xtižen'."

⁷ Perw bene' ca' gose' lježe': "Bengan' yega'anlene' yežlio nga cate' gat xen'. Le da gotchone' cont yega'anlenchon."

⁸ Na' gosezene'ne', gosote'ne', na' besyebeje' cuerp čhen' gan' že' yag ca', bosozalen' ga yoble.

⁹ Nach Jesúsen' gwñabe':

—¿Bi chaquele? ¿Nacxe gon xan yežlion' len bene' ca' buca'anlene' yag uvas čhen'? Šeje' šjetoe' legaque', na' yodie' yežlion' lo na' bene' yoble.

¹⁰ ¿Bina' gwlable ga nyoj Xtiža' Diosen'? žan quinga:

Yej dan' bi gosaclaže' bene' güen yo'o ca' yosochine', len ba naquen yej squin.

¹¹ Da' nga ben Xacho Dios, na' naquen to da' yežejecho.

¹² Nach gosaclaže' yesezene' Jesúsen', le gosache'ede' be'e jemplna' neče dan' bi chesejnilaže' le'. Perw besežebe' še bi yesone bene' ca' nžaguen' legaque', da'n'an' bosocua'ane'ne' na' besyeya'aque'.

Ca nac che dan' cheyala' gaxjw

(Mt. 22:15-22; Lc. 20:20-26)

¹³ Gwdena' gosesele' bał bene' fariseo na' bał bene' ca' gosedā' Herodes cont yesebeje' Jesúsen' diža' da' yosode'ede' cont yesagüe' xya che'.

¹⁴ Bene' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi ža bene', le toze can' chono' len note'teže bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. Da'nān' zedenabeto' le' žnaquen binlo no chixjo da' cheyala' chixjo che ben' nac la'zelagüe bene' gwnabia' ben' chi' Roma? žGwdixjwton', še bi chixjwton'?

¹⁵ Jesúsen' gočbe'ede' gague do lažen' chese'ene' ca', san chesaclaže' yesonlede' le' len xtiža' gaquen', nach gože'ne':

—žBixchen' chaclaže'le yoslažo'le neda' len xtižan'? Le gon neda' to mechw cont na'an.

¹⁶ Na' goso'enen', na' cate' ble'eden' na' Jesúsen' gwnabde' legaque':

—žNo lao dan' da' le'e mechw nga? na' žno la dan' nyoj le'en ni?

Nach bosoyoži'en gose'ene':

—Che César ben' nac la'zelagüe bene' gwnabian' ben' chi' ciuda Roman'.

¹⁷ Nach Jesúsen' gože'ne':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

Gosenabde' le' bi zejen dan' yesyeban bene' guat ca'

(Mt. 22:23-33; Lc. 20:27-40)

¹⁸ Nach besežin bał bene' saduceos gan' zoa Jesúsen'. Bene' ca' chesene' bene' guaten' bich yesyebane'. Nach gosenabde' le', gose'ene':

¹⁹ —Maestro, da' Moisésen' bzoje' can' cheyala' goncho, gwne' še to bene' byo gate' na' chzeb no'ol chen' perw na' nono bi' güezeb chga'an, na' bene' biše' ben' ba got cheyala' yošagna'lene' no'ol güezeba' cont yesenita' xi'in diaža che da' bišen'.

²⁰ Gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'.

²¹ Na' bene' gwchopa' bošagna'lene' no'ol güezeba', na' lecze gote' nono xi'ine' gwnita'. Lecze ca' goc len bene' gwyona'.

²² Na' ca' goc gosedāš bene' gaža' bosošagna'lene' no'ola', na' ne toe' ca' gosezoa xi'ine' len le'. Gwde gosat yogo'loł bene' ca', ca beyožen got len no'ola'.

²³ Gož neto', cate' yesyebane' ladjo bene' guat ca' žnox bene' ca' soalene' no'ola' ca' xo'ole'? le yogo' bene' gaža' bosošagna'lene' le'.

²⁴ Nach Jesúsen' boži'e xtižen', gwne':

—Clemen' chonle xbab dan' žale ca', le bi nezele can' ža Xtiža' Dios da' nyojen, neca nombia'le yela' guac chen'.

²⁵ Cate' yesyeban bene' guat ca' bich yosošagna' bene', neca yosonežjo xi'ine' no'ol gwšagne'e, le yesaque' ca angl bene' zjazoa yaba.

²⁶ Na' ca' nac dan' yesyeban bene' guat ca', žbina' gwłable gan' bzoj da' Moisés, can' gož Diosen' le' caten' bol güiže'ne' to lo yag yeše' dao' da' chey? Gože'ne': “Neda' naca' Dios ben' chonxen Abraham, ben' chonxen Isaac, na' ben' chonxen Jacob.”

²⁷ Bene' guat ca' bi chesonxene' Diosen', san bene' zjamban. Na' ca' nac le'e, leca clemen' chonle xbab.

Da' nac da' žialao da' cheyala' goncho

(Mt. 22:34-40)

²⁸ Leze bžin to bene' bsd blo'ede' ley dan' bzoj da' Moisés, bene' bende' caten' chesežeše' len Jesúsen', na' nezde' boži'ice Jesúsen' xtiža'gaquen' binlo. Na' bena' gwnabde'ne':

—žNon' nacch da' žialao da' zjanyojen da' ža Diosen' cheyala' goncho?

²⁹ Jesúsen' boži'e xtižen' gože'ne':

—Da' nga nacch da' žialao lao yogo'lołen, žan: “Le gwzenag bene' Israel gualaž chia', toze Xancho Dios naque' bene' zaca' gonxencho.

³⁰ Da'nān' cheyala' gaquecho Xancho Diosen' con ca' zelao chejni'icho, do yichj do laže'cho, do fuerz valor checho.” Lenna' naquen da' žialao lagüe da' ca' ža Diosen' cheyala' goncho.

³¹ Na' da' gwchopen' zejgalan' ca', gan' žan': “Cheyala' gaque lježcho ca' chaque cuincho.” Bich bi de da' že' cheyala' goncho da' zaca'ch ca' da' qui.

³² Nach ben' chsed chlo'e dan' bzoj da' Moisésen' gwne':

—Ca'yanen' naquen, Maestro. Da' licze can' gwnaon'. Toze Xancho Dios zaque' gonxenchone', na' noch no zoa bene' zaca'ch ca' le'.

³³ Na' še gaquecho Dios, con ca zelao chejni'icho, do yichj do laže'cho, do fuerz valor checho, na' gaque lježcho ca chaque cuincho, lenna' zaca'chen ca yogo' da' choncho chotcho no beyixe' na' chzeychoba' chonxencho Diosen'.

³⁴ Nach cate' goche'e Jesúsen' boži'icze' xtižen' to licha, gože'ne':

—Gague da' xen chyažjen cont nabdo' Diosen' nabi'e yichjlažda'oguoñ'.

Na' ne yetoe' bich beseyaxjde' bichle yesenabde' Jesúsen'.

Criston' naque' xi'in diaža che da' rey David

(Mt. 22:41-46; Lc. 20:41-44)

³⁵ Jesúsen' bsed blo'ede' chyo'o yodaon', gwne':

—¿Nacxechen' bene' ca' chososed chosolo'e dan' bzoj da' Moisés chesene' Criston' ben' gwlej Diosen' cont yedenabi'e naque xi'in diaža che da' rey David?

³⁶ Cuin Daviden' gwne' can' blo'e Spiritw che Diosen' le':

Ǫancho Dios gože' Ǫanan':

“Gwche'edo' cuita' nga nabi'acho txen,

na' gona' cont yogo' no chesegue'e le' yosozexjw yichje' yosozenague' chio'.”

³⁷ ¿Nacxe gac nacho Criston' naque' xi'in diaža che da' David? le' cuin Davin' gože' le': “Ǫana”.

Na' zjanyanchgua bene' ca' chosozenag xtižen', na' besyebede' xtižen'.

Jesúsen' bcuiše' bene' ca' chososed chosolo'e ley dan' bzoj Moisés

(Mt. 23:1-36; Lc. 11:37-54; 20:45-47)

³⁸ Jesúsen' caten' chsd chlo'ede' legaque' gwne':

—Le gwsaca' cont bi gonle can' cheson bene' ca' chososed chosolo'e dan' bzoj da' Moisés, le chesyebede' chesaše' zjanyaze' lache' ton, na' chesyebede' chesap bene' legaque' bala'an cate' chesyěžague' lagüe ya'a.

³⁹ Chesyebede' chesebi'e gan' chesebe' bene' blao cate' chja'aque' yodao' na' cate' chac lni.

⁴⁰ Legaque' cheseque'e yo'o che no'ol güezeb ca', na' cate' chosol güiže' Dios, sša cheso'e diža' cont yesaque bene' leca chesonxene' Diosen'. Bene' can' yesacche' castigw clcl ca yezica' chle bene' güen da' xinj.

To no'ol güezebe be'e Diosen' xmechue'

(Lc. 21:1-4)

⁴¹ Na' šlac zoa Jesúsen' chyo'o yodaon', gwchi'e gała'ze gan' xoa caj gan' chesegüe'e mechw che yodaon', na' chne'e can' chesego'o bene' mechw. Na' zan bene' gwñ'a ca' chesegüe'e da' zcha'o mechw.

⁴² Ca' chac, cate' bžin to no'ol güezebe bene' yaše', gwlo'e chop mechw dao' da' bibi zaca'tec.

⁴³ Nach Jesúsen' goxe' bene' ca' zjanaque' le' txen na' gože'ne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch len Diosen' clcl ca yogo' bene' ca' chesego'o mechw lo' cajen,

⁴⁴ le yogo' legaque' chesegüe'e da' checho'onen lo yela' gwñ'a chegaquen', perw no'ol nga, lo yela' yaše' yela' zi' che' gwlo'e yogo' da' de che' da' chacbanlende'.

13

Jesúsen' gwne' gwžin ža yosyočinje' yodao' blaon'

(Mt. 24:1-2; Lc. 21:5-6)

¹ Cate' cheza' Jesúsen' yodao' blaon' to bene' ca' zjanaque' le' txen gože'ne':

—iMaestro, gwñ'ašc catec xdan zjanac yej qui na' yo'o qui!

² Na' Jesúsen' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca yega'an zjancua' cože' lježen. Yogon' yosyočinje'.

Can' gac cate' ba zoa yeyož yežlion'

(Mt. 24:3-28; Lc. 21:7-24; 17:22-24)

³ Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo ya'an len Pedro na' Jacobo, na' Juan na' Andrés, bene' ca' zjanaque' le' txen, legaque' gose'ene' šižize:

⁴ —Che'neto' nao' neto' batcan' gac da' ca'. ¿Nac gac nezeto' cate' ba zoa gac yogo' da' ca'?

⁵ Jesúsen' boži'e xtižen', gwne':

—Le gwsaca' cont nono siye' le'e.

⁶ Le bene' zan yesaš yežlio nga yesaclaže' yosolane' xlatja' nga, yesene': “Nedan' naca' Cristo ben' gwlej Diosen' cont nabi'e.” Na' yeseziye'e bene' zan.

⁷ Na' cate' yenele chac gwdi'e nile nale, o yenele guac gwdi'e, bi žeble, le can' cheyała' gac. Perw gague lenna' nacho ba bžin ža yeyož yežlion'.

⁸ Le yesedil to yež len yeto yež yoble na' to naciön len yeto naciön yoble, na' zan cuen ga xo'chgua lo yežlion', na' gata' gwbin na' yesebec bene' žaš. Na' da' qui gac cate' za' solao gata' yela' zi'.

⁹ Na' le gwsaca' can' gonle, le yesone' le'e lo na' bene' gwnabia' ca' cont yesot yeseyine' le'e lo' yodao' chegaquen', na' dan' chejnilaže'le neda' nita' bene' yesech'e' exoxje' le'e no lao rey no lao nochle bene' gwnabia', na' can' güe'lenle' legaque' xtižan'.

¹⁰ Le za' te che yežlion', xtiža' Diosen' cheyała' gas lajlen doxen yežlion'.

¹¹ Na' cate' yesezene' le'e na' yesech'e' le'e lao bene' gwnabia' ca', bi cuec yichjle nac yoži'ile xtiža'gaquen', neca gonlen xbab. San le na con da' ye' Diosen' le'e nale lo hor na'teze, le gague le'eczen' nele, san Spiritw che Diosen' gonen ga nale bin' cheyała' nale.

¹² Cana' bal' benach yesechje' yesone' bene' biše' golje' lo na' bene' yesot legaque', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne' e lo na' bene' yesot legaque'.

¹³ Yogo'ze bene' yesegue'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žin žate gatle, nach šjayzoale len Diosen'.

¹⁴ Da' Daniel ben' gwdixjue'ede' xtiza' Dios bzoje' che da' zbanchgua da' gwxiñjen latje gan' chonxencho Diosen'. Na' cate' le'e le'ele ba zoa dan' gan' bi cheyała' soan, cana' bene' yesenita' distritw Judea cheyała' yosoxonje' šja'aque' do ya'adao'. (Bene' gwlaben' cheyała' šejni'iden'.)

¹⁵ Na' bene' chda do yichjo' che liže' žana', bi yeyetje' yotobe' xšinlaze' ca' že' ližen', con oxonje'.

¹⁶ Na' bene' chda yix'e' bi yeyej liže' šjayxi' xalane'.

¹⁷ Nyaše'chguaže zjanac no'ol ca' zjanao' xi'in, na' no'ol ca' ne' chosoguaže' bidao' lo ža ca'!

¹⁸ Le nab lao Dios bi yažjen gwxonje' caten' chac zag,

¹⁹ Le yesaquen ža da' leca yesale' bene'. Cate' bxete Diosen' yežlio na' ža na'aža nono na' gale' ca', neca žinlažen' yesale'de' ca' da' yoble.

²⁰ Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

²¹ Cana' še no ye' le'e: "Le na'šc, nga zoa Cristo ben' gwlej Diosen' cont nabi'e", o "Le na'šc, na' zoe", bi šejle'le.

²² Le yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque', na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'.

²³ Perw ca nac le'e, le gwzenag, le ba gwdixjue'eda' le'e yogo' can' gac.

Can' gac cate' ben' gwseła' Diosen' golje' benach yide' da' yoble

(Mt. 24:29-35, 42-44; Lc. 21:25-36)

²⁴ Perw ca nac ža ca' cate' yeyož gale'le can' gwnia', gwbižen' yeyaquen choł na' bion' bich gwsenin'.

²⁵ Na' beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'.

²⁶ Nach bene' že' yežlion' yesele'ede' neda' naca' ben' gwseła' Diosen' golja' benach za'a ladjo bejon' len yela' guac xen na' yela' bene' zaca' juisyw chian'.

²⁷ Nach seła' angl chian' yosyotobe' yogo' bene' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

²⁸ Le gwzenag che jempl nga che yag yixgüigon': Cate' ba chzolao chebešjw yaguen' na' chelan' laga' che'en' dao', nezele ba za' lagüe ba.

²⁹ Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gala'.

³⁰ Da' li žia' le'e, biña' yenit diaža che le'e nita'le na'a cate' yeyož gac yogo'loł da' ca'.

³¹ Le'e yaban' na' yežlion' yesede' chen, perw ca nac xtižan', gague da' te cbi gac can' žanna'.

³² Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nežda'. Toze Xa' Dios neze.

³³ Da'nana', le soa le cueze, le güia le na', na' le soateze yol güižle Dios, le nono neze batcan' žin ža.

³⁴ Naquen ca nac che to bene' šejje' zito', na' cate' za' se'e chon liž xlatje' lo na' bene' güen žin che', cho'e žin da' yeson to toe', na' chzoe' bene' chape' cho'a yo'ona'.

³⁵ Le soa le cueze ca' bene' chesape' liže'na', le bi zjanезде' batcan' yela' xan yo'on, še cate' ba zoa gal, še chel, še cate' chbež jea, še cate' ba gwyeni'.

³⁶ Le xož yele'e zejenez na' yedole'de' legaque' chesetase'.

³⁷ Da' nga žia' le'e leze žiczan' par yogo' lo' bene'. Le soa le cuez batcan' žin ža.

14

Bosoxi'e yesezene' Jesúsen'

(Mt. 26:1-5; Lc. 22:1-2; Jn. 11:45-53)

¹ Yechop ža za' gala' pascw na' lni dan' chesone' caten' chesagüe' yetextil dan' bibi levadura yo'on. Na' bžoz gwnabia' ca' na' bene' ca' chosed chosolo'e dan' bžoj da' Moisés cheseyiljwlaže' nac yesone' yeseziye'e Jesúsen' cont yesezene'ne' yesote'ne'.

² Perw gosene':

—Bi senchone' lo' lnin' cont ca yesebec bene' žaš.

To no'ole bzoe' set zix yichj Jesúsen'

(Mt. 26:6-13; Jn. 12:1-8)

³ Na' goquen' Jesúsen' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chl'a' zix, naquen dogualje da' bchoj lo yag yej da' nzi' nardo, na' zaca' chguan la'ay. Na' bžoxje' gan' yož seta' na' bžoačhočje' seta' yichj Jesúsen'.

⁴ Na' ba' bene' ca' žjanita' na' beseže'e, na' gose' lježe':

—žBixchen' benditjde' set zix nga?

⁵ Ša no bete' len güesonen ca no laxjw mos da' gone' gan tgüiz, na' gwnežjuen' gaclenen bene' yaše'.

Na' beseloque' no'ola'.

⁶ Perw Jesúsen' gwne':

—Jayen'. žBixchen' chnele che no'olen'? Dan' bene' len neda' nga naquen güen.

⁷ Le bene' yaše' ca' bate'teze nita'cze' len le'e, na' guaque gonle len legaque' da' güen cate' žan chele, san neda' bich soacza' yessa len le'e.

⁸ No'ole nga bene' da' zelao gwzaque'de'. Ba bguazje' neda' set zix can' cheya'la' yesone' len neda' cate' gaša'.

⁹ Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de šjasyeže'ede' can' ben no'ol nga.

Judas gwchoglaže' gwdie' Jesúsen' lo na' bene' ca' chesegue'e le'

(Mt. 26:14-16; Lc. 22:3-6)

¹⁰ Nach Judas Iscariote, ben' goque' txen len bene' ca' šižinw ben' gwlej Jesúsen' cont zjanaque' le' txen, gwyeye' jane'e bžoz gwnabia' ca' cont yosoxi'e nac gone' gwdie' Jesúsen' lo na'gaque'.

¹¹ Cate' gosende' xtiža' Judasen', besyebede' na' gose'ene' yeso'ene' mechw. Nach Judasen' gwzologüe' gwdiljwlaže' nac gone' gwdie' Jesúsen' lo na'gaque'.

Xše' dan' gosagüe' len Xanchon'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Na' bžin ža čala' lni caten' neto' bene' Israel chagwto' yetextil dan' bibi levadura yo'o. Naquen ža nechw che lni pascw cate' chotto' xila' dao', cont šjajza' laže'to' can' bosla Diosen' da' žoxxta'oto' ca' lo na' bene' Egipto ca'. Na' bene' ca' zjanaque' Jesúsen' txen gosenabde' le':

—žGa che'ndo' šjasiñi'ato' cont gagwcho xše' che pascon'?

¹³ Nach gwsele' čop bene' ca' na' gože'ne':

—Le šja'ac ciudan', na' yežagle to bene' byo no'e to che'e nis. Le šejlene',

¹⁴ na' gan' yežinen', le ye' xan yo'on: "Maestrona' že': Goščo' to yo'o gan' gagwto' xše' ža lni nga len bene' ca' zjanaque' neda' txen."

¹⁵ Nach gwlo'ede' le'e to cuart xen dan' zoa yichjen na'ale gan' de yogo' da' čhyažjecho. Na' le gwsini'a cont gagwcho na'.

¹⁶ Na' gosa'ac bene' ca' čhope, na' besežine' ciudan', na' yogo' can' gož Jesúsen' legaque' goc, na' bososiñi'e xše' že' lnin'.

¹⁷ Cate' beyož gwxo'a gwbiž, bžin Jesúsen' len bene' šižinw ca' gwleje' cont zjanaque' le' txen.

¹⁸ Na' gosebi'e gosagüe' xše'. Na' šlac chesagüen', Jesúsen' gože' legaque':

—Da' li' žia' le'e, to le'e chagwle len neda' txen, gwdele neda' lo' na' bene' ca' chesegue'e neda'.

¹⁹ Nach legaque' besyeyaše' laže'de' na' gosezologüe' tgüeje tgüeje' gosenabde' le' gosene':

—žNedan' gona' ca'?

Na' yetoe' leze gwne':

—žNedan' gona' ca'?

²⁰ Na' Jesúsen' gože'ne':

—Ladjo le'e bene' šižinw, to bene' chagw len neda' txen toze lo' ye'en gon ca'.

²¹ Na' gac chia' can' nyoj le'e Xtiža' Diosen', neda' naca' ben' gwsela' Diosen' golja' benach. Perw inyaše' chguaze nac ben' gwdie' neda' lo na' bene' ca'! Yejni'acle ša bi goljen'.

²² Na' šlac chesagüe', Jesúsen' gwxi'e to yetextilen', na' beyož be'e yela' choxcen che Dios, bzojxen', na' bnežjuen' legaque', gwne':

—Le gagon'. Lenña' cuerp chia'.

²³ Nach beħue' to vas gan' yože nis uvasen' na' beyož be'e yela' choxcen che Dios, be'en legaque', na' yogüe' gose'eje' late' güej dan' yože lo' vassen'.

²⁴ Na' gože' legaque':

—Da' ngan' xchena' na' chzanlažan' laljen neche yogo'lol benach. Na' laljen cont solao gac da' coben' da' gwna Diosen' gone' gaclene' benach.

²⁵ Da' li žia' le'e, bich ye'eja' xis uvas na'a. Cate'ch žin ža ba zoacho txen gan' chnabia' Diosen', canan' ye'ejan' da' yoble.

Jesúsen' gwne' Pedroa' bi chebe' naque' le' txen

(Mt. 26:30-35; Lc. 22:31-34; Jn. 13:36-38)

²⁶ Beyož gosole' gosonxene' Diosen' nach gosa'aque' ja'aque' Ya'a Olivos.

²⁷ Nach Jesúsen' gože'ne':

—Na'aže' yogo'le cuejyichjle neda' neche dan' gac chian'. Le nyojzen le'e Xtiža' Diosen', žan: "Gota' bene' güeyoe xilan' na' xila' ca' yesaslasba'."

²⁸ Perw cate' yosban Diosen' neda' ladjo bene' guat ca', yobch yeya'a Galilea ca' le'e.

²⁹ Nach Pedron' gože'ne':

—La' yogo' bene' quinga yesebejyichje' le', neda' bi gona' ca'.

³⁰ Perw Jesúsen' gože'ne':

—Da' li žia' le', biña' cuež jean' chop ni'a na'aže' cate' gac šon ni'a bi chchebo' še nombi'o neda'.

³¹ Perw Pedroa' do laže' gwne':

—La'czla' še chonen byen guatlencza' le', gwbat nia' bi nombia' le'.

Na' lecze ca' gosena' yogüe'.

Jesúsen' bol güiže' X'e Dios Getsemaní

(Mt. 26:36-46; Lc. 22:39-46)

³² Nach besežine' latje gan' nzi' Getsemaní, na' Jesúsen' gože' bene' ca' zjanaque' le' txen, gože'ne':

—Ngaze le cue'edo' šlac neda' šjel güiža' Dios.

³³ Na' gwche'e Pedro, Jacobo na' Juan, na' gwzolaon da' juisyw da' godce' lo' yichjlažda'ogüen' na' benchgüe' xbab.

³⁴ Na' gože' legaque':

—Lo' yichjlažda'ogua' nga chacyaše' chgüeda', chacda' gatcza' catequen' chžlagua'. Nga le yega'an na' le soa le na' txen len neda'.

³⁵ Nach Jesúsen' gwžialagüe' yelate' na' jačhaze' cosčo'ale lo yon' gwñabde' Dios še guac ten ca'ale bi gac can' ba zoa gac che'.

³⁶ Gože' Diosen':

—Xa', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chñaba' gac da' žia' neda', san gac da' nao' le'.

³⁷ Nach beyeje' gan' nita' bene' ca' šone, na' ble'ede' zjanite' chesetase'. Na' gože' Pedron':

—Simón žichtason'? žNe šlož da'oze ca' goc cuejo' bišgal len neda'?

³⁸ Bi tasle, san le yol güiž Dios cont bi gon gwxiyen' le'e gan. Da' li lo' yichjlažda'olen' chña'laže'le gonle da' nac binlo, perw cuerp chelen' bi chzoecen.

³⁹ Nach gwyeje' da' yoble na' bol güiže' Dios na' da' yoble gože'ne' dan' ba gožcze'ne' tni'a.

⁴⁰ Nach bezyeje' gan' niten', na' da' yoble ble'ede' chesetase', le yejlagüen' chesexa' chesežoden' bišgal. Na' bi besyežellaže' nac yosyoži'e xtižen'.

⁴¹ Na' da' gwyone ni'a gwyeje' na' bežžine' gan' nita' bene' ca' šone na' gože' legaque':

—žNe' chtasle? žNe' cheži'laže'le? Ba goc. Ba gole' gon to bene' neda' lo na' bene' güen da' xinj ca', neda' naca' ben' gwsela' Diosen' golja' benach.

⁴² Le čhas, le yeyo'o. Ba za' ben' gon neda' lo na'gaque'.

Gosezene' Jesúsen' cont yeseche'ene' lao bene' gwnabia' ca'

(Mt. 26:47-56; Lc. 22:47-53; Jn. 18:2-11)

⁴³ Jesúsen' ne' choe'te dižan' ca' cate' bžin Judas, na' zan bene' zja'aque' len le' zjanoxe' no yag, no spada, bene' goseseła' bžoz gwnabia' ca' na' bene' gole blao ca' chesenabia' nación Israel cheton'. (Judasen' goque' to bene' šižinw ca' gwleje Jesúsen' cont zjanaque' le' txen.)

⁴⁴ Na' Judasen' ba gože' legaque' nac yesežezde' non' yesezene', gwne':

—Ben' gwnopa' xague', le'na'; le sene' na' le che'e.

⁴⁵ Na' cate' bžin Judasen' na' jabigue' gan' zoa Jesúsen' na' gože'ne':

—Maestro, Maestro.

Na' bnop'e'ne'.

⁴⁶ Nach gosezene' Jesúsen' cont yeseche'ene'.

⁴⁷ Perw to ben' zecha cuít Jesúsen' gwlej spada chen' na' gwđinen' mos che bχoz blaon' gwchogte' šla'a nague'.

⁴⁸ Nach Jesúsen' gože' bene' ca':

—¿Nonle neda' ca to bene' gwban za'acle zedeži'le neda' len spada na' len yag?

⁴⁹ Yogo' žaze gwzoa' len le'e bsed blo'eda' bene' chyo'o yodao' blaon', na' bi gwzenle neda'. Perw chac da' qui cont chac can' nyoj Xtíža' Diosen'.

⁵⁰ Nach yogo' bene' ca' zjanaque' Jesúsen' t xen bosoxonje' gosebejyichje'ne'.

Bi' güego' bin' boxonj

⁵¹ Na' to bi' güego' na'obe' Jesúsen', na' nχoa cože'be' toze sávana. Na' bene' ca' ba gosezene' Jesúsen' lecze gosenize'be'.

⁵² Perw gwlejšyichje' sávanan' na' boxonjbe' ga'alyidbe'.

Goseche'e Jesúsen' lao bene' ca' chesenabia' nación Israelen'

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Nach goseche'e Jesúsen' lao bχoz blaon', na' besežag yogo' bene' ca' zjanac bχoz gwn-
abia', na' bene' gole blao ca' chesenabi'e nación četon' na' bene' ca' bososed bosolo'ede'
dan' bzoj da' Moisés.

⁵⁴ Na' Pedron' na'ogüe' Jesúsen' zito' zito'le bžintie' liž bχoz blaon' na' gwyo'e chyo'ona'
gwchi'e t xen len bene' ca' chesape' yodao' blaon' boše'e cuine' cho'a yi'.

⁵⁵ Na' ca' nac bχoz blaon' na' yogo' bene' ca' chesenabia' nación četon', besyeyiljwlaže' bi
da' yesagüe' xya che Jesúsen' cont yesote'ne', perw bi besyeželden'.

⁵⁶ Na' zan bene' gosone' diža' güenlaže' che Jesúsen', perw bi gosene' toz ca' yesene'.

⁵⁷ Bale' gosezože'e na' bososbague'ne' xya čol' gosene':

⁵⁸ —Neto' beneto' gwne': "Neda' yochinja' yodao' nga da' ben beňach, na' šone žaze yeyona'
yeto yodao' da' bi gon beňach."

⁵⁹ Perw ne' ca' ca' gosene' toz ca' yesene'.

⁶⁰ Nach bχoz blaon' gwzože'e ladjo yogo'lole' na' gwňabde' Jesúsen':

—¿Bi choži'o xtižen'? ¿Bi dan' chosožie' le' xya?

⁶¹ Perw Jesúsen' bitw bi gwne', bitw boži'e xtižen'. Na' bχoz blaon' da' yoble gwňabde' le',
gwne':

—¿Naco' le' Cristo ben' gwlej Diosen' cont űabi'e, na' Xi'ĩn Dios ben' chonxencho?

⁶² Jesúsen' gože'ne':

—Le can' naca'. Na' le'ele neda' cate' ba čhi'a šla'a liča che Dios ben' nac la'zelagüe bene'
gwnabia', neda' naca' ben' gwsele' golja' beňach. Na' le'ele yetja' ladjo bejw dan' ze le'e
yaban'.

⁶³ Nach bχoz blaon' gwčheza' xałane' cont nacia' bi beque'e can' gwna Jesúsen', na' gwne':

—Noch no čyazje bene' co' da' bałi.

⁶⁴ Le'e ba benele čne' che Dios dan' že' ca', chon cuine' ca' Dios. ¿Nacxe ža le'e?

Na' yogüe' gosene' nape' doł'a na' cheyał'a gate'.

⁶⁵ Nach bale' gosezolagüe' chosoži'ene' xene' na' bososeyjue' lagüen' len to lache' na' gosot
goseyine' le', na' gosonle' che' gose'ene':

—¡Gwnašč non' čot le'!

Na' bene' ca' chesape' yodao' blaon' gosot goseyine' le'.

Pedron' bi gwčhebe' še nombi'e Jesúsen'

(Mt. 26:69-75; Lc. 22:56-62; Jn. 18:15-18, 25-29)

⁶⁶ Pedron' čhi'e chyo'o che'e'ele, cate' bžin to no'ole güen žin che bχoz blaon'.

⁶⁷ Na' cate' no'olen' ble'ede' le' čhi'e choše'e cuine' cho'a yin', gwne'e le' na' gože'ne':

—Lencze le' naco' t xen len Jesús bene' Nazaret.

⁶⁸ Perw Pedron' bi gwčhebe', gwne':

—Bi nombi'ane', neca nežda' bin' žo'.

Na' beyej Pedron' jayzie' cho'a puert na'le. Nach gwčež to jea.

⁶⁹ Na' no'ol güen žinna' gwne'e le' da' yoble na' gože' bene' ca' nita' na':

—Benga naque' legaque' t xen.

⁷⁰ Perw le' da' yoble bi gwčhebe' še naque' t xen len Jesúsen'. Na' gocze štit da' yoble bene'
ca' nita' na' gose'e Pedron':

—Da' licze, le' naco' txen len legaque', le naco' bene' Galilea, nachbia' chnio' can' chesene bene' Galilea ca'.

⁷¹ Nach Pedron' chop šone ni'a gwne':

—Diosen' gone' neda' castigw še chonlaža' žia' bi nombi'a bena'.

⁷² Na' cate la' gwchežte jean' da' gwchope. Nach jayze'e Pedron' can' gož Jesúsen' le': "Bina' cuež jean' chop ni'a cate' gac šon ni'a bi chebo' še nombi'o neda'." Na' cate' jayze'ede' can' gož Jesúsen' le', na' gwcheže'.

15

Goseche'e Jesúsen' lao Pilato

(Mt. 27:1-2, 11-14; Lc. 23:1-5; Jn. 18:28-38)

¹ Ca gwyeni', bhoz gwnabia' ca' besežague' len bene' gole blao ca' chesenabi'e nación cheton' na' len bene' ca' chososed chosolo'e dan' bzoj da' Moisés na' len yezica'chle bene' gwnabia' ca'. Na' bosochėje' Jesúsen' na' goseche'ene' jasesane'ne' lo na' Pilato ben' nac gobernador.

² Pilaton' gwnabde'ne', gože'ne':

—¿Len' naco' rey che bene' Israel?

Jesúsen' boži'e xtižen', gwne':

—Can' gwnao'na', can' naquen.

³ Na' bhoz gwnabia' ca' da' zan da' bosocuiše'ne'.

⁴ Nach Pilaton' da' yoble gwnabde'ne', gože'ne':

—¿Bi choži'o xtiža'gaquen'? le da' zan da' chosocuiše' le'.

⁵ Perw Jesúsen' bitw bi gwne'. Na' Pilaton' bebande' che'.

Gosechogbi'en gat Jesúsen'

(Mt. 27:15-31; Lc. 23:13-25; Jn. 18:38-19:16)

⁶ Na' gota' costumbr, Pilaton' gwsane' to bene' de ližya caten' čala' lni pascw che neto' bene' Israel, con to bene' yesenab bene' gualaž cheton'.

⁷ To bene' lie' Barrabás na' len yexonj bene' gosot bene' cate' besyedabague' gobiernna' zjajo'e lo' ližya len nochle bene' güen da' mal.

⁸ Nach besežag bene' na' gosenabde' Pilaton' gwsane' to bene' con can' nac costumbr čegaquen'.

⁹ Na' Pilaton' boži'e xtiža'gaquen' gwne':

—¿Čaclaže'le gwsana' rey che le'e nacle bene' Israel?

¹⁰ Gwne' ca' le' gočbe'ede' dan' chesacxi'a bhoz gwnabi'a ca' Jesúsen', da'nan' bosodie' le' lo ne'e.

¹¹ Perw bhoz gwnabia' ca' bosota bosone' bene' ca' že' na' cont gosenabe' gwsane' Barrabás ben' de ližyan'.

¹² Nach Pilaton' gwnabde' legaque':

—¿Bixe gona' len ben' žale nac rey che le'e nacle bene' Israel?

¹³ Legaque' bososya'adie' bosyoži'e xtižen':

—jBde'e le'e yag cruz!

¹⁴ Pilaton' gože' legaque':

—¿Bixe da' xinj nonen'?

Nach legaque' da' yoble bososya'achgüe' gosene':

—jBde'e le'e yag cruz!

¹⁵ Nach Pilaton', cont bega'ane' güen len bene' ca', bsane' Barrabásen' can' gosenabe'. Na' bene' mandaw gosot goseyin soldadw che' ca' Jesúsen', nach bene' le' lo na'gaque' cont yosode'ene' le'e yag cruz.

¹⁶ Nach soldadw ca' goseche'ene' yeto latje dan' zoa chyo'o che liž bene' gwnabian', na' bosotobe' yogo' soldadw ca', zjanac zane'.

¹⁷ Gosechize' Jesúsen' to lache' moradw, na' gosone' to corona de xis yeše' bosozoen' yichjen'.

¹⁸ Na' gosezolagüe' chesonle' che', chesosye'e:

—jViva, rey che bene' Israel!

¹⁹ Na' bosozete' yichjen' xis, bosoži'ene' xene', na' bosozoa xibe' gosone' ca' bene' chesonxen le'.

²⁰ Beyož gosonle' che', besyeyine' lache' moradon' na' bosyoguacue'ne' xacze'. Nach goseche'ene' cont jasede'ene' le'e yag cruz.

Bosode'ene' le'e yag cruz

(Mt. 27:32-44; Lc. 23:26-43; Jn. 19:17-27)

21 Na' šlac zjanche'ene' gan' yesote'ne' besyežague' to bene' yež Cirene le' Simón, xa Alejandro na' Rufo, za' zeze'e yixe', na' bosogüe'ene' yag cruz che Jesúsen'.

22 Goseche'e Jesúsen' latje ga nzi' Gólgota, zeje dižan' Latje che Žit Yichj Bene' Guat.

23 Na' goso'ene' vino da' nchixe to nechw da' nzi' mirra, perw Jesúsen' bi goclaže' ye'ejen'.

24 Nach bosode'ene' le'e yag cruzen'. Na' soldadw ca' gosone' rifa cate' besyele'e xalana' Jesúsen' cont bla' bi besyecheł to toe'.

25 Cheda ga šezille caten' bosode'ene' le'e yag cruz.

26 Na' yichj yag cruzen' bosozoe' dan' bosozoje' choen' diža' bixchen' gosote'ne'. Qui nyojen, žan: "Rey che Bene' Israel."

27 Txen len Jesúsen' lecze bosode'e le'e yag cruz yečhope bene' gwban, toe' šla'a licha, na' yetoe' šla'a robes.

28 Na' da' gosone' ca', goc ca' nyoj Xtiza' Diosen', žan: "Gosone'ne' ca' bene' güen da' xinj."

29 Na' bene' gosede gala'ze gosezi'diže'ne', con chosota yichje' gosene':

—Le' gwnao' yočhijjo' yodaon' na' šone žaze yeyontion'.

30 Bosla cuino' na' beyetj le'e yag cruza'.

31 Lecze ca' bxož gwnabia' ca' na' bene' ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' bene' yoble, perw bi chac yosla cuine'.

32 Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabi'e chio' bene' Israel.

Na' lente bene' ca' bosoda'lene' le' le'e yag cruz ca' gosezi'diže'ne'.

Can' goc caten' got Jesúsen'

(Mt. 27:45-56; Lc. 23:44-49; Jn. 19:28-30)

33 Cate' bžin guagwbiž, doxen yežlion' goc choł, bžinte cheda šone.

34 Na' ca' hora' Jesúsen' gwne' žižje gwne':

—Eloi, Eloi žlama sabactani? —zeje diža': Dios chia', Dios chia', žbixchen' ba gwlejyichjo' neda'?

35 Na' bał bene' ca' zjanita' na' gosende' na' gosene':

—Le gwzenag, choł güiže' da' Elias, ben' be' xtiza' Dios cani'.

36 Nach to bene' ca' gweyjsese' na' bzažede' to esponja vino zichj na' bzoen' to lao xis tone nach jažiguen' cho'a Jesúsen' cont xopen', na' gwne':

—Cuezcho, yešque güid Elíasen' yeletje' le'.

37 Nach Jesúsen' bosye'e žižje, na' gote'.

38 Na' lache' da' ze lo' yodao' blaon' bcheza' gacholen, gwza'te yichjen bžinte che'ełe.

39 Na' xan soldadw ca' zie' lao Jesúsen', na' cate' bende' can' bosye'en na' ble'ede' can' goten', gwne':

—Da' li le bengan' goc dogualje Xi'in Dios.

40 Lecze bał no'ole zjanite' zito'le chesene'e. Na' len legaque' zjanita' María no'ole Magdala, na' Salomé, na' María xna' Jacobo bene' naše'te, na' lecze goque' xna' José.

41 No'ol qui gosa'ogüe' Jesúsen' na' gosaclene' le' cate' chsed chlo'ede' bene' ca' že' distritw Galilea. Na' yezanch no'ol zjanita' na', bene' ja'aclene' le' txen Jerusalén.

Bosocuaše' Jesúsen'

(Mt. 27:57-61; Lc. 23:50-56; Jn. 19:38-42)

42 Žana' goquen žan' bososi'ne' par ža che Dios cate' bi de lsens yesone' žin. Na' cate' ba chxoa gwbiž.

43 to bene' le' José, bene' ciuda Arimatea, beyaxjde' gweyje' lao Pilaton' na' jaynabe' cuerp che Jesúsen'. José goque' to bene' zaque' lao bene' ca' gosenabi'e nación Israel četon', na' ba zoe' chbeze' batcar' solao nabi'a' ben' seła' Diosen'.

44 Pilaton' bebande' dan' ba gote', na' goxe' xan soldadw ca' cont gwñabde' le' še da' li ba gote'.

45 Na' cate' xan soldadw ca' gože' le' le' can' ba goc, Pilaton' bnežjue' latje beyoa' Josén' cuerp che' Jesúsen'.

46 Nach Josén' gwzi'e to lache' xen, beletje' cuerp che Jesúsen' na' bolažen' len. Na' la' jasełote' le' to lo' bloj da' nche'ene' le'e yej xen, na' blöle' to yej cho'a blojen' cont bseyjon len.

47 Na' María no'ole Magdalan' len María xna' Josén' besele'ede' gan' bosocuaše'nen'.

16

Beban Jesúsen' ladjo bene' guat ca'

(Mt. 28:1-10; Lc. 24:1-12; Jn. 20:1-10)

1 Cate' gwde ža čhe Diosen', María no'ole Magdalan', María xna' Jacobo, na' Salomé gosezi'e da' chla' zix cont šjaselo'en cuerp čhe Jesúsen'.

2 Na' šezildao' ža dmigw besežine' cho'a ban', cate' za' chla' gwbiž.

3 Na' za' yesežine' gose' lježe':

—žNoxe ca'a yej xen dan' da' cho'a blojen'?

4 Perw cate' besežine' na' gosene'e, besele'ede' yej xen dan' da' cho'a blojen' ba bga'an.

5 Nach goso'e lo' blojen', na' besele'ede' chi' to beŋe' xcuide' šla'a liča, nyaze' to lache' ton da' šiš. Na' besežebe'.

6 Na' bena' gože'ne':

—Bitw žeble. Cheyiljwle Jesús beŋe' Nazaret ben' bosode'e le'e yag cruz. Perw ba bebane'; notoch no nla' nga. Le na' gan' gosexoe'ne'.

7 Le šjaya'ac na' le ye' bene' ca' gosaque' le' txen, na' len Pedron', gwyobech Jesúsen' yežine' Galilea clal ca' legaque'. Na' Galilean' na' yesele'ede'ne' can' gwnacze'.

8 Nach no'ol ca' chosyoxonjseŋe' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

Jesúsen' blo'elagüe' María no'ole Magdala

(Jn. 20:11-18)

9 Beyož beban Jesúsen' ladjo beŋe' guat ca' šezildao' ža dmigw, Jesúsen' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'.

10 Na' María nga jatixjue'ede' beŋe' ca' ba gosanita' len le'. Zjanita'yaše' na' chesebeže' cate' bžine'.

11 Na' cate' gosende' be'e diža' mban Jesúsen' na' gosende' be'e dižan' can' ba ble'ede'ne', bi gosejle'e.

Jesúsen' blo'elagüe' len čhop beŋe' ca' gosaque' le' txen

(Lc. 24:13-35)

12 Beyož goc ca', čhop beŋe' ca' gosaque' Jesúsen' txen zjangüe'e nez yixe' cate' Jesúsen' blo'elagüe' legaque', na' nža'le besele'ede'ne'.

13 Lecze legaque' ja'aque' jasedixjue'ede' beŋe' yezica'chle, perw neca gosejle'e čhegaque'.

Da' hgon Jesúsen' yeson beŋe' ca' chsejnilaže'ne'

(Mt. 28:16-20; Lc. 24:36-49; Jn. 20:19-23)

14 Gwdena' beŋe' šnej ca' gwlej Jesúsen' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdile' legaque' da' bi chesejnilaže' le' do yichj do laže' na' zjanaque' laždao' čhach, le bi gosejle'e čhe beŋe' ca' besele'ede'ne' ba bebane' ladjo beŋe' guat ca'.

15 Na' gože' legaque':

—Le šja'ac doxen yežlio, na' le šjatixjue'e diža' güen čhia' len yogo'loł beŋe'.

16 Beŋe' ca' yesejnilaže' neda' na' yesezoe' nis, gata' yela' mban čhegaque' toli' tocaŋe. Perw beŋe' bi chesejnilaže' neda', yesebiaye'e.

17 Na' beŋe' ca' chesejnilaže' neda', yesyega'anlene' da' qui: Yeso'e la' na' yesyebeje' da' xigüe' yo'o nyaz beŋe'; yesenje' diža' cobe da' bi zjansede';

18 na' še yesože' no beł znia, o še yese'eje' da' nac venen, bibi yesacde'; na' lecze yesexoa taque' yichj beŋe' chese'e na' yesyeyacde'.

Begüe Jesúsen' yaba

(Lc. 24:50-53)

19 Beyož bšaljlene' legaque', Xancho Jesúsen' begüe' yaba, na' gwchi'e cuit Diosen' šla'a liča.

20 Na' beŋe' ca' zjanaque' le' txen besežaše' na' jasedixjue'ede' diža' güen čhe' doxen. Na' cuin Xancho Jesúsen' goclene' legaque' gosone' yela' guac cont gosejle' beŋe' le nac da' li dižan' goso'en. Da' na'zen' chzoja'.

DIŽA' GÜEN DAN' BZOJ SAN LUCAS

Da' nga bzoj Lucasen' par Teófilo

1-4 Teófilo, naco' bene' zaca' na' chzoja' le' diža' quinga cont nezdo' da' li ca nac da' ba bosozejni'ide' le' che da' ca' ba gosac. Bene' zan bačh bosozoje' che Jesúsen', goso'e diža' che da' ca' bene', con can' bosozejni'i bene' ca' neto', bene' ca' besele'ede' can' gwzolaon cate' goljte Jesúsen'. Na' bene' ca' gosende' na' besele'ede' can' goquen' bososed bosolo'ede' bene' yoble diža' güen che'. Na' neda' cate' beyož gwñabyoža' can' goquen' na' gwyazlaža' gwzolan' tcho'a cont nezdo', Teófilo.

To angl gwdixjue'ede' galje Juan

5 Ca tiemp caten' gwnabia' rey Herodes distritw gana' nzi' Judea, na' gwzoa to bxož che bene' Israel ca' bene' le Zacarías. Bene' žin len to xonj bxož bene' zjale Abías. Na' no'ol che Zacarías le Elisabet, na' naque' diaža che da' bxož Aarón.

6 Na' Zacarías len Elisabeten' zja'accze' to liča len Diosen' na' gosonyane' yogo'lo' da' non Xancho Diosen' mandadw da'na' nyoj le'e ley che'na'.

7 Na' nono xi'inga' nita' neče Elisabeten' naque' no'ol güiž. Na' chopte' ba zjanaque' bene' gole.

8 Na' goquen' beyala' Zacaríasen' len bene' lježe' ca' bene' ca' zjanaque' bxož cont yesone' da'na' besyeyale' yesone' yesonexene' Dios.

9 Na' bxož ca' yogo' ni'a chesone' rifa cont chata'bia' noe' choj gwzeje' yal lo' yodao' blao čegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bzeye' yala' lo' yodao'na'.

10 Na' šlac bzeye' yala' gosonita' yogo'lo' bene' zan ca' chyo'ole bosol güiže' Diosen'.

11 Na' to angl bene' gwsele' Xancho Dios blo'elagüe' Zacaríasen', na' gwzecha angla' cuit mesa' lichale gan' chosozeye' yala'.

12 Na' cate' ble'e Zacaríasen' anglen', benit bečhol lo' yičhjažda'ogüe' na' bžebchgüe'.

13 Perw anglen' gože' le':

—Bitw žebo' Zacarías. Diosa' ba bzenague' che dan' gwnabdo'ne', na' no'ol čhio' Elisabeten' sane' to xi'ino', na' gwsio'obe' Juan.

14 Na' so' mbalaz na' yebedo' na' leczze bene' zan yesyebede' še ba goljbe'.

15 Gacbe' to bene' blao lao Diosen'. Bitw ye'ejbe' vino ne bichle da' chzože bene'. Na' cate' za' galjtebe' ba yo'o Spiritw che Diosa' lo' yičhjažda'obe' nabi'an lebe'.

16 Na' gombe' cont zan bene' Israel ca' yosoša' yičhjažda'ogüe' na' yesonxene' Xancho Diosen' can' cheyała' yesonxene' le'.

17 Na' cuialaobe' lao Xancho', na' soa Spiritw che Diosen' len lebe' can' gwzoan len da' Eliasen', na' lecz ca' yela' guac che Diosen'. Na' bene' ca' bi nita' binlo len xi'ine' ca' gombe' ga yesenite' binlo len legacbe', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xancho' cate' yide'.

18 Nach Zacaríasen' gože' anglen':

—Žnac gac nežda' da' nga? Neda' naca' bene' gole na' lecz ca' no'ol čhian' ba naque' bene' gole.

19 Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonxena'ne', na' gwsele' neda' zedetixjue'eda' le' diža' güen qui.

20 Le' bi gac nio' na'a, le bi chejli'o xtiža' nga. Cate' žin ža gac da' nga, cana' gac ye'nio' da' yoble. Na' da' li gwžin ža gac can' gwnia'.

21 Na' bene' ca' že' chyo'ole chesebeze' Zacaríasen' besyebande' da' gwžede' lo' yodao' blaona'.

22 Na' cate' bechoj Zacaríasen', bene' señw len ne'e da' bi goc nie'. Nach gosacbe'e bene' ca' ble'ebande' lo' yodao'na'.

23 Na' cate' beyož bdelaze' dan' bene' žin lo' yodao'na', beyej liže'.

24 Gwde na' no'ol che' Elisabeten' gwchendao' bidaon' lo' le'e. Na' gayo' bio' gwzoaze'.

25 Na' gwne':

—Güenchguan' ba ben Xancho Diosen' len neda'. Ba bžin ža beži'ilaže'de' neda', cont bich yeson beñača' xbab bibi zaca'.

To angl gwdixjue'ede' galje Jesucriston'

26 Goc xop bio' noa' Elisabeten' bidaon', Diosen' besele' anglen' ben' le Gabriel, gwyje' to yež da'na' nzi' Nazaret gan' mbane distritw Galilea.

²⁷ Gwsele' le' gan' zoa to no'ol güego' le' María. Na' Marian' napši'ichgua cuine'. Na' to bene' le' José bačh naquen gwšagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'.

²⁸ Na' bžin to angl' bene' za' yaban' gwyo'e gan' zoa María na' gože'ne':

—Patiox. Xancho Diosen' nži'ide' le' na' zoe' len le'. Na' gone' cont so' mbalazch ca yogo'loł no'ole yezica'chle.

²⁹ Cate' ble'e Marian' anglen', bebanchgüede' ca nac dižan' dan' gože' le'. Na' bene' xbab bi zejen dan' gwne' caten' bguape'ne' tiox.

³⁰ Na' anglen' gože'ne':

—Bitw žebo' María, Diosen' nži'ide' le'.

³¹ Na'a gua' xi'ino' to bi' byo dao', na' sano'be', na' go'o labe' Jesús.

³² Na' Jesúsén' gaque' to bene' blao na' benachen' yososi'ene' Xi'in Dios, Dios ben' naque' la'zelagüe bene' blao. Na' Xancho Diosen' gone' cont nabi'e nación Israel chele ca gwnabia' da' xozxta'ogüe' rey David.

³³ Na' le' nabi'e nación Israelen' toli tocaņe, na' gwbat te yela' gwnabia' čhen'.

³⁴ Nach gož Marian' angla':

—¿Nacxe gac sana' bdaon'? Bitw nžaga' bene' byo.

³⁵ Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe bene' blao. Da'nán' bidaon' za' galje gacbe' laždao' xilaže' na' yososi'ebe' Xi'in Dios.

³⁶ Na' bene' xna'o Elisabeten' lecze bačh gwchenda' bidao' lo' le'e la'czla' ba naque' bene' gole. Ba goc xop bio' no'e to bi' byo dao', len gosene' naque' no'ole güiž.

³⁷ Bibi de da' nacho da' cbi gac gon Dios.

³⁸ Nach gož Marian' anglen':

—Ni zoa' naca' xmos Xana' Diosen'. Gacšca čhia' con can' ba gwnao'.

Nach beza' anglen' gan' zoa Marian'.

Marian' jane'e Elisabeten'

³⁹ Gwde na' la' gwyejte Marian' to yež da' žia to lo ya'a gan' mbane distritw Judean',

⁴⁰ na' bžine' liž Zacariásen'. Na' gwyo'e bguape' Elisabeten' tiox.

⁴¹ Na' cate' Elisabeten' bende' chol' güiž Marian' le', nach gocbe'ede' chxite' chžia bidaon' lo' le'e. Na' Spiritw che Diosen' gwnabian' yichjlaždao' Elisabeten'

⁴² na' gwne' zižje da' bebechgüede', gože' Marian':

—Zo' mbalazch ca yogo'loł no'ole yezica'chle. Na' lecze bidaon' no'ona' soabe' mbalaz.

⁴³ Chebanda' le' naco' xna' Xana' zedena' o neda'.

⁴⁴ Con cate' benda' chguapo' neda' tiox, bidao' čhian' lecze bebebe', bxite' bžiabe' lo' lian'.

⁴⁵ Zo' mbalaz da' gwyejli'o gac can' gwna xtiža' Diosen' dan' gož anglen' le'.

⁴⁶ Nach Marian' gwne':

Chonxena' Xancho Diosen' do yichj do laža'.

⁴⁷ Na' do yichj do laža' chebechgüeda' Dios ben' bebeje' neda' lo da' malen'.

⁴⁸ Ba beyaše'de' neda' naca' xmore' la'czla' bibi zaca'.

Na' na'a bene' yesenita' toli tocaņe yesene' neda' zoa' mbalaz.

⁴⁹ Dios ben' chac chon da' nono gac gon ba bene' da' güen juisyw len neda'.

Toz len' naque' bene' laždao' xilaže' juisyw.

⁵⁰ Na' note'teze bene' chesape' le' bala'an do yichj do laže', Diosen' cheži'ilaže'de' legaque'.

Cheži'ilaže'de' bene' že' na'a na' yeži'ilaže'de' xi'in diaža čhegaque' ca'.

⁵¹ Bač blo'e Diosen' benachen' yela' guac che'.

Na' ba bolague' bene' ya'laže' ca'.

⁵² Ba bene' cont bene' gwnabia' ca' bich yesenabi'e.

Na' bene' bi naque' bene' blao, Diosen' ba bnežjue' latje yesaque' bene' blao.

⁵³ Na' bene' chesedon, Diosen' ba bnežjue' legaque' da' zan da' güen.

Na' bene' gwni'a ca', ba bose'e legaque', bibi bonežjue' legaque'.

⁵⁴ Nach ba goclene' chio' bene' Israel naccho ca xmore'.

Ba blo'ede' bitw ganlaže' chio', san ba cheyaše' cheži'ilaže'de' chio'.

⁵⁵ Ba bene' can' gože' da' Abraham len yezica'chle da' xozxta'ocho.

Na' soacze' yeyaše' yeži'ilaže'de' xi'in diaža che da' Abrahamna' toli tocaņe.

⁵⁶ Na' cate' ba goc šone bio' zoa Marian' len Elisabeten', nach Marian' beyej liže'.

Golje Juan bene' bzoe' bene' nis

⁵⁷ Na' cate' bžin ža san Elisabeten', gwzane' bi' byo dao'.

⁵⁸ Na' cate' goseneze bene' gualiz čhegaquen' na' diaža čhegaquen' Xancho Diosen' ba beyaše' beži'ilaže'de' Elisabeten', nach besyebchgüede' len le'.

⁵⁹ Na' gos doc xono' ža goljbe' na' jasezoe'be' señw dan' že' circuncisión can' gosone' len yogo' bi' byo dao' bi' gosaljbe' lo diaža che da' Abraham. Na' gosaclaže' si' labe' Zacarías can' le xaben',

⁶⁰ perw xna'be' gwne':

—Bi' gac. Cheyała' si'be' Juan.

⁶¹ Na' legaue' gose'ene':

—Notno diaža chele nita' bene' zjale ca', neca xozxta'ole.

⁶² Na' gosone' señw gosenabde' xaben' nac che'nde' si' labe'.

⁶³ Nach bene' señw gwñabe' to yagla' dao' da' bzoje': "Si' labe' Juan." Na' yogüe' besyebande'.

⁶⁴ Beyož bzoje' da'na', la' gocte benie', nach la' gwzolaote be'e diža' benxene' Diosen'.

⁶⁵ Na' besyebane bene' gualiz čegaquen'. Na' xtiža'gaquen' gos gwłaljen doxen yež ca' zjachi' lo ya'ana' gan' mbane distritw Judean'.

⁶⁶ Na' yogo'lol bene' gosende' dižan' gosone' xbab lo' yichjlažda'ogüe' che da' ca', na' gosene':

—¿Bixe gon bdao'na'?

Gosene' ca' le gosenezde' zoacze Xancho Diosen' len lebe'.

Diža' da' be' Zacarías

⁶⁷ Nach gwnabia' Spiritw che Diosen' yichjlaždao' Zacaríasen', nach be'e xtiža' Diosen', gwne':

⁶⁸ Chonxena' Xancho Dios ben' chonxen chio' bene' Israel.

Cheyaše' cheži'ilaže'de' chio' naccho nación che' na' ba chsele' bene' yebej chio' lo da' malen'.

⁶⁹ Na' bena' bach za' cont yebej chio' lo da' malen', naque' bene' gwnabia' gual,

na' naque' xi' in diaža che da' rey David ben' goc xmos Diosen'.

⁷⁰ Chac can' gwna Diosen' len cho'a da' bene' ca' gwsele' cani', bene' gosac lo ne'e gosoe' xtižen'.

⁷¹ Ba za' ben' gwne' yosle' chio' lo na' yogo' bene' chesegue'e chio'.

⁷² Chac can' gože' da' xozxta'ocho ca' yeyaše' yeži'ilaže'de' legaue'.

Bi' chanlaže', san chone' yogo' da' ba gwne' gone' gaclene' chio'.

⁷³ Diosen' chone' can' gwlo'e da' balj lao da' xozxta'ocho da' Abraham gože'ne' gaccze can' gwnen'.

⁷⁴⁻⁷⁵ Gwne' yosle' chio' lo na' bene' chesegue'ede' chio'.

Nach gac lažda'ochon' xilaže' lao le' na' gonxenchone' sin čbi žebcho,

na' šejcho licha gonxenchone' šlac de yeła' mban checho.

⁷⁶ Nach Zacaríasen' gože' bdao' čhen':

Bdao' chia', beñach yesene' čchio' naco' bene' choe' xtiža' Dios, Dios ben' naque' la'zelagüe bene' blao.

Yesene' ca' da' cuialaguo' lao Xančon' na' go'o xtižen' cont nita' bene' yosozenague' che' cate' yide'.

⁷⁷ Gwsed gwlo'edo' neto' can' chaclaže' Diosa' yebeje' chio' naccho nación che' lo da' mala' na' yezi'xene' xtoła'chon'.

⁷⁸ Diosen' cheyaše' cheži'ilaže'de' chio',

le len' gwlo'e be'ni' che' lo' laždao' chio' beñach.

⁷⁹ Cue'e be'ni' che' lo' yichjlaždao' chio' naccho ca' bene' chaš ga nac čhol, chio' chžebcho gatcho.

Na' gwzejni' ide' chio' beñach naquen' soa cuezcho yežlio nga.

Can' be' Zacaríasen' xtiža' Diosen'.

⁸⁰ Na' Juanna' zej chcha'obe' zejze chac yichjlažda'oben' can' chazlaže' Diosen'. Na' jasoe' latje daš. Na'ate zoe' cate' gwzomagüe' gwduxjue'ede' xtiža' Diosen' len bene' Israel ca'.

2

Caten' golje Jesúsen'

(Mt. 1:18-25)

¹ Na' lecz šlac gwnabia' rey César Augusto, bene' mandadw gwyas to censo cont nežde' bal bene' že' to to yež da' zjachi' doxen yežlio gan' chnabi'e.

² Na' lecz cana' Cirenio naque' gobernador gan' nzi' Siria. Na' naquen da' nechw bčhele' bal bene' že' to to yež.

³ Na' yogo'lol bene' jaya'aque' lažgaue' jasyede cuent cuine' cont bosochele' le'.

⁴ Na' José naque' diaža che da' rey David. Da'nan' beže'e Nazaret gan' mbane distritw Galilea, beyeje' yež Belén dan' nac laž da' rey David. Na' chi' yež Belén gan' mbane distritw Judea.

⁵ Beyeje' jayde cuine' cuent na' zenche'e no'ol che' Marían' perw biña' yeseca'a lježe'. Na' Marían' ba no'e bdao'.

⁶ Na' šlac nite' Belén bžin ža sane'.

⁷ Na' gwxane' bi' nechw, to bi' byo dao', na' btobe'be' lache' na' gwlo'ebe' ga chesagw beyixe', da' bich bi latje yo'o mesónna' par legaue'.

Angl ca' bosozende' bene' güeyoe xila' ba golje Jesúsen'

⁸ Na' že'na' yixe' che yež Belén na' ate že' bene' güeyoe xila' chesape' xila' chen'.

⁹ Na' to angl bene' gwsela' Xancho Diosen' bžine' gan' nita' bene' güeyoe xila' ca', na' be'ni' che Xancho Diosa' gwyechjen bsenin' gan' nite'na'. Na' besežebchgüe'.

¹⁰ Na' gož angla' legaue':

—Bitw žeble. Na'a chixjue'eda' le'e to diža' güen da' yesebechgüe yogo'lol bene'.

¹¹ Na'aža lo yež che rey David ba golje bena' gac yebeje' benachen' lo da' mal. Naque' Cristo, na' zeje diža' naque' ben' gwsela' Dios cont nabi'e, na' lecze naque' Xancho.

¹² Cont yeželele bdao'na', quinga naquen: bdao'na' ba ntobe'be' lache' na' debe' gan' chesagw beyixe' ca'.

¹³ Beyož gwna angla' ca' la' besežinte bene' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

¹⁴ jChonxenko Diosa' ben' zoa yaba,

na' lo yežlio yesezoa yesebez benachen' binlo, con bena' cheson can' chazlaže' Diosen'.

¹⁵ Na' cate' besyeya'ac angl ca' zjaya'aque' yaba, na' bene' güeyoe xila' ca' gose' lježe':

—Yeyejcho Belén šjayna'cho dan' ba goc can' nac dan' gwsela' Xanchon' angl quinga bedesedixjue'ede' chio'.

¹⁶ Na' beseya'aces bene' güeyoe xila' ca' jaya'aque' Belén. Na' besyeželde' Marían' len Josén' na' len bdao'na'. Na' bdao'na' debe' gan' chesagw beyixe' ca'.

¹⁷ Beyož besele'ede' can' ba goquen, na' gosoe' diža' che bdao'na' len bene' ca' yezica'chle ca nac dan' gož anglen' legaue'.

¹⁸ Na' yogo'lol bene' ca' gosende' diža' dan' gosoe' bene' güeyoe xila' ca' besyebande'.

¹⁹ Na' lecze Marían' gwlo'o yichje' yogo'lol diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen.

²⁰ Nach besyeya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba goc yogo'lol da' ba gosende' na' besele'ede' dan' gož anglen' legaue'.

Diža che Jesúsen' jasesane'be' lo' yodao' blaona'

²¹ Cate' goc xono' ža golje bdao'na' jasezoe'be' sešw da'na' nzi' circuncisión, na' bososi'e labe' Jesús, can' ben anglen' mandadw cate' za' gua' Marían' lebe'.

²² Na' cate' gwde ba beyac Marían' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'.

²³ Gosone' can' nyoj ley che' dan' ža: "Yogo' bi' byo dao' bi' nechw cheyala' gache' lo na' Dios."

²⁴ Nach gosonxene' Diosen', gosone' can' ža ley che Xancho Dios dan' žan: "Cheyala' gotle chop ngolbex o čhope plomxtil."

²⁵ Na' Jerusalénna' gwzoa to bene' le' Simeón. Benan' gwyejcze' bene' da' güen lao Diosen' na' benxene' le', na' gwleze' batcan' yid Cristo ben' sela' Xancho Diosen' cont yebeje' bene' Israel ca' lo da' mal. Na' Spiritw che Diosen' gwyo'on lo' yichjlaždao' Simeón,

²⁶ na' bzejni'in le' bi gate' še biña' le'ede' Criston'.

²⁷ Na' Spiriton' benen cont gwyeye' yodao' blaona', na' zoe' yodao'na' cate' besežin xaxna' Jesúsen' zjano'ebe' cont yesone' len lebe' can' non ley čhegaquen' mandadw.

²⁸ Nach Simeónna' gwlene'be' nach benxene' Diosen', gože'ne':

²⁹ Xana' Dios, bač goc can' gwnaon'.

Ben latje yeyeda' binlo gana' zo'na', neda' naca' xmoso'.

³⁰ Ba ble'eda' bena' zedyelej neto' lo da' mal.

³¹ Naque' bene' gwnalažo' gwselo' neče yogo'lol benačh.

³² Na' cue'e be'ni' che' lo' yichjlaždao' bene' cbi zjanaque' bene' Israel.

Na' gaque' la'zelagüe bene' zaca' len neto' bene' Israel.

³³ Nach xaben' len xna'ben' besyebande' ca diža' chebe' dan' be' Simeónna'.

³⁴ Na' Simeónna' gwnabde' Diosen' cont gac güen čhegaue'. Na' gože' Marían':

—Bene' Israel ca' yesejnilaže' xi'ino' nga yesenite' mbalaz, na' bene' Israel ca' cbi yesejnilaže'ne' bi yesenite' mbalaz. Zedelo'ede' benachen' can' chaclaže' Diosen' goncho, perw zane' bi yesejle'e che'.

³⁵ Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguo'n' catequen' žaglaguo' len da' gac che'.

³⁶ Na' lecze yodao' blaona' gwzoa to no'ole le Ana, na' cho'e xtiža' Diosen'. Naque' xi'ın da' ben' le' Fanuel na' naque' diaža che da' Aser. Bšagne'e cate' naque' no'ol güego', perw na' gaž izga gwzoalene' bene' che' na' gote', na' bga'ane' güezebe. Na' Anan' ba naque' to bene' gole, ³⁷ taplalj tap izde'. Bicze chechoje' yodao' blaona'. Leca chonxene' Xancho Diosen' do ža do yel, gwzoatie' tgüje bene' gwbas na' con gwzoachgüe' boļ güiže' Diosen'.

³⁸ Na' goquen' gwbiga' Anan' gan' zoa Josén' len Marián' lo' yodao'na' na' be'e yela' choxlen che Diosen' bač gwsele' Jesúsen'. Na' be'e diža' che Jesúsen' len yogo' bene' ca' že' Jerusalén ben' chesebeze' batca' seļa' Diosen' ben' yebeje' legaque' lo da' malen'.

Jaya'aque' Nazaret

³⁹ Nach Josén' len Marián' cate' beyož gosone' yogo'loļ dan' non ley che Xancho Diosen' mandaw yesone', jaya'ac lažgaque' Nazaret gan' mbane distritw Galilea.

⁴⁰ Na' Jesúsen' zej chcha'ogüe' na' zej chchachlaže'. Na' ca zej chcha'ogüe' na' zej chejni'ichde', na' Diosen' nži'ilaže'de'ne'.

Can' ben Jesúsen' chašil yodao' blaona'

⁴¹⁻⁴² Na' xaxne'e ca' yogüiz chja'aque' ınin da' chaļa' Jerusalén chjaseze'ede' can' goc cate' Diosen' betue' bi' nechw che yogo' bene' Egipto na' bosle' bene' Israel. Šižinw ize Jesúsen' cate' goseche' xaxne'en le' ja'aque' ınin' Jerusalén.

⁴³ Na' cate' gwde ınina' besyeya'aque', perw Jesúsen' bega'ane' ciuda Jerusalén. Na' xne'ena' len Joséna' bi gosache'ede'.

⁴⁴ Con gosacde' ba zjayde' txen len bene' ca' nžaggaque'. Na' tža nez ba gosa'aque' cate' gwzoloa chesyeyiljue'ne' ladjo diaža čegaque' na' no bene' xmigüe',

⁴⁵ perw bitw besyeželde' le'. Nach besyebi'e jaya'aque' Jerusalénna' da' yoble cont šjasyediljue' le'.

⁴⁶ Na' beyon žach besyeželde' Jesúsen' chašil yodao' blaona', chi'e gachol bene' ca' chososed chosolo'ede' dan' bzoj da' Moisés. Jesúsen' chzenague' xtiža'gaquen' na' zanen chnabde' legaque'.

⁴⁷ Na' yogo'loļ bene' ca' chosozenague' xtiža' Diosen' da' cho'e chesyebande' can' chejni'ide' na' can' choži'e xtiža' bene' ca' zjansed dan' bzoj da' Moisés.

⁴⁸ Na' cate' besele'e xaxne'en le', besyebande', na' xne'en gože' le':

—Xi'ındagua', žbixchen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

⁴⁹ Jesúsen' gože' legaque':

—žBichen' beyiljwle neda'? žBi nezele liž Xa' ngan' cheyala' soa'?

⁵⁰ Perw xaxne'e bitw gosejni'ide' bi zejen dan' gože' legaque'.

⁵¹ Na' beyeje' yež Nazaret len xaxne'e bzenague' čegaque'. Na' gwlec yichj xne'ena' yogo'loļ dan' goca'.

⁵² Na' ca' chac zej chejni'iche Jesúsen' na' zej gwcha'oche', na' Diosen' len benača' zej chesazlaže'che' le'.

3

Juan gwdixjue'ede' diža' güen che Diosa'

(Mt. 3:1-12; Mr. 1:1-8; Jn. 1:19-28)

¹ Cate' lo ız šino' dan' chnabia' César Tiberio doxen ga mbane nación Roma, izna' goc Poncio Pilato gubernador che distritw Judea, na' goc Herodes gubernador che distritw Galilea. Na' bene' biše' Herodesen', ben' le Felipe, goque' gubernador che distritw Itorea na' che distritw Traconite. Na' goc Lisaniás gubernador che distritw Abilinia.

² Nach lecze izna' Anás na' Caifás gosacche' bžoz blao che bene' Israel. Izna' Juan ben' naque' xi'ın Zacarías gwzoe' to latje daš. Nach Diosen' be'lene' Juanna' diža'.

³ Na' Juanna' gwyeje' yogo'loļ yež dan' nita' gaļa'ze yegw Jordán, jatixjue'ede' yogo'loļ bene' cheyala' yesyetinjde' xtola'gaque' na' yesezoe' nis cont nitlao xtola'gaquen'.

⁴ Juanna' bene' dan' bzoj da' Isaiás ben' be' xtiža' Diosen' cani'te, gana' žan: Bena' chne' zižje latje dašen', že':

“Le gonšagüe' yichjlažda'olen' cont soale gwzenagle che Xancon' cate' yide',

le cueyijchj da' malen' chonle' cont yichjlažda'olen' gaquen' ca to nez da' ba gosonšagüe'.

⁵ Gwžin ža cate' yogo' ya'a yegw ca' yesyeyaquen laše',

na' no nez da' nacchgua bxoca' yesyeyaquen liča,

na' no nez da' nžaš nche'ene' yesyeyaquen ba'a.

⁶ Na' yogo'loļ bene' yesache'ede' can' chaclaže' Diosen' yebeje' benačen' lo da' mal'.”

⁷ Na' bene' zan ja'aque' gan' gwzoa Juanna' cont gwzoe'ne' nis. Na' Juanna' gože' legaque':

—Le'e nacchguale bene' zgot na' bene' gwxiye'. ¿Chaquale guac yelale lao castigw dan' sela' Diosen' caten' gone' yela' justis che benachen'?

⁸ Še da' li ba betinjle xtoła'le, cheyala' gonle da' nac güen cont yesacbe'e bene' ba boša' yichjlažda'olen'. Na' bitw gonle xbab gaquale Diosen' bitw gone' le'e castigw che xtoła'len' lagüe da' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'.

⁹ Ca nac le'e, še bi chorle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'.

¹⁰ Nach bene' ca' chosozenag xtiže'na' gosenabde' Juanna', gose'ene':

—¿Bica' da' cheyala' gonto'?

¹¹ Na' gože' legaque':

—Ben' nape' chope camis cheyala' gwnežjue' ton che bene' bi de che'. Na' lecze ca' che ben' de da' gagüe', cheyala' gwnežjue' che ben' bi de gagüe'.

¹² Na' cate' to chope bene' güechixjw ca' jasebigue' cont gwzoa Juanna' legaque' nis, na' gose'ene':

—Maestrw, ¿bica' da' cheyala' gonto'?

¹³ Na' gože' legaque':

—Bitw gwchixjwchle ca da' cheyala' yeseyixjue'.

¹⁴ Na' to chope bene' ca' zjanac soldadw lecze gosenabde' le', gose'ene':

—¿Chix neto'? ¿Bica'ch da' cheyala' gonto'?

Na' Juanna' gože' legaque':

—Bitw ca'ale da' de che bene', na' neca gonlaže'le len da' yosbague'le bene' cont ca'ale xmechwgaque'. Le gon banez len laxjwle.

¹⁵ Na' bene' ca' gosezoe' lez yid Cristo ben' naquen sela' Diosen' yedenabi'e, na' gosacde' še Juanna' naque' Cristo.

¹⁶ Na' Juanna' gocbe'ede' xbab chegaquen' na' gože' yogo'lole':

—Neda' da' li chzoa' le'e nis, perw za' yid bena' gon cont soa Spiritw che Diosen' lo' yichjlažda'olen' nabian' le'e. Na' Spiriton' naquen ca yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' bene' zaca' bitw zaca' gona' xmandadoe' lechja' no xe'le'.

¹⁷ Benan' gone' len benachen' can' choncho cate' chdecho trigon' lo' rner: Chtobcho trigon' chgo'osağüe'chon na' chzeycho yix beben'. Na' bene' chesejnilaže' Diosen', yotobe' legaque' cont šjasenyite' txen len le', na' bene' bi chesejnilaže' le', sele' legaque' lo' yi' gabilen' dan' cbi cheyol chenit.

¹⁸ Da' zanch da' gwna Juanna' gwdixjue'ede' legaque' diža' güen, na' gwneyoede' legaque' yesejle'en.

¹⁹ Nach Juanna' gwdile' gobernador Herodes ca nac da' mal da' bene' beque'e Herodías ca xo'ole', le Herodíasna' naque' xo'ole Felipe bene' biše' Herodesen'. Na' Juanna' lecze be'e diža' yogo'lo' da' mal dan' ba ben Herodes.

²⁰ Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

Can' goc caten' gwzoa Jesúsen' nis

(Mt. 3:13-17; Mr. 1:9-11)

²¹ Nach šlac chzoa Juanna' bene' nis, bene' zan ja'ac cont bzoe' legaque' nis. Na' len Jesúsen' gwzoe' nis. Na' lo' hora' Jesúsen' bol güiže' Diosen' na' la' byaljwte yaba gan' zoa Diosen'.

²² Na' betj Spiritw che Diosen' bžinen gwzoan len le', na' ca hora' Spiriton' naquen ca to ngolbex. Na' gosende' gwne Dios ben' zoa yaban', gwne':

—Le' naco' Xi'ina' bene' chacchgüeda', na' chebe chezaquelaže'chgüeda' chio'.

Diaža che Jesúsen'

(Mt. 1:1-17)

²³ Na' ca do šichoa ize Jesúsen' cate' gwzolao bene' yogo'lo' da' zedeyene'. Na' bene' ca' gwnita' na' gosone' xbab še naque' xi'in Joséna'. Josén' naque' xi'in Elí,

²⁴ na' Elí naque' xi'in Matat, na' Matata' naque' xi'in Leví, na' Levína' naque' xi'in Melqui, na' Melquin' naque' xi'in Jana, na' Janan' naque' xi'in yeto ben' le' José.

²⁵ Na' Joséna' naque' xi'in Matatías, na' Matatíasen' naque' xi'in Amós, na' Amósen' naque' xi'in Nahum, na' Nahunna' naque' xi'in Esli. Na' Eslin' naque' xi'in Nagai,

²⁶ na' Nagain' naque' xi'in Maat, na' Maata' naque' xi'in Matatías, na' Matatíasen' naque' xi'in Semei, na' Semein' naque' xi'in José, na' Josén' naque' xi'in Judá.

²⁷ Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri,

²⁸ na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosanna' naque' xi'in Elmodam, na' Elmodanna' naque' xi'in Er.

²⁹ Na' Era' naque' xi'in Josué, na' Josué'n' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat.

³⁰ Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim.

³¹ Na' Eliaquina' naque' xi'in Melea, na' Melean' naque' xi'in Mainán, na' Mainánna' naque' xi'in Matata, na' Matatan' naque' xi'in Natán.

³² Na' Natánna' naque' xi'in David, na' Davida' naque' xi'in Isaí, na' Isaín' naque' xi'in Obed, na' Obeda' naque' xi'in Booz, na' Boozen' naque' xi'in Salmón, na' Salmónna' naque' xi'in Naasón.

³³ Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque' xi'in Esrom, na' Esronna' naque' xi'in Fares. Na' Faresen' naque' xi'in Judá,

³⁴ na' Judán' naque' xi'in Jacob, na' Jacoben' naque' xi'in Isaac, na' Isaaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor.

³⁵ Na' Nacoren' naque' xi'in Serug, na' Seruga' naque' xi'in Ragau, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala,

³⁶ na' Salán' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in Sem, na' Senna' naque' xi'in Noé, na' Noén' naque' xi'in Lamec.

³⁷ Na' Lamequen' naque' xi'in Matusalén, na' Matusalénna' naque' xi'in Enoc, na' Enoca' naque' xi'in Jared, na' Jareden' naque' xi'in Mahalaleel. Na' Mahalaleela' naque' xi'in Cainán,

³⁸ na' Cainánna' naque' xi'in Enós, na' Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

4

Satanásen' goclažen' co'oyelan' Jesúsén' cont gone' da' mal

(Mt. 4:1-11; Mr. 1:12-13)

¹ Na' Spiritw che Diosen' gwnabian' yichjlaždao' Jesúsén'. Na' Jesúsén' beze'e cho'a yegw Jordán, na' Spiritua' benen cont gwyeje' latje daš.

² Čhoa ža gwzoe' latje dašen' na' lao čhoa žan' bicze bi gwdagüe'. Na' cate' gwde čhoa žan' gwdone'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal.

³ Nach gož Satanásen' le':

—Še le' naco' Xi'in Dios, gož yej nga yeyaquen yetextil.

⁴ Na' gož Jesúsén' len:

—Nyojzce Xtiža' Diosa' žan: “Gague yela' guagw na'zen' chyažje chio' beňach cont gac bancho, san lezce chyažjecho yogo'lol diža' dan' ža Diosen'.”

⁵ Na' gwčhe' Satanásen' le' to lo ya'a sibe na' bedao'nez blo'en le' yogo'lol nación da' zjachi' yežlio.

⁶⁻⁷ Nach gožen le':

—Doxen yela' gwnabia' da' de yežlio nga naquen lo na' cont gwnežjuan' con no che'nda'. Še le' gwzoe xibo' gonxeno' neda', nach goņa' le' yela' gwnabia' che nación ca' zjachi' yežlio nga na' len yela' zaca' yela' xdan che nación ca'.

⁸ Nach Jesúsén' gože' Satanásen':

—Becuas ca' ale Satanás. Nyojzce Xtiža' Diosen' žan: “Cheyala' šejnilaže' cho Xancho Diosen' na' toz le' gonxencho.”

⁹ Nach Satanásen' gozčhe'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino',

¹⁰ le nyojzce Xtiža' Diosen', žan:

Seļa' Diosen' bene' ca' zjanac angl che' yesaclene' le' na' yesape' le',

¹¹ yesože' le' cont bi čhego' no yej.

¹² Nach Jesúsén' gožen':

—Lecz ca' nyoj Xtiža' Diosen' žan: “Bitw goncho Xancho Diosen' prueba še lede' can' žen'.”

¹³ Beyož gota'bia' bi gwzoe Satanásen' co'oyelan' Jesúsén' gone' da' mal, nach becuasen šlož len le'.

Jesúsén' gwzologüe' chyixjue'ede' diža' güen che Diosen' distritw Galilea

(Mt. 4:12-17; Mr. 1:14-15)

¹⁴ Nach Jesúsen' beyeje' distritw Galilea, na' yela' guac che Spiritw che Diosen' gwzooan len le'. Na' yogo' lo' bene' že' yež ca' zjachi' doxen Galilea gosenezde' che Jesúsen'.

¹⁵ Na' Jesúsen' bsd blo'ede' legaque' lo' yodao' chegaquen', na' yogo' lo' bene' ca' gosonxene' le'.

Bežin Jesúsen' Nazaret

(Mt. 13:53-58; Mr. 6:1-6)

¹⁶ Na' bežin Jesúsen' yež Nazaret gan' gwcha'ogüe', na' gwyo'e yodao' že che Dios can' ba yolagüe' chone', na' gwzechede' cont gwlabē'.

¹⁷ Na' ben' yo'o lo ne'e yodao' na' bnežjue'ne' yiš da' ndobe gan' nyoj dan' bzoj da' Isaias ben' be' Xtiža' Diosen' cani'te. Na' Jesúsen' bzaše' yišen' na' beželde' ga nyojen žan:

¹⁸ Zoa Spiritw che Diosa' len neda',

na' Diosen' gwleje' neda' zedeya' diža' güen len bene' yaše'.

Na' gwsele' neda' zedeyena' cont yesyeyaclaže' bene' ca' chesacyaše'de'.

Na' za'a cont gwsana' beže' ca' zjade ližya.

Na' zedeyena' cont yesyela'e beže' l'chol.

Na' bene' chy chzaca', zedeyena' cont noch no yosochi yososaque' legaque'.

¹⁹ Na' zedetixjue'eda' ba bžin že gaclen Diosen' beňachen'.

²⁰ Jesúsen' botobe' yišen' na' bonežjue' ben' yo'o lo ne'e yodaon' na' gwchi'e. Na' yogo' bene' ca' nita' yodaon' la' gosaña'tie' le'.

²¹ Nach gwzoloa be'e diža' gwne':

—Ža na'aža ba chac can' že Xtiža' Diosen' dan' ba benele nga.

²² Na' yogo' beže' ca' gosende' diža' dan' be'e besyebande' catec mba nac xtiža' Jesúsen'. Na' gosenie' güen che' na' gose' lježe':

—¿Gague benga xi'in Josén'?

²³ Nach gož Jesúsen' legaque':

—Ye'ljale neda' can' že diža' dan' de: "Beže' güen rmed le', beyon cuino'." Na' lecze ye'ljale neda': "Dan' chesene' beno' yež Capernaum da' bebane beže', lecz can' cheyala' gono' lažcho nga."

²⁴ Nach goze'e legaque':

—Da' li chnia' le'e, beže' gualaž che note'teže beže' choe' xtiža' Diosen' bitw chesezi'e che'.

²⁵ Ca tiemp che da' Eliás ben' be' xtiža' Diosen' cani', bibi yejw goc šon iz yo gašje na' goc gwbin juisyw čegaque' doxen gan' zelao mbane Israel. Naquen da' li gwnita' zan no'ol güezebe yež ca' gan' mbane Israel ca tiempa',

²⁶ perw Diosen' bi gwsele' Eliásen' cont gaclene' ne to beže' güezeb ca'. Gwsele' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe.

²⁷ Na' lecz ca' tiemp che da' Eliseo ben' be' xtiža' Diosen' cani', gwnita' zan beže' Israel bene' gosacšene len yižgüe' da' nzi' lepra. Ne to legaque' bi beyon Eliseon'. Toz beže' zito' bene' Siria, ben' le' Naamán, beyon Eliseon'.

²⁸ Na' yogo' beže' ca' že' yodao' na' cate' gosende' dan' gwna Jesúsen' beseža'achgüe'.

²⁹ Na' la' besyezoža'te' na' besyebaje' Jesúsen' yežen', na' goseče'ene' to lo ya'a da' zoa gala'ze, gosaclaže' yosolažoe'ne' lo ya'a na'ate,

³⁰ perw bibi goc yesonde' le'. Con beza' Jesúsen' bedie' gachol gague'.

Jesúsen' bebeje' da' xigüe' dan' yo'o yichjlaždao' bene'

(Mr. 1:21-28)

³¹ Na' jasoe' yež Capernaum gan' mbane Galilean', na' že che Dios bsd blo'ede' beže' ca' že' lo' yodao'na'.

³² Na' beže' ca' besyebande' ca' nac dan' bsd blo'eden', le bzejni'ide' cacze to beže' nežde' cayanen' nac xbab che Diosen'.

³³ Lo' yodao'na' gwzooa to beže' yo'o nyaze' da' xigüen'. Na' bosye'e gwne':

³⁴ —¿Bixchen' chgoša' chlaže' čho' len neto', Jesús beže' Nazaret? ¿Zedežiyao' neto'? Neda' nombi'a le' na' nežda' naco' beže' laždao' xilaže' juisyw ben' gwseła' Diosen'.

³⁵ Nach Jesúsen' gwdile' da' xigüen' na' gožen':

—¡Ššago'! Bechoj yichjlaždao' benga.

Na' bchix da' xigüen' bena' gachol beže' ca' že'na' nach bechojen. Perw bitw benen le' zi'.

³⁶ Na' leca besyebane yogo' beže' ca', nach gose' lježe':

—¿Bixen' chac? ¿Bixe da' coben' chlo'e benga? Nachia' nape' yela' chnabia' na' yela' guac, le chone' mandadw na' la' chechojte da' xigüe' da' yo'o nyaz beže'.

³⁷ Na' ca' nac dan' ben Jesúsen' gos gwlaže dižan' doxen lagüe yež ca' zjachi' do na'.

Jesúsen' beyone' taobi'in che Simónna'

(Mt. 8:14-15; Mr. 1:29-31)

³⁸ Na' cate' beze'e yodao'na', na' gwyeye' liž Simón. Na' taobi'in che Simónna' chacšende', yo'e da' la. Na' bosol güiže' Jesúsen' cont yeyone' le'.

³⁹ Na' Jesúsen' gwzeche' cuite' gan' die', na' bcheque' gwdile' da' lan' cont bechojen. Nach taobi'in che Simónna' la' gwyastie' na' bsini'e da' gose'ej gosagüe'.

Jesúsen' beyone' bene' zan

(Mt. 8:16-17; Mr. 1:32-34)

⁴⁰ Na' cate' ba chxoá gwbižen' goseche'e con yogo' bene' chese'e yižgüe' jasesane' legaque' lao Jesúna'. Na' Jesúsen' gwxoá ne'e yichj to toe' na' beyone' legaque'.

⁴¹ Na' lecz ca' bebej Jesúsen' da' xigüe' da' yo'o yichjlaždao' bene' zan. Na' besyechojen gosenen zižje, gosenan:

—Le' naco' Xi'in Dios.

Na' Jesúsen' gwdile' legaquen na' bitw be'e latje bi yesenan, le gosenezen naque' Cristo ben' gwlej Diosen' cont yedenabi'e.

Jesúsna' gwde' doxen Galilean' bsed blo'ede'

(Mr. 1:35-39)

⁴² Na' beteyo cate' gwe'ni', beze'e na' beyeje' to latje ga nono nla'. Na' bene' ca' besyeyiljue' ne' na' ja'aque' gan' zoen'. Na' gosaclaže' yosozague' Jesúsen' cont bi yeze'e.

⁴³ Na' Jesúsen' gože' legaque':

—Lecz ca' bene' ca' nita' yež yoble cheyala' šjalo'eda'ne' cont yosozenague' che Diosen' na' nabi'e yichjlažda'ogaque'. Diosen' gwsele' neda' cont šjatixjue'eda' legaque' xtižen'.

⁴⁴ Ca' goquen', Jesúsen' gwde' to to yež che distritw Galilea na' bsed blo'ede' bene' ca' lo' yodao' chegaquen'.

5

Gosezene' be zan bel'ya'a

(Mt. 4:18-22; Mr. 1:16-20)

¹ Na' šlac zecha Jesúsen' cho'a nisdao' da'na' nzi' Genesaret, besežag bene' zan na' bosochite' Jesúsen' da' gosaclaže' yosozenague' xtiža' Diosen' dan' bi'e cho'a nisdao'.

² Na' Jesúsen' ble'ede' chope barcw dao' cho'a nisdao'. Na' bene' gwxcn bel' ca' ba besyežaše' lo' barcon' ba chesyeyibe' yixjw bel' chegaquen'.

³ Na' Jesúsen' gwyo'e lo' barcw che Simónna' na' gwñabde' le' bosožigue' barcon' yelate' lo' nisen'. Na' Jesúsen' gwchi'e lo' barcon' blo'ede' bene' ca' že'na'.

⁴ Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwzala' yixjw chelen' na' senle belen'.

⁵ Nach Simónna' gože' Jesúsen':

—Maestrw, ba bento' žin do yel na' ne to nono bdoła'. Perw le' ba gwnao' yezolaoto', na' gwzala'to' yixjw ca' da' yoble.

⁶ Na' beyož bosozala' yixjw chegaquen' zjanyicoco'ten belen', yeleze ca' yesyecheza'ten.

⁷ Na' bene' ca' zjanita' lo' barcw che Simónna' gosone' señw gosaxe' bene' lježen' že' yeto lo' barcw yoble cont yesaclene' legaque' yesyebeje' yixjon'. Yelez ca' gwdebe nisen' chopte barcw ca' dan' gosegüe'e bel' zan lo'enna'.

⁸ Nach Simónna', ben' lecz le' Pedro, cate' ble'ede' da'na' goquen' na' bzoa xibe' lao Jesúsen' gože' le':

—Xana', neda' naca' to bene' mal, bibi zaca' par so' nga len neda'.

⁹ Gwne' ca' le le' txen len bene' lježe' ca' že' lo' barcon' besyebanchgüede' da' gosezene' bel' zanna'.

¹⁰ Lecz ca' besyebane xi'in ben' le Zebedeo, zjanac chop biše'tie', Jacobo len Juan. Bene' ca' chesone' žin len Simónna'. Nach Jesúsen' gože' Simónna':

—Bitw žebo'. Le' naco' bene' gwxcn bel', na' chebejo' belen' lo' nisen'; perw na'a gona' cont gaxle bene' yesyechoje' lo' da' malen'.

¹¹ Na' cate' besyeyinlene' barcon' yo biž, nach gosebejyichje' barcon' len yogo' xšinlaže' ca' na' ja'aclene' Jesúsen'.

Jesúsen' beyone' to bene' che'ede' yižgüe' dan' nzi' lepra

(Mt. 8:1-4; Mr. 1:40-45)

¹² Na' šlac Jesúsen' zoe' to yež na' bžin to bene' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' bol güiže'ne' gože'ne':

—Xana', še chaclažo', guac yeca'o yižgüe' dan' che'eda' nga.

¹³ Nach Jesúsen' bli' ne'e na' gwxo'en' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'.

¹⁴ Nach Jesúsen' bene' mandadw gože' le' notno ye'e can' ba beyone' le'. Na' gože' le':

—Con gwyej jaŋa' bxoza' cont le'ede' bach beyacdo'. Na' bnežjo da' cheyala' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

¹⁵ Na' tža tža gos gwłalje diža' ca nac yela' guac dan' ben Jesúsen'. Na' besedob bene' zan cont bosozenague' xtiža' Jesúsen' na' cont beyone' legaque' len bite' teze yižgüe' da' chese'ede'.

¹⁶ Nach Jesúsen' bchoje' to ši'i güeje jał güiže' Diosen' to latje daš.

Jesúsen' beyone' to bene' bi chda šla'a ni'a ne'e

(Mt. 9:1-8; Mr. 2:1-12)

¹⁷ Nach to ža zoa Jesúsen' to yo'o gan' chsed chlo'ede' bene'. Na' gała'ze zjanita' zan bene' Israel bene' zjanzi' fariseo. Na' ľecze zjachi' yeto cuen bene' ca' chososed chosolo'ede' dan' bzoj da' Moisés. Bene' ca' že'na' za'aque' yogo'loł yež ca' gan' mbane distritw Galilea len distritw Judea, na' ľecze bałe' za'aque' ciuda Jerusalén. Na' bosozenague' diža' da' be' Jesúsen'. Na' yela' guac che Xancho Diosen' zoon len Jesús'a na' beyone' bene' güe' ca'.

¹⁸ Na' besežin xonj bene' zjanlene' to bene' xinj, bene' bi chda šla'a ni'a ne'e, zjanxoe' le' to lo cam dao'. Na' gosaclaže' yesedie' šjasesane' le' lao Jesús'a.

¹⁹ Na' da' že'chgua bene' zan bi goc latje yesedie' šjasesane' bene' güen' lao Jesúsen'. Nach bene' ca' gosepe' yichjo'ole gososaljue' goseque'e tej na' beseletje'ne' len xcame'na' gachol bene' ca' že' lo' yo'ona' cont bžine' lao Jesúsen'.

²⁰ Cate' gocbe'e Jesúsen' gosejnilaže' le' na' gože' bene' güe'na':

—Xi'ina', ba bezi'xena' xtolon'.

²¹ Na' bene' ca' chososed chosolo'e dan' bzoj Moisés'a na' bene' fariseo ca' gosene':

—¿Non' chaque' benga naque' chne' ca'? Chon cuine' ca' Dios. Le nono zoa bene' gac yezi'xene' xtola' beŋačhen'. Toz Diosen' gac yezi'xene'.

²² Jesúsen' gocbe'ede' ca nac da' cheseza'laže' na' gože' legaque':

—¿Bičhena' chza'laže'le ca' lo' yichjlažda'ole?

²³ Še yapa'ne': "Ba bezi'xena' xtolo'na'", bi nezele še napa' yela' gwnabia' cont yezi'xena' xtole'na'. San še yapa'ne': "Gwyas na' gwda", na' nachbia' še napa' yela' guac gac can' gwnian'.

²⁴ Na'ach gona' cont gache'ele napa' yela' gwnabia' cont yezi'xena' xtola' beŋač, neda' naca' bena' gwsela' Diosen' golja' beŋač.

Nach gože' bene' xinja':

—Chapa' le' beyas, beyoa' xcamon', na' beyej ližo'.

²⁵ Nach la' beyaste bene' xinja', cheseŋa'te bene' ca' nita'na'. Nach beyoa' xcamen' na' beze'e zjajda liže' chonxene' Diosen'.

²⁶ Na' yogo'loł bene' ca' že'na' besyebande' yela' guac che Jesúsen' dan' bene'na'. Nach gosonxene' Diosen', na' do chesežebe' gose' lježe':

—Da' yebanecho da' ca' ba ble'echo ŋa'aža.

Jesúsen' gwleje' Leví cont goque' le' txen

(Mt. 9:9-13; Mr. 2:13-17)

²⁷ Gwdena' beza' Jesúsen' na' ble'ede' to bene' güečhixjw bene' le' Levi, chi'e latje gan' chchixjue'. Na' Jesúsen' gože' le':

—Da len neda'.

²⁸ Nach gwzoža' Levín' gwlejyichje' yogo' xšinłaze' na' gwyejlene' Jesúsen'.

²⁹ Nach Levina' bene' to ľni xen ližen' par Jesúsen', na' ja'ac bene' zan bene' güečhixjw ca' na' bene' yezica'chle na' gosebe'lene' le' cho'a mesen' gosagüe'.

³⁰ Na' bene' ca' chososed chosolo'ede' dan' bzoj Moisésen' na' len bene' fariseo ca' gosacyožlene' bene' ca' zjanaque' Jesúsen' txen, gose'e legaque':

—¿Nacxečhen' che'ej chagwle txen len bene' güečhixjw na' yebałe bene' güen da' xinj ca'?

³¹ Jesúsen' gože' legaque':

—Bene' cbi chesacšene bitw cheseyažjde' bene' güen rmed. Bene' ca' chesacšene, legaquen' cheseyažjde' bene' güen rmed.

³² Gague bene' ba zjanaque' bene' güen len Diosen' zedenyoeda' cont yesyetinjde' xtolen', san bene' güen da' xinj. Legaque' zjanaque' ca bene' cheseyažjde' bene' güen rmed.

Gosenabde' Jesúsen' bixchen' cbi gwleje' tgüeje ža gwbas

(Mt. 9:14-17; Mr. 2:18-22)

³³ Nach bał bene' gose'e le':

—Bene' ca' zjanaque' txen len Juan na' bene' zjanaque' txen len bene' fariseo ca' chesonchgüe' gwbas chosol güiže' Diosen'. Perw na' bene' ca' zjanaque' le' txen chese'ej chesagüe'. ¿Bixchen'?

³⁴ Nach gož Jesúsen' legaque':

—¿Guac yesezoa gwbas bene' chaxe' to ga chac yela' güesagna' šlac ben' bšagnan' zoalene' legaue'? Bi gac.

³⁵ Perw žin ža cate' bich soe' len legaue', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

³⁶ Na' Jesúsen' be'e jempl nga bzejni'ide' legaue':

—Notno zoa bene' cheza' xe' da' cobe na' yode'en de'exo'. Še gone' ca' gwžiaye'e xe' da' coben' na' xe' de'exon' bitw gac leben len lache' coben'.

³⁷ Na' neca zoa bene' chgue'e vino cobe lo' bzod yide'exo', le vino coben' chšon' yide'exon' na' lalje vino na' yesebiayi' chopen.

³⁸ Cheyala' yesegue'e vino coben' lo' yid cobe cont bibi gaquen.

³⁹ Na' ca' nac bene' bač yolagüe' che'eje' vino golen', bitw ye'nde' ye'eje' vino coben', san že': "Vino golen' nacchen güen."

6

Bene' ca' zjanaque' Jesúsen' txen goselechje' trigon' gosagüen' ža che Dios

(Mt. 12:1-8; Mr. 2:23-28)

¹ Na' to ža nac ža che Dios, Jesúsen' gwdie' gan' nyaž trigw len bene' ca' zjanaque' le' txen. Nach bene' ca' zjanaque' le' txen goselechje' trigon' na' gosexoben' gosagüen'.

² Na' besele'e bał bene' fariseon' can' gosone' na' gose'e legaue':

—¿Bičen' chonle da' bi de lsens goncho ža che Dios?

³ Na' Jesúsen' gože' legaue':

—¿Bina' gwlable can' ben da' rey David to ža cate' le' na' bene' lježe' ca' gosedone'?

⁴ Gwyo'o Davin' liž Dios na' jaži'e yetextil da' nac che Dios da' bi chac gagw bene' bi nac bžoz, na' gwdagüen', na' lecze bnežjue' che bene' zja'ac len le'.

⁵ Na' lecz ca' gwna Jesúsen':

—Naquen lo' na' nia' bi da' nac güen goncho cate' nac ža che Dios, neda' naca' ben' gwseła' Diosen' golja' beňach.

Beyac to bene' nxo'oň šla'a taque'

(Mt. 12:9-14; Mr. 3:1-6)

⁶ Na' yeto ža che Dios gozeje' lo' yodaon' na' bsed blo'ede' bene' ca' že'na'. Na' ladjo bene' ca' zjaže'na' yo'o to bene' nxo'oň taque' licha.

⁷ Na' bene' ca' chososed chosolo'e dan' bzoj da' Moisés na' bene' fariseo ca' chosogüia chesene'e Jesúsen' še yeyone' bena' ža che Dios cont de da' yosode'ede' yesagüe' xya che'.

⁸ Na' goche'e Jesúsen' can' chesone' xbaden', na' gože' ben' nxo'oň taque':

—Gwzoža' na' gwzecha nga gachol.

Nach bena' bžine' gwzeche' lagüen'.

⁹ Na' Jesúsen' gože' bene' ca' že'na':

—¿Bi da' cheyala' goncho ža che Dios? ¿Goncho da' güen, še goncho da' mal? ¿Cheyala' yoslacho bene', še gwžiayi'chone'?

¹⁰ Jesúsen' gwne'e yogo'te ben' že'na', nach gože' ben' nxo'oň taque':

—Bli naon'.

Nach blien' na' taquen' beyaquen binlo.

¹¹ Na' bene' ca' chososed chosolo'e leyna' na' len bene' fariseon' leca beseže'e na' gwzolao bosoxi'e nacle yesone' len Jesúsen'.

Jesúsen' gwleje' šiziw postlw

(Mt. 10:1-4; Mr. 3:13-19)

¹² Na' to ža gwyej Jesúsen' to lo ya'a jel güiže' Diosen'. Na' do yel be'lene' Diosen' diža'.

¹³ Na' cate' gwye'ni', goxe' bene' ca' zjanaque' le' txen, nach gwleje' šizinue' na' bsi'e legaue' postlw.

¹⁴ Bene' qui gwleje': Simón ben' bsi'e Pedro, na' bene' biše' Andrés, na' Jacobo, na' Juan, na' Felipe, na' Bartolomé,

¹⁵ na' Mateo, na' Tomás, na' Jacobo xi'in Alfeo, na' Simón ben nac cananista,

¹⁶ na' Judas bene' biše' Jacobo, nach Judas Iscariote ben' bdie' Jesúsen' lo' na' bene' chesege'ede' le'.

Jesúsen' bzejni'ide' bene' zan

(Mt. 4:23-25)

¹⁷ Na' beyetje' lo ya'an len legaue' na' gwzeche' ga nac to laše' len bene' ca' zjanaque' le' txen. Na' lecze nita' bene' zan bene' za'ac doxen Judean', do ciuda Jerusalenna' na' do gan' mbane yež ca' zjanzi' Tiro na' Sidón. Na' Tiro len Sidón zjachin' cho'a nisdao'. Na' len

bene' ca' nita' chosozenague' xtiža' Jesús'en' zjančixē baļ bene' chese'e yižgüe'. Na' Jesús'en' beyone' legaue'.

¹⁸ Na' bene' ca' zjajo'o zjanyaz da' xigüen' yichjlažda'ogaue', Jesús'en' bebejen'.

¹⁹ Na' yogo' bene' goseyiljue' nacle yesone' cont yeselapa' na'gaquen' le', le gosenezde' nape' yēla' guac cont yega'a yižgüe' čhegaquen' še yesechele'ne'.

*Non' zoa mbalaz na' non' cbi zoa mbalaz
(Mt. 5:1-12)*

²⁰ Na' Jesús'en' gwlis lagüe' gwne'e bene' ca' zjanaue' le' txen na' gože' legaue':

—Mbalaz zoa le'e bene' yaše', le'e chzenagle che Diosen' cont chnabi'e yichjlažda'olen'.

²¹ 'Mbalaz zoa le'e chdonle' na'a, gwžin ža cate' bich tonle.

'Na' mbalaz zoa le'e chbežle' na'a, gwžin ža cate' gwxižle.

²² 'Neda' naca' ben' gwsela' Diosen' golja' benačh. Na' mbalaz soale še dan' chejnilaže'le neda' chesegue'e bene' le'e, na' chesyebeje' le'e lo' yodao' čhegaue', na' cheseneye'e čhele, na' chesene' nacle bene' mal.

²³ Le yebechgüe' cate' chac da' quinga, na' le soa mbalaz, le Diosen' gone' cont gacchgua da' güen čhele cate' yežinle gan' zoe'na'. Can' chesonde' le'e, ca'czen' goson da' xozxta'ogaue' len da' bene' ca' goso'e xtiža' Diosen' cani'.

²⁴ Na' nyaše'chguaze nac le'e bene' gwñi'a. Chac güen čhele' na'a, perw gague toļi točanē' nac čhele ca'.

²⁵ 'Nyaše'chguaze nac le'e dechgua da' chagwle' na'a. Gwžin ža cate' bich bi gata' čhele.

'Nyaše'chguaze nac le'e chxižle' na'a. Gwžin ža cate' yegüine'le na' cuežyaše'le.

²⁶ 'Nyaše'chguaze nac le'e chesonxen yogo'loļ bene' le'e. Ca'czen' goson da' xozxta'ogaue', gosonxene' bene' ca' goseyiye'e gosene' cheso'e xtiža' Diosen' cani'.

*Cheyaļa' gaquecho bene' chesegue'ede' chio'
(Mt. 5:38-48; 7:12)*

²⁷ Le'e chzenagle čhia', cheyaļa' gaquele bene' chesegue'ede' le'e. Cheyaļa' gonle' da' güen len bene' ca' chesegue'ede' le'e.

²⁸ Le nab cont bene' chesegue'ede' le'e nite' mbalaz. Le soa le nabe Diosen' gaclene' bene' chososaca'zi' le'e.

²⁹ Še to bene' čhaze' šļa'a xaga'le, le güe' dan' yešļa'a. Še to bene' que'e xadon čhele, le güe' latje lečhje' len xcamisle.

³⁰ Note'teze bene' bi dan' nabde' le'e, le gwnežjon. Še to bene' que'e bite'teze da' de čhele, bitw yenablen.

³¹ Con yogo' da' güen da' chaclaže'le yeson benačhen' len le'e, lecze ca' cheyaļa' gonle len legaue'.

³² Še chaquele šinze bene' chacde' le'e na' bi chaquele bene' yoble, čbixčhen' chaquele chebe Diosen' can' chonle? Ca'cze cheson bene' güen da' mal ca'.

³³ Lecze še chonle da' güen len bene' ca' cheson da' güen len le'e na' bi chonle güen len bene' yoble, čbixčhen' chaquele chebe Diosen' can' chonle? Ca'cze cheson bene' güen da' mal ca'.

³⁴ Še chbejle bi da' chbejle len bene' chaquele yesyeyonen' le'e, čbixčhen' chaquele chebe Diosen' can' chonle? Ca'cze cheson bene' güen da' mal ca', chesebeje' bi dan' chesebej lježgaue', na' nite' lez yosyonežjuen'.

³⁵ Perw na' le'e, le soa le gaque bene' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyonen'. Še gonle ca dan' ba gwnia' le'e, gwlo'ele nacle xi'in Dios ben' nac la'zelagüe' bene' blao, na' Diosen' güebi'icze' güen len le'e. Le'na' naque' bene' šagüe' len bene' ca' bi cheso'e yēla' choxclen che' na' len yezica'chle bene' güen da' mal ca'.

³⁶ Na' ca Xacho Diosen' ben' zoa yaba cheyaše' čeži'ilaže'de' yogo' benačhen', ca'cze cheyaļa' yeyaše' yeži'ilaže'le ljež benačhlen'.

*Bitw zaca'cho nacho bene' zjanape' doļa'
(Mt. 7:1-5)*

³⁷ 'Bitw gonle' xbab zaca'le nale bene' zjanape' doļa'. Še nale che bene' zjanape' doļa', ca'cze Diosen' ne' le'e nape' doļa'. Na' bibi yosbaga'le bene' cont Diosen' bibi yosbague'de' le'e. Le soa le yezi'xen che bene' cont Diosen' yezi'xene' čhele.

³⁸ Le soa le gwnežjo bi da' gwnežjwle bene' na' Diosen' güeyoncze' čhele. Baļ bene' leca nala' chosochixē' bi dan' chesote', chosochiše' lao yagarm čhegaquen' na' chesebiben' na' chosozoa'aten'. Ca'czen' cheyaļa' gonle gwnežjwle bi dan' cheseyažje bene' na' lecz ca' gon Diosen' len le'e.

³⁹ Nach Jesús'en' be'lene' bene' že'na' to jempl, gwne':

—¿Guaque to bene' lchoꞤ cue'e nez yeto bene' lchoꞤ? Bi gac. Le nezecho chopte' šjasebixe' to lo' yechw.

⁴⁰ Ca nac cate' to bene' chsede' len to maestrw, bi nacho naque' bene' blaoch ca maestraoa'. Na' la'czla' še ben' chseda' gwda' yichje' yogo'loꞤ dan' blo'e maestron' le', bitw naque' bene' sina'ch ca maestraoa'.

⁴¹ ¿Bixchen' chna'le beb dao' dan' yo'o lo' yejlao bene' lježle, na' bi chacbe'ele naquech beb xen dan' yo'o lo' yejlaolen'?

⁴² Na' še le'e yo'o to da' xen lo' yejlaolen' ¿nacxechen' che'le bene' lježlen': "Ben yebeja' beb dao' dan' yo'o lo' yejlaguon'?" jBene' güexooyag! Zguatec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlao bene' lježle.

Dan' choncho chlo'en bin' yo'o lo' yichjlažda'ochon'

(Mt. 7:17-20; 12:34-35)

⁴³ Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen.

⁴⁴ Con can' nac da' chbia to to yaguen' nezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas.

⁴⁵ To bene' laždao' ži'ilaže' chone' da' güen, le ca ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ochon' za'aquen.

Chope bene' na' yo'o da' chon to toe'

(Mt. 7:24-27)

⁴⁶ ¿Bichen' che'le neda': "Xana'", na' bi chonle can' nona' mandadw?

⁴⁷ Na'a nia' nac zaca'lebe bene' nao' neda' na' chzenague' xtiža' na' chone' can' nona' mandadw.

⁴⁸ Naque' ca to bene' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoachachgguan.

⁴⁹ Na' yogo' bene' chende' xtiža'na' na' bi chone' can' žia'na' naque' ca yeto bene' ben yo'o, con benen' lo yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiai'te yo'on.

7

Jesúsen' beyone' xmos to xan soldadw

(Mt. 8:5-13)

¹ Na' cate' beyož be' Jesúsen' diža' len bene' ca', beyeje' yež Capernaum.

² Na' zoa to xan soldadw bene' bitw naque' bene' Israel. Na' zoa to xmos'e chacšenchgüede', na' yelez ba de' par gate'. Na' xan soldadon' chacchgüede' le'.

³ Na' cate' xan soldadon' bende' diža' che Jesúsen', gwsele' bal' bene' gole blao che bene' Israel cont jasenabde' Jesúsen' šeje' liže' yeyone' xmos'e.

⁴ Nach cate' besežine' gan' zoa Jesúsen', gosenabde' le' gaclene' xan soldadon'. Na' gose'e Jesúsen':

—Xan soldadon' naque' to bene' zaque' gacleno',

⁵ le chacde' chio' bene' Israel, na' le' bene' yodao' cheto' nga len xmechue'.

⁶ Nach gwyej Jesúsen' len legaque', perw za' yesežine' liže'na' cate' gwsele' xan soldadon' bal' bene' migw che' lao Jesúsen' na' gose'ene':

—Xan soldadon' že' bitw gwš'a'a yichjo' yido' liže'na', le nezde' bitw zaque' cont šo' liže'na'.

⁷ Da'nan' bitw beyaxjde' yide' nabde' le' gacleno'ne'. Con che'nde' gonšco' mandadw yeyaque' xmos'e'na'.

⁸ Xan soldadon' že' zoa bene' chnabia' le' perw lecze nita' soldadw che' na' chnabi'e legaque'. Na' cate' che'e toe': "Gwyej", na' cheje', na' cate' che'e yetoe': "Da", na' chide', na' cate' che'e xmosen': "Da' nga gono'", na' chonen'. Na' nezde' con nao' yeyac xmos'e'na' na' yeyacde'.

⁹ Na' Jesúsen' cate' bende' diža' dan' gose' bene' migw che' xan soldadon' le', bebande' na' beyechje' gože' bene' zan ca' zjanao' le':

—Žia' le'e ne toze bene' Israel bina' šejnilaže' neda' ca chejnilaže' benga bi naque' bene' Israel.

¹⁰ Nach jaya'ac bene' ca' gwsele' xan soldadon'. Cate' besyežine' liže'na' ba beyaque' xmosen'.

Jesúsen' bosbane' xi'in' to no'ole güezebe

¹¹ Jesúsen' gwyeye' to yež dan' nzi' Nain len bene' ca' zjanaque' le' txen na' zan bene' yoble.

¹² Ba zja'aque' gala'ze par yesežine' cho'a puert che yežna' cate' besele'ede' chesechoj xonj bene' cho'a puerten' zjanlene' to bene' guat. Na' ben' goten' naque' bene' tliša', na' xne'en naque' no'ole güezebe. Na' bene' zan bene' lo yeža' zja'aclene' xna' bene' guaten'.

¹³ Na' cate' ble'e Xanchon' no'olen', beyaše'de' le' na' gože'ne':

— Bitw cuežo'.

¹⁴ Nach gwyeje' jažoa ne'en lo yagla' gan' xoa bene' guata'. Nach bene' ca' zjanlen le' gosebeze'. Na' gože' bene' guata':

— Bene' güego', neda' žia', beyas.

¹⁵ Nach bene' guaten' gwchi'e na' gwzologüe' benie'. Na' Jesúsen' beyone' le' lo na' xne'e.

¹⁶ Na' yogo'lol bene' ca' besežebe' dan' beban bene' guata' nach gosonxene' Diosen' gosene':

— Ba bla' to bene' blao ga zoacho, bene' choe' xtiža' Diosen', na' Diosen' ba gwsele'ne' cont gaglene' chio' naccho nación che'.

¹⁷ Ca nac dan' ben Jesúsen' gos gwlaļ diža' chen' doxen Judea na' yogo'lol yež ca' dan' zjanita' gala'ze.

*Juanna' gwsele' chope ben' gosaque' le' txen gan' zoa Jesúsen'
(Mt. 11:2-19)*

¹⁸ Nach bene' ca' zjanaque' txen len Juanna' jaseye'lene' le' diža' yogo'lol ca nac dan' chon Jesúsen'. Nach gox Juanna' chope bene' ca'

¹⁹ nach gože' legaque':

— Le šja'ac gan' zoa Jesúsen' na' ye'ln'e': “¿Len' naco' ben' chbezto' seļa' Diosen' o še cheyaļa' cuezchto' yid bene' yoble?”

²⁰ Nach bene' ca' chope cate' besežine' gan' zoa Jesúsen' gose'ene':

— Juan ben' chzoa bene' nis gwsele' neto' laguo' nga nabeto' le' še len' naco' ben' chbezto' seļa' Diosen' o še cuezchto' yid bene' yoble.

²¹ Šlacte ne' nita' chope bene' ca', Jesúsen' beyone' bene' zan bene' ca' chesacšene na' bene' chese'ede' yižgüe' gual. Lecze bebeje' da' xigüe' da' zjayo'o zjanyaz yichjlaždao' bene' zan. Na' bene' cont besyele'e zan bene' lchol.

²² Nach Jesúsen' boži'e xtiža' bene' ca' gwseļa' Juanna' lagüe'na', gože' legaque':

— Le šjaya'ac na' le šjayež Juanna' doxen da' ca' ba ble'ele na' da' ca' ba benele. Ba ble'ele chona' cont chesyele'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choya' diža' güen len bene' yaše' ca'.

²³ Mbalaz zoa bene' chejle'e chia' na' bi chdebde'.

²⁴ Na' cate' besyeya'ac bene' ca' gwseļa' Juanna', nach Jesúsen' be'lene' bene' ca' zjandoben' xtiža' Juanna', gože' legaque':

— Nacxe nac ben' jale'ele latje dašen'? ¿Šayichj šayen chaque'? Bi naque' ca'.

²⁵ ¿Nac naque' caten' jale'elne'? ¿Nyaze' lache' šagüe'? ¿še bitw' le bene' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o güenchgua, ca no liž bene' gwnabia'.

²⁶ ¿Noxen' jale'ele? ¿Naque' to bene' choe' xtiža' Diosen'? Da' li naque' to bene' choe' xtiža' Dios, perw chnia' le'e, zaca'che' ca note'teze bene' choe' xtiža' Dios.

²⁷ Che benga nyojen le'e Xtiža' Diosen' žan:

Neda' Dios seļa' to bene' cuialagüe' laguo' güe'e xtižon'
cont cate' yido' ba nita' bene' yesonxene' le'.

²⁸ Chnia' le'e, notech no benach na' soa bene' naquech bene' blaoch ca Juanna'. Perw na' note'teze bene' gwzenague' che Diosen' cont Diosen' nabi'e yichjlažda'ogüe', la'czļa' bi naque' bene' blao, gwžin ža cate' šejni'ichde' chia' clel ca Juanna'.

²⁹ Ba bzoa Juanna' bene' zan nis na' len bal bene' güechixjw. Na' yogo' bene' ca' gosache'ede' Diosen' zejzce' to licha dan' gwsele' Juanna' jatixjue'ede' legaque' yesyetinjde' xtoļa'gaque'.

³⁰ Perw na' bene' fariseo ca' na' bene' ca' chososed chosolo'e dan' bzoj da' Moisés, goson yichjlaogaquen' cbi besyetinjde' xtoļa'gaquen' can' goclaže' Diosen'. Bi gosaclaže' gwzoo Juanna' legaque' nis.

³¹ Nach Jesúsen' gože' legaque':

— ¿No gwsaca'lebdā' le'e zoale na'a? ¿No chon can' chonlen'?

³² Nacle ca bidao' neche bicze bi de chlebele. Can' zjanac bidao' ca', cate' nita'be' gan' chac ya'a chese' lježbe': “Ba bcuežto' bžejo, neca bya'ale, na' ba bilyaše'to', neca gwchežle.”

³³ Juan ben' chzoa bene' nis bide' laole nga, bitw güe'ej gwdagwšagüe' can' chese'ej chesagw bene' yoble, na' neca güe'eje' vino, nach gwnaļe che': “Yo'o nyaz da' xigüen' yichjlažda'ogüe'.”

³⁴ Na' neda', chle'ele che'ej chagua' can' chese'ej chesagw bene' yoble, na' žale čhia' naca' bene' lia na' bene' borrašw, neda' naca' ben' gwsela' Diosen' golja' benačh. Na' ľecze žale naca' migw che bene' güečhixjw ca' na' migw che nochle bene' güen da' xinj.

³⁵ Perw na' bene' chosozenag che Diosen' zjanape' to yela' sina' na' chesone' cont nachbia' Diosa' naque' la'zelagüe' bene' sina'.

Jesúsen' gweje' liž Simón bene' fariseo

³⁶ To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'.

³⁷ Na' to no'ole lo ciudan', no'ole zle', gwnežde' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze člja' zix.

³⁸ Na' jabigue' gala'ze xni'a Jesúsen' na' gwcheže' na' nis xchež čen' bžonen ni'a Jesúsen' gwbsisen. Na' bxie' ni'ena' len yiša' yichje' na' bnopen' na' gwdeben' set zixen'.

³⁹ Na' ben' goxe' Jesúsen' ližen', cate' ble'ede' can' chon no'ola' na' godce': "Šaca' benga naque' to bene' choe' xtiža' Dios, guacbe'ede' no'olen' chgan ni'ena' naque' no'ole zle'".

⁴⁰ Nach Jesúsen' gože'ne':

—Simón, de to da' che'nda' yapa' le'.

Nach Simónna' gože' Jesúsen':

—Gwnan Maestrw.

⁴¹ Jesúsen' gože'ne':

—Gwzoa to bene' na' nita' čhope bene' chesale' xmechue'. Toe' čale' gayo' gayoa mechw da' nzi' denario, na' ben' yeto čale' šiyon mechw ľecze denario.

⁴² Na' chopte bene' ca' ne toe' ca de čhegaque' cont yesyeyixjue' xyan'. Na' ben' gwlej mechon' gwlejičhje' dan' chesale' čen'. Gwnašč neda', žnoe' bene' ca' čhope gosacchde' če'?

⁴³ Nach Simónna' gože'ne':

—Šeca ben' goc xya čen' da' xench na' gwlejičhjen'.

Jesúsen' gože'ne':

—Da' li can' ba gwnao'na' naquen.

⁴⁴ Nach Jesúsen' gwečhje' gwne'e no'ola' na' gože' Simónna':

—Čhle'edo' no'ole nga? Neda' ba gwyo'a ližo' nga na' bi beŋo' nis čhib ni'a, perw no'ole nga ba gwdibe' ni'an' len nis xchež čen' bxien' len yiša' yichje'.

⁴⁵ Bi bnopo' neda', perw na' no'ole nga cate' bla'atia' gwzologüe' chnope' ni'a nga.

⁴⁶ Bi gwdebo' set yichja', perw no'ole nga ba gwdebe' set zix ni'a nga.

⁴⁷ Na' žia' le', xtole'na' gosaquen da' zan, perw ba bezi'xena' čhe'. Da'n'an' chacchgüede' neda'. Bene' bi žinlaže' xtolen' ca xtoła' no'ole nga, cate' yezi'xena' čhe' bitw gactecde' neda'.

⁴⁸ Nach gože' no'olen':

—Ba bezi'xena' xtoło'na'.

⁴⁹ Nach bene' ca' chesagw len Jesúsen' txen lo mesen' gwzolao chese' ľježe':

—Čnox benga chacde' le'na' chezi'xene' xtoła' benačhen'?

⁵⁰ Nach gož Jesúsen' no'ola':

—Dan' chejniłažo' neda' da'n'an' ba de yela' mban čhio' toli' tocaŋe. Beyej to šagüe' to güen.

8

No'ol ca' gosaclene' Jesúsen'

¹ Na' gwdechle gwyej Jesúsua' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' bene' yosozenague' čhe'. Na' zja'aclen bene' šižinw ca' le', bene' ca' zjanzi' postlw.

² Nach to xonj no'ole ľecze zja'aclene' Jesúsen' bene' ca' ba beyone'. Baľe' ba be-beje' da' xigüe' da' zjajo'o zjanyaz lo' yichjlažda'ogaque' na' yebaľe' ba beyone'ne' cate' gosacšende'. Na' toe' lie' Maria bene' Magdala, bebej Jesúsen' gaže da' xigüe' gwyo'o gwyaz yichjlažda'ogüe'na'.

³ Nach ľecze len ben' le Juana, xo'ole ben' le Chuza, na' Chuzan', gwyo'o lo ne'e liž rey Herodes na' yežlio čhe' ca'. Na' ľecze len ben' le Susana gwyejlene' Jesúsen', na' yezan bene' yezica'chle. Na' no'ol ca' bosochine' bite'teze da' gota' čhegaque' cont bosonežjue' dan' byažje Jesúsen' len bene' ca' zjanaque' le' txen.

Jempl čhe bene' goz trigon'

(Mt. 13:1-9; Mr. 4:1-9)

⁴ Na' bene' zan besežag gan' zoa Jesúsen' bene' za'ac to to yež ca'. Na' be'e to jempl, gwne':

⁵ —To bene' güen žin jeze' trigw na' šlac zeje' chose' trigon' late' biñ jasechazen do cho'a nezen', na' bosolej bosošošj bene' len, na' be žia xil be chaš le'e yaba gosagwban'.

⁶ Yelaten' jasechazen ga nac lo yej, na' cate' beselan' na' gosebižen, le gague bi gopa' den'.

⁷ Yelaten' jasechazen ga nac lo yag yeše', na' gosecha'on txen, na' bosolole' yag yeše' ca' len.

⁸ Perw na' yelaten' jasechazen ga nac yo šagüe' na' beselan', na' bañen gosebjan to gayoa güeje.

Na' beyož be'e diža' quinga gwne' zižje gože' legaque':

—Le'e žia nagle da' chene, le gwzenag xtiža' na'.

Jesúsen' gwne' bixchen' bi'e jeml cate' bzejni' ide' bene'

(Mt. 13:10-17; Mr. 4:10-12)

⁹ Nach bene' ca' zjanaque' Jesúsen' txen gosēnabde' le' bi zejen jeml da' ba bi'e.

¹⁰ Na' gož Jesúsen' legaque':

—Nono na' neze can' nac yela' gwnabia' che Diosen'. Perw ba chone' cont le'e chejni-laže'lene' neželen. Perw bene' bi chesaclaže' yesejniლაže'ne', chzejni'igacda'ne' len jeml. Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden'.

Jesúsen' bzejni' ide' bi zejen jeml che bene' goz trigon'

(Mt. 13:18-23; Mr. 4:13-20)

¹¹ Na' ca nac jeml nga zejen quinga: Ca dan' byažen zejen xtiža' Dios.

¹² Na' biñ dan' besego'onen chanezen', zejen bene' ca' chesende' xtiža' Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejniლაže' le' na' bi gata' yela' mban chegaque' toli tocane.

¹³ Na' biñ dan' besego'on ga nac lo yej zjanaquen ca bene' chesyebede' xtiža' Diosen', perw zjanaque' ca to da' bibi loe chon, šložga chesejle'e che xtiža' Diosen', na' cate' chac bi da' mal chegaque' la' chesebejičhte' xtižen'.

¹⁴ Na' biñ dan' besego'onen ga nac lo yag yeše', zejen ca bene' ca' ba gosende' xtiža' Diosen', perw šlac zjambane' chesylala' chesyēžejde' na' chese'nde' yeseñi'e, na' chesede' chesonteze' con da' žazen chegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'nan' bi chesejniლაže' le' ca cheyala'.

¹⁵ Na' da' ca' besego'onen lo yo šagüen', zejen ca bene' cate' chesende' xtiža' Diosen' chesezi'en chesonen' chegaque', na' chesejniლაže' le' do yichj do laže', na' chesechejde' bite'tez dan' chac chegaque' cont chesone' can' che'ne Diosa'.

Jeml che yi' dan' chguala'cho

(Mr. 4:21-25)

¹⁶ Na' Jesúsen' gwne':

—Notno gwguala' to yi' na' gwdosen' to yeso', na' neca gwcuāše' yin' xan xcame'. San chde'en le'e ze'e cont gwšenin' len yogo'lol bene' yeso'o lo' yo'o.

¹⁷ Le yogo'lol da' ngaše' chia' neda', lenna' gwlo'elaon, na' yogo'lol da' nono na' neze chia', žin ža yesenežden' na' yesejni'iden'.

¹⁸ Le gwzenag da' quinga da' chzejni'ida' le'e, le note'teze bene' chzenague' xtiža' Diosen' gwzejni'ich Diosen' le', perw na' note'teze bene' bi chzenague', da' daon' chacde' ba nežde', yeca'a Diosen' len.

Xna' Jesúsen' len bene' biše' ca' besežine' gan' zoe'

(Mt. 12:46-50; Mr. 3:31-35)

¹⁹ Na' xna' Jesúsen' len bene' biše' ca' besežine' gan' zoa Jesúsen', gosaclaže' yeso'e, perw catec bene' zan že' gague goc latje yesežine' lagüe' na'ate.

²⁰ Na' to ben' ze na' gože' Jesúsen':

—Xna'o len bene' bišo' ca' zjanite' chy'o na' chesacclaže' yedesene'e le'e.

²¹ Na' Jesúsen' gože' legaque':

—Bene' ca' chosozenag xtiža' Diosen' na' chesezi'e cho'alao xtižen', bene' can' zjanaque' xna'a na' biša'.

Jesúsen' bcueze' be' bdono' lo nisdao'

(Mt. 8:23-27; Mr. 4:35-41)

²² Na' goc to ža Jesúsen' gwyo'e to lo barcw len bene' ca' zjanaque' le' txen. Na' gože' legaque':

—Laga' cho yešla'ale nisaon'.

Nach bosose'e barcon'.

²³ Šlac zejen lo nisen' gwtas Jesúsen'. Nach gwzolao gwyechj to be' bdono' lo nisaon', na' gwzolao cheyož nis lo' barcon'. Na' besexožde' yesebiaye'e.

²⁴ Nach bosyosbane' Jesúsen' gose'e le':

—¡Maestrw! ¡Maestrw! Bač chbiayi'cho.

Nach gwyase' na' gwdiŕe' be' bdono' len nisdaon', na' la' gosebe'žiten.

²⁵ Na' gože' legaque'!

—¿Nacxechen' bi chejle'le chia'?

Nach legaque' besežebe' len besyebande'. Nach gose' lježe':

—¿Noxe benga? lente be' bdono' na' len nisdaon' chosozenaguen che da' že'.

To bene' Gadara yo'o nyaze' da' xigüe'

(Mt. 8:28-34; Mr. 5:1-20)

²⁶ Na' besežine' laž bene' Gadara ca', to yež da' chi' šla'a distritw Galilean', lağa'cho nisdao'.

²⁷ Na' cate' bechoj Jesúsen' lo' barcoa', to bene' lo' yežna' jašague' le'. Ba gwža yo'o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do capsantwle.

²⁸⁻²⁹ Na' bene' gualaž che' ca' bosocheje' ni'a ne'e len gden na' gosape' le'. Na' da' xigüe' ca' gosonen cont bzojx btine' gdenŕa' zan ni'a. Na' gosonen cont gwyeje' ga nono bene' zjanla'. Na' bena' cate' ble'ede' Jesúsen' na' bzoa xibe' lagüen'. Na' bosye'e zizje gwne':

—¿Bixchen' chgoša' chlaže' chio' len neda', Jesús? Le' naco' dogualje Xi'in Dios ben' nape' la'zelagüe' yela' gwnabia' xen. Chñeyoeda' le' bi gwsaco' neda'.

Gwne' ca' dan' ben Jesúsen' mandadw yechoj da' xigüen' yichjlažda'ogüen'.

³⁰ Nach Jesúsen' gože' da' xigüen' yo'o nyaz yichjlaždao' bena':

—¿Bi lio'?

Nach da' xigüen' gwnan:

—Legión lia'.

Gwnan ca' le' zjanaquen da' zan zjajo'on yichjlažda'ogüen'.

³¹ Nach da' xigüe' ca' gosata'yoen Jesús'a' bi yeselen' lo' yi' gabil.

³² Na' to ya'a da' zoa gała'ze chesaš zan coš chesagwba'. Nach da' xigüe' ca' gosata'yoen Jesúsen' gwnežjue' latje šjaseyo'on yichjlaždao' coš ca'. Na' Jesúsen' bnežjue' latje.

³³ Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjes coš ca' le'e ya'a gan' nita'ba' na' jaselažo'ba' lo' nisdao' ga gosatba' gose'ejba' nis.

³⁴ Na' bene' ca' chosoyoe' cošen' besele'ede' dan' ba goquen' bosyoxonje' jasyeyeže' bene' lagüe yež len bene' chaš yixe', gose'e legaque' can' ba goquen'.

³⁵ Nach ja'ac bene' jaseŕe'e bixen' goc. Na' cate' besežine' gan' zoa Jesúsen' besele'ede' bena' ba gwyo'o gwyaz da' xigüen', na'a ba chi'e gała'ze cuit Jesúsen' nyaz xałane', na' ba bezoa yichjlažda'ogüe' binlo. Na' besežebe'.

³⁶ Na' bene' ca' besele'ede' can' goquen' goso'e diža' che dan' goc che bena' gwyo'o gwyaz yichjlažda'ogüe' da' xigüen' na' can' ba beyaque'.

³⁷ Nach yogo'lol bene' ca' že' gan' mbane yež Gadaran' jasetayoede' Jesúsen' yeze'e lažgaquen', le' besežebchgüe'. Nach Jesúsen' beyo'e lo' barcon' cont yeze'e.

³⁸ Na' bena' beyaque cate' Jesúsen' bebeje' da' xigüe' ca' goso'o gosazen yichjlažda'ogüe', gota'yoede' le' gwnežjue' latje šjilene'ne'. Perw Jesúsen' bi be'e latje, san gože'ne'.

³⁹ —Beyej ližo' na' jayež bene' lo' yo'o chio' yogo' da' güen da' ba ben Diosen' len le'.

Nach beza' ben' na' gwzolažgüe' cho'e diža' doxen yežen' yogo' can' ba ben Jesúsen' len le'.

Jesúsen' beyone' xi'in Jairo na' beyone' yeto no'ole bene' gwdane' xe'

(Mt. 9:18-26; Mr. 5:21-43)

⁴⁰ Na' cate' Jesúsen' belague' nisdaon', bene' zan ba nita' chesebeze' le'. Chesyebechgüede' da' bežine' na'.

⁴¹ Na' bžin to bene' le' Jairo, ben' nac to bene' gwnabia' che yodao' che yežna'. Na' bzoa xibe' lao Jesúsen' gota'yoede' le' šjilene' le' liže',

⁴² le' ba zoa gat bi' no'ol che'. Nache' bi' tliša', na' šižinw izguebe'. Na' šlac zej Jesúsen' len le', bene' zan gosebiadi'e le' na' bosochichgüe' le'.

⁴³ Na' len to no'ole ba goc šižinw iz chzoe' gwba'o' na' ba benditje doxen xmechue' len bene' güen rmed ca'. Na' notno goc gon le' rmed.

⁴⁴ Na' gwbiga' no'olen' cože' Jesúsen' na' gwdane' lox xen', nach la' gwlezte gwba'o' dan' zoen'.

⁴⁵ Na' gwna Jesúsen':

—¿Non' gwdan neda'?

Na' ne toe' ca' gosechebe' še ba gosegane' le'. Nach Pedron' len bene' ca' zja'aclen Jesúsen' gose'e le':

—Maestrw, bene' zan bene' za'ac nga chosochie' le' na' chosožigue' le' nile na'le. ¿Bixchen' chnabo' no gwdan xaon'?

⁴⁶ Nach Jesúsen' gože' legaque':

—To bene' ba gwdane' neda'. Chache'eda' ba beyacde' len yela' guac chia'na'.

47 Nach no'olen' cate' goche'ede' cbi bgaše' dan' benen', nach gwbigue' lao Jesúsen' do chaž chžebe' na' bzoa xibe' lagüe'na', be'e diža' lao yogo' bene' ca' že'na' bixchen' gwthane' le' na' can' goc la' beyactede'.

48 Nach gož Jesúsa' no'ola':

—Xi'ina', ba beyacdo' dan' chejnilažo' neda'. Beyej binlo.

49 Ne' choe'te Jesúsa' dižan' ca' cate' bžin to bene' gwza' liž Jairo ježe' le':

—Ba got bi' no'ol dao' chion'. Bich gondo' Maestroa' zed.

50 Perw cate' bene' Jesúsen', na' gože' Jairo:

—Bitw žebo', con gwyejnilaže' neda' na' yeyaquebe'.

51 Na' cate' besežine' liž Jairona', Jesúsen' bi be'e latje yeso'o zan bene' ca' zja'aclen le', san Pedro, len Juan, len Jacobo, na' len xaxna' bi' guat na'ze goso'o.

52 Na' ba chi'chgua žaš na' yogo' bene' ca' že'na' chesebežchgüe'. Na' Jesúsen' gože' legaque':

—Bitw cuežle. Biņa' gatbe', san chtasbe'.

53 Na' bosoxiže' gosonle' che' da' zjanezde' ba gotbe'.

54 Perw Jesúsen' bežue' taca' bi' no'ol guaten' na' bol giüže'be' gože'be':

—No'ol dao', beyas.

55 Nach bebambe', la' beyastebe'. Na' Jesúsen' bene' mandadw yeso'ebe' da' gagwbe'.

56 Na' xaxna'be' besyebanchgüede'. Perw Jesúsen' bene' mandadw bi yeso'e diža' can' goca'.

9

Jesúsa' gwsele' bene' šižinw ca' jasedixjue'ede' xtižen'

(Mt. 10:5-15; Mr. 6:7-13)

1 Jesúsen' botobe' bene' šižinw ca' gwleje' cont zjanaque' le' txen na' bnežjue' legaque' yela' gwnabia' na' yela' guac cont goc besyebeje' da' xigüe' lo' yichjlaždao' bene', na' lecze ca' besayone' bene' ca' chesacšene.

2 Na' lecze bene' mandadw šjasedixjue'ede' Diosa' nabi'e yichjlaždao' bene' yosozenag che'. Na' bene' mandadw yesyeyone' no bene' güe'.

3 Na' gože' legaque':

—Bibi goxe'le tnez. Bitw goxe'le xis da' gwchiše'le, neca gua'le bzod, ne yet, ne mechw, na' bitw gua'le yeto xcamisle.

4 Cate' žinle to liž bene', na'ze yega'anle šlac zoale lagüe yeža'; cate'ch yeža'le yeža', cana'ch yeža'le latja'.

5 Na' še zoa ga bi yosolebe' le'e, cate' yeža'le na', le cuibe ni'alen' yo bište cont nachbia' malen' chesone' bi chosozenague' xtiža' Diosen'.

6 Nach bene' šižinw ca' ja'aque' to to yež, na' gate'teze ja'aque' jasedixjue'ede' diža' güen che' Jesúsen' na' besyeyone' no bene' güe'.

Ba gosote' Juan ben' bzoa bene' nis

(Mt. 14:1-12; Mr. 6:14-29)

7 Na' gubernador Herodes goque' tole bende' yogo'lol da' güen da' chon Jesúsen'. Gocžejlaže', le bal' bene' gose'e le' ba beban da' Juan ladjo bene' guat ca'.

8 Na' yebale' gosene' šeca da' Elías ben' be' xtiža' Diosen' cani' ba bela' yežlio nga da' yoble. Yebale' chesene' yeto bene' be' xtiža' Diosen' cani'te ba bebane' ladjo bene' guat ca'.

9 Na' Herodesen' gwne':

—Neda' bena' mandadw gosechogue' yen Juanna', perw čnoxen' chon da' güen ca dan' chesoe' bene' diža'?

Na' gwdiļjwlaže' nacle gone' cont le'ede' Jesúsen'.

Bguagw Jesúsen' gayo' mil bene'

(Mt. 14:13-21; Mr. 6:30-44; Jn. 6:1-14)

10 Na' cate' besyežin postlw ca' gan' zoa Jesúsen' nach gose'e le' can' ba gosonen'. Na' gwchi'e legacze' na' ja'aque' to latje gan' mbane yež Betsaida.

11 Cate' gosache'e bene' ca' nita' gan' zoa Jesúsen' ba gosa'aque' len bene' ca' zjanaque' le' txen, nach zja'aque' zjana'ogüe' legaque'. Jesúsen' blebe' legaque' na' bsd blo'ede' legaque' Diosen' nabi'e yichjlaždao' bene' yosozenag che', na' beyone' bene' ca' chesacšene.

12 Cate' gwzoloa gwxxoa gwbižen', nach bene' šižinw ca' zjanaque' Jesúsen' txen gose'ene': —Besela' bene' quinga cont šjaya'aque' ga že' bene' do ranšw na' do yež ca' dan' nyechjmbi'i cont yeseyiljue' ga yesetase' na' yeseyiljue' da' yese'ej yesagüe', le ca nac latje gan' zoacho nga, naquen to latje daš.

13 Perw na' gož Jesúsen' legaque':

—Le'e le güe'e da' yesagüe'.

Na' gose'e le':

—Gayo'ga yetextil na' yechopga beḷ ya'a de checho, lete še si'chon cont gaquen yesagw yogo'lol bene' quinga.

¹⁴ Gosene' ca' le že' ca gayo' mil bene' byo, bi cuent no'ol ca' len bidao'. Nach Jesúsen' gože' bene' ca' zjanaque' le' txen:

—Le gon mandadw yesebe' šiyon güej bene' ca'.

¹⁵ Nach gosone' mandadw gosebe' yogo' bene' ca',

¹⁶ na' Jesúsen' gwxi'e gayo' yetextilen' na' chope beḷ ya'ana', na' gwne'e yabale, be'e yela' choxclen che Diosen' na' bzojxen' na' be'en bene' šižinw ca' cont goso'e che to to bene' ca'.

¹⁷ Na' gosagüen' ca' goseljde'. Nach bososše'e šižinw žome len yetextil bixjw na' len late' güeje beḷ da' bega'an.

Pedron' gwne' Jesúsen' naque' bene' gwsela' Dios

(Mt. 16:13-19; Mr. 8:27-29)

¹⁸ Na' gozac yeto, bene' ca' zjanaque' Jesúsen' txen zjanite' len le' lchojiže, na' Jesúsen' chol güiže' Diosen'. Nach gože' legaque':

—¿Bi chesena bene'? ¿Non' naca' neda'?

¹⁹ Na' gose'e le':

—Baḷe' chesene' naco' da' Juan ben' bzoe' bene' nis. Na' yebaḷe' chesene' naco' Elías ben' be' xtiža' Diosen' cani'. Na' yebaḷe' chesene' naco' yeto bene' be' xtiža' Diosen' cani' ben' ba behan ladjo bene' guat ca'.

²⁰ Nach gože' legaque':

—¿Chixe le'e? ¿No žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

Jesúsen' gwdixjue'ede' gate'

(Mt. 16:20-28; Mr. 8:30-9:1)

²¹ Nach Jesúsen' gože' legaque' nono yese'e naque' ben' gwlej Diosen' cont yedenabi'e.

²² Na' gože' legaque':

—Da' zan da' saca'zi'a, neda' naca' ben' gwsela' Dios golja' beḷač. Na' bene' gole blao ca' chesenabia' nación chechon' na' bzož gwnabia' ca', na' bene' ca' chososed chosolo'e ley dan' bzož da' Moisés, bi yesele'ede' neda' güen dan' bi gosejle'e chia', na' yesote'nda', perw yeyon ža yebana' ladjo bene' guat ca'.

²³ Nach gože' yogo' bene' ca' zjanaque' le' txen:

—Note'tez bene' še chaclaže' gaque' neda' txen, cheyaḷa' cuejyichj cuine' yogo' ža, la'czla' saca'zi'e, na' gone' can' nia' neda'.

²⁴ Note'tez bene' chacde' gone' cont bi saca'zi'e o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne chia' neda', ba de yela' mban che' toli tocane.

²⁵ ¿Bixe zejenna' to bene' nabi'e doxen yežlion' še cuiaye'e na' bi gata' yela' mban che' toli tocane?

²⁶ Na' note'tez bene' še cheto'ede' par ye'e lježe' chejnlaže' neda' na' še cheto'ede' par gwzenague' xtižan', lecze ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' beḷač. Yeto'eda' che' cate' yida' da' yoble nsa'a yela' zaca' juisyw chia' na' yela' zaca' juisyw che Xa' Diosen' na' che ben' zjanac angl che'.

²⁷ Da' li žia' le'e, baḷle nita'le nga na'a biḷa' gatle cate' žin ža le'ele gwlo'e Diosen' yela' gwnabia' chen'.

Jesúsen' goque' ca to be'ni'

(Mt. 17:1-8; Mr. 9:2-8)

²⁸ Nag goc to xman gwna Jesúsen' ca', gwyeje' to lo ya'a jaḷ güiže' Diosen' na' gwče'e Pedro len Juan len Jacobo.

²⁹ Na' šlac chol güiže' Diosen' goc cho'alagüen' ca da' bža'. Na' xaḷanen' beyaquen šiš xila' na' goctiten.

³⁰ Na' lo hora' besežin chop bene' gan' zoa Jesúsen', toe' da' Moisés na' yetoe' da' Elías bosošaljlene' le'.

³¹ Goso'e diža' gosene' ba zoa gat Jesúsa' Jerusalén. Na' be'ni' che Diosen' gwyechjen bsenin' legaque'.

³² Na' Pedron' len bene' ca' yechope leca gosac ša tase' perw bi gosetase' na' besele'ede' Jesúsen' chactit cho'alagüen' na' zeche' choe'lene' da' Moísesen' len da' Elíasen' diža'.

³³ Na' cate' ba cheza' da' Moísesen' len da' Elíasen', Pedroa' gože' Jesúsen':

—¡Maestrw, leca güenna' zoacho nga! Gonto' šone ranšw, to chio', to che Moisés, na' yeto che Elias.

Con gwne' ca' sin ca bene' xbab.

³⁴ Na' choe'te Pedron' diža' cate' to bejw gwyechjen legaque' na' besežebe' lagüe dan' goc ca'.

³⁵ Na' lo' bejon' gosende' gwne Diosen', gwne':

—Benga Xi'ina' ben chacda'. Le gwzenag che'.

³⁶ Na' cate' beyož gwna Diosen' ca', besele'ede' yetoze Jesúsen'. Na' ca' beyoža' bibi diža' gosoe'lene' bene' ca' yezica'chle can' nac dan' ba gosende' na' dan' ba besele'ede'. Con gosenita'teze' šižize.

Beyon Jesúsen' to bi' gwyo'o gwyaz da' xigüe'

(Mt. 17:14-21; Mr. 9:14-29)

³⁷ Na' beteyo cate' ba besyeyetje' ya'ana' bene' zan jasešague' legaque' gan' nite'na'.

³⁸ Na' toe' gwne' zižje, gože' Jesúsen':

—Maestrw, chata'yoeda' le' gaclenšco' xi'ina' nga. Nache' xi'ina' tliša'.

³⁹ Chniz da' xigüen' lebe' na' la' chgosya'aten lebe', chonen cont chazbe' šon na' cont chžica bžina' cho'abe' na' chonen lebe' zi', na' cañe chsanen lebe'.

⁴⁰ Ba gota'yoeda' bene' ca' zjanaque' le' txen cont yesyebetje' da' xigüen' yo'o nyazbe', perw bitw gosezaque'de'.

⁴¹ Nach Jesúsen' gože' bene' ca' že' na':

—Ile'e bene' bi chejnilaže', chonchguale clele! žšna chyažjen soalena' le'e cont šejnilaže'le? žBatca' zelao na'lagua' le'e?

Nach gože' xa bidao'na':

—Ben bidao' chion' nile.

⁴² Na' šlac zjasane'be' lao Jesúsen', da' xigüen' benen cont gwyazbe' šon, na' bchix btojen lebe' lo yo. Na' Jesúsen' gwdi'e' da' xigüen' cont bechojen lo' yichjlažda'obe'. Nach beyaquebe'. Gwdena' beyoñe'be' lo na' xabe'.

⁴³ Na' yogo' ben' že'na' besyebande' cate' besele'ede' yela' guac che Diosen'.

Da' yoble Jesúsen' gwdixjue'ede' gate'

(Mt. 17:22-23; Mr. 9:30-32)

Na' besyebande' che yogo'lo' dan' chon Jesúsen', na' šlac nite' ca', Jesúsen' gože' bene' ca' zjanaque' le' txen:

⁴⁴ —Le gon cont diža' nga šo'on yichjlažda'ole, na' bi ganlaže'len. Neda' gaca' lo na' ben' chesegue'enda', neda' naca' ben' gwsela' Diosen' golja' benač.

⁴⁵ Perw legaque' bitw gosejni'ide' diža' dan' be' Jesúsen', le naquen ca to da' ngaše' len legaque'. Na' besežebe' yesenabde'ne' bi zejen dan' gože' legaquen'.

Gosacyože' noe' nacch blao

(Mt. 18:1-5; Mr. 9:33-37)

⁴⁶ Na' bene' ca' zjanaque' Jesúsen' txen gosacyože' noe' nacch blao.

⁴⁷ Jesúsen' goche'ede' xbab dan' chesonen', na' bežue' to bidao' na' bzeche'be' cuite'na'

⁴⁸ na' gože' legaque':

—Note'teze bene' chone' güen len to bidao' ca bi' nga neche da' chejnilaže' neda', choncze' güen len neda'. Na' note'teze chon güen len neda' choncze' güen len Dios ben' gwsela' neda'. Na' note'tez le'e cate' chonle xbab che cuinle bibi zaca'teclle, canan' ba nacle bene' blao.

Bene' bi chon contr chio' txenczen' chone' len chio'

(Mr. 9:38-40)

⁴⁹ Nach Juanna' gože'ne':

—Maestrw, bežagto' to bene' cho'e lao' na' chebeje' da' xigüe' da' yo'o nyaz bene'. Na' bžonto' gone' ca', le bi chone' chio' txen.

⁵⁰ Nach Jesúsen' gože'ne':

—Bitw gwžonle gone' ca', le še to bene' bi chone' contr chio', txenczen' chone' len chio'.

Jesúsen' gwdi'e' Jacobo len Juan

⁵¹ Na' lagüe' ba zoa bagwze yezi' yeca'a Diosen' le', bečoglaže' šeje' Jerusalén.

⁵² Na' gwsela' to chope bene' gosebialao lagüe'na'. Na' ja'aque' to yež gan' mbane distritw Samaria cont šjasesini'e gan' soa Jesúsen' len bene' ca' zjanaque' le' txen.

⁵³ Perw bene' Samaria ca' bi bosolebe' Jesúsen' len bene' ca' nžague', le gosache'ede' zja'aque' Jerusalén.

⁵⁴ Na' chope bene' ca' zjanaque' Jesúsen' txen, Jacobon' len Juanna', cate' besele'ede' can' goson bene' Samaria ca', nach gosenabde' Jesúsen':

—Maestrw, žche'ndo' gonto' can' ben da' Elias ben' be' xtiža' Diosen' cani', nabeto' Diosen' sele' yi' gwzeyen bene' qui?

⁵⁵ Nach Jesúsen' gwyechje' gwdi'e' legaque' gwne':

—Le'e bitw ñezele non' chnabia' yichjlažda'ole.

⁵⁶ Neda' bitw za'a cont gwžiaya'a beñačh, san za'a cont gwnežjua'ne' yela' mban toli tocaņe, neda' naca' ben' gwsela' Diosen' golja' beñačh.

Nach ja'aque' yež yoble.

Can' gož Jesúsen' bene' ca' gosaclaže' yesaque' le' txen
(Mt. 8:19-22)

⁵⁷ Šlac zja'aque' na', to bene' gože' le':

—Sa'lena' le' gate'teze šejo'.

⁵⁸ Nach gož Jesúsen' le':

—Nita' xišna' beza' na' lecz chesyeyžin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwsela' Diosen' golja' beñačh.

⁵⁹ Nach Jesúsen' gože' yeto bene':

—Yo'o len neda'.

Perw bena' gože' le':

—Xana', za' got xa'. Beňšca latje zgua'tec šjaycuaša'ne'.

⁶⁰ Na' gož Jesúsen' le':

—Bene' ca' zjanac yichjlažda'ogüe' ca che bene' guat, legaque' guacze yosocuaše' yzica'chle bene' guat. Perw le', jatixjue'e bene' Diosa' nabi'e yichjlaždao' bene' yosozenague' che'.

⁶¹ Nach lecze yetoe' gože' Jesúsen':

—Sa'lena' le' Xana', perw zgua'tec šjayzenda' xaxna'a len diaža chia'.

⁶² Jesúsen' gože' le':

—Bene' ba gwzolao nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to bene' chne'e coscože'le šlac chgua'aņe' go'n.

10

Jesúsen' gwsele' gayonši bene' šjasedixjue'ede' xtiže'

¹ Na' gwdechle Xancho Jesúsen' gwleje' yegayonši bene' na' bene' mandadw yesebialagüe' šja'ac čhope güeje' to to yež ga za' šej le'.

² Na' cate' za' yesa'aque' gože' legaque':

—Chyažje bene' zan yeseyxjue'ede' xtiža' Diosen', perw to čhopga bene' nita' yeseyxjue'eden'. Na' bene' yosozenag che Diosen' zjazaca'lebe' ca to coseš xen da' chyažje yedobe. Da'n'an' le nabe Xancho Diosen' sela'che' bene' yesaclene' chio' yotobcho coseš čhen'.

³ Le šja'ac, le neda' chsela' le'e šjatixjue'ele xtižen' len bene' ca' chesegue'ede' le'e. Zaca'leble ca xila' dao' ben' čja'ac gan' že' beco'yo.

⁴ Bitw gua'le bzod, ñe mechw, ñe yel, na' bi šele guaple bene' tiox bene' yežagle chanez.

⁵ Note'tez liž šo'le zgua'tec nale: "Čhñablaže'šca' soa cuezle binlo len xbab dan' yo'o lo' yichjlažda'ole, le'e nita'le nga."

⁶ Na' še zoa to bene' chaclaže' soa cueze' binlo len yichjlažda'ogüe'na', nach gac can' gwñablaže'le cont soa cueze' binlo; perw še nono zoa bene' chaclaže' soa cueze' binlo len yichjlažda'ogüe', bi gac dan' ba gwñablaže'len'.

⁷ Na' lo' yo'o na'teze yega'aņle. Bitw tale to to yo'o. Le ye'ej le gagw bite'teze da' chesone' ye'ej gagwle. Ca to bene' güen žin cheyaļa' si' laxjue', lecz ca' le'e zaca'le yesone' da' ye'ej gagwle.

⁸ Na' cate' žinle to yež ga chesonene' le'e, le ye'ej le gagwteze da' yesone' le'e.

⁹ Le yeyon bene' güe' bene' nita' yež gan' žinle, na' le' ye'e: "Ba bžin ža gwzenagle che Diosen' cont nabi'e yichjlažda'ole."

¹⁰ Perw na' cate' žinle to yež ga bi yosolebe' le'e, le šja'ac la cay na' le' ye'e:

¹¹ "Bište che lažle nga da' žia ni'ato', cuipton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont nabi'e yichjlažda'olen'."

¹² Da' mal xen goson bene' ciuda Sodoma cani', perw žia' le'e, žan' gac juisyw bene' ca' bi bosolebe' le'e ližen', yesaļe'chde' clcl ca bene' Sodomán'.

Bene' ca' bi chosozenag xtiža' Jesúsen'

(Mt. 11:20-24)

¹³ Nach gozna Jesúsen':

—iNyaše'chguaze gac che le'e bene' Corazín! iNyaše'chguaze gac che le'e bene' Betsaida! Bene' ca' nita' Tiro na' Sidón ba' besyētijnje' xtoļa'gaque' šaca' blo'egacda'ne' yela' guac chia' ca da' ba blo'eda' le'e. Na' bosoš'e ca gosone' šaca' bena' ca', chesazļje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogüen'.

¹⁴ Sac'a'zi' chle c'lel ca beñe' že' Tiro na' Sidón cate' žin ža gac juisyw.

¹⁵ Le'e nita'le yež Capernaum chonle xbab šeca Diosen' gončgüe' le'e yeļa' bala'añ. Bi gone' le'e yeļa' bala'añ san gone' le'e castigw toli tocañe dan' bi chejle'le čhia'.

¹⁶ Nach Jesúsen' goze'e beñe' gayonši ca':

—Beñe' gwzenag xtiža'llen' lecze gwzenague' xtiža'na', na' beñe' goncze yichjlagüe' bi gwzenague' xtiža'len', lecze bi gwzenague' čhia' neda'. Na' beñe' goncze yichjlagüe' bi gwzenague' xtiža'na', lecze bi gwzenague' xtiža' Diosen' ben' gwseļa' neda'.

Besyžein beñe' gayonši ca'

¹⁷ Beñe' gayonši ca' cate' beyož jasedixjue'ede' xtiža' Jesúsen', besyžeine' gan' zoen' na' besyebeghüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen četo' cate' chonto' mandadw yesyechojen lo' yichjlaždao' beñe' choe'to' lao'.

¹⁸ Na' gože' legaque':

—Ble'eda' bedao'nez gwnit yeļa' gwnabia' čhe Satanásen' dan' chnabia' da' xigüe' ca'.

¹⁹ Ba beña' le'e yeļa' guac cont gwlej gwšošje no beļ znia na' no beļjoni' na' cont soele Satanásen' bi gonen le'e gan. Na' bibi de da' gonen le'e ži'.

²⁰ Perw bi yebele neche da' xigüen' chosozenaguen čele, san le yebe da' ba bzoj Diosen' lale le'e libr gan' nyoj la yogo'loļ xi'ine' ca'.

Bebechgüe Jesúsen'

(Mt. 11:25-27; 13:16-17)

²¹ Za' beyožte gwna Jesúsen' ca' nach ben Spiritw čhe Diosen' cont bebechgüede' na' bol güiže' Diosen', gwne':

—Xa', le' chnabi'o beñe' ca' že' yaba na' yežlion'. Na' chona' yeļa' choxclen čio' ba bzejni'ido' baļ beñe'. Ba bzejni'ido' beñe' ca' gosache'ede' chesyazjde' no gwsed gwlo'e legaque'. Na' bitw bzejni'ido' beñe' ca' cheson xbab zjanaque' beñe' sina' na' beñe' zjanejni'i. Beno' ca' Xa', le can' gwyazlažo'.

²² Nach gože' beñe' ca' že'na':

—Xan' ba bene' lo' na' chona' cont chombia' bene' le'. Le' nombia'yañe' neda', na' neda' nombia'yañe' le'. Na' beñe' ca' ba gwleja' ba zjanombi'e Xan'. Na' nono nochle zjanombia' Xa' ñe neda'.

²³ Na' gwyechj Jesúsen' gwne'e beñe' ca' zjanaque' le' txen na' gože' legaque':

—Mbachgua zoale chle'ele neda' na' chle'etele da' ca' chona'.

²⁴ Na' chnia' le'e zan beñe' ca' goso'e xtiža' Diosen' cani' len beñe' zan rey gosaclaže' yesele'ede' dan' chle'ele na'a, perw bitw goļa' yesele'eden', na' gosaclaže' yesende' dan' chenelen', perw bitw goļa' yesenden'.

Jempl čhe to beñe' güen, beñe' Samaria

²⁵ Na' gwzoža' to beñe' nsedchgüe' ley dan' bzoj da' Moisés, goclaze' cueje' Jesúsen' diža' da' gwčhine' contr le' na' gože'ne':

—Maestrw, žbi da' cheyaļa' gona' cont gata' yeļa' mban čhia' toli tocañe'?

²⁶ Na' gož Jesúsen' le':

—žBi nyoj le'e leyna'? žNac žan?

²⁷ Na' ben' chejni'ichgüe' leyna' boži'e xtiža' Jesúsen', gože' le':

—Ley čhe Diosa' žan: "Cheyaļa' gaquecho Xancho Diosen' con ca zelao chejni'icho, do yichj do laže'cho, do fuers valor čhecho, na' gaque lježcho ca chaque cuincho."

²⁸ Nach gož Jesúsen' le':

—Da' licze can' ba gwnao'na'. Can' cheyaļa' gono' cont bano' toli tocañe.

²⁹ Na' bena' goclaze' gwlo'ede' choncze' can' ža leyna', na' gože' Jesúsen':

—žNon' nac beñe' lježa' ben' cheyaļa' gacda'?

³⁰ Na' Jesúsen' gože' le':

—To beñe' beza' Jerusalén par yežine' yež Jericó, jasyexen beñe' gwban le'. Na' goseyine' xaļane' na' gosot goseyine' le'. Nach besyeya'aque' bosocua'añe' le' cacze to beñe' guat.

³¹ Na' to bžoz čhe beñe' Israel ca' gwdie' lo' neza', na' cate' ble'ede' bena' dena', nach gwcuase' to šļa'ale neza' na' con gwdeze'.

³² Lecz ca' ben to diaža čhe da' beñe' Leví ca'. (Xi'in diaža čhe da' Leví yo'o lo' na'gaque' chesone' mandadw lo' yodao' bla.) Bena' zeje' tnez na' cate' ble'ede' ben' dena', na' gwcuase' to šļa'ale neza' na' con gwdeze'.

³³ Nach to beñe' Samaria ngüe'e neza' nļague' xpurrue' na' bžine' gan' de bena', perw na' le' cate' ble'ede' ben' beyaše'laže'.

³⁴ Na' gwbigue' gan' de' na' bene' le' rmed, bšone' set len vino lao güe' čhe'na' na' bčhejen' lache'. Na' božie' le' cože' xpurrue' na' beče'e le' ga zoa to mesón ga gwñe'e le'.

³⁵ Na' beteyo cate' beza' bene' Samaria, gwleje' mechw da' zaca' ca chop ža žin na' bnežjuen' xan mesónna' ca laxjue', na' gože' le': "Gwŋa' benga na' še žan bichle da' gono' gastw na' chixjuan' cate' zeza'a."

³⁶ Beyož be' Jesúsen' diža' can' goc che ben' jasyexen bene' gwban ca', nach gože' bena' chsed chlo'e leyna':

—¿Nac chono' xbab? ¿No bene' ca' šone godde'ne' ca bene' lježe'?

³⁷ Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyexen gwban ca'.

Nach gož Jesúsen' le':

—Lecze ca' cheyała' gono' le', yeyaše' yeži'ilaže'do' yogo loł bene'.

Jesúsa' jane'e Marta na' María

³⁸ Na' gosego'och'e nez na' besyežine' to yež ga zoa to no'ole lie' Marta, na' Jesúsen' gweyje' liže'na'.

³⁹ Na' zoa to bile' le' María. Na' Marian' gwchi'e cuít Jesúsen' bzenague' xtiže'na'.

⁴⁰ Perw na' Martan' belalchgüede' bsin'e da' yesagüe'. Na' gweyje' lao Jesúsen' na' gože' le':
—Xana', žbi chacdo' median can' bcua'an bene' bilan' neda' toza' len mandadua'? Benšca mandadw gaclene' neda'.

⁴¹ Xancho Jesúsen' gože' le':

—Marta, chi'chgua yichjo' mandadua' na' chacžejlažo' dan' nyanchguan.

⁴² María nga ba gwleje' da' naquech da' güen. Chi'e chzenague' chia', na' notno gwžon gone' ca', le len da' nacch da' žialao da' cheyała' gonle.

11

Jesúsen' blo'ede' can' yosoł güiže' Diosen'

(Mt. 6:9-15; 7:7-11)

¹ Na' gwzoo Jesúsa' to latje chol güiže' Diosen'. Cate' beyož bol güiže'ne' to bene' ca' zjanaque' le' txen gože' le':

—Xanto', bzejni'i neto' nac cheyała' yoł güižto' Diosen', can' bzejni'i da' Juanna' bene' ca' gosaque' txen len le'.

² Na' Jesúsen' gože' le'gaque':

—Cate' yoł güižle Diosen', quinga nale:

Xato' bene' zoa yaba,

chŋabto' yogo loł bene' yesonxene' le'.

Zelaže'to' nabi'o yichjlaždao' yogo' neto' beŋach.

Gacšca can' chazlažo' yežlio nga can' chac yabana'.

³ Ca nac dan' che'ej chagwto' tža tža, beŋšca cheto' ŋa'a.

⁴ Na' bezi'xenšca cheto', le lencze neto' chezi'xento' che ljež beŋachto' bite'tez da' chesonde' neto'.

Na' bitw go'o latje soa da' gwžigan' neto' gonto' da' mal, san bcuase bcue'ejšca neto' len da' mala'.

⁵ Nach gož Jesúsen' le'gaque':

—Le gon xbab še šejle liž bene' migw chele do chel na' ye'ln'e: "Migw chia', beŋšca neda' šone yetextil.

⁶ Ba bla' to bene' migw chia' bene' za' zito', na' bibi de chia' da' gua'ane' gagüe'?"

⁷ Na' chixe še migw chelen' yo'e lo' yo'ote yoži'e xtiža'len': "Bitw gondo' neda' zed, le ba nyeyjw cho'a yo'o na' ba deto' chtasto' len bi' cheto' ca'. Bi gac čhasa' goŋa' dan' chyažjdo'."

⁸ Chnia' le'e, la'czla' naque' migw chele, bitw ye'nde' chase' gone' dan' chyažjele, perw še gata'yoelne' šša na' chasšaze' gone' bite'tez da' chyažjele.

⁹ Na' chnia' le'e, še žan bi da' chyažjecho, chŋabchon. Še žan to da' chaclaže'cho želecho, chyljwchon. Še žan chaclaže'cho saljw bene' cho'a yo'o che', na' necho cho'a yo'on cont saljue'. Na' ca'cze cheyała' ye'le Diosen' cate' bi da' chyažjele o bi da' chaclaže'le gone'.

¹⁰ Na' note'tezle še bi da' nabelene', gonczen'. Na' še bi dan' che'nele gwzejni'ide' le'e, gwzejni'iczen'. Na' note'tezle še žan chaclaže'le gac to da' gac, yoł güižle Diosen' can' chon to bene' chnie' cho'a yo'o, nach Diosen' gone' cont gacczen.

¹¹ 'Na' le'e nacle xa bidao', še xi'ŋle nabebe' le'e yetextil, žgwnežjwlebe' to yej? Na' še nabebe' le'e yid beł gagwbe' žgwnežjwlebe' to be xigüe'?

¹² Na' še nabebe' le'e to žit gagwbe' žgwnežjwlebe' to be xjoni'? Cabi gonle ca'.

¹³ La' nacle bene' mal, nezczele gwnežjo xi'ŋle to da' güen. Nacchxe güen gon Xacho Diosen' ben' zoa yaba gwnežjue' Spiritw čhen' soan lo' yichjlaždao' bene' chŋab len.

Gosene' Jesúsen' bebeje' da' xigüe' len yela' guac che Beelzebú
(Mt. 12:22-30; Mr. 3:19-27)

¹⁴ Gwzoa to bene' gwyo'o gwyaz da' xigüe' yichjlažda'ogüe' na' benen cont bi goc nie'. Na' Jesúsen' bebeje' da' xigüe' lo' yichjlažda'ogüe'na'. Na' cate' bechoj da' xigüen', na' goc bene'. Na' bene' ca' ze'na' besyebanchgüede'.

¹⁵ Perw bałe' gosene':

—Beelzebú dan' chnabia' da' xigüe' ca' chaclenen le' cont chebeje' da' xigüe' zjayo'o zjanyaz yichjlaždao' bene'.

¹⁶ Na' yebale' cont gosagüe' xya che' gosenabde'ne' gone' to yela' guac da' yesele'ede' le'e yaban' cont yesenezde' še da' licze Diosa' gwsele' le'.

¹⁷ Perw Jesúsen' gocbe'ede' xbab dan' gosone', na' gože' legaque':

—Ša to gobiern choje' chop šon cuen na' yeyoža' yesedile' legacze', gobiernna' bi sibi'e. Na' še bene' to lo' yo'o yesechoje' chople na' yesedile' legacze', gague sša yesenite' txen.

¹⁸ Na' še Satanásen' dan' chnabia' da' xigüen' len da' xigüe' chen ca' yesechojen chople na' yesedilen, lecze bi sibirian', san na' yeyož yedon. Le'e chnale Beelzebún' dan' chnabia' da' xigüe' ca' chaclenen neda' cont chebeja' da' xigüe' zjayo'o zjanyaz yichjlaždao' bene'.

¹⁹ Šaca' naquen can' žalen', lecze zejen dan' chnabia' da' xigüe' ca' chaclenen bene' lježle ca' chesyebeje' da' xigüe' zjayo'o zjanyaz yichjlaždao' bene'. Bene' lježle ca' yese'e le'e celen' žale.

²⁰ Neda' chebeja' da' xigüe' len yela' guac che Dios, na' dan' chona' ca' chlo'en ba bžin ža Diosen' nabi'e yichjlaždao' bene' yosozenag che'.

²¹ 'Satanásen' naquen ca to bene' gual, na' neda' naccha' bene' gualch. Na' nezele cate' to bene' gual chape' ližen' len spada, bibi gac che da' de che'.

²² Perw cate' žin to bene' gualch ca le' na' tilłene' le', nach ben' nac bene' gualch gon gan. Na' que'e spada che ben' da'na' zoe' lez gaclen le' na' ca'atie' bichle da' de che' na' čhisen' len bene' migw che' ca'.

²³ 'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

Da' xigüe'na' yeyo'on da' yoble lo' yichjlaždao' bene'
(Mt. 12:43-45)

²⁴ 'Na' še to da' xigüe' da' gwyo'o gwyaz lo' yichjlaždao' bene' yechojen, nach lažen nile na' le yeyiljon ga soan mbalaz. Na' še bibi latje želen, nach nan: "Da' yoblecze šjajo'a lo' yichjlaždao' ben' gan' ba gwyo'a."

²⁵ Nach yeyejen da' yoble gan' zoa ben'. Cate' le'en bač cheyone' güen, na' ba zoache' binlo,

²⁶ nach šjaytoben yegaže da' xigüe' ca' da' zjanacch malech ca len, na' txen yeso'on lo' yichjlažda'ogüe'na'. Na' še bač goc ca', gacch mal che bena' clet ca dan' ba goc che' da' nechw.

Mbalaz nita' bene' ca' chosozenag xtiža' Diosen'

²⁷ Šlac be' Jesúsen' diža' quinga, gwzoa to no'ole gachoł bene' ca' ze' gan' bsd blo'ede', na' no'ola' gwne' zižje, gože'ne':

—Mbalaz zoa no'ola' gwxxan le' na' bguaže' le'.

²⁸ Perw na' Jesúsen' gože'ne':

—Nacchxe mbalaz nita' bene' ca' chosozenag xtiža' Diosen' na' chesone' can' žanna'.

Bene' bi chosozenag che Diosen' chesene' gon Jesúsen' to yela' guac
(Mt. 12:38-42; Mr. 8:12)

²⁹ Na' bene' zan gosebigue' gosečhjde' Jesúsen', nach Jesúsen' gwne':

—Le'e zoale na'a nacchguale bene' laždao' xi'a. Chnable gona' yeto yela' guac da' le'ele cont nezele še Diosa' gwsele' neda', perw bi gona' ca dan' chnablana', le ba ble'ele da' ca' chona'. Lete gac chia' can' goc che da' Jonás ben' be' xtiža' Diosen' can'.

³⁰ Na' ca dan' goc che Jonásen' blo'en bene' Níneve ca' Diosen' gwsele' le', ca'cze dan' gac čhia' gwlo'en le'e zoale na'a Diosen' gwsele' neda' golja' benach.

³¹ Cate' žin ža gon Diosen' castigw che yogo'loł bene' cheson da' mal, da' no'olen' gwnabi'e bene' Seba ca' yedecuiše' le'e mbanle na'a. Le' gwze'e gan' nac zito'chgua na' bide' nga cont bedezenague' diža' sina' dan' be' da' rey Salomón len le', na' neda' zoa' nga naccha' bene' blaoch ca da' Salomón na' bitw chzenagle čhia'.

³² Na' cate' žin ža gon Diosen' castigw che yogo'loł bene' cheson da' mal, lecze žana' yesyeban bene' Nínive ca' na' yosocuiše' le'e nita'le ža na'aža. Le' legaque' besyetiñjde' xtoła'gaque' cate' da' Jonásen' gwdixjue'ede'ne' can' gwna Diosen'. Na' neda' zoa' nga naccha' bene' blaoch ca da' Jonása' na' bi chzenagle čhia'.

Dan' bsed blo'e Jesúsen' naquen ca to yi'
(Mt. 5:15; 6:22-23)

³³ 'Notno gwuala' to yi' na' gw dosen' caj, na' neca gwcuašen' ga yoble ga nono le'e len, san chde'en le'e ze'e cont gwsenin' len yogo'lo' bene' yeso'o lo' yo'ona'.

³⁴ Žia yelaocho cont le'echo. Con še bibi chaquen chle'eczecho binlo. Perw še ncholcho, bi chle'echo. Ca'czen' naquen len yichjlažda'ochon'. Še naccho bene' laždao' güen, yo'o be'ni' che Diosen' lo' yichjlažda'ochon'. Perw še naccho bene' mal, chol' nac yichjlažda'ochon'.

³⁵ Da'n'an' le gon cont gacle bene' laždao' güen, na' šo' be'ni' che Diosen' yichjlažda'ole.

³⁶ Še nyeni' yichjlažda'olen' na' bibi da' mal yo'on, gwseni'czen xnezle can' chseni' to yi' ga nac chol.

Jesúsen' gože' bene' fariseo ca' zjanape' dola' na' len bene' ca' chososed chosolo'e ley
(Mt. 23:1-36; Mr. 12:38-40; Lc. 20:45-47)

³⁷ Cate' beyož be' Jesúsen' diža' quinga, to bene' fariseo gwche'e le' liže' cont yesagüe'. Na' gwyo'o Jesúsen' liž bene' fariseon' na' gwchi'e cho'a mesen'.

³⁸ Na' bene' fariseon' bebande' ble'ede' bitw bona' Jesúsen' cate' za' gagüe' can' cheson legaue' chesacde' chebe Diosen' legaue' dan' chesone' ca'.

³⁹ Na' Xancho Jesúsen' gože' le':

—Le'e bene' fariseo nacle ca xiga' ye'eñ da' chčin bene' na' chyibe' cožen' binlo perw bi chyibe' do lo'en. Chonle cont chesaque bene' nacle bene' güen, perw chebele chca'ale bi da' de che bene' na' nacle bene' mal juisyw.

⁴⁰ Bicze bi chejni'ile. Chi' yichjle gacle xilaže' len cuerp chelen'. Lecz ca' cheya'la' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'.

⁴¹ Le yeyaše' bene' na' le gwnežjo bi da' cheseyažjde'. Še gonle ca', nacbia' nacle bene' laždao' xilaže'.

⁴² 'Nyaše'chguaze gac che le'e bene' fariseo! La'czla' chnežjwle Diosen' to part lao ši part che yix'e'güe, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquele Diosen'. Da' nac da' žialao gonle, gonle da' nac güen na' gaquele Diosen'. Perw bi cuejyichjle gwnežjwle da' ca' chnežjwle Diosen'.

⁴³ 'Nyaše'chguaze gac che le'e bene' fariseo! Chzelaže'le cue'le lo' yodao' txen len bene' blao ca', na' cate' chejle do gan' chac ya'a chaclaže'le yesonxen bene' le'e.

⁴⁴ 'Nyaše'chguaze gac che le'e chsed chlo'ele da' bzoj da' Moisés na' len le'e bene' fariseo! Chonle cont nacbia' gan' xoa ba che bene' guaten', le ley chechon' žan zjanaquen zban na' bi cheya'la' gwlejchon. Perw le'e nacle ca ba da' bi zjanacbia'. Chosozenag bene' chele na' bi chesacbe'ede' nacle bene' laždao' zban.

⁴⁵ To bene' chsed chlo'e ley boži'e xtiža' Jesúsen', gože'ne':

—Maestrw, lagüe da' žo' da' quinga, chaqueton' zi'.

⁴⁶ Na' gož Jesúsen' legaue':

—Lecz ca' le'e chsed chlo'ele ley da' bzoj da' Moisés, 'nyaše'chguaze gac chele! Da' žale da' zan da' cheya'la' yeson bene', chonle leyna' ca to yoa' da' nocze no do'e, to yoa' da' chaclaže'le yesoa' bene' yoble, perw le'e ne late'ze bi chaclaže'le gua'len.

⁴⁷⁻⁴⁸ 'Nyaše'chguaze gac che le'e chonšagüe'le cho'a ba che da' bene' ca' gosoe' xtiža' Diosen' cani'! Chacle toze len da' xoxxta'ole ca' ben' gosote' legaue'. Na' dan' chonle ca', zejen chazlaže'le dan' gosote' legaquen'.

⁴⁹ 'Da'n'an' Diosen' lao yela' sina' che' gwne' sele' bene' yesoe'lene' le'e xtižen' na' sele' postlw che' ca' len le'e. Na' gwne' gotle ba'le' na' gwchi' gwsaca'le yeba'le'.

⁵⁰ Na' da' li' ba chonle can' gwnen'. Da'n'an' si'le castigw che yela' got che yogo' bene' ca' gosoe' xtižen' gwzolaon caten' gwxete yežlion' chžinten ža' na'aža.

⁵¹ Zan bene' gosot bene' yoble legaue' gwzolaozen len da' Abel ben' beyot da' biše' Cain le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chyo'o yodao' gan' chesote' beyix'e' cont chesonxene' Diosen'. Na' le'e mbanle' na'a si'le castigw che yela' got che yogo' bene' ca'.

⁵² 'Nyaše'chguaze nac le'e chsed chlo'ele ley che Diosen'! Bitw chzejni'ile bene' leyna' to liča can' naquen, neca chzenagle čhen. Na' bene' chesacclaže' yosozenaguen', neca choe'le latje yosozenaguen'.

⁵³ Na' cate' beyož be' Jesúsen' diža' quinga, nach bene' fariseo ca' na' bene' ca' chososed chosolo'e ley gosacyožchgüe' len le'. Na' gosaclaže' yesebeje' le' diža'

⁵⁴ le gosaclaže' choj dižan' cho'e da' yosode'ede' yesagüe' xya che'.

12

Yela' güexoayag che bene' fariseo

¹ Na' goc zan mil bene' besežague' gan' zoa Jesúsen', catec bene' zan besežag bosolej bosošošte ni'a lježe'. Na' Jesúsen' zgua'tec gwzologüe' be'e diža' len bene' ca' zjanaque' le' txen, gože' legaue':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca levadura dan' chchixede' yetextil. Bitw gonle can' chesonen'.

² Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'.

³ Da'nan' bite'teze da' gwnale bagaše'ze, bene' zan yesenden'. Na' dan' ba gwnale šižize lo' yo'o chelen', yogo'ze bene' yesenezden'.

Non' cheyala' žebcho

(Mt. 10:28-31)

⁴ Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e.

⁵ San zoa ben' cheyala' žeble, cheyala' žeble Diosen', le cate' bach beque'e yela' mban chele, lecze nape' yela' chnabia' cont yesele' le'e gabil. Da' yoble chnia' le'e, cheyala' žeble Diosen'.

⁶ Nezecho byin dao' ca' bibi zjazaca'tecba', perw na' Diosen' ne toba' bi chanlaže'.

⁷ Na' ca nac chio', da' leca chaque Diosen' chio' neztede' bal' yiša' yichj to tocho žia. Da'nan' bitw žeble, le zaca'ch le'e clel ca yogo' byin dao' ca'.

Cheyala' ye'cho bene' nombia'czcho Jesucriston'

(Mt. 10:32-33; 12:32; 10:19-20)

⁸ Na' chnia' le'e, note'tez bene' še cho'e diža' len benachen' che'ene' chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' naque' neda' txen, neda' naca' ben' gwsela' Diosen' golja' benach.

⁹ Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' bitw naque' neda' txen.

¹⁰ Na' note'teze bene' še ne' yela' ya' chia' neda' naca' ben' gwsela' Diosen' golja' benach, Diosen' yezi'xene' che' še yetinjde'. Perw note'teze bene' še ne' yela' ya' che Spiritw che Diosen', gwbat yezi'xen Diosen' che'.

¹¹ Na' cate' yesече'exožje' le'e lao bene' gwnabia' che yodaon' o lao justis o še lao nochle bene' gwnabia', bi cuec yichjle nac yoži'ile xtiža'gaquen' o še nacle nale.

¹² Lo hor na'teze gwzejni'i Spiritw che Diosen' le'e bin' cheyala' nalen'.

Bitw cheyala' cuec yichjcho tloaze bi da' de checho

¹³ To bene' bchoje' ladjo bene' zan juisyw ben' zjanžag na', na' gože' Jesúsen':

—Maestrw, gonšco' mandadw cont bene' bišan' gone' neda' bien che da' xaxna'to' da' cheyala' si'a.

¹⁴ Na' Jesúsen' gože' le':

—Bitw naca' neda' juez chele. Bi cheyala' gua' neda' laze da' de chele.

¹⁵ Nach gože' yogo'lo' bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o la' bibi de checho bi da' chyažj chchinecho, gague da' can' nac yela' mban checho.

¹⁶ Na' be'lene' legaue' to jempl, gwne':

—To bene' gwni'a gocchgua coseš che',

¹⁷ na' bene' xbab lo' yichjlažda'ogüe' gwne': “žNacxe gona'? Bich bi latje de ga gwže'šagua' coseš chian'.”

¹⁸ Nach gozne': “Quinga gona', yočinja' yo'o gan' že' coseš chia' quinga na' gona' yo'o xench. Na' gwže'šagua' cosešen' na' bichle da' de chia'.

¹⁹ Na' lagüe ba de da' yažjda' da' zan iz, bich gona' žin. Ye'ej gagwteza' con da' chaclaža' na' gona' legr.”

²⁰ Perw Diosen' gože' bena': “Chono' xbab da' bibi zaca'. Na'aže' bžin hor gato', na' žnola lo' na' gac yogo' da' de chio'?”

²¹ Can' gac che note'tez bene' še con chbec yichje' tloaze da' de che' šlac mbane' na' bi chone' da' chazlaže' Dios.

Diosen' chapši'e xi'ine' ca'

(Mt. 6:25-34)

²² Na' gož Jesúsen' bene' ca' zjanaque' le' txen:

—Da'nan' žia' le'e, bi gacžejlaže'le bi da' gagwle šlac mbanle, na' lecze ca' bi gacžejlaže'le che xalana'le.

²³ Zaca'ch yela' mban chelen' ca yela' guagw. Lecze ca' cuerp chelen', zaca'chen ca xalana'le.

²⁴ Le gon xbab che bechj ca', bitw chesazba', bitw chesyelapba', neca zoa da'a xoa' chegacba', neca zoa ga ncu'a no goš chegacba' ga že' da' yesagwba', perw na' Diosen' chguagwcz'e'ba'. jNacchle zaca' le'e ca be ca' zjažia xil!

²⁵ Na' ne tole bi gac yoston cuinle gašje metr še con cue' yichjle tonle.

²⁶ Nezele bitw gac yoston cuinle, na' neca naquen da' zaca'. Da'n'an' bi gacžejlaže'le che bica'chle da' chyažjele.

²⁷ 'Le gon xbab ca nac yej ca' da' zjaze yixe'. Chesecha'oczen, bibi žin chesonen, neca chesaljen do. Na' chnia' le'e, da' rey Salomón gocue' lache' güen juisyw, perw bitw bžinlaže' xalane'na' ca yela' xdan che yej ca'.

²⁸ Diosen' none' xdan da' ca' ze yixen' la'czla' to chop žaze nitan' na' chosozeyen'. jNacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le che'!

²⁹ Da'n'an' bitw güe'laže'le cont gata' da' ye'ej da' gagwle. Bitw gacžejlaže'le chen.

³⁰ Bene' ca' bi chesonxene' Diosen' con chesoe'laže' che bi da' gata' yese'ej yesagüe' na' che xalana'gaque'. Perw Xacho Diosen' nezcze'de' bi da' ca' chyažjele.

³¹ Cheyala' güe'laže'le gwzenagle che Diosen' cont nabi'e yichjlažda'olen', na' yogo' da' ca' chyažjele, goncze Diosen' len.

Da' zaca'ch gata' checho yežincho yaba

(Mt. 6:19-21)

³² 'Bitw žeble la'czla' nac to chople. Diosen' chbede' chnabi'e yichjlaždao' le'e chzenagle che' na' chaclene' le'e.

³³ Le yeyote' da' de chele cont gata' da' gwnežjwle bene' ca' cheseyažje. Še gonle ca', Diosen' gone' le'e da' zaca'ch na' da' cbi te chen cate' yežinle yaba gan' zoe'na'. Na' bitw gac šo' bene' gwban que'en, na' neca gac šo' be dao' gwžiai' len.

³⁴ Gan' de dan' chaquele nan' zoa yichjlažda'olen'.

Cheyala' soa cuezcho batcan' yide Criston' yeto

³⁵⁻³⁶ 'Le soa le cueze batcan' yida' yeto. Le soa can' nita' bene' chesape' liž xangaquen' šlac zeje' to yela' güešagna'. Zjanyaz xalana'gaque' na' chała' yi'. Nach cate' yežine' na' nie' cho'a yo'on, na' la' yesesaljwte' cont yeyo'a.

³⁷ Mba gac che bene' ca' chesebeze' batcan' yežin xangaquen'. Še nite' chesebeze' le' caten' yežinen', nach gwsini'e da' yesagüe' na' cuine' gwnežjue' legaque' dan' yese'ej yesagüe'.

³⁸ Mba gac chegaque' še chesebeze' batcan' yežine' la'czla' yežine' do chel o do šbal.

³⁹ Le gon xbab che da' nga. Šaca' neze xan yo'on baten' žin bene' gwban liže'na', le gwna'ze' cont bi güe'e latje šo' bena' liže'na' cuane' xšinlazen'.

⁴⁰ Le soa le cueze batcan' yida' da' yoble, le cate' bi chonle xbab yida', canan' yida', neda' naca' bena' gwseła' Diosen' golja' benačh.

Mos ben' chon güen, na' mos ben' bi chon güen

(Mt. 24:45-51)

⁴¹ Pedroa' gože' Jesúsen':

—Xanto', žcho'o jempl nga par neto'ze o še par yogo'lol benačh?

⁴² Nach gož Xančon' Pedroa':

—Naquen par note'tez bene' še chone' can' chon mos blao ben' chejni'i, ben' chon can' cheyala' gone'. Ben' chon ca', co' xane' lo ne'e ližen' cont ne'e mos ca' yezica'chle. Na' gone' da' yesagw to toe' cate' žin hor yesagüe'.

⁴³ Še to bene' mos chonteze' can' ben xanen' mandadw gone', mba soe' cate' yežin xanen'.

⁴⁴ Da' li chnia' le'e, xanen' cue'e lo na' mosen' yogo'lol da' de che'.

⁴⁵ Perw na' še mosen' gone' xbab na' ne': "Ba gwže xanan'", na' solagüe' got čhine' mosa' yezica'chle na' ye'ej gagwxate' na' sožde'.

⁴⁶ nach xane'na' yežine' to ža senyale' le' cate' bi gacbe'ede'. Na' da' bi chon mosen' can' cheyala' gone', xane'na' got chinchgüe' le' na' gone' cont si'e castigw txen len yezica'chle bene' bi cheson can' cheyala' yesone'.

⁴⁷ 'Na' mos ben' nac bene' güedenag, la'czla' ba nežde' can' che'ne xanen' gone', bi chone' ca'. Bi zoe' chbeze' batcan' yežin xanen', na' da'n'an' xanen' got chinchgüe'ne'.

⁴⁸ Na' bene' bi nežde' bin' non xanen' mandadw gone' na' da'n'an' chone' da' zaca' čhine' le', na' xanen' bi chintequ'e' le' ži'. Note'teze bene' zjanye'chgua xbab, chesego'o bene' lo na'gaque' da' zan da' yesone', na' chonen byen yesone' yogo' da' ca' zjajo'o lo na'gaque' yesone'.

Yesedil bene' neče da' bid Jesúsen'

(Mt. 10:34-36)

⁴⁹ Nach gwna Jesúsen':

—Dan' zedeyena' yežlio nga naquen ca to yi' da' cuec bene'. Na' yebeda' šaca' ba chi' yi'na'.

⁵⁰ Za'a cont saca'zi'a na' gata'. Na' chžaglagua' šlac chbeza' žin ža yeyož gaquen.

⁵¹ ĆChonle xbab bene' že' yežlio yesezoa yesebeze' binlo len lježgaque' na'a dan' ba bidan'? Chnia' le'e, bi yesezoa yesebeze' binlo len lježgaque' na'a ba bida', san yesedile' na' yosošaše'.

⁵² Quinga solao gac na'a, še žan nita' gayo' bene' to lo' yo'o, yesedil legacze', čhope' contr šone' na' šone' contr chope'.

⁵³ Yesedil bene' byo len xi'ine' na' xi'ine' len le'. Na' yesedil no'olen' len xi'ine' no'ole, na' xi'ine' no'olen' len le'. Na' yesedil no'olen' len xo'oliže' na' xo'oliže' len le'.

Bitw gosache'ede' bi zeje da' ca' chon Diosen'

(Mt. 16:1-4; Mr. 8:11-13)

⁵⁴ Nach lecze gož Jesúsen' bene' ca' nita' na':

—Cate' chle'ele chi' bejw gan' chxoa gwbiža' na' žale: “Gac yejw”, na' chac ca'.

⁵⁵ Na' cate' chečj be' da' za' ži'le na' žale: “Guac zeye”, na' chac zeye'.

⁵⁶ Bene' gwxiye' le'e. Cate' chle'ele nac chac le'e yaban' na' lo yežlion nezele še gac yejw o še gac zeye'. ĆBixčhen' bi chache'ele bi zejen da' ca' chon Diosen' tiemp nga zoacho na'a?

Cheyała' goncho cont yezoacho binlo len bene' che'e chio' lao justis

(Mt. 5:25-26)

⁵⁷ ĆBixčhen' bi chonle xbab cont nezele can' cheyała' gonle?

⁵⁸ Cate' to bene' gonle xya che' na' che'e le'e lao justis, šlac ngo'ole nezen' le yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo na' bene' ca' yoseseyjue' le'e ližya.

⁵⁹ Chnia' le'e bitw yebeje' le'e še biña' chixjwle doxen da' čala'le.

13

Cuiayi'cho še bitw yetinjecho xtola'chon'

¹ Na' len bene' ca' že'na' gwnita' bał bene' gosoe'lene' Jesúsen' diža', gose'ene' Pilaton' gwsele' soldadw che' ca' jasetue' to xonj bene' Galilea ca' na' bchixde' xčhengaquen' len che beyixe' ca' ba gosote' cont yesonxene' Diosen'.

² Nach boži'i Jesúsen' xtiža'gaquen' gože' legaque':

—ĆChonle xbaba' gosac čegaque' ca' lagüe dan' gosonche' da' malech clcl ca bene' Galilea ca' yezica'chle'?

³ Chnia' le'e, bi naquen ca'. Še bitw yetinjle xtola'le ca', lecze gwžin ža cate' cuiayi'le.

⁴ Nezele che bene' šino'šone ca', šlac zjanite' yež Siloé gwbiže to campanaryw na' gwdenen legaque' na' gosate'. ĆLecze chonle xbab goc ca' dan' zjanacche' bene' mal clcl ca bene' ca' zjaže' Jerusalén?

⁵ Chnia' le'e, gague can'. Še le'e bi yetinjle xtola'le, lecze gwžin ža cate' cuiayi'le.

Jempl che yag yixgüigw da' bibi chbia

⁶ Na' be'lene' legaque' jempl nga, bzejni'ide'ne' cheyała' yesyetinjde' xtola'gaque', na' gože' legaque':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' jane'e še de toga yixgüigw gagüe', perw bitw bi bželde'.

⁷ Na' gože' ben' chape' yag che' ca': “Ba chac šon iz chedena'a yag nga še chbian yixgüigw, perw bitw bi chbian. Gwčhoguen, lažjw con zolan nlanen, na' neca bi chbiazen.”

⁸ Na' gož ben' le': “Xana', jayenna', za' zoašazen yetgüiz, che'ena' xanenna' na' cuecan' yo beb.

⁹ Na' še cuian yixgüigw do yetgüiz, bitec da' güen, perw še bicze bi cuian, nach čhogchon.”

Jesúsen' beyone' to no'ole ža che Dios

¹⁰ Na' to ža che Dios bsed blo'e Jesúsen' bene' že' to lo' yodao'.

¹¹ Na' zoa to no'ole bene' ba goc šino'šone iz yo'o nyaz da' xigüen' yichjlažda'ogüe'na'. Na' ben da' xigüen' cont bdohe cuerp che'na', na' gague gocch se' to liča.

¹² Na' cate' ble'e Jesúsen' le', goxe'ne' na' gože'ne':

—No'ole, na'a yeyacdo' yižgüe' chio' nga.

¹³ Na' gwžoa ne'e cuerp che no'ola', na' la' bezete' to liča. Na' no'ola' benxene' Diosen'.

¹⁴ Perw na' bene' gwnabia' che yodao'na' bloque' da' beyon Jesúsen' no'ole güen' ža che Dios. Na' gože' bene' ca' nita' lo' yodaon':

—De xop ža cont gonle žin. Le da lo ža ca' cont yeyone' yižgüe' chelen' perw bitw yidle ža che Dios cont yeyacle.

¹⁵ Nach Xancho Jesúsen' gože'ne':

—Bene' gwxiye' le' len bene' lježo'. ¿Gague lo za che Dios bia'cze chsežle go'n chele o burr chele ga zjada'ba' chjasanlba' güe'ej nis?

¹⁶ No'ole nga naque' xi'in diaža che da' Abraham, na' Satanásen' dan' chnabia' da' xigüe' ca' benen cont ba bdohe cuerp chen' šino'šone iz. Da'n'an' nacczen liča ba beyona'ne' za che Dios.

¹⁷ Cate' gwne' ca', bene' ca' cheseague' le' gosacde' zto', perw yogo'lol bene' ca' yezica'chle nita'na' besyebanchgüede' len yogo' dan' ben Jesús'en', le leca güen zjanac dan' benen'.

Yela' gwnabia' che Diosen' naquen ca bin che xomdas

(Mt. 13:31-32; Mr. 4:30-32)

¹⁸ Nach gwna Jesús'en':

—Na'a gwlo'eda' le'e cont nezele šanch bene' yosozenag che Diosen' cont nabi'e yichjlažda'ogaque'.

¹⁹ Da'n'an' yela' gwnabia' che Diosen' naquen ca bin che xomdas. To bene' gozen' na' cate' blan' gwcha'on goquen yag cha'o na' be ca' zjazoa xil goson ližgacba' lo xoze' yaga'.

Yela' gwnabia' che Diosen' naquen ca levadura

(Mt. 13:33)

²⁰ Nach da' yoble gozne':

—Na'a nia' le'e yelate' nac nac yela' gwnabia' che Diosen'.

²¹ Naquen ca levadura dan' gwlec no'olen' len to rob yezj cont gwcha'o doxenen.

Cheyała' chiljwlaže'cho nac goncho cont soacho binlo len Diosen'

(Mt. 7:13-14, 21-23)

²² Na' gwda Jesús'en' bsd blo'ede' bene' ca' že' ciuda ca' na' yež ca' gan' bedie' cont bežine' Jerusaléna'.

²³ Na' to bene' gože' Jesús'en':

—Xanto', ¿con to čopze bene' šjasyenite' len Diosen'?

Nach Jesús'en' gože' legaque':

²⁴ —Chnia' le'e, bene' zan chese'nde' yesenite' binlo len Diosen', perw gwžin za cate' bich gac yesone' cont yesenite' binlo len le'. Da' nac žialao gonle, chiljwlaže'le nac gonle cont soale binlo len Diosen'

²⁵ cont bi gone' len le'e ca ben to xan yo'o cate' bžin hor gwseyjuen'. Gwžože'e bseyjue', na' gwdechle besežin bene' bososiže' le'e puert che'na' na' bich gwsaljue' cont yeso'e. Na' gose'ene': "Gwsaljwšca cont šo'to'." Na' gože' legaque': "Bitw nombi'a le'e, neca nežda' ga za'acle'."

²⁶ Can' gac che balle. Nach solaole ye'ln'e': "Güe'ej gwdagwto' len le' na' bsd blo'edo' neto' la cay lažto'."

²⁷ Perw na' da' yoble ye'e le'e: "Bitw nežda' ga bene' le'e. Le šjaya'ac yogo' le'e bene' güen da' mal." Can' ye'e le'e.

²⁸ Na' le'ele Abraham na' Isaac na' Jacob na' yogo'lol bene' ca' gosoe' xtiža' Diosen' cani' nite' yaba gan' zoa Diosen' chnabi'e. Na' le'e bitw gac šo'léna'. Nach cuežyaše'le na' gagwxetje layle dan' leca žaglaole cate' gacbe'ele bich gac šo'le.

²⁹ Bene' zan bene' za'ac doxen yežlio yesyěžine' yaba gan' zoa Diosen' chnabi'e na' yesebi'e cho'a mes yesagüe'.

³⁰ Nita' bene' zjanaque' bene' bzebe na'a perw gwžin za cate' yesaque' bene' žialao. Na' nita' bene' zjanaque' bene' žialao na'a, perw gwžin za cate' yesaque' bene' bzebe.

Begüine' Jesús'en' neche xtoła' bene' Jerusalén ca'

(Mt. 23:37-39)

³¹ Lo za na'teže bal bene' fariseo ca' besežine' gan' zoa Jesús'en' gose'ene':

—Cheyała' yoxonjo' nga gan' chnabia' rey Herodes, le chaclaže' gote' le'.

³² Jesús'en' gože' legaque':

—Herodesen' naque' ca to beza' yela' gwxiye' chen'. Le šja'ac na' ye'ln'e' yeto čope žazen' soa' yebejcha' da' xigüe' ca' zjajo'o zjanyaz yichjlaždao' bene' na' yeyoncha' bene' chesacšene. Ba zoa yeyož gona' dan' cheyała' gonan'.

³³ Perw ca nac dan' chona' na'a gonchczan' gwxe güižj. Gague ngan' chesote' bene' ca' chesoe' xtiža' Diosen', san Jerusalén chesote' bene' ca'.

³⁴ Le'e bene' Jerusalén, chotle bene' ca' chesoe' xtiža' Diosen' na' ca nac nochle bene' ca' chsela' Diosen' len le'e, chchellene' yej. Zan ni'a goclaža' yotoba' le'e ca to jed xcaca' be nche' xi'in na' chyežba' legacba', perw bitw goclaže'le.

³⁵ Na' na'a ba gwlejjichj Diosen' le'e. Na' chnia' le'e, bich le'ele neda' na'a. Cate'ch žin žana' nale: "Mbalaz ben' za' nga nselá' Xancho Diosen' le' cont nabi'e", cana'ch le'ele neda' da' yoble.

14

Jesúsen' beyone' to bene' de yi

¹ Na' to ža che Dios Jesúsen' gwyeje' jatagüe' liž to bene' fariseo ben' nac bene' blao. Na' yezica'chle bene' fariseo ca' chosogüia chesene'e bixen' goncze' cont gata' da' yosode'ede' yesagüe' xya che'.

² Na' lagüe'na' zecha to bene' chacšene, de cuerp chen' yi.

³ Na' gož Jesúsen' bene' fariseo ca' na' bene' ca' chososed chosolo'e ley dan' bzoj da' Moisés: —¿De ľsens len ley chechon' yeyoncho to bene' güe' ža che Dios o še bitw bi ľsens de?

⁴ Perw notno boži'i xtíže'na'. Nach Jesúsen' bešue' na' bena' na' beyone' ľe', na' gože'ne': —Guac yeyejo'.

⁵ Nach gož Jesúsen' bene' ca' že' liž bene' fariseon':

—Le'e še zoa to burr o to go'ň chele na' lažo'ba' to ľo' yechw sitjw, ¿cabi ľa' yebejteleba' ľa'šaze nac ža che Dios?

⁶ Na' nono goc yoži'i xtíža' Jesúsen'.

Bene' ca' gosaxe' gan' chac güešagna'

⁷ Na' ble'e Jesúsen' can' cheson bene' ca' gosaxe' liž bene' fariseon', gosebeje' gan' zjachi' bene' blao ca' cont gosebi'ena'. Na' Jesúsen' be'e to jempl, gože' ľegaque':

⁸ —Cate' to bene' gaxe' le'e gan' chac güešagna', bitw cue'le gan' cheyaľa' cue' bene' blao ca', le še cue'le na', guacte yid bene' nacch bene' blao

⁹ na' xan yo'ona' ye'e le'e: “Le soža' cont cue' benga.” Nach do chaquele zto' soža'le cue'le ga yoble len bene' ca' bitec bi zjazaca'.

¹⁰ Na' cate' gan' gaxe' le'e cue'le len bene' bitec bi zjazaca', na' cate' yid xan yo'ona' na' ye'e to tole: “Bene' migw chia', da cui'o len bene' blao ca'.” Nach gacxenle lao bene' ca' zjachi' len le'e cho'a mesen'.

¹¹ Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gacxene'.

¹² Na' ľecze gož Jesúsen' ben' goxe' ľe' ližen':

—Cate' gono' to ľni na' gaxo' bene' yesagüe' len le', bitw gaxo' bene' biše' ľežo', bene' migw chio' o bene' zjanaque' bene' gwni'a. Ľegaque' ľecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'.

¹³ Cate' gono' to ľni gox bene' yaše' na' bene' nchog no ņi'a na'gaque', bene' nxinj ņi'e, na' bene' ľchol.

¹⁴ Še gaxo' ľegaque', Diosen' gone' so' mbalaz, le bene' ca' bi gac yesyegüe'e gwzon chio'. So' mbalaz cate' Diosen' yosbane' le' ladjo bene' guat ca' txen len yezica'chle ben' ja'ac to ľicha cate' gosebane'.

Jempl che to bene' ben ľni xen

¹⁵ Na' to bene' chi' cho'a mesen' txen len Jesúsen' bende' xtíže'na' na' gože'ne':

—Mbalaz soacho gagwcho ľo ľni da' gac caten' ba chnabia' ben' sela' Diosen'.

¹⁶ Nach Jesúsen' gwne':

—To bene' bene' to ľni xen, na' goxe' bene' zan šja'ac ližen' cont yesagüe'.

¹⁷ Na' cate' bžin hor yesagüe', na' xan yo'ona' gwsele' xmosen' cont šjatobe' ľegaque' yesagüe'. Na' cate' jaņe'e to toe', gože' ľegaque': “Le šo'o, ba bsini'e dan' gagwchon'.”

¹⁸ Na' yogo'ľole' gose'e ben' bi zjazoe' latje šja'aque' gan' chone' ľnin'. Bene' nechon' gwne': “Za' gwxia' to yežlio, na' cheyaľa' šjaņa'an. Na' ye'šco' xanon' bitw gac yida'.”

¹⁹ Na' yetoe' gwne': “Za' gwxia' gayo' cue' go'ň na' na'a šjengaca'ba' prueba. Ye'šco' xanon' si'xene' chia', bitw gac yida'.”

²⁰ Na' yetoe' gože'ne': “Za' bšagna'. Da'n'an' bitw gac yida'.”

²¹ Na' mosen' beyeje' na' jayeže' xanen' can' gose' bene' ca' ľe'. Nach xan yo'ona' ben' chon ľnin' bže'e. Nach gože' xmosen': “Gwyej jata to to cay na' to to nez ľo ciudan', na' gwto'bo' bene' yaše' na' bene' nchog ņi'a na'gaque' na' bene' nxinj ņi'e, na' bene' ľchol cont yeside' yesagüe'.”

²² Gwde bene' ca' nach gože' ľe': “Xana', ba jatoba' bene' ca' ba gwnaon', na' ņe' dehcze latje par bene' yoble.”

²³ Nach xane'na' gože' ľe': “Bchoj ľo' ciudan' na' gono' byen yesid ben' nita' chanez. Na' šjaji'o bene' ca' zjaže' yiže'. Gono' byen yeside' liža' nga yesagüe' cont yežan' bich bi latje šo'.

²⁴ Na' ca' nac bene' ca' goxa' da' nechw, bich gua' latje yesagw ľegaque' dan' ba bsini'ana'.”

Dan' cheyaľa' goncho cont gaccho txen len Jesucriston'

²⁵ Na' bene' zan juisyw zjana'ogüe' Jesúsen', na' gwychje' gože' ľegaque':

²⁶ —Note'teze bene' še chaclaže' šejnilaže' neda' na' gwzenague' chia', še bi gacchde' neda' cled ca' xaxne'e, no'ol che', xi'ine', biše', zane', na' lente cuine', bi gac gone' neda' txen.

²⁷ Na' note'teze bene' bi chzanlaže' cuine' saca'zi'e o gate' ne chia' neda', lecze bitw gac gone' neda' txen.

²⁸ Še tole che'nele gonle to campanaryw, zgua'tec cue'le na' gonle xbab gwsaca'le ca do gaca' da' chyažjele cont gonlen, še gaque xmechwle cont yeyož campanaryon'.

²⁹ Še bi gwchix gwtole xbab chelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožen, na' yogo' bene' yesele'ede' lenenna' yesezi'diže' le'e,

³⁰ yesene': "Benga gwzolao chone' to campanaryw perw bitw beyož xšinen'."

³¹ Na' še to rey chone' xbab tile' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw.

³² Na' še chache'ede' bi gone' gan, šlac ne' zoa ben' yeto, zito', sele' ben' šjasedie' xtižen' lao rey ben' yeto yesenabe' yesyenite' binlo.

³³ Ca' naquen len le'e, note'tezle še bi cuejyichjle yogo'loł bi da' de chele, bitw gac gonle neda' txen.

Cate' zeden' bich naquen xzi'

(Mt. 5:13; Mr. 9:50)

³⁴ "Zeden' naquen güen, perw na' še bich naquen xzi', ¿nacxe goncho cont yeyaquen xzi' da' yoble?"

³⁵ Bibi zacan', neca gaclenen yežlio, neca gaquen par beb, lete cho'onchon. Le'e žia nagle da' chene, le gwzenag xtiža'na'.

15

Jempl che xila' ben' gocžeje

(Mt. 18:10-14)

¹ Na' bene' güečhixjw ca' na' yebale bene' güen da' xinj, yogüe' gosebigue' gan' zoa Jesúsen' cont gosende' xtiže'na'.

² Na' bene' fariseo ca' na' bene' ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' bene' güen da' xinj ca' na' chagwlene' legaque'.

³ Nach Jesúsen' be'e to jempl, gože' legaque':

⁴ —Še nita' to gayoa xila' chele na' gacžeje toba', ¿bi yocua'anle be ca' taplalj togalj gan' že'ba' latje daša' na' šjajdiljwle ben' ba gocžejena' cont yeželba'?

⁵ Na' cate' yeželban' yebechgüele na' yežoalba' ya'axičhje leyoea'lba'.

⁶ Na' cate' yežin ližle, gwtoble bene' migw chele na' bene' gualiž chele na' ye'le': "Le yebe len neda'. Ba bežel xila' chia' ben' gocžeje."

⁷ Chnia' le'e, gwbeche Diosen' txen len angl che' ca' cate' to bene' chon da' mal yetinjde' xtole' clcl ca' yesyebede' che taplalj togalj bene' zjanaque' bene' güen bene' bitw de xtoła'gaque' da' yesyetinjde'.

Jempl che mechw dan' gwnit

⁸ Na' le'e no'ole še de ši mechw plata chele na' še nit ton, la' gwguala'tele to yi' na' gwloale lo' yo'o chele na' yeyiljwyožlen cont yeželen.

⁹ Na' cate' yeželenna', na' yotoble no'ole migw chele ca' na' bene' gualiž chele na' ye'le' legaque': "Le yebe len neda', le ba beželda' mechw chia' dan' gwnit."

¹⁰ Chnia' le'e lecze chesyebe chesyenzaque' angl che Diosen' bene' zoa yaba cate' to bene' chon da' xinj chetinjde' xtole'na'.

Jempl che ben' benditje xi'inen' xmechue'

¹¹ Na' lecze gože' legaque':

—Gwzoo to bene' na' gwnita' chop xi'ine' bene' byo.

¹² Na' bžin ža bene' xcuiden' gože' xen': "Xa, beñ neda' dan' cheyała' sia' da' de čio'." Nach xen' bnežjue' dan' cheyała' si'en.

¹³ Goc to chop ža nach bene' xcuiden' btobe' yogo'loł bi da' de che' na' gwze'e gwyeye' nación zito' n' zlez da' bi zaca' jene'. Na' benditjde' xmechue'na' zejlene' da' malen'.

¹⁴ Na' cate' beya xmechuen', goc to gwbin juisyw doxen naciónna', na' bich bi gota' xmechue' cont si'e da' ye'ej gagüe'.

¹⁵ Da'n'an' gwyeye' gan' zoa to bene' naciónna' gwnabe' žin, na' bena' gwsele' le' yixe' ga že' be zan xcoše' na' jayoe'ba'.

¹⁶ Na' catec gwdone' goclaže' gagüe' dan' chosonežjue' chesagw coš ca', perw ne len ca bosonežjue' le' gagüe'.

¹⁷ Na' beyone' to xbab šagüe', gwne': "Nita' mos zan che xan' na' dechgua da' chesagüe', na' neda' gatda' yeła' chdon.

- 18 Yeza' nga na' yeya'a gan' zoa xa' na' yapa'ne' bena' da' mal lao Diosen' na' lao le',
 19 na' bich zaca' gone' neda' cuent ca to xi'ine', con še gone' latje gaca' ca to xgnose'."
 20 Nach beze'e beyeje' gan' zoa xen'. Na' zito'le za' yežine' cate' ble'e xen' le' na' beyaše'de' le' na' gwza'sese' jašague'ne'. Na' gwdele'ne' bnopene'.
- 21 Nach gož xi'ine'na' le': "Xa', ba bena' da' mal lao Diosen' na' laguo' le'. Bich zaca' gono' neda' cuent ca xi'ino'."
- 22 Na' xe'na' gože' xgnose' ca: "Le šjalej tgot lache' šagüe', le guacwben', na' le šjaxi' to niy na' le co'on xbembe', na' le šjaxi' šcue' yel na' gwdele'ni'abe'.
- 23 Na' le šjaxi' go'ñ dao' ben' chane' na' le gotba' cont gagwchoba', le goncho lni.
- 24 Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejičhijbe' chio', perw na'a ba bela'be'." Na' gosezolaogüe' chesone' lni.
- 25 Na' xi'ine' bene' nechon' zeje' yixe' cate' bežin xi'inen' yeto ben' benditje xmechuen', na' cate' zeza' ben' gwyey yixen', ba zoa yežine' liž xen' cate' bende' chosocueže' na' chosoye'e.
- 26 Na' goxe' to mosen' na' gwnabde' le' bixchen' chesone' lni.
- 27 Na' mosen' gože'ne': "Bi' bišo'na' ba bela' na' xaon' ba betue' go'ñ daon' ben' chane'chgua da' bela'be' to šagüe' to güen."
- 28 Nach xi'ine' nechua' bže'e na' bi goclaze' yeyo'e liž xen'. Na' bchoj xen' na' gota'yoede' le' yeyo'e yo'o.
- 29 Perw xi'ine' bene' nechua' gože' xen': "Zan iz ba chac zoa' nga chonteza' žin con can' žo' le', na' biña' gaca' bene' güedenag. Na' ne to šib dao' caña' goño' neda' cont gota'ba' gona' lni len bene' migw chia' ca'.
- 30 Na' na'a ba bela' xi'ino' nga benditjbe' yogo'lol da' bnežjo'be' gwdalembe' no'ole zle', na' beto' par lebe' go'ñ dao' ben' chane'."
- 31 Na' xe'na' gože'ne': "Xi'indagua', le' zoatezo' len neda', na' yogo'lol da' de naquen chio'.
- 32 Perw cheyała' goncho lni nga na'a da' chbechgüecho ba bela' bi' bišon', le ba bena'be' cuent ca to bi' guat, perw na'a zoabe' mbambe'; gwlejičhijbe' chio', perw ba bela'be'."

16

Jempl che to mos blao ben' benditjde' da' de che xane'

- 1 Nach gož Jesúsen' bene' ca' zjanaque' le' txen:
 —Gwzao to bene' gwni'a na' gwzao to mos blao che' ben' gwyo'olo'ne'e yogo'lol da' de che'. Na' bene' gwni'ana' bende' rson xgnose' blaon' ba benditjde' bi da' de che'.
- 2 Na' xanen' goxe' le' na' gože'ne': "Ba benda' diža' can' chonon'. Cheyała' yodio' cuent yogo'lol da' ba benditjedo' chia'. Bich gac gono' xšinan' na'a."
- 3 Nach mosen' bene' xbaben': "¿Bixe gona' na'a? Xanan' ba cholague' neda'. Bich gac gona' xšinen', na' neca gac goncha' žin gual, na' gacda' zto' še ŋaba' carida.
- 4 Nežda' bi gona' cont ni'a' bene' yesene'e neda' cate' bich chona' žin che xanan'."
- 5 Nach goxe' yogo'lol bene' ca' chesala' xmechw xane'na' tgüej tgüejje' na' gože' bene' nechw: "¿Gaca' čalo' che xana'?"
- 6 Na' bena' gože'ne': "Čala' che tap mil litrw set." Nach gož mos blaona' le': "Bedao'nez gwche'edo' na' bzoj lo cuenten' bzoan čalo' che čop mil litrwse seten'."
- 7 Gwde na' gože' bene' gwchopen': "¿Gacan' čalo' che xanan'?" Nach bena' gože'ne': "Čala' che to mil rob trigw." Nach mosen' gože' bena': "Gwche'edo' na' bzoj lo cuent čio'na' bzoan čalo' che xono' gayoa robze trigon'."
- 8 Na' xan mos gwxiyen' gocbe'ede' xmosen' leca nye'e xbab da' beyiljwlaže' nacle gone' soe' binlo len lježe' bene' ca' chesala' che xanen'. Le bene' ca' zjachi' yičhje' to zleze dan' chac lo yežlion' chesonchgüe' xbab nacle yesone' len dan' zjade čhegaque', perw zan bene' ba zjajo'o be'ni' che Diosen' lo' yičhjlazda'ogaque' bitw chesone' xbab naclen' yosočhine' dan' de čhegaque'.
- 9 Na' čnia' le'e, dan' de čele yežlio nga da' te čen', perw le gwčhinen cont ni'a' migw čele. Na' cate' ba beya bi dan' de čele yežlio nga, nach ni'a' bene' yosolebe' le'e cate' yežinle yaba gan' soale toli točane'.
- 10 Še to bene' chone' can' cheyała' gone' len da' bibi zaca'tec, lecz ca' gone' len da' zaca'chgua. Na' bene' bi chone' can' cheyała' gone' len da' bibi zaca'tec, lecz bitw gone' can' cheyała' gone' len da' zaca'chgua.
- 11 Še le'e bi chonle can' cheyała' gonle len dan' de čele yežlio nga da' te čen', bitw gon Diosen' le'e da' zaca'č da' bi te če.
- 12 Dan' de čele yežlio nga, che Diosen' gague čelen'. Na' še bitw chonle can' cheyała' gonle len da' nac che', bitw gone' le'e da' zaca'č da' bi te čen'.
- 13 Nono mos gac gone' žin len čop xane' to ši'ize, le še gone' ca', gue'ede' to xan žinna' na' gacde' yetoe'; o gone' žin che toe' do yičh do laže' na' če ben' yeto gonen' do čhža'alaže'ze'.

Łecze ca' le'e, bitw gac gonłe xšin Diosen' do yichj do laže'le na' gonte xšinle cont gacle bene' gwni'a.

¹⁴ Na' łecze nita' bene' fariseo ca' chesende' xtiža' Jesúsen', na' gosezi'diže' le', le gosaclaže' yesaque' bene' gwni'a.

¹⁵ Na' gož Jesúsen' legaue':

—Le'e chonle cont benačen' chesacde' chdaczle licha, perw Diosen' neze nle'ede' yichjlažda'ole, na' Diosen' chgue'ede' bał da' chesaque benačen' zjanaquen da' žialao xen.

Ley che Diosen' na' bene' ca' chnabia' Diosen' yichjlažda'ogaue'

¹⁶ Na' gozna' Jesúsen':

—Gwzolaon cani'te bžinten cate' bla' Juanna' bedetiŋjue'ede' xtiža' Diosen', ley dan' bzoj da' Moisés len dan' bosozoj yezica'chle bene' gosoe' xtiža' Diosen' bzejni'in chio' che Diosen'. Na' na'a gwzolaon len Juanna', ne' nita'cze bene' cheseyiŋjue'ede' Diosen' nabi'e yichjlaždao' bene' yosozenague' che'. Na' bene' zan cheseyiljue' nacle yesone' cont nabia' Diosen' yichjlažda'ogaue'.

¹⁷ Ła'czła' še yežlion' len da' ca' zjažia le'e yaban' yesede čegaquen, ca nac Xtiža' Diosen' dan' nyojen, ne late' daon' cbi te čhen.

Bi cheyala' yela'acho len no'ol čechon' cont soalencho no'ole yoble

(Mt. 19:1-12; Mr. 10:1-12)

¹⁸ Note'teze bene' chele'e len no'ol che' na' cheque'e no'ole yoble chone' da' xinj, tozcze ca naquen šaca' gata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' čhe', łecze tozcze ca da' xinj gone' len dan' chon bene' chata'lene' no'ol che bene' yoble.

Bene' gwni'a na' Lázaro

¹⁹ Nach gozna' Jesúsen':

—Gwzoo to bene' gwni'a na' xdanchgua goc xałane'na', na' leca gwdagwšagüe' yogo' ža.

²⁰ Na' to bene' yaše' le' Lázaro, yogo' ža jasediŋjue' le' cho'a puert zaguan che bene' gwni'ana' cont gwñabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp čhen'.

²¹ Na' catec gwdone' goclaže' gagüe' bla'a dao' yela' guagw da' beselažo' cho'a mes che bene' gwni'an'. Na' beco' ca' ja'acba' jasele'eba' yežo' dan' gwžia cuerp čhe'na'.

²² Na' got bene' proben' nach angl bene' že' gan' zoa Diosen' besyezi' besyeque'e le' yaban' gan' zoe' na'a len da' xozxta'och Abraham. Na' łecze got bene' gwni'ana' na' bosocuaše'ne'.

²³ Na' beyeje' lo yi' gabił. Na' šlac chžaglagüe' na' gwłis lagüen' na' ble'ede' zito'le nita' da' Abraham len Lázaron' yabana'.

²⁴ Nach bene' gwni'an' gwñe' zižje gwne': “Xa' Abraham, beyaše'laže'šca neda' na' gwseła' Lázaron' cont yosbise' loža' nga len late' nis da' gwłapa' xbene'na', le leca chžaglagua' lo yi' nga.”

²⁵ Perw na' Abrahanna' gože' le': “Xi'ina', bosa'laže' cate' gwbanoo yežlio zleze da' šagüe' da' güen gota' chio', na' Lázaro nga to zleze da' mal goc čhe'. Na' ba zoe' mbalaz nga na'a na' le' chžaglaguo'.

²⁶ Bi gac gona' can' chaclažon', le Diosen' bač nze' to bđinj xen ga nono gac te, cont nono gac sa' nga šeje' gan' zon', neca nono gac sa' gan' zon' na' yide' nga.”

²⁷ Nach bene' gwni'ana' gože' Abrahanna': “Bene' gol dao', chata'yoeda' le' gwseła'šca Lázaron' liž xan'.

²⁸ Nita' gayo' bene' biša' na' che'nda' šjatixjue'ede' legaue' nac yesone' cont Diosen' bi yesele' legaue' latje nga gan' yesežaglagüe'.”

²⁹ Na' Abrahanna' gože' le': “Decze dan' bzoj da' Moisésen' na' dan' bosozoj yezica'chle bene' ca' gosoe' xtiža' Diosen' cani'. Cheyala' yosozenague' che da' ca' zjanyojen.”

³⁰ Na' gože' Abrahanna': “Bitw, bene' gol dao'. Še to bene' yebane' ladjo bene' guat na' güe'lene' legaue' diža', nach yesyetiŋjde' xtoła'gaquen'.”

³¹ Nach gož Abrahanna' le': “Še bitw chosozenague' che dan' bzoj da' Moisésen' na' dan' bosozoj yezica'chle bene' ca' gosoe' xtiža' Diosen', la'czła' še yeban to bene' ladjo bene' guat ca', bi yesejle'cze' che Diosen'.”

17

Bitw cheyala' goncho cont gon bene' da' xinj

(Mt. 18:6-7, 21-22; Mr. 9:42)

¹ Na' gož Jesúsen' bene' ca' zjanaque' le' txen:

—Decze da' gonen cont lažo' bene' yesone' da' xinj, perw nyaše'chguaze gac che bene' chone' cont bene' yoble yesone' da' xinj.

² Yejn'i'a šaca' yosocheje' yene' to yiše na' šjasezale' le' lo' nisdao' clal ca soe' gone' cont to bene' za' gwzologüe' chejnilaže' neda' lažoe' gone' da' xinj.

³ Da'n'an' le gwsaca' cont bi gonle ga lažo' bene' gone' da' xinj.

'Na' še to bene' lježle gonde' le'e mal, le tile' na' še gwše'e xbab na' ne' bich gone' ca', le yezi'xen che'.

⁴ La'czla' gaž ni'a lao tža gone' da' mal contr bene' lježen', še gaž ni'ate ne': "Ba betinjda' che dan' benan', bezi'xen chia'", na' cheyala' yezi'xene' che'.

Gosaclaže' yesejle' che' che Diosen'

⁵ Na' gose' postlw ca' Xancho Jesúsen':

—Gaclenšco' neto' cont šejle' chto' che Diosen'.

⁶ Nach gož Xancho' legaque':

—Xsa yag xomdas naquen da' dao' riz, na' la'czla' dan' chejnilaže' le Diosen' naquen ca to xsa xomdas lagüe dan' bi chejnilaže' techne', še šejnilaže' lne', guaque ye' le yag nga: "Gwcuase nga na' jayzoa lo' nisdao'", na' guacze can' nalna'.

Dan' cheyala' yeson mos ca'

⁷ Le'e še mos chelen' chgua' aňe' go'ň, o še chyoe' xila', cate' chele'e güeyeban' bitw che' lne': "Beyo' o ngale, gwche' edo' gaguo' xše'."

⁸ San che' lne': "Bsin'i'a da' ye'ej gagua' na' goňon'. Te yedaguan' nach gago'."

⁹ Na' bitw cho'elne' yela' choxclen cate' ba bene' dan' gožlene'.

¹⁰ Na' lecz ca' le'e, cate' ba benle yogo' lol dan' ža Diosen' gonle, cheyala' nale: "Bitw zaca' to' no goň yela' choxclen cheto' ca dan' ba bento', le bento' con da' cheyala' cze gonton'."

Jesúsen' beyone' ši bene' chese' ede' yižgüe' da' nzi' lepra

¹¹ Na' zej Jesúsen' Jerusalenna' len bene' ca' zjanaque' le' txen na' gwdie' gan' ndil distritw Samaria len distritw Galilean'.

¹² Na' besežine' to cho'a yež dao' na' besechoj ši bene' chese' e yižgüe' da' nzi' lepra jasešague' Jesúsen'. Na' gosezie' zito'

¹³ na' gosene' zižje gosene':

—Maestrw Jesús, beyaše' laže' neto'.

¹⁴ Na' Jesúsen' cate' ble' ede' legaque' na' gože' ne':

—Le šjaya' ac lao bxož ca' cont yesene' le'e še ba beyacle.

Na' goquen' lo neza' besyeyacde'.

¹⁵ Nach toe' cate' goche' ede' bač beyaque', na' bebi'e na' gwnie' zižje benxene' Diosen',

¹⁶ na' bzoa xibe' lao Jesúsen' bi'e le' yela' choxclen. Ben' ben ca' naque' to bene' Samaria.

¹⁷ Nach gwna Jesúsen':

—Beyona' ši bene'. ¿Gaňxe bene' ca' yega?

¹⁸ ¿Tož bene' zito' nga bebi'e chonxene' Diosen'?

¹⁹ Nach gož Jesúsen' bena':

—Bezoža' beyej to šagüe' to güen. Ba beyacdo' da' chejnilažo' neda'.

Yela' chnabia' che Diosen'

(Mt. 24:23-28, 36-41)

²⁰ Na' bene' fariseo ca' gosenabde' le' batxen' yid ben' seļa' Diosen' nabi'e nación Israelen'. Nach boži'i Jesúsen' xtiža' gaquen' gwne':

—Ca nac yela' gwnabia' che Diosen', bi naquen da' le' echo.

²¹ Nono cheyala' güe' diža' ne': "Gwņa' nga chnabi'e", o "Gwņa' na' chnabi'e." Le ba zoe' len le'e na'a chnabi'e.

²² Nach gože' bene' ca' zjanaque' le' txen:

—Gwžin ža cate' nale: "Šaca' na'a ba chnabia' ben' gwseļa' Diosen'", perw bitw gac can' nablaze' len'.

²³ Yesenita' bene' yesi'e le'e: "Gwņa' šc nga zoa ben' gwseļa' Diosen'", o "Gwņa' šc na' zoa ben' gwseļa' Diosen'." Perw bitw ga'ole ben' yesi'e le'e ca'.

²⁴ Can' chac cate' chep yes, chšenin' doxen le'e yaban' zejenez, lecze can' gac cate' žin ža yida' da' yoble, neda' naca' ben' gwseļa' Diosen' golja' beňach. Yida' zejenez na' yogo' lol bene' yesele' ede' neda'.

²⁵ Zgua' tec de da' zan da' cheyala' saca' zi'a na' bene' ca' že' na'a bitw yesejle' e chia'.

²⁶ Lecz ca' goc ca tiemp che da' Noé, lecze ca' gac cate' ba zoa žin ža yida' da' yoble, neda' naca' ben' gwseļa' Diosen' golja' beňach.

²⁷ Bene' gwnita' ca tiemp che da' Noén' gosaše' gose' ej gosagüe' goso' elaze' bosošagne' e na' bosošague' na' no xi' in che' cate' bžin ža gwo' o Noén' lo' barcon'. Nach goc to yejwsio' juisjyw. Na' gosebiiayi' yogo' bene' ca' bi goso' o lo' barcon'.

²⁸ Lecz ca' goc ca tiemp che da' Lot, bene' Sodomian' gose'ej gosagüe' gosote' bi da' de chegaque', na' gosezi'e bi da' beseyažjde', na' gosaz gosa'ane', na' goson liže'.

²⁹ Perw na' žan' beza' Loten' Sodomian', Diosen' bene' cont byñj yi' na' azufre yaba na' gosebiiyi' yogo'lole'.

³⁰ Can' gac cate' yida' da' yoble, neda' naca' ben' gwseła' Diosen' golja' beñač, na' yogo'loł bene' yesele'ede' neda'.

³¹ 'Na' ža caten' yida' še chda to bene' do yichjo'o che liže', na' xšinłaze' žen' lo' yo'o che', bi yeyetje' cont yotoben', con yoxonje'. Na' lecze ca' bene' chda do yiže', bitw gacde' yeyej liže'.

³² Le šjayza'laže' can' goc che no'ol che Loten'.

³³ Note'tez bene' chazanlaže' cuine' saca'zie' o cont nono yesot le', bena' cuiayi'. Na' note'tez bene' chzanlaže' cuine' saca'zie' o gate' ne čhia' neda', ba de yela' mban che' toli tocaņe.

³⁴ Čhnia' le'e, quinga gac caten' yida' da' yoble. Čhope bene' zjadie' chesetase' toz cam. Toe' yeca'a Diosen' na' yetoe' yega'an.

³⁵ Na' čhop no'ole nite' txen chesote', toe' yeca'a Diosen' na' yetoe' yega'an.

³⁶ Na' čhope bene' nite' do yiže', toe' yeca'a Diosen' na' lecze yega'an yetoe'.

³⁷ Cate' gosende' diža' nga gose'e le':

—čGan' gac da' qui, Xanto'?

Nach Jesúsen' gože' legaque':

—Nga chonen che ben' že': "Gan' de be guat nan' chesežag šod ca'."

18

Jempl che to no'ol güezeb len to juez mal

¹ Na' be'len Jesúsen' legaque' to jempl bsd blo'ede' legaque' cheyała' nita'teze' yesončachlaže' yosoł güiže' Diosen'.

² Na' gože' legaque':

—Gwche' to ciuda ga gwzoa to juez na' juezen' bi gwdape' Diosen' bala'an na' neca gwche'yichje' še chesazlaže' beñačen' can' chonen'.

³ Na' ciudan' gwzoa to no'ol güezeb, na' goxje cheje' lao juezen' na' che'e le': "Ben yela' justis čhia' len bene' chgue'ede' neda'."

⁴ Ba goc sša bi chzenague' che', perw gwdechle bene' xbab, gwne': "Bitw čhapa' Diosen' bala'an na' neca čhi'yichja' še chesazlaže' beñačen' can' chonan'.

⁵ Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' čhia'."

⁶ Nach gož Xančhon' legaque':

—Le goñ xbab che dan' gwna juezen' ben' bi zej to liča.

⁷ Nacchxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' čhosol güiže' le' do ža do yel. čGwleze' sša cont yosle' legaque' lo na' bene' ca' čhesegue'ede' legaque'?

⁸ Čhnia' le'e, Diosen' bedao'nez yosle' legaque' lo na' bene' ca'. Perw cate' neda' yida' yežlio nga yeto, neda' naca' ben' gwseła' Diosen' golja' beñač, čne' nita'č bene' chesejniłaže' neda'?

Jempl che to bene' fariseo len to bene' güečhixjw

⁹ Gwnita' bał bene' gosacde' zjanaque' bene' güen lao Diosen' neče da' chesone'. Bene' ca' chesacde' bene' ca' yezica'čhle bibi zjazaque' len Diosen'. Na' Jesúsen' bi'e jempl nga da' bcuišen bene' ca', gwne':

¹⁰ —Čhope bene' ja'ac yodao' blao jaseł güiže' Diosen', toe' bene' fariseo na' yetoe' bene' güečhixjw.

¹¹ Bene' fariseon' gwzeze' boł güiže' Diosen' na' con chonxen cuine', gwne': "Dios, neda' chona' yela' choğclen čhio' bitw chona' cana' cheson yezica'čhle bene'. Bitw čhca'a bi da' de che bene' yoble, na' bitw chona' bichle da' mal. Bitw čhata'lena' no'ol bi nac no'ol čhia', na' neca naca' bene' mal can' nac bene' güečhixjw ni.

¹² Čhope ni'a to xman chona' gwbas, na' yogo'loł da' chona' gan, chbecan' ši cuen na' chnežjua' to cuen che yodao'."

¹³ Na' bene' güečhixjon' gwzeteze' zito'le, neca cheyaxjde' lis lagüe' yabale. Nach čhbaže' lčo'e gwne': "Dios, beyaše'laže' neda' naca' bene' güen da' xinj." Da'na'z da' gwna bene' güečhixjon'.

¹⁴ Na' čhnia' le'e, Diosen' bezi'xene' che bene' güečhixjon' na' beyej liže' bibi xtole' gota'. Perw bi goc ca' len bene' fariseon'. Le note'tez bene' chonxen cuine', Diosa' gone' cont si'e zto', na' note'tez bene' chxexjwlaže' lagüen', Diosen' gone' cont gacxene'.

Jasesane' bidao' lao Jesúsén'
(Mt. 19:13-15; Mr. 10:13-16)

¹⁵ Na' jasesane' bidao' lao Jesúsén' cont xoa ne'e yichjgache'. Na' cate' bene' ca' zjanaque' le' txen besele'ede' can' chesonen', gosedile' legaque'.

¹⁶ Perw na' Jesúsén' goxe' bene' ca' cont yeside' len bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ba bidao' quinga, legaque' chosozenague' che Diosen' cont chnabi'e yichjlažda'ogüe'.

¹⁷ Na' da' li žia' le'e, note'teze bene' bi yosozenague' che Diosen' ca cheson bidao' quinga cate' chosozenagbe' che xaxna'be', gwbat nabia' Diosen' yichjlažda'ogaque'.

To bene' gwni'a be'lene' Jesúsén' diža'
(Mt. 19:16-30; Mr. 10:17-31)

¹⁸ To bene' gwnabia' gože' Jesúsén':

—Maestrw, le' naco' bene' güen. žBi cheyała' gona' cont gata' yela' mban chia' toli tocanē?

¹⁹ Nach Jesúsén' gože'ne':

—žBixchen' zo' naca' bene' güen? Toz bene' güen zoa, na' len' Dios.

²⁰ Le' nezdo' da' none' mandadw goncho: "Bi gata'lenle' no'ol bi nac no'ol chele o bene' byo bene' bi nac bene' chele. Nono gotle. Bi cuanle. Bi güe'le diža' güenlaže' che bene' lježle. Le gap bala'añ xaxna'le."

²¹ Na' gož ben' le':

—Yogo'lol da' quinga gwzolagua' chonczan' cate' ne' nactia' bidao'.

²² Nach cate' bene' Jesúsén' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežin bene' yaše'. Yeyoža' šejnilažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' chio'.

²³ Perw na' bena' cate' beyož bende' diža' dan' gož Jesúsén' le', gocyša'chgüede', le bene' gwni'achgua goque'.

²⁴ Na' Jesúsén' gwn'e' bene' gwni'ana' na' gože'ne':

—Leca zdebe naquen to bene' gwni'a gwzenague' che Diosen' cont Diosen' nabi'e yichjlažda'ogüe'.

²⁵ Bedao'ch te to be xen be nzi' camello to lo' nag yeše' clev ca to bene' gwni'a gwzenague' che Diosen' cont Diosen' nabi'e yichjlažda'ogüe'.

²⁶ Na' bene' ca' bosozenague' xtiže'na' gose'ene':

—žNoxen' šjayzoa len Diosen' še ca'?

²⁷ Na' Jesúsén' gože' legaque':

—Da' bi gac gon beñachen', bitw nacho bi gac gon Diosen' len.

²⁸ Nach Pedroa' gože' le':

—Neto' ba gwlejjichjto' yogo' da' de cheto' cont nacto' le' txen.

²⁹ Na' gož Jesúsén' legaque':

—Da' li žia' le'e, note'teze bene' ba gwlejjichje' liže', xaxne'e, biše', xo'ole' o xi'ine' neche chzenague' che Diosen' cont Diosen' chnabi'e yichjlažda'ogüe',

³⁰ yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli tocanē.

Da' yoble gosyixjue' e Jesúsén' ba zoa gate'
(Mt. 20:17-19; Mr. 10:32-34)

³¹ Na' gwlejiže Jesúsén' bene' šižinw ca' gwleje' cont zjanaque' txen len le' na' gože' legaque':
—Na'a ba zejcho Jerusalénna' gan' gac yogo'lol dan' nyoj chia' dan' bosozoj da' bene' ca' gosoe' xtiža' Diosen' cani', neda' naca' bena' gwsela' Diosen' golja' benach.

³² Gaca' lo' na' bene' ca' bi zjanac bene' Israel, na' yesezi'diže' neda', na' yesene' yela' ya' chia', nach yosoži'e xene' cho'alagua'.

³³ Yesot yeseyine' neda' na' yesote' neda', perw yeyon' ža yebana' ladjo bene' guat ca'.

³⁴ Perw bene' ca' zjanaque' Jesúsén' txen bi gosejni'ide' dan' gože' legaque', le zjančhol yichjlažda'ogüen', da'nana' bi gosejni'iden'.

To bene' lchol bene' Jericó bele'ede'
(Mt. 20:29-34; Mr. 10:46-52)

³⁵ Nach cate' ba zoa yežin Jesúsén' Jericó, to bene' lchol chi'e chanezen' chnabe' yosonežjo bene' le' con gaca' da' chesezande'.

³⁶ Na' bende' chesede bene' zan gan' chi'ena', na' gwñabe' bin' chac.

³⁷ Na' gose'ene':

—Jesús bene' Nazaret chdie' laguo' nga.

- ³⁸ Na' bosya'adie' gwne':
—Jesús, xi'in diaža che da' rey David, beyaše'laže'sca neda'.
- ³⁹ Nach bene' ca' zjažialao lao Jesúsen' gosedile' bene' lcholen', gose'e le' cheyała' soe' šize, perw nachle bosya'adiache', gwne':
—Xi'in diaža che da' rey David, beyaše'laže'sca neda'.
- ⁴⁰ Jesúsen' gwleze', nach bene' mandadw šjasexi'e bene' lcholen' lagüe'na'. Na' cate' gwbiga' bene' lcholen' lao Jesúsen', nach gože'ne':
⁴¹ —¿Bi chaclažo' gonda' le'?
Na' bene' lcholen' gože'ne':
—Xana', benšca cont yele'eda'.
- ⁴² Jesúsen' gože'ne':
—Bele'e. Dan' chejnilažo' neda' bačh beyac yejlagon'.
- ⁴³ Na' la' bele'ete bene' lchola' na' gwda'ogüe' Jesúsen' benxene' Diosen'. Na' lecze ca' yogo' bene' ca' besele'ede' can' goquen' gosonxene' Diosen'.

19

Jesúsen' na' Zaqueo

- ¹ Nach Jesúsen' gwyo'e yež Jericó na' gwdeze' yešla'a ciudan'.
- ² Na' zoa to bene' le' Zaqueo. Naque' bene' gwnabia' che bene' güechixjw ca', na' naque' bene' gwñi'a.
- ³ Gwdiljwlaže' naclen' gone' le'ede' Jesúsen', perw bitw goc, le' gwnita' bene' zan len Jesúsen' na' Zaqueon' goque' to bene' bčhecw dao'.
- ⁴ Da'nan' gwza'sese' gwddie' lao bene' ca' cont gwyep'e to lo yag da' zoa gala'ze gan' te Jesúsen'.
- ⁵ Perw na' cate' bžin Jesúsen' xan yaguen', gwñe'e lo yaguen' na' gože'ne':
—Zaqueo, bedao'nez beyetj. Cheyała' yega'ana' ližo' na'aže'.
- ⁶ Nach Zaqueon' beyetjsese' chebede'. Nach beče'e Jesúsen' liže'na' na' benxene' le'.
- ⁷ Perw na' bene' ca' zjanžague' len Jesúsen' cate' besele'ede' can' goquen', yogüe' gosene' che Jesúsen' gosene':
—Ba zeje' zjazoe' to liž bene' güen da' xinj.
- ⁸ Nach Zaqueon' gwzeche' na' gože' Xanchon':
—Xana', gašje dan' de chia' gwnežjuan' bene' yaše'. Na' dan' ba gwca'a che bene', gwziya'a legaque' cont goseyixjwche' da' zčha'och ca dan' cheyała' yeseyixjue', yonežjwgaca'ne' tap ca'te'le.
- ⁹ Na' Jesúsen' gože'ne':
—Na'aža ba ben Diosen' yela' mban chio' toli' tocane len che bene' lo' yo'o' chio'. Na' da' li ba naco' xi'in diaža che da' Abraham lagüe dan' ba chejnilažo' Diosen' can' ben da' xoxxta'och Abraham.
- ¹⁰ Ca nac neda', gwseła' Diosen' neda' golja' benačh cont zedyediljua' note'tez bene' ba mbiayi', na' gwnežjua' legaque' yela' mban toli' tocane.

Jempl' che ši bene' bnežjw xangaque' legaque' mechw xen

- ¹¹ Na' šlac ne' zjanžag bene' chosozenague' diža' dan' choe' Jesúsen', be'lene' legaque' to jempl, le ba nite' gala'ze Jerusalénna' na' gosacde' la' solaate nabi'e nación Israelen'.
- ¹² Nach gwne':
—To bene' blao gwyeje' to yež zito' jene' dan' cheyała' gone' cont jaxi' lo ne'e nabi'e yež che', le gosebeje'ne' nabi'e yež chen' cate' yežine'.
- ¹³ Na' cate' za' se'e, gwleje' ši mos che' na' bnežjue' to toe' mechw xen. Nach gože' legaque':
“Mechw nga gonele negosyw šlac bi zoa”.
- ¹⁴ Perw bene' gualaž chen' besegue'ede' le', nach cate' beyož gwze'e, gosesele' bene' lao xane'na' ben' gwnabia'che' lao yogüe', jaseže'ne': “Bitw chaclaže'to' nabia' benga neto'.”
- ¹⁵ Perw la'czla' bi gosaclaže' bene' gualaž chen', bia'cze gwxi' lo ne'e nabi'e. Nach cate' bežin lažen' da' yoble, bene' mandadw šja'ac xmose' bene' ši ca' lagüe'na', bene' ca' bocua'anlene' xmechuen'. Goclaže' nezde' gaca' gosone' gan len mechw dan' bocua'anlene' to toe'.
- ¹⁶ Bene' nechw bžine' lagüen' na' gože'ne': “Xana', xmecho' dan' bocua'anleno' neda' benen gan ši ca'te'le ca dan' bocua'anon'.”
- ¹⁷ Nach xanen' gože'ne': “Ba beno' da' güen. Naco' mos güen. Beno' can' cheyała' gono' len da' daon' bocua'anlena' le', da'nan' gona' cont nabi'o ši ciuda.”
- ¹⁸ Na' bene' gwchopen' bžine' lao xanen' na' gože'ne': “Xana', xmecho' dan' bocua'anleno' neda' benen gan gayo' ca'te'le ca dan' bocua'anon'.”
- ¹⁹ Nach gože' le': “Le' nabi'o gayo' ciuda.”

²⁰ Nach bžin yetoe' lao xane'na' na' gože'ne': "Xana', nga de xmecho' dan' bocua'anleno' neda'. Ba blažechachan' bay nga.

²¹ Bžeba' le' dan' naco' to bene' znia. Chono' gan da' bi beno' žin na' chelapo' dan' gosaz bene' yoble."

²² Nach gož xanen' le': "Dan' ba gwnao' ca' chlo'en napo' doła'. Naco' mos mal. Chacdo' naca' to bene' znia, na' neždo' chona' gan da' bi bena' žin na' chelapa' dan' gosaz bene' yoble.

²³ Na' še neždo' chona' ca', žičhen' bi gwlejo' xmechuan' bene' yoble cont yezian' len yichjen na'a ba bela'a?"

²⁴ Nach gože' bene' ca' zjaze cuite'na': "Yeca'ale xmechuan' dan' bocua'anlena'ne' na' gwnežwlen ben' ba noxe' ši ca'te' ca' dan' bocua'anlena'ne'."

²⁵ Nach gose'e le': "Xanto', ba noxe'cze' ši ca'te' ca' dan' bocua'anleno'ne'."

²⁶ Nach gož bene' gwnabian' legaque': "Chnia' le'e, ben' chon güen len dan' chnežjua'ne', gwnežjua'ne' da' zcha'och, perw na' bena' bi chgone' žin dan' chnežjua'ne', yeca'a da' daon' noxe'na'."

²⁷ Na' ca' nac bene' ca' chesegue'ede' neda', bene' ca' bi chesaclačže' nabia'gaca'ne', le šjaxi'e na' gotlene' lagua' nga."

Gosonxene' Jesúsen' cate' beyo'e Jerusalén

(Mt. 21:1-11; Mr. 11:1-11; Jn. 12:12-19)

²⁸ Na' cate' beyož be' Jesúsen' jempl nga nach gwze'e zeje' ciuda Jerusalén.

²⁹ Na' cate' ba zoa yesežine' yež ca' da' zjanzi' Betfagé na' Betania do gan' zoa ya'a da' nzi' Ya'a Olivos, na' gwsele' chop bene' ca' mandadw ben' zjanaque' le' txen,

³⁰ gože' legaque':

—Le šja'ac yež dan' chi' gała'ze, na' cate' žinlen' na' yežezele to burr dao' da'ba' yag, be nono na' cuia. Le sežba' na' le che'ba' nga.

³¹ Še no nab bixchen' chsežleba', na' ye'ln'e': "Xanto' chyažjde'ba'."

³² Nach bene' ca' gwseła' Jesúsen' gosa'aque' na' besele'ede'ba' da'ba' gan' gož Jesúsen' legaque' ca'.

³³ Nach šlac cheseseže'ba', xamba' ca' gose'e legaque':

—žBixchen' chsežle burr daon'?

³⁴ Nach bene' ca' gwseła' Jesúsen' gose'e legaque':

—Xanton' chyažjde'ba'.

³⁵ Nach goseče'eba' lao Jesúsen' na' gosexoa xagaque' cože'ban' nach bosožie' Jesúsen'.

³⁶ Na' šlac zeje' ngüe'e nez bene' ca' zjanžag gosonxene'ne', na' gosexixjw no xagaque' lo nez cont blej burron' len.

³⁷ Nach ba zja'aque' gała'ze Jerusalénna' na' besežine' gan' yesyeyetje' Ya'a Olivos. Na' bene' ca' zja'aclene' le' gwzolao gosonxene' Diosen', zižje cheso'e diža' che yogo'lol yela' guac da' ba besele'ede' da' ben Jesúsen'.

³⁸ Nach gosene':

—jMbalaz rey chechon' ben' ba za' nga gwseła' Xancho Diosen' le' cont nabi'e! Cheyala' gonxencho Diosen' txen len bene' ca' nita' gan' zoe'na', le ba bene' cont benachen' gac yesyenite' binlo len le'.

³⁹ Na' len bene' zan ca' zja'aclene' Jesúsen' zja'ac bał bene' fariseo. Nach to chope' gose'e Jesúsen':

—Maestrw, ben mandadw len bene' ca' za'ac len le' txen cont yesenite' šize.

⁴⁰ Nach boži'i Jesúsen' xtiža'gaquen', gwne':

—Chnia' le'e, šaca' bene' quinga nite' šize, yej quinga yesosya'an yesonxenen neda'.

⁴¹ Cate' bžine' gała'ze Jerusalénna', gwne'e ciudan', na' bene' xbab che bene' lo' ciudan' na' gwchežyaše',

⁴² na' gwne':

—Šaca' la'ch na'aža šejni'ile nac gonle cont soale binlo len Diosen', perw na'a ne' ngašen'.

⁴³ Gwžin ža cate' bene' ca' chesegue'ede' le'e yesone' to yež de yej da' šečhen ciudan' cont nono gac yoxonj.

⁴⁴ Na' yesote' le'e len xi'inle ca'. Na' yosyočhinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

Jesúsen' bebeje' bene' ca' cheson ya'a yodao' blaon'

(Mt. 21:12-17; Mr. 11:15-19; Jn. 2:13-22)

⁴⁵ Jesúsen' gwyo'e chy'o yodao' blaona' na' gwzolağüe' bešaše' bene' ca' chesote' na' bene' chesa'o na'.

⁴⁶ Na' gože' legaque':

—Nyojcze Xtiža' Diosen' žan: "Ližan' naquen to latje gan' yesoł güiž bene' neda'", perw le'e ba benlen ca to latje ga že' bene' gwban.

⁴⁷ Na' bŕsed blo'ede' be'ne' ca' že' yodao' blaona' yogo' ža. Na' bŕxoz gwnabia' ca' na' be'ne' ca' chososed chosolo'e dan' bzoj da' Moisésen' na' nochle be'ne' blao che be'ne' Israel ca', goseyljwlaže' nacle yesone' yesote'ne'.

⁴⁸ Perw bi besyeželde' nacle yesone' le' neče yogo' be'ne' besyebechgüede' xtiže'na'.

20

Yela' gwnabia' che Jesúsen'

(Mt. 21:23-27; Mr. 11:27-33)

¹ To ža šlac chsd chlo'e Jesúsen' be'ne' ca' chyo'o yodao' blaona' na' chyixjue'ede' diža' güen che Diosen', besežin bŕxoz gwnabia' ca' na' len be'ne' gol ca' chesenabi'e nacióñna' na' be'ne' ca' chososed chosolo'e dan' bzoj da' Moisés.

² Na' gose'e le':

—Gwnašc neto' bi yela' gwnabia' napo' chono' da' qui, na' no be' yela' gwnabian' cont chonon'.

³ Na' boži'e xtiža'gaquen', gwne':

—Łecz de to da' nabda' le'e. Le našc neda'

⁴ ¿non' gwseła' da' Juanna' bzoe' be'ne' nis? ¿Dios nan' gwsele'ne', še be'načen'?

⁵ Na' legacze' gose' lježe':

—¿Bi nacho? Še ye'chone' Dios gwseła' le', na' ye'e chio': "¿Bixčen' ca' gweyje'le che?"

⁶ Na' bi gac ye'chone' be'nač gwseła' le', le yogo'te be'ne' že' nga chesejle'e Diosen' gwsele' da' Juanna' be'e xtiže'na', na' yosožie' chio' yej še ye'chone' ca'.

⁷ Na' gose'e Jesúsen':

—Bi nežeto' non' gwseła' da' Juan.

⁸ Nach Jesúsen' gože' legaque':

—Łecz ca' neda' bi yapa' le'e bi yela' gwnabian' chonłenda' da' ca'.

Jempl che mos mal ca'

(Mt. 21:33-44; Mr. 12:1-11)

⁹ Na' be'e jempl nga bzejni'ide' be'ne' ca' chosozenag che', gwne':

—To be'ne' gože' to cue' xen yag uvas na' bocua'anen' lo na' be'ne' ca' yesonen' žin na' gwze'e gweyje' zito' na' jasoe' šša.

¹⁰ Cate' bžin ža yosyotobe' cosešen', nach gwseła' to xmose' lao be'ne' ca' nac lo na'gaque' yag uvasen' cont yosyonežjue'ne' to tlaw coseš dan' yesyezi'en. Na' be'ne' ca' nac lo na'gaque' yag uvasen' goseyine' mosen' na' to ga'alze bosyose'ene' bibi gosone'.

¹¹ Nach xan yežlion' gwsele' yeto mosen', na' łecz gosot goseyine' le' na' gosonde' le' zgot, na' to ga'alze bosyose'ene' bibi gosone'.

¹² Na' xan yežlion' gwseła'che' gos gwyone, na' łecz gosotlate'ne' gosone'ne' güe', na' besyebeje'ne' gan' že' yag uvas ca'.

¹³ Na' xan yežlion' gwne': "¿Nacxe gona'?" Nach beyone' xbab gwne': "Seła' xi'ina' ben' chacchgüeda', le šeca güesezi'e xtiža' le'."

¹⁴ Perw be'ne' ca' nac lo na'gaque' yag uvasen' cate' besele'ede' xi'ine'na', gose' lježe': "Benga yega'anlene' yežlio nga cate' gat xe'. Le da gotchone' cont yega'anlenchon."

¹⁵ Nach besyebeje' le' gan' že' yag ca' na' gosote'ne'.

Nach Jesúsen' gwnabde' be'ne' ca' zjanžaguen':

—¿Nacxe gon xan yežlion' len be'ne' ca' bocua'anlene' yežlio čen'?

¹⁶ Šeje' šjetue' legaque' na' yodie' yežlion' lo na' be'ne' yoble.

Na' be'ne' ca' že'na' cate' gosende' diža' quinga dan' be' Jesúsen' gosone':

—¿Catec da' mal juisyw dan' goc!

¹⁷ Na' Jesúsen' gwna'chgüe' legaque' na' gwne':

—¿Bixe zejen da' nga nyojen le'e Xtiža' Diosen'? Žan:

Yej dan' bi gosaclaže' güen yo'o ca' yosočhine',

len ba naquen yej squin.

¹⁸ Na' ca' nac yejna', note'tez be'ne' lažo' lo yeja' na' cue'žože', na' note'tez be'ne' čiže' yeja' cate' lažon' na' gwšošen le'.

Ca nac dan' cheyla' gaxjw

(Mt. 21:45-46; 22:15-22; Mr. 12:12-17)

¹⁹ Na' be'ne' ca' chososed chosolo'e dan' bzoj da' Moisés na' bŕxoz gwnabia' ca' la' besyey-iljwlaže'te nacle yesone' yesezene' Jesúsen', le gosacbe'ede' Jesúsen' be'e jemplna' neče dan' bi chesejnilaže' le'. Perw bibi gosone', le besežebe' bi yeson be'ne' ca' že'na' be'ne' chesejle'e che Jesúsen'.

²⁰ Da'nan' gosesele' bene' yosogüia yesene'e Jesúsen' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab do laže'gague' chosozenague' che'.

²¹ Nach gose'e le':

—Maestrw, nezeto' diža' da' cho'o na' da' chsed chlo'edo' bene' zejen to liča. Nezeto' toz can' chono' len note'tez bene'. Na' nezeto' diža' li cho'o chsed chlo'edo' bene' can' chazlaže' Diosen' goncho.

²² Na' da'nan' zedenabeto' le' čnaquen binlo no chixjo da' cheyała' chixjwcho che ben' nac la'zelagüe bene' gwnabia' ben' chi' Roma, še bi?

²³ Na' goche'e Jesúsen' gague do lažen' chese'ene' ca', san chesaclaže' yesagüe' xya che xtižen'. Na' gože' legaue':

—čBixchen' chaclaže'le yoslažo'le neda' len xtižan'?

²⁴ Le gwlo'e neda' to mechw. čNo lao dan' da' le'e mechw nga? na' čno la' dan' nyoj le'en ni? Nach gose'ene':

—Če César ben' nac la'zelagüe bene' gwnabia' ben' chi' ciuda Roma.

²⁵ Nach gože' legaue':

—Le gwnežjo bene' gwnabian' da' nac che bene' gwnabia', na' le gwnežjo Dios dan' nac che Dios.

²⁶ Na' bi gosezaque'de' yososlažoe' le' len xtižen' lao bene' ca' že'na'. Na' besyebande' can' boži'e xtiža'gauen', na' bich bi gose'ene'.

Cate' yesyeban bene' guat ca'

(Mt. 22:23-33; Mr. 12:18-27)

²⁷ Na' lecze besežin bał bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', gose'ene':

²⁸ —Maestrw, da' Moisésen' bzoje' can' cheyała' goncho, gwne' še to bene' byo gate' na' chzeb no'ol chen' perw na' nono bi güezeb chga'añ, na' bene' biše' ben' ba gota' cheyała' yošagna'lene' no'ol güezeba' cont yesenita' xi'in diaža che da' bišen'.

²⁹ Na' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'.

³⁰ Na' bene' gwchopen' bošagna'lene' no'ol güezeba', na' lecze gote' nono xi'ine' gwnita'.

³¹ Na' bene' gwyona' lecze bošagna'lene' no'olen', na' lecz ca' goc len le'. Na' ca' goc gosedaš bene' gaža' bososagna'lene' no'ola', na' ne toe' ca' gosezoa xi'ine' len le'.

³² Gwde gosat yogo'loł bene' ca', nach got len no'ola'.

³³ Na' cate' yesyebane' ladjo bene' guat ca', čnox bene' ca' soalene' no'ola' ca' xo'ole'? le yogo' bene' gaža' bososagna'lene' le'.

³⁴ Na' Jesúsen' boži'e xtiža'gauen', gože' legaue':

—Bene' ca' nita' lo yežlio nga chosošagne'e na' lecze chosošague' na' no xi'ingaque'.

³⁵ Perw na' bene' ca' chaque Diosen' zjazaque' cont yosbane' legaue' ladjo bene' guat ca' cont šjasyenite' len le' toli tocañe, caten' yesyežine' gan' zoa Diosen' bich yosošagne'e neca yosonežjo xi'ine' no'ol yosošagne'e.

³⁶ Bich yesate', le yesaque' ca angl ben' že' yaba, na' yesaque' xi'in Dios lagüe dan' ba bosban Diosen' legaue' ladjo bene' guat ca'.

³⁷ Na' lecze da' Moisésen' bzoje' che dan' chesyeban bene' guat ca'. Bzoje' can' gož Diosen' le' caten' boł güiže'ne' to lo yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob.

³⁸ Na' bene' guat ca' bi chesonxene' Diosen', san bene' zjamban. Na' yogo' bene' ba gosejnilaže' Diosen', ne' zjambane' cont chesonxene' le'.

³⁹ Na' bał bene' chososed chosolo'ede' ley dan' bzoj da' Moisés gose'e Jesúsen':

—Maestrw, binlo boži'o xtiža'gauen'.

⁴⁰ Na' bich besyeyaxjde' bi yesenabde' le'.

Criston' naque' xi'in diaža che da' rey David

(Mt. 22:41-46; Mr. 12:35-37)

⁴¹ Jesúsen' gože' legaue':

—čNacxečen' chesena bene' Criston' ben' yedenabi'e naque' xi'in diaža che da' rey David?

⁴² Cuiñ Daviden' bzoje' Xtiža' Diosen' le'e libr da' nzi' Salmos, gwne':

Xancho Dios gože' Xanan':

“Gwche'edo' cuita' nga nabia'cho txen,

⁴³ na' gona' cont yogo' no chesegue'e le' yosozexjw yichje' yosozengue' chio'.”

⁴⁴ čNacxe gac načo Criston' naque' xi'in diaža che da' rey David? le cuiñ Davin' gože' le': “Xana”.

Xtola bene' ca' chososed chosolo'e dan' bzoj da' Moisésen'

(Mt. 23:1-36; Mr. 12:38-40; Lc. 11:37-54)

⁴⁵ Bene' zan zjanžag chosozenague' cate' gože' bene' ca' zjanaque' le' txen:

⁴⁶ —Le gwsaca' cont bi gonle can' cheson bene' ca' chososed chosolo'e ley dan' bzoj da' Moisés. Legaque' chesyebede' chesaše' zjanyaze' lache' ton. Na' chesyebede' chesonxen bene' legaque' cate' chesyěžague' lagüe ya'a. Chesyebede' chesebi'e gan' chesebe' bene' blao cate' chja'aque' yodao' na' cate' chac lñi.

⁴⁷ Na' chesyequ'e yo'o che no'ole güezeb ca'. Na' cate' chosol güize' Dios, sša cheso'e diža' cont yesaque' bene' leca chesonxene' Diosen'. Bene' can' chesacche' castigw clcl ca' yezica'chle bene' güen da' xinj.

21

To no'ole güezebe bnežjue' Diosen' xmechue'na'

(Mr. 12:41-44)

¹ Šlac zoa Jesúsen' chyo'o yodao', gwne'e na' ble'ede' bene' gwñ'a ca' gosego'o xmechw-gaquen' lo' cajen' gan' chesegüe'e mechw che yodaon'.

² Na' lecze ble'ede' to no'ol güezebe bene' yaše' gwlo'e chop centav dao' che'na'.

³ Nach Jesúsen' gwne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch clcl ca' yogo' bene' ca' yezica'chle.

⁴ Le yogo' legaque' chesegüe'e da' checho'onen lo yela' gwñ'a čhegaquen', perw no'ol nga, lo yela' yaše' yela' zi' che' gwlo'e yogo' da' de che', yogo' da' chacbande'.

Gwžin ža yosyočhinje' yodao' blaona'

(Mt. 24:1-2; Mr. 13:1-2)

⁵ Na' bal' bene' ca' chesejnilaže' che dan' chsed chlo'e Jesúsen' goso'e diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo bene'. Nach Jesúsen' gwne':

⁶ —Ca nac da' quinga chle'ele ngan', žin ža cate' ne to yej dan' zjancua' nga ca yega'an zjancua' cože' lježen. Yogon' yosyočhinje'.

Dan' gac cate' ba za' bagwze yeyož yežlion'

(Mt. 24:3-28; Mr. 13:3-23)

⁷ Na' gosenabde' Jesúsen' gose'ene':

—Maestrw, ždo bat gac dan' žo' nga? na' žnac gac nezeto' cate' ba zoa gac yogo' da' ca'?

⁸ Na' gwne':

—Le gwsaca' cont nono siye' le'e. Le bene' zan yesaš yežlio nga bene' yesaclaže' yosola'ne' xlatja' nga, yesene': "Nedan' Criston' ben' gwlej Diosen' cont nabi'a", na': "Ba za' gac juisyw." Perw le'e bitw gwzenagle xtiža'gaquen'.

⁹ Na' cate' yenele chac gwđile nile na'le o yenele chi' žaš contr bene' ca' chesenabia', bi žeble, le zgua'tec da' quinga cheya'la' gac. Perw gague lenna' nacho na'tec na'a yeyož yežlion'.

¹⁰ Nach gože' legaque':

—Na' yesedile to yež len yeto yež yoble na' to nación len yeto nación yoble,

¹¹ Na' zan cuen ga xo'chgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e bene' le'e yaban' da' zaca' yesyebande', na' yesežebchgua benachen' neče dan' chac.

¹² Perw za' gac yogo' da' quinga cate' yesezene' le'e na' yosoči yososaque' le'e na' yesone' le'e lo na' bene' gwnabia' che yodao' chelen', na' yeseyixjue' le'e ližya. Na' yeseče'xo'xe' le'e do lao rey na' do lao nochle bene' gwnabia' dan' chejnilaže'le neda'.

¹³ Na' cate' gac da' quinga güe'le xtiža'na'.

¹⁴ Na' le gon xbab zoacza' chaclena' le'e, nach cate' gacle lo na' bene' ca' bi cuec yichjle nacle yoži'ile xtiža'gaquen',

¹⁵ Le neda' gona' le'e xbab len yela' sina' čhian' cont yoži'ile xtiža'gaque' sin cbi bi gac yesene'.

¹⁶ Na' bal'e xaxna'le na' bene' biše'le na' biše' lježle na' bene' migw čhele yesechje' yesone' le'e lo na' bene' chesegüe'e le'e. Na' yesote' bal'e.

¹⁷ Na' yogo'ze bene' yesegue'ede' le'e dan' chejnilaže'le neda'.

¹⁸ Perw chape Diosen' le'e na' bitw güe'e latje cuiayi'le,

¹⁹ na' goņe' yela' mban čhele toli tocane še soale gwyo gwchejle yogo'lol dan' yesonde' le'e.

²⁰ Na' cate' le'ele ba besela'ac soldadw zan cue'ej cuit Jerusalenna' ben' yesedillen le'e, canan' nezele ba zoa cuiayi' ciudad'.

²¹ Cana' beñe' yesenita' Jerusalén cheyała' yosoxonje'. Na' beñe' že' yezica'chle yež ga mbane Judea cheyala' šja'aque' do ya'adao'. Na' beñe' yesenita' yixe', bi cheyała' yesone' xbab yesyeyo'e lo' ciuda.

²² Cana' gwnežjo Diosen' castigw che xtoła' beñe' ca' že' Judean', cont gac can' nyojen le'e Xtiža' Diosen'.

²³ iNyaše' zjanac no'ol ca' zjanao' xi'in na' no'ol ca' ñe' chosoguaže' bidao' lo' za ca'! Leca yesesaca'zi' beñe' ca' že' doxen Judean', le Diosen' za'achgüe' legaque'.

²⁴ Soldadw ca' yesote' bałe' lo' gwdile na' yebale' yesече'xoxje' nación ca' dan' zjachi' doxen yežlion'. Na' beñe' ca' bi zjanaque' beñe' Israel yosyochinje' yo'o ca' dan' že' Jerusalénna' na' yosolej yosošožen'. Perw ba bžia' Diosen' bia' žin za cate' beñe' ca' bi zjanaque' beñe' Israel bich yesenabi'e nación Israel.

Yid Jesucriston' da'yoble

(Mt. 24:29-35, 42-44; Mr. 13:24-37)

²⁵ 'Ca' nac gwbiž, bio' na' beljw ca', gac da' yebanecho len legaquen. Na' beñe' že' yežlion' yesaque' tole na' yesaczejlaže' catec sšag gon nisdaon' chas chata' gaquen.

²⁶ Na' beñe' že' yežlio nga yesatte' šlat yesে'ebchgüe' dan' gaquen, le yogo' da' chle'echo le'e yaban' yesaquen ca' chac yežlion' cate' chxo'.

²⁷ Na' cana'ch beñe' že' yežlion' yesele'ede' neda' naca' ben' gwsela' Dios golja beñach, za'a to lo' bejw len yela' guac xen na' yela' beñe' zaca' juisyw chia'.

²⁸ Na' cate' solao gac da' quinga, le gonchach laže'le na' le yebe. Ba zoa žin za yida' da' yoble yebeja' le'e lo' da' malen'.

²⁹ Na' Jesúsen' be'lene' legaque' to jempl, na' gože' legaque':

—Le na'šc can' chon yag yixgüigw na' bite'teze yag yoble,

³⁰ cate' chle'ele ba chebian laga' che'en dao' nach nezele bačh zoa yela' tiemp ba.

³¹ Ca'czen' cate' le'ele ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

³² 'Da' li žia' le'e, bina' yenit diaža' che le'e nita'le na'a cate' yeyož gac yogo'lo' da' ca'.

³³ Le'e yaba na' yežlion' yesede chen, perw ca' nac xtižan', gague da' te cbi gac can' žanna'.

³⁴ Na' le gon xbab cont bi gacle beñe' lia na' beñe' borrašw na' cont bi soale yela' yežejele. Beñe' ca' yesac beñe' lia na' borrašw na' beñe' ca' yesyela' yesyežejde' bi yesebeze' batcan' gac yogo' da' quinga.

³⁵ Na' toz can' gac che beñe' že' doxen yežlion', yesac yogo' da' quinga cate' nono chon xbab.

³⁶ Perw yogo' ža le soa le cuez batcan' gac da' quinga na' le yo' güiž Diosen' cont bibi gac chele na' gac yedyesoale len neda' naca' ben' gwsela' Diosen' golja' beñach.

³⁷ Yogo' ža gwzoa Jesúsen' bsd blo'ede' beñe' yodao' blao, na' yogo' že' beyeje' lo' ya'a da' nzi' Ya'a Olivos.

³⁸ Na' yogo' zil besežin beñe' zan bosozenague' che' šlac bsd blo'ede' legaque' chy'o yodao' blao.

22

Bosoxi'e cont yesezene' Jesúsen'

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Na' ba zoa gala' lni pascw caten' chesagüe' yetextil da' bibi levadura yo'on.

² Na' bxož gwnabia' ca' na' beñe' ca' chososed chosolo'e ley dan' bzoj da' Moisésen' besejiljue' nacle yesone' na' bi da' yosode'ede' cont yesezene' Jesúsen' na' yesote'ne', le besežebe' še cate' bi yesone yezica'chle beñe' legaque'.

³ Nach Satanásen' dan' chnabia' da' xigüe' ca' gwy'o'o gwyazen lo' yichjlaždao' Judas Iscarioten' ben' goque' txen len beñe' šižinw ca' zjanaque' Jesúsen' txen,

⁴ na' gwyeje' jane'e bxož gwnabia' ca' na' beñe' gwnabia' che beñe' ca' chesape' yodao' na' cont bosoxi'e nacle gone' gwdie' Jesúsen' lo' na'gaque'.

⁵ Na' leca besyebede' na' gose'e le' yosonežjue'ne' mechw.

⁶ Na' Judasen' gwxenlaže' len legaque', na' gwzolažgüe' gwdiłjwlaže' nacle gone' gwdie' Jesúsen' lo' na'gaquen' cate' bi že' beñe' zan.

Jesúsen' blo'ede' legaque' can' cheyała' yesone' šjasyeža'laže' dan' gaten'

(Mt. 26:17-29; Mr. 14:12-25; Jn. 13:21-30; I Co. 11:23-26)

⁷ Na' bžin ža gala' lni caten' chesagüe' yetextil dan' bibi levadura yo'o. Naquen ža cate' chesote' xila' dao' cont šjasyeža'laže' can' bosla Diosen' da' xoxxta'ogaquen' lo' na' beñe' Egipito ca'.

⁸ Na' Jesúsen' gwleje' Pedroa' len Juanna' na' gože' legaque':

—Le šja'ac na' le šjasini'a dan' gagwcho lo' lnin'.

⁹ Na' gose'ene':

—¿Ga che'ndo' šjasiñi'ato'?

¹⁰ Nach gože' legaque':

—Le šja'ac na' cate' ba gwyo'ole ciudan' na' yežagle to beñe' byo no'e to che'e nis. Na' šejlen'ne' na' gan' yežinen'

¹¹ Le ye' xan yo'on': "Maestron' že': Gonšco' to yo'o ga gagua' xše' že' lñi nga len beñe' ca' zjanaque' neda' txen."

¹² Nach gwlo'ede' le'e to quart xen dan' zoa yichjen na'ale gan' de yogo' da' chyažjecho. Na' le gwsini'a cont gagwcho na'.

¹³ Na' gosa'aque' na' yogo' can' gož Jesúsen' legaque' goc. Nach bososini'e xše' že' lñina'.

¹⁴ Na' cate' bač gwchi'e cho'a mesen' len postlw che' ca',

¹⁵ na' gože' legaque':

—Leca gwzelaža' gagua' yela' guagw che lñi nga len le'e na'a za' saca'zi'a na' gata'.

¹⁶ Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

¹⁷ Na' gwxi'e vas gan' yože nis uvasen', na' beyož be'e yela' choxclen che Dios, nach gwne':

—Le sin', na' le ye'ej yogo'le late' güeje dan' yože lo' vas nga.

¹⁸ Chnia' le'e na'a zelao che'aja' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

¹⁹ Nach gwxi'e yetextilen' na' be'e yela' choxclen che Diosen' na' bzoxjen' na' bnežjuen' legaque'. Na' gože' legaque':

—Da' nga cuerp chia' chzanlaža' neche le'e. Quinga gonle cont šjazy'e'ele bi zejen len le'e dan' yesote' neda'.

²⁰ Na' lecze bexae' vasen' cate' ba beyož gosagüe' xšen' na' gože' legaque':

—Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gwlał xchenan' neche le'e.

²¹ Na' da' li ben' gwdie' neda' lo na' beñe' ca' chesegue'e neda' nga chagwlene' neda' txen.

²² Na' gac chia' can' nžia' bia' gac, neda' naca' bena' gwseła' Diosen' golja' beñach, perw nyaše'chguaze nac ben' gwdie' neda' lo na' beñe' ca'.

²³ Nach gosezolagüe' gosenabe lježgaque' noen' gon da' malen' nac ca'.

Gosacyože' noe' nacch blao

²⁴ Na' lecze gosezolagüe' gosacyože' noe' nacch blao.

²⁵ Na' Jesúsen' gože' legaque':

—Nita' beñe' gwnabia' che to to nación ca' na' chesone' byen chosozenag beñe' chegaque', na' beñe' gwnabia' ca' chesacłaze' yesoe' beñe' diža' chegaque' zjanaque' beñe' güenchgua.

²⁶ Perw le'e gague can' cheyala' gonle. Še no le'e nacchle beñe' blao, cheyala' gwzejwlaže'le len beñe' lježle na' gonle ca' beñe' xcuide' ben' bibi na' neze. Na' še no le'e chnabia'le, cheyala' soale gaclen lježle.

²⁷ Le gon xbab noe' nacch beñe' blao, še bena' chi' cho'a mesen' o še xmosen' ben' chon mandaw che'. Nacbia'cze ben' chi' cho'a mesen' naccze' beñe' blaoch. Perw neda', zoa' cont gaclena' le'e la'cze naca' Xanle.

²⁸ Le'e biña' cuejyichje neda' la'czla' beñe' zan ba chesegue'ede' neda'.

²⁹ Na' ca' nac Xan' ba none' chia' cont nabi'a txen len le', lecze neda' ba nona' chele cont nabi'a'le txen len neda'.

³⁰ Na' gona' cont ye'ej gagwle txen len neda' cate' yela'le gan' nabi'a, na' cue'le cuita'na' nabi'a'le šižiñw cuen beñe' ca' zjanaque' xi'ñ diaža che da' Israel.

Jesúsen' gwne' Pedroa' bi chebe' še nombi'e le'

(Mt. 26:31-35; Mr. 14:27-31; Jn. 13:36-38)

³¹ Nach Jesúsen' gwne':

—Simón, ben xbab čhio', Satanásen' dan' chnabia' da' xigüe' ca' ba gwñaben gaco' lo ne'en cont gonen cuejyichjo' bich šejnilažo' neda'. Na' dan' gonen len le' naquen ca' dan' chon beñe' caten' chdie' trigon' lo' rner.

³² Perw na' neda' ba gwñaba' gaclen Diosen' le' cont bi cuejyichjo' dan' chejnilažo' neda'. Na' cate' ba betiñdo' xtolo'na', gono' chach laže' beñe' lježo' quinga.

³³ Nach Pedroa' gože'ne':

—Ba bechoglaža' sa'alena' le', gague ližya na'ze, san gatlenca' le'.

³⁴ Na' Jesúsen' gože'ne':

—Pedro, žia' le', biña' cuež jean' na'aže' cate' gac šon' n'i'a bi chchebo' še nombi'o neda'.

Gwne' ba zoa yosoči yososaca' beñe' legaque'

³⁵ Na' gože' beñe' ca' zjanaque' le' txen:

—¿Byažjele bi da' byažjele cate' gwseła' le'e jatixjue'ele xtiža'na'? Gwseła' le'e sin cbi bia'le mechw, ne bzod, na' neca bia'le xelle.

Na' gose'ene':

—Bitw bi byažjeto'.

³⁶ Na' gože' legaque':

—Perw na'a še nagle mechw, cheyala' gua'len, na' lecze ca' gua'le bzod. Na' še bitw bi spada chele de, le gote' xadon chelen' cont si'le to spada.

³⁷ Chnia' le'e gonle ca', le gac chia' can' nyojzen le'e Xtiža' Diosen' žan: "Gosone'ne' ca beņe' güen da' xinj." Na' cheyala' gac yogo'lol dan' nyojen.

³⁸ Nach gose'ene':

—Xanto', gwna'sc nga noa'to' chope spada.

Na' gože' legaque':

—Güesaqueczen.

Jesúsen' chol güiže' Diosen' latje gan' nzi' Getsemani'

(Mt. 26:36-46; Mr. 14:32-42)

³⁹ Nach gwze'e gwyje' Ya'a Olivos can' ba yolagüe' chone', na' beņe' ca' zjanaque' le' txen zjana'ogüe' le'.

⁴⁰ Nach cate' besyežine' latjen' na' gože' legaque':

—Le yol güiž Dios cont bi gon gwxyien' le'e gan.

⁴¹ Na' gwle'e len legaque' zito' ca' gan' zelao žin to yej da' gwzala'cho, na' bzoa xibe' na' bol güiže' Dios,

⁴² gwne':

—Xa', benšca cont bi saca'zi'a na' bi yesote'nda' še ca' chazlažo', perw bi chnaba' gac da' žia' neda', san gac can' nao' le'.

⁴³ Na' to angl beņe' za' yaba blo'elagüe' le' na' be'e le' fuerz valor.

⁴⁴ Na' šlac chžaglaochgüe' len yichjlažda'ogüe'na' gwzolao chžaglaоче' chol güiže' Diosen' beyačoljte' yes. Na' nis yes che'na' beyaquen ca' tlabā' güeje chen dan' zjanaquēn chełson, besyeyinjten lo yo.

⁴⁵ Na' bezeche', na' beyeje' gan' nita' beņe' ca' zjanaque' le' txen, ble'ede' zjanite' chesetase' dan' leca gosacyaše'chgüede'.

⁴⁶ Na' gože' legaque':

—¿Bixchen' chtasle? Le chas, le yol güiž Dios cont bi gon gwxyien' le'e gan.

Gosezene' Jesúsen'

(Mt. 26:47-56; Mr. 14:43-50; Jn. 18:2-11)

⁴⁷ Ne' choe'te Jesúsen' diža' cate' besežin beņe' zan gala'ze gan' zoen'. Na' ben' le' Judas, ben' goque' txen len beņe' šižiņw ca' gwlej Jesúsen' cont zjanaque' le' txen, žialagüe' laogaque'. Na' gwbigue' gan' zoa Jesúsen' na' bnopē' xague', perw gague do lažen' bene' ca'.

⁴⁸ Na' Jesúsen' gože' le':

—Judas, čchnopo' neda' cont gwdio'nda' lo na' beņe' quinga? neda' naca' bēna' gwseła' Diosen' golja' benačh.

⁴⁹ Na' cate' beņe' ca' zjanaque' Jesúsen' txen besele'ede' can' gac che'na' nach gose'ene':

—Xanto', čgwyinto' beņe' quinga spada čheton'?

⁵⁰ Na' toe' gwdinen' mos che bžoz blaon', gwchogtechgüe' nague' licha.

⁵¹ Perw Jesúsen' gože'ne':

—Bich gonle ca'.

Nach gwdane' nag mosen' na' beyone' le'.

⁵² Jesúsen' gože' bžoz gwnabia' ca' na' beņe' ca' chesenabi'e beņe' ca' chesape' yodao', na' beņe' gole blao ca' chesenabia' nación Israelen' ben' zja'ac zjasexi'e le', gože'ne':

—¿Bixchen' nonle neda' ca to beņe' gwban za'acle zedexi'le neda' len spada na' len yag'?

⁵³ Yogo' žaze gwzao' len le'e chyo'o yodao' blaon' na' bitw gwzenle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásen' dan' chnabia' beņe' ca' chesaš lo cholēn'.

Pedroa' bi gwčhebe' še nombi'e Jesúsen'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Nach gosoxe' Jesúsen' na' goseče'ene' liž ben' naque' bžoz blao che nación Israelen'. Nach Pedroa' na'ogüe' Jesúsen' zito' zito'le.

⁵⁵ Na' bosoxene' yi' chyo'o che bžoz blaona' na' gosebi'e cho'a yi'na'. Na' gwche' Pedroa' len legaque'.

⁵⁶ Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len bengā naque' txen len Jesúsen'.

- ⁵⁷ Perw Pedroa' bitw gwçhebe' še nombi'e Jesúsen'. Gože'ne':
—No'ole, bitw nombi'ane'.
⁵⁸ Na' gocze šlož, yeto bene' ble'ede' Pedroa' gože'ne':
—Lenczo' naco' txen len bene' ca'.
Na' Pedroa' gože'ne':
—Bitw lena' len legaque'.
⁵⁹ Gwde to hor yetoe' gwne':
—Da' licze nac benga txen len Jesúsen', le naque' bene' Galilea.
⁶⁰ Na' Pedroa' gože'ne':
—Bene', bi ne zda' bi dižan' cho'o.
Na' ne' choe'te Pedroa' dižan' ca', gwchež to jea.
⁶¹ Na' Xancho Jesúsen' gwyechje' gwne'e Pedroa' na' jayze'e Pedroa' diža' dan' gož Xancho'n' le' caten' gwne': "Bina' cuež jean' na'aže' cate' gac šone ni'a bi chebo' še nombi'o neda'."

⁶² Na' Pedroa' beze'e leca gwchežyaše'.

Gosezi'diže' Jesúsen'

(Mt. 26:67-68; Mr. 14:65)

⁶³ Na' bene' ca' goseche'e Jesúsen' gosezi'diže' le', na' gosot goseyine' le'.

⁶⁴ Na' bosocheje' to lache' lao Jesúsen' na' goseyine' le' na' gose'ene':

—Gwneya'ašč non' chyin le'.

⁶⁵ Na' zanch diža' da' gosene' gosezi'diže' Jesúsen'.

Goseche'e Jesúsen' lao bene' ca' chesenabia' nación Israelen'

(Mt. 26:59-66; Mr. 14:55-64; Jn. 18:19-24)

⁶⁶ Na' cate' gwyeni', bene' gole blao ca' chesenabia' nación Israelen' na' bçoz gwnabia' ca' na' bene' ca' chososed chosolo'e ley dan' bzoj da' Moisés besežague' na' gosone' mandadw gwyej Jesúsen' laogaque' gan' chesenabi'ena', nach gose'ene':

⁶⁷ —Gwnašč neto' še le' naco' ben' gwlej Diosen' cont nabi'o nación chechon'.

Nach gože' legaque':

—Šaca' nia' le'e neda' naca' Criston' ben' gwlej Diosen' cont nabia' nación chechon', bitw šejle'le' chia'.

⁶⁸ Na' šaca' bi nabda' le'e, neca yoži'ile xtižan', neca gwsanlenda.

⁶⁹ Neda' naca' ben' gwseļa' Diosen' golja' beñačh. Na' na'a cui'a cuit Diosen' nabi'a txen len le', Dios ben' chnabia' doxen.

⁷⁰ Nach yogüe' yose'ene':

—¿Len' naco' dogualje Xi'in Diosen'?

Na' gože' legaque':

—Le can' žale nan' naca'.

⁷¹ Na' gosene':

—iNoch no chyažje no gagw xya če'! Chio' ba benecho na'a chne' che Diosen' dan' že' ca'.

23

Bosocuiše' Jesúsen' lao Pilaton'

(Mt. 27:1-2, 11-14; Mr. 15:1-5; Jn. 18:28-38)

¹ Na' yogo'lol bene' ca' gosežože'e na' goseche'ene' lao Pilaton' ben' nac gobernador.

² Na' gwzolaos bosocuiše' Jesúsen' gosene':

—Ba gwçhoglaoto' che benga cheyala' gate' dan' chde' chgo'oyele' nación Israelen' cont yesejle'e che' na' lecze chžone' chixjwto' da' cheyala' chixjwto' lao rey César. Na' lecze že' len' naque' Criston' ben' gwlej Diosen' cont nabi'e nación cheton'.

³ Nach Pilaton' gwnabde'ne' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

⁴ Nach Pilaton' gože' bçoz ca' len yogo'lol bene' ca' zjanžag lagüe'na':

—Bibi nla'lagüe' še bi doļa' nap benga.

⁵ Perw na' goseneche', gosene':

—Chde' chgo'oyele' yogo' bene' že' distritw Judea nga yesejle'e dan' chsed chlo'ede'. Gwzolaogüe' bsd blo'ede' distritw Galilean' perw lencze nga bačh chsed chlo'ede' na'a.

Pilaton' gwseļe' Jesúsen' lao Herodes

⁶ Cate' bene Pilaton' can gosene', nach gwñabe' še Jesúsen' naque' bene' Galilea.

⁷ Na' cate' gocbe'ede' Jesúsen' ze'e Galilean' gan' chnabia' gobernador Herodes, na' gwsele'ne' lao Herodes, le ca hora' zoa Herodes Jerusalénna'.

⁸ Cate' Herodes ble'ede' le' bebede', le ba goc sša che'nde' le'ede' le'. Ba bende' xtiža' Jesúsen' na' zoe' lez le'ede' gone' to da' zaca' yebande'.

⁹ Nach da' zan da' gwñabde' Jesúsen', perw ne to xtižen' ca boži'i' Jesúsen'.

¹⁰ Bxoz gwnabia' ca' na' beñe' ca' chososed chosolo'e ley dan' bzoj da' Moisés gosezeche' gała'ze na' bosocuiše'ne' len zan diža'.

¹¹ Na' Herodes len zan soldadw che' ca' gosezolaogüe' gosezi'diže'ne' na' gosonle' che'. Nach cate' beyož bosoguacue'ne' to lache' xdan juisyw, gosesele'ne' da' yoble lao Pilaton'.

¹² Na' žana' Pilaton' len Herodes gwzolaogosaque' migw, la'czla' cate' za' gac ca' besegue'e lježe'.

Gosechoglagüen' gat Jesúsen'

(Mt. 27:15-26; Mr. 15:6-15; Jn. 18:39-19:16)

¹³ Nach Pilaton' botobe' bxoz gwnabia' ca' na' beñe' ca' chesenabia' nación Israelen' len yezan beñe' yež, gan' chesone' yela' justisen'.

¹⁴ Nach gože' legaque':

—Le'e bedesanle' benga lagua' nga, na' gwnale chde' chgo'oyele' beñe' Israelen' yesone' contr gobiernna'. Neda' bačh gwñabyožda'ne' lao le'e ca xyan' dan' chagwle che', ne to da' xinj ca chželda' še bi dan' none'.

¹⁵ Na' lecz ca' Herodes bitw bi xtole' bželde', na' besele' le' laoto' nga. Na' nacia' bibi ben benga da' cheyała' gate'.

¹⁶ Na' na'a con gona' mandadw yeseyine' le' na' gwsana'ne'.

¹⁷ Gwne' ca', le yogüiz chsane' to beñe' pres lo lni pascw chegaque'.

¹⁸ Na' yogo' beñe' ca' že' bososye'e toz ca gosene':

—Chojtega benga gate' na' gwsano' Barrabásen'.

¹⁹ Na' Barrabásen' goseyixjue'ne' ližya da' bxie' gwdiłe lo' ciudan' na' goque' to beñe' güet beñe'.

²⁰ Na' da' yoble Pilaton' gwñabde' legaque' še gwsane' Jesúsen',

²¹ perw bososye'e zižjeh gosene':

—jBde'e le'e yag cruz! jBde'e le'e yag cruz!

²² Da' gwyon ni'a gož Pilaton' legaque':

—žBixe da' xinj nonen'? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

²³ Perw gosone' byen bososye'e yelate' zižjeh gosenabe' gwde'ene' le'e yag cruz. Nach Pilaton' bzenague' chegaquen'

²⁴ na' gwchoglagüe' che' gac can' gosenabde' le'.

²⁵ Nach bsane' Barrabás ben' zjanyixjue' ližyan', ben' gosenabe' gwsane', la'czla' Barrabásna' goque' ben' bxie' gwdiłe na' beñe' güet beñe'. Na' Pilaton' bodie' Jesúsen' lo na'gague' cont yesone' len le' ca chesacłaže'.

Bosode'e Jesúsen' le'e yag cruz

(Mt. 27:32-44; Mr. 15:21-32; Jn. 19:17-27)

²⁶ Na' šlac zjanče'ene' gan' yesote'ne' besyežague' to beñe' yež Cirene le' Simón, za' zeze'e yixe'. Na' bosogüe'ene' yag cruz che Jesúsen' na' gwyeye' gwda'ogüe' Jesúsen'.

²⁷ Na' beñe' zan zjana'ogüe' le' na' zjalen zan no'ole. Na' no'ol ca' gwzolaogosaque' bososye'e gosebeže' che'.

²⁸ Na' Jesúsen' gwyechje' na' gože' legaque':

—No'ole Jerusalén, bitw cuežle chia'. Yejni'a le' cuež chele na' che xi'inle.

²⁹ Da' li gwžin ža cate' yesene': "Mbalaz nita' no'ole güiž no'ole cono gwxxan na' nono bguaže'."

³⁰ Cana' yesenablaže' yesebiže ya'a ca' cont čnenen legaque'. Yesenablaže' che' bdiñj goten legaque'.

³¹ Še yesot beñe' neda' len bibi xtoła' de, jnacchxe yesonde' le'e nacle beñe' güen da' xinj!

³² Na' lecze goseche'e čhop beñe' güen da' xinj cont bosode'e legaque' le'e yag cruz can' gosone' len Jesúsen'.

³³ Na' cate' besežine' latje gan' nzi' Latje che Žit Yichj Bene' Guat, bosode'e Jesúsen' le'e yag cruzen'. Na' lecze bosode'e beñe' mal ca' čhop le'e yag cruzen' len le', toe' gwda' cuít Jesúsen' liča, na' yetoe' gwda' cuíten' robes.

³⁴ Na' Jesúsen' gwne':

—Ža', bezi'xen che beñe' quinga chesegue'ede' neda'. Gague zjanežde' bin' chesone'.

Na' gosone' rifa cate' besyele'e xałane' cont gota'bia' noe' yechelen.

³⁵ Na' beñe' zan besyežejde' le'. Na' beñe' gwnabia' chegaque' ca' gosonle' che', gosene':

—Yezica'chle bene' bosle'. Še da' li naque' Criston' ben' gwlej Diosen' yedenabi'e, ¿bixchen' bi chosla cuine'?

³⁶ Nach soldadw ca' lecz ca' gosonle' che'. Gosebigue' gala'ze gan' zoa yag cruzen' na' bosonežjue'ne' vino zichj.

³⁷ Nach gosene':

—Še len' naco' rey che bene' Israel, bosla cuino'.

³⁸ Na' yichj yag cruz che'na' gwzoa to dan' nyojen, žan: “Bengan' rey che bene' Israel.” Na' byojen diža' griego, diža' latín na' diža' hebreo.

³⁹ Na' to bene' mal ben' da' le'e yag cruz cuit Jesúsen' lecze gwzi'diže'ne', gože'ne':

—Še le' naco' ben' gwlej Diosen' cont yedenabi'o nación chechon', bosla cuino' na' lecze bosla neto'.

⁴⁰ Na' ben' yeto gwdile' bene' lježen' gože'ne':

—¿Bi chžebo' Diosen'? Chio' ba da'cho le'e yag cruz cont gatcho can' da' le',

⁴¹ na' dan' gat chio' naquen licha cont si'cho castigw che xtoła'chon'. Perw benga, bitw bi dola' nape'.

⁴² Nach gože' Jesúsen':

—Jesús, šjayza'laže'go' neda' cate' žin ža nabi'o.

⁴³ Na' gož Jesúsen' le':

—Da' li chnia' le', na'aža soaczo' len neda' gan' zoa Diosen'.

Can' goc caten' got Jesúsen'

(Mt. 27:45-56; Mr. 15:33-41; Jn. 19:28-30)

⁴⁴ Na' cate' bžin guagwbiž goc choł doxen lo yežlion' bžinte do cheda šone.

⁴⁵ Bitw bseni' gwbižen'. Na' ca nac lache' dan' ze lo' yodao' blaona', bcheza' gachołen.

⁴⁶ Nach Jesúsen' bosye'e zizje gwne':

—Xa', chon cuina' lo nao', bezi' spiritw chia'na'.

Na' beyož gwne' ca' gote'.

⁴⁷ Na' cate' ble'e xan soldadon' can' goquen', benxene' Diosen' na' gwne':

—Da' licze benga goque' bene' gwey to licha.

⁴⁸ Na' bene' zan bene' besežag besele'ede' can' goc na' yogo'lole' besyeya'aque' chesebaže' lcho'e gosacde' da' juisyw ba goc.

⁴⁹ Na' yogo' bene' ca' zjanombia' Jesúsen', na' len no'ol ca' zjanao' le' caten' beze'e Galilean', gosezeche' zito'le besele'ede' da' ca' goquen'.

Bosocuaše' Jesúsen'

(Mt. 27:57-61; Mr. 15:42-47; Jn. 19:38-42)

⁵⁰ Na' zoa to bene' ciuda Arimatea gan' mbane Judean' na' le' José. Naque' txen len bene' ca' chesenabia' nación Israel, na' naque' to bene' güen bene' zej to licha.

⁵¹ Ba zoe' chbeze' batcan' solao nabia' ben' sela' Diosen'. Bitw bene' txen len bene' ca' gosechoglagüen' yesote' Jesúsen'.

⁵² Bena' gwyeje' lao Pilaton' jaynabe' cuerp che Jesúsen'.

⁵³ Na' beletje'ne' le'e yag cruzen' na' btobe' le' to lache' xen na' la' bcuaše'te' le' to lo' bloj da' nche'ene' le'e yej. Na' naquen to ba cobe ga nono na' yosocuaše'.

⁵⁴ Na' yogo' da' ca' goc ža cate' chososini'e che ža che Dios. Na' ba bžin hor cate' cheyała' yosocueze' bite'teze žin o mandadw da' chesone'.

⁵⁵ Na' no'ol ca' za'aclene' Jesúsen' cate' gwze'e distritw Galilean' ja'aclene' Josén' cont besele'ede' ba che Jesúsen' gan' gwxa cuerp che'na'.

⁵⁶ Na' gosa'aque' na' gosone' to da' chła' zix da' yeseyebe' cuerp che Jesúsen'. Na' ža che Diosen' gosonita'cze can' ža ley chegaquen', bibi žin gosone'.

24

Jesúsen' bebane' ladjo bene' guat

(Mt. 28:1-10; Mr. 16:1-8; Jn. 20:1-10)

¹ Bał dmigw ja'ac no'ol ca' da' yoble cho'a bloj gan' bosocuaše' Jesúsen' na' gosoxe' da' ca' ba gosone' da' chła' zix, na' yebał no'ole ja'aclene' legaque'.

² Na' cate' besežine' na' besele'ede' ba bga'a yeyen' dan' bosode'e cho'a blojen'.

³ Na' goso'e, na' bitw besyeželde' cuerp che Xancho Jesúsen'.

⁴ Šlac zjanita' chesyebande' che da' quinga, besele'ede' chope bene' zjazecha cuitgaquen' zjanyaze' lache' da' chactitchgua.

⁵ Na' no'ol ca' besežebe' na' bosocheque' yichjgaquen' gosone'e lo yole. Nach bene' ca' gose'e no'ol ca':

—¿Bixchen' cheyiljwle to bene' mban nga ladjo bene' guat?

⁶ Notoch no nła' nga. Ba bebane' ladjo bene' guat na' mbancze'. Le šjayza'laže' can' gwne' cate' ne' zoale Galilean'.

⁷ Gwne' le' naque' ben' gwseła' Diosen' golje' benačh. Na' gwne' cheyała' gaque' lo na' bene' mal ca' cont yesote' le' yosode'ene' le'e yag cruz, na' yeyon' ža yebane' ladjo bene' guat.

⁸ Na' no'ol ca' jasyeze'ede' xtiže'na'.

⁹ Na' besyeya'aque' cho'a blojen' na' jasedixjue'ede' yogo' da' ca' len postlw ca' šnej na' len yezica'chle bene' ca' nita' txen len legaue'.

¹⁰ Na' no'ol ca' jasedixjue'ede' postlw ca' zjanaque' bene' quinga: María bene' Magdala, na' Juana, na' María xna' Jacobo, na' len yebałe no'ole.

¹¹ Na' postlw ca' bitw gosejle'e che no'ol ca', gosacde' chesenazen'.

¹² Perw na' Pedroa' la' gwzoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo yo. Na' beze'e bebanchgüede' che da' ca' ble'ede'.

Blo'elao Jesúsen' chop bene' ca' šlac zja'aque' Emaús

(Mr. 16:12-13)

¹³ Na' lecze ža dmigwna' chop bene' ca' gosaque' Jesúsen' txen ja'aque' yež dan' nzi' Emaús, do šnej mil metr zito' par Jerusalénna'.

¹⁴ Na' legacze' bosošalje' che yogo' da' ca' ba goquen'.

¹⁵ Ne' chesone' xbab na' ne' chesoe'te' diža' čhen cate' Jesúsen' gwbigue' len legaue' na' gwza'lene' legaue' txen,

¹⁶ perw bitw gosacbe'ede' noxen' zejlen legaue'.

¹⁷ Nach gože' legaue':

—žBi dižan' choe'le šlac ngo'ole nezen'? žBixčhen' chacyaše'le?

¹⁸ Na' toe' le' Cleofas boži'e xtižen' gože'ne':

—žNacxe chaquen' gwza'o Jerusalén na' biña' gacbe'edo' da' ca' ba goc lo' ciudan'? žTozo' le' zo' Jerusalén na' biña' gacbe'edo'!

¹⁹ Na' Jesúsen' gože' legaue':

—žBi goquen' žale ca'?

Nach gose'ene':

—Dan' goc che Jesús bene' Nazaret. Goque' to bene' gwseła' Dios cont be'e xtižen', na' Diosen' len benačhen' besyebede' yela' guac čhen' dan' blo'e na' diža' dan' be'e.

²⁰ Perw na' bžoz gwnabia' čecho ca' len bene' ca' chesenabia' nación čechon' gosone' le' lo na' bene' ca' gosechoglagüe' che' cheyała' gate', na' bosode'e le' le'e yag cruz.

²¹ Ba goc šone ža na'a goc da' quinga. Na' neto' gwzoato' lez Diosen' gwsele' le' cont yebeje' nación čecho lo da' malen'.

²² Na' no'ol ca' zjanac txen len neto', bałe' goso'e diža' da' chebaneto', ja'aque' cho'a ban' be'e

²³ na' bitw besyeželde' cuerp che'na'. Cate' besyela'aque' gosene' besele'eda'ogüede' angl bene' gose'e legaue' ba bebane' ladjo bene' guat ca'.

²⁴ Na' lecze to chop bene' byo bene' ca' zjanaque' txen len neto' ja'aque' cho'a ban' na' besele'ede' cayanen' gosena no'ol ca' naquen, perw bi besele'ede' Jesúsen'.

²⁵ Na' gož Jesúsen' legaue':

—Nyaše' chguaze le'e bi chejni'ile na' bi chejle'le yogo' dan' bosozoj bene' ca' gwseła' Diosen' goso'e xtižen' cani'.

²⁶ žChaquele bi cheyała' gac dan' ba goca'? Cristo ben' gwlej Diosen' cont yedenabi'e, benen byen gwzaca'zi'e yogo' da' quinga ba goc, perw yeyoža' la'laon naque' bene' zaca' juisyw.

²⁷ Na' be'e diža' len legaue' bsd blo'ede' legaue' yogo' dan' nyoj che'na' le'e Xtiža' Diosen', gwzolaoteque' len dan' bzoj da' Moisés na' len dan' bosozoj yezica'chle bene' gwseła' Diosen' goso'e xtižen' cani'.

²⁸ Na' bežežine' gała'ze yežen' gan' zja'aquen', na' Jesúsen' bene' ca' chon bene' šejch yelate' zito'ch.

²⁹ Perw bene' ca' gosone' byen yega'ane' len legaue', gose'ene':

—Yega'ańczo' len neto', le ba čał na' ba nac bagwže' par šejo'.

Na' gwyo'e cont yega'ańlene' legaue'.

³⁰ Na' šlac zjachi'e cho'a mesen' txen, Jesúsen' gwxi'e yetextilen' na' be'e yela' choxclen che Diosen' na' bžoxjen' bnežjuen' legaue'.

³¹ Cana'ch gosacbe'ede' le'na'. Na' šlac ne' nite' ca' con benite'.

³² Nach gose' lježgaue':

—Leca bebe lažda'ochon' cate' be'lene' chio' diža' chanez na' bsd blo'ede' chio' can' nyojen che' le'e Xtiža' Diosen'.

³³ Na' la' besyeya'actie' jaya'aque' Jerusalénna' na' besyežine' gan' zjandop zjanžag postlw ca' šnej len bene' ca' yezica'chle.

³⁴ Na' beñe' šnej ca' gose'e beñe' ca' za' besyežin:

—Da' licze ba beban Xanchon'. Ba blo'elagüe' Simónna'.

³⁵ Nach beñe' ca' chop gose'e legaque' dan' goc šlac zjangüe'e nezen', na' gose'e legaque' besyeyombi'e le' cate' bzojje' yetextilen' cont yesagüen'.

Jesúsen' blo'elagüe' beñe' ca' zjanaque' le' txen

(Mt. 28:16-20; Mr. 16:14-18; Jn. 20:19-23)

³⁶ Ne' chesoe'te' dižan' ca', cate'cze gwzecha Jesúsen' gachol. Nach gože' legaque':

—Le soa binlo len xbab dan' yo'o lo' yichjlažda'olen'.

³⁷ Perw leca besežebe' na' besyebande', gosacde' še chesele'ede' bxin che da' beñe' guata'.

³⁸ Nach Jesúsen' gože' legaque':

—¿Bičhen' chacle tole? na' ¿bičhen' chonle xbab ca' lo' yichjlažda'olen'?

³⁹ Le na'šc ni'a na' nga cont gacbe'ele nedan'. Le can neda' cont gacbe'ele. Šaca' naca' beñe' guat, bi nac žit bela' chia' ca' dan' chle'ele nga.

⁴⁰ Beyož gwne' ca', blo'ede' legaque' ni'a ne'e ca'.

⁴¹ Na' legaque' biña' yeyož yesejle'e catec chesyebande' na' catec chesyebede'. Nach Jesúsen' gože' legaque':

—¿De late' da' gagua'?

⁴² Nach bosonežjue'ne' late' yid bel gagüe' na' late' chixe beser da' yože šina'ba'.

⁴³ Gwxi'en na' gwdagüen' laogaquen'.

⁴⁴ Nach gože' legaque':

—Ba gwnia' le'e cate' ne' zoalena' le'e cheyala' gac yogo'lol da' ca' bsi' Diosen' xneze zjanyoj chia' le'e ley dan' bzoj da' Moisés, na' le'e dan' bosozoj beñe' ca' goso'e xtiža' Diosen' cani', na' lecz ca' da' nyoj le'e Salmos ca'.

⁴⁵ Nach ben Jesúsen' cont gosejni'ide' da' ca' zjanyoj che' le'e Xtiža' Diosen'.

⁴⁶ Na' gože' legaque':

—Benen byen goc da' quinga cont goc can' nyojen žan neda' gata' na' yebana' ladjo beñe' guat yeyon ža, neda' naca' Cristo ben' gwlej Diosen' yedenabia'.

⁴⁷ Na' le'e cheyala' güe'le xtiža'na' len beñe' že' yogo' nación. Soloatecle güe'len Jerusalén. Güe'le xtižan' nale cheyala' yesyetinje beñachen' xtoła'gaquen' cont Diosen' yezi'xene' chegaque'.

⁴⁸ Le'e cheyala' güe'le diža' che da' quinga ba ble'ele dan' ba goc chia'.

⁴⁹ Na' lecze sela' Spiritw che Xa' Diosen' yedesoan len le'e can' gwnen'. Na' le yega'an lo ciuda nga na'a cuezle gon Xa' Diosen' le'e yeła' guac da' za' yaba.

Beyep Jesúsen' yaba

(Mr. 16:19-20)

⁵⁰ Na' Jesúsen' gwche'e legaque' ja'aque' gan' chi' yež dan' nzi' Betania na' gwlis ne'e gwnabde' Diosen' gone' cont nite' mbalaz.

⁵¹ Na' ca' beyoža' beyepe' yaban'.

⁵² Na' beñe' ca' gosaque' le' txen besyega'ane' yešlož dao' gosonxene' Jesúsen' nach jaya'aque' Jerusalénna', chesyebchgüede'.

⁵³ Na' gwnita'teze' lo' yodao' blaona' chesonxene' Diosen'. Da' na'ze chzoja' na'a.

DIŽA' GÜEN DAN' BZOJ SAN JUAN

Jesucristo ben' nzi' Xtiža' Dios golje' goque' benačh

¹ Cate' gwxe yežlion' ba zoacze ben' nzi' Xtiža' Dios. Zoe' len Diosen' na' lecze naque' Dios.

² Cate' gwxe yežlion' ba zoacze' len Diosen'.

³ Len' bene' yogo' benačh, yogo' angl, yogo' da' ca' beyac da' mal, yogo' beyixe' na' bite'teze da' dech. Bibi de da' gwxe da' bi ben ben' nzi' Xtiža' Dios.

⁴ Le' nse'e yela' mban. Na' ben' ba zjanape' yela' mban toli tocane da' none', legaquen' ba yo'o be'ni' lo' yichjlažda'ogaquen'.

⁵ Ben' nzi' Xtiža' Dios bide' nse'e be'ni' che yichjlaždao' benačhen', na' la'czla' bene' zan bi gosejnilaže'ne' na' bi gwyo'o be'ni' čhen' lo' yichjlažda'ogaque', bi gosezaquede' yosocue'eje' be'ni' che'na'.

⁶ Gwzoa to bene' le Juan, na' Diosen' gwsele'ne'.

⁷ Juanna' ben' bzoe' bene' nis bedeye'e diža' che ben' nsa' be'nin', cont yogo' benačh guac yesejnilaže'ne'.

⁸ Gague Juanna' nac bene' nsa' be'nin', san le' bedeye'e xtiža' ben' nsa' be'ni' che yichjlaždao' benačhen'.

⁹ Ba bžin ža be'ni' da' nac da' dogualje ba blan' yežlio nga, na' blan' cont gwsejin' lo' yichjlaždao' note'teze bene'.

¹⁰ Ben' nzi' Xtiža' Dios zoe' yežlion' cate' gwxeten. Na' la'czla' len' bene' yežlion' ben' že' yežlion' bi gosacbe'ede' non' naque'.

¹¹ Golje' ladjo neto' bene' gualaž che', perw zan neto' bene' gualaž che' bi gwyejle'to' čhen'.

¹² San balteze chio' gwyejle'cho che', chio' gwyejnilaže'chone', bene' cont naccho xi'in Dios.

¹³ Na' gague lagüe goljcho nita' xaxna'cho zjanaque' bene' bela' čhen ba naccho xi'in Dios. Na' gague lagüe to bene' byo gwzoalene' to no'ole ba naccho xi'in Dios, na' gague lagüe bene' byon' goclaze' soa xi'ine' ba naccho xi'in Dios, san da' chejnilaže'chone', da' nan' non Diosen' chio' xi'ine'.

¹⁴ Jesucristo ben' nzi' Xtiža' Diosen' golje' goque' benačh na' gwzoe' len neto'. Na' ble'eto' naque' bene' zaca' juisyw, le togue' naque' dogualje Xi'in Dios. Leca nži'ilaže'de' chio' benačh na' bedezejni'ide' chio' diža' li che Diosen'.

¹⁵ Juanna' ben' bzoe' bene' nis be'e diža' che', gwne':

—Che bengan' bi'a diža' cate' gwnia': "Bene' za' za' zaca'che' ca neda', le ba zoacze le' cate' bina' soa' neda'."

¹⁶ Jesucriston' nži'ilaže'chgüede' yogo' chio' chejnilaže'chone' na' zoacze' chaclenchgüe' chio'.

¹⁷ Da' Moisésen' bzejni'ide' da' xoxxta'o neto' bene' Israel ley che Diosen' na' chlo'en yogo'cho napcho dola', na' Jesucriston' bedelo'ede' nži'ilaže' Diosen' chio' benačh na' bedezejni'ide' chio' diža' li che Diosen'.

¹⁸ Nono na' soa bene' ba ble'ede' Diosen'. Toz ben' nac dogualje Xi'in Dios bene' tliša' ba bzejni'ide' chio' benačh can' nac yichjlaždao' Diosen', le chacchgüe Diosen' le'.

Juan ben' bzoe' bene' nis be'e xtiža' Jesúsen'

(Mt. 3:11-12; Mr. 1:7-8; Lc. 3:15-17)

¹⁹ Bene' chesenabi'e nación Israel čheton' bene' že' Jerusalén gososele' to chope bžoz na' yebale bene' gosajle lo diaža che da' Levi cont gosenabde' Juanna' non' naque'.

²⁰ Na' Juanna' bi bedi'ide', be'e diža' li gože' legaque':

—Gague nedan' Cristo ben' chbezcho seła' Diosen' yedenabi'e nación čhechon'.

²¹ Nach gose'ene':

—¿Nox naco'? ¿Naco' da' Elías ben' be' xtiža' Diosen' cani'?

Na' gože' legaque':

—Bi naca' le'.

Nach gosenabde' le':

—¿Naco' ben' naquen yide' yedeye'lene' neto' xtiža' Diosen'?

Na' boži'en gwne':

—Bi naca'.

²² Nach da' yoble gosenabde' le':

—¿Non' naco'? cont ye'to' bene' ca' gosesele' neto'. ¿Bi ža togo' che cuino'?

²³ Nach Juanna' gože' legaque':

—Neda' naca' ben' čhne' žiže to latje daš, žia': "Le gwža' yichjlažda'olen' cont gwzenagle che Xanchon' cate' yide'", can' gwna da' Isaias ben' be' xtiža' Diosen' cani'.

²⁴ Beñe' ca' ja'ac lao Juanna', beñe' fariseo ca' gosesele' legaque'.

²⁵ Nach gose'ene':

—¿Bixchen' chzo' beñe' nis še bi naco' Criston' neca naco' Elíasen' na' neca naco' ben' chbezcho yedeye'e xtiža' Diosen'?

²⁶ Nach Juanna' gože' legaque':

—Neda' chzoa' beñe' nis, na' gachol le'e ba zoa to beñe' bina' gombia'le.

²⁷ Len' za' gwlo'elagüe' na' zaca'che' ca neda', na' da' nacchgüe' beñe' zaca' bitw zaca' gona xmandadoe' lechja' no xe'le'.

²⁸ Yogo' da' quinga goquen gan' nzi' Betábara dan' chi' yešlja'a yegw Jordán gan' chzoa Juanna' beñe' nis.

Jesúsen' yeque'e xtola' benachen'

²⁹ Na' beteyo Juanna' ble'ede' zej Jesúsen' gan' zoen' na' gože' ben' chosozenag che':

—Le na' ben' za' nga, Diosen' ba gwsele'ne' cont yeque'e xtola' benachen'. Bena' zaca'lebe' ca xila' dao' ben' chot chio' beñe' Israel cont Diosen' chezi'xene' xtola'chon'.

³⁰ Che len' bi'a diža', gwnia': "Ben' za' za' zaca'che' ca neda', na' le' ba zoacze' cate' bina' soa neda'."

³¹ Neda' bi goche'eda' non' naque' perw Diosen' bzejni'ide' neda', na' da'nan' zedezoa' beñe' nis cont yogo' chio' beñe' Israel gacbe'echo non' naque'.

³² Juanna' lecze gwne':

—Ble'eda' cate' betj Spiritw che Diosen' yaban' bžinen gan' zoa Jesúsen'. Bžinen ca to ngolbex na' bega'anen len le'.

³³ Neda' bi goche'eda' še Jesús nan' naque' ben' gwsela' Diosen', nach Dios ben' gwsele' neda' chzoa' beñe' nis gože'nda': "Le'edo' yetj Spiritw chia' na' yega'anen len beñe' ba mbeja'. Len' naque' beñe' gon cont soa Spiritw chian' lo' yichjlaždao' bene' na' nabian' legaque'."

³⁴ Ba ble'eda' goc can' gwne' na' cho'a diža' le' bengan' Xi'in Dios.

Beñe' nechw ca' gwlej Jesúsen' cont gosaque' le' txen

³⁵ Beteyo Juan ben' bzoa beñe' nis zeche' da' yoble len yechope beñe' zjanaque' txen len le'.

³⁶ Na' cate' ble'ede' gwde Jesúsen', nach gože' beñe' ca':

—Le na' ben' gwsela' Diosen' ben' zaca'lebe' ca xila' dao' ben' chot chio' beñe' Israel cont Diosen' chezi'xene' xtola'chon'.

³⁷ Na' cate' beñe' ca' choppe, ben' zjanaque' txen len Juanna', gosende' can' gwnen' nach ja'aclene' Jesúsen'.

³⁸ Nach beyechj Jesúsen' na' gwne'e legaque' zjana'ogüe'ne', na' gože' legaque':

—¿Bi chaclaže'le'?

Na' gose'ene':

—Maestrw, žgan' zo'?

³⁹ Nach gože' legaque':

—Le šo'o na' le'ele.

Nach ja'aclene'ne' na' besele'ede' gan' zoen', na' besyega'anlene' le' žana', le' ba nac bagwže', ca do cheda tap.

⁴⁰ Na ca nac beñe' ca' choppe bosozenag xtiža' Juanna' na' gosa'ogüe' Jesúsen', toe' Andrés, beñe' biše' Simón Pedro.

⁴¹ Na' Andrésen' za' gone' bichle da' gone' na' jel güiže' Simón bišen' na' gože' le':

—Ba bežaglaoto' ben' chesene' Mesías, ben' ba gwlezcho yide' yedenabi'e nación Israel chechon'. —Na' Mesías zeje diža' Cristo.

⁴² Nach Andrésen' gwche'e beñe' bišen' gan' zoa Jesúsen'. Na' cate' Jesúsen' ble'ede' Simónna' gože'ne':

—Len' Simón xi'in Jonás. Perw yososi' beñe' le' Cefas. (Na' Cefas zeje diža' Pedro.)

Jesúsen' gwleje' Felipe na' Natanael cont bsed blo'ede' legaque'

⁴³ Beteyo Jesúsen' gwchoglagüen' yeyeje' Galilean' na' jane'e Felipen' na' gože'ne':

—Yo'o len neda'.

⁴⁴ Felipen' goque' beñe' Betsaida gan' nac laž Andrésen' len Pedron'.

⁴⁵ Nach Felipen' jane'e Natanaelen' na' gože'ne':

—Bač ble'eto' ben' bzoj da' Moisésen' xtižen' le'e da' ca' gan' bzoje' ley chechon', na' lecze xtiže'na' bosozoj beñe' ca' goso'e xtiža' Diosen' cani'. Len' Jesús beñe' Nazaret, ben' nac xi'in José.

⁴⁶ Nach Natanaelen' gože'ne':

—¿Bat benecho yesene' Nazaret na' choj beñe' zaca'?

Nach gož Felipen' le':

- Yo'o cont le'edo'.
⁴⁷ Na' Jesúsen' ble'ede' bach zej Natanaelen' gan' zoe'na' nach gwne':
 —Na' za' to bene' Israel gualaž chechon' bene' naque' bene' güen. Ne late'ze bi naque' bene' gwxiye'.
⁴⁸ Natanaelen' bende' xtiža' Jesúsen' na' gože'ne':
 —¿Nac chac nombi'o neda?
 Na' Jesúsen' gože'ne':
 —Ble'eda' le' šlac zechao' xan yag yixgüigw cate' za' ne Felipen' le'.
⁴⁹ Nach Natanaelen' gwne':
 —Maestrw, len' naco' dogualje Xi'in Dios. Len' naco' ben' chbezto' seła' Diosen' yedenabi'o nación Israel chechon'.
⁵⁰ Na' Jesúsen' gože'ne':
 —¿Da' gwnia' ble'eda' le' xan yag yixgüigw nan' chejli'o chia'? Da' zaca'ch ca da' quinga za' le'edo'.
⁵¹ Da' li chnia', le'ele yaban' gan' zoa Diosen' gaquen ca to da' chyaljo na' bene' ca' zjanac angl che' chep chetj yesaque' yežlio gan' zoa' nga, le neda' naca' ben' gwsela' Dios golja' benačh.

2

Gota' to yela' güešagna' yež da' nzi' Caná

- ¹ Beyon ža gota' to yela' güešagna' yež da' nzi' Caná gan' mbane distritw Galilea. Na' xna' Jesúsen' gwyeye' liž ben' gan' gota' yela' güešagna'na'.
² Na' lecze gosaxe' Jesúsen' len bene' ca' zjanaque' le' txen cont ja'aque' gan' chac yela' güešagnan'.
³ Na' bebiž vino dan' chese'ej bene' ca' že'na', na' xna' Jesúsen' gože' le':
 —Bich bi vino čegaque' de.
⁴ Na' gož Jesúsen' le':
 —¿Bixčhen' žo' ca'? le biŋa' žin hor gwlo'a non' naca'.
⁵ Na' xne'ena' gože' bene' ca' cheson mandadon':
 —Le gon bite'tez da' ne'.
⁶ Na' nita' xop yeso' de yej ga chož nis da' chosočhin bene' Israel gualaž četo' ca' par chesa' cheseyib cuine' can' za ley četon'. Na' to to yej ca' chožen do xono' che'e o do ši che'e nis.
⁷ Nach Jesúsen' gože' bene' güen mandadw ca':
 —Le yosša' yeso' yej ca' nis.
 Na' gosegue'en nis goseža'ten.
⁸ Nach gože' legaque':
 —Le gaše' laten' na'a na' le šjanežjon ben' yo'o lo ne'e lñin'.
 Na' gosone' can' gwnen'.
⁹ Na' ben' yo'o lo ne'e lñin' con bnixen' bi nežde' gan' zan', con bene' ca' cheson mandadw na'ze gosenežde' nisen' beyaquen vino, le legaquen' gosaše' nisen'. Na' bena' bnixen' na' goxe' bene' byo ben' bšagnan',
¹⁰ na' gože'ne':
 —Yogo'ze bene' chon lñi chdie' vino güen da' chzaca' la'ay cate' chzolao lñin', na' cate' ba zjane'eje' da' zil nach cho'e legaque' da' corrient. San le' bzago' vino šagüen' chdion' na'a ba cheyož lñin'.
¹¹ Da' nga ben Jesúsen' yež Caná distritw Galilea goquen yela' guac nechw da' bene' cont blo'e naque' bene' zaca'chgua, nach bene' ca' gwleje' cont gosaque' le' txen gosejnilaže'ne'.
¹² Gwde na' Jesúsen' gwyeye' Capernaum len xne'e na' len bene' biše' ca', na' len bene' ca' zjanaque' le' txen, na' besyega'ane' na' čop šone ža.
Jesúsen' bebeje' bene' cheson ya'a chy'o yodao' blao
(Mt. 21:12-13; Mr. 11:15-18; Lc. 19:45-46)
¹³ Na' ba zoa gała' lñi che neto' bene' Israel da' nzi' pascw, nach Jesúsen' gwyeye' Jerusalén len bene' ca' zjanaque' le' txen.
¹⁴ Cate' bžine' chy'o yodao' blaon' bene' zan že' chesote' go'n na' xila' na' ngolbex, na' zjachi' bene' chosoše'le mechw.
¹⁵ Jesúsen' ble'ede' can' chaca' na' bene' to tašjw de do na' bčhinen' cont bebeje' yogo' bene' ca' že' chy'o yodaon', len xila' ca', len go'n ca', na' besłase' xmechw bene' chosoša' mechon' na' gwlo'oni'ane'e xmesgaquen'.
¹⁶ Na' gože' bene' ca' chesote' ngolbexen':
 —Le yebej yogo' be qui nga. Bi gonle ya'a liž Xa' nga.

¹⁷ Nach bene' ca' zjanaque' le' txen jaseza'laže' can' nyoj Xtiža' Diosen' gan' žan: "Da' chi'chgua yichja' che ližon' chonten ga saca'zi'chgua'."

¹⁸ Na' ben' chesenabia' nación Israel cheton' gose'ene':

—¿Bi yela' guac gono' da' le'eto' cont šejle'to' zaco' bebejo' bene' ca'?

¹⁹ Jesúsen' boži'e xtiža'gaquen' gwne':

—Le yochinj yodao' nga na' šone žaze yeyonan'.

²⁰ Nach bene' gwnabia' ca' gose'ene':

—Xopeyon iz byažjen gosone' yodao' nga, ¿chacdo' guac yeyonon' šone žaze?

²¹ Perw Jesúsen' bsaca'lebde' cuerp čhen' yodao' cate' gwne' ca', na' legaque' gosone' xbab che yodao' na'zen' gwne' ca'.

²² Na' cate' bžin ža beyas bebane' ladjo bene' guat ca', bene' ca' zjanaque' le' txen jaseza'laže' can' gwnen' na' gosejle'e Xtiža' Diosen' dan' nyoj che' na' lecze gosejle'e xtiža' Jesúsen'.

Jesúsen' nezde' bin' yo'o lo' yichjlaždao' benačhen'

²³ Šlac gwzoa Jesúsen' Jerusalénna' lo' lni pascon' bene' zan besele'ede' yela' guac ca' dan' benen' na' gosejle'e naque' bene' gwseła' Dios.

²⁴ Perw Jesúsen' bi ben cuine' lo' na'gaque', le nombi'e yichjlaždao' benačhen'.

²⁵ Bi byažjde' no ye' le' xbab da' yo'o lo' yichjlaždao' bene' ca'. Le nezecede' bin' yo'o lo' yichjlaždao' to to chio' benač.

3

Jesúsen' len Nicodemo

¹ Na' gwzoa to bene' fariseo bene' le' Nicodemo. Goque' to bene' gwnabia' che nación Israel cheton'.

² Gwyeye' lao Jesúsen' šeze'le na' gože'ne':

—Maestrw, nezeto' Diosen' gwsele' le' cont chzejni'ido' neto', le nono gac gon yela' guac ca' dan' chonon' še bi zoa Diosen' len le'.

³ Na' gož Jesúsen' le':

—Da' li chnia' le', še non' bi galje yeto bi gac šjayzoe' gan' zoa Diosen' chnabi'e.

⁴ Nach gož Nicodemon' le':

—¿Nac gon to bene' galje' še' ba naque' bene' gole? ¿Guaquech yeyo'e lo' le'e xne'en' cont galje' yeto?

⁵ Na' Jesúsen' gozne':

—Chnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zoa Diosen' chnabi'e.

⁶ Bene' zjanaque' bela' chen chesenita' xi'ingaque' lecze bi' bela' chen. Na' Spiritw che Diosen' chnežjon yela' mban toli tocane che bene' chesejnilaže' Diosen'. Da'n'an' žacho chesalje' yeto.

⁷ Bi yebando' dan' gwnia' chonen byen yogo' bene' galje' yeto.

⁸ Cate' chechj be' chechjen gate'teze, na' chendo' cholyoyen perw bi nezdo' ga zan' na' neca nezdo' ga šejen. Ca'czen' naquen len yogo' bene' chon Spiritw che Diosen' cont chesalje' da' yoble. Bi chle'echo da' chon Spiriton' perw nacbia' ba bocoben yichjlažda'ogaque'.

⁹ Nach Nicodemon' gože'ne':

—¿Nacxe gac can' žo' nga?

¹⁰ Na' gož Jesúsen' le':

—Le' chsed chlo'edo' bene' Israel gualaž chechon' xtiža' Diosen', ¿bi chejni'ido' da' quinga?

¹¹ Da' li neto' chyixjue'to' da' nezeto' na' choe'to' diža' che da' ba ble'eto' na' bi chejle'le.

¹² Ba bia' diža' che dan' chac yežlio nga na' bi chejle'ele. ¿Nac gac šejle'le še nia' le'e da' chac yaban'?

¹³ Toze neda' naca' ben' gwseła' Diosen' golja' benač za'a yaba na' noch no zoa no ba beyep yaba cont nezde' che Diosen'.

¹⁴ Na' can' goc latje daš cani' cate' gwliš da' Moisésen' bel' de bronze bde'eba' to le'e yag, can' cheyała' gac yeselise' neda' to le'e yag, neda' gwseła' Diosen' golja' benač.

¹⁵ Na' gac čhia' ca' cont note'teze bene' yesejnilaže' neda' bi cuiaye'e san gata' yela' mban che' toli tocane.

Chaque Diosen' benačhen'

¹⁶ Leca chaque Diosen' chio' benač, na' gwseła' Xi'ine' bene' tliša' cont note'tez bene' chejnilaže'ne' bi cuiaye'e, san gata' yela' mban che' toli tocane.

¹⁷ Na' Diosen' gwsele' Xi'inen' yežlio nga gague cont gwnežjue' castigw che xtoła' benačhen', san cont gwnežjue' yela' mban chegaque' toli tocane.

18 'Note'tez bene' chesejnilaže' Xi'in Diosen' bene' tlišan', bi yesezi'e castigw che xtoła'gaquen', perw bene' bi chesejnilaže'ne' ba nchoglaon čhegaque' yesezaca'zi'e toli tocaņe da' bi chesejnilaže' Xi'in Dios bene' tlišan'.

19 Na' can' naquen, bene' bi chesejnilaže' Xi'in Diosen' ba nchoglaon čhegaque' yesezaca'zi'e toli tocaņe. Nchoglaon yesezacazi'e, le ba bid Xi'in Diosen' nse'e be'ni' che yichjlaždao' beñačen' perw na' chesyebchde' dan' nac čhoļ clel ca be'ni' čhen', dan' chesone' da' malen'.

20 Yogo' bene' cheson da' mal chesegue'ede' be'ni' čhen' na' bi chesazlaže' yosozenague' che' cont bi gwlo'elaon še chesone' da' mal.

21 San note'tez bene' cheson can' ža diža' li čhe Diosen', chesyebede' chosozenague' che Criston', le chlo'en zoacze Diosen' chaclene' legaque' cont chesone' can' ža diža' li čhen'.

Juan ben' bzoa bene' nis be'che' diža' che Jesúsen'

22 Gwde na' Jesúsen' len bene' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosonite' na' bosozoe' bene' nis.

23 Na' Juanna' lecze bzo'e' bene' cont yež gan' nzi' Enón da' čhi' gała'ze Salim, le na' dechgua nis. Na' ja'ac bene' gan' gwzoe'n' cont bzo'e' legaque' nis.

24 Caten' biņa' yeseyixjue' Juanna' ližyan' goc ca'.

25 Nach gwche' to žaš len bene' ca' zjanaque' txen len Juanna' na' yeto čhope bene' Israel gualaž cheto' che dan' chesezoa bene' nis.

26 Nach ja'aque' lao Juanna' na' gose'ene':

—Maestrw, ben' gwzoa len le' yešla'a yegw Jordánna', ben' cho'o xtižen', bačh chzoe' bene' nis na' yogo'ze bene' čja'aque' gan' zoe' na'.

27 Nach Juanna' gože' legaque':

—Nono gacxene' še bi gon Diosen' cont yesonxen bene' le'.

28 Nezczele can' ba gwnian', bi naca' Cristo ben' chbezcho seļa' Diosen' yedenabi'e chio', san naca' ben' gwseļa' Diosen' cont bia' xtižen' žialaole.

29 Cate' chac to yela' güešagna', toz bene' byo ben' chšagnan' chzi'e no'olen'. Perw še zoa bene' migw che' len le' ža'na, chebede' cate' ben' chšagnan' že' zoe' mbalaz. Can' chac len neda', chbechgüeda' bene' zan chosozenague' che Criston'.

30 Len' cheyaļa' šejch yesonxen bene' le' na' neda' cheyaļa' šejch yesanlaže' neda'.

Bene' za' gan' zoa Diosen'

31 Ca nac Cristo ben' za' gan' zoa Diosen', le' naque' bene' zaca'ch ca yogo'loļ bene'. Yezica'chle beñačh zjanaque' bene' che yežlio ngaze na' che yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'loļ bene'.

32 Le' cho'e diža' čhe da' ca' ba ble'ede' na' diža' da' ba bende' gan' zoa Diosen', na' nono čzenag xtižen'.

33 Na' note'tez bene' chosozenag xtiža' ben' za' gan' zoa Diosen', nachbia' bena' nežde' Diosen' cho'e diža' li.

34 Na' bena' gwseļa' Diosen', bena' za' gan' zoe'na', len' cho'e xtiža' Diosen', le Spiritw čhe Diosen' zoan len le', na' cate' Diosen' čhone' Spiritw čhen' bi chyisen' late' güeje.

35 Diosen' chacde' Xi'ine' Criston' na' ba bene' lo ne'e yogo'loļ da' de yežlion'.

36 Na' bene' ca' chesejnilaže' Xi'in Diosen' de yela' mban čhegaque' toli tocaņe, san bene' cheson güedenag len Xi'in Diosen', bi gata' yela' mban čhegaque', le Diosen' gone' cont yesezaca'zi'e toli tocaņe.

4

Jesúsen' be'e diža' len to no'ole Samaria

1-3 Na' goquen' bene' zanch chosozenague' che Jesúsen' ca bene' chosozenag čhe Juanna', na' bene' zanch chesezoa nis len Jesúsen' ca bene' chesezoa nis len Juanna', la'czļa' gague cuin Jesúsen' bzo'e' bene' nis, bene' ca' zjanaque' le' txen gosonen'. Nach cate' Jesúsen' gwnežde' bene' fariseo ca' gosache'ede' bene' zanch zjana'ogüe' le', nach beze'e distritw Judean' na' beyeje' distritw Galilean' len bene' ca' zjanaque' le' txen.

4 Na' benen byen zjaya'aque' nez da' chde Samarian'.

5 Ca' goquen' besežine' to yež da' nzi' Sicar lo distritw Samarian'. Yežen' čhega'nen gała'ze gan' de yežlio dan' bnežjw da' Jacob da' xi'ine' Josė.

6-8 Na' žia to bej da' nacchgua sitjw da' nzi' Bej čhe da' Jacob. Ca do guagwbiž Jesúsen' ba chjaxaque'de' ngü'e nezen' nach gwchi'e cho'a bejen'. Na' bene' ca' zjanaque' le' txen ba zja'aque' lagüe yežen' zjasexi'e da' yesagüe' len le', cate' bžin to no'ole Samaria cho'a bejen' cont güe'e nis. Na' Jesúsen' gože'ne':

—Beñ late' nis ye'eja'.

9 Na' no'ole Samarian' boži'en gože'ne':

—¿Nacxechen' le' naco' bene' Israel chñabdo' neda' nis ye'ejo'? le no'ole Samaria neda'. (Na' ca nac bene' Israel gualaż cheto' ca', bi chesene lježe' len bene' Samaria ca.)

¹⁰ Nach Jesúsen' gože'ne':

—Neda' ba goša' le': "Ben late' nis ye'eja'", na' šaca' nezdo' da' chaclaže' Diosen' gone' le' na' šaca' chacbe'edo' non' naca' neda', ba gwñabdon' neda' na' ba bene' le' nis da' choñ yela' mban toli' tocane šaca'.

¹¹ Na' no'olen' gože'ne':

—Bene', bi noxo' bi gaše'don' na' bej nga naquen sitjw. ¿Gaxe si'o nis da' choñ yela' mbanna' žo' ca'?

¹² ¿Chacdo' zaca'cho' ca da' xozxta'ochó Jacob ben' bocua'an len neto' bej nga gan' güe'eje' len xi'ine' ca' na' len beyixe' che' ca'?

¹³ Gož Jesúsen' le':

—Note'tez bene' ye'ej nis che bej nga bia'cze bilde' da' yoble.

¹⁴ Na' note'tez bene' ye'ej nisen' gwnežjua'ne' neda', gwbatech bilden' da' yoble, le dan' gwnežjua'nen' gaquen lo' lažda'ogüe' ca to latje ga chaldi nis cont gata' yela' mban che' toli' tocane.

¹⁵ Na' no'olen' gože'ne':

—Bene', beñ neda' nisen' žo' ca' cont bich bil'dan' na' bich yida' dexian' nga.

¹⁶ Jesúsen' gože'ne':

—Beyej jel' güiž bene' chio' na' le da nga.

¹⁷ Nach gože' Jesúsen':

—Notno bene' chia' zoa.

Na' Jesúsen' gože' no'olen':

—Ledo' can' gwnaon' nono bene' chio' zoa,

¹⁸ le gayo' bene' chio' ba gwnita' na' bene' zoaleno' na'a gague naque' bene' chio'. Da' li can' ba gwnaon'.

¹⁹ Na' gož no'olen' le':

—Bene', chache'eda' naco' to bene' chac chyixjue'ede' bi da' ža Diosen'.

²⁰ Da' xozxta'o neto' bene' Samaria gosonxene' Diosen' lo' ya'an zoa nga, na' le'e nacle bene' Israel žale Jerusaléna' cheyala' gonxenchone'.

²¹ Jesúsen' boži'en gože'ne':

—No'ole, gwyejle' chia', gwžin ža cate' bi gonen byen gonxenle Diosen' lo' ya'a nga ne Jerusaléna'.

²² Le'e nacle bene' Samaria bi nombia'yane'le Dios ben' chonxenle. Neto' bene' Israel nombia'to' Dios ben' chonxento', na' ladjo' neto' bene' Israel choj ben' yebej benachen' lo' da' malen'.

²³ Chžin ža na' na'a ba gole', cate' bene' yesonxene' Xacho Diosen' can' cheyala'cze yesonxene' le', gate'tez nite', lo' yichjlažda'ogaquen' yesonxene' bene' naque' dogualje Dios, le Xacho Diosen' cheyiljue' bene' yesonxene' le' ca'.

²⁴ Diosen' bi naque' bene' bela' chen, naque' spiritw. Da'n'an' bene' yesonxen le', lo' yichjlažda'ogaque' cheyala' yesonxene' bene' nac dogualje Dios.

²⁵ Nach no'olen' gože'ne':

—Nezda' yid ben' ba gwlej Diosen' cont yedenabi'e chio', ben' nzi' Mesias o Cristo, na' cate' le' yide' yedezejni'ide' chio' yogo' da' quinga.

²⁶ Nach Jesúsen' gože' no'olen':

—Neda' choe'lena' le' diža' naca' ben' žo' ca'.

²⁷ Ne' choe'lente Jesúsen' no'olen' dižan' cate' bene' ca' zjanaque' le' txen besyežine' cho'a bejen'. Na' besyebande' choe'lene' to no'ole diža', perw ne toe' bi gosenabde'ne' bi dižan' choe'lene' no'olen' o bixchen' chšaljlene' le'.

²⁸ Nach no'olen' bocua'an che'e nis chen' na' beyeje' lo' yežen' jayeže' bene' gualaż che' ca':

²⁹ —Le šo'o le' na' to bene' ba gože' neda' yogo'te da' ba bena'. ¿še bengan' Cristo ben' chbezcho yedenabi'e?

³⁰ Na' besežaše' yežen' ja'aque' gan' chi' Jesúsen'.

³¹ Na' šlac zjayda no'olen', bene' ca' zjanaque' Jesúsen' txen gosata'yoede' le', chese'ene':

—Maestrw, gwdagw.

³² Na' Jesúsen' gože' le'gaque':

—Bi nezele de to yela' guagw chia'.

³³ Na' gose' lježe':

—¿Gague ba bedesesan bene' da' gwdagüe'?

³⁴ Na' gož Jesúsen' le'gaque':

—Len neda' naquen ca to yela' guagw chona' can' chazlaže' Dios ben' gwsela' neda' cont gac yogo' da' chnaláže'.

³⁵ Le'e žale: "Ne' dech yetap bio' cont yedobe cosešen." Na' neda' chnia', le na' na' le'ele to coseš da' chyažje yedob na'a.

³⁶ De da' goncho na'a cont bene' yosozenague' che Diosen' na' gata' yela' mban chegaque' toli' tocane. Na' bene' cheseyixjue'ede' xtiža' Diosen' na' lente bene' chesone' cont yosozenag bene' xtižen' txen yesenite' mbalaz.

³⁷ Diža' nga naqnen da' li, žan: "Bene' yoble chaz na' bene' yoble chelap."

³⁸ Bač chseļa' le'e šjajlaple gan' bi gozle, le le'e gonle cont yosozenag bene' xtiža' Diosen' dan' ba goseyixjue'e bene' yoble.

³⁹ Na' ca nac bene' yež Sicar ga mbane Samaria, zane' gosejnilaže' Jesúsen' da' gosende' gwna no'olen': "Ba gože' neda' yogo' da' ba bena'."

⁴⁰ Nachen' besežin bene' Sicaren' gan' chi' Jesúsen' gosata'yoede' le' yega'anlene' legaque', na' bega'ane' chope ža.

⁴¹ Na' bene' zanch gosejnilaže' Jesúsen' cate' gosende' diža' da' be' cuine'.

⁴² Nach gose'e no'olen':

—Bač chejle'to' na'a, gague dan' bzenagto' xtižo' na'ze, san da' ba beneto' choe' cuine' dižan', na' nezeto' bengan' Cristo ben' gwlej Diosen' cont yebeje' beňachen' lo da' malen'.

Jesúsen' beyone' xi'in to bene' gwnabia'

⁴³ Na' cate' goc chop ža, Jesúsen' len bene' ca' zjanaque' le' txen gosa'aque' jaya'aque' Galilea.

⁴⁴ Le cuin Jesúsen' ba gwne' note'teze bene' cho'e xtiža' Diosen', bi chesonla'ančze bene' gualaž chen' le'.

⁴⁵ Na' cate' besežine' Galilean' bene' gualaž chegaquen' bosolebe' Jesúsen' dan' ba be-sele'ede' yogo' da' güen da' bene' Jerusalénna' lo lnin', le lencze legaque' ja'aque' lnina'.

⁴⁶ Na' gozej Jesúsen' yetni'a yež Caná dan' chi' distritw Galilea gan' bene' cont nisen' beyaquen vino. Na' yež Capernaum gwzoa to bene' gwnabia' bene' chon žin che rey, na' chacšenchgüe xi'ine'.

⁴⁷ Xa bi'na' cate' bende' ba bežin Jesúsen' Galilean' zeze'e Judean', nach gwyeye' lao Jesúsen' gwneyoede' le' šeje' šjayene' xi'inen', le ba zoa gatbe'.

⁴⁸ Na' Jesúsen' gože'ne':

—Še bi chle'ele yela' guac na' bichle da' zaca' yebanele, bi chejle'le čhia'.

⁴⁹ Nach ben' chon žin che reyen' gota'yoede' le' gwne':

—Bene', yo'ošca šlac bina' gat bi' čhian'.

⁵⁰ Na' Jesúsen' gože'ne':

—Beyej ližo', bi gat bi' čhion'.

Nach gwyejle' bena' dan' gož Jesúsen' le' na' beze'e.

⁵¹ Ba zoa yežine' cate' jasešag xmoše' ca' le' na' gose'ene':

—Ba beyac bi' čhion'.

⁵² Na' gwnabde' legaque' bi hor gwzolao beša'alaže'be', na' gose'e le':

—Neje cheda to gwde guagwbiz bechojbe' da' lan'.

⁵³ Na' xaben' goče'ede' ca hor na'czen' gož Jesúsen' le' bi gat bi' čhen'. Nach gwyejnilaže' Jesúsen', le' len yogo' bene' že' ližen'.

⁵⁴ Da' nga goc yela' guac gwchop da' ben Jesúsen' šlac beze'e Judean' na' bežine' Galilea.

5

Jesúsen' beyone' to bene' nat late' cuerp che'

¹ Na' gwde to tiemp bžin ža goc yeto lnin' che neto' bene' Israel Jerusalénna', na' Jesúsen' gwyeye'.

² Jerusalénna' gala'ze cho'a puert che ze'e da' nychj ciudan' dan' nzi' Puert che Xila' žia to ga chož nis da' nzi' Betesda, na' ze gayo' chalšil cue'ej cuite gan' chož nisen'.

³ Na' bene' zan bene' güe' zjadie' chalšil ca', no bene' lčhoj, no bene' nxinj ni'e, no bene' natsi' late' güeje cuerp chegaquen'. Zjadie' chesebeze' batcan' ta nisen'.

⁴ Le tgüeje betj to angl na' bte' nisen', na' bene' nechw bene' cho'e lo' nisen' cheyož čta anglen' len, cheyacde' bite'tez yižgüe' che'ede'.

⁵ Na' cate' bžin Jesúsen' na' de to bene' ba goc šino'šonechoa iz chacšende'.

⁶ Na' Jesúsen' ble'ede' ben' na' gocbe'ede' ba chac šša de' ca', na' gože'ne':

—čChaclažo' yeyaco'?

⁷ Na' bene' güen' gože' Jesúsen':

—Bene', nono zoa no co' neda' lo' nisen' cate' chdan. Na' šlac zya'a cont šo'a, bene' yoble chyobde' četje' lo' nisen'.

⁸ Nach gož Jesúsen' le':

—Gwyas na' botobe xta'on na' gwda.

⁹ Na' la' beyacte bena' na' botob xte'en na' gwzolao chde'. Perw na' goquen to ža che Dios cate' bi de lsens gon neto' bene' Israel žin.

¹⁰ Nach bene' gwnabia' che neto' bene' Israel gose'e bena' beyaquen':

— Ža che Dios na'a. Bi de lsens yeyoa' xta'ona'.

¹¹ Na' gož ben' legaque':

— Bena' beyon neda' gože'nda': "Botobe xtaon' na' gwda."

¹² Nach gose'ene':

— žNon' gož le': "Botobe xtaon' na' gwda"?

¹³ Na' ben' beyaquen' bi gwnezde' non' beyon le', le Jesúsen' benite' ladjo bene' zan ca'.

¹⁴ Gwdechle Jesúsen' bedile' bena' beyaquen' lo' yodao' blaon' na' gože' le':

— Bač beyaco' na'a, na' cheyala' cuejyichjo' da' malen' bich gonon', cont bi gac chio' to da' malech.

¹⁵ Nach beza' bena' jatixjue'ede' bene' gwnabia' che nación Israel cheton' gože' legaque' Jesúsna' ben' beyon le'.

¹⁶ Da'nan' bene' gwnabia' ca' gwzolao gosebe'na'ogüe' Jesúsen' na' cheseyiljue' nacle yesone' yesote'ne' da' chone' yela' guac ca' ža che Dios cate' bi de lsens gon neto' bene' Israel žin.

¹⁷ Na' Jesúsen' gože' legaque':

— Xan' zoacze' chelažde' bate'teze na' lecze ca' neda'.

¹⁸ Da'nan' goseyiljwlaže'che' nacle yesone' yesote' Jesúsen', perw gague neche bi chone' can' ža ley gan' chgualan' che ža che Dios na'zen', san lecze da' gwne' Diosen' naque' X'e, le zejen toz ca' zaque' len Diosen'.

Yela' chnabia' da' nape Xi'in Diosen'

¹⁹ Na' gož Jesúsen' legaque':

— Chnia' le'e to da' zejen, bibi chac gona' to gualaza'. Con da' chle'eda' chon Xan', lenna' chona', na' bite'teze da' chon Xan', lenna' chona', le neda' naca' Xi'ine'.

²⁰ Chaque Xan' neda' na' chlo'ede' neda' yogo' dan' chone'. Na' gwlo'ede' da' zaca'ch ca' da' quinga da' gona' cont yebanele.

²¹ Ca Xa' Diosen' chosbane' bene' ladjo bene' guat ca', ca'cze chona' neda' naca' Xi'ine', chnezjua' yela' mban che note'tez bene' chbeja' cont gata' yela' mban chegaque'.

²² Na' Xan' bi chchoglagüe' che ne to bene' še nape' dola', san ba gwlo'e lo' na' choglagua' che yogo' benač še non' nap dola'.

²³ Xan' chaclaže' yogo' bene' yesonxene' neda' lecze can' chesonxene' le'. Na' bene' bi chonxen neda', ne Xa' Diosen' bi chonxene', le le'na' gwsele' neda'.

²⁴ 'Chnia' le'e to da' zejen, bene' chosozenag xtižan' na' chesejnilaže' Dios ben' gwseła' neda', de yela' mban chegaque' toli tocañe. Na' bi yesezaca'zi'e toli tocañe da' bi chesejnilaže'ne'. Bich zjanaque' ca' bene' guat len yichjlažda'ogaquen' da' bi chosozenague' che Diosen', san ba bocobe' yichjlažda'ogaquen' neche ba chesejnilaže'ne'.

²⁵ Chnia' le'e to da' zejen, gwžin ža cate' bene' zjanac ca' bene' guat len yichjlažda'ogaque' yesende' xtiža' neda' naca' Xi'in Dios, na' bene' yosozenag chia' gata' yela' mban chegaque' toli tocañe, na' bač chzolao chac ca' na'a.

²⁶ Xa' Diosen' zoacze' toli tocañe na' chone' cont zjamban benačhen', na' lecze ba bene' cont neda' naca' Xi'ine' zoa' toli tocañe na' chona' cont zjamban bene'.

²⁷ Na' lecze ba bene' neda' yela' chnabia' cont nia' non' nap dola', le ba gwsele' neda' golja' benač.

²⁸ Bi yebanele dan' chnia' nga, le gwžin ža cate' yogo'lo' bene' guat že' lo' ba yesende' cate' yol güiža'ne'.

²⁹ Na' bene' ca' goson da' güen šlac gosebane' yesyechoje' na' yesebane' toli tocañe. Na' bene' ca' goson da' mal šlac gosebane' yesyechoje' na' yesezaca'zi'e toli tocañe.

Jesúsen' bzejni'ide' nape' yela' chnabia'

³⁰ 'Bibi gac gona' to gualaza'. Chzenaga' bin' ža Xan' cont nia' che benačhen' noe' nap dola'. Na' dan' nia' gac che to to bene' naquen da' cheyala' gac, le bi chi'yichja' gac dan' chnalaža'; san chi'yichja' gac can' chnalaže' Xan' ben' gwseła' neda'.

³¹ Šaca' toz neda' chgua'a da' ba'li non' naca', bi naquen to da' šejle'le.

³² Perw zoa Xan' cho'e diža' li non' naca', na' nezda' diža' da' cho'e chia' naquen da' šejle'le.

³³ Bač gwseła'le bene' lao Juanna' cont jasenabde' le' nac nac chia', na' Juanna' be'e diža' li non' naca'.

³⁴ Perw neda' bi chyažjda' diža' da' güe' ne to benač chia'. San chnia' da' quinga cont le'e šejle'le chia' na' gata' yela' mban chele toli tocañe.

³⁵ Juanna' goque' ca to yi' da' chseni'chgua dan' bzejni'ide' le'e che Diosen', na' šlož daon' bebele dan' bsd blo'eden'.

³⁶ Na' de to da' choe' xtiža' da' zaca'ch ca diža' da' choe' Juanna' chia': chona' yogo|o| da' ba gwlo'o Xan' lo na' gona', na' da' ca' chonan' choen' diža' le Xan' gwsele' neda'.

³⁷ Nach Xan' ben' gwsela' neda' lecze cho'e xtižan', la' czla' bina' yenele can' chnen' na' bina' le'ele can' naquen'.

³⁸ Xtižen' bina' šon' lo' yichjlažda' olen', le bi chejnilaže'le neda' naca' ben' gwselen'.

³⁹ Chsedyañe'le gan' nyoj Xtiža' Diosen', le chaquele gaple yela' mban to|i tocañe neče chsedlen. Na' da' ca' chsedlen' zjanyojen chesoen' xtiža'.

⁴⁰ Perw bi chaclaže'le šejnilaže'le neda' cont gata' yela' mban chele to|i tocañe.

⁴¹ Na' neda' bi chyažjda' yesena beñačen' naca' bene' zaca'.

⁴² Nombi'a le'e na' nezda' bi chaquele Diosen'.

⁴³ Xan' ba gwsele' neda' chona' con da' že', perw bi chejle'le chia'. Na' cate' za'ac bene' cheson con bi da' ža xbab chegacze', nachle chejle'le chegaque'.

⁴⁴ žNacxe gac šejle'le chia'? le chzelaže'le yesena bene' chonle güen, na' bi chzelaže'le gonle cont toz Diosen' ne' chonle güen.

⁴⁵ Bi gonle xbab neda' gwcuiša' le'e lao Xan'. Da' Moisésen' hcuiše' le'e lagüen', le chsedchgual dan' bzojen' chaquele cont soale bin|o len Diosen', perw bi chejle'le xtižen'.

⁴⁶ Šaca' chejle'le xtiža' da' Moisésen', chia' neda'czen' chejle'le še ca', le xtiža' nedan' bzoje'.

⁴⁷ Na' da' bi chejle'le dan' bzoj da' Moisésen', žnacxe gonle šejle'le bi dan' žia' le'e?

6

Jesúsen' bguagüe' gayo' mil bene'

(Mt. 14:13-21; Mr. 6:30-44; Lc. 9:10-17)

¹ Gozde goc ca' Jesúsen' gweyje' yeš|a'a nisdao' che Galilea len bene' ca' zjanaque' le' txen. Na' nisdao' na' lecze nzin' Nisdao' Tiberias.

² Na' bene' zan zjanao' Jesúsen' da' ba besele'ede' yela' guac dan' chonen' cheyone' bene' güe' ca'.

³ Na' gwlo'e Jesúsen' to lo' ya'a len bene' ca' zjanaque' le' txen na' gosebi'e.

⁴ Na' da' yoble ba zoa gala' |ni che neto' bene' Israel da' nzi' pascw.

⁵ Na' cate' gwñ'a' Jesúsen' ble'ede' bene' zan ba zjanao' le' na' gože' Felipen':

— žGaxe si'cho da' yesagw yogo' bene' quinga?

⁶ Gwne' ca' yešque bi na' Felipen', le Jesúsen' nezeczede' naquen' gone'.

⁷ Na' Felipen' gože'ne':

— Chop gayoa denario yetextilen' bi gaquen yesyeche|e to toe' ne late' güejen.

⁸ Na' yeto ben' naque' Jesúsen' txen le Andrés na' naque' bene' biše' Simón Pedro. Na' Andrésen' gože' Jesúsen':

⁹ — Nga zoa to bi' byo dao' na' de gayo' yetextil de cebada chebe' na' yechope bel' ya'a. Perw žbi de gon da' quinga? le bene' zanna' že' nga.

¹⁰ Nach Jesúsen' gože' bene' ca' zjanaque' le' txen:

— Le ye' yogo'lo|e' yesebi'e.

Dechgua yixye latjen', na' gosebe' bene' ca' lo' yixyena' ca' do gayo' mil bene' byo, bi cuent no'ole len bidao'.

¹¹ Nach gwxi' Jesúsen' yetextil ca', na' beyož be'e yela' choxclen che Diosen' bnežjuen' bene' ca' zjanaque' le' txen cont goseyisen' len bene' ca' zjachi' na'. Na' lecze ca' bene' len bel' ya'a ca'. Na' goso'e to toe' con ca'te'te' gosac|aže' gosagüe'.

¹² Na' beyož gosagüe' ca'te'te' goseljde', Jesúsen' gože' bene' ca' zjanaque' le' txen:

— Le yotobe da' ca' bega'añ late' güeje cont bibi cuiayi'.

¹³ Nach bosyotobe' da' bixjw ca' dan' besyega'añ lao gayo' yetextil ca' de cebad, na' goquen šiz|ñw žome.

¹⁴ Cate' bene' ca' besele'ede' yela' guac dan' benen' nach gosene':

— Da' |i bengan' choe' xtiža' Dios na' naque' ben' ba gwlezcho se|a' Diosen' yež|io nga.

¹⁵ Na' cate' Jesúsen' gocbe'ede' ba zoa yeseche'ə|xoxje' le' cont yesone' le' rey chegaque', nach gozze'e gozeje' ya'adaon' toze'.

Jesúsen' gwze'e lo nisdao'n'

(Mt. 14:22-27; Mr. 6:45-52)

¹⁶ Cate' ba gwxi'n, bene' ca' zjanaque' Jesúsen' txen jaya'aque' cho'a nisdao'n'.

¹⁷ Na' besyeyo'e to lo' barcw zjaya'aque' ciuda Capernaum. Ba go| na' Jesúsen' bina' yežine'.

¹⁸ Na' chas chata' chac nisdao'n' le cheh|jchgua be'.

¹⁹ Ba goc sša zjaya'aque' len barcon' lo' nisdao'n' cate' besele'ede' ba zjajda Jesúsen' cheze'e lo nisen' gala'ze gan' zej barcon'. Na' besežebe'.

²⁰ Na' gože' legaque':

—Nedan', bi žeble.

²¹ Nach chesyebede' besyegü'e'ene' lo' barcon'. Na' la' besyežintie' ga nac yo biž cho'a nisdaon' gan' zjaya'aquen'.

Bene' zan chesyeyiljue' Jesúsen'

²² Na' beteyo bene' zan bene' ca' besyega'an yešla'a cho'a nisdaon' gosache'ede' nono Jesúsen' nla' na' gosache'ede' hibi barcw yoble gota'ch san toga dan' besyeyo'o bene' ca' zjanaque' Jesúsen' txen, na' zjanezde' Jesúsen' bi beyo'e len legaque' lo' barcon'.

²³ Nach besežin barcw da' za'ac ciuda Tiberias gała'ze gan' gosagüe' yetextilen' caten' beyož be' Xancho Jesúsen' yela' choxclen che Diosen'.

²⁴ Na' cate' gota'bia' nono Jesúsen' bežel gan' nite'na' nach besyeyo'e lo' barcw ca' ja'aque' Capernaum cont besyeyiljue' Jesúsen' do na'.

Yela' guagw da' chnežjon bene' yela' mban toli tocanē

²⁵ Na' cate' bene' zan ca' besyēzede' Jesúsen' yešla'ale nisdaon' nach gose'e le':

—Maestrw, žbatca' bla'o nga?

²⁶ Na' Jesúsen' gože' legaque':

—Chnia' le'e to da' zejen, cheyiljwle neda' neche dan' gwdagwle ca beljele na'zen', gague neche chejle'le chia' lagüe ba ble'ele yela' guac ca' ba benan'.

²⁷ Bi cheyała' cuecyichjle gata' da' ye'ej gagwle da' chbiayi', san cuecyichjle gata' da' gon yela' mban chele toli tocanē. Diosen' gwsele' neda' golja' benach na' neda' gona' to da' ye'ej gagwle cont gata' yela' mban chele toli tocanē. Na' Xa' Diosen' ba blo'e naca' ben' ba gwsele'.

²⁸ Na' gose'ene':

—ŽBi cheyała' gonto', cont yebe Diosen' neto'?

²⁹ Na' gož Jesúsen' legaque':

—Da' nga gonle cont yebe Diosen' le'e, šejnilaže'le neda' naca' ben' gwsejen'.

³⁰ Na' gose'e Jesúsen':

—ŽBi yela' guac gono' še ca' cont le'eto' na' šejnilaže'to' le'? ŽBi gono'?

³¹ Da' xoxta'ocho ca' gosagüe' yela' guagw da' nzi' maná šlac gosenite' latje dašen', na' nyoj Xtiža' Diosen' chegaquen', žan: "Yela' guagw da' za' yaban' be'e legaque' gosagüe'."

³²⁻³³ Nach Jesúsen' gože' legaque':

—Chnia' le'e to da' zejen, gague da' Moisésen' bnežjue' da' xoxta'ocho ca' yela' guagon', san Xa' Diosen' bnežjuen' legaque'. Na' bi nacho lenna' zan' yaba gan' zoe'na', san de to yela' guagw da' ba gwseła' Diosen' na'a da' za' yaban' na' betjen yežlion', na' chnežjon yela' mban che note'teze bene' chesagw len.

³⁴ Nach bene' ca' gose'e le':

—Bene', beňšca neto' yela' guagon' žo' ca' gagwton' yogo' ža.

³⁵ Nach Jesúsen' gože' legaque':

—Neda' naca' yela' guagw da' chnežjon bene' yela' mban toli tocanē. Note'teze bene' yosozenag chia' na' yesejnilaže' neda', guata' da' chyažje yichjlažda'ogaque' toli tocanē.

³⁶ Na' ba gwniczla' le'e, la'czla' ba ble'ele neda' bi chejnilaže'le neda'.

³⁷ Yogo' bene' chbej Xan' cont yesaque' neda' txen, chžin ža chesejnilaže' neda'. Na' note'teze bene' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'.

³⁸ Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwseła' neda'.

³⁹ Len' chaclaže' bi gua'a latje cuiayi' ne toze bene' ba gwleje' cont yesaque' neda' txen. Nach cate' žin ža te che yežlion' cana' yosbangaca'ne' ladjo bene' guat še ba gosate'.

⁴⁰ Xan' chaclaže' yogo'lol bene' yesejni'ide' non' naca' na' yesejnilaže' neda' cont gwnežjue' legaque' yela' mban toli tocanē, na' neda' yosbana' legaque' ladjo bene' guaten' še ba gosate' cate' žin ža te che yežlion'.

⁴¹ Na' zan bene' Israel gualaž cheto' legacze' besežeše' che dan' gwna Jesúsen': "Neda' naca' yela' guagw da' za' yaba."

⁴² Gosene':

—ŽGague bengan' Jesús xi'in José? Nombia'cho xaxna' benga. ŽBi dižan' cho'e že' ze'e yaba betje' yežlio?

⁴³ Nach Jesúsen' gože' legaque':

—Bich žešele chia'.

⁴⁴ Nono gac yesejnilaže' neda' še Xan' ben' gwsele' neda' bi gaclene' legaque' yesejnilaže', na' cate' žin ža te che yežlion' yosbana' legaque' še ba gosate'.

⁴⁵ Le'e gan' bosozoj bene' ca' goseyixjue'ede' xtiža' Diosen' cani' žan: "Yogüe' Diosen' gwsed gwlo'ede' legaque'." Na' yogo' no yeseneze can' ža Xan' na' yosozenague' cont yesone' can' že'na', lecz yesejnilaže' neda'.

⁴⁶ Bi načo zoa bene' ba ble'ede' Xan'. Toza' neda' ba ble'eda'ne', le za'a gan' zoen'.

⁴⁷ Chnia' le'e to da' zejen, bene' chesejnilaže' neda', de yela' mban chegaque' toli tocaṇe.

⁴⁸ Neda' naca' yela' guagw da' chnežjon yela' mban toli tocaṇe che benachen'.

⁴⁹ Da' xozxta'ocho ca' gosagüe' yela' guagw da' nzi' maná ślac gosenite' latje dašen', na' bia'cze gosat yogüe'.

⁵⁰ Neda' cho'a diža' che to yela' guagw da' za' yaban' na' bene' chagw len bi gate'.

⁵¹ Neda' naca' yela' guagw dan' za' yaban' dan' nsa' yela' mban toli tocaṇe. Bene' šejnilaže' neda', bane' toli tocaṇe. Na' yela' guagw da' chnežjua' cont gata' yela' mban che benachen' naquen cuerp chia'.

⁵² Nach bene' Israel gualaž cheto' ca' legacze' besežeše', gosene' che':

—¿Nacxe gone' gone' cuerp chen' gagwchon?

⁵³ Jesúsen' gože' legaque':

—Chnia' le'e to da' zejen, Diosen' gwsele' neda' golja' benach, na' še bi chagwle cuerp chian' na' še bi che'ejle xchenan', bi de yela' mban chele toli tocaṇe.

⁵⁴ Bene' chesagw cuerp chian' na' chese'eje' xchenan' de yela' mban chegaque' toli tocaṇe, na' še ba gosate', cate' te che yežlion' yosbana' legaque' ladjo bene' guat ca'.

⁵⁵ Le cuerp chian' naquen dogualje yela' guagw, na' xchenan' naquen dogualje da' ye'ejle.

⁵⁶ Bene' ca' chesagw cuerp chia' na' chese'eje' xchenan' de yela' mban chegaque' toli tocaṇe, na' zjanaque' txen len neda' na' neda' naca' txen len legaque'.

⁵⁷ Xa' Diosen' gwsele' neda' na' de yela' mban chia' da' naca' toze len le'. Na' ca'cze gac len bene' yesagw cuerp chian', yesenite' toli tocaṇe dan' zjanaque' txen len neda'.

⁵⁸ Cuerp chian' naquen yela' guagw da' za' yaba. Na' len bi naquen ca' da' gosagw da' xozxta'ocho ca' latje dašen', le bene' gosagw len bia'cze gosate'. Na' bene' chesagw yela' guagw dan' žia' ca', yesenite' toli tocaṇe.

⁵⁹ Jesúsen' bšed blo'ede' da' ca' lo' yodao' che bene' Israel gualaž cheto' ca' da' zoa Capernaum.

Xtiža' Jesúsen' chnežjon yela' mban toli tocaṇe che bene' chosozenag chen

⁶⁰ Na' zan bene' ca' zjanao' Jesúsen', cate' gosende' da'na' chzejni'ide' legaque', gosene':

—Zdebechgua naquen goncho dan' chzejni'iden'. ¿Noxen' gac gon can' žen'?

⁶¹ Gočbe'e Jesúsen' chesenie' che' dan' bzejni'ide' legaque' da' ca', na' gozne':

—¿Bi chazlaže'le can' ba gwnian'?

⁶² ¿Nacxe nale cate' le'ele neda' yeyepa' gan' gwzoo' cana'? neda' naca' ben' gwsele' Diosen' golja' benach.

⁶³ Spiritw chian' chnežjon benachen' yela' mban, na' cuerp chian' bi gac gonen ca'. Diža' dan' bach bia' len le'e zjazacan' len yichjlažda'olen' cont banle toli tocaṇe še šejle'le chen.

⁶⁴ Perw ne' nita' halle bi chejle'le.

Jesúsen' gwne' ca' le gočbe'ede' cate' gosezolao bene' ca' gosedalene' le' noe' bi chesejle'e che' na' noe' gwdie'ne' lo na' bene' ca' cheseque'ede' le'.

⁶⁵ Na' gozna' Jesúsen':

—Chac can' ba gwnian', nono gac šejnilaže' neda' še bi gaclen Xa' Diosen' le' cont šejnilaže'nda'.

⁶⁶ Beyož bzejni'i Jesúsen' legaque' da' ca', zan bene' ca' ba chosozenag xtižen' gosebejyichje' bich bosozenaguen'.

⁶⁷ Nach Jesúsen' gože' šižinw bene' ca' gwleje' cont gosaque' le' txen:

—¿Len le'e chaclaže'le yeyejle'?

⁶⁸ Na' gož Simón Pedron' le':

—Xanto', noch no zaca' gwzenagto' xtižen'. Tozo' le' cho'o diža' da' chnežjon yela' mban che bene' chzenague' chen.

⁶⁹ Neto' chejnilaže'to' le' na' nezeto' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocaṇe.

⁷⁰ Na' Jesúsen' gože' legaque':

—Ba gwleja' le'e šižinwle cont zoale len neda' na' nezda' tole chzenagle che gwxiyen'.

⁷¹ Gwne' ca' che Judas Iscariote ben' naque' xi'in to bene' le' Simón, le gwnezde' Judasen' ba naquen gwdie' le' lo na' bene' ca' cheseque'e le', na' Judasen' naque' to bene' šižinw ca'.

7

Bene' biše' Jesúsen' bi gosejnilaže' le'

¹ Gwde na' Jesúsen' gwdacze' bšed blo'ede' ben' že' distritw Galilean'. Bich goclaže' šejche' Judean', le bene' gwnabia' che nación Israel cheton' že' na' chesejiljue' nacle yesone' yesote'ne'.

² Na' ba zoa gała' lni che neto' bene' Israel da' nzi' Lni che Ranšw Yix.

³ Na' bene' biše' Jesúsen' gose'ene':

—Bitw yega'ano' nga. San gwey Judean' cont bene' ca' chosozenag chio' yesele'ede' yela' guac dan' chonon'.

⁴ Note'teze bene' še chaclaže' yesache'e bene' naque' to bene' zaca', bi gone' yela' guac bagaše'ze. Še da' li chono' yela' guac, ben cont yesele'e yogo'lol bene' can' chonon'.

⁵ Bene' biše' Jesúsen' gose'ene' ca', le ne legaque' bi gosejnilaže'ne'.

⁶ Nach gož Jesúsen' legaque':

—Biña' žin ža ša'a, san le'e guac šja'acle bate'teze.

⁷ Bene' ca' bi zjanombi'e Diosen' bi gac yesegue'ede' le'e, san chesegue'ede' neda', le chzejni'ida'ne' chesone' da' xinj.

⁸ Le šja'ac lñin'. Neda' bi sa'a na'a, le biña' žin ža chia'.

⁹ Beyož gože' legaque' ca' bega'ane' Galilean' yeto chop ža.

Jesúsen' gweyje' Jerusalén gan' yo'o lñin'

¹⁰ Nach gwde gosa'ac bene' biše' ca' zja'aque' lñin' gwza' Jesúsen' len bene' ca' zjanaque' le' txen zja'aque' lñin', perw bi ja'aque' can' nla'ze san bagaše'ze.

¹¹ Na' bene' gwnabia' che nación Israel cheton' že' Jerusalénna' besyeyiljue' le' lo lñin', chesene':

—¿Gaŋxe bena'?

¹² Na' bene' ca' zjandop zjanžag lo lñin' šižize goso'e diža' che Jesúsen', na' gague toze ca gosene'. Bale' gosene': "Naque' bene' güen", na' bale' gosene': "Bi naque', chonlede' bene'."

¹³ Na' goso'e diža' šižize che Jesúsen', le yogo'ze bene' chesežebe' bi yesone bene' gwnabia' ca' legaque' še yesache'ede' cheso'e diža' güen che Jesúsen'.

¹⁴ Na' do gašje zej lñin' cate' gweyje' Jesúsen' gan' zoa yodao' blao che neto' bene' Israel na' gwzoloa chsed chlo'ede'.

¹⁵ Na' besyebane bene' gwnabia' ca', gosene':

—¿Nacxechen' da' zan neze benga? le gague bi nsenden'.

¹⁶ Na' Jesúsen' gože' legaque':

—Dan' chsed chlo'edan' bi naquen xbab checza', san naquen xbab che bene' gwseła' neda'.

¹⁷ Note'tez bene' chesaclačže' yesone' can' chazlačže' Dios ben' gwseła' nedan', guache'ede' še dan' chsed chlo'edan' zan' che Dios o še naquen da' chaljlačže'za'.

¹⁸ Cate' to bene' chsed chlo'ede' xbab checze', cheyiljue' nacle gone' cont gacxene'. San cate' to bene' chaclaže' gacxen bene' gwseła' le', nezecho xtižen' naquen da' li na' bi chziye'e.

¹⁹ Da' Moisésen' bene' le'e ley dan' nsendlen' perw ne tole bi chonle can' žanna'. ¿Bixchen' cheyiljwle nacle gonle gotlenda'?

²⁰ Bene' ca' že'na' gose'ene':

—Yo'o da' xigüen', nan' chol chñenošo'. ¿No chaclaže' got le'?

²¹ Jesúsen' gože' legaque':

—Toz yela' guac da' bena' ža che Dios cate' bi de lsens gon chio' bene' Israel žin, na' yogo'le chebanelle.

²² Da' Moisésen' bene' mandadw soacho señw dan' že' circuncisión (la'czła' bi gwzoloa señon' len le' san len da' xozxta'ocho ca' bene' gwnita' cani'te), na' da'nan' chozale bi byo dao' ca' señwna' ža che Dios.

²³ Can' naquen, la'czła' še naquen ža che Dios, chzoale no bi' byo dao' señw cate' chaquebe' xono' ža cont chonle can' ža ley dan' bzoj Moisésen', na' ¿bixchen' chža'ale neda' dan' ba beyona' to bene' güe' ža che Diosen'?

²⁴ Bi cheyala' yosbaga'le bene' che da' chle'ele chone', le bi nezele še chazlačže' Diosen' can' chone', san le nabyane' cont nezele bi ža Diosen', nachen' gache'ele non' cheyala' yosbaga'le.

Jesúsen' gwne' ze'e gan' zoa Diosen'

²⁵ Nach to chope bene' Jerusalén ca' gosene':

—¿Gague benga ben' cheseyiljue' cont yesote'ne'?

²⁶ Le na' can' cho'e dižan' lao yogo' bene' na' bibi chese'e le'. ¿Gague ba cheson bene' gwnabia' checho xbab le naque' Cristo ben' chbezcho yedenabia'?

²⁷ Perw nezecho ga bene' benga, na' cate' yid Criston' nono yeseneze ga bene' le'.

²⁸ Jesúsen' chsed chlo'ede' chalšil che yodao' blao cate' gosene' ca'. Nach gwne' zižje gože' legaque':

—Chaquele nombia'le neda' na' chaquele nezele ga bene' neda'. Perw gague con za'a to gualaza'. Da' li zoa bene' gwsele' neda', na' le'e bi nombia'le'.

²⁹ Neda' nombi'ane', le za'a gan' zoen' na' le' gwsele' neda'.

³⁰ Na' da' gwne' ca' bal' bene' gosaclaže'chgüe' yesezene' le', perw nono gwzen le' da' biña' žin ža gague' lo na'gaquen'.

³¹ Na' bene' zan gosejle'e Jesúsen' naque' bene' gwseła' Dios, na' gosene':

—Cate' yid Criston' ¿gonche' yela' guac da' zaca'ch ca da' chon benga?

Bene' chesape' yodao' blaon' ja'aque' cont šjasexene' Jesúsen'

³² Bene' fariseo ca' gosende' diža' cheso'e bene' ca' che Jesúsen'. Da'nán' bosoxi'e len bene' ca' zjanac bꝁoz gwnabia' che nación Israel cheton' na' gosesele' bene' chesape' yodao' blaon' cont šjasexene' Jesúsen'.

³³ Nach Jesúsen' bsd blo'echde' bene' ca' že'na', gwne':

—Soacha' yeto tiemp dao' len le'e nach yeya'a gan' zoa ben' gwseła' neda'.

³⁴ Na' yeyiljwle neda' na' bi yezelele neda', le gan' soan' bi gac yidle.

³⁵ Nach bene' gwnabia' che nación Israel cheton' gose' lježe':

—¿Gan' chacde' yeyeje' ga bi yezelechone'? ¿Yeyeje' gan' zjanaslas bene' gualaż checho ladjo bene' griego ca' na' gwsed gwlo'ede' legaue'?

³⁶ ¿Bi zejen dan' gwnen': "Yeyiljwle neda' na' bi yezelele neda' na' gan' soan' bi gac yidle"?

Jesúsen' be'e diža' che Spiritw che Diosen'

³⁷ Ža cate' zelao chesone' ĩnin' naquen ža xench, na' Jesúsen' zeche' chsed chlo'ede' na' gwne' zizje, gwne':

—Note'tezle še lo' yichjlažda'olen' nacle ca bene' chbilláže', cheyala' šejniláže'le neda' na' gona' le'e yela' mban toli tocané, na' lenna' gaquen lo' yichjlažda'olen' ca to nis da' gwbat cheyo'ojen cont bich gacle ca to bene' chbilláže'.

³⁸ Le'e chejniláže'le neda', gac chele can' ža Xtiza' Diosen' da' nyojen, to da' güen juisyw gac lo' yichjlažda'olen' cont gacle ca to yežlio ga chaldi nis, gan' de zan yegw da' cheseyilen len.

³⁹ Na' dan' gwna Jesúsen' ca' be'e diža' che Spiritw che Diosen' da' yedesoa lo' yichjlaždao' note'tezcho chejniláže'chone'. Na' caten' gwne' ca' Spiriton' biņa' yedesoa lo' yichjlaždao' bene', le biņa' gac yogo' da' cheyala' gac cont gacbia' Jesúsen' naque' bene' zaca' juisyw.

Gosaque' chople neche Jesúsen'

⁴⁰ Bene' ca' chosozenag xtiža' Jesúsen' bale' gosene':

—Da' li benga naque' ben' choe' xtiža' Diosen' ben' naquen yide'.

⁴¹ Na' yebale' gosene':

—Benga Criston' ben' naquen yedenabia'.

Perw yebale' gosene':

—¿Bixe nacho bene' Galilea ba gwlej Diosen' cont yedenabi'e chio'?

⁴² Xtiža' Diosen' da' nyojen žan Criston' ben' yedenabi'e choje' lo diaža che da' rey David na' gaque' bene' Belén gan' nac laž da' David.

⁴³ Can' goc bene' ca' gosaque' chople neche Jesúsen'.

⁴⁴ Na' bale' gosacáže' yesezene'ne', perw nono gwzen le'.

Bene' gwnabia' che nación Israelen' bi gosejle'e che Jesúsen'

⁴⁵ Na' bene' chesape' yodao' blaon' jaya'aque' gan' nita' bꝁoz gwnabia' ca' len bene' fariseo ca', le bene' can' gosesele' legaue' cont yesezene' Jesúsen'. Na' bene' ca' gose'e legaue':

—¿Bixchen' bi nche'elne'?

⁴⁶ Na' bene' chesape' yodao' blaon' gose'ene':

—Biņa' yenetó' bene' cho'e diža' güen ca dan' choe' bena'.

⁴⁷ Nach bene' fariseon' gose'e legaue':

—¿Lente le'e ba gwxiye'e?

⁴⁸ Ne toz neto' nacto' bene' fariseo biņa' šejle'to' xtižen' na' neca bene' gwnabia' chechon', ne toze' biņa' šejle'e xtižen'.

⁴⁹ Perw bene' quinga že' nga bi zjanombi'e ley dan' bzoj da' Moisésen' na' ba zjambiyae'e, da'nán' chesejle'e xtižen'.

⁵⁰ Na' Nicodemo ben' gwyey lao Ješusen' šeže'le naque' txen len bene' gwnabia' ca'. Na' Nicodemon' gože' legaue':

⁵¹ —Ley chechon' bi choen' latje choglaochó che to bene' ba ben da' mal še biņa' güe'e diža' naquen' goc na' še biņa' nezecho bi dan' bene'.

⁵² Nach yezica'chle bene' gwnabia' ca' gose'e le':

—¿Leno' le' ba beyaco' bene' Galilea? Bsd Xtiža' Diosen' da' nyojen na' nezdó' ne to bene' choe' xtiža' Diosen' ca' na' choje' Galilean'.

⁵³ Nach besyeya'ac to toe' jaya'ac ližgaue'.

8

No'olen' besyedo'le'de' len xtoe'

¹ Na' Jesúsen' gwyeye' ya'a da' nzi' Ya'a Olivos.

² Na' beteyo cate' gwyeni' gwyeye' yodao' blaon' da' yoble na' yogo' bene' ca' ze' na' gosebigue' lagüen' na' gwchi'e na' gwzologüe' chsed chlo'ede' legaue'.

³ Nach bene' chososed chosolo'e ley dan' bzoj da' Moisésen' na' bene' fariseo ca' jasesane' to no'ole bene' besyedole'de' len xtoe'. Na' bosozече' le' gachol bene' ca' chosozenag che Jesúsén'.

⁴ Na' gose'e Jesúsén':

—Maestrw, no'ole nga ba bedole'to' delene' xtoe'.

⁵ Na' ley chechon' da' bzoj Moisésen' žan cheyala' gotcho no'ol ca' cheson ca' gwchelchone' yej. Na' žbi žo' le'? žbix cheyala' gonechone'?

⁶ Gose'e Jesúsén' ca' da' gosaclaže' yesebeje' le' diža' da' yosočhine' yesagüe' xya che'. Na' Jesúsén' con bcheque' bzoje' lo' yon' len xbene'.

⁷ Na' bene' ca' gosone' byen gosenabchde' le' bi že'. Nach Jesúsén' bebe'šagüe' na' gože' legaue':

—Guaque con note'tezle bi de xtoła'le solaole gwchellene' yejen'.

⁸ Nach bcheque' da' yoble bzojche' lo' yon'.

⁹ Na' bene' ca' zjanče' no'olen' cate' gosende' can' gož Jesúsén' legaue', zjanezde' lecze ba zjanoncze' da' xinj, nach tgüeje' tgüeje' besyechoje' gwzolaotequen' len bene' golech na' bžinten len bene' xcuide'ch, nach bega'an yetoze no'olen' len Jesúsén' gan' že' bene' ca' chsed chlo'ede'.

¹⁰ Nach Jesúsén' bebe'šagüe' da' yoble na' ble'ede' noch no'ole' ca' zjanla' na' gože' no'olen':

—No'ole, žganxe bene' ca' chosocuiš le'? žNe toe' bi beň le' castigw?

¹¹ Na' no'olen' gože'ne':

—Ne toe', bene'.

Na' Jesúsén' gože'ne':

—Ne neda' bi gona' le' castigw. Beyej na' bich gono' da' malen'.

Jesúsén' nse'e be'ni' che yichjlaždao' benačh

¹² Jesúsén' gozo'e diža' da' yoble chzejni'ide' bene' ca' že' na', gwne':

—Neda' nsa'a be'ni' che yichjlaždao' benačhen'. Bene' zjanaque' neda' txen bich zjanaque' ca' bene' yichjlaždao' lchoł bene' cheson da' xinj, san lo' yichjlažda'ogaque' naquen ca to da' yo'o be'ni'. Da'nan' ba de yela' mban chegaque' toli tocané.

¹³ Nach bene' fariseo ca' gose'e Jesúsén':

—Cho'o diža' che cuino' naco' bene' zaca', na' da'nan' bi naquen to da' yesejle' bene'.

¹⁴ Na' gož Jesúsén' legaue':

—La'czla' cho'a diža' che cuina', xtižan' naquen da' li. Neda' nežda' gan' gwza'a na' gan' yeya'a, perw le'e bi nezele gan' za'a na' gan' yeya'a.

¹⁵ Le'e chosbaga'le neda' con can' chon benačhen' xbab, san neda' nono chosbaga' bi da' yosbaga'.

¹⁶ Perw na' šaca' bi da' yosbaga' bene', gonan' ca' cheyala', le' bibi de da' chona' to gualaza', san chona' dan' ža' Xan' ben' gwseła' neda'.

¹⁷ Ley chechon' dan' chsedlen' žan cheyala' šejle'cho cate' chedił diža' da' chesoe' čhope testigw.

¹⁸ Na' nac chopto' choe'to' xtiža': neda' cho'a diža' che cuina' na' Xan' ben' gwseła' neda' lecze cho'e diža' čhia'.

¹⁹ Na' gose'ene':

—žGaxe zoa xaoň?

Na' gwna Jesúsén':

—Ne neda' ne Xan' bi nombia'le. Šaca' nombia'le neda' lecze nombia'le Xan'.

²⁰ Diža' ca' bsd blo'e Jesúsén' cate' ze' gala'ze gan' chesegüe'e mechw lo' yodao' blao che neto' bene' Israel. Na' nono gwzen le', le' biña' žin ža' gaque' lo' na' bene' chesegue'ede' le'.

Jesúsén' gože' legaue' bi gac šjaya'aque' gan' yeyejen'

²¹ Nach Jesúsén' gože' legaue':

—Neda' yeya'a, na' yeyiljwle neda' perw bi gac yeyejle gan' yeya'an, le' biña' yetinjele xtoła'len' cate' žin ža' gatle.

²² Na' da' gwne' ca' bene' gwnabia' che naciön Israel čheton' gosene':

—žYeyot cuinen' že' gan' yeyejen' bi gac šejcho?

²³ Nach Jesúsén' gože' legaue':

—Le'e nacle bene' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'.

²⁴ Da'nan' gwnia' biña' yetinjele xtoła'len' cate' žin ža' gatle. Le' še bi šejle'le neda' naca' doxen can' gwnian', gatle biña' yetinjele xtoła'len'.

25 Nach gose'e Jesúsen':

—¿Nox naco' le'?

Na' gož Jesúsen' legaque':

—Zan ni'a ba gwnia' le'e non' naca'.

26 Ne' dech da' zan da' nia' cont gwzejni'ida' le'e naple doła'. Perw bene' gwseła' neda' nezde' yogo'loł na' cho'e diža' li, na' neda' cho'e lena' benachen' diža' da' ba benda' gwne'.

27 Bene' gwnabia' ca' bi gosejni'ide' cho'e lene' legaque' diža' che Xe' Diosen'.

28 Nach Jesúsen' gože' legaque':

—Cate' ba gwde gwłisle neda' to le'e yag, neda' naca' bene' gwseła' Diosen' golja' benach, cana'ch gacbe'ele le naca' ben' ba gwnia' le'e, na' gacbe'ele bibi chona' to gualaza', san con da' bzejni'i Xan' neda', lenna' žia'.

29 Xan' ben' gwsele' neda' zoacze' len neda'. Na' bi chbejyichje'nda', le bate'teze chona' da' chazlaže'.

30 Na' šlac Jesúsen' cho'e lene' bene' ca' dižan' nach bene' zan gosezolao chesejnilaže' le'.

Bene' ca' chnabia' da' malen' yichjlažda' ogaquen'

31 Nach Jesúsen' gože' bene' gualaž cheto' ca' bačh gosezolagüe' chesejnilaže'ne':

—Še soacze gonle can' ba gwnian', gwlo'en da' li nacle txen len neda'.

32 Na' še soacze gonle can' ba gwnian', nachen' šejni'ile diža' li chian' na' gaclenen le'e cont yechojle lo na' da' chnabia' le'e.

33 Bał bene' ca' gose'e Jesúsen':

—Neto' nacto' diaža che da' Abrahanna' na' nono na' soa bene' nabia' neto'. ¿Bixchen' žo' yechojto' lo na' da' chnabia' neto'?

34 Na' gož Jesúsen' legaque':

—Chnia' le'e to da' zejen, yogo' bene' cheson da' xin'j zjanaque' lo na' da' mal da' chnabian' legaque'.

35 Bene' zoa liž xan xšine' bi naque' xi'in ben' gan' chone' žinna', san šlož güeje zoe' txen len legaque' len bi da' chesone'. San bene' golje' txen len le', bate'teze zoe' len legaque'.

36 Neda' naca' dogualje Xi'in Dios na' guac gona' cont da' malen' bich nabi'an yichjlažda' olen' na' yechojle lo ne'en na' bich gaquen ca xanle.

37 Nezda' nacle diaža che da' Abrahanna', perw bia'cze chejyljwlaže' le nac gonle cont gotle neda'. Na' chonle ca' da' bi chzenagle xtižan'.

38 Neda' cho'a diža' che da' ca' ba ble'eda' cate' zoa' cuit Xan', na' le'e lecze chonle da' ba benele gwna xalen'.

39 Nach bene' ca' gose'e Jesúsen':

—¿Bixchen' žo' ca'? Neto' nacto' diaža che da' Abraham.

Na' gož Jesúsen' legaque':

—Šaca' nacle dogualje diaža che da' Abraham, gonle can' ben da' Abrahanna' šaca'.

40 La'czla' ba bzejni'ida' le'e diža' li da' benda' gwna Diosen', bia'cze chejyljwlaže' le nac gonle gotle neda'. Da' Abrahanna' bi bene' can' chonlen'.

41 Toz can' chonle len xalen'.

Nach bene' ca' gose'e le':

—Toz Diosen' naque' Xato' na' bi chzenagto' che nochle bene'.

42 Jesúsen' gože' legaque':

—Šaca' Diosen' naque' xale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'.

43 ¿Bixchen' bi chejni'ile dan' chnia' le'e? Nezda' bi chejni'ile dan' bi chaclaže' le gwzenagle chia'.

44 Satanás dan' chnabia' da' xigüe' ca' naquen xale, nachen' chebele chonle can' chnalažen'na'. Len ba naquen güet bene' cate' gwxxete yežlen'. Na' bi chzenaguen che diža' li, le diža' li bi yo'on lo' yichjlažda' oğüen. Cate' chnen diža' güenlaže' chnen con can' nac cuinen, le naquen güenlaže' na' yogo' diža' güenlažen' zan' len len.

45 Na' neda', da' cho'a diža' li, bi chejle' le chia'.

46 Bibi da' mal nona' na' da' nan' ne tole bi gac gwlo'ele še bi da' mal ba bona'. Neda' zoateza' cho'a diža' li, ¿bixchen' bi chejle' le chia'?

47 Bene' ca' chon Diosen' legaque' cuent ca xi'ine' chosozenague' xtižen'. Na' le'e bi chzenagle chen' da' bi nacle xi'ine'.

Ba zoacze Criston' cate' golje da' Abraham

48 Nach bene' gwnabia' che nación Israel cheton' gose'e Jesúsen':

—Can' ba gwnaczo' nachbia'cze naco' txen len bene' Samaria ca' na' yo'o to da' xigüe' lo' yichjlažda' oğüon' chonen ga chol chñenošo'.

⁴⁹ Jesúsen' gože' legaque':

—Bi yo'o da' xigüen' lo' yichjlažda'ogua', san chonxena' Xan' na' le'e chnele chia'.

⁵⁰ Bi chyljua' no gonxen neda', perw zoa Xan' chaclaže' beñaçhen' yesonxene' neda' na' Xan' choglagüen' chele nable doła' da' chnele chia'.

⁵¹ Chnia' le'e to da' zejen, note'teze bene' yosozenague' xtižan', guata'cze yela' mban çe' toli tocane.

⁵² Nach da' yoble bene' gwnabia' ca' gose'e le':

—Nach beyož gwñezeto' yo'o to da' xigüe' lo' yichjlažda'oguo' chonen ga chol chñenošo'. Ba got da' xozxta'ocho Abrahanna', na' len bene' ca' gosoe' xtiža' Diosen' cani' lecze ba gosate', na' chñenošo' žo' bene' chosozenag xtižon' gata' yela' mban çe' toli tocane.

⁵³ ¿Chacdo' zaca'cho' ca' da' xozxta'ocho Abrahanna' len bene' ca' gosoe' xtiža' Dios bene' ba gosat? ¿Noxen' chacdo' naco'?

⁵⁴ Gož Jesúsen' legaque':

—Šaca' chonxen cuina' bibi zejen, perw Xan' ben' žale naque' Dios ben' chejnilaže'le chonxene' neda'.

⁵⁵ Le'e bi nombia'ln'e, san neda' nombi'ane'. Šaca' nia' bi nombi'ane' gaca' bene' güenlaže' can' naclena'. Perw neda' nombi'ane' na' chzenaga' xtižen'.

⁵⁶ Da' Abrahanna' ben' žale nac xozxta'ole bebecgüede' gwñezde' le'ede' ba za'a len beñaçhen' na' zoe' mbalaz ba ble'eden'.

⁵⁷ Na' gose' bene' blao che nación Israel çeton' le':

—Bina' gacdo' šiyon iz. Chñenošo' žo' ba ble'edo' Abrahanna'.

⁵⁸ Jesúsen' gože' legaque':

—Chnia' le'e to da' zejen, ba zoacza' neda' cate' biña' galje Abrahanna'.

⁵⁹ Nach gosenize' yej da' yosochele' le', perw Jesúsen' bcuaše' na' beze'e yodaon'. Neca gosache'ede' cate' bedie' ladjagaque'.

9

Jesúsen' bene' cont ble'e to bene' golje' nçhole'

¹ Txen zej Jesúsen' len bene' ca' zjanaque' le' txen cate' besele'ede' to bene' byo golje' nçhole'.

² Na' gose'e Jesúsen':

—Maestrw, žnon' nap doła' golje benga nçhole', še le' o še xaxne'en'

³ Na' Jesúsen' gože' legaque':

—Benga golje' nçhole' gague da' nape' doła' na' gague da' zjanap xaxne'en' doła', san golje' ca' cont le'ele can' chon Diosen'.

⁴ Cheyala' goncho xšin Dios ben' gwseła' neda' šlac ne' de latje. Gwžin ža bich gała' gonchon.

⁵ Šlac ne' zoa' yežlion' chgua'a be'ni' lo' yichjlaždao' beñaçhen'.

⁶ Beyož gwne' ca' gwcho'oñ xene' lo' yon' na' bene' late' gona' len xene' na' gwdebe' gonan' yejlao bene' lçholen'.

⁷ Nach gože' ben':

—Gwyey jaydib yejlago' cho'a yel da' nzi' Yel Siloé.

(Na' Siloé zeje diža' Nseła'). Na' gwyeye' na' beyib yejlagüen' na' cate' beze'e zjayde' ba chle'ede'.

⁸ Na' bene' gualž çe' na' nochle bene' ba besele'e le' yogo' ža cate' ne' nçholen' gosene':

—¿Gague bengan' ba ble'echo chbe' chñabe' carida?

⁹ Na' bale' gosene':

—Le bengan'.

Na' yebale' gosene':

—Bi nac le' san yeto bene' yoblen', perw toz ca naque' len benga.

Perw ben' beyaquen' gože' legaque':

—Nedan'.

¹⁰ Na' gose'ene':

—¿Nac goquen' gwzolao chle'edo'?

¹¹ Na' gože' legaque':

—To bene' le Jesús bene' late' gona' na' gwdeben' yejlaguan' na' gože'nda': "Gwyey cho'a yel da' nzi' Yel Siloé na' jaydiben'." Na' gwya'a na' beyiban' na' gwzolao chle'eda'.

¹² Nach gose' bene' ca' le':

—¿Gaxe bena'?

Na' gože' legaque':

—Bi nežda'.

Bene' fariseo ca' gosenabyože' nac goquen' ba chle'ede'

¹³ Nach goseče'e ben' goc lchołen' gan' že' bene' fariseo ca'.

¹⁴ Nac to za che Dios caten' Jesúsen' bene' gonan' dan' gwdebe' yejlao bena' cont ble'ede' na' bi de ľsens gon neto' bene' Israel žin' za che Diosen'.

¹⁵ Na' bene' fariseo ca' ľecze gosenabde' le' nac goquen' ba chle'ede'. Na' gože' ľegaque':

—Gwdebe' gona' yejlaguan' na' jaydiban' na' na'a ba chle'eda'.

¹⁶ Nach bal bene' fariseo ca' gosene':

—Nezecho bi zoa Diosen' len bena' beyone' bene' lchołen', le chone' da' bi cheyała' gone' za che Diosen'.

Na' yebałe' gosene':

—¿Nac gon to bene' güen da' xinj gone' yela' guac ca dan' ben benga?

Na' ľegacze' besechoje' chop cuen.

¹⁷ Na' da' yoble gose'e ben' golje' nchołe':

—¿Bi žo' le' che ben' bene' cont chle'edo'?

Na' bena' gwne':

—Naque' to bene' choe' xtiža' Dios.

¹⁸ Na' bene' gwnabia' che nación Israel cheton' bi gosejle'e golje ben' nchołe' na' na'a bach chle'ede'. Nach gosaxe' xaxne'ena'.

¹⁹ Na' gosenabde' ľegaque', gose'ene':

—¿Xi'inle benga ben' žale golje' nchołe'? ¿Nacxe goquen' chle'ede' na'a?

²⁰ Xaxne'ena' gose'e ľegaque':

—Nezeto' bengan' xi'into', na' nezeto' golje' nchołe'.

²¹ Perw bi nezeto' nac goquen' ba chle'ede' na'a, na' neca nezeto' non' ben cont ba chle'ede'. Ba zejeczede' iz, le nabe cuine' cont güe'e diža' naquen' goc.

²² Xaxne'en gosene' ca' da' chesežebe' bene' gwnabia' ca', le bene' gwnabia' ca' ba gosechoglagüen' bi yosolebe' lo' yodaon' note'teze bene' güe'e diža' chejle'e Jesúsen' naque' Cristo ben' chesebeze' yedenabi'e.

²³ Da'nar' xaxne'en gosene': "Ba zejeczede', le nabe cuine'."

²⁴ Nach da' yoble gosaxe' ben' golje' nchołe' na' gose'ene':

—Be' diža' li lao Diosen', le bi naquen can' gwnao' bače. Nezeto' ben' gwnao' beyon le' naque' bene' güen da' xinj.

²⁵ Na' ben' beyac yejlagüen' gwne':

—Bi nezda' še naque' bene' güen da' xinj o še bi naque'. Da' nezda', goca' bene' lchoł na' na'a ba chle'eda'.

²⁶ Na' da' yoble gose'e le':

—¿Bi bende' le'? ¿Nac benen' chle'edo'?

²⁷ Na' gože' ľegaque':

—Ba gwnicza' le'e na' bi chzenagle. ¿Bixčhen' chaclaže'le yenian' da' yoble? ¿Len le'e chaclaže'le gwzenagle che'?

²⁸ Nach gosezi'diže' le', gosene':

—Le' naco' txen len le', san neto' nacto' txen len da' Moisés.

²⁹ Nezeto' Diosen' be'lene' Moisésen' diža', perw benga bi nezeto' ga ze'e.

³⁰ Na' ben' golje' nchołe' gože' ľegaque':

—¿Da' zaca' yebanecho, bi nezele ga za' benga, na' bene' cont chle'eda'!

³¹ Nezecho Diosen' bi chzenague' che bene' cheson da' xinj, san chzenague' che note'tez bene' chejnilaže' le', bene' cheson can' chnalažen'.

³² Na' gwzolaoten cate' gwxe yežlion' bina' yenecho zoa bene' chac chone' cont chle'e bene' golje' nchołe'.

³³ Šaca' bengan' bi ze'e gan' zoa Diosen' bibi gac gone'.

³⁴ Bene' fariseo ca' beselocchgüe' na' gose'e le':

—Len' goltio' naco' bene' mal juisyw, ¿chacdo' zaco' gwseddo' neto'?

Na' besyebeje' le' lo' yodaon'.

Bene' ca' zjančołyichjlažda'ogaque'

³⁵ Jesúsen' bende' diža' che ben' beyac yejlagüen' can' goc che' ba besyebeje'ne' lo' yodaon' nach jašague'ne' na' gože'ne':

—¿Chejnilažo' Xi'in Diosen' ben' gwswelen'?

³⁶ Na' gož ben' le':

—Bene', gwna neda' non', cont šejnilaža'ne'.

³⁷ Jesúsen' gože'ne':

—Nedan' ben' ba ble'eczede' na' nedan' choe'lena' le' diža'.

³⁸ Nach bena' bzoa xibe' benxene' Jesúsen', gwne':

—Xana', chejnilaža' le'.

³⁹ Nach Jesúsen' gwne':

—Za'a yežlio nga cont gata'bia' non' nap doła' na' non' bi nap doła'. Zedeyena' cont bene' ca' bi chesejni'i bich yesaque' ca bene' lchol, na' zedeyena' cont bene' ca' chesacde' chesejni'ide' yesaque' ca bene' lchol len yichjlažda'ogaquen'.

⁴⁰ Nach bał bene' fariseo ca' nita' gala'ze caten' gwne' ca' na' gosende' xtižen', gose'e Jesúsen':

—¿Chacdo' len neto' nacto' ca bene' lchol?

⁴¹ Nach Jesúsen' gože' legaue':

—Šaca' nacle ca bene' lchol, bibi xtoła'le de, san žale chejni'ile, na' da'nan' naple doła'.

10

Jempl che bene' güeye' xila' ca'

¹ Chnia' le'e to da' zejen, bene' bi cho'o lo' le'ej che xilan' gan' nac cho'a puerten' san chepe' ga yoble cont cho'e, benan' naque' bene' gwban.

² Ben' chsaljue' na' cho'e cho'a puerten', len' güeyoe' xilan'.

³ Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', le zjanombia'ba' ši'en cate' chaxe'ba' cho'e lagacba' cont chbeje'ba'.

⁴ Na' cate' ba gwleje' yogo'ba' lo' le'ejen', chbialagüe' laogacban', na' xila' che' ca' chesa'oba' le' da' zjanombia'ba' ši'en.

⁵ Bi chesa'oba' bene' yoble, san chosyoxonjba' dan' bi zjanombia'ba' ši'en.

⁶ Jesúsen' be'e diža' che bene' güeye' xila' ca' par bzejni'ide' bene' ca' že'na', perw bi gosejni'ide' bi zejen dan' gože' legaue'.

Jesúsen' zaca'lebbe' ca to bene' chyoe' xila' chen' binlo

⁷ Nach Jesúsen' bsd blo'echde' legaue' yeto, gwne':

—Chnia' le'e to da' zejen, nedan' naca' ca cho'a puert gan' cheso'o xila' ca' lo' le'ej chegacban'.

⁸ Yogo' nochle bene' ba goside' cate' za' yida' neda', bene' bosozejni'ide' diža' güenlaže', guac nacho zjanaque' bene' gwban. Perw bene' chesejnilaže' neda' bi chosozenague' xtiža' bene' ca'.

⁹ Neda' naca' ca cho'a puert che le'ej che xila' ca'. Na' note'tez bene' yesejnilaže' neda', gata' yela' mban chegaque' toli tocanē na' soacza' gaclena' legaue' bite'tez da' cheseyažjde'.

¹⁰ Bene' ca' žia' bene' gwban chesaclaže' yesone' cont bene' ca' žia' zjanaque' xila' chia' yesebejyichje' xtižan' na' yosozenague' che legaue'. Na' še yosozenague' che legaue', yesebiaye'e. Na' neda' za'a chnežjua' yela' mban toli tocanē che bene' chesejnilaže' neda' cont nite' güenchgua.

¹¹ Neda' binlo chgüia chna'a bene' chesejnilaže'nda' ca chon to bene' güeye' xila' bene' chyoe' xila' chen' binlo. Na' da' nži'ida' legaue', da'nan' chzane cuina' gata' neče' legaue'.

¹² Nita' bene' chesezi' laxjue' cont chosoyoe' xila' che bene'. Na' bene' chesezi' laxjue' chesebejyichje' xila' ca' cate' chesele'ede' za' beco'yo, le xila' ca' bi zjanacba' be chegaque'. Cheso'e latje chniz beco'yon' xila' ca' na' chesoslasba' legacba'.

¹³ Na' bene' bi zjanaque' xan xila' ca' chosoxonje' da' bi zjanži'ide' xilan', le bi zjanac xilan' be chegaque', san chosoyoeba' dan' chesezi' laxjuen'.

¹⁴ Neda' binlo chgüia chna'a bene' ca' chesejnilaže'nda', chona' ca chon to bene' chyoe' xila' chen' binlo. Na' nombi'a' bene' ca' chesejnilaže' neda' na' legaue' zjanombi'e neda'.

¹⁵ Nombi'a' legaue' ca Xan' nombi'e neda' na' neda' nombi'a' Xan'. Na' da' nži'ida' legaue' chzane cuina' gata' neče' legaue'.

¹⁶ Nita' bene' yoble bene' bi zjanaque' bene' Israel bene' yesejnilaže' neda'. Na' cheyał' šjatoba' legaue' cont yosozenague' chia', nach yesaque' toze len yezica'chle bene' ba chesejnilaže' neda' na' toz neda' gwgüia na'a yogo'lole'.

¹⁷ Chzane' cuina' yesot bene' neda', na' techle yebana' da' yoble. Na' Xan' chacchde' neda' le chazlaže' da' chona' ca'.

¹⁸ Nono checa'a yela' mban chian' san chzanlaže' cuina' gata'. Guac zane cuina' yesote'nda' na' lecz guac yeyas yebana' ladjo bene' guaten', can' non Xan' mandadw gona'.

¹⁹ Na' da' yoble bene' nación Israel cheton' besechoje' chople neče xtiža' Jesúsen'.

²⁰ Zane' gosene':

—Yo'o da' xigüen' yichjlažda'ogüe', nan' chol chñenoše'. ¿Bixchen' chzenagle xtižen'?

²¹ Na' yebale' gosene':

—Bene' yo'o da' xigüen' yichjlažda'ogüen' bi gac gwšalje' ca'. ¿Guac gon da' xigüe' cont le'e bene' lchol?

Beñe' gwnabia' che nación Israel besegue'ede' Jesúsen'

²² Na' cate' bžin ža gwyo'o lni dan' chesone' chjasyeze'ede' žan' beyož besyeyone' yodao' blaoc che Diosen', ba bžin tiemp zag Jerusalénna'.

²³ Na' Jesúsen' chde' chašil che yodao' blaon' gan' nzi' Chašil che Salomón.

²⁴ Na' bene' gwnabia' che nación Israel četon' gosečhje' Jesúsen' na' gose'ene':

—žBixčhen' chono' cont chacžejlaže'to' še naco' Cristo ben' chbezto' seļa' Diosen' cont yedenabi'e nación čechon'? Še len' Criston', gwnatega neto' zaca'lao.

²⁵ Na' gož Jesúsen' legaque':

—Ba gwnia' le'e na' bi chejle'le. Da' ca' ba bena' len yela' guac che Xan' chlo'en naca' bene' gwsele'.

²⁶ Perw bi chejle'le čhia' da' bi nacle txen len bene' chesejnilaže' neda', can' ba gwnicza' le'e.

²⁷ Nombi'a bene' chesejnilaže' neda', na' žia' legaque' xila' čhia'. Legaque' chosozenague' čhia' na' chesone' con can' chzejni'ida'ne'.

²⁸ Na' chnežjua' legaque' yela' mban toli tocaņe na' gwbat yesebiaye'e na' nono gac yesyeca'a legaque' lo na'.

²⁹ Xan' ba gwleje' bene' ca' chesejnilaže' neda' cont chgüia čhna' legaque'. Na' nono gac yesyeca'a legaque' lo na' Xan', le nape' la'zelagüe yela' chnabia' xen.

³⁰ Neda' na' Xan' toz bene' nacto'.

³¹ Beyož gwne' ca' bene' gwnabia' ca' gosenize' yej cont yosočhelenen'.

³² Na' gož Jesúsen' legaque':

—Da' zan da' güen ba ble'e'le bena' len yela' guac che Xan'. žChe nonna' chaclaže'le gwchelle neda' yej?

³³ Na' bene' gwnabia' ca' gose'e le':

—Gague che yela' guac ca' benon' gwchelto' le' yej san da' čhneya'o che Diosen'. Con beņačze le' na' chon cuino' ca Dios.

³⁴ Na' gož Jesúsen' legaque':

—Nezcezele can' nyoj Xtiža' Diosen' dan' nsedle gan' žan: "Neda' ba gwnia', le'e nacle ca neda' Dios."

³⁵ Na' Xtiža' Diosen' da' nyojen gague da' te čhen', na' lenna' žan Diosen' gwne' che bene' ca' bosozenag xtižen' cani' gosaque' ca le'.

³⁶ Diosen' gwleje' neda' cont gaclena' beņačhen' že' yežlio nga na' žnacxečhen' ža le'e čhneya'a che Diosen' da' žia' naca' Xi'ine'?

³⁷ Še dan' chonan' bi chlo'en yela' guac che Xa' Diosen', bi cheyaļa' šejle'le čhia' šeca'.

³⁸ Perw še chache'ele chona' da' zaca' len yela' guac che Diosen', cheyaļa' šejle'le len' gwsele' neda', la'czļa' bi chaclaže'le šejle'le xtižan'. Na' še šejle'le che da' ca' chonan', nachen' nezele zoa Xan' len neda' na' neda' zoa' len le', le toz benen' nacto'.

³⁹ Nach da' yoble gosacłaže' yesezene' Jesúsen' perw bitw bdole'.

⁴⁰ Jesúsen' beyeye' jayzoe' yešļa'a yegw Jordanna' latje gan' gwzoa da' Juanna' šlac ne' chzoe' bene' nis.

⁴¹ Na' bene' zan ja'ac gan' gwzoe' cont bosozenague' xtižen' na' gosene':

—Da' Juanna' ne to yela' guac bi bene', perw yogo'loļ dan' gwne' che benga naquen da' li.

⁴² Na' bene' zan gosejnilaže' Jesúsen' latje na'.

11

Can' goc cate' got Lázaro

¹⁻² Na' gwzoa to bene' goscene bene' yež Betania le' Lázaro. Betania naquen laž María na' bene' bile' Marta, na' legaque' zjanaque' bene' zan Lázaron'. María nan' bzoe' to set zix ni'a Xancho Jesúsen' na' bosbiže' ni'en len yiša' yichje'.

³ Na' bene' zan Lázaron' gosesele' diža' gan' zoa Jesúsen', chese'e le':

—Xanto', bene' xmigo' Lázaron' ba chacšende'.

⁴ Cate' gwneze Jesúsen' chacšene Lažaron', na' gwne':

—Ca nac yižgüe' čhen', bi che'eden' cont yela' goten' gonen le' gan, san che'eden' cont gache'ele catec bene' zaca' nac Diosen' na' gache'ele naca' bene' zaca'čgua, neda' naca' dogualje Xi'in Dios.

⁵ La'czļa' Jesúsen' chacde' Martan' len bene' bilen' na' len Lázaron',

⁶ cate' gwnežde' chacšene Lázaron', bega'anche' yechope ža gan' zoen'.

⁷ Nach gože' bene' ca' zjanaque' le' txen:

—Le šo'o šejcho distritw Judean' da' yoble.

⁸ Na' gose'ene':

—Maestrw, bi ža na'zen' bene' gwnabia' che nación chechon' gosacłaze' yesote' le' yosochel' le' yej. ¿Da' yoble šejjo' na'?

⁹ Jesúsen' gože' legaque':

—Lagüe žan' nsa' šiziw hor, na' bene' chda lagüe ža bi chčhegüe, le nseni' gwbižen' lo yežlion'.

¹⁰ Na' bene' chda ba goł chčhegüe, le nac chol.

¹¹ Gwde gwne' ca' nach gože' legaque':

—Bene' xmigwcho Lázaron' ba chtase' na' ša'a šjaysbana'ne'.

¹² Na' gose'ene':

—Xanto', še ba chtase' güeyacczede'.

¹³ Jesúsen' gwne' ca' dan' gwneзде' ba got Lázaron', na' bene' ca' zjanaque' Jesúsen' txen gosacde' še chtaszen'.

¹⁴ Nach Jesúsen' bochixgaten' bi zejenna' gwne' ca':

—Ba got Lázaron'.

¹⁵ Na' chebeda' bi gwzoa' na' ślac chacšende', cont gona' šejle'le chia'. Le šo'o šejcho gan' de'na'.

¹⁶ Nach ben' le' Tomás ben' bososi'e Tomás Cuaš gože' yezica'chle bene' ca' zjanaque' Jesúsen' txen:

—Le šo'o cont gatcho txen len Jesúsen' še yesote'ne'.

Jesúsen' že' chac chosbane' bene' guat

¹⁷ Na' ja'aque' Betanian' len Jesúsen', na' cate' besežine'na' bene' Betania ca' bosozende' le' ba goc tap ža bosocuaše' Lázaron'.

¹⁸ Betanian' chin' gała'ze Jerusalénna' ca do gašjw hor.

¹⁹ Na' bene' zan bene' gualaž chegaque' že' Jerusalénna' besežine' gan' zoa Martan' len Marian' cont yeso'e legaque' yela' chxenlaže' da' got bene' zangaquen'.

²⁰ Nach Martan', cate' gwneзде' Jesúsen' ba bžine' cho'a yežen', na' gwze'e jašague'ne'. Na' Marian' bega'ane' yo'ona'.

²¹ Nach Martan' gože' Jesúsen':

—Xana', šaca' zo' nga caten' gocšene bene' zanan' bilja gote' šaca'.

²² Na' nezda' la'czla' ba gote', bite'tez da' nabdo' Diosen' gone', gonczen'.

²³ Nach gož Jesúsen' le':

—Güeban bene' zanon'.

²⁴ Nach Martan' gože'ne':

—Nezda' yebane' cate' yesyeban bene' guat ca' žan' te che yežlion'.

²⁵ Na' gož Jesúsen' le':

—Neda' chac chosbana' bene' guat ca' le nsa'a yela' mban toli tocañe. Da'nan' bene' ca' yesejnilaže' neda', la'czla' yesate', guata' yela' mban chegaque' toli tocañe.

²⁶ Na' note'tez bene' nite' chesejnilaže' neda', gwbat yesebiaye'e. ¿Chejli'o da' nga chnia' le'?

²⁷ Na' gož Martan' le':

—Xana', chejli'a naco' dogualje Xi'iw Dios. Chejli'a naco' Criston' ben' ba gwlezto' seła' Diosen' yežlion' yedenabi'e.

Jesúsen' gwcheže' gan' bosocuaše' Lázaron'

²⁸ Beyož gwna Martan' ca' beyeje' jayeže' María bilen' šizize:

—Ba bla' Maestron' cho'a yežen' na' chnie' le'.

²⁹ Na' Marian' cate' bende' dan' gož Martan' le' la' gwza'te' na' gwejeje' gan' zoa Jesúsen'.

³⁰ Biña' žin Jesúsen' lagüe yežen' ca horen', ne' nga'ane' cho'a yežen' gan' jašag Martan' le'.

³¹ Na' bene' Jerusalén ca' nita' liž María, bene' cheso'e le' yela' chxenlaže' da' got bene' zanan', cate' besele'ede' gwza' Marian' nach gosa'aclene' le', gosacde' zeje' cho'a blojen' gan' ngaše' zjačeže'.

³² Na' Marian' cate' bžine' gan' zoa Jesúsen' na' ble'ede' le', la' bzoate xibe' lagüen', gože'ne':

—Xana', šaca' zo' nga caten' gocšene da' bene' zanan', bilja gote' šaca'.

³³ Na' cate' ble'e Jesúsen' chbež Marian' na' lecze chesebež bene' Jerusalén ca' za'aclene' le', da' juisyw da' goque Jesúsen' na' bžaglagüe' lo' yichjlažda'ogüen'.

³⁴ Na' gože' legaque':

—¿Ga bcuaše'lene'?

Na' gose'e le':

—Xanto', yo'o na' le'edo'.

³⁵ Na' gwchež Jesúsen'.

³⁶ Na' bene' Jerusalén ca' gosene':

—Le na' catequen' chacde' le'.

³⁷ Na' baļe' gosene':

—Bengan' bene' ga ble'e beņe' lchoļen', na' šaca' gwzoe' nga caten' gocšene Lázaron', benļje' cont bi gote'.

Jesúsen' bosbane' Lázaron' ladjo beņe' guaten'

³⁸ Na' da' yoble da' juisyw da' goque Jesúsen' lo' lažda'ogüen'. Na' gweyje' gan' bosocuaše' ben'. Naquen to bloj na' da' to yej cho'enna'.

³⁹ Na' Jesúsen' gože' beņe' ca':

—Le ca'a yejen'.

Na' Martan' bene' zan da' Lázaron' gože'ne':

—Xana', ba chl'a' ben' zigw, le bačh goc tap ža gote'.

⁴⁰ Na' gož Jesúsen' le':

—Ba gwnia' le' še šejnilažo' neda' na' le'edo' nac Diosen' beņe' zaca' juisyw.

⁴¹ Nach beņe' ca' goseque'e yejen'. Na' Jesúsen' gwņe'e yabale na' gwne':

—Xa', choxcleno' ba bzenago' chia'.

⁴² Nežda' yog'o' ni'a chzenago' chia', perw žia' ca' cont beņe' ca' že' nga yesejle'e len' gwseļo' neda'.

⁴³ Beyož boļ güiže' Diosen', gwņe' zižje, gwne':

—Lázaro, bechoj.

⁴⁴ Nach la' bechojte Lázaron' ndobyoy ni'a ne'en to cint de lache' na' to bay ndobe cho'alagüen'. Na' Jesúsen' gože' legaque':

—Le yožaše' lachen' na' le gwsane' yeyeje'.

Bosoxi'e yesezene' Jesúsen'

(Mt. 26:1-5; Mr. 14:1-2; Lc. 22:1-2)

⁴⁵ Na' zan beņe' Jerusalén ca' beņe' ja'aclene' Marían' besele'ede' yeļa' guac da' ben Jesúsen' na' gosejnilaže'ne'.

⁴⁶ Perw baļ beņe' Jerusalén ca' ja'aque' lao beņe' fariseo ca' na' jaseže' legaque' Jesúsen' bosbane' Lázaron'.

⁴⁷ Nach bħoz gwnabia' ca' che neto' bene' Israel len beņe' fariseo ca' bosyotobe' yog'o'loļ beņe' ca' chesenabia' nación četon'. Na' bosoxi'e gosene':

—¿Nac goncho? le yeļa' guac zan chon benga.

⁴⁸ Na' še nacho jayenna', yog'o'ze beņe' yesejnilaže'ne', na' yesid beņe' nación Roma na' yeseque'e yodao' blaō čechon' na' yosožiaye'e nación čechon'.

⁴⁹ Na' to beņe' gwnabia' zoa ca horen' le' Caifás. Le' naque' bħoz blaō lo izen'. Na' gože' legaque':

—Le'e gague bi nezele.

⁵⁰ Na' bi chache'ele napen chio' cuent toz ben' gat, clēl ca cuiayi' yog'o'cho lente nación čecho nga.

⁵¹ Gague con ca gwnalaže'ze Caifásen' gwne' ca', san da' naque' bħoz blaō iznan', Diosen' bene' ga gwne' ca' cont gwdixjue'ede' gat Jesúsen' neče nación četon'.

⁵² Na' ca nac dan' gaten', gague gate' neče nación četo' na'zen' san gate' cont yog'o' beņe' ba gwlej Diosen' yesaque' xi'ine' gate'teze nación, yesaque' txen yesejnilaže'ne'.

⁵³ Ca' goquen', žana' beņe' gwnabia' ca' gosezolagüe' bosoxi'e nacle yesone' yesote' Jesúsen'.

⁵⁴ Na' da'nān' Jesúsen' bich gwdacze' con can' nļa'ze gan' že' beņe' gwnabia' čhe nación četon'. Nach gwze'e distritw Judean' na' gwčhe'e beņe' ca' zjanaque' le' txen to yež da' nzi' Efraim da' chi' gaļa'ze latje dašen', na' besyega'ane' na'.

⁵⁵ Na' ba zoa gaļa' lni' pascw che neto' beņe' Israel. Na' beņe' zan beņe' za'ac to to yež zja'aque' Jerusalēna' cate' za' gaļa'le lni'n' cont yeson cuine' xilaže' can' ža ley četon'.

⁵⁶ Na' besyeyiljue' Jesúsen' do gan' zoa yodao' blaon' na' cate' bi besyeželde'ne' na' gose' lježe':

—¿Bi chaquele? ¿Güide' lni' nga, še bi yide'?

⁵⁷ Gosene' ca' le bħoz gwnabia' četo' ca' na' beņe' fariseo ca' ba gosečoguen' še note'tez beņe' nežde' gan' zoa Jesúsen' cheyaļa' gwzende' legaque' cont yesezene' le'.

12

Marían' chgüe'e set zix'ni'a Jesúsen'

(Mt. 26:6-13; Mr. 14:3-9)

¹ Na' yeħop ža za' gaļa' lni' pascon', Jesúsen' gwčhe'e beņe' ca' zjanaque' le' txen yež Betanian' gan' zoa Lázaron' ben' bosbane' ladjo beņe' guaten'.

² Na' baļ beņe' Betanian' bososini'e to xše' da' gwdagw Jesúsen' cont gosonxene'ne'. Na' Martan' bdie' yeļa' guagw na' Lázaron' gwčhe'lene' beņe' ca' cho'a mesen' txen len Jesúsen'.

³ Na' Marían', de ca do tya set zix che' da' zaca'chgua la'ay na' naquen dogualje da' bchoj lo yag yej da' nzi' nardo. Na' jabigue' gala'ze xni'a Jesúsén' na' gwlo'e set zixén' ni'ena' na' beyoza' bosbižen' len yiša' yichje'. Na' doxen yo'ona' gwla'chguan ze set zixén'.

⁴ Na' Judas Iscariote xi'in to bene' le' Simón, le' naque' to bene' šižinw ca' zjanaque' Jesúsén' txen, na' len' ba naquen gwdie' Jesúsén' lo na' bene' ca' chesegue'ede' le'. Na' Judasen' gwne: ⁵ —¿Bixchen' bi bete' seten' na' goñe' mechon' cont gaclenen bene' yaše'? le zacan' ca no laxjw mos da' gone' gan tgüiz.

⁶ Judasen' gwne' ca' gague da' beyaše'de' bene' yašen' san da' goque' bene' gwban. Len' beñue' mechw da' bosochin yogüe' na' gwlejlane' mechon'.

⁷ Nach Jesúsén' gože'ne':

—Bibi ye'ine', le ba bene' da' non gone' len neda' che za cate' gaša'.

⁸ Bene' yaše' ca' nita'cze' len le'e bate'teze, san neda' bich soacza' yesša len le'e.

Bxoz gwnabia' ca' bosoxi'e yesote' Lázaron'

⁹ Na' bene' zan bene' Israel gualaz' cheton' gosenezde' zoa Jesúsén' lagüe' yež Betanian' na' ja'aque', gague cont yesele'ede' Jesús na'zen' san da' gosaclaže' yesele'ede' lencze Lázaron' ben' bosbane' ladjo bene' guaten'.

¹⁰ Na' bxoz gwnabia' che nación Israel cheton' bosoxi'e lecze yesote' Lázaron',

¹¹ le bene' zan bene' Israel ba chesyecuase' len legaque' na' ba chesejniłaže' Jesúsén' dan' gosenezde' bosbane' Lázaron'.

Jesúsén' beyo'e ciuda Jerusalénna' da' yoble

(Mt. 21:1-11; Mr. 11:1-11; Lc. 19:28-40)

¹² Na' beteyo Jesúsén' len bene' ca' zjanaque' le' txen gosa'aque' Betanian' na' ja'aque' Jerusalén. Na' bene' zan chesežag Jerusalénna' da' ba zoa gala' lnin', na' zane' cate' gosenezde' žin Jesúsén' Jerusalénna'.

¹³ besežaše' jaseleže' le' zjanože' no zin. Na' cheseğüe'e lban' che', chesene':

—¡Leca bene' zaca' bengal! Mbalaz ben' za' nga nsel'a Xancho Diosen' le' cont nabi'e. ¡Mbalaz bene' naque' Rey che nación Israel chechon'!

¹⁴ Na' bžel to burr dao' be gwžia Jesúsén', na' goc can' nyoj Xtiža' Diosen' žan:

¹⁵ Le'e chonxenle Diosen' ciuda Jerusalénna', bi žeble; le na', ba za' Rey chelen' žie' to burr dao'.

¹⁶ Na' bene' ca' zjanaque' Jesúsén' txen gague cate gosejni'ide' chac con can' bosozoj ben' goso'e xtiža' Diosen' can'. Beyož got Jesúsén' na' goc yogo' da' ca' gosaquen' cont bla'lagüe le Jesúsén' naque' bene' zaca' juisyw, cana'ch jasyeza'laže' diža' ca' da' zjanyoj che Jesúsén' na' gosejni'iden'.

¹⁷ Bene' ca' besele'e cate' Jesúsén' bol' güiže' Lázaron' na' bosbane' le' cont bechoje' lo' ban' gosoe'lene' bene' ca' že' lo ciudan' diža' can' goquen'.

¹⁸ Na' da'nan' bene' zan jaseleže' Jesúsén' da' ba gosende' diža' che yeļa' guac dan' bene' bosbane' Lázaron'.

¹⁹ Nach bene' fariseo ca' gose' lježe':

—Ba chle'ele bibi chac bi goncho. Yogo'ze bene' ba chosozenague' che'.

To chope bene' griego gosēnabe' yesoe'lene' Jesúsén' diža'

²⁰ Na' zjalen to chope bene' griego bene' ca' ja'aque' gosonxene' Diosen' lo lnin'.

²¹ Na' bene' ca' besežine' gan' zoa Felipen' ben' nac bene' Betsaida ga mbane distritw Galilean', na' gose'ene':

—Si'xenšco', chaclaže'to' güe'lento' Jesúsén' diža'.

²² Na' Felipen' gwyje' jane'e Andrésen' nach choptie' jaseže' Jesúsén' ca'.

²³ Nach Jesúsén' gože' legaque':

—Na'a ba bžin hor gac yogo'lol da' cheyaļa' gac cont la'lagüe naca' bene' zaca' juisyw.

²⁴ Žia' to da' zejen, še to trigon' bi yexinjen cate' lažon' lo yon', con chega'ancze tozen; perw še yexinjen na' yelan', da' zan trigon' goñen.

²⁵ Note'tez bene' con chi' yichje' gac güen chegaque' yežlio nga, bene' ca' yesebiaye'e. Na' note'teze bene' chesene' bibi nonen še bi gac chegaque' yežlio nga, šjasyezoe' len Diosen' toli tocane.

²⁶ Na' note'tez bene' chesaclaže' yesone' xšinan', cheyaļa' yesejniłaže' neda' na' yosozenague' chia'. Na' gan' soa' neda' lecze na' yesezoa bene' ca' yeson xšinan'. Note'tez bene' yeson xšinan', Xan' gone' cont yesacxene'.

Jesúsén' gwdixjue'ede' yesot bene' le'

²⁷ Ba chžaglagua' lo' yichjlažda'oguan'. ¿Chaquele nabda' Xan' yosle' neda' lo da' ca' ba zoa gac chia' na'a? Bitw gona' ca', le za'a cont gac chia' yogo' da' ca'.

²⁸ Nach bol' güiže' Diosen', gwne':

—Xa', ben len neda' cont yesache'e bene' naco' bene' zaca' juisyw.

Beyoż gwne' ca' na' gwne Dios ben' zoa yaban', gwne':

—Ba bena' len le' cont chesache'e bene' naca' bene' zaca' juisyw na' za' goncha' ca' yeto.

²⁹ Na' zan bene' ca' že' na' gosende' dan' gwna Diosen' na' gosene' gwzion' gwne. Na' yebale' gosene':

—To angl gwne' le'.

³⁰ Na' Jesúsen' gwne':

—Diosen' gwne' neda' zižje gague cont ne zda' neda' chzenague' chia' san cont neze le'e.

³¹ Ba bžin ža Diosen' chogbi'en' che bene' ca' bi chesejle'e chia'. Na' ba bžin ža Satanás dan' chnabia' da' xigüe' ca' na' dan' chnabia'te bene' ca' bi chosozenag che Diosen' solao nit yela' chnabia' chen.

³² Na' cate' yeselise' neda' to le'e yag, cana'ch gona' cont zan bene' že' doxen lo yežlion' yesejnilaže' neda'.

³³ Gwne' ca' cont gosenezde' yesot bene' le' yosode'ene' to le'e yag cruz.

³⁴ Na' bene' ca' že'na' clele gosejni'ide' dan' gwnen' na' gose'e le':

—Ba beneto' can' ža Xtiža' Diosen' da' nyojen, na' nezeto' žan Cristo ben' sela' Diosen' yedenabi'e nación chechon' soe' toli tocañe. Na' le' žbixchen' žo' naco' bene' gwseła' Dios goljo' beñach na' žo' yesote' le' to le'e yag cruz še ca'? žNox naco' šaca'?

³⁵ Nach Jesúsen' gože' legaque':

—Yešlož da'ozen' soa' len le'e, neda' nsa' be'ni' che yichjlažda'olen'. Le gwzenag chia' šlac ne' de latje šo' be'ni' chian' lo' yichjlažda'olen', cont bi cuiayi'lenle' da' mal dan' chnabia' le'e. Ben' chda gan' nac choł bi chache'ede' gan' zeje'. Can' naquen len le'e.

³⁶ Le šejnilaže' neda' šlac ne' zoa' len le'e, cont šo' be'ni' chian' lo' yichjlažda'olen'.

Gwde gwna Jesúsen' ca' beze'e na' bcuaše'de' legaque'.

Zan bene' Israel bi gosejnilaže' Jesúsen'

³⁷ Na' la'czła' bene' Israel gualaž cheto' ca' besele'ede' ben Jesúsen' da' zan yela' guac, zane' bi gosejnilaže'ne'.

³⁸ Goc can' bzoj da' Isaíasen' ben' be' xtiža' Diosen' cani', gwne':

Xanto', nono chejle' diža' dan' chyixjue'eton', na' nono chesache'e blo'o yela' guac chion'.

³⁹ Bi goc yeseljle'e, le goc chegaque' can' ža yeto dan' bzoj da' Isaíasen', žan:

⁴⁰ Diosen' bene' cont bi gosejni'ide' na' cont zjanaque' bene' güedena.

Ba bene' cont chesele'ede' na' bi zjanezde' bi zejen,

na' bi chesache'ede' lo' yichjlažda'ogaque' bi zejen dan' chlo'ede' legaque'.

Šaca' chesejni'ide' na' chesache'ede' bi zejen dan' chlo'eda' legaque',

ba besyetiñde' na' ba beca'a xtoła'gaquen' šaca'.

⁴¹ Da' Isaíasen' gwne' ca' da' ble'ebande' nac Jesúsen' bene' zaca' juisyw nach be'e diža' che'.

⁴² Na' la'czła' zanch bene' Israel gualaž cheto' ca' bi gosejnilaže' Jesúsen', bia'cze bene' zan na' len no bene' gwnabia' cheto' gosejnilaže'ne', perw bi gosoe' diža' chesejnilaže'ne' le besežebe' bich yosoleb bene' fariseo ca' legaque' lo' yodaon'.

⁴³ Gosaclaže'che' yesenite' binlo len beñachen' clel ca yesenite' binlo len Diosen'.

Xtiža' Jesúsen' naquen da' žialao

⁴⁴ Nach Jesúsen' gwne' zižje gože' bene' ca' že'na':

—Bene' chesejnilaže' neda' gague neda'zen' chesejnilaže' san lente Xan' ben' gwseła' neda'.

⁴⁵ Na' bene' chne'e neda' chle'ede' bene' gwseła' neda'.

⁴⁶ Neda' za'a yežlio nga chgua'a be'ni' lo' yichjlaždao' bene' ca' chesejnilaže' neda', cont bi yesenite' yesonche' da' malen'.

⁴⁷ Na' note'tez bene' nezde' can' ba gwnian' na' bi chzenague' chia', gague neda' gwnežjua' castigw che xtolen', le bi za'a yežlion' cont gwnežjua' castigw che xtoła' beñachen', san za'a cont gwnežjua' yela' mban toli tocañe che bene' yesejnilaže' neda'.

⁴⁸ Perw de da' choglaon che bene' ca' bi chesejnilaže' neda' na' bi chosozenague' che dan' ba gwnian', xtižan' dan' ba bian', lenna' choglaon che bene' ca' zjanape' doła' cate' žin ža te che yežlion'.

⁴⁹ Gague bia' diža' to gualaza', san Xa' ben' gwseła' nedan' none' mandadw bin' cheyała' nia' na' bin' cheyała' gwsed gwlo'eda'.

⁵⁰ Na' nezda' dan' none' mandadw nia' nsan' yela' mban toli tocañe che bene' yosozenag chen. Na' da' li, con can' ža Xan', can' choe'lena' le'e diža'.

13

Gwdib Jesúsen' ni'a bene' ca' zjanaque' le' txen

¹ Na' Jesúsen' ba neзде' ba bžin ža yeze'e yežlion' na' yeyeje' gan' zoa Xe' Diosen', na' godce' yogo' bene' ba chejniłaže' le' lo yežlio nga. Da'nan' za' gala' lni pascon' bzejni'ide' bene' ca' zjanaque' le' txen, le chacyane'czede' legaue'.

² Bač gwlo'o Satanásen' xbab lo' yichjlaždao' Judas Iscariote, ben' nac xi'ın to bene' le Simón, cont gwdie' Jesúsen' lo na' bene' ca' chesegue'ede' le'. Na' ba zjanite' chesagüe' xše'.

³ Na' Jesúsen' neзде' Xen' ba bene' cont nape' la'zelagüe' yela' chnabia', na' neзде' gan' zoa Diosen' gwze'e na' gan' zoe' nan' yeyeje'.

⁴ Da'nan' gwzože'e cate' ba chesyedagüe' xše' na' gwlečhje' xe' da' nyaze' cha'le na' gwxi'e to lache' da' bčhej lsinen'.

⁵ Nach gwxi'e nis na' gwde'en to lo' ša' na' gwzolagüe' gwdibe' ni'a bene' ca' zjanaque' le' txen ca to mos, na' bosbiže' ni'agaquen' len lachen' nčhej lsinen'.

⁶ Na' cate' ba zoa čhibe' ni'a Simón Pedro, Pedron' gože'ne':

—Xana', žle' čhibo' ni'an'?

⁷ Na' Jesúsen' gože'ne':

—Dan' chona' nga bi chejni'idon' na'a, perw gwžin ža cate' šejni'idon'.

⁸ Na' gož Pedron' le':

—Gwbat gua'a latje čhibo' ni'an'.

Jesúsen' gože'ne':

—Še bi čhiban', bich gaco' txen len neda'.

⁹ Na' Pedron' gože'ne':

—Xana', gague ni'a na'zen' čhibo' še ca', san doxena'.

¹⁰ Nach gož Jesúsen' le':

—Bene' noša' nazje', ni'e na'zen' chyažjen čhibe', le doxen cuerp čhen' naquen xilaže'. Can' nac le'e, nac lažda'olen' xilaže', la'czła' gague yogo'le.

¹¹ Jesúsen' gwneзде' non' gwde' le' lo na' bene' chesegue'ede' le'. Da'nan' gwne': "Gague yogo'le nac lažda'olen' xilaže'."

¹² Na' cate' beyož gwdibe' ni'a yogüe', nach beyaze' xe' dan' chaze' cha'le na' bebi'e da' yoble cho'a mesen'. Na' gože' legaue':

—čChejni'ile bi zejen dan' ba bena' nga len le'e?

¹³ Le'e nsi'le neda' Maestrw na' Xanle, na' güenczen' žale, le can' naca'.

¹⁴ Na' neda' la'czła' naca' Xanle na' Maestrw čhele, ba gwdiba' ni'alen' ca to mos, na' can' cheyała' gaclen lježle ca to mos.

¹⁵ Ba gwdiba' ni'alen' cont blo'eda' le'e cheyała' gonle can' ba benan'.

¹⁶ Čhnia' le'e to da' zejen, note'teze mos bi naque' bene' blaoch ca xane', na' to bene' zej mandawd bi zaca'che' ca bene' gwseła' le'.

¹⁷ Še chejni'ile da' quinga na' gonle can' gwnian', nach soale mbalaz.

¹⁸ 'Bi žia' ca' che yogo'le. Nombi'a yichjlaždao' to to le'e ba gwleja' cont soale txen len neda'. Na' nezda' gac can' ža Xtiza' Diosen' da' nyojen žan: "Bene' gwdagw len neda' txen ba blej bšoše' neda'."

¹⁹ Čhnia' le'e da' quinga cate' za' gac ca' cont cate' ba goc ca' soačhačhle šejle'le le naca' ben' gwseła' Diosen' can' ba gwnia' le'e.

²⁰ Čhnia' le'e to da' zejen, bene' ca' chosolebe' note'tez bene' chseła', neda'czen' chosolebe' še ca', na' bene' chosolebe' neda' lecze chosolebe' Dios bene' gwsele' neda'.

Jesúsen' gwne' toe' gwdie' le' lo na' bene' ca' chesegue'ede' le'

(Mt. 26:20-25; Mr. 14:17-21; Lc. 22:21-23)

²¹ Beyož gwna Jesúsen' ca' ba gwzolao chacyaše'chgüede' lo' yichjlažda'ogüen', na' bochixgaten' gwne':

—Da' li čhnia' le'e, to le'e gwdelenda' lo na' bene' chesegue'e neda'.

²² Na' bene' ca' zjanaque' le' txen con chesena' cho'alao lježe' chesone' xbab čhe noen' gwne' ca'.

²³ Na' toe' čhi'e cuiten' dan' chaquechgüe' Jesúsen' le'.

²⁴ Nach Pedron' bene' seřw len bena' cont gwñabde' Jesúsen' no čhen' gwne' ca'.

²⁵ Nach gwbigue' bago gože' Jesúsen':

—čNon' gon ca'?

²⁶ Na' gož Jesúsen' le':

—Bena' gwnežjua' late' yetextilen' cate' ba blo'ojan' lo' nis yela' guagon', le'na' gon ca'.

Nach blo'oje' late' yetextilen' lo' nis yela' guagon' na' bnežjuen' Judas Iscariote bene' nac xi'ın to bene' le' Simón.

²⁷ Na' beyož bnežjue' Judasen' yetextilen' la' gwyo'o gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen bedao' nez.

²⁸ Na' ñe to ben' zjachi' cho'a mesen' bi gosejni'ide' bixchen' gože' le' ca'.

²⁹ Ba'le' gosacde' da' noxe' Judasen' bols mechon' Judasen' gože' le' šjaxi'e da' cheseyažjde' lo' ĩnin' o' šjanežjue' mechw da' chyažje no bene' yaše'.

³⁰ Nach cate' beyož gwdagw Judasen' pedas yetextil dan' bnežjw Jesúsen' le', la' bchojte'. Na' ba nac ba goļ gual.

To da' cobe da' non Jesúsen' mandadw goncho

³¹ Gwde bchoj Judasen', Jesúsen' gwne':

—Diosen' gwsele' neda' golja' benach na' ña'a ba nla' laon naca' bene' zaca' juisyw, na' neda' ľecze ba chlo'a Diosen' naque' bene' zaca' juisyw.

³² Na' dan' chlo'a naque' bene' zaca', ľecze le' gwlo'e naca' bene' zaca', na' la' gontien' ña'a.

³³ Xi' ĩnda'ogua', yešložga soa' len le'e. Na' yeyiljwle neda', na' chnia' le'e dan' goša' bene' gwnabia' che nación Israel chechon', bi gac sa' lenle neda' gan' yeya'an.

³⁴ Na' to da' cobe chžia' bia' gonle, gaque ľježle tole yetole. Can' chacda' le'e, ľecz can' cheya'la' gaque ľježle tole yetole.

³⁵ Na' yesezeze yogo'loļ bene' nacle neda' txen še soacze gaque ľježle tole yetole.

Jesúsen' gwne' Pedron' bi chebe' nombi'ene'

(Mt. 26:31-35; Mr. 14:27-31; Lc. 22:31-34)

³⁶ Na' Simón Pedron' gože' Jesúsen':

—Xana', ĩgan' yeyejo'?

Na' gož Jesúsen' le':

—Gan' yeya'an bi gac sa' leno' neda' ña'a, perw techle yido' ga'oguo' neda'.

³⁷ Na' Pedron' gože' le':

—Xana', ĩbixchen' bi gac sa' lena' le' ña'a? Gwzanlaže' cuina' gata' še chonen byen cont gaclena' le'.

³⁸ Na' gož Jesúsen' le':

—ĩChacdo' gwzanlaže' cuino' gato' cont gacleno' neda'? Da' ľi chnia' le', cate' cuež jean' ba goc šon' ñi'a bi chchebo' nombi'o neda'.

14

Bene' chesejnilaže' Jesúsen' ľecze zjanombi'e Xe' Diosen'

¹ Bich gacžejlaže' le. Le šejnilaže' Diosen' na' ľecze le' šejnilaže' neda'.

² Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de chele, san yeya'a šjajenšagua' yo'o che to tole.

³ Na' cate' yeyož šjajenšagua' yo'o chele ca', cana'ch yida' da' yoble yeči'a le'e cont yedyezoale gan' šjajzoa' neda'.

⁴ Nezele gan' yeya'an' na' ba nezele nac gonle cont yežinle na'.

⁵ Na' gož Tomásen' le':

—Xanto', bi ñezetó' gan' yeyejo'. ĩNacxe gac ñezetó' nac gonto' yežinto' na'?

⁶ Jesúsen' gože'ne':

—Neda' naca' nezen' na' nsa'a yogo' diža' ľi, na' toz neda' chac chnežjua' bene' yela' mban toľi tocañe. Ne toze bene' bi yežine' gan' zoa Xan' še bi šejnilaže' neda'.

⁷ Še nombia'yane'le neda', lente Xan' ba nombia'le še ca'. Na' bačh nombia'ľne' ña'a na' ba ble'elne'.

⁸ Na' gož Felipen' le':

—Ben cont le'eto' Xaon', ľezen' chñabeto' le'.

⁹ Jesúsen' gože'ne':

—Felipe, sša xen ba gwzóa' nga len le'e na' ĩbiña' gombi'o neda'? Note'tez bene' ba ble'e neda' ľecze Xan' ba ble'ede'. ĩBixchen' chñabo' gona' cont le'ele Xan'?

¹⁰ ĩBi chejli'o zoa' len Xan' na' le' zoe' len neda'? Diža' da' choa' len le'e bi choan' to gualaza'. Xa' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'.

¹¹ Le šejle' chia' zoa' len Xan' na' le' zoe' len neda'. Na' še bi chejle'le xtiz'an', le šejle' chia' dan' ba ble'ele chona' yela' guac.

¹² Na' chnia' to da' zejen, bene' ca' chesejnilaže' neda', da' ca' chonan' ľecze legaquen yesone'. Na' da' zaca'ch ca' da' ca' yesone', le yeya'a gan' zoa Xan'.

¹³ Na' bite'teze da' ñabele Xan' lagüe' da' chejnilaže'le neda' naca' Xi'ine', gonan', cont gwlo'a nac Xan' bene' zaca' juisyw.

14 Bite'tez da' nable gona' lagüe da' chejnilaže'le neda', neda' gonan'.

Jesüsen' gwne' sele' Spiritw che Diosen'

15 Še chaquale neda', gonle can' nona' mandadw.

16 Na' nabda' Xan' cont sele' Spiritw chen' soan len le'e toli tocanë na' gaclenen le'e. Na' Spiritw che Diosen' gwzejni'in le'e da' nac da' li.

17 Na' bene' bi chesejnilaže' Diosen', Spiritw chen' bi gac soan len legaque', le bi chesele'eden' na' neca chesejle'e še zoan. San le'e nombia'len, le zoan len le'e na' gwžin ža yedesoa lo' yichjlažda'olen' nabian' le'e.

18 Bi yocua'ana' le'e ca bi' güezebe. Güidcza' yeto gan' zoale nga.

19 Yešlož bene' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli tocanë, da'nan' soale toli tocanë.

20 Na' cate' žin ža yedesoa Spiritw che Diosen' lo' yichjlažda'olen', cana'ch gacbe'ele neda' zoa' len Xan' na' le'e zoale len neda' na' neda' zoa' len le'e.

21 Bene' zjažezde' dan' nona' mandadw yesone' na' chesonen', bene' ca' chesacde' neda'. Na' bene' ca' chesacde' neda' lecze chaque Xan' legaque', na' neda' lecze soa' gacda' legaque' na' gona' cont yesombia'che' neda'.

22 Na' Judas (perw gague Judas Iscariote) gože'ne':

—Xanto', žbixchen' gono' cont neto' nezeto' zoaczo' len neto' na' bi gono' ca' len bene' bi chesejnilaže' Diosen'?

23 Na' Jesüsen' gože'ne':

—Bene' chesacde' neda' chosozenague' xtižan', na' Xan' lecze gacde' legaque' na' neda' len xan' yedesoa' len legaque'.

24 Bene' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža Xan' ben' gwseła' neda'.

25 Da' quinga ba gwnia' le'e šlac ne' zoa' len le'e.

26 Na' Xan' sele' Spiritw chen' soan lo' yichjlaždao' le'e chejnilaže'le neda' cont gaclenen le'e. Na' Spiriton' gwzejni'in le'e yogo' da' cheyała' nezele na' gonon' cont šjajza'laže'le yogo' dan' ba gwnia' le'e.

27 Na' hcua'ana' le'e na' chona' cont soa cuezle binlo len xbab chelen'. Chaclaža' soa cuezle binlo len xbab chelen' can' chac chona' neda'. Bi gacžejlaže'le, neca žeble.

28 Ba benele gwnia' yeya'a gan' zoa Xan' na' yida' da' yoble gan' zoale nga. Na' ša chaquelenda' ca cheyała', nach chebele dan' yeya'a gan' zoa Xan', le Xan' zaca'che' ca neda'.

29 Na' ba gwnia' le'e na' a' bibi na' gac, cont soačhačhle šejnilaže'le neda' caten' gac ca'.

30 Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te bene' ca' bi chesejnilaže' neda', na' tilenen neda', perw bi gonon' neda' gan'.

31 Chona' con can' non Xan' mandadw cont neze benachen' chacda' Xan'. Le šo'o na'a, ba gole šejcho.

15

Jesüsen' zaca'lebe' ca to yag da' chbia uvas

1 'Neda' zaca'leba' ca to yag da' chbia uvas. Na' Xan' zaca'lebe' ca bene' chonši' yaguen'.

2 Na' le'e chejnilaže'le neda' zaca'lebe' ca xoze' yaguen'. Na' to to xoze' yaguen' da' bibi chbian, chchoguen'. Na' to to xozen' da' chbia uvasen' chpe'en cont chbiachen da' zanch.

3 Na' le'e ba nacle ca to xozen' da' ba mpe'e, le bach chzenagle xtižan' dan' ba be'lena' le'e.

4 Le soačhač len neda' cont soačhača' len le'e. Can' nac xoze' yaguen' bibi chac cuian to gualazen še bi nca'an le'e yaguen', can' naquen len le'e, bi gacle can' chazlaže' Diosen' še bi soačhačle len neda'.

5 'Neda' zaca'leba' ca to yag da' chbia uvas na' le'e zaca'lebe' ca xozen'. Note'tezle še soačhačle len neda' lecze soačhača' len le'e na' gacle can' chazlaže' Diosen', ca'aczen' nac che yag uvazen' dan' chbiachgua, le bibi gac gonle to gualazle.

6 Bene' bi zoačhače' len neda', gac che' can' chac len xoze' yag da' bibi chbia, le chesechoguen' na' chesebižen na' chžin ža chosotoben' chesadoen' yi' cont cheseyen.

7 Na' le'e še zoačhačle len neda' na' zoačhačle chzenagle xtižan', bite'tez da' chaclaže'le nabele Diosen', gončzen'.

8 Chacxen Xan' cate' zoale chonchguale dan' chazlažen', na' še chonle ca', yesache'e bene' da' li chejnilaže'le neda' na' chzenagle chia'.

9 Ca Xan' chacde' neda', lecz ca' neda' ba chacda' le'e. Le soa le gon can' žia' cont gacbe'ele chacda' le'e.

10 Še gonle can' nona' mandadw, nachen' gacbe'ele chacda' le'e, le neda' chona' dan' non Xan' mandadw na' chacbe'eda' chacde' neda'.

¹¹ 'Ba gwnia' le'e ca' cont soale mbalaz ca mbalazen' zoa' neda'. Chacłaza' soale mbalaz juisyw.

¹² Na' da' nga nona' mandadw gonle, gaque lježle tole yetole can' chacda' neda' le'e.

¹³ Nono zoa bene' chaquech lježe' ca bene' chzanlaže' cuine' gate' neče bene' migw če'. Na' can' chona' neda'.

¹⁴ Na' le'e nacle migw chia' še chonle con can' nona' mandadw.

¹⁵ Na' bich žia' nacle bene' güen žin chia', le to bene' güen žin bi nežde' yogo' da' chon xanen', san žia' nacle migw chia'. Le yogo' lo' da' ba benda' gwna Xan' ba bzejni' idan' le'e.

¹⁶ Gague le'e gwlejlē neda' naca' Xanle. Neda' gwleja' le'e cont chejnilaže' le neda'. Na' chsela' le'e cont šjenle can' chazlaže' Xan', na' gague da' te če da' ca' gonlen'. Na' yogo' lo' da' nabele Xan' gone' lagüe da' chejnilaže' le neda', gonczen'.

¹⁷ Da' nga da' chona' mandadw gonle, gaque lježle tole yetole.

Bene' bi chesejnilaže' Diosen' chesegue'ede' bene' chosozenag če Jesúsen'

¹⁸ 'Še bene' bi chesejnilaže' Diosen' chesegue'ede' le'e, le gon xbab ba chesegue'eczede' neda' cate' za' yesegue'ede' le'e.

¹⁹ Ša nacle txen len bene' ca' bi chesejnilaže' Diosen', nachen' yesacde' le'e can' chesaque' bene' lježen' šaca'. Perw ba gwleja' le'e cont chzenagle chia'. Da' nan' chesegue'ede' le'e da' bi nacle legaque' txen.

²⁰ Le šjasa' laže' dan' gwnia' le'e: "Note'teze mos bi naque' blaoch ca xanen'." Bosochi bososaca' bene' neda', na' lecz ca' yesonde' le'e. Na' balze bene' bosozenague' xtižan', lecze balze' yosozenague' xtiža' len'.

²¹ Na' da' bi zjanombi'e Diosen' ben' gwseła' neda', da' nan' yesonde' le'e yogo' da' ca', le chesegue'ede' le'e da' chzenagle chia'.

²² 'Ša neda' bi bedezejni' ida' legaque', bi zjanape' doła' da' chesegue'ede' neda' šaca'. Perw na' a' bibi de da' yosode'ede' yesene' bi zjanape' doła'.

²³ Bene' chgue'ede' neda' lente Xan' chgue'ede'.

²⁴ Ba bena' yela' guac da' nono nochle na' gon, na' šaca' bi besele'eden' bi zjanape' doła' da' chesegue'ede' neda'. Perw ba besele'ede' da' ca' na' bia'cze chesegue'ede' neda' len Xan'.

²⁵ Na' chac can' nyoj Xtiža' Diosen' dan' chososedē' gan' žan: "Besegue'ede' neda' la' czła' bibi da' mal bena'."

²⁶ 'Ba gwnia' le'e seła' Spiritw če Xa' Diosen' gaclenen le'e. Spiriton' san' gan' zoa Xan' na' gwzejni' in le'e diža' li chia' neda'.

²⁷ Na' lecz ca' le'e cheyała' güe' le xtižan', le ba gwzoale len neda' šlac ba gwdixjue'eda' xtiža' Xa' Diosen'.

16

¹ 'Ba gwnia' le'e yogo' da' ca' cont bi gacžejlaže' le'e.

² Le yesyebje' le'e lo' yodao' chegaque' ca', na' gwžin ža cate' note'tez bene' yesote' le'e yesacde' chebe Diosen' dan' chesonen'.

³ Yesonde' le'e yogo' da' ca' le bi zjanombi'e Xan' neca neda'.

⁴ Žia le'e da' quinga cont cate' žin ža gac can' gwnian' nach šjaze'ele.

Da' chon Spiritw če Diosen'

'Bi gwnia' le'e yogo' da' ca' gac chele cate' za' gwzolao bzejni' ida' le'e xtiža' Diosen', le ne' zoacza' chaclena' le'e.

⁵ San na' a' yeya' a' gan' zoa Xan' ben' gwseła' neda', na' ne tole bi chnabele neda' gan' yeya' a'.

⁶ Na' ba chacyaše' le dan' ba gwnia' yeya' a'.

⁷ Perw da' li napan le'e cuent yeya' a', le še bi yeya' a', Spiritw če Xa' Diosen' dan' gaclenen le'e bi yedesoa lo' yichjlažda' olen'. Na' yeya' a' nach sełan' len le'e.

⁸ Na' cate' yid Spiriton' gwzejni' in benachen' zjanape' doła', na' gwzejni' in non' nac bene' güen len Diosen', na' gwzejni' in gata' castigw toli tocañe če bene' bi chosozenague' chia'.

⁹ Spiriton' gwzejni' in legaque' zjanape' doła' da' bi chesejnilaže' neda'.

¹⁰ Na' gwzejni' in legaque' non' nac bene' güen len Diosen', le yeya' a' gan' zoa Xa' Diosen' na' le'e bich le'ele neda'.

¹¹ Na' gwzejni' in legaque' gata' castigw če xtola' gaquen' toli tocañe, le Satanás dan' chnabia' da' xigüe' ca' na' dan' chnabia' te bene' ca' bi chesejnilaže' Diosen' ba nchoglaon chen gwnežjw Diosen' castigw chen toli tocañe.

¹² Ne' dech da' zan da' nia' le'e, perw naquen zdebe šejni' ilen na' a'.

¹³ San cate' yedesoa Spiritw če Diosen' lo' lažda' olen' cont gwzejni' in le'e da' nac da' li, len gwsed gwlo' en le'e yogo' da' cheyała' nezele chia', le Spiriton' chñen diža' li. Bi güe' en diža' to gualazen, san güe' en bite' tez diža' da' chzene Xan' len, na' chixjue' en le'e bica' da' za' a' ac.

¹⁴ Spiriton' gonen cont gwlo'elaon naca' bene' zaca' juisyw, le gwzejni'in le'e xtiža'.

¹⁵ Xan' ba bene' cont nezda' yogo' da' neze le', na' da'nan' gwnia' Spiriton' chixjue'en le'e xtižan'.

Jesúsen' gwne' šložze yesacyaše'de' na' techle yesyebede'

¹⁶ Šlož bi le'ele neda', na' te yešlož na' yezle'ele neda' da' yoble, le yeya'a gan' zoa Xan'.

¹⁷ Na' ba le bene' ca' zjanaque' Jesúsen' txen gose' lježe':

—čBi zejen dan' che'e chio' te yešlož na' bich le'echone' na' techle lecze yešlož na' yezle'echone' da' yoble? Na' čbi zejen dan' že' yeyeje' gan' zoa Xan'?

¹⁸ čBi zejen dan' že' yešlož? Bi chejni'icho bin' že'.

¹⁹ Jesúsen' gočbe'ede' chesaclaže' yesenabde'ne' bi zejen, na' gože' legaque':

—čBa chnabe lježe bi zejen dan' gwnia': "Yešlož na' bich le'ele neda' na' techle lecze yešlož na' yezle'ele neda' da' yoble"?

²⁰ Da' li chnia' le'e ba zoa cuežle na' yegüine'le šlac bene' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele.

²¹ Cate' chzan no'olen' chžaglagüe' šlac chaque' bes che yela' sanna'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto benač yežlio nga.

²² Lecze ca' le'e ba chacyaše'le na'a, perw cate' yežagcho da' yoble soachle mbalaz na' nono gac yeca'a yela' chebe chelen' lo' yichjlažda'olen'.

²³ Na' cate' ba bžin ža šjazyoa' da' yoble gan' zoa Xan', cana'ch bich yažjele bi nabe gwzejni'ida' le'e. Da' li chnia' le'e, da' chejnilaže'le neda' bite'tez da' nabele Xan', gonczen' le'e.

²⁴ Ža na'aža bibi na' nabele Xan' ye'ln'e chnablen da' chejnilaže'le neda'. Na' na'a le nabe Xan' bi da' nabelene' ye'ln'e ca', na' gone' can' nabelenen' cont soale mbalaz juisyw.

Criston' ba bene' cont yenit yela' chnabia' che gwxiyen'

²⁵ Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che Xan'.

²⁶ Na' cate' ba bžin žana', cana'ch nabele Xan' bi da' nabelene' ye'ln'e chnablen da' chejni-laže'le neda'. Na' bi yažjen nabda' Xan' gaclene' le'e.

²⁷ Le cuincze Xan' chacde' le'e dan' chaquele neda' na' chejle'le gwsele' neda'.

²⁸ Gan' zoa Xa' Diosen' gwza'a na' ba bida' yežlio nga. Na' na'a yeza' yežlio nga na' yeya'a gan' zoa Xan'.

²⁹ Nach gose'ene':

—Bač cho'o diža' da' chejni'ito' na' bi cho'o jemplw.

³⁰ Ba chacbe'eto' nombi'o yogo' xbab che benačen'. Ba nezledo' bi chesaclaže' bene' yesenezde' cate' bina' yesenaben'. Da'nan' bač chejle'to' zao' gan' zoa Diosen'.

³¹ Na' gož Jesúsen' legaque':

—čBa chejle'le na'a?

³² Ba bžin ža na' na'a ba gole' gaslasle. To tole ca'a xnez che čele na' gwcua'anle toza'. Perw bi zoa' toza', le zoa Xan' len neda'.

³³ Ba gwnia' le'e ca' cont soa cuežle binlo len xbab čele, le chejnilaže'lenda'. Yežlio nga saca'zi'le, perw bi gacžejlaže'le, neda' ba bena' cont yenit yela' chnabia' che gwxiyen' dan' zoa na'a chnabian' yežlio nga.

17

Jesúsen' gwnabde' Diosen' gaclene' bene' ca' zjanaque' le' txen

¹ Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac čhia' dan' ba bžio' bia' gac. Ben cont nacbia' nedan' Xi'ino' naca' bene' zaca' juisyw cont neda' gona' ga gachia' le' naco' bene' zaca' juisyw.

² Ba beno' neda' yela' chnabia' lao yogo' benač cont chnezjua' yela' mban toli tocače che yogo' bene' ca' ba gwlejo' chesejnilaže' neda'.

³ Na' bene' ca' zjanape' yela' mban toli tocače zjanombi'e le', le tozon' zaco' gonxento', na' lecze zjanombi'e neda' Jesucristw bene' gwsele'.

⁴ Lo yežlion' ba bena' cont nacbia' naco' bene' zaca' juisyw, le ba beyož bena' yogo'lo' da' gwlo'o lo na' gona'.

⁵ Na' na'a Xa', ben cont la'laon naca' bene' zaca' juisyw cate' yela'a gan' zon', doxen can' blo'elaon cate' gwzoa' len le' cate' za' xete yežlion'.

⁶ Ba gwlejo' ba benač chesejnilaže' neda', na' bač blo'eda' legaque' can' naco' na' can' chonon'. Zjanaque' xi'ino' na' beno' cont chesejnilaže' neda' na' chesone' can' žon'.

⁷ Na' ba zjanezde' yogolo' da' chona' na' yogo' diža' da' choa' zjanaquen čio' le'.

⁸ Le ba be'lena' legaque' diža' dan' ba bzejni'ido' neda' na' ba bosozenague' chen, na' ba chesacbe'ede' da' li gwza'a gan' zon', na' chesejle'e le len' gwselo' neda'.

⁹ Chnaba' gacleno' legaque'. Bi chnaba' gacleno' yogo' benach, san gacleno' bene' ca' gwlejo' chesejnilaže'nda' le ba zjanaque' lo nao'.

¹⁰ Na' yogo' bene' chesejnilaže' neda' lecze chesejnilaže' le'. Na' ca'cze naquen, note'tez bene' zjanaque' xi'ino' lecze zjanaque' xi'ina', na' bene' ca' chesejnilaže'nda' chosolo'e naca' bene' zaca' juisyw.

¹¹ Na' na'a bich soa' yežlio nga, perw bene' quinga chesejnilaže' neda' nita'cze' yežlio nga, na' neda' ba zeza' gan' zo'na'. Xa', naco' la'zelagüe bene' laždao' xilaže', na' chnaba' gwchino' yela' chnabia' chio' cont gcuas gwcuižo' da' malen' len legaque' cont nita'cze' yesaque' toze len lježgaque', ca' chio' naccho toze.

¹² Šlac ba gwzoa len legaque', neda' ba bchina' yela' chnabia' chion' cont bcuas bcuiža' da' malen' len legaque'. Da'nan' ne toe' bi gwžiyai', con toz ben' ba naquen cuiaye'e cont gac doxen can' ža Xtüžo' dan' nyojen.

¹³ Na' na'a ba zeza' gan' zon', na' šlac ne' zoa' yežlio nga cho'a diža' quinga cont bene' qui nita'chgüe' mbalaz ca' mbalazen' zoa' neda'.

¹⁴ Neda' ba be'lena' legaque' xtižon', na' bene' ca' bi chesejnilaže' le' chesegue'ede' legaque' dan' bi chesone' txen len legaque', ca' neda' bi naca' txen len bene' ca' bi chesejnilaže' le'.

¹⁵ Na' ca' nac bene' ca' chesejnilaže' neda', bi chnaba' yeca'o' legaque' lo' yežlio nga, san chnaba' gacleno'ne' cont Satanás dan' chnabia' da' xigüe' ca' bi siye'en' legaque'.

¹⁶ Legaque' bi zjanaque' txen len bene' bi chesejnilaže' le', ca' neda' bi naca' txen len bene' bi chesejnilaže' le'.

¹⁷ Ben cont bene' ca' chesejnilaže' neda' yesaclaže' yesone' con da' žo', le ba zjanombi'e diža' li chio'. Yogo' da' ba bzejni'ido' legaque' naquen da' li.

¹⁸ Len' gwselo' neda' yežlion' cont ba bia' xtižon', na' lecze ca' chsela' legaque' yeso'e xtižan'.

¹⁹ Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li chion'.

²⁰ Na' bi chnaba' gacleno' legacze', san lecze gacleno' bene' ca' yesejnilaže' neda' cate' yesende' diža' dan' yesoe' bene' quinga.

²¹ Xa', ben cont yogo'lole' yesaque' toze len lježgaque' na' yesaque' txen len chio', ca' le' naco' toze len neda' na' neda' naca' toze len le'. Ben cont yeyož yesaque' toze len chio' na' len lježgaque' cont bene' ca' bi chesejnilaže' le' yesacbe'ede' len' gwselo' neda'.

²² Na' yela' bala'añ dan' nono' neda' ba bnežjuan' legaque' cont zjanaque' toze len bene' lježe' ca' chio' naccho toze.

²³ Legaque' zjanaque' txen len neda' na' neda' naca' txen len le' cont yogo'cho gaccho toze. Gaccho toze cont bene' ca' bi chesejnilaže' le' yesacbe'ede' len' gwselo' neda' na' yesacbe'ede' chacdo' bene' ca' can' chacdo' neda'.

²⁴ Xa', chacdo' neda' cate' biña' xe yežlio nga na' nono' neda' bene' zaca' juisyw. Na' chaclaža' bene' quinga gwlejo' chesejnilaže' neda' yedyesenite' len neda' gan' yedyesoan' cont yesele'ede' naca' bene' zaca' juisyw.

²⁵ Xa', naco' la'zelagüe bene' chon da' zej to licha. Na' ca' nac bene' ca' bi chesejnilaže'nda', lecze bi zjanombi'e le', perw neda' nombi'a le', na' bene' ca' ba gwlejo' cont chesejnilaže' neda' zjanezde' len' gwselo' neda'.

²⁶ Na' ba bzejni'ida' legaque' can' nacon' na' can' chonon', na' za' gwzejni'ichda' legaque', cont yesacbe'ede' chacdo' legaque' can' chacdo' neda', na' cont neda' soacza' len legaque'.

18

Judasen' bdi'e Jesúsen' lo na' soldadw ca'

(Mt. 26:47-56; Mr. 14:43-50; Lc. 22:47-53)

¹ Beyož gwna Jesúsen' da' ca', gwza'lene' bene' ca' zjanaque' le' txen ja'aque' šla'a Yegw Cedrón gan' gota' to le'ej ga goseze zan yag olivos. Na' goso'e lo' le'ejen'.

² Na' Judasen' ben' ba naquen gone' Jesúsen' lo na' bene' ca' chesegue'ede' le' lecze nombi'e latjen', le zan ni'a Jesúsen' len bene' ca' zjanaque' le' txen ba besedobe' na'.

³ Ca' goquen' bžin Judasen' na' nche'e xonj soldadw na' yexonj bene' chesape' yodao' blaon' bene' gosesela' bžox gwnabia' ca' na' bene' fariseo ca' cont yesezene' Jesúsen'. Zjanxobe' no lintern na' zjanoxe' no yi' yech na' zjana'le' spada.

⁴ Jesúsen' ba nezde' yogo'lol da' za' gac che', na' bchoje' jašague' legaque' na' gwne':

—žNon' cheyljwle?

⁵ Na' gose'ene':

—Cheyljwto' Jesús bene' Nazaret.

Na' gož Jesúsen' legaque':

—Nedan'.

Na Judasen' ben' ba naquen gone' Jesúsen' lo na'gaquen' zelene' legaque'.

⁶ Cate' Jesúsen' gože' legaque': "Nedan", la' besyebiga'te' cosxanle na' jasechaze' lo yon'.

⁷ Na' da' yoble Jesúsen' gože' legaque':

—¿Non' cheyljwle'?

Na' legaque' gose'ene':

—Cheyljwto' Jesús bene' Nazaret.

⁸ Na' Jesúsen' gwne':

—Ba gwnia' nedan'. Na' še nedan' cheyljwle, le güe' latje šjaya'ac bene' quinga.

⁹ Gwne' ca' cont goc can' ba gwdixjue'ede' caten' gwne': "Ne to bene' ca' ba gwlej Diosen' chesejnilaže' neda' bi yesebiaye'e."

¹⁰ Na' Simón Pedron' no'e to spada na' goljen' gwдынen' mos che b̄xoz blaon' gwchogtechgüe' nague' licha. Na' mosen' le' Malco.

¹¹ Na' Jesúsen' gože' Pedron':

—Bego'o spada chion' lo' ližen'. ¿Chacdo' bi cheyla' gac da' ba nžia bia' Xa' Diosen' gac chia'?

Goseche' e Jesúsen' lao ben' le' Anás

(Mt. 26:57-58; Mr. 14:53-54; Lc. 22:54)

¹² Nach soldadw ca' len xangaque' na' len bene' chesape' yodao' blao che nación Israel cheton' gosezene' Jesúsen' na' bosocheye'ne'.

¹³ Na' goseche'ene' da' nechw lao Anás ben' naque' xta'obi'in che Caifás. Na' Caifásen' goque' b̄xoz blao che nación Israel cheton' lo izen'.

¹⁴ Na' Caifásna' ben' gože' bene' gwnabia' cheton' napen legaque' cuent toz ben' gat clal ca cuiayi' yogüe'.

Pedron' bi gwchebe' naque' Jesúsen' txen

(Mt. 26:69-70; Mr. 14:66-68; Lc. 22:55-57)

¹⁵ Simón Pedron' len yeto bene' naque' Jesúsen' txen gosa'ogüe'ne'. Na' nombia' ben' nac b̄xoz blao ben' yeto. Da'nan' goc gwyo'e len Jesúsen' chyo'o che b̄xoz blaon'.

¹⁶ Na' Pedron' bega'ane' do cho'a puerten'. Nach ben' yeto, da' nombia' b̄xoz blaon' le', gwyeye' na' be'lene' diža' bi' no'olen' chap cho'a puerten' cont gwlo'obe' Pedron'.

¹⁷ Nach bi' no'olen' chape cho'a puerten' gožbe' Pedron':

—¿Gague leno' le' chzenago' dan' chsed chlo'e benga?

Na' Pedron' gwne':

—Bi lena' neda'.

¹⁸ Bene' güen žin ca' na' bene' ca' chesape' yodao' blaon' ba gosebeque' to yi' ya'alj, le chac zag, na' zjazeche' cho'a yin' cont chesyeže'ede'. Na' Pedron' ze' len legaque' cho'a yin' cheže'ede'.

Gosenabde' Jesúsen' che dan' chsed chlo'eden'

(Mt. 26:59-66; Mr. 14:55-64; Lc. 22:66-71)

¹⁹ Na' ben' nac b̄xoz blaon' gwñabde' Jesúsen' che bene' ca' chosozenag che dan' chsed chlo'eden' na' che da' ca' chzejni'iden'.

²⁰ Na' Jesúsen' gože'ne':

—Ba bi'a diža' doxen latje lagüe. Zan ni'a bsd blo'eda' lo' yodao' checho ca' na' chyo'o yodao' blaon' gan' chesežag yogo' bene' gualaž chechon'. Bibi diža' gwnia' bargaše'ze.

²¹ ¿Bixchen' chñabdo' neda'? Gwñabe bene' ca' gosende' dan' bsd blo'edan'. Legaque' zjanезде' bi dižan' bia'.

²² Beyož gwna Jesúsen' ca', to ben' chape yodao' blaon' zie' na', na' gw dape' x̄gauen', gože'ne':

—¿Ca' choži'o xtiža' ben' nac b̄xoz blaon'?

²³ Jesúsen' gwne':

—Še bi da' mal ba gwnia', be' diža' che bi da' malen' ba gwnia', na' še gwnia' güen, ¿bixchen' chgapo' neda'?

²⁴ Nach Anásen' bdie' Jesúsen' ncheje' lao Caifásen' ben' nac b̄xoz blaon'.

Da' yoble Pedron' bi gwchebe' še naque' txen len Jesúsen'

(Mt. 26:71-75; Mr. 14:69-72; Lc. 22:58-62)

²⁵ Na' Pedron' zie' cho'a yin' cont cheže'ede' na' bene' ca' nita'na' gose'ene':

—¿Gague lenczo' len' chzenago' dan' chsed chlo'e benga?

Na' bi gwchebe', gwne':

—Bi lena' neda'.

²⁶ To xmos b̄xoz blaon' naque' biše' ljež ben' gwchog Pedron' naguen', na' le' gože' Pedron':

—¿Gague ble'eda' le' len Jesúsen' lo' le'ej gan' ze yag olivos?
 27 Na' Pedron' da' yoble bi gwchebe', na' la' gwchezte to jea.

Goseche'e Jesúsen' lao Pilaton'

Mr. 27:1-2, 11-14; Mr. 15:1-5; Lc. 23:1-5)

28 Na' do cheni'las bene' gwnabia' ca' gosebeje' Jesúsen' gan' zoa Caifásen' na' goseche'ene' gan' zoa gobernador Pilato ben' chon yela' justis. Na' le'gaque' bi goso'e len Jesúsen' yo'o gan' zoa Pilaton', le can' nac costumbr cheton' bi chac yesagüe' xše' Ini pascon' še yeso'e gan' že' bene' bi zjanac bene' Israel.

29 Da'n'an' Pilaton' bchoje' na' gože' le'gaque':

—¿Bi ben benga? ¿Bi xya chagwle che'?

30 Na' bene' gwnabia' ca' gosene':

—Šaca' benga bi naque' bene' güen da' xinj bi bdeto'ne' lo naon'.

31 Na' gož Pilaton' le'gaque':

—Le yeche'e, na' le gon yela' justis che' can' ža ley chelen'.

Nach bene' gwnabia' che nación Israel cheton' gose'ene':

—Bi de Isens gotto' bene'.

32 Da' gosone' ca' goc can' gwna Jesúsen' caten' bzejni'ide' nac yesone' yesote'ne'.

33 Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey che bene' Israel ca'?

34 Jesúsen' gože'ne':

—¿Con da' goljlažon' chnabo', še bene' yoble gose'e le' ca'?

35 Pilaton' gože'ne':

—¿Chacdo' naca' neda' bene' Israel? Bene' Israel gualaž chio' na' bħoz gwnabia' chele ca' bosodie' le' lo na' nga. ¿Bi da' xinj benon'?

36 Jesúsen' gože'ne':

—Yela' chnabia' chia' nža'le naquen len yela' chnabia' che bene' chesenabi'e yežlio nga. Šaca' yela' chnabia' chia' naquen che yežlio nga na' šaca' nabi'a nación ca' že' yežlio nga, bene' ca' chosozenag chian' gosedile' cont bi goca' lo na' bene' gwnabia' che nación Israel cheton' šaca'. Perw yela' chnabia' chian' bi naquen che yežlio nga.

37 Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' li can' žon', naca' rey na' ba bida' yežlio nga cont gwzejni'ida' benačhen' diža' li na' yogo' bene' chesone' txen len diža' li chosozenague' chia'.

38 Nach gož Pilaton' le':

—¿Bi dan' diža' li?

Gosechoglagüen' yesote' Jesúsen'

(Mt. 27:15-31; Mr. 15:6-20; Lc. 23:13-25)

Beyož gwna Pilaton' ca' na' bezchoje' yeto ši'i gan' že' bene' gwnabia' che nación Israel cheton' na' gože' le'gaque':

—Bibi nla'lagüe še bi da' xinj non benga.

39 Perw na' de costumbr chele gwsana' to bene' de ližya lo Ini pascon'. ¿Chaclaže'le gwsana' benga naque' Rey che le'e bene' Israel?

40 Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to bene' gwban.

19

1 Nach Pilaton' bene' mandadw goseyine' Jesúsen'.

2 Na' soldadw ca' gosone' to corona de xis yeše' na' bosozoen' yičhj Jesúsen' na' bosoguacue'ne' to lache' moradw ca' da' chosochin no rey.

3 Nach gosonle' che', gosene':

—¡Viva Rey che bene' Israel!

Na' gosegapa'chgüe' xague'.

4 Nach Pilaton' bchoje' da' yoble na' gože' bene' gualaž cheto' ca' že' na':

—Cueja'ne' da' yoble cont nezele bibi da' xinj chželda' še bi da' none'.

5 Na' bechoj Jesúsen' chyo'ona', na' zoa corona de xis yešen' yičhje' na' ne' nyaze' lache' moradon'. Na' Pilaton' gože' le'gaque':

—Le na', nga ze ben'.

6 Na' bħoz gwnabia' ca' na' bene' chesape' yodao' blaon' cate' besele'ede' Jesúsen' na' bososye'e zan ni'a gosene':

—¡Bde'e le'e yag cruz! ¡Bde'e le'e yag cruz!

Nach Pilaton' gože' legaue':

—Le'e le che'e na' le gwde'e le'e yag cruzen', le neda' bibi da' xinj cheželda' še bin' none'.

⁷ Na' bene' gwnabia' ca' che nación Israel cheton' gose'e le':

—De to ley cheto' da' žan cheyala' gate' da' že' naque' Xi'in Dios, le con to beňachzen' naque'.

⁸ Ba chžeb Pilaton' can' ba chaquen', na' cate' bende' xtiža'gaquen' bžebche'.

⁹ Na' beyo'e yo'o gan' zoe' da' yoble, nche'e Jesús'en', na' gože' Jesús'en':

—¿Ga bene' le'?

Na' Jesús'en' bi boži'e xtižen'.

¹⁰ Nach Pilaton' gože'ne':

—¿Bi choži'o xtižan'? ¿Bi neždo' napa' yela' chnabia' cont gwsana' le' na' napa' yela' chnabia' cont chogbi'an yosode'e le' le'e yag cruz?

¹¹ Jesús'en' gože'ne':

—Bibi yela' gwnabia' napo' šaca' Diosen' bi noňen' le'. Da'nan' bene' bdie' neda' lo naon' napche' doła' ca le'.

¹² Nach Pilaton' beyiljwlaže' nacle gone' gwsane' Jesús'en'. Perw bene' gwnabia' che nación cheton' bososye'e gosene':

—Še gwsano' benga, contr rey che nación Roman' chono' še ca', le note'tez bene' že' naque' rey chone' contr rey César.

¹³ Nach Pilaton', beyož bende' xtiža'gaquen', gwleje' Jesús'en' chyo'ona' na' lecze bchoj le' na' gwchi'e gan' chone' yela' justisen', to latje da' nzi' Gan' Nagw Yej, na' diža' hebreo nzin' Gabata.

¹⁴ Do guagwbiz ža cate' za' solao lni pascon' Pilaton' gože' bene' gwnabia' cheto' ca':

—Le na', nga zoa rey chelen'.

¹⁵ Nach da' yoble gosezolagüe' bososye'e gosene':

—¡Cheyala' gate'! ¡Bde'e le'e yag cruz!

Nach Pilaton' gože' legaue':

—¿Rey chele nga gona' mandadw yosode'e le'e yag cruz?

Nach bžoz gwnabia' ca' gose'ene':

—Gague rey cheto' benga. Toze César naque' rey cheto'.

¹⁶ Nach Pilaton' bdie' Jesús'en' lo na'gaque' cont te'e le'e yag cruzen'. Nach gosa'aque' Jerusalénna' goseche'e Jesús'en' cho'a ciudan'.

Bosode'e Jesús'en' le'e yag cruz

(Mt. 27:32-44; Mr. 15:21-32; Lc. 23:26-43)

¹⁷ Na' Jesús'en' zeje' no'e yag cruz chen' na' besežine' to latje nzi' Latje che Žit Yichj Bene' Guat, na' diža' hebreo nzin' Gólgota.

¹⁸ Na' soldadw che gobernadores' bosode'ene' le'e yag cruzen', na' lecze bosode'e yechope bene' le'e yechope yag cruz cuiten' na' Jesús'en' gwyo'e gachol bene' ca' chope'.

¹⁹ Na' gobernador Pilaton' bene' mandadw byoj diža' da' gwda' yichj yag cruz che Jesús'en'. Na' bosozojen' žan: "Jesús bene' Nazaret, Rey che bene' Israel".

²⁰ Bosozojen' diža' hebreo, diža' griego na' diža' latín. Na' zan bene' Israel gualaž cheto' bosolaben', le gan' gwda' Jesús'en' le'e yag cruzen' naquen' gala'ze ciuda Jerusalénna'.

²¹ Nach bžoz gwnabia' ca' na' yezica'chle bene' gwnabia' che nación Israel cheton' gose'e Pilaton':

—Bi gwzojo' "Rey che bene' Israel", san bzoj: "Le' gwne' naque' rey che bene' Israel."

²² Na' Pilaton' gwne':

—Da' bena' mandadw bosozoje', ba nyojennna'.

²³ Nach soldadw ca', beyož bosode'e Jesús'en' le'e yag cruzen', goseque'e xalana' Jesús'en' na' besyele'en gosebejen' tap cuenle na' tgüejen gosezi' to toe'. Na' lecze goseque'e yeto xe' da' naquen' to güelize, na' bibi dia chen de.

²⁴ Na' gose' lježe':

—Bi gwzoxjchon san gonchon rifa cont nezecho no yechelen.

Na' dan' gosone' ca' goc can' nyoj Xtiža' Diosen', žan: "Besyele'e xalanan' legacze', na' gosone' rifa lache' dan' chazan'."

²⁵ Na' do gala'ze yag cruz che Jesús'en' zecha Marían' ben' nac xna' Jesús'en' na' bene' bile xne'ena', na' María bene' naque' no'ol che Cleofas na' María bene' naque' bene' Magdala.

²⁶ Na' cate' Jesús'en' ble'ede' zecha xne'en' gala'ze len to bene' naque' le' txen, bene' chaquechüe Jesús'en' le', nach gože'ne':

—Bena' gaque' ca xi'ino'.

²⁷ Nach gože' bena':

—Bži'ilaže' xna' nga ca xnao'.
Na' žana' gwque'ene' bene'ne' ca bene' lo' yo'o.

Can' goc caten' got Jesúsen'
(Mt. 27:45-66; Mr. 15:33-41; Lc. 23:44-49)

²⁸ Gwde na' Jesúsen' ba nezde' bačh goc yogo' da' cheyała' gac. Nach cont goc can' ža yelate' Xtiža' Diosen' da' nyojen gwne':

—Chbilda' nis.

²⁹ Na' de late' vino zichj da' yože' to lo' xguag dao'. Na' to bene' bzaže'de' vino zichjen' to esponja bzoen' to lo' xis da' že' hisopo na' gwłisen' blapen' cho'a Jesúsen'.

³⁰ Na' beyož gwop Jesúsen' vinon' na' gwne':

—Bačh goc yogo'lol da' cheyała' gac.
Nach bcheque' yichjen' gote'.

To soldadw godoe' lanza cuit le'e Jesúsen'

³¹ Na' yeteyo gaquen ža che Dios na' ža lni xen, da'nan' bene' gwnabia' che naciön cheton' jasenabde' Pilaton' gone' mandadw yeseyišjw soldadw che' ca' ni'a bene' ca' zjada' le'e yag cruzen' cont yob yesate' na' yesyegue'e legaque' le'e yag cruz ca', le bi gosacłaže' yeseda'ch bene' ca' le'e yag cruzen' ža che Dios.

³² Nach soldadw ca' ja'aque' jasedišjue' chope la'a ni'a ben' gwda' šla'a cuit Jesúsen'. Na' lecze ca' gosone' len ben' gwda' le'e yag cruzen' cuiten' yešla'a.

³³ Na' cate' besežine' gan' da' Jesúsen', besele'ede' ba gote' na' bich goseyišjue' ni'e ca'.

³⁴ Perw to soldadon' godoe' lanza cuit le'e Jesúsen', na' la' bchojten chen len nis.

³⁵ Neda' ble'eda' can' goquen' na' nezda' cho'a diža' li. Na' cho'a diža' li can' goquen' cont lencze le'e šejle'le.

³⁶ Na' goc da' ca' len Jesúsen' cont goc can' ža Xtiža' Diosen' da' nyoj che', žan: "Ne to žit yo'e bi yeseyišjue'."

³⁷ Na' yeto da' žan: "Yesene'e ben' ba bosožie' güe'."

Bosocuaše' Jesúsen'

(Mt. 27:57-61; Mr. 15:42-47; Lc. 23:50-56)

³⁸ Beyož goc yogo' da' ca', José bene' nac bene' ciuda Arimatea jañabde' Pilaton' gwnežjue' lsens yeque'e cuerp che Jesúsen'. Na' Pilaton' be'e lsens. Nach Josén' gwyeje' na' beque'e cuerp che Jesúsen'. Josén' ba chejnilaže' Jesúsen' perw chejnilaže'ne' багаše'ze da' chžebe' bene' gwnabia' cheto' ca'.

³⁹ Na' len Josén' lecze gwyej Nicodemo ben' ba gwyej gan' zoa Jesúsen' šeže'le. Na' Nicodemon' no'e to da' chl'a' zix da' none' len yal dan' že' mirra, na' len to bište dan' že' aloes, ca do šona roben'.

⁴⁰ Nach bosyochele' cuerp che Jesúsen' to lache' xen na' len dan' chl'a' zixen', ca' chon neto' bene' Israel cate' chcušaše'to' bene' guat.

⁴¹ Na' gála'ze latje gan' bosode'e Jesúsen' le'e yag cruzen' gota' to le'ej ga goseze yag. Na' na' za' goseche'ene' to bloj cont yosočhinen' ca to ba, na' nono bene' guat na' šo' lo'enna'.

⁴² Ža caten' got Jesúsen' naquen ža caten' chososiñi'e che ža che Diosen'. Na' da' chesachyende' yosocuaše'ne', da'nan' jaseło'e Jesúsen' lo' bloj coba', le naquen gála'ze.

20

Jesúsen' bebane' ladjo bene' guaten'

(Mt. 28:1-10; Mr. 16:1-8; Lc. 24:1-12)

¹ Na' bal dmigw María bene' Magdalan' gwyeje' cho'a blojen' gan' bosocuaše' Jesúsen' na' ble'ede' ba bga'a yejen' dan' bosode'e cho'a blojen'.

² Nach beza'sese' beyeje' gan' zoa Simón Pedron' len yeto bene' naque' Jesúsen' txen, na' gože' legaque':

—Ba besyebeye' Xanchon' lo' blojen' na' bi nezeto' ga besyeyo'ene'.

³ Nach Pedron' na' ben' yeto gosa'aque' ja'aque' cho'a blojen'.

⁴ Choptie' goseza'sese' perw ben' yeto gwza'sesche' ca Simón Pedron' na' byobech bžine' cho'enna' ca le'.

⁵ Na' bcheque' gwne'e lo'enna' na' ble'ede' lache' ca' zjachin' lo' yo perw bi gwyo'e.

⁶ La' bla'te Simón Pedron' na' le' gwyo'e lo' blojen' na' lecze ble'ede' lache' ca' gan' zjachin'na'.

⁷ Na' bay dan' bosoguazje' yichjen' bi chin' gan' chi' lache' ca', san ndoben chin' šla'ale.

⁸ Nach lencze ben' yeto gwyo'e, le biña' šo'e la'czła' byobech bžine' cho'enna', na' ble'ede' can' naquen na' gwyeje'le'e.

⁹ Le biña' yesejni'ide' Xtiža' Diosen' da' nyojen žan cheyała' yebane' ladjo bene' guaten'.

¹⁰ Na' besyeya'aque' jaya'aque' yo'o gan' nite'na'.

María bene' Magdalan' ble'ede' mbancze Jesúsen'
(Mr. 16:9-11)

¹¹ Na' Marian' bega'ane' na' gwzeche' gala'ze cho'a blojen' chbeže'. Na' ne' chbeže'te' ca' bcheque' gwne'e lo' blojen'.

¹² Na' ble'ede' chope angl bene' zjanyaz lache' šiš zjachi'e lo' blojen', toe' chi' zej yichjle na' yetoe' chi' zej xni'ale gan' gota' cuerp che Jesúsen'.

¹³ Nach gose'e no'olen':

—¿Bixchen' chbežo' no'ole?

Na' boži'en gože' legaue':

—Ba besyeyo'e Xanan' na' bi nezda' gale jasesane'ne'.

¹⁴ Beyož gwna' Marian' ca' gwyečhje' ble'ede' zecha Jesúsen' cožen', perw bi gocbe'ede' še naque' le'.

¹⁵ Na' gož Jesúsen' le':

—¿Bixchen' chbežo', no'ole? ¿Non' cheyiljo'?

Marian' bene' xbab še ben' chape' yaguen' nach boļ güiže' le', gože'ne':

—Bene', še len' beyo'one' ga yoble, gwna neda' gale jaysano'ne' cont yeyoa'ne'.

¹⁶ Jesúsen' gože'ne':

—¡María!

Na' Marian' gwyečhje' da' yoble na' gože'ne':

—¡Raboni! —naquen to diža' hebreo na' zejen Maestrw.

¹⁷ Jesúsen' gože'ne':

—Bi goxo' neda', le' biña' yeyepa' gan' zoa Xan'. Beyej len yezica'chle bene' ca' ba bosozenag xtižan' bene' ca' zjanaque' ca' biše' zana', na' gožgaue' yeyepa' gan' zoa Xan' ben' lecz naque Xale. Naque' Dios ben' chonxena' na' lecze naque' Dios ben' chonxenle.

¹⁸ Nach beza' María bene' Magdalan' na' jaydixjue'ede' yezica'chle bene' ca' chosozenag xtiža' Jesúsen' le' ba ble'ede' Xanchon'.

Bene' ca' zjanaque' Jesúsen' txen besele'ede' mbancze'
(Mt. 28:16-20; Mr. 16:14-18; Lc. 24:36-49)

¹⁹ Na' cate' ba goc choļ že' dmigon', bene' ca' zjanaque' Jesúsen' txen zjandop zjanžague' lo' yo'o na' zjanseyjw'tie' puert ca' da' besežebe' bene' gwnabia' che naciön Israel četon'. Nach Jesúsen' ble'e na' gwze' gachol' legaue'. Na' gože' legaue':

—Le soa binlo len xbab da' yo'o lo' yichjlažda'ole.

²⁰ Beyož gwne' ca' na' blo'ede' legaue' taque' ca' na' cuit le'ena'. Na' besyebede' cate' besele'ede' le' naque' Xanchon'.

²¹ Na' gozne' da' yoble:

—Le soa binlo len xbab da' yo'o lo' yichjlažda'olen'. Can' gwsela' Xan' neda' yežlio nga bia' xtižen', lecze ca' neda' chsela' le'e güe'le xtižan'.

²² Beyož gwne' ca' blobe' legaue' na' gože' legaue':

—Le si' Spiritw che Diosen'.

²³ Bene' ca' yesyetinje xtoļa'gaquen', naple yela' chnabia' ye'ln'e ba gwnitlaon, na' naple yela' chnabia' cont ye'le bene' bi yesyetinje xtoļa'gaquen' bitw nitlaon.

Tomás ble'ede' mban Jesúsen'

²⁴ Na' Tomás ben' bososi'e Tomás Cuaš lene' len bene' šižiw ca' ba gosedalene' Jesúsen', na' bi gwzoe' cate' Jesúsen' bedyelo'elagüe' legaue' že' dmigon'.

²⁵ Na' bene' ca' yezica'chle gose'ene':

—Ba ble'eto' Xanchon'.

Na' Tomásen' gože' legaue':

—Bi šejli'a mbancze' še bi le'eda' yiž che claven' le'e taque' ca' na' gwzebe xbenan' gan' gwdebe clav ca' na' gwzebe na'an cuit le'en.

²⁶ Gozde' to xman zjanite' lo' yo'on da' yoble na' zoa Tomásen' len legaue'. Na' da' yoble nyeyjw puert ca', cate' bezla' Jesúsen' na' gozzeche' gachol' legaue'. Na' gwne':

—Le soa binlo len xbab da' yo'o lo' yichjlažda'olen'.

²⁷ Nach gože' Tomásen':

—Gwna' lo' taca' quinga na' bzeben xbenon'. Na' bzebe naon' cuit li'a nga cont šejli'o. Na' bich gaco' bene' bi chejle', san šejli'o.

²⁸ Nach Tomásen' gože'ne':

—¡Xana' na' Dios chia'!

²⁹ Na' Jesúsen' gože' Tomásen':

—Tomás, ba chejli'o da' ba ble'edo' neda'. Mbalaz bene' ca' ba chesejle'e la'czla' bina' yesele'ede' neda'.

Da' quinga zjanyojen cont šejle'cho Jesúsen' naque' bene' gwse'la' Dios

³⁰ Da' zan yela' guac ben Jesúsen' da' besele'e bene' ca' zjanaque' le' txen da' bi nyojen nga.

³¹ Perw zjanyoj da' quinga cont šejle'le' Jesúsen' naque' Cristo ben' gwlej Diosen' cont nabi'e na' naque' Xi'in Dios, na' cont gata' yela' mban toli' tocan'e chele da' chejnilaže'lene'.

21

Jesúsen' blo'elagüe' gaže bene' ca' zjanaque' le' txen

¹ Gwdechle yeto ža yoble Jesúsen' bozlo'elagüe' bene' ca' zjanaque' le' txen cho'a nisdao' da' nzi' Nisdao' Tiberias. Quinga goc:

² Txen nite' Simón Pedron' len Tomásen' ben' bososi'e Tomás Cuaš, na' Natanael bene' yež Caná gan' mbane Galilean', na' čhope xi'in Zebedeo na' yechope bene' ca' zjanaque' Jesúsen' txen.

³ Na' Simón Pedron' gože' legaque':

—Ša'a gwxen beł da' yoble.

Na' gose'e le':

—Łecze sa' neto'.

Nach gosa'aque' ja'aque' cho'a nisdaon' na' goso'e to lo' barcw. Na' nocze no beł beseželde' že'na'.

⁴ Na' do ba zoa šeni' besele'ede' zecha Jesúsen' cho'a nisdaon', perw bi gosacbe'ede' še Jesús nan'.

⁵ Nach Jesúsen' gože' legaque':

—Bene' migw chia' čnono beł chdole'le?

Na' gose'ene':

—Nono chdole'to'.

⁶ Nach gože' legaque':

—Le gwzala' yixjw beł chelen' cuit barcon' lichale na' senlba'.

Nach bosozala' yixjw beł chegaquen', na' tantw be zan besedola', bi gosezoede' yosy-ocuen' lo' barcon'.

⁷ Nach ben' chaquechgüe Jesúsen' le', gože' Pedron':

—Xancho nan'.

Na' cate' gože' Simón Pedron' Xancho nan', la' beyacwte Pedroa' xalanen', le gague bi nyaze' cha'len' chone' žinna', na' la' bxite'te' lo' nisen' cont byob bežine' gan' zoa Jesúsen'.

⁸ Na' yezica'chle bene' ca' zja'aclene' barcw daon' zjanxobe' yixjw gan' že' beł ya'a ca'. Bi naquen' zito' cho'a nisdaon', ca do yeto gayoa metrže.

⁹ Na' cate' besyěžine' cho'a nisdaon' besele'ede' chi' yi' ya'alj na' xoa beł ya'a lagüenna' na' len yetextil.

¹⁰ Na' Jesúsen' gože' legaque':

—Le yeyože' ngale to chope beł ya'a ca' za' gwxenle'.

¹¹ Na' Simón Pedron' gwyeje' jaxi'e yixjw bełen' gan' chi' barcon' na' bexoben' ga nac yo biž. Žen' to gayoa ši'ineyon beł xen, perw bi bcheza' yixjon' la'czla' be zan gwže' lo'en'na'.

¹² Na' Jesúsen' gože' legaque':

—Le da gagwle xsil.

Na' ne toe' bi besyeyaxjde' ye'ene': “čNo le'?” le ba gosacbe'ede' naque' Xancho'.

¹³ Jesúsen' gwbigue' na' gwxi'e yetextilen' na' bnežjue' che to toe' na' lecz ca' bene' len beł ya'an.

¹⁴ Da'na' goc da' gwyon' ni'a blo'elao Jesúsen' bene' ca' zjanaque' le' txen gwde bebane' ladjo bene' guaten'.

Jesúsen' be'lene' Simón Pedron' diža'

¹⁵ Na' cate' besyedagüe', Jesúsen' gože' Simón Pedron':

—Simón xi'in Jonás, čchaquechdo' neda' clel can' chesaque bene' quinga neda'?

Pedron' boži'en gože'ne':

—Xana', neždo' chacda' le'.

Jesúsen' gože'ne':

—Bsed blo'e bene' ca' za' gwzolao chesejnilaže' neda', bene' ca' zjanac ca me' xila' chia'.

¹⁶ Na' da' gwchop' ni'a gože' le':

—Simón xi'in Jonás, čchacdo' neda'?

Na' da' yoble gwna Pedron':

—Xana', le' neždo' chacda' le'.

Jesúsen' gože'ne':

—Bgüia gwña' bene' ca' chesejnilaže' neda', bene' ca' zjanac ca xila' chia'.

¹⁷ Da' gwyon' ni'a gož Jesúsen' le':

—Simón xi'in Jonás, ¿chacdo' neda'?

Na' Pedron' gocyas'e'de' dan' gož Jesúsen' le' ca' da' gwyon' ni'a, na' gože' le':

—Xana', le' neze nle'edo' yogo'lol. Nezdo' chacda' le'.

Jesúsen' gože' le':

—Bsed blo'e bene' ca' chesejnilaže' neda', bene' ca' zjanac ca xila' chia'.

¹⁸ Da' li' chnia' le', cate' goco' bene' güego', cuino' gwyaz xalanon' na' gwyejo' con ga žan chio'. Perw cate' gaco' bene' gole, gwli' naon' na' bene' yoble chize' xalano' na' yeche'e le' ga bi' chaclažo'.

¹⁹ Gože'ne' ca' cont gwnezde' can' gacxen Diozen' len da' gac che' cate' žin ža gate'. Na' gwde gwna Jesúsen' can' gac che' Pedron' nach gože'ne':

—Con gwyejnilaže' neda' na' bzenag chia'.

Can' gwna Jesúsen' che ben' chacchgüede'

²⁰⁻²² Na' yeto bene' naque' Jesúsen' txen na'ogüe' legaque'. Na' beyechj Pedron' na' ble'ede' le' na' gože' Jesúsen':

—Xana', ¿nac gac che' benga?

Jesúsen' gože'ne':

—Še' chaclaža' ne' zoacze' cate' yida' yeto ¿bin' chacžejlažo'? Con gwzoateze gwyejnilaže' neda' na' bzenag chia'.

Ben' gwne' ca' naque' ben' chaquechgüe Jesúsen' na' ben' gwche' cuit Jesúsen' txen cate' gosagüe' xše' žen' cate' za' gac Jesúsen' lo' na' bene' ca' chesegue'ede' le'. Na' cana' bena' gwñabde'ne': "Xana', ¿noxen' gwdie' le' lo' na' bene' ca'?"

²³ Na' dan' gož Jesúsen' Pedron': "Še' chaclaža' ne' zoacze' cate' yida' yeto ¿bin' chacžejlažo'?", da'nan' gwditj diža' len bene' ca' chsejnilaže' Criston' gosene' bi' gat bena'. Perw Jesúsen' gague gože'ne' bi' gate', san gože'ne': "Še' chaclaža' ne' zoacz benga cate' yida' yeto, ¿bin' chacžejlažo'?"

²⁴ Nedan' nezda' can' goc yogo' da' quinga na' da'nan' ba' bia' diža' chegaquen na' ba' bzojan'. Na' lecze le'e nezzele choa' diža' li'.

²⁵ Na' da' zanch da' ben' Jesúsen' da' bi' zjanyojen, le' ša' zjanyoj yogon' tgüeje tgüejen, libr' zan juisyw yesaquen še' ca'.

Da' na'ze chzoja' na'a.

DA' GOSON POSTLW CA'

Jesúsen' gwne' sele' Spiritw che Diosen'

¹ Teófilo, ca nac dan' bzoja' da' nechw, bzoja' yogo'lol da' ben Jesúsen', na' lecze bzoja' yogo' dan' bsed blo'ede' cate' gwzolaote' bsed blo'ede'

² žinten cate' beyepe' yaba. Šlac bsed blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'.

³ Nach gwde gosot bene' mal ca' Jesúsen' na' gwde bebane' ladjo bene' guaten' nach jalo'elagüe' postlw che' ca'. Na' da' zan da' bene' cont gosenезде' mbanczen'. Na' gwdalene' legaque' čhoa ža na' bzejni'ide' legaque' can' chnabia' Diosen'.

⁴ Na' šlac ne' zoa Jesúsen' len postlw che' ca' gože' legaque' cbi yesyežaše' ciuda Jerusalénna'. Gwne':

—Le yega'añ le cueze gac can' gwna Xa' Diosen' gac, ca dan' bzejni'ida' le'e.

⁵ Da' zaque' ben Juan da' bzoe' bene' nis, perw yeto čhope ža da' zaca'ch gac čhele dan' yedesoa Spiritw che Diosen' lo' yichjlažda'olen' nabi'an le'e.

Jesúsen' beyepe' yaban'

⁶ Na' ža na'teže šlac ne' zjandop zjanžague' len Jesúsen' gose'ene':

—Xanto' žba bžin ža gono' cont yechoj nación Israel čhechon' lo na' bene' zito' ca'?

⁷ Jesúsen' gože' legaque':

—Bitw naquen nezele bi ža bi hor gon Xacho Diosen' da' ca' toze' ba bžie' bia' gone'.

⁸ Perw na' cate' yedesoa Spiritw che'na' len le'e, gaclenen le'e len yela' guac čhenña' cont gü'e'le xtižan' ciuda Jerusalén ni, na' doxen ga mbane distritw Judean', na' distritw Samarian', na' doxen yežlion'.

⁹ Beyož gwna Jesúsen' ca', cheseña'te bene' ca' chesejnilaže' le', beyepe' yaba to lo' bejw na' bich besele'ede' le'.

¹⁰ Na' ne' cheseña'te bene' ca' le'e yaban' gan' besele'ede' beyepe', cate'cze gosache'ede' ba zjazecha čhope angl len legaque' bene' zjanyaz lache' šiš.

¹¹ Na' bene' ca' čhope gose'e' legaque':

—Bene' Galilea, žbixčhen' čhna'le le'e yaban'? Can' ble'ele beyep Jesúsen' yaban' caten' bechoje' ladjwlen', can' le'eczele yide' da' yoble.

Gosebeje' Matías cont goque' postlw laz Judasen'

¹² Na' nite' ya'a dan' nzi' Ya'a Olivos na' jaya'aque' Jerusalénna'. Jerusalénna' naquen gala'ze con ca'te' de šsens yesa'aque' ža che Dios can' ža ley che bene' Israel ca'.

¹³ Na' cate' besyežine' Jerusalénna' postlw ca' šnej na' bene' ca' zjanžague' gosegüe' gan' nite'na' lo' cuart zoa yichjen'. Postlw ca' šnej bene' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'in Alfeo, na' Simón ben' chon txen partid dan' nzi' cananista, na' Judas ben' nac bene' biše' Jacobon'.

¹⁴ Na' gosenita'teže postlw ca' šnej chosoļ güiže' Diosen' txen len bene' ca' zjanaque' biše' Jesúsen' na' len María xna' Jesúsen' na' len yezica'chle no'ol ca' zjanžag.

¹⁵ Na' ca hora' Pedroa' zeche' ladjo to gayoa gaļje bene' chesejnilaže' Jesucriston' cont be'lene' legaque' dižan', na' gože' legaque':

¹⁶ —Bene' migw, Spiritw che Diosen' benen cont rey David bzoje' na' be'e diža' che Judasen' ben' gwčhe' bene' ca' gosenen Jesúsen' gan' jasešague' le'. Na' benen byen goc can' nyoj Xtiža' Diosen'.

¹⁷ Judasen' goque' txen len neto' na' bene' txen len neto' yogo'lol dan' gwyo'o lo na'to' bento'.

¹⁸ Na' gosezi'e late' yežlio len mechw dan' gwxi' Judasen' bene' da' malen' bdie' Jesúsen' lo na' bene' ca'. Perw na' blažoe' cosyichj gan' goładite' na' gošj li'ena', doxen xjaloen' bchoj.

¹⁹ Yogo' bene' že' Jerusalénna' gosenезде' can' goc čhen' na' da'nán' bososi'e yežlion' Acéldama na' xtiža'gaque'na' zejen Yežlio Chen.

²⁰ Goc can' nyoj to salmo žan:

Liže'na' gaquen to yo'o daš, nono soa na'.

Na' lecze nyojen žan:

Na' te bene' yoble yołane' žin dan' bene'.

²¹ Na' nga nita' bene' ba gosone' txen len chio' šlac gwdalen Xancho Jesúsen' chio'.

²² Ba gosone' txen gwzolaoten cate' da' Juan bzoe' le' nis bžinten caten' beyepe' yaban', na' cheyala' cuejcho toe' gone' txen len neto' postlw güe'to' diža' can' beban Xancho Jesúsen' ladjo bene' guat ca'.

²³ Na' gosebeje' čhope bene', toe' José ben' le Barsabás, na' lecze le' Justo, na' ben' yeto Matías.

24-25 Nach bosol güiže' Diosen' gose'ene':

—Xanto', le' nombi'o yichjlaždao' yogo'lol bene'. Lao bene' ca' chope blo'ešca neto' noe' ba gwlejo' cont gaque' postlw na' gone' xšinon' txen len neto'. Le ca nac Judasen', gwlejyichje' dan' ngo'o lo ne'e gone' na' ba zjayde' gan' naquen yeyeje' yela' güen da' mal che'na'.

26 Nach gosone' rifa cont gosenezde' non' ba gwlej Diosen' na' Matiasen' bchoje' na' gosone' le' cuent len postlw ca' yešnej.

2

Can' goc cate' bla' Spiritw che Diosen'

1 Na' bžin ža lni dan' že' Pentecostés, na' postlw ca' na' yogo'lol bene' ca' ba gosejnilaže' Jesúcriston' zjandop zjanžague' toze latje.

2 Na' zejenez goc to sšag le'e yaban' ca' sšag che to be' bdonon' gual na' nenxeje lo' yo'o gan' zjachi'ena'.

3 Na' besele'ede' gała'ze yichj to toe' gosezoa tgüeje yi' beł da' čala'nin.

4 Ca' goc jašo'o Spiritw che Diosen' lo' yichjlaždao' to toe', na' Spiriton' benen cont gosezolažüe' goso'e gwde gwdele diža' da' gosejni'i bene' zito' ca'.

5 Na' ca' tiempen' bene' zan bene' Israel že' Jerusalénna' bene' chesonxene' Diosen', za'aque' doxen yežlion'.

6 Na' cate' gosende' chac sšaguen' gan' že' postlw ca', zan bene' Israel ca' besežague', na' leca besyebande', le to to postlw ca' bosozejni'ide' legaque' len diža' da' chesejni'i to toe'.

7 Bi gosejni'ide' bin' chac na' besyebande' gosene':

—žGague bene' distritw Galilea bene' quinga?

8 žNacxečen' to tocho chenecho cheso'e diža' can' cheso'e bene' gualaž checho diža'?

9 Bałcho naccho bene' nación Partia, na' bałcho bene' nación Media, na' bałcho bene' nación Elam, na' bałcho bene' distritw Mesopotamia. Na' yebałcho bene' distritw Judea, na' yebałcho bene' distritw Capadocia, yebałcho bene' distritw Ponto, na' yebałcho bene' distritw Asia,

10 yebałcho bene' distritw Frigia na' bene' distritw Panfilia, na' yebałcho za'cho nación Egipto, na' yebałcho za'cho yež ca' zjachi' Africa do te ciuda Cirene. Na' chio' naccho cuent len bene' nación Roma, bałcho goljcho naccho bene' Israel na' yebałcho ben cuincho txen len bene' Israel.

11 Na' bałcho naccho bene' yež ca' zjachi' Creta na' bene' distritw Arabia. Na' gate'tez bene' naccho, yogo'cho chenecho cheso'e bene' distritw Galilea quinga xtiža'chon' da' chaccho, cheso'e diža' che da' zan da' ba ben Diosen' da' zaca' yebanecho.

12 Na' yogo' bene' ca' besedobe' chosozenague' besyebande' na' gosacžejaže' bin' chac, na' zane' gosene':

—žBi zejen dan' chaquen'?

13 Na' yebale' goseneje'e gosene':

—jBene' quinga chesezožde'!

Diža' dan' be' Pedroa' len bene' Israel ca' besežag

14 Na' Pedroa' gwzeche' lao ben' zjandop zjanžague' txen len postlw ca' yešnej na' be'e diža' žiže gwne':

—Le'e bene' Judea na' note'tezechle zoale ciuda Jerusalén ni, che'nda' gwzenagle čhia' na' gonle xbab che da' za' ni'a le'e.

15 Bene' lježa' quinga bitw chesezožde' can' chaquele, le ne' nac tempran.

16 Ba chac can' bzoj da' Joel ben' be' xtiža' Diosen' cani' bzoje' dan' gwna Diosen', žan:

17 Cate' ba zoa žin ža cont yeyož yežlion',

neda' Dios gona' cont Spiritw čhian' yedesoa len bene' že' doxen yežlion'.

Na' gona' cont xi'ınle ca' yeso'e xtiža'na',

na' bene' byo xcuide' ca' yesele'edagüede' bi da' gona',

na' güe'lena' bene' byo gol ca' diža' lo bišgal čhegaquen'.

18 Na' yogo' bene' ca' chesejnilaže' neda', bene' byo na' no'ole,

yedesoa Spiritw čhian' len legaque' cont yeso'e xtižan'.

19 Gona' cont yesele'e benachen' da' zaca' yesyebande' le'e yaban' na' lagüe yežlion',

na' gona' yela' guac čhia'na' len chen, len yi' na' len žen da' nac ca' bejw.

20 Bich gwšeni' gwbižen', na' bio'na' yeyaquen xna ca' chen

cate' za' žin ža yida' da' yoble gwnežjua' castigw che yogo' bene' cbi chesejnilaže'nda', neda' naca' Xanle.

žŽana' gaquen to ža žialao xen.

21 Nach note'tez bene' yeseñabe' gaclena' legaque',

neda' naca' Xanle yebeja' legaque' lo da' malen'.

Can' gwna Diosen'.

²² Na' le'e bene' Israel gualaž chia', le gwzenag chia'. Jesúsen' ben' nac bene' yež Nazaret, Diosen' blo'ede' naque' bene' zaque'. Diosen' bene' cont Jesúsen' bene' yela' guac na' bichle da' zaca' yebanecho can' nezcetzen'.

²³ Lo yela' neze che Diosen' bin' za' gac, bi'e latje gwzenle Jesúsen' na' bdelene' lo na' bene' mal ca' gosote'ne' bosode'ene' le'e yag cruzen'.

²⁴ Perw na' Diosen' bechis bosbane'ne' ladjo bene' guat ca', le bi gwzoe yela' goten' nabian' le'.

²⁵ Quinga bzoj da' rey David xtiža' Jesúsen' cani'te, žan:

Nezda' Xana' Diosen' zoe' len neda' do ža do yel,
na' zoe' chaclene' neda' cont bi chžeba'.

²⁶ Da'na'na' zoa' mbalaz na' choa' diža' leca chebeda'.

Na' lecze chebeda' nezda' yechis yosbane' neda' ladjo bene' guat ca' cate' ba gota'.

²⁷ Dios chia', nezda' bi yocua'ano' neda' gan' že' bene' guat ca',

neca go'o latje gožo' cuerp chia'na', neda' naca' xi'ino' na' nac lažda'oguan' xilaže'.

²⁸ Ba blo'edo' neda' can' soa cueza' mbalaz.

na' mbalaz soa' dan' soaleno' neda'.

Beyož gwna Pedroa' ca' nach gože' legaque'.

²⁹ —Bene' Israel, nezecho da' xozxta' ocho rey David gote' na' bosocuaše' le'. Na' nom-bia'cho ba gan' bosocuaše' le'.

³⁰ Na' da' rey Davin' be'e diža' can' bzejni'i Diosen' le' na' gwneзде' gwlo'o Diosen' da' bałi gague da' te bi gac can' gwne'. Gwneзде' gon Diosen' cont Criston' galje' lo diaža' che' na' nabi'e naciön Israelen' can' gwnabia' le'na'.

³¹ Diosen' bene' cont da' rey Davin' gwneзде' can' gaquen' na' da'nan' be'e diža' che Criston' ben' ba gwsela' Diosen' cont nabi'e. Gwne' Criston' yebane' na' bi yega'ane' gan' že' bene' guat ca' na' neca gožo' cuerp che'na'.

³² Na' Diosen' bechis bosbane' Jesúsen' ladjo bene' guat ca', na' yogo' neto' choe'to' diža' neze'to' beyas bebane'.

³³ Na' Diosen' len yela' guac che'na' bene' cont beyep Jesúsen' gan' zoe'na' na' chnabi'e txen len le'. Na' Diosen' bnežjue'ne' Spiritw che'na' can' gwne'. Na' Jesúsen' ba bene' yela' guac nga da' ba benele na' da' ba ble'ele.

³⁴ Gague da' rey Davin' beyep yaban', san da' David bzoje' che Jesúsen' gwne':

Xancho Diosen' gože' Xanan':

“Gwche'edo' cuita' nga nabi'a'cho txen,

³⁵ na' gona' cont yogo' no chesegue'e le' yosozexjw yichje' yosozenague' chio'.”

³⁶ Da'nana' yogo' chio' bene' Israel cheyla' nezecho Jesúsen' ben' betwle bda'ln'e' le'e yag cruz, Diosen' gwleje'ne' cont naque' Xancho' na' naque' Cristo, zeje diža' naque' ben' gwsela' Diosen' nabi'e naciön chechon'.

³⁷ Na' cate' bene' ca' zjanžaguen' gosende' xtiža' Pedroa', da' juisyw da' gosacde' lo' lažda'ogaquen', nach gose'e Pedroa' na' len yezica'chle postlw ca':

—Bene' gualaž, žbin' cheyla' gonto'?

³⁸ Nach Pedroa' gože' legaque':

—To tole cheyla' yetinjele xtoła'le ca' na' soale nis dan' ba chejnilaže'le Jesucriston', na' Diosen' yezi'xene' chele na' gone' le'e Spiritw che'na' soan lo' yichjlažda'olen'.

³⁹ Xancho Diosen' gone' note'tezle Spiritw che'na' can' ba gwne', le'e na' xi'inle ca' na' note'tez bene' zito', le chnežjuen' yogo' bene' chbeje' cont yesaque' lo'ne'e.

⁴⁰ Nach Pedroa' be'lene' legaque' diža' zan, na' gwneyoede' legaque' gwne':

—Le yechoj ladjo bene' mal quinga bene' cbi zjanombia' Dios.

⁴¹ Ca' goquen' bene' ca' gosejle'e diža' dan' be' Pedroa' gosezoe' nis. Na' lo žana' šon mil bene' gosejnilaže' Jesúsen' na' gosaque' txen len yezica'chle bene' chesejnilaže' le'.

⁴² Yogüe' gosenita'teze' bosozenague' dan' bososed bosolo'e postlw ca' legaque'. Na' gosaque' toze len yezica'chle bene' gosejnilaže' Jesúsen' na' gose'ej gosagüe' txen na' gosenite' bosol' güiže' Diosen' txen.

Can' goson bene' ca' gosejnilaže' Criston' da' nechw

⁴³ Na' yogo'ze bene' besyebande' can' goson postlw ca' da' zan da' güen da' zaca' yebanecho len yela' guac che Diosen'.

⁴⁴ Na' bene' ba chesejnilaže' Jesúsen' gosaque' toze na' gosone' toze yogo'lo' da' zjade čhegaque'.

⁴⁵ Na' gosote' yežlio na' bichle da' zjadede' na' mechw dan' besele'ede' čhen goseyisen' lao yogo'lole' con da' beseyažje to toe'.

⁴⁶ Na' t̄za t̄za besedop besežague' yodao' blaona' na' lecze do laže' gose'ej gosagüe' txen liž to togaque' na' gosenite' mbalaz.

⁴⁷ Gosenita'teze' gosonxene' Diosen'. Na' gosazlaže' bene' yezica'chle can' gosone'na'. Na' t̄za t̄za Xancho Diosen' bene' cont gosanch bene' ca' gosejnilaže' Jesucriston'.

3

Beyac to bene' nxinj ni'e

¹ Na' to ža Pedroa' na' Juan ja'aque' yodao' blaona' do cheda šone, hor cate' bene' Israel ca' chosol güiže' Diosen' yogo' ža.

² Na' gwzoa to bene' nxinj ni'e ca goljte' na' yogo' ža gosebec bene' le' cho'a puert che yodao'na', puert dan' nzi' Puert Xdan, cont gwñabe' mechw lao bene' ca' chja'ac yodao'na'.

³ Nach cate' bžin Pedroa' len Juan yodao'na' na' ben' nxinj ni'ena' bol güiže' legaque' yosonežjue'ne' mechw.

⁴ Nach Pedroa' len Juanna' gosebeze' na' goseña'chgüe' le' na' Pedroa' gože'ne':

—Gwñna' neto'.

⁵ Na' bena' bene' xhab yosonežjue'ne' mechw.

⁶ Perw Pedroa' gože'ne':

—Bibi mechw chia' de da' goña' le', perw zoa to da' gona' gaclena' le': len yela' guac che Jesucriston' bene' naque' bene' yež Nazaret, chona' mandadw gwzoža' na' gwda.

⁷ Na' Pedroa' bežoe' ne'e liča na' bsože'ene', na' gocte gwzeche' na' ni'ena' la' besyeyacten da' gual na' lecz ca' bečhij ni'e ca'.

⁸ Na' cate' gocbe'ede' ba besyeyac ni'en', bxite' yela' chbe che'. Na' gwoy'e chašil che yodao'na' len legaque' chxite' na' cho'e yela' choχcLen che Diosen'.

⁹ Na' bene' ca' že' chašilen' besele'ede' can' chde' chxite' cho'e yela' choχcLen che Diosen'.

¹⁰ Na' besyeyombi'e le' naque' ben' chbe' chñab mechw yogo' ža cho'a puert che yodao'na', puert dan' nzi' Puert Xdan, na' leca besyebande' da' ba beyac ni'ena'.

Pedroa' be'e xtiža' Diosen' chašil yodaon'

¹¹ Na' gosenite' chašil da' nzi' Chašil che da' Salomón dan' ze gan' zoa' yodao'na'. Na' ben' beyac ni'ena' bi bsane' Pedroa' len Juanna'. Nach yogo' bene' že' yodaon' besežagsese' chašila' cont jasene' ben' beyaquen', le besyebanchgüede'.

¹² Na' cate' Pedroa' ble'ede' ba zjanžag bene' zan gan' nite'na' nach be'lene' legaque' diža', gože' legaque':

—Le'e bene' gualaž chia' bene' Israel, ž bixchen' chebanelo? ž Chaquele len yela' guac cheton' bento' cont beyac benga? ž Še chaquele beyaque' dan' chonchguato' can' chazlaže' Diosen'? Bi naquen ca'.

¹³ Dios ben' gosonxen da' xoxxta' ocho Abraham, Isaac na' Jacob, blo'e nac Xi'ine' Jesúsen' bene' zaca' juisyiw. Perw le'e bdele Jesúsen' lo na' justis ca' cont gosote'ne' na' bžonle cate' Pilaton' goclaže' gwsane'ne'.

¹⁴ Can' benle len Jesúsen' la'czla' naque' bene' laždao' xilaže' juisyiw na' naque' la'zelagüe bene' chon da' güen. Nach gwñable bosan Pilaton' to bene' güetw bene' na' bi gwñable yosane' Jesúsen'.

¹⁵ Na' ca nac Jesúsen' ben' bxe yela' mban toli tocañe, le'na' betwle, perw na' Diosen' bečhis bosbane' le' ladjo bene' guat ca'. Neto' ble'eto'ne' na' choe'to' diža' ba bebane' ladjo bene' guat ca'.

¹⁶ Na' chle'ele benga chi goc se'e na' nombia' lne', na' na'a ba beyac ni'ena' len yela' guac che Jesúsen' ben' chejnilaže'to'. Le da' chejnilaže'to' Jesúsen', da'nan' besyeyacšagüe' ni'a benga na' ba chle'ele can' beyaquen'.

¹⁷ Bene' migw, nezda' le'e na' bene' gole blao chele ca' betwle Jesúsen' lagüe bi gwejni'ile Diosen' gwsele'ne'.

¹⁸ Na' da' benle ca', goc can' gwna Diosen' gac, da' bene' mandadw bosozoj da' bene' ca' goso'e xtižen' can', bosozoje' che Criston' ben' gwlej Diosen' cont ñabi'e. Bosozoje' che' gosene' yosochi yososaca' bene' le'.

¹⁹ Da'nan' le yeyonšca xhab chele na' le yetinjje xtola' len' cont Xancho Diosen' gwñitlagüen' na' gone' ga soale mbalaz.

²⁰ Nach Xancho Diosen' sele' Jesúsen' yežlio nga yetni'a, ben' gwleje' cani'te cont naque' Cristo checho.

²¹ Perw chonen byen yega'an Jesucriston' yaban' ña'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena bene' gwleje' cani' cont goso'e xtižen'.

²² Da' Moisésen' be'lene' da' xozxta' ocho diža', gože' legaque': "Xancho Diosen' sele' yeto bene' gualaž chechon' cont güe'lene' le'e xtiže'na' can' gwsele' neda'. Che bena' gwzenagle bite'tez ne'.

²³ Na' Diosen' gone' yesebiayi' yogo' bene' ca' cbi yosozenague' che bena' selen', na' bich yesenite' txen len bene' ca' chesonxene' le'." Can' gož Moisésen' da' xozxta' ocho ca'.

²⁴ Lecz ca' yogo' lo' bene' goso'e xtiža' Diosen' cani', gwzoloazen len da' Samuel na' yogo' bene' ca' gosedeč, goso'e diža' che da' ca' ba chac tiemp na'a.

²⁵ Le'e nacle xi'in diaža che da' bene' ca', na' dan' gož Diosen' legaque' gone', na' dan' gože' yezica' chle xozxta' ole ca', lecz naquen che le'e. Gože' da' Abrahanna': "To bene' galje lo diaža chio' gone' cont bene' že' doxen yežlion' nite' mbalaz."

²⁶ Da'n'an' cate' Diosen' bosbane' Xi'ine' Criston' ladjo bene' guat ca', zgua'tec gwsele'ne' lao chio' bene' Israel da' goclaže' gaclene' chio' cont to tocho yetinjecho xto'la'chon'.

4

Pedroa' na' Juanna' nite' lao bene' gwnabia' ca'

¹ Ne' chesoe'lente Pedroa' na' Juanna' bene' ca' diža' cate' besežin ba' b'xoz che bene' Israel ca', na' bene' gwnabia' che ben' chesape' yodao' blao chegaque'na' na' bene' saduceo ca' bene' cbi chesejle'e še yesyeban bene' guat ca'.

² Bene' ca' cheseže'e che dan' chososed chosolo'e Pedroa' len Juanna', le chesene' nezecho gwžin ža cate' yesyeban bene' guat ca' da' beban Jesusen'.

³ Na' bene' blao ca' gosezene' Pedroa' len Juanna' na' goseyixje' legaque' ližya do yel, le ba ch'xin na' bi gola' yesone' yela' justis chegaquen' ca' cheyala' že'na', san bosocuezen' beteyoch.

⁴ Na' ca' nac bene' ca' gosende' chesoe' Pedroa' na' Juanna' xtiža' Diosen', zane' gosejnilaže' Criston', na' txen len bene' ca' ba gosejnilaže'ne' cana', gosac do gayo' mil bene' byo cbi cuent no'ole.

⁵ Na' beteyo bene' gwnabia' che bene' Israel ca', bene' gole blao ca' na' bene' bososed bosolo'e ley dan' b'zoj da' Moisés, besedop besežague' ciuda Jerusalénna'

⁶ len Anás ben' naquech b'xoz blao, na' len Caifás, na' Juan, na' Alejandro na' nochle bene' zjanaque' biše' ljež ben' naquech b'xoz blaon'.

⁷ Na' gosone' mandadw jasexi'e Pedroa' na' Juanna' na' cate' ba zjazie' laogaquen' gosena' bde' legaque':

—Žno ben' isens chele cont beyonle bene' nxinjen'? o žno yela' guac che bchinle beyonlene'?

—Na' Spiritw che Diosen' dan' yo'o lo' yichjlaždao' Pedroa' benen cont gože' bene' ca':

—Le'e bene' gwnabia' na' bene' gole bene' blao che nación Israel chechon',

⁹ chn'able nac bento' da' güen beyonto' bena' nxinj ni'ena'.

¹⁰ Le'e na' yogo' bene' gualaž cheyala' nezele Jesucriston' ben' naque' bene' Nazaret bene' yela' guac che' cont beyacšague' benga. Le'e betwle Jesucriston' bda'line' to le'e yag cruz, perw Diosen' bečhis bosbane'ne' ladjo bene' guat ca'.

¹¹ Bi gwyejle'le che Jesucriston', da'n'an' zaca'leble ca' bene' cheson yo'o bene' bi chesazlaže' yej güen da' ba naquen yej squin che yo'ona'.

¹² Toze Jesucriston' guac gone' chio' yela' mban toli tocane, na' noch no zoa doxen lo yežlion' bene' gac gone' yela' mban toli tocane che chio' beñač.

¹³ Besyebane bene' gwnabian' can' boži'i Pedroa' na' Juanna' xtiža'gaquen' sin cbi besežebe', le nachbia' zjanaque' bene' yiže' na' bi zjansedteque'. Nach gosache'ede' legaquen' ba gosodalene' Jesusen'.

¹⁴ Na' dan' zecha ben' beyaque ni'ena' txen len Pedroa' na' Juanna', bi besyežele bene' gwnabian' bi yesene' chegaque'.

¹⁵ Nach bene' gwnabian' besyebeje' postlw ca' chyo'ole šlac bosoxi'e legacze' nacle yesone'.

¹⁶ Na' bene' gwnabian' gose' lježgaque':

—Žbi goncho len bene' quinga? Yogo' bene' že' ciuda Jerusalén ni zjaže'zde' gosone' to yela' guac xen na' bi gac ye'cho bene' bi gosone' yela' guaquen'.

¹⁷ Letečozhe goncho cont cbi gaslas diža' dan' cheso'ena'. Da'n'an' cheyala' ye'cho legaque' gata' castigw chegaque' še yesoe'che' xtiža' Jesusen'.

¹⁸ Nach gosaxe' Pedroa' na' Juanna' da' yoble na' gose'e legaque' bich yeso'e diža' che Jesusen' na' noch no yososed yosolo'ede'.

¹⁹ Nach Pedroa' na' Juanna' bosyoži'e xtižen' gose'e legaque':

—Le gon xbab che da' nga, žchaquele chaclaže' Diosen' gwzenagto' chele o še chaclaže' gwzenagto' che le'?

²⁰ Bi gac cuezto' bich güe'to' diža' che da' ba ble'eto' na' ba beneto'.

21-22 Na' da' zan da' gose' bene' gwnabia' ca' legaque' cont yosošebe'ne'. Perw na' bi beseželde' nacle yesone' legaque' castigw, le bene' zan chesonxene' Diosen' dan' beyac bena' len yela' guac che Diosen'. Ba gwddie' čhoaz iz na' ca goljte' bi goc se'e. Nach bososane' Pedroa' na' Juanna'.

Gosenabde' Diosen' gaclene' yeso'e xtiže'na' sin cbi yesežebe'

23 Na' Pedroa' len Juanna' cate' bososan bene' gwnabian' legaque' jaya'aque' gan' nita' yezica'chle bene' chesejnilaže' Criston' na' gosoe'lene' legaque' diža' yogo'loł can' gose' bꝛoz gwnabia' ca' na' bene' gole blao ca' legaque'.

24 Na' cate' gosende' dan' gose' Pedroa' len Juanna' legaque', toze can' gosone' xbab na' bosol güiže' Diosen', gosene':

—Xanto' Dios, len' yaban' yaban' na' yežlion' na' nisdaon'. Len' beno' benačh na' be ca' chesaš na' bica'chle da' zjade, na' len' chnabi'o doxen.

25 Na' le' beno' cont da' rey David bzoje' diža' quinga dan' gož Spiritw čhion' le', žan:

Bene' ca' cbi zjanaque' bene' Israel chesase' contr le', Xanto' Dios,

perw bicze gac can' chesone' xbab.

26 Bene' gwnabia' che naciön ca' na' che yež ca'

txen zjanaque' chesone' contr le' Xanto' Dios,

na' contr Xi'ino' Criston' ben' gwseło' cont nabi'e.

27 Na' Xanto' Dios, naquen da' li rey Herodes na' Poncio Pilato na' bene' cbi zjanaque' bene' Israel gosaque' txen len bene' Israel ca' lo ciuda nga. Na' yogüe' gosone' txen cont gosote' Xi'ino' Jesúsen' ben' nac bene' laždao' xilaže' juisyw, ben' gwlejo' cont nabi'e.

28 Gosone' can' gwčhogbi'o gac dan' bžio' bia' can'te.

29 Na' na'a Xanto', gwna can' cheson bene' gwnabia' ca', le chesaclaže' yosošebe' neto' bene' güen žin čhio'. Na' goclen neto' cont bi žebto' güe'to' xtižo'na'.

30 Na' cate' güe'to' xtižo'na' blo'ešca yela' guac che Xi'ino' Jesúsen' bene' laždao' xilaže' juisyw' cont gac yela' guac, na' yesyeyac no bene' chesacšene' na' gac bichle da' yesyebane bene'.

31 Na' cate' beyož bosol güiže' Diosen', Diosen' bene' gwxo' gan' zjandop zjanžague'na' na' Spiritw che'na' gwzoachguan len legaque', nach goso'e xtiža' Diosen' sin cbi besežebe'.

Gosone' dan' zjade chegaque' toze

32 Na' yogo' bene' ca' gosejnilaže' Criston' toz ca gosac yičhjažda'ogaque'. Na' yogo' bi da' zjade chegaque' gosonen' toze, na' nono gwna: “Čhia' da' nga”, o “Čhia' da' na”, le naquen che yogo'loł gaque'.

33 Na' postlw ca' len yela' guac xen che Diosen' bosozejni'ide' bene' Jesúsen' bebane' ladjo bene' guat ca'. Na' Diosen' goclenčgüe' legaque' len bi dan' gosone'.

34 Na' bibi goc falt bi da' beseyažje bene' gosejnilaže' Criston', le bene' zjanape' no yežlio o no yo'o gosoten'. Na' mechw dan' besele'ede' che to ton

35 bosonežjuen' postlw ca', na' postlw ca' goseyisen' len bene' beseyažjden'.

36 Can' ben to bene' Chipre bene' le José. Naque' xi'in' dižaže che da' Levin' na' postlw ca' bososi'ene' Bernabé, zeje diža' ben' cheyonxenlaže' bene'.

37 Joséna' bete' to yežlio che' na' mechw dan' ble'ede' čhen bnežjuen' postlw ca'.

5

Da' mal dan' goson Ananías na' Safira

1 Na' zoa to bene' le Ananías na' no'ol che'na' Safira, na' gosote' to yežlio chegaquen'.

2 Perw na' legacze' bosoxi'e yosonežjue' late'ze mechw dan' besele'ede' čhen na' yese'e postlw ca' doxenenna'. Nach gwyej Ananíasen' na' bnežjue' postlw ca' mechon'.

3 Nach Pedroa' gože'ne':

—Ananías, žbixčhen' bzenago' che Satanás dan' chnabia' da' xigüe' ca' na' chacdo' xoayago' Spiritw che Diosen'? Čhi'o neto' choño' doxen mechon' dan' ble'edo' che yežlion', len ba gwlo'ošagüe'le laten' par cuinle.

4 Čhio' yežlion' cate' biña' goton', na' čhio' mechon' dan' ble'edo' cate' beton' na' zaco' cont beno' da' chaclažo' len len. žBixčhen' benle' da' malen' nac ca'? Gague contr neton' ba benle' benlaže'le, san contr Diosen'.

5 Nach Ananíasen' cate' bende' xtiža' Pedroa' to gwbižze' na' gote'. Na' yogo' bene' ca' gosende' diža' can' goquen' besežebčgüe'.

6 Na' besežin to chope bene' xcuide' gan' gwbiž da' Ananíasen' na' bosyočhele' cuerp čhen' to lache' na' besyeyo'ene' ga bosocuaše'ne'.

7 Na' gwde do šon hor gote' cate' bžin no'ol che'na' na' gwyo'e lo' yo'on sin cbi nežde' bin' ba goc che bene' čhen'.

8 Na' Pedroa' gože'ne':

—¿To ca'te' ble'ele che yežlion'?

Na' Safran' gože'ne':

—To ca'te'ten'.

⁹ Nach Pedroa' gože' no'olen':

—¿Bix'chen' goco' toze len beñe' chion' chaquele gonle Diosen' prueba še lede' can' že' bi cheyala' xoayagcho? Cho'a puert nga jzazecha beñe' ba bosocuaše' beñe' chio'na' na' na'a yeso'e le'.

¹⁰ Na' la' gwbiixte Safran' lao Pedroa' na' gote'. Na' cate' goso'o beñe' xcuide' ca' lo' yo'ona' bešele'ede' ba gote' nach goso'ene' jasecuaše'ne' cuit da' beñe' che'na'.

¹¹ Na' yogo' bene' chesejnilaže' Criston' besežebe' can' goquen' na' lecze besežebe yezica'chle beñe' gosende' diža' can' goquen'.

Gosone' da' zan yela' guac

¹² Na' postlw ca' gosone' da' zan yela' guac na' bichle da' bešele'e beñe' da' zaca' yesyebande'. Na' beñe' ca' chesejnilaže' Xancho Jesucriston' chesedop chesežague' txen chašil che yodao' blaona' gan' nzi' Chašil che da' Salomón.

¹³ Na' yezica'chle beñe' ca' že' Jerusalénna' gosapchgüe' legaque' bala'an, la'czla' besežebe' yesaque' txen len legaque'.

¹⁴ Perw na' zane' gosejnilaže' Xancho' na' gosaque' txen, zan beñe' byo na' no'ole.

¹⁵ Na' cate' no beñe' gosacšende' goseyixjue' legaque' tnez do lo cam do lo yagla', gosebeze' te Pedroa' cont yesечеle' bxin che' na' yeseyacde' še bi yižgüen' chese'ede'.

¹⁶ Na' beñe' ca' že' yež da' zjachi' gała'ze ciuda Jerusalénna' ja'aque' zjanche'e beñe' chesacšene na' beñe' zjajo'o zjanyaz da' xigüe'. Na' yogo'lole' besyeyacde'.

Bene' saduceo ca' goseyixjue' Pedroa' len Juanna' ližya

¹⁷ Nach ben' nacch bxož blao na' yezica'chle beñe' saduceo beñe' cbi chesejle' yesyeban beñe' guat, besegue'ede' postlw ca'.

¹⁸ Na' gosezene'ne' na' goseyixjue' legaque' ližya.

¹⁹ Na' to angl beñe' za' gan' zoa Xancho Diosen' bžine' ližyan' šeže'le na' gwsaljue' puert ca' na' bebeje' legaque'. Na' gože' legaque':

²⁰ —Le šja'ac yodao' blaona' na' le güe' diža' len ben' chesežagna' naquen' yesone' cont gata' yela' mban chegaque' toli tocane.

²¹ Nach dan' gosende' can' gož anglen' legaque', ja'aque' yodao' blaona' cate' gwyeni' na' bososed bosolo'ede' ben' zjanžag na'.

Na' ben' nac bxož blao len beñe' gole blao ca' chesenabia' nación Israelen' besedobe' cont bosoxi'e, nach gosone' mandadw šjasexi'e postlw ca' gan' zjade' ližyan'.

²² Na' cate' ben' chesap yodaon' besežine' ližyan' gague no postlw ca' zjanla' na' jaya'aque' lao beñe' gwnabia' ca' jasyedixjue'ede'.

²³ Gose'e beñe' ca':

—Nyeyjwčhach ližyan' na' lecze na' nita' soldadw ca' cho'a puerta' chesapen' perw cate' gwsaljwto' puerten' gague no postlw ca' že' lo' ližyan'.

²⁴ Na' ben' nacch bxož blao na' beñe' gwnabia' che ben' chesap yodaon' na' bxož gole blao ca' cate' gosende' rsonna' besyebande', gosone':

—¿Nac gac da' nga na'a?

²⁵ Na' šlac chesacžejaže', bžin to beñe' gože' legaque':

—Beñe' ca' gwdixjwle ližyan' jzaje' chašil che yodao' blaona' chososed chosolo'ede' beñe'.

²⁶ Nach beñe' gwnabia' che ben' chesap yodaon' len beñe' gop ca' jasa'aque' jasexi'e postlw ca' diža' šagüe'. Bi gosone' znia len legaque' da' besežebe' beñe' chosozenag xtiža' postlw ca' še yosožie' legaque' yej.

²⁷ Na' cate' besežin postlw ca' lao beñe' gwnabia' ben' nita' chosoxi'a, nach ben' nacch bxož blao gože' legaque':

²⁸ —Ba bento' mandadw bi güe'le diža' che Jesúsen' na' bich gwsed gwlo'ele beñe' xtižen', na' ba gwdisle xtiže'na' doxen ciuda Jerusalénna'. Na' ba chosbague'le neto' žale betwto'ne'.

²⁹ Nach Pedroa' na' postlw ca' gose'e legaque':

—Nacchen da' žialao xen gwzenagto' che Diosen' clcl ca che benačh.

³⁰ Le'e betwle Jesúsen' bda'ln'e to le'e yag cruz, perw Dios ben' chonxencho na' ben' gosonxen da' xožxta'ocho ca' bechis bosbane'ne' ladjo beñe' guat ca'.

³¹ Na' na'a Diosen' ba bnežjue'ne' yela' bala'an xen na' yela' gwnabia' xen cont chnabi'e na' chnežjue' yela' mban toli tocane che beñe' chesejnilaže'ne'. Na' le'na' chazlaže' gaclene' yogo' chio' beñe' Israel yetinjecho xtoła'chon' nach yezi'xene' chechon'.

³² Neto' nezeto' can' ben Diosen' len Jesúsen' na' choe'to' diža' čhen, na' lecze Spiritw che Diosen' choen' diža' che Jesúsen' lo' yichjlažda'oton', le Diosen' ba gwsele' Spiritw čhen' zoon lo' yichjlaždao' beñe' chosozenag che'.

³³ Na' beseža'achgua bene' gwnabia' ca' cate' gosende' can' gož Pedroa' legaque' na' gosaclaže' yesote' postlw ca'.

³⁴ Perw gwzao to bene' fariseo len legaque' bene' le Gamaliel. Chsed chlo'ede' bene' ley dan' bzoj da' Moisésen' na' gosapchgua bene' le' bala'an. Na' Gamalielen' gwzeche' na' bene' mandaw yesechoj postlw ca' chy'o'ole šlac güe'lene' bene' ca' že'na' diža'.

³⁵ Na' gože' bene' ca' že'na':

—Bene' gualaž, cheyała' goncho xbab nac goncho len bene' quinga cont goncho da' nac güen.

³⁶ Le yosa'laže' can' goc cate' bchoj ben' le Teudas gwne' naque' bene' zaque'. Na' do tap gayoa bene' bosozenag che' na' gosaque' le' txen. Perw na' bžin ža gosot bene' le' na' besyeyaslas ben' gosaque' le' txen, gague bi gocch yesone'.

³⁷ Na' gwdechle ca' tiempen' bosochele' bał bene' že' to to yež, bchoj to bene' distritw Galilea ben' le Judas na' bene' zan gosaque'ne' txen. Na' ľecze bžin ža gosote'ne' na' bene' ca' gosaque' le' txen ľecze besyeyaslaše'.

³⁸ Na' da'nan' žia' le'e can' chacda' cheyała' goncho, jaseye bene' quinga, bibi gonecho legaque'. Le še chososed chosolo'ede' xbab chegacze', yeniten.

³⁹ Na' še dan' chososed chosolo'ede' naquen che Dios, bibi gac goncho cont chi gaslasen. Cheyała' gwsaca'cho cont bi tillencho Diosen'.

⁴⁰ Na' gosazlaže' bene' gwnabia' ca' can' gož Gamalielen' legaque'. Nach gosaxe' postlw ca' na' goseyine' legaque' na' gosone' mandaw bich yososed yosolo'ede' che Jesúsén' bate'tezechle. Nach bososane' legaque'.

⁴¹ Na' ca' nac postlw ca', cate' besyechoje' gan' gota' yela' güexian', chesyebede', le Diosen' be'e latje bosochi bososaca' bene' legaque' neče dan' chososed chosolo'ede' che Jesúsén'.

⁴² Na' yogo' ža bososed bosolo'ech postlw ca' che Jesucriston' do liž bene' na' cate' chja'aque' yodao' blaona'.

6

Bene' ca' chesejnilaže' Criston' gosebeje' gaže bene' goson žin bixjw

¹ Na' ca' tiempen' zej chanch bene' ca' chesejnilaže' Jesucriston' na' bene' ca' cheso'e diža' griego gwzolaio chesežeše', chesene' no'ol güezeb ca' nchixe' legaque' bi chesezi'e lebe len no'ole güezeb ca' cheso'e diža' hebreo cate' cheseyise' dan' chese'ej chesagw to togaque'.

² Nach postlw ca' šižinw bosyotobe' yezica'chle bene' ca' chesejnilaže' Jesucriston' na' gose'e legaque':

—Bi naquen güen neto' gwsanto' bich gwsed gwlo'eto' bene' xtiža' Diosen' cont chisto' dan' yese'ej yesagw bene'.

³ Da'nan' bene' migw, le cuej gaže bene' ľježle, bene' zoachgua Spiritw che Diosen' len legaque', bene' zjanac bene' sina' na' bene' cheson da' güen, na' le gon lo' na'gaque' yeseyise' dan' yese'ej yesagw bene' ca'.

⁴ Na' neto' soateze soato' yoł güižto' Diosen' na' gwsed gwlo'eto' bene' xtižen'.

⁵ Na' gosazlaže' yogo' bene' ca' na' gosone' can' gose' postlw ca' legaque', na' gosebeje' to bene' le Esteban bene' chejnilaže' chgua Diosen' na' zoachgua Spiritw che Diosen' len le'. Na' ľecze gosebeje' Felipe, na' Prócoro, na' Nicanor, na' Timón, na' Parmenas, na' Nicolás bene' ciuda Antioquía ben' bene' txen len bene' Israel.

⁶ Na' bosozoe' legaque' lao postlw ca' na' postlw ca' bosol' güiže' Diosen' chegaque' na' gosexo'a na'gaquen' yichj bene' ca' cont gosezi' lo' ne'e žin dan' yesonen'.

⁷ Na' bene' zanch gosende' xtiža' Xancho Jesucriston', na' zan bene' Jerusalénna' gosejni-laže'ne' na' ľecze zan bžoz ca' bosozenague' na' gosejle'e xtiže'na'.

Gosezene' Esteban

⁸ Na' Estebanna' gwzoachgua yela' guac che Diosen' len le' na' Diosen' goclenchgüe' le'. Da'nan' bene' yela' guac na' bichle da' zaca' yesyebane bene' lao bene' ca' že' na'.

⁹ Na' zoa to yodao' dan' chesene' Yodao' che Bene' ca' Bich Zjanaque' Esclavos. Bene' ca' chesedop chesežag yodao'na' za'aque' ciuda Cirene na' ciuda Alejandría na' distritw Cilicia na' distritw Asia. Na' bał bene' ca' gwzolaio gosacyože' len Estebanna',

¹⁰ perw na' bi besyeželde' nac yosyoži'e xtižen', le Spiritw che Diosen' bnežjon le' yela' sina' na' bzejni'in le' bin' gwne'.

¹¹ Nach gosego'oyele' to čhop bene' cont goso'e diža' güenlaže' che', gosene' Estebanna' gwneye'e che da' Moisésen' ben' bzoj ley che bene' Israel ca'. Na' ľecze gosene' Estebanna' gwne' diža' ya' che Diosen'.

¹² Na' bene' ca' gosacyože' che Estebanna' bosota bosone' bene' lo' ciuda na' bene' gole blao che bene' Israel ca' na' bene' ca' chososed chosolo'ede' ley dan' bzoj da' Moisésen' cont

gosaque' toze. Na' ja'acsesse' gan' zoa Estebanna' na' gosezene'ne' na' goseche'ene' gan' že' bene' ca' chesenabia' nación Israelen'.

¹³ Na' goseyiljue' bene' goso'e diža' güenlaže' bene' gosene' che':

—Benga bicze šize zoe' chne' diža' bya' che yodao' blao che Diosen' nga na' ley dan' bzoj da' Moisés.

¹⁴ Ba beneto' že' Jesús ben' naque' bene' yež Nazaret yočinje' yodao' blaona' na' yoše'e costumbr checho dan' ben da' Moisés mandadw na' ocho.

¹⁵ Na' yogo' bene' ca' zjachi' gan' chesone' yela' justisen' gosene'e cho' alao Estebanna' na' besele'ede' chactiten ca cho' alao angl.

7

Choe' Estebanna' diža'

¹ Nach ben' nacch bχoz blaona' gože' Estebanna':

—¿Naquen can' chesena bene' quinga?

² Na' Estebanna' gože' legaque':

—Le'e bene' gole na' note'teze bene' gualaž, le gwzenag chia' len to chop da' nia' le'e. Diosen' ben' nac la'zelagüe bene' zaca' blo'elagüe' da' χozxta' ocho Abraham cate' gwzoe' distritw Mesopotamia cate' za' šjasoe' ciuda Harán.

³ Na' Diosen' gože'ne': "Bchoj lažo' na' gwlejšyichj bene' biše' lježo' na' gwyej jasoa latje gan' gwlo'eda' le'."

⁴ Beyož gož Diosen' Abrahanna' ca', nach Abrahanna' bchoje' gan' že' bene' Caldea ca' na' jasoe' Harán. Na' bžin ža got da' xe'na' na' gwdechle Diosen' gwche'e da' Abrahanna' gan' zoacho nga.

⁵ Diosen' bi bnežjue' da' Abrahanna' yežlio gaquen che', ne late' da' ozen', san gwne' gaquen che xi'in diaža che' cate' ba gote', la'czla' nono xi'ine' na' soa cate' gož Diosen' le' ca'.

⁶ Nach Diosen' gwne' šjasenite' laž bene' zito' tap gayoa iz ga yesaque' esclavos na' yesožaglaochgüe'.

⁷ Nach Diosen' lecze gože'ne': "Neda' gwnežjua' castigw che nación gan' yesone' xi'in diaža chio' ca' esclavos na' gona' cont yesyechoje' naciónna' na' yeside' yesonxene' neda' nga."

⁸ Nach Diosen' gože' Abrahanna' gone' güen len xi'in diaža che'na'. Na' bene' mandadw soa Abrahanna' to seřw dan' že' circuncisión, le' na' len bene' byo ca' zjanaque' diaža che', cont gachia' le chesejle'e che dan' gwna Diosen'. Da'na'na' cate' golje xi'ine' Isaaquen' bzoe'be' seřw to xmanzebe', na' lecze can' ben da' Isaaquen' cate' gol je xi'ine' Jacob. Na' ca'cze ben da' Jacoben' len da' xi'ine' ca' šižinw, bene' ca' gosac šižinw diaža che bene' Israel.

⁹ Na' xi'in da' Jacoben' ben' le Josė, bene' biše' ca' gosacxi'ede' le' na' gosote'ne' gosezi' bene' nación Egipto le'. Perw Diosen' gwzoe' len Josėn'.

¹⁰ Na' goclene'ne' len yogo'lo' da' bžaglagüe'. Na' Diosen' bene' cont da' faraón ben' chnabia' Egipton' bebede' Josėn' na' goebe'ede' naque' bene' sina'. Na' da'nan' faraónna' gwleje' le' cont goque' gobernador che nación Egipton' na' bene' lo ne'e ližen' na' yežlio che'na'.

¹¹ Na' goc gwbin doxen Egipton' na' lecze can' goc gan' nzi' distritw Canaán na' da' χozxta' ocho ca' bi beseželde' da' yesagüe' na' besežaglaochgüe'.

¹² Perw na' bžin ža da' Jacoben' bende' diža' de trigw Egipton' na' gwsele' da' χozxta' ocho ca' jasexi'en da' nechw.

¹³ Na' bechop ni'a ja'aque' cate' ben Josėn' ga besyeyombia' bene' biše' ca' le', nach gwneze faraónna' can' nac diaža che Josėn'.

¹⁴ Na' Josėn' bene' mandadw šjasexi'e xagaque' Jacoben' na' yogo'lo' biše' lježe' ca', zjanaque' ca do gayonšino' bene'.

¹⁵ Can' goc gwyej Jacoben' jasoe' Egipton' na' Egiptona' gote', na' lecž na' gosat xi'ine' ca' bene' ca' gosac χozxta' ocho.

¹⁶ Na' gwdechle besyeyo'e žit benat chegaquen' na' jasecuše'ne' to lo' bloj ba da' gosone' yež gan' nzi' Siquem. Da' Abrahanna' gwxi'e ban' cani'te che xi'in da' Hamor gwduxjen' mechw.

¹⁷ Na' cate' ba zoa žin tiemp gwnežjo Diosen' legaque' yežlio can' gože' Abrahanna', ba zej chan bene' Israel ca' že' laž bene' Egipto ca'.

¹⁸ Na' ca' chac beža' rey che Egipton' na' rey coben' bi gwnežde' can' goclen Josėn' nación čhen'.

¹⁹ Na' rey nga gwdiljwlaže' bi da' mal bene' len da' χozxta' ocho bene' Israel ca' na' bene' mandadw šjasecho'on xi'ingaque'na' cont yesatbe'.

²⁰ Na' ca' tiempen' golje da' Moisésen' na' bebe Diosen' lebe', na' xaxna'be' bososča'ogüe'be' šone bio'.

²¹ Perw na' bžin ža jasecho' oňšaze' be' na' xi' in faraónna' to no' ole beželde' be' na' beyo' ebe' liže' boscha' oğüe' be' ca xi' ine'.

²² Ca' goquen' bsed da' Moisésen' tcho'a yela' sina' che bene' Egipto ca' na' bene' da' zaca' na' be'e diža' da' zaca'.

²³ Na' čhoa ize da' Moisésen' cate' gwnan šjane' e bene' Israel gualaž che' ca'.

²⁴ Na' jale' ede' to bene' Egipto chchi čsaque' to bene' Israelen'. Nach da' Moisésen' betue' bene' Egipton', boži' e da' malen' bende' bene' gualaž che' na'.

²⁵ Bene' xbab godce' yesache' e bene' gualaž che' chaclen Diosen' le' cont yosle' legaque' lo' na' bene' Egipto ca', perw bi gosache' ede'.

²⁶ Na' beteyo gosedił chopze bene' Israel. Na' bžin da' Moisésen' godce' gone' cont yesenite' binlo, na' gože' legaque': "čBixchen' chdillen lježle le' e nacle bene' gualažze'?"

²⁷ Nach ben' nap doła' na' bžigue' da' Moisésen' ca' ale gože' ne': "čNo gwna le' gaco' bene' gwnabia' cont gono' yela' justis četo' na'?"

²⁸ čLez chaclažo' goto' neda' can' beto' bene' Egipton' neje'?"

²⁹ Na' cate' bene da' Moisésen' can' gož bena' le' nach bxonje' jasoe' naciön gan' nzi' Madiän la' cžla' naque' bene' zito' len bene' ca'. Na' bšagne' e na' gwnita' čhope xi' ine'.

³⁰ Na' goc čhoa iz zoe' na', cate' to angl bene' gwseła' Dios blo' elägie' le' latje dašen' gała' ze Ya'a Sinaí, yo' o anglen' to lo' yi' beł chdoljen to lo' yag xis yeše'.

³¹ Na' cate' ble' e da' Moisésen' can' chaquen' bebande' nach gwbigue' yelate' cont ble' esägie' de' na' bende' choł güiz čancho Diosen' le', che' ene':

³² "Neda' naca' Dios ben' chonxen Abraham, ben' chonxen Isaac, na' ben' chonxen Jacob." Nach da' Moisésen' gwxize' catec bžebe', gague cheyaxjde' ne' e.

³³ Na' gož čančon' le': "Gwlečj xelo' na' cont gapo' neda' bala' an, le' latje gan' zechao' na' naquen čhia'.

³⁴ Neda' ba ble' eda' yela' yaše' yela' zi' da' chde naciön čhia' Israelen' bene' že' Egipton' na' ba benda' ca' chesonyäše'. Da' na' na' gaclena' legaque'. Beda' na' a cont seła' le' Egipton'."

³⁵ Diosen' gože' ne' ca' la' cžla' bene' Israel ca' cbi gosezi' e che', gose' e Moisésen': "čNo gwna le' gaco' bene' gwnabia' cont gono' yela' justis četo'?" Diosen' gwsele' da' Moisésen' cont gwnabi' e da' čoxxta' ocho ca' na' cont bebeje' legaque' lo' na' bene' Egipto ca', na' angl che Diosen' ben' ble' e da' Moisésen' lo' yi' beł gwzoe' goclene' ne'.

³⁶ Na' da' Moisésen' bebeje' legaque' Egipton' gan' bene' zan yela' guac na' bichle da' zaca' yebane bene', na' lecz ca' bene' cate' besežine' Nisdao' čnan' na' šlac gosonite' latje dašen' čhoa iz.

³⁷ Na' da' Moisésnan' gože' da' čoxxta' ocho ca': "čAncho Diosen' sele' yeto bene' gualaž čechon' cont güe' lene' le' e xtiže' na' can' gwsele' neda'. Che benan' gwzenagle."

³⁸ Da' Moisésen' gwzoe' len da' čoxxta' ocho ca' latje dašen', na' lo' Ya'a Sinaín' to angl bene' gwseła' Diosen' gože' le' diža' da' zjansa' yela' mban, na' bzoje' dižan' par čchio'.

³⁹ Perw na' da' čoxxta' ocho ca' zan las bi bosozenague' che da' Moisésen', bosozoe' ne' to šla' ale. Gosaclaže' šjaya' aque' Egipton'.

⁴⁰ Na' šlac zej da' Moisésen' lo' Ya'a Sinaí, gose' e bene' biše' Aarónna': "Ben da' le' echo da' šejnilaže' cho' na' da' cuialao laochi tnez. Le' ca' nac Moisésen' ben' bebej čchio' Egipton', nono neze bin' ba goc che'."

⁴¹ Nach gosone' to me' go' ň dao' de oro na' gosote' no' beyixe' gosonxene' me' daon', na' gosone' lni' che bena' gosone' len ni' a na' gague'.

⁴² Da' nan' Diosen' gwlejyichje' naciön Israelen' na' be' e latje gosejnilaže' gwbiž, bio', na' beljw. Na' da' nga nyojen len dan' bosozoj da' bene' ca' goso' e xtiža' Diosen' cani', žan: Le' e bene' Israel, gague nedan' benxenle' caten' betwle beyixe' latje dašen' lao čhoa iz.

⁴³ Benle' no da' benxenle, na' bia' le yodao' da' chacte chedobe gan' benxenle' dan' nzi' Moloc, na' bia' le beljon' benxenle' dan' nzi' Renfán.

Na' dan' ba gwlejyichje' neda', da' nan' cueja' le' e gan' zoalen' na' seła' le' e naciön zito' do gan' nzi' Babilonia.

⁴⁴ Na' šlac chesaše' latje dašen', da' čoxxta' ocho ca' gosone' to yodao' da' chacte chedobe gan' že' yej ta' a gan' nyoj ley čhegaque' na'. Na' gosonen' con can' gož Diosen' da' Moisésen' na' con can' blo' ede' le'.

⁴⁵ Nach cate' da' Josué gwče' e legaque' gan' ben Diosen' cont goseque' e yežlio che bene' zito' ca', lecze gosoe' yodao' da' chacte chedobe. Na' ne' bosochine' yodaon' bžinten tiemp che da' rey David.

⁴⁶ Na' Diosen' bebede' da' rey Davin', na' da' Davin' goclaže' gone' to yodao' che Diosen', Dios ben' lecze benxen da' Jacoben' cani' te.

⁴⁷ Perw na' da' xi' ine' Salomón benen'.

⁴⁸ Na' Diosen' ben' čnabia' doxen, bi načo zoe' lo' yo' o da' chon benačhen', san chac can' gwna Diosen' dan' bzoj to bene' be' xtiže' na' cani', žan:

49 Neda' zoa' yaba chnabia',
na' guac gona' con bi chazlaža' lo yežlion'.
Na' ¿chaquele gonle to liža'na'?

Neda' bi chyažjda' yo'o ga yezi'laža'.

50 Neda' bena' yogo'te da' zjade.

51 'Dan' bi chzenagle, dan' bi chejle'le lo' lažda'olen' nacchguale bene' güedenag can' gosac da' xozxta'ochó ca'. Bicze chzenagle che Spiritw che Diosen'.

52 Da' xozxta'ochó ca' lecze bosochi bososaque' bene' ca' goso'e xtiža' Diosen' cani', na' gosote' legaque' caten' goso'e diža' can' seła' Diosen' Xi'ine' ben' nac bene' güen juisyw. Na' cate' bide', le'e bdelne' lo na' bene' ca' gosote'ne' na' le'e naple doła' dan' gosote'nen'.

53 La'czla' nombia'le ley dan' bosonežyw angl ca' da' Moisésen', bi chzenagle chen.

Gosote' Estebanna'

54 Na' cate' Esteban' gože' legaque' ca', beselocchgüe' gosagwxetje laye'.

55 Perw na' Esteban' gwzoachgua Spiritw che Diosen' len le', bcos lagüen' gwne'e yabale na' ble'ede' chac to be'ni' gual gan' zoa Diosen' na' ble'ede' zecha Jesús'en' cuít Diosen' chnabi'e txeñ len le'.

56 Nach Estebanna' gwne':

—Le na'šc nla'xeje yaban' na' nla' Jesús'en' ben' golje' beñach zeche' cuít Diosen' chnabi'e txeñ len le'.

57 Nach bene' ca' zjanžaguen' leca beseloque' na' bososya'adie' na' bososeyiw naggaque'na' na' to ši'ize ja'acsese' gan' ze Estebanna'.

58 Nach gosebeje' Estebanna' cho'a yež na' bosozie'ne' yej. Na' bene' ca' bosozie' le' yejen' bosonežjue' xagaque' da' zjandobe' to bene' xcuide' bene' le Saulo cont gapen'.

59 Na' šlac chosože' Estebanna' yej, Esteban' boł güiže' Diosen', gwne':

—Xana' Jesús, bezi' neda' yaban'.

60 Nach bzoa xibe' lo yon' na' gwne' zižje, gwne':

—Xana' bi gono' cuent xtola' bene' quinga dan' chesote' neda'.

Na' beyož gwne' ca', gote'.

8

Saulo bchi bsaque' bene' chesonxen Jesucriston'

1-2 Na' ca nac Saulon', gwyazlaže' dan' gosote' da' Estebanna'.

Na' bene' ca' chesejniłaže' Jesucriston' ciuda Jerusalenna' jasecuaše' da' Estebanna', na' gosebežhgüe' che'. Na' gwde gosote' da' Estebanna' gosozlagüe' bosochi bososaque' bene' ca' chesedop chesežag chesonxene' Jesucriston' Jerusalenna', na' yogo' bene' ca' chesonxen Jesucriston' besyeyasłase', ja'aque' yež ca' zjachi' do distritw Judean', do distritw Samaria, perw gague len postlw ca'.

3 Na' Saulon' gwzologüe' cheje' liž to to bene' ca' chesonxen Jesucriston' chjaxobe' no bene' byo na' no no'ole cont chče'e legaque' ližya.

Bene' ciuda Samaria gosende' diža' güen che Jesucriston'

4 Na' bene' ca' chesonxen Jesucriston' ben' besyeyasłase' ja'aque' doxen, jasedixjue'ede' xtiža' Jesucriston'.

5 Na' ben' le Felipe bžine' ciuda Samaritan' na' be'e diža' che Jesucriston'.

6 Na' cate' gosende' xtižen' na' besele'ede' yela' guac dan' bene' len legaque', bene' zan besedobe' bosozenague' che'.

7 Bebeje' da' xigüe' ca' zjajo'o zjanyaz yichjlaždao' bene' zan, na' cate' besyechojen chososya'adian. Na' zan bene' natzi' late' güeje cuerp chegaque'na' beyone' legaque', lecze beyone' no bene' nxinj ni'e.

8 Na' besyebchgüe bene' ca' že' ciudan'.

9 Na' lo ciudan' zoa to bene' guaža' bene' le Simón. Da' zan da' bene' da' besyebane bene' Samaritan' gwziye'e legaque' gože'ne' naque' bene' zaque'.

10 Na' šlac bene' da' ca', yogo' bene' lo ciudan' bosozenague' che' tcho'a, no bene' gole ca' lente no bi' xcuide' ca', gosene' che':

—Le bengan' nse'e yela' guac xen che Diosen'.

11 Zan iz bosozenague' che', le gwziye'e legaque' len yela' guaža' che'na'.

12 Perw cate' Felipen' gwduxjue'ede' diža' güen che Jesucriston' len legaque' na' bzejni'ide' legaque' che yela' chnabia' che Diosen', zane' gosejle'e che' na' gosezoe' nis, bene' byo na' no'ole.

13 Na' lencze Simón gwwejl'e che' na' gwzoe' nis na' gwzolaogüe' gwдалene' Felipen', na' bebände' ca nac yela' guac ca' dan' chon Felipen' na' yezica'chle da' zaca' yebanecho.

14 Na' postlw ca' nite' ciuda Jerusalénna' gosende' bene' ca' že' ciuda Samaria ba chosozenague' xtiža' Diosen', nach gosesele' Pedroa' len Juanna' Samarian'.

15-16 Na' cate' besežine'na' bosol' güiže' Diosen' gosenabde'ne' soa Spiritw čhen' lo' yichjlaždao' bene' Samaria ca', le ca hora' biña' soan lo' lažda'ogaque' la'czla' ba gosezoe' nisen' dan' chesejnilaže' Xancho Jesúsen'.

17 Nach gosežoa na' postlw ca' yichjogue' cont gwzoa Spiriton' lo' yichjlažda'ogaquen'.

18 Na' ble'e Simón can' cheson postlw ca' chesežoa ne'e yichj bene' cont chzoa Spiriton' len legaque', na' bšabde' legaque' mechw.

19 Gože' legaque':

—Le gon cont neda' gac žoa na'a yichj note'teže bene' na' soa Spiriton' len legaque' can' chon le'e.

20 Nach Pedroa' gože'ne':

—Cuiayo' len xmechon' dan' chono' xbab guac si'o len mechw da' chon Diosen'.

21 Bi zaco' gono' da' nga chonto', le yichjlažda'oguo' naquen mal lao Diosen'.

22 Da' cheyala' gono', betinje da' malen' chono' na' gwñab goclen lao Diosen' cont yezi'xene' chio' ca' nac xbabn' yo'o lo' yichjlažda'oguo'.

23 Nachbia' da' mal dan' yo'o lo' yichjlažda'oguo' chnabi'an le' na' ngo'on le' nez malen'.

24 Nach Simónna' boži'e xtižen' gože' le':

—Le ñab goclen lao Xancho' cont ne to da' mal dan' bač gwnao' nga bi gac chia'.

25 Na' Pedroa' len Juanna' cate' beyož goseyixjue'ede' xtiža' Diosen' lo' ciuda Samarian' na' beyož goso'e diža' can' ba goclen Xancho Jesucriston' legaque', nach jaya'aque' Jerusalénna'. Na' šlac zjaya'aque'na' goseyixjue'ede' xtiža' Xancho Jesucriston' len bene' ca' že' yezičhle yež ca' gan' mbane distritw Samaria.

Felipe na' bene' Etiopía

26 Nach Xancho Diosen' gwsele' to angl bene' gože' Felipe:

—Gwey gan' xoa nez dan' chetj Jerusalénna' na' chden latje dašen' chžinen yež dan' nzi' Gaza.

27 Nach Felipe gwlo'e nezen', na' šlac zeje' ble'ede' to bene' nación Etiopía zeyo'e to lo' carret zeže'e gwyeje' Jerusalénna' jexene' Diosen'. Le' naque' to bene' blao na' ba none' le' capar cont gone' xšin no'ole gwnabia' che bene' Etiopía ca', šo'o lo' ne'e mechw che'. Na' no'ole gwnabian' le' Candace.

28 Na' ben' yo'o lo' carreten' chlabe' libr dan' bzoj da' Isaíasen' ben' be' xtiža' Diosen' cani'.

29 Nach Spiritw che Diosen' gožen Felipen':

—Jayxen carreten' na' gwyejlene' txen.

30 Nach gwza'ses Felipen' cont jayxene' carreten' na' cate' bžine' gała'ze bende' chlab ben' libr dan' bzoj da' Isaíasen'. Nach gože'ne':

—¿Chejni'ido' dan' chlabo'na'?

31 Na' bene' Etiopían' boži'e xtižen' gože' Felipen':

—¿Nacxe gac šejni'ida' da' ngan', le gague no nla' no gwzejni'ide' nedan'?

Nach gota'yoede' Felipen' cont gwyo'e lo' carreten' gwche'lene'ne'.

32 Na' gan' chlabe'na' nyojen žan:

Ca to xila' be nxob bene' cont gote'ba',
na' ca to xila' dao' be bi chosya'a cate' chšibe'ba',
can' bene', bibi gwne' caten' gosezi' gosebague'ne'.

33 Na' gosone' le' ca to bene' bibi zaca'.

Na' bi gosone' yela' justis che' ca cheyala' gaquen.

Na' nono diaža che' nita', le goseque'e yela' mban che' lo' yežlio nga.

34 Nach bene' Etiopían' gože' Felipen':

—Benšca goclen gwna neda' no čhen' ža ben' bzoj Xtiža' Diosen' ca', ¿che cuinen' že' ca' o še che bene' yoble?

35 Nach Felipen' gwzologüe' bzejni'ide' bi zejen dan' chlab bene' Etiopían', gože' le' diža' güen che Jesúsen'.

36 Na' ca' chac, besežine' ga žia nis, nach bena' gože' Felipen':

—Nga žia nis, ¿cbi gac soa' nisen' na'a?

37 Nach Felipen' gože'ne':

—Še chejnlažo' Jesucriston' do yichj do lažo', guac so' nisen'.

Nach gwne':

—Chejl'a Jesucriston' naque' xi'in Diosen'.

38 Nach bene' mandaw bcueze' carreten' na' betj Felipen' len bene' Etiopían' jasežo'e lo' nisen' cont Felipen' bzo'e'ne' nis.

³⁹ Na' cate' besyechoje' lo' nisen', Spiritw che Diosen' la' beche'eten Felipen' ga yoble, na' bich ble'e bene' Etiopian' le'. Na' mbalaz beza' ben' beyo'e lo' carreten'.

⁴⁰ Nach Felipen' bžine' yež dan' nzi' Azoto na' gwzolakü'e gwđixjue'ede' diža' güen che Jesucriston' to to yež da' zjachi' gała'ze ga gwđie' bžinte' Cesarean'.

9

Diosen' bocobe' yichjlaždao' Saulon'

(Hch. 22:6-16; 26:12-18)

¹ Na' Saulon' con chdacze' cho'e diža' can' chaclaže' gote' bene' chesejnilaže' Xancho Jesucriston' na' chdacze' cheyljwlaže' nacle gone' gote' legaque'. Na' da'nan' Saulon' gwyje' lao bžox blao che bene' Israelen',

² na' gwnabde'ne' gwzoje' to yiš da' goxe' yosolab bene' že' to to yodao' nita' ciuda Damasco cont yesenezde' nape' yela' gwnabia' sene' bene' ca' ba chesejnilaže' Jesucriston' na' gwcheje' legaque' cont che'e legaque' ciuda Jerusalénna' la'czla' bene' byo o la' no'ole.

³ Cate' beyož bnežjue'ne' yišen' gwlo'e nez, na' ba zoa žine' ciuda Damascon' cate' zejzenez to be'ni' da' za' yaban' gwyechjen le'.

⁴ Na' gwbiže' lo yon'. Na' bende' che' to bene' le':

—Saulo, žbixchen' chchi chsaco' neda'?

⁵ Na' Saulon' boži'e xtižen' gože' le':

—žNo le' bene'?

Nach bena' gože'ne':

—Nedan' Jesús ben' chchi chsaco'. Na' dan' chgue'edo' neda', chone zi' cuino' can' chac che to go'ņ be chlibe lo ya dan' zoa lo carroš cheba'.

⁶ Na' do chaž chžebze' gože' le':

—Xana' Jesús, žbin' chaclažo' gona'?

Nach Xancho' gože'ne':

—Beyas na' gwyje' ciuda Damascon' na' zoa to bene' ye'e le' da' cheyała' gono'.

⁷ Na' bene' ca' zja'aclen Saulon' benit bečoļ gosac lo' yichjlažda'ogaque'na' catec besežebe' dan' goquen', le gosende' ši'i bene' perw nono besele'ede'.

⁸ Nach beyas Saulon', perw cate' bexa' lagüen' con bich ble'ede'. Nach bene' ca' nžague'na' gosoxe' ne'e goseche'ene' Damascon'.

⁹ Na' šone' za gwzoe' sin cbi ble'ede' na' bi güe'ej gwđagüe'.

¹⁰ Na' zoa to bene' chejnilaže' Xancho Jesucriston' Damascon' bene' le Ananías, na' Ananíasen' ble'edagüede' Xancho'. Na' Xancho' gože'ne':

—Ananías.

Na' boži'e xtižen' gwne':

—Nga zoa', Xana'.

¹¹ Nach Xancho' gože'ne':

—Gwzoža' na' gwyje' liž Judas dan' zoa cay dan' chesene' Nez Licha, na' nabo' to bene' le Saulo, to bene' ciuda Tarso. Ba choļ güiže' neda'.

¹² Na' ba bena' cont ble'edagüede' le' gwyo'o gan' zoe'na' na' gwxoā nao' yejlagüe'na' cont ye'le'ede'.

¹³ Nach Anaiásen' boži'e xtižen' gože' le':

—Xana', ba benda' bene' zan cheso'e xtiža' bena', ca nac da' mal juisyw ba bene' Jerusalén len bene' ca' ba gwlejo' cont zjanaque' lo nao'.

¹⁴ Na' chesene' ze'e nga noxe' yiš che bžox gwnabia' ca' cont sene' yogo'loļ neto' chejni-laže'to' le'.

¹⁵ Nach Xancho Jesucriston' gože' Ananíasen':

—Gwyje, le ba gwleja' Saulon' cont šjazejni'ide' xtiža' len bene' chi zjanac bene' Israel na' len rey chegaque' ca', na' lente le'e nacle bene' Israel.

¹⁶ Na' gwlo'eda'ne' ca nac da' yaše' da' zi' da' gac che' dan' gwzenague' chia'.

¹⁷ Nach Ananíasen' gwyje' gan' zoa Saulon' na' gwyo'e lo' yo'ona' na' gwxoā ne'e yejlaō Saulon', gože'ne':

—Bene' migw Saulo, Xancho Jesúsben' ben' blo'elagüe' le' tnez gan' za'ona' ba gwseļe' neda' zedena'a le' cont ye'le'edo' na' soa Spiritw che Diosen' len le'.

¹⁸ Nach la' besyeyinjte da' ca' že' lo yejlagüen', zjanaquen ca yid bdi'ej, na' la' bele'etede'. Nach gwzože'e cont gwyje' gan' gwzoe' nisen'.

¹⁹ Ca beyoža' gwđagüe' na' beyaclaže'. Na' bega'ane' Damascon' yeto chop ža len bene' ca' chesejnilaže' Xancho'.

Saulon' be'e xtiža' Diosen' Damascon'

²⁰ Na' la' gwzolaote gwyeye' to to yodao' be'e diža' che Jesús'en', gwne' len' naque' Xi'in Diosen'.

²¹ Na' yogo' bene' ca' chesende' xtiže' dan' cho'ena' besyebande' na' chese' lježe':
—¿Gague bengan' chda chonit cholane' bene' ca' chesejnilaže' Jesús'en' ciuda Jerusalénna'?
na' ¿gague da' na'czen' bide' nga na'a cont gwcheje' bene' ca' na' šjasane' legaque' lao bꝑoz gwnabia' ca'?

²² Na' Saulon' tža tža Diosen' goclene'ne' cont be'e diža' che Jesús'en' tcho'a, gwne' Jesús'en' naque' ben' gwseła' Diosen' cont nabi'e. Na' bene' Israel ca' že' Damascon' bi beseželde' bin' yesene', le gosacbe'ede' dan' che'e legaque' naquen da' li.

Saulon' bi goque' lo na' bene' ca' chesegue'ede' le'

²³ Na' cate' ba goc šša choe'len Saulon' bene' Damasco ca' xtiža' Jesucriston' nach bosoxi'a bene' Israel ca' yesote'ne'.

²⁴ Na' gosenite' chesape' to to cho'a puert che ze'ena' dan' nychj ciudan' cont yesezene' Saulon' yesote'ne' bate'teze choje', perw na' Saulon' gocbe'ede' ba zjachi'na'ogüe'ne'.

²⁵ Na' bene' ca' chesejnilaže' Jesucriston' besyeltje'ne' le'e ze'e dan' nychj ciudan' šeže'le besyegüe'ene' to lo' žome cont goc bechoje' lo ciudan'.

Gwyej Saulon' Jerusalénna'

²⁶ Nach beze'e beyeje' Jerusalén. Na' cate' bežin Saulon' ciuda Jerusalénna' goclaže' gone' txen bene' ca' chesejnilaže' Jesucriston', perw yogo'lol'e besežebe' le', bi gosejle'e še da' li ba chejnilaže' Jesucriston'.

²⁷ Nach Bernabé gwche'e Saulon' ja'aque' gan' že' postlw ca' na' be'lene' legaque' diža' can' goc ble'e Saulon' Xancho Jesús'en' šlac ngüe'e nez zeje' Damascon' na' can' goc Xancho' be'lene' Saulon' diža'. Na' leče gož Bernabén' legaque' Saulon' ba be'e xtiža' Jesús'en' Damascon' sin cbi bžebe'.

²⁸ Nach postlw ca' gosejle'e can' goc che Saulon', na' gwzolaogwdalen Saulon' bene' ca' chesejnilaže' Jesucriston' Jerusalénna'.

²⁹ Na' sin cbi bi chaž chžebe' gwzolağüe' chzejni'ide' bene' Israel ca' diža' che Xancho Jesús'en', con bene' chesac diža' griego. Bene' byen bzejni'ide' legaque' xtiža' Diosen', perw na' legaque' gosaclaže' yesote'ne'.

³⁰ Na' cate' bene' ca' chesejnilaže' Jesucriston' Jerusalénna' gosacbe'ede' ba zjachi'na'ogüe' yesote'ne', nach goseche'ene' ja'aque' ciuda Cesarea na' besyesele'ne' ciuda Tarso.

³¹ Na' bene' ca' chesedop chesežague' chesonxene' Jesucriston' doxen distritw Judean', distritw Galilean' na' distritw Samarian' gosenite' binlo, noch no bosochi bososaca' legaque', na' gosenita'chache' gosejnilaže' Xancho Jesús'en' na' bosozenague' che' do yichj do laže'gaque'. Na' Spiritw che Diosen' benen cont gosacchach laže'gaque' na' benen cont gwyane'.

Byac ben' le Eneas

³² Ca nac Pedroa' cheje' to to yež gan' že' bene' ca' ba gwlej Diosen' cont zjanaque' lo ne'e chjane'e legaque'. Na' to ža gwyeye' jane'e bene' ca' že' yež dan' nzi' Lida.

³³ Na' yež Lidan' jati'e to bene' le' Eneas. Ba chac xono' iz de' che'ede', natzi' late' cuerp che'na'.

³⁴ Nach gož Pedroa' le':

—Eneas, Jesucriston' cheyone' le'. Gwyas na' btob xcamo'na'.

Nach la' gwyaste bena'.

³⁵ Na' yogo'lol'bene' že' Lidan' na' bene' že' yež dan' nzi' Sarón besele'ede' bena' ba beyacde' na' gobejyichje' costumbr chegaque' cont gosejnilaže' Xancho Jesucriston'.

Dorcac bebane' ladjo bene' guat ca'

³⁶ Na' ca tiemp na', to ciuda dan' nzi' Jope zoa to no'ole le' Tabita, na' diža' griego le' Dorcac. Na' chejnilaže' Jesucriston' na' zoe' chone' da' güen na' chaclene' no bene' yaše' bene' chyažj chchine'.

³⁷ Perw na' gocšene Dorcasen' na' gottechgüe', na' bosoguzaje'ne' na' gosexo'e'ne' to lo' cuart da' zoa yichj yo'o cha'te.

³⁸ Na' gala'ze chega'an yež Lidan' len Jopen', na' bene' ca' chesonxen Jesucriston' Jopen' gosenezde' Pedroa' zoe' Lidan'. Nach gosesele' chope bene' jasata'yoede' Pedroa' gose'ene':
—Benšca goclen yo'o len neto' netec na'a.

³⁹ Na' Pedroa' la' gwza'te' gwyeye' len bene' ca'. Na' cate' besežine' Jopen', goseche'ene' lo' yo'o gan' xoa bene' guaten', na' la' gosebiga'te yogo' no'ol güezebe lagüe'na' chesebeže' chosolo'ede' le' lache' dan' ben da' Dorcasen' šlac gwbane', no vestidw na' no camis.

⁴⁰ Nach Pedroa' bešaše' yogo'lol'bene' ca' chy'ole na' bzoa xibe' boł güiže' Diosen'. Na' beyechje' chne'e cuerp che no'olen', na' gože'ne':

—Tabita, gwyas.

Nach la' bexa'te yejlao da' Dorcasen' gwne'e Pedroa' na' la' bebe'te'.

⁴¹Nach Pedroa' bexue' ne'ena' bsože'e le', nach goxe' no'ole güezeb ca' na' yezica'chle bene' ca' zjanaque' lo na' Diosen' na' blo'ede' legaque' ba beban Dorcasen'.

⁴²Na' yogo'lol bene' Jopen' gosende' can' goquen', na' bene' zanch gosejnilaže' Xancho Jesucriston'.

⁴³Na' Pedroa' bega'ane' Jopen' zan ža, gwzoe' liž to bene' le Simón, bene' chonšagüe' yid.

10

Pedroa' na' Cornelio

¹Na' ciuda Cesareana' zoa to bene' le Cornelio, naque' xan to gayoa soldadw, na' bosozoa la soldadw che' ca' Bene' Italia.

²La'czla' Cornelion' cbi naque' bene' Israel, benxene' Diosen', na' lecze ca' goson bene' lo' yo'o che', chesezoe' chesape' Diosen' bala'an. Na' Cornelion' chaclenteze' bene' Israel bene' chyažj chchine', na' zoateze' choł güiže' Diosen'.

³Na' goc che', to ža do cheda šone ble'edagüede' to angl bene' gwseła' Diosen' gwyo'e gan' zoe'na', na' anglen' gože'ne':

—Cornelio.

⁴Nach Cornelion' chna'chgüe' lao anglen' na' do chžebe' gože'ne':

—¿Bixen' Xana'?

Nach gož anglen' le':

—Diosen' nezde' can' zo' choł güižo'ne' na' chnežjo' dan' cheseyažje bene' yaše', na' Diosen' chaclaže' gaclene' le'.

⁵Da' nga gono' na'a, gwseła' bene' šjasexi'e to bene' zoa ciuda Jopen' bene' le Simón na' lecze le' Pedro.

⁶Zoe' liž to bene' chonšagüe' yid. Bena' lecze le' Simón, na' liž ben' zoan cho'a nisdao'. Na' Simón Pedroa' ye'e le' bin' cheyała' gono'.

⁷Cate' beza' anglen' Cornelion' goxe' chope mos che' na' to soldadw bene' chaclen le', na' soldadoa' lecze chonxene' Diosen'.

⁸Na' Cornelion' bzejni'ide' legaque' yogo'lolte can' goquen' nach gwsele' legaque' Jopen'. Na' gosegüe'e nez zja'aque'.

⁹Na' beteyo gała'ze ba zja'aque' za' yesežine' ciuda Jopen' cate' Pedroa' gwloe' yichjo'o che' yo'o gan' zoe'na' ca do guagwbiz cont jel güiže' Diosen'.

¹⁰⁻¹¹Na' šlac choe'lene' Diosen' diža' gwdonchgüe', con goclaže' gagüe' cate. Na' šlac chac dan' gagüe'na', ble'edagüede' le'e yaban' chetj to lache' xen na' nchey tap squinen na' chetjen gan' zoe'na'.

¹²Na' lo'emna' zjaže' yogo' cuen beyixe' že' yežlion', be žia tap ni'a na', na' be chososa' le'eban' lo yo, na' len be žia xil be chaš le'e yaba.

¹³Nach bende' gož Diosen' le':

—Gwyas Pedro na' betw be ca' gwdagw.

¹⁴Nach Pedroa' gože'ne':

—Bi gagua' legacba' Xana'. Ne tni'a bina' gagua' be zban zjanac ca', le cbi de lsens len ley cheto'na' gagwto' ben' zjanac ca'.

¹⁵Nach Diosen' gože' le' da' gwchope:

—Ben' bach gwnia' gago' bi nao' be zban zjanacba'.

¹⁶Da' gwyon' ni'a gož Diosen' le' ca' nach la' begüete lachen' le'e yaban'.

¹⁷Šlac chacžejaže' Pedroa' bi zejen dan' ble'edagüeden', besežin bene' ca' gwseła' Cornelion' cho'a puert liž Simón ben' chonšagüe' yiden', le ba gosenabe' gan' zoa liže'na'.

¹⁸Nach zižje gosenabe' še le na' zoa to bene' lecze le Simón Pedro.

¹⁹Na' Pedroa' ne' chone' xbab che dan' ble'edagüede', cate' gož Spiritw che Diosen' le':

—Simón, šone bene' cheseyiljue' le'.

²⁰Gwzoža' na' beyetj cont šejleno' legaque', na' bi gacžejažo' la'czla' bi zjanaque' bene' Israel, le neda' gwseła' legaque'.

²¹Nach Pedroa' beyetje' jašague' bene' ca' gwseła' Cornelion', nach gože' legaque':

—Nga zoa', nedan' Simón Pedro. ¿Bichen' cheyiljwle neda'?

²²Nach gose' bene' ca' le':

—To xan soldadw bene' le Cornelio gwsele' neto'. Le' zejczje chone' da' güen na' chonxene' Diosen' na' yogo'lol bene' Israel ca' cheso'e xtiže' ca bene' šagüe' naque'. To angl che Diosen' gože' le' yedenabe' šejo' liže'na' cont gwzenague' chio' še bin' yo'one'.

²³ Nach gwlo'o Pedroa' legaque' yo'o na' besyega'anlene' le' tže'. Nach beteyo Pedroa' gwyase' gwejlene' legaque' na' gwche'e to chope bene' Jopen' bene' chesejnilaže' Jesucriston'.

²⁴ Na' beteyo cate' besežine' ciuda Cesarean', Cornelion' bač nto'be' biše' lježe' len xmigüe' ba zjaže' liže'na' chesebeze' le'.

²⁵ Na' cate' bžin Pedroa' liž Cornelion' la' bchojte Cornelion' bšague'ne' na' bzoa xibe' lagüe'na' benxene'ne'.

²⁶ Na' Pedroa' bsože'e le', gože'ne':

—Bezoža'. Lecze benač neda'.

²⁷ Na' ne' choe'lente' le' dižan' ca' cate' gwyo'o Pedroa' lo' yo'on na' ble'ede' bene' zan ba že' lo' yo'ona'.

²⁸ Nach gože' legaque':

—Nezeczele ley che neto' bene' Israel žan bi cheyala' šo'to' liž bene' bi zjanaque' bene' Israel, na' žan bi cheyala' gonto' txen len le'e bi nacle bene' Israel. Perw bač bzejni' i Diosen' neda' ne to bene' cbi cheyala' gona' xbab che' naque' bene' zban par šo'a liže'na'.

²⁹ Da'nan' cate' bene' quinga bedesexi'e neda', bi gocžejlaža' še nacle gona', san ba bida' do yichj do laža', na' na'a chaclaža' nezda' žbixčen' gwñio' neda'?

³⁰ Nach Cornelion' gože'ne':

—Na'a chac tap ža do cheda šone zoa' sin cbibi nagua', na' choł güiža' Diosen' liža' nga, cate'cze ble'eda' to bene' byo lagua'na' nyaze' to lache' da' chgo'oten be'ni'.

³¹ Nach gože' neda': “Cornelio, ca nac da' gwnabdo' Diosen', bač bzenague' čen, na' nezde' chnežjo' da' chyažj da' chčhine' bene' yaše'.

³² Na' na'a gwsela' to chope bene' šjasexi'e to bene' zoa ciuda Jopen' bene' le Simón Pedro. Zoe' liž to bene' lecze le Simón, to bene' chonšagüe' yid. Liž ben' chonšagüe' yiden' zoan gala'ze cho'a nisdao'. Na' cate' la' Pedroa' ližo' nga nach gü'lene' le' diža'.”

³³ Nach la' gwsela'tia' bene' ca' bedesexi'e le', na' chočlenteco' bač bido'. Na' nezczce Diosen' yogo'to' nita'to' nga gwzenagto' yogo'lołte dan' ba ben Diosen' mandadw ŋao'.

Pedroa' be'e diža' liž Cornelion'

³⁴ Nach Pedroa' gwzologüe' be'e dižan' gwne':

—Da' li bač nezda' nono nla' bene' nacho nzoa Diosen' le' to šla'aze.

³⁵ Gate'teze bene' nación con bene' chesonxen Diosen' do yichj do laže' na' chesone' da' güen, Diosen' chbede' legaque'.

³⁶ Diosen' gwdixjue'ede' neto' bene' Israel guac soato' binlo len le' še šejnilaže'to' Xi'ine' Jesucriston' bene' naque' Xan yogo'loł bene'.

³⁷ Nezele dan' ba goc doxen distritw Judean' dan' gwzolao distritw Galilean' gwde gwdixjue'e da' Juanna' xtiža' Diosen' na' bzoe' bene' nis.

³⁸ Nezele Diosen' gwleje' Jesúsen' ben' naque' bene' yež Nazaret cont chaclene' chio' benač, na' be'ene' Spiritw che'na' na' yela' chnabia'. Na' gwda Jesúsen' bene' da' güen na' beyone' yogo'loł bene' ca' chsaca'zi' Satanás dan' chnabia' da' xigüe' ca', le Diosen' zoe' len le'.

³⁹ Neto' nezeto' na' choe'to' diža' che yogo' da' güen da' ben Jesúsen' na' dan' bsd blo'ede' distritw Judean' na' ciuda Jerusalénna'. Na' choe'to' diža' can' gosote'ne' bosode'ene' to le'e yag cruz.

⁴⁰ Perw na' Diosen' bechis bosbane'ne' ladjo bene' guat ca' beyon ža na' ben Diosen' cont Jesúsen' blo'elagüe' neto'.

⁴¹ Gague yogo'loł bene' besele'ede' Jesúsen' caten' bebane' ladjo bene' guat ca', perw Diosen' gwleje' neto' cont choe'to' xtiže'na' na' bene' cont ble'eto'ne'. Na' neto' gü'e'ej gwdagwlento'ne' txen gwde bebane' ladjo bene' guat ca'.

⁴² Jesúsen' bene' mandadw chixjue'eto' benačhen' Diosen' bzoe' le' gone' yela' justisen' len yogo' bene' zjamban na' len yogo' bene' ba gosat.

⁴³ Na' da' ca' bosozoj yogo' bene' goso'e xtiža' Diosen' cani'te zjanyojen chesenan note'tez bene' yesejnilaže' Jesucriston', Diosen' yezi'xene' xtoła'gaque'na'.

Spiritw che Diosen' gwyo'on lo' yichjlaždao' bal bene' bi zjanaque' bene' Israel

⁴⁴ Ne' cho'ete Pedroa' diža'na' cate' Spiritw che Diosen' gwyo'on lo' yichjlaždao' yogo' bene' ca' chosozenag diža' dan' cho'ena'.

⁴⁵ Na' bene' Israel ben' chesejnilaže' Jesucriston', bene' ca' zja'ac len Pedroa' liž Cornelion', besyebande' dan' gwyo'o Spiritw che Diosen' lo' yichjlaždao' bene' ca' cbi zjanaque' bene' Israel.

⁴⁶ Gosache'ede' gwyo'o Spiritw che Diosen' lo' yichjlaždao' bene' ca' že' liž Cornelion', le gosende' gosonxen bene' ca' Diosen' goso'e diža' da' bi gosejni'ide' na' lecze gosonxene' Diosen' len xtiža'gaque'na'.

⁴⁷ Nach Pedroa' gože' bene' Israel ca' nžaguen':
—Bibi de da' gwžon yesezoa bene' quinga nisen', le nacbia' ba zoa Spiritw che Diosen' len legaque' can' zoan len chio'.

⁴⁸ Nach Pedroa' bene' mandadw gosezoe' nis da' chesejnilaže' Jesucriston'. Na' gosata'yoede' le' cont bega'ane' yeto chop ža.

11

Pedroa' gože' bene' Jerusalén ca' can' goquen'

¹ Na' postlw ca' na' yezica'chle bene' ca' že' distritw Judean' ben' chesejnilaže' Jesucriston' gosende' xtiža' bene' ca' bi zjanaque' bene' Israel lecze ba chosozenague' xtiža' Diosen'.

² Nach Pedroa' beze'e gweyjeche' ciuda Jerusalénna' gan' nita' bene' Israel ben' chesejnilaže' Jesucriston' na' legaque' gosenelagüe' che',

³ gose'ene':

—¿Bixchen' ba gweyje' gan' že' bene' cbi zjanaque' bene' Israel na' jatagwleno' legaque' Malen' ba beno'.

⁴ Nach Pedroa' gwzologüe' be'lene' legaque' diža' tcho'a yogo' dan' goc che', gože' legaque':

⁵ —Šlac zoa' ciuda Jopen' chol güiža' Diosen', ble'edagüeda' ca to lache' xen nchej dapte squin ca' chetjen le'e yaban' zan' gan' zoa' na'.

⁶ Na' gwna'yaña' na' ble'eda' lo'enña' že' beyixe' ca' chaš yežlion' be žia tap ni'a na', na' ble'eda' be chososa' le'eban' lo yo, na' be žia xil be chaš le'e yaba, na' bał be ca' zjanacba' be znia.

⁷ Na' benda' gož Diosen' neda': "Gwyas Pedro, na' betw be ca' gwdagw."

⁸ Nach boži'an gwnia': "Xana', bi gagua' legacba'. Ne tñi'aze biña' gagua' be zban zjanac ca', le bi de šsens len ley cheto' na' gagwto' ben' zjanac ca'."

⁹ Na' da' gwchop ni'a Diosen' gwne': "Be bach gwnia' gago' bi nao' zjanacba' be zban."

¹⁰ Šon ni'a gože' neda' ca' nach begüe lachen' le'e yaban'.

¹¹ Za' beyož ble'edagüeda' da'na' cate' besela'ac šone bene' byo gan' zoa'na' bene' za'ac ciuda Cesarean' chesyeyiljue'nda'.

¹² Na' Spiritw che Diosen' bzejni'in neda' cheyala' ša'alena' legaque' sin cbi gacžejlaža', na' gwch'i'a bene' lježcho quinga xop, gweyje'to' Cesarean' bžinto' liž ben' le Cornelio na' gwyo'oto' ližen'.

¹³ Nach Cornelion' be'lene' neto' diža' can' blo'elao to angl le' liže'na' na' anglen' gože'ne': "Gwseła' bene' šja'ac ciuda Jopen' šjasexi'e to bene' le Simón Pedro.

¹⁴ Bena' ye'e le' len bene' lo' yo'o chio' nac gonle cont gata' yela' mban chele toli tocanē."

¹⁵ Nach cate' gwzologua' bia' dižan' len bene' ca' že' liž Cornelion', Spiritw che Diosen' gwyo'on lo' yichjlažda'ogaque'na' can' gwyo'on lo' lažda'ochon' cana'.

¹⁶ Nach jaysa'laža' xtiža' Xancho Jesucriston' can' gwne': "Da' zaque' ben Juan da' bzoe' bene' nis, perw da' zaca'che' gac chele cate' yedesoa Spiritw che Diosen' lo' yichjlažda'olen' nabi'an le'e."

¹⁷ Na' ba ben Diosen' cont zoa Spiritw che'na' lo' yichjlažda'ogaquen' dan' gosejnilaže' Xancho Jesucriston' can' ba bene' len chio' chejnilaže'chone', na' žnox naca' neda' gwžona' gon Diosen' dan' chaclaže' gone'?

¹⁸ Na' ca beyož bosozenague' xtiža' Pedroa' bich bi gosenē' che Pedroa' dan' gweyje' liž Cornelion', san gosoe' yela' choxclen che Diosen', gosene':

—Na'a ba nezecho lecze len bene' ca' bi zjanaque' bene' Israel chazlaže' Diosen' yesyetinjde' xtoła'gaque'na' cont gwnežjue' yela' mban chegaque' toli tocan.

Bene' ca' chesonxen Jesucriston' ciuda Antioquía gan' mbane Siria

¹⁹ Na' gwde gosot bene' Israel ca' Estebanna', gosezologüe' bosochi bososaca'chgüe' yezica'chle bene' ca' chesejnilaže' Jesucriston', nach bene' ca' chesejnilaže'ne' gosasłase'. Bałe' ja'aque' do distritw Fenicia, na' yež ca' zjachi' to lo yežlio da' žia lo' nisdawn' gan' nzi' Chipre na' do ciuda Antioquía ga mbane distritw Siria. Na' gan' zja'auen' bososed bosolo'ede' con bene' zjanac bene' Israel xtiža' Jesúsen', bi bososed bosolo'eden' bene' cbi zjanaque' bene' Israel.

²⁰ Perw na' to chope bene' Chipre na' bene' ciuda Cirene lecze bosoxonje' ja'aque' ciuda Antioquían', na' gosezologüe' goseyixjue'ede' diža' güen che Xancho Jesucriston' len bene' ca' cbi zjanaque' bene' Israel.

²¹ Na' Xanchon' goclene' legaque' len yela' guac che'na' na' bene' zan gosebejyichje' da' ca' chesejnilaže' na' gosejnilaže' Xanchon'.

²² Na' cate' bene' ca' chesejnilaže' Jesucriston' ciuda Jerusalénna' gosende' can' ba chac ciuda Antioquían', nach bosose'e Bernabén' cont gweyje' Antioquían'.

²³ Na' cate' bžin Bernabén' Antioquían', ble'ede' da' li ba goclenchgua Diosen' bene' ca', na' bebehgüede'. Nach gwnyoeede' legaque' nita'chache' yosozenague' che Xanchon' do yichj do laže'.

²⁴ Bernabén' naque' to bene' güen, na' chejnilaže'chgüe' Jesucriston' na' Spiritw che Diosen' zoachguan len le'. Na' zanch bene' Antioquían' gosejnilaže' Jesucriston'.

²⁵ Gwde na' Bernabén' gwze'e zeje' ciuda Tarson' jaydiljue' Saulon', nach cate' beželde' le', gwche'ene' Antioquían'.

²⁶ Na' gosonite' Antioquían' tgüiz gosone' txen len bene' Antioquía ca' chesedop chesežag chesonxene' Jesucriston' na' bososed bosolo'ede' bene' zan. Na' Antioquía na'tequen' gwzolo bososi'e bene' ca' chesejnilaže' Jesucriston' bene' cristian da' chosozenague' che Criston'.

²⁷ Šlac nita' Bernabén' na' Saulon' lo ciuda Antioquían', besežin bał bene' Jerusalén ben' chosozende' bene' bi dan' ba gož Diosen' legaque'.

²⁸ Na' cate' bene' ca' besežinna', toe' bene' le Agabo gwzeche' lao bene' ca' zjandop zjanžag chesonxen Jesucriston' be'e diža' can' ba bzejni'i Spiritw che Diosen' le', gwne' doxen yežlion' gata' to gwbin juisyw. Na' cate' bžin ža gwnabia' ben' le Claudio doxen gan' mbane nación Roman', cana' goc gwbinna' can' gwna Agabon'.

²⁹ Nach bene' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseseleñ' yesaclene' bene' lježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gaca'te' da' gac yosonežjue'.

³⁰ Na' gosone' can' bosoxi'ena' nach gosesele' Saulon' len Bernabén' distritw Judean' jasenežjue' mechon' bene' ca' chosogüia cheseñe'e bene' chesejnilaže' Jesucriston' ciuda Jerusalénna'.

12

Gosote' Jacobon' na' goseyixjue' Pedroa' ližya

¹ Na' ca tiempa' rey Herodes bchi bsaque' bał bene' ca' chesonxene' Jesucriston'.

² Nach bene' mandadw gosote' Jacobo bene' biše' Juanna' len spada.

³ Na' gocbe'e rey Herodesen' chesyebe bene' Israel ca' dan' bene' mandadw gosote' Jacobon', nach bene' mandadw gosezene' Pedroa' cate' gola' lni cate' chesagüe' yetextil dan' bibi levadua nchixen.

⁴ Nach Herodesen' gwduxjue'ene' ližya na' gwsele' šino'to soldadw bene' gosape' ližyan', tap güeje' do ža do yel. Herodesen' bene' xbab cueje'ne' ližyan' te lñin' cont gone' yela' justis che' lao bene' že' lo ciudan'.

⁵ Soldadw ca' gosapchgüe' Pedroa' šlac de' ližyan', perw na' ca nac bene' ca' chesejnilaže' Jesucriston', gosenabchgüede' Diosen' gaclene' Pedroa'.

Diosen' bebeje' Pedroa' ližyan'

⁶ Na' to že' ca gwxeze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw bene' chesape' cho'a puert ližyan'.

⁷ Cate'cze zejenez to angl bene' gwsele' Xancho Diosen' bžine' lo' ližyan' gan' de Pedroa' na' gwyeni'chgua lo' ližyan'. Anglen' bte' cuít le'e Pedroa' bosbane'ne', gože'ne':

—Netec na'a gwyas.

Na' la' besyeyežte gdenna' zjanchej na' Pedroa'.

⁸ Nach gož anglen' le':

—Bego'o xpanto' na' bolej xelon'.

Nach ben Pedroa' ca'. Nach gož anglen' le':

—Bechele xadon' chio' na' beyo'o len neda'.

⁹ Nach bechoj Pedroa' zena'ogüe'ne' perw bi gocbe'ede' še da' li anglen' chon ca' len le', con godde' še chle'edagüede'.

¹⁰ Beyož besyedie' chop cuen gan' nita' soldadw ca' chesape' ližyan', besyěžine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gosa'aque' late' nach anglen' bocua'ane' Pedroa' toze'.

¹¹ Cana'ch gocbe'e Pedroa' da' li ba bechoje' ližyan', nach gwne':

—Ba cheyacbe'eda' da' licze Xana' Diosen' ba gwsele' angl che'na' na' bosle' neda' lo na' Herodesen' na' bosle' neda' lo yogó' da' ca' chesaque bene' Israel gualaž chia' ca' yesonde' neda'.

¹² Na' ne' chonte Pedroa' xbaden' ca', gwze'e gwyeje' liž María xna' Juan ben' lecze le Marcos. Na' liž Marían' zjandop zjanžag bene' zan chosol güiže' Diosen'.

¹³ Nach bsiže' cho'a puert zaguanna' na' la' bchojte to bi' no'ole le Rode jaña'be' non'.

14 Na' cate' bžimbe' cho'a puerten' beyombia'be' ši'i Pedraa', na' tantw bebebe' bi gwsaljwbe' puerten' san beyejsesbe' gan' že' beŋe' ca' jayežbe' legaque' ba bla' Pedraa'.

15 Nach gose'ebe':

—¿Gague chactonto'na'?

Perw lebe' nezczbe' le'na'. Nach legaque' gose'ebe' naquen bxin che'.

16 Perw Pedraa' ne' chsižcze' cho'a puerten'. Nach ja'aque' gosesaljue'. Cate'cze be-sele'ede' le'na' besyehande'.

17 Nach Pedraa' bene' seŋw len ne'e cont gosenite' šize bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyala' yosozende' Jacobon' na' yezica'chle beŋe' lježgaque' can' ba goquen'. Nach beze'e zjayde' ga yoble.

18 Nach cate' gwyeni', yela' güeban juisyw gwnita' soldadw ca' na' gosoe diža', gosene':

—¿Bixen' goc len Pedraa'?

19 Nach rey Herodesen' bene' mandadw jasyediljue' Pedraa' na' gw nabde' soldadw gop ca' nac goquen' bele'. Perw soldadw ca' bibi rson bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

Got rey Herodesen'

20 Ca horan' Herodesen' chža'achgüe' beŋe' ciuda Tiro na' beŋe' ciuda Sidón ca'. Perw na' bene' ca' beseyažde' yesezi'e da' yese'ej yesagüe' gan' chnabia' rey Herodesen'. Da'na'na' bosocode' ljež beŋe' Tiro na' beŋe' Sidón ca' cont jasenežjue' mechw che ben' nac lo ne'e gan' mbane Herodes, ben' le' Blasto. Gosone' ca' cont Blaston' gwne' chegaque' lao reyen', le gosaclaže' gwzenag reyen' chegaque' cate' šja'aque' lagüe'na' šjasenabe' yesenite' binlo len le'.

21 Nach rey Herodesen' bžie' bia' to ža gwtobe' legaque' cont güe'e diža' laogaque'na'. Na' cate' bžin žan', reyen' gwyaz xałane' dan' nac xdan dan' chaze' cate' chone' yeła' justis, nach gwchi'e xišne'e gan' chnabi'e na' be'e diža' lao beŋe' ca' že' žana'.

22 Nach beŋe' ca' bososye'e, gosene':

—Diosen' choe' diža', gague beŋachen'.

23 Na' lo hora' gwseła' Xancho Diosen' to angl ben' ben' cont gocšene reyen' gwže'e bzoga' lo' le'e na' gote'. Goc che' ca' dan' be'e latje gosonxen bene' le' gualaz da' yesonxene' Diosen'.

24 Perw ca' nac xtiža' Xancho Jesucriston' gos gwlałjchguan.

25 Na' Bernabén' len Saulon' beyož gosone' yogo' da' cheyala' yesone' ciuda Jerusaléna', nach besyeya'aque' jaya'aque' ciuda Antioquían'. Na' goseche'e to beŋe' le Juan na' lecze lie' Marcos.

13

Bernabén' na' Saulon' ja'aque' jasedixjue'ede' xtiža' Jesucriston' yež zito'

1 Na' len beŋe' ca' chesedop chesežag chesonxene' Jesucriston' ciuda Antioquían' zjančixe bene' cheseyixjue'ede' bene' yoble bi da' che' Diosen' legaque', na' zjalen bene' chososed chosolo'ede' xtiža' Diosen'. Na' legaque' zjalie' Bernabé, na' Simón ben' zjansi'e bene' gasj, na' Lucio bene' ciuda Cirene, na' Saulo, na' Manaén. Na' Manaénna' bgole' txen len rey Herodes ben' gwnabia' distritw Galilea.

2 Na' to ža beŋe' ca' chesejnilaže' Jesucriston' gosone' gwbas zjandop zjanžague' chesonxene'ne' cate'cze gož Spiritw che Diosen' legaque':

—Le cuej Bernabén' len Saulon' cont yesone' xšina' con gate'teze seła' legaque'.

3 Nach beŋe' ca' bosol güižche' Diosen' sin cbi zjane'ej zjanagüe', nach gosexo' na'gaque' yičj Saulon' len yičj Bernabén', gosone' ca' cont gosegüe'e xšin Diosen' lo' na'gaque'. Gwdena' bosose'e legaque'.

Postlw ca' gosoe' xtiža' Jesucriston' Chipre

4 Nach Spiritw che Diosen' gwsełan' Bernabén' len Saulon' yež gan' nzi' Seleucia. Na' Seleuciana' gosoe' lo' barcon' cont besežine' Chipre. Na' Chipren' naquen to yežlio dao' dan' chi' lo' nisdaon'.

5 Besežine' yež dan' nzi' Salamina gan' mbane Chipren' na' gosezolagüe' goseyixjue'ede' xtiža' Diosen' lo' yodao' che beŋe' Israel ca'. Na' zjanche'e Juan ben' lecze le Marcos cont chaclene' legaque'.

6 Na' ca' gosaše' gosodie' doxen Chipren' besežine' yež gan' nzi' Pafos. Na' Pafosna' besežague' to beŋe' guaža' le Barjesús. Naque' beŋe' Israel na' chxoayague' že' chzende' bi dan' che' Diosen' le'.

7 Barjesúsen' naque' xmigw gobernador ben' le Sergio Paulo. Sergio Paulon' naque' to beŋe' chejni'ichgüe'. Na' le' goxe' Bernabén' na' Saulon', le goclaže' yosozende' le' xtiža' Diosen'.

⁸ Na' Barjesús'en' lecze bososi'ene' Elimas, diža' griego zejen bene' guaža'. Le' goclaže' bi šejle' Sergio Paulo xtiža' Diosen' dan' choe' Bernabén' na' Saulon'.

⁹ Na' Spiritw che Diosen' zoachguan len Saulon' ben' lecze le Pablo, nach bcos lagüen' gwna'chgüe' Elimasen'.

¹⁰ Nach gože'ne':

—Naco' xi'in Satanás dan' chnabia' da' xigüe' ca', yela' güexoayag chio' na' yela' bene' mal chio'. Bi chazlažo' bite'teze da' güen. ¿Bičhen' cbi chbezo' chžono' yosozenag bene' diža' li che Xanto' Diosen'?

¹¹ Da'n'an' Xanto' Diosen' gone' castigw chio' na' choło' to tiemp, bi gac le'edo' gwbiža'.

Nach la' gwchol'tie', gwde ca' to bejw lo' yejlagüe'na', nach gwzologüe' chgan chtobe' cheyiljue' no gože' ne'e cont cue' nez.

¹² Gobernadore'n' ble'ede' can' goquen' na' gwyejle'e xtiža' Xancho Jesucriston', na' bebanchgüede' can' ža dižan'.

Pablon' na' Bernabén' ja'aque' Antioquian' gan' mbane distritw Pisidia

¹³ Nach Pablon' len bene' ca' nžague'na' gosa'aque' yež Pafosen', goso'e lo' barcon' cont besežine' yež gan' nzi' Perge gan' mbane distritw Panfilia. Na' Juan ben' lecze chese'e Marcos gwlejyichje' legaque' beyeje' Jerusalenna'.

¹⁴ Na' Pablon' len Bernabén' gosa'aque' yež Perge na' besežine' ciuda Antioquian' gan' mbane distritw Pisidia. Na' cate' bžin ža che Dios nach ja'aque' yodao' che bene' Israel' ca' dan' zoa na' na' jasechi'e.

¹⁵ Na' ca' beyož blab to bene' libr gan' nyoj ley che Diosen' len dan' bosozoj bene' ca' goso'e xtiža' Diosen' cani', bene' ca' chesenabia' lo' yodao'na' gosesele' to bene' gan' chi' Pablon' len Bernabén' na' gože' legaque':

—Bene' migw, še de bi diža' da' chaclaže'le güe'le neyoele bene' quinga, guac ņalen ņa'a.

¹⁶ Nach Pablon' gwzchede' bene' seřw len ne'ena' cont yosozenag bene' ca' zjachi'na', na' gože' legaque':

—Le gwzenag le'e bene' Israel' na' nochle chonxenle Diosen'.

¹⁷ Dios ben' chonxen chio' bene' Israel gwleje' da' xozxta'ocho ca' na' goclene' legaque' cont yesaque' to yež xen šlac gosenite' nación Egipto gan' gosaque' bene' zito'. Nach Diosen' bebeje' legaque' Egipton' len yela' guac chen'.

¹⁸ Na' Diosen' gwdape' yela' chxenlaže' čhoa iz len da' xozxta'ocho ca' šlac gosaše' latje dašen'.

¹⁹ Diosen' bonite' gaž yež da' zjachi' gan' nzi' Canaán cont bnežjue' da' xozxta'ocho ca' yežlio chegaquen'.

²⁰ Nach gwde na' Diosen' gwleje' tgüeje tgüeje juez cont gosenabi'e nación Israelen' lao tap gayoa yogaše iz bžinte tiemp che da' Samuel ben' be'e xtiža' Diosen' cani'.

²¹ Nach tiemp che da' Samuelen' da' xozxta'ocho ca' gosenabde' Diosen' gone' to rey bene' ņabi'e legaque'. Na' Diosen' bnežjue' legaque' rey Saúl na' gwnabi'e legaque' čhoa iz. Saúl nan' goque' xi'in ben' le' Cis, na' goque' diaža che da' ben' le Benjamín ben' gwzoa cani'te.

²² Nach bžin ža Diosen' beque'e yela' gwnabia' che Saúlen' na' bzoe' ben' le David cont gwnabi'e. Na' gwne' che rey Davin': "Chbeda' David xi'in Isai nga, le chaclaže' chone' can' chazlažan' na' chzenague' bite'tez da' chapa'ne'."

²³ Nach na'a Diosen' ba gwsele' yeto bene' golje' lo' diaža che da' rey Davin', ben' le Jesús. Ba gwsele' le' cont gone' chio' bene' Israel yela' mban toli točane can' gwne' cani'.

²⁴ Na' cate' biņa' solao Jesúsen' gwsed gwlo'ede' bene', da' Juanna' gwđixjue'ede' len yogo' bene' Israel gualaž chechon' cheyala' yesyetiņjde' xtoła'gaque' na' yesezoe' nis.

²⁵ Na' cate' beyož ben' Juanna' dan' yo'o'lo ne'e gone', nach gože' bene' ca' chosozenag che: "¿Chonle xbab naca' neda' ben' chbezle sela' Diosen'? Bi naca' bena'. Za' yid bena', na' da' nacchgüe' bene' zaca', bi zaca' gona' mandadw che' lechja' no xele'."

²⁶ Bene' migw, chio' naccho xi'in diaža che da' xozxta'ocho Abraham, na' nochle le'e chonxenle Diosen' txen len neto' bene' Israel, xtiža' Diosen' dan' žan gone' chio' yela' mban toli točane naquen par chio'.

²⁷ Bene' ciuda Jerusalén ca' len bene' gwnabia' chegaque' ca' bi gosejli'e gwsela' Diosen' Jesúsen', na' bi gosejni'ide' da' ca' zjanyoj che' le'e libr dan' bosozoj bene' ca' goso'e xtiža' Diosen' cani' la'czla' chosolaben' lo' yodaon' yogo' ža che Dios. Na' dan' bi gosejni'ide', da'n'an' gosechoglagüen' yesote' Jesúsen', nach goc can' nyoj che'.

²⁸ Na' la'czla' gosenezde' bibi da' mal non Jesúsen' cont yesote' le', gosenabde' Pilaton' gone' mandadw yesot soldadw che' ca' le'.

²⁹ Na' goc che Jesúsen' yogo' dan' nyoj che' le'e Xtiža' Dios dan' bosozoj bene' ca' gosenita' cani'. Na' beyož gote'na' nach besežin bene' besyeletje' cuerp che'na' le'e yag cruzen' na' bosocuaše'ne'.

³⁰ Na' gwdena' Diosen' bečhis bosbane' le' ladjo bene' guata'.

³¹ Na' bene' ca' zjanaque' Jesúsen' txen cate' gwze'e distritw Galilea cont gwyeje' ciuda Jerusalén, legaque' besele'ede' Jesúsen' yezan ža gwde bebane' ladjo bene' guata', na' legaque' cheso'e diža' čhen' len yezica'chle bene' Israel.

³² Na' lencze neto' chyixjue'eto' le'e diža' güen cont nezele ba chac da' güen dan' gož Diosen' da' xozxta'ocho ca' cani'.

³³ Ba benen' len čhi' naccho xi'in diaža che da' bene' ca', dan' bosbane' Jesúsen' ladjo bene' guaten'. Na' goc can' nyojen che' le'e libr dan' nzi' Salmos, na' salmo gwchopen' žan: "Le' naco' xi'ina'; na'aža ba blo'a zoaczo'."

³⁴ Na' Diosen' lecze bene' cont nyojen ga yoble che' dan' bosbane' le' ladjo bene' guaten' na' gwbat gožo' cuerp chen', žan: "Gona' güen len le' dołol can' goša' rey Davin'."

³⁵ Na' nyoj yeto salmo žan: "Bi go'o latje gožo' cuerp čhian' neda' naca' ben' chacchgüedo' na' ben' chon xšinon'."

³⁶ Nezecho da' rey Davin' gwnabi'e bene' Israel ca' gwnita' ca' tiemp čhen' can' gwnalaže' Diosen' na' beyožen' gote' na' bgaše' len yezica'chle da' xozxta'ocho ca' na' lecze gožo' cuerp čhen'.

³⁷ Perw na' Diosen' bosbane' Jesúsen' ben' nyoj Xtizen' žan ca', na' bi gožo' cuerp čhen'.

³⁸ Na' cheyała' nezele bene' migw, Jesúsen' ben' choa' diža' che', chezi'xene' xtoła' note'tez bene' chejnilaže'ne'.

³⁹ Bi beyaccho bene' güen len Diosen' da' bi benyane'cho can' ža ley dan' bzoj da' Moisésen', perw note'tezcho chejnilaže'cho Jesúsen', len' ba cheyone' chio' bene' güen.

⁴⁰ Le gwsaca' cont bi gac chele can' bosozoj bene' ca' goso'e xtiža' Diosen' cani', žan:

⁴¹ Cheyała' gonle xbab, le'e čhnelaole chia', na' cheyała' yebanele, le gwžin ža cuiayi'le. Neda' Dios gona' to da' yebanele šlac mbanle, to da' bi šejle'le la'czla' še no čhixjue'e le'e can' gaca'.

⁴² Beyož bzejni'i Pablon' bene' ca' že'na' nach besyechoje' lo' yodaon'. Nach bene' ca' ba goson cuine' bene' Israel gosata'yoede' Pablon' len Bernabén' yesinde' ža che Dios xmanña' yeto cont yosozejni'ide' legaque' yelate' che da' ca' ba bosozejni'ide'.

⁴³ Nach bene' žan bene' Israel len žan bene' ca' ba goson cuingaque' bene' Israel zja'aclene' Pablon' len Bernabén'. Nach Pablon' na' Bernabén' goseneyoede' legaque' cont nita'che' yesejnilaže'che' Diosen' ben' chaclen legaque'.

⁴⁴ Na' cate' bežag xmanña' ža che Dios yogo'lolcze bene' lo' ciudan' besežag cont bosozenague' xtiža' Diosen'.

⁴⁵ Na' gwnita' bene' Israel bene' bi gosejle' che Jesúsen', na' cate' besele'ede' ba nac bene' žan chosozenague' che Pablon' na' gosacxi'ede' le' na' gosenełagüe' che' na' gosezi'diže' le'.

⁴⁶ Perw na' Pablon' len Bernabén' bi besežebe' san gose'e bene' ca' že'na':

—Ba bento' can' gwnalaže' Diosen' na' zgua'tec bzejni'ito' le'e nacle bene' Israel gualaž čheto'. Na' na'a dan' bi chaclaže'le gwzenagle, chonle cont bi gož Diosen' le'e yela' mban toli tocanē. Da'nan' na'a gwzejni'ito' bene' ca' bi žjanac bene' Israel.

⁴⁷ Gonto' ca' neče Xanto' Diosen' bačh bene' mandadw gonton', le nyojen žan:

Bačh nzoa' le'e cont co'ole be'ni' čhian' lo' yichjlaždao' bene' ca' bi žjanac bene' Israel, cont bene' ca' že' doxen yežlion' yesacbe'ede' guac nitlao xtoła'gaque'.

⁴⁸ Na' bene' ca' bi žjanac bene' Israel chesebede' beyož gosende' can' gwna Pablon', na' gosene' güenčhua nac xtiža' Diosen'. Na' yogo' bene' ca' ba gwlej Diosen' cont gata' yela' mban čhegaque' toli tocanē, legaque' gosejle'e xtiža' Diosen' dan' be' Pablon' len Bernabén'.

⁴⁹ Can' goc bene' ca' že' doxen distritwna' gosende' xtiža' Xancho Jesucriston'.

⁵⁰ Perw bał bene' Israelen' goso'e diža' len no'ol blao ca' gosonxen Diosen' na' len bene' gwnabia' blao ca' lo' ciudan', na' bosoš'e xbab čhegaque' cont gwzolao gosone' contr Pablon' len Bernabén' na' bich goso'e latje yesenite' doxen distriton'.

⁵¹ Nach Pablon' len Bernabén' cate' besyeya'aque' ciuda Antioquían' gosebibe ni'agaque' cont bežib yo bište dan' žianna'. Gosone' ca' cont bosolo'ede' bene' ca' chesyebej legaque' malen' chesone' chosolague' legaque'. Nach jaya'aque' yež Iconio.

⁵² Na' mbalazchgua gwnita' bene' ca' chesonxen Jesucriston' ciuda Antioquían', na' Spiritw che Diosen' gwzoachguan len legaque'.

14

Pablon' len Bernabén' besežine' yež Iconio

¹ Na' goquen' Pablon' len Bernabén' besežine' yež Iconion' na' ja'aque' yodao' che bene' Israel. Na' cate' goso'e xtiža' Jesucriston', bene' žan bene' Israel ca' na' len žan bene' cbi žjanac bene' Israel gosejle'e che'.

² Perw na' gwnita' bene' Israel ca' bene' bi gosejle'e che Jesucriston', na' legaque' gosnelagüe' che bene' ca' chesejnilaže' Jesucriston' na' gosone' cont bene' ca' bi zjanac bene' Israel gosezolagüe' besegue'ede' Pablon' len Bernabén'.

³ Perw na' Pablon' len Bernabén' besyega'ane' sša Iconion' cheso'e xtiža' Xancho Jesucriston' sin cbi besežebe'. Na' Xancon' blo'e le diža' lin' cheso'e chesene' Diosen' chacde' benachen', le be'e legaque' yela' guac cont gosone' da' zaca' yabanecho cont gosaclene' bene'.

⁴ Na' bene' ca' že' lo yežen' gosaque' čople, bale' gosede'e bene' Israel ca' ben' bi gosejnilaže' Jesucriston' na' yebale' gosede'e Pablon' len Bernabén'.

⁵ Nach bene' Israel ca' gosone' yela' güexi'a len bene' ca' cbi zjanac bene' Israel na' len justis čegaque' cont yesone' contr Pablon' len Bernabén' na' yosočhele' legaque' yej.

⁶ Perw cate' gwneze Pablon' len Bernabén' dan' chesaclaže' yesone' len legaque', bosyoxonje' jaya'aque' yež Listra na' yež Derbe na' yezica'chle yež ca' zjachi' distritw dan' nzi' Licaonia.

⁷ Na' lecz goseyixjue'ede' xtiža' Xancho Jesucriston' len bene' ca' že' na'.

Bosožie' Pablon' yej šlac zoe' Listran'

⁸ Na' yež Listran' besežague' to bene' golje' nxinj ni'e ca', cate' gocte' bidao' bi goc se'e.

⁹ Con čhi'teze' chzenague' choe' Pablon' dižan'. Nach Pablon' gwne'e le' na' gočbe'ede' bena' chejle'e Diosen' nape' yela' guac cont yeyone' ni'en'.

¹⁰ Nach Pablon' bol güiže'ne' gože' le' zižje:

—Gwzoža'.

Na' la' gwzoža'te' na' gwzolao chde'.

¹¹ Na' že' bene' zan chesene'e can' goquen' na' legaque' bososye'e gosene' diža' Licaonia:

—Xancho bene' ca' chejnilaže'cho ba gosetje' nga chesone' yela' guac, na' chle'etecho legaque' ca' benačh.

¹² Gosene' Bernabén' naque' xangaque' ben' zjansi'e Júpiter, na' Pablon' naque' xangaque' ben' zjansi'e Mercurio. Gosene' ca' le Pablon' choe'che' dižan'.

¹³ Na' yodao' gan' chesonxene' xangaque' Júpiteren' zoan cho'a yež. Na' bxoz che Júpiteren' jaxi'e go'n be ba zjanone' xdan zjanžie' legacba' corona yej. Nach bxoza' gwčhe'e bene' zan cho'a yežen' gan' zoa puert che ze'e dan' nyechj yežen' na' goclaže' yesote' go'nen' yesonxene' postlw ca'.

¹⁴ Na' Pablon' len Bernabén' cate' gosache'ede' can' yeson bene' ca', gosečheza' xagaque' dan' bi gosaclaže' yesonxen bene' ca' legaque'. Nach gosodie' gachol bene' ca' gose'e legaque' zižje:

¹⁵ —Bene', čbixchen' chonle ca'? Lecz benačh neto'. Za'to' cont chyixjue'eto' le'e cheyała' gwša' yichjlažda'olen' na' cuejyichjle costumbr quinga dan' bibi zaca' na' gonxenle Dios ben' zoa toli tocané. Le' bene' yaban' yežlion', nisdaon', benačh, be ca' chesaš na' bite'tezechle da' chle'echo le'e yaban', lo yežlion' na' lo' nis.

¹⁶ Cani' Diosen' bi bžone' gon benačhen' bite'tez da' mal da' žan yesone'.

¹⁷ Perw zoacze' chone' da' güen len yogo' benačh cont yesežezde' zoe' naque' Dios. Chone' cont chac yejw cont chac dan' chazcho na' chata' da' che'ej chagwcho cont zoacho mbalaz.

¹⁸ Na' la'czla' Pablon' len Bernabén' gosene' yogo' da' ca', cané gosezoede' bosožone' yesot bene' Listra ca' go'nna' yesonxene' legaque'.

¹⁹ Nach besežin bal bene' Israel bene' nita' yež Iconio na' ciuda Antioquia dan' čhi' distritw Pisidian', na' bene' ca' gosego'oyele' bene' Listra ca' cont gosaque'ne' txen bosočhele' Pablon' yej. Na' cate' gosone' xbab bačh gote' nach gosexobe' le' cho'a yeža' na' bosyocua'ane' le' na'.

²⁰ Perw na' bene' ca' chesonxene' Jesucriston' besedobe' gan' de Pablon', nach Pablon' beyase' beyeje' lo ciudadan' da' yoble. Nach beteyo beza' Pablon' len Bernabén' jaya'aque' yež Derben'.

²¹ Nach cate' besežine' Derben' bosozende' bene' ca' že' na' diža' güen che Jesucriston', na' bene' zan gosone' txen len legaque' gosejle'e che Jesucriston'. Na' gwdena' gosa'aque' ja'aque' da' yoble Listran' na' Iconion' na' Antioquian'.

²² Na' to to yež gan' ja'aque' gosone' čačh laže' bene' ca' chesonxene' Jesucriston' na' gose'e legaque' yesenite' yesonxene' le' do yichj do laže', na' gose'e legaque' da' zan da' gac da' saca'zi'cho šlac chbezcho yeyejcho yaban' gan' zoa Diosen' chnabi'e.

²³ Na' to to yež ga besyedeje' gosebeje' bene' yosogüia yesene'e yezica'chle bene' ca' chesonxene' Jesucriston'. Na' Pablon' len Bernabén', cate' ja' yesa'aque' to to yež, gosone' gwbas na' bosol güiže' Diosen' gosene' gaclen Xancho Jesucriston' bene' ca' ba chesejnilaže' le'.

Pablon' len Bernabén' jaya'aque' Antioquia gan' mbane distritw Siria

²⁴ Cate' gosa'aque'na' Pablon' len Bernabén' besyedie' distritw Pisidia na' besežine' distritw Panfilian'.

²⁵ Na' goseyixjue'ede' xtiža' Jesucriston' yež Perge na' beyožen' jaya'aque' yež Atalia.

²⁶ Nach Atalian' besyeyo'e lo' barcw jaya'aque' ciuda Antioquían' gan' mbane distritw Sirian'. Le bene' Antioquíanan' gosesele' Pablon' na' Bernabén' cana'te na' gosenabde' Diosen' šejlene' legaque' na' gaclene' legaque' cont yosozejni'ide' bene' xtiže'na'. Na' na'a besyežine' ba beyož gosone' dan' gosego'o bene' ca' lo' na'gaque' yesone'.

²⁷ Na' bosyotobe' bene' ca' chesonxene' Jesucriston' na' gose'ene' yogo'lol can' ben Diosen' len legaque' šlac zja'aque', can' goclene' legaque' cont zan bene' bi zjanac bene' Israel ba gwzolao chesejnilaže' Jesucriston'.

²⁸ Na' besyega'añe' Antioquían' sša len bene' ca' chesonxene' Jesucriston'.

15

Gosone' yela' güxi'a len bene' ca' že' ciuda Jerusalénna'

¹ Na' šlac Pablon' len Bernabén' ne' nite' ciuda Antioquían' besežin to čope bene' za'ac distritw Judean' na' gosezolagüe' bosozejni'ide' bene' ca' chesonxen Jesucriston' na'. Gose'ene' yogo'lol bene' byo cheyała' yesezoe' señw dan' že' circuncisión can' ža ley dan' bzoj da' Moisésen' cont gata' yela' mban čegaque' toli tocañe.

² Na' Pablon' len Bernabén' gosacyože' len bene' ca' za'ac distritw Judea dan' chosozejni'ide' ca'. Nach bene' ca' chesonxene' Jesucriston' Antioquían' gosechoglagüen' šja'ac to čope' Jerusalén len Pablon' na' Bernabén'. Šja'aque' šjasene'e postlw ca' že'na' na' len bene' ca' chosogüia chesene'e lježgaquen' cont yesone' yela' güxi'a len legaque' che dan' chosozejni'i bene' ca' za'ac distritw Judean'.

³ Nach bene' ca' chesedop chesežag chesonxene' Jesucriston' Antioquían' gosesele' legaque' Jerusalénna'. Na' bene' ca' zja'aquen' gosedie' distritw Fenicia na' distritw Samaria. Na' yež ca' gan' že' bene' chesonxene' Jesucriston', bene' ca' zja'aquen' gose'e legaque' zan bene' bi zjanac bene' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach bene' ca' že' distritw Fenicia na' distritw Samaria besyebchgüede' gosende' dižan'.

⁴ Na' cate' Pablon' len Bernabén' besežine' Jerusalénna', bene' ca' chesedop chesežag chesonxene' Jesucriston', na' postlw ca' na' len bene' ca' chosogüia chesena' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lol can' ba goclén Diosen' legaque'.

⁵ Nach nita' to čope bene' Fariseo bene' ba chesonxene' Xancho Jesucriston', na' tgüje tgüje' gosezie' gosene':

—Note'tez bene' byo gonxene' Jesucriston' cheyała' soe' señw dan' nzi' circuncisión na' cheyała' gone' can' ža ley dan' bzoj da' Moisésen'.

⁶ Nach besedobe postlw ca' len bene' ca' chosogüia chesena' lježgaque', na' bosoxi'e še naquen can' chesena bene' ca'.

⁷ Ba chac sša cheso'e dižan' cate' gwzoža' Pedron' gože' legaque':

—Bene' migw, nezele ba goc zan iz Diosen' gwleje' neda' jatixjue'eda' diža' güen che Jesucriston' len bene' ca' bi zjanac bene' Israel cont gosejle'e che'.

⁸ Na' Diosen' nombi'e yichjlaždao' yogo'lol bene', na' cont nezecho chacde' bene' ca' bi zjanac bene' Israel can' chacde' chio' naccho bene' Israel, nacha' gwsele' Spiritw čhen' gwyo'on lo' yichjlaždao' bene' ca' can' ba gwyo'on lo' yichjlažda'ochon'.

⁹ Toz ca chon Diosen' len chio' na' len legaque', note'tezcho ba beya' beyibe' lažda'ochon' dan' chejle'cho che Jesucriston'.

¹⁰ Ba chonle contr Diosen' dan' chaquele gwchile bene' ca' bi zjanac bene' Israel cont yesa'ogüe' costumbr che chio' bene' Israel. Nezele catec zdebe zjanauen, ne chio' ne xozxta'ocho ca' bi goc yesone' yogo' can' ža diža' gol čheto' ca'.

¹¹ Bi cheyała' goncho ca', le nezecho note'tez naccho, Xancho Jesúsén' chone' yela' mban čhecho toli tocañe dan' chacde' chio', gague neche dan' choncho can' ža ley che Moisés.

¹² Beyož gwna Pedroa' ca' nach bich bi gosena bene' ca', san yogüe' gosenite' šize bosozenague' xtiža' Pablon' len Bernabén'. Goso'e diža' can' bnežo Diosen' legaque' yela' guac cont gosone' da' zaca' yebanecho gan' že' bene' ca' bi zjanac bene' Israel.

¹³ Na' beyož goso'e dižan' nach postlw Jacobo be'e dižan', gwne':

—Bene' migw, le gwzenag diža' nga gua'a.

¹⁴ Simón Pedro nga ba bzejni'ide' chio' can' ben Diosen' da' nechw len bene' bi zjanac bene' Israel cont blo'e chacde' legaque', ba gwleje' ba'le' cont zjanaque' lo' ne'e.

¹⁵ Na' dan' goc ca' chotilen da' ca' bosozoj bene' goso'e xtiža' Diosen' cani', le nyojen žan:

¹⁶ Tena' yida' da' yoble na' gona' cont nabia' xi'in diaža che da' rey David,

la'czla' na'a nono xi'in diaža che' chnabia',

na' gona' cont soa toe' da' yoble nabie'.

17 Gona' ca' cont yogo' bene' bi zjanac bene' Israel guac yeseyiljue' nac yesone' yesenite' binlo len neda'.

Note'tez bene' naci6n guac yosol gũize' neda'.

18 Can' gwna Xancho Diosen' cani'te,

bene' cont gosepeze bene' can' gaquen'.

19 Na' lagũe nyoj Xtizen' žan ca', chacda' neda' bi cheyala' gonecho zed bene' ca' bi zjanac bene' Israel bene' ba chesebeyijchje' costumbr gole chegaque' na' chesonxene' Diosen'.

20 Con gwzozcho ye'gacchone' bi yesone' txen len bi dan' cheson bene' dan' chesene' naquen che l gua'a Isaca' dan' chesonxene', neca yesata'lene' no no'ol cbi nac no'ol chegaque' o bene' byo cbi nac bene' chegaque', neca yesagũe' be chesote' chosošoque' do lba'ba', neca yesagũe' chen che beyixe'.

21 Nabcho bi yesone' da' ca', le cani'te nita' bene' to to yež chosozejni'ide' ley chechon' dan' bzoj da' Moisesen' dan' žan bi goncho da' ca', na' chosolabe' leyna' yogo' ža che Dios.

22 Nach postlw ca' len bene' chosogũia chesene'e yezica'chle bene' chesonxene' Jesucriston', na' len bene' chesodop chesežag, gosazlaže' can' gwna Jacobon', na' bosoxi'e choj chope bene' lježe' šja'aque' ciuda Antioquian' txen len Pablon' na' Bernabén'. Na' gosebeje' Judas ben' lecze gože'ne' Barsabás, na' Silas, ben' zjanac bene' blao len legaque'.

23 Na' bosozoje' to cart da' gosoxe' bene' ca' žan:

“Neto' postlw, len bene' chosogũia chesene'e yezica'chle bene' chesonxene' Jesucriston', na' len yogo' bene' chesodop chesežag len neto', chguapto' le'e tiox le'e zoale Antioquian' na' distritw Siria na' distritw Cilicia. Bi nacle bene' Israel perw ba nac lježcho chonxencho Jesucriston'.

24 Ba nezeto' to chope bene' besechoj nga ja'aque' gan' zoalen' gosone' šejlaže'le len dan' bosozejni'ide', na' chacle tole dan' chesene' cheyala' soale seřw dan' že' circunci6n na' cheyala' gonle yogo' bichle dan' ža ley dan' bzoj da' Moisesen'. Bi nezeto' gosa'aque' na' gague mandadw che neto' gose'e le'e ca'.

25 Da'nan' gwzoato' txen bento' yela' gũexi'a gwlejto' chope bene' quinga chsela'to' gan' zoalen', txen len postlw Pablon' na' len Bernabén', bene' ca' chaquechgũeto'.

26 Nezeto' Pablon' len Bernabén' zan las ba ša' yesate' dan' cheso'e xtiža' Xancho Jesucriston'.

27 Na' chsela'to' Judasen' len Silasen' cont yosozejni'ide' le'e diža' cho'a yogo' dan' bzojto' le'e cart nga.

28 Chazlaže'to' can' bzejni'i Spiritw che Diosen' neto', na' da'nan' bi gonto' mandadw bichle da' zdebe gonle san da' quinga chaqueto' chonen byen cbi gonlen.

29 Bi gagwle yela' guagw dan' ba bosozie' lo l gua'a lšacan' chesonxenen', na' bi gagwle be ca' chesote' chosošoque' do lba'ba', bi gagwle chen che beyixe', na' bi gata'lenle no'ol cbi nac no'ol chele o bene' byo ben' cbi nac bene' chele. Na' še gwzenagle che da' quinga ba gwnato' bi gonle, gũenna' chonle še ca'. Da' na'ze chzojto' le'e cart nga. Diosen' gaclenšque' le'e.”

30 Can' goquen' bene' ca' chesonxene' Jesucriston' Jerusalenna' gosesele' bene' ca' chope len Pablon' na' len Bernabén' gosa'aque' zja'aque' ciuda Antioquian'. Na' cate' besežine' Antioquian' bosotobe' bene' ca' chesonxene' Jesucriston' na' bosonežjue' legaque' carten' goseseļa' bene' Jerusalén ca'.

31 Na' cate' bene' Antioquía ca' bosolaben' besyebede' ca' consejon' nyoj le'e carta'.

32 Na' Judasen' len Silasen' lecze gosaque' bosozende' bene' bin' ba gwna Diosen'. Nach gosoe'lene' bene' Antioquía ca' diža' zan gosone' chach laže'gague' na' gosaclene' legaque' cont gosonxenche' Jesucriston'.

33 Gosenite' Antioquian' zan ža, nach cate' bžin ža šjaya'aque', bene' Antioquía ca' gose'e legaque': “Nayežagcho", na' lecze gose'e legaque' yesyežine' Jerusalenna' to šagũe' to güen.

34 Na' Silasen' bechoglaže' yega'a'ne' Antioquian'.

35 Na' Pablon' len Bernabén' gosenita'cze' Antioquian' na' txen len yezan bene' bosozejni'ide' bene' xtiža' Xancho Jesucriston'.

Pablon' gweje' da' yoble gan' ba jatixjue'ede' xtiža' Diosen'

36 Nach cate' ba goc šša nite' Antioquian', Pablon' gože' Bernabén':

—Šejcho da' yoble yogo' yež ca' gan' ba jatixjue'echo xtiža' Xancho Jesucriston' šja'na'cho nac cheson bene' ca'.

37 Nach Bernabén' goclaže' šja'aque' na' yesече'e Juan ben' lecze le Marcos.

38 Perw Pablon' gwne' bi gonen güen yesече'ene' dan' gwlejyichj Marcosen' legaque' cate' besežine' distritw Panfilian' na' bi benlene' legaque' xšin Diosen'.

39 Cate' gota'bia' ne toe' bi goclaže' gac can' ža ben' yeto, nach besyele'e. Bernabén' gwze'e gwche'e Marcosen' na' goso'e lo' barcw ja'aque' Chipren'.

⁴⁰ Na' Pablon' gwleje' Silasen' cont che'e le'. Na' bene' ca' chesonxene' Jesucriston' Antioquían' bosol güiže' Xancho Diosen' gosenabe' gaclene' legaue' gate'tez šja'aque'. Nach Pablon' len Silasen' gosa'aque'.

⁴¹ Na' ja'aque' to to yež ca' zjachi' distritw Sirian' na' len distritw Cilician' gosone' čačh laže' bene' ca' chesedop chesežag chesonxene' Jesucriston'.

16

Timoteon' gwzolağüe' chonlene' Pablon' na' Silasen' txen

¹ Na' Pablon' len Silasen' besyežine' yež Derben' nach gwdena' besyežine' yež Listran'. Na' Listran' zoa to bene' chonxene' Jesucriston' le' Timoteo. Xna' Timoteon' naque' bene' Israel na' chonxene' Jesucriston', na' xen' naque' bene' griego.

² Na' bene' ca' chesonxene' Jesucriston' yež Listran' len yež Iconion' cheso'e diža' che Timoteon' chesene' zoacze' chone' da' güen.

³ Da'nán' Pablon' gwnabe' šejlen Timoteon' legaue', nach gwchi'ene' gan' bosozoe' le' sefiw dan' že' circuncisión. Bene' ca' le yogo' bene' že' na' gosenezde' xa Timoteon' bi naque' bene' Israel na' Timoteon' biña' soe' señon', na' lecze Pablon' goclaže' yega'ane' güen len bene' Israel ca'. Cate' beyož bzoe'ne' señua' na' gosa'aque'.

⁴ Na' to to yež ga besežine' bosozende' bene' ca' chesonxene' Jesucriston' can' nac yela' güexi'a che postlw ca' len bene' chosogüia chesene'e lježgaue' Jerusalénna' che da' ca' cheyala' yesone'.

⁵ Na' bene' ca' chesedop chesežag chesonxene' Jesucriston' gosenita'čače' gosejni-laže'ne' na' gwyanche' tža tža.

Pablon' ble'edagüede' to bene' distritw Macedonia chata'yoede' le' šeje' laže'

⁶ Nach Spiritw che Diosen' bi ben' latje šjasedixjue' Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'nán' gosodie' yež ca' zjachi' distritw ca' gan' nzi' Frigia na' Galacia.

⁷ Besežinte' gala'ze distritw gana' nzi' Misia na' gosone' xbab yeso'e distritw da' nzi' Bitinia, perw lez na' bi be' Spiritw che Jesúsen' latje šja'aque'.

⁸ Nach gosodie' gala'ze distritw Misian' na' besežine' ciuda dan' nzi' Troas dan' chi' cho'a nisdan'.

⁹ Nach že'na' Pablon' ble'edagüede' zecha to bene' distritw Macedonia lagüe', che'e le': "Yo'o Macedonia cont gacleno' neto'."

¹⁰ Neda' Lucas gwzoa' len legaue' na' da' ble'edagüe Pablon' bene' Macedonian', nach gwnezeto' chaclaže' Diosen' šjazeneto' bene' Macedonia ca' diža' güen che Xancho Jesucriston'. Nach bsiñi'a čheto' cont gwza'to' gwejto' distritw Macedonian'.

Pablon' len Silasen' ja'aque' Filipos

¹¹ Na' cate' gwza'to' ciuda da' nzi' Troas dan' chi' cho'a nisdao' gwyo'oto' to lo' barcw zejto' liča gan' chi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis.

¹² Nach gwza'to' Neápolis bžinto' ciudan' nzi' Filipos gan' mbane distritw Macedonia na' bega'anto' to čhop ža. Filipos naquen ciuda blaoch che distriton' gan' že' bene' Roma.

¹³ Na' cate' bžin ža che Dios bchojto' ciudan' na' gwejto' cho'a yegw gan' chaqueto' chjaseļ güiže' Diosen', nach gwche'to' na' be'lento' no'ol ca' ba zjandoben' diža' güen che Jesucriston'.

¹⁴ Toe' le Lidia naque' bene' Tiatira na' chote' lache' güen da' nac color moradw, na' chonxene' Diosen' do yichj do laže'. Xancho Diosen' bene' cont bzenague' che dan' bzejni'i Pablon' le'.

¹⁵ Nach le' len bene' lo' yo'o che' gosezoe' nis. Gwdena' gota'yoede' neto' gwne':

—Še chejle'le da' li ba chonxena' Xancho Jesucriston', le šo'o soale ližan'.

Nach gwejto' jasoato' ližen', le bene' byen.

¹⁶ Na' to ža zejto' gan' chosol güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yichjlažda'oben' chonen cont chac chneya'abe', na' gan xen chombe' par xambe' ca' chneya'abe'.

¹⁷ Na' lebe' na'obe' neto' len Pablon' gate'tez zejto', na' chosya'abe' žabe':

—Bene' quinga chesone' xšin Diosen' ben' chnabi'e doxen, na' cheseyixjue'ede' le'e can' gata' yela' mban chele toli tocanē.

¹⁸ Ba chac zan ža chombe' ca' cate' goque Pablon' zed, na' gwyečhje' gože' da' xigüen' yo'o lo' yichjlažda'oben':

—Len yela' chnabia' che Jesucriston' chnia' le' bechoj lo' yichjlaždao' bi'nga.

Na' la' bechojte da' xigüen' lo' yichjlažda'oben'.

¹⁹ Na' gwdena' cate' gosacbe'e xambe' ca' ba bechoj da' xigüen' lo' yichjlažda'oben' na' bich bi gan yesone' len lebe', nach gosezene' Pablon' len Silasen' na' jasesane' legaue' lagüe ya'a gan' že' bene' ca' chesenabia' ciudan'.

²⁰ Na' cate' besežine' gan' že' justis ca', gose'e legaue':

—Bene' Israel quinga chesaše' chesebeque' da' zed lo' ciuda nga.

²¹ Na' chosolo'ede' costumbr da' bi de lsens gao' chio' naccho bene' Roma.

²² Nach bene' ca' lo' ciudan' gosase' contr Pablon' len Silasen', na' bene' gwnabia' ca' gosone' mandadw goselechje' xagaue' cont goseyine' legaue' xis.

²³ Beyož goseyinchgüe' legaue' nach bosoži'e' legaue' ližya, chese'e ben' chape' ližyan' gwna'iane' legaue' cont bi yesyechoje'.

²⁴ Beyož gose'e le' ca', nach bži'e' legaue' lo' cuart ližyan' dan' zoa la'zelaoze gan' nac biže'te na' bchide' ni'agaquen' len yag dan' nzi' cepo.

²⁵ Ca' gosenita' Pablon' len Silasen' ca' do chel, chosol güiže' Diosen' na' chesole' no himno chesonxene' Diosen', na' yezica'chle bene' ca' zjade ližyan' chosozenague'.

²⁶ Nach zejenez leca gwxo' na' bsesechguan len yo'o ližyana'. Na' to ši'ize yogo' puert che ližyana' beseyaljon na' besyeyež yogo' gden ca' dan' zjanchej ni'a na' bene' ca' že' lo' ližyan'.

²⁷ Bosbanen ben' chape' ližyan' na' cate' ble'ede' ba zjanyaljo puert ca', la' goljte spada chen' cont yeyot cuine', le bene' xbab ba bosyoxonj yogo' bene' ca' zjade ližyan'.

²⁸ Nach Pablon' gože'ne' zižje:

—Bibi gone cuino'. Nga zoacze yogo'to'.

²⁹ Nach ben' chap ližyan' gwnabe' to yi', na' gwyo'osese' zjane'e gan' de Pablon' len Silasen'. Do chxizze' bzoa xibe' lao bene' ca', le chžebchgüe'.

³⁰ Na' la' bebejte' legaue' lo' cuart gan' zjajo'en', che'e legaue':

—¿Bi cheyała' gona' cont gata' yela' mban chia' toli' tocaņe'?

³¹ Nach gose'e le':

—Gwejniłaže' Xancho Jesucriston', le' na' bene' lo' yo'o chio', na' gata' yela' mban chele toli' tocaņe'.

³² Nach ben' chape' ližyan' gwche'e legaue' ližen' na' gosoe'lene' le' len bene' lo' yo'o chen' xtiža' Xancho Jesucriston'.

³³ Nach ca' hora' ben' chap ližyan' gwđibe' lo' güe' che Pablon' na' che Silasen', na' gwdena' jasoe' nis len bene' lo' yo'o che' ca'.

³⁴ Nach ben' chape' ližyan' beče'e Pablon' len Silasen' liže' bgüe'ej bguagüe' legaue'. Mbalaz zoe' ba chejniłaže' Diosen' txen len bene' lo' yo'o che'.

³⁵ Cate' ba gwyeni' bene' gwnabia' ca' gosesele' xa'ag jaseže' ben' chap ližyan' yosane' bene' ca' šjaya'aque'.

³⁶ Nach le' gože' Pablon':

—Bene' gwnabia' ca' bach gosesele' rson yosana' le'e. Guac yeyejle to šagüe' to güen.

³⁷ Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yela' justis cheto' še bi nonto' na' gosegüe'e neto' ližya, len nacto' bene' nación Roma. ¿Na' chesone' xbab yososane' neto' šižize? Bi gac, san yesid cuine' yesyebeje' neto'.

³⁸ Nach xa'ag ca' jasyeyeže' bene' gwnabia' ca' can' gož Pablon' legaue'. Na' bene' ca' besežebe' cate' gosenezde' Pablon' len Silasen' zjanaque' bene' nación Roma.

³⁹ Nach bene' gwnabia' ca' ja'aque' gan' zjade Pablon' len Silasen' na' gosata'yoede' legaue' yesyezi'xene' can' ba goquen', na' diža' šagüe' gose'e legaue' yesyechoje' yesyeya'aque' lo' ciudan'.

⁴⁰ Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' chačh laže' bene' ca' chesonxene' Jesucriston' na' beyožen' besyeya'aque'.

17

Bene' Tesalónica ca' gosone' contr Pablon'

¹ Cate' Pablon' na' Silasen' gosa'aque' ciuda Filipos nach ja'aque' yež da' nzi' Anfipolis na' len yež da' nzi' Apolonia na' besyežine' to ciuda da' nzi' Tesalónica gan' zoa to yodao' che bene' Israel.

² Na' Pablon' ca' costumbr che' gwyeye' yodao' ža che Dios. Na' ca' goc, šone ža che Dios be'lene' legaue' diža'.

³ Bzejni'ide' legaue' gože'ne' bene' ca' gosoe' xtiža' Diosen' cani' bosozoje' xtiža' Criston'. Gosene' ben' sela' Dios yedenabi'e, cheyała' yosoči yososaca' bene' le' na' yesote'ne' na' techle yeyas yebane' ladjo bene' guat ca'. Gože' bene' Tesalónican':

—Jesüsen' ben' choa' diža' che', le'na' Criston' ben' gwseła' Dios cont nabi'e.

⁴ Nach bał bene' Israel gosejle'e xtiža' Pablon' len Silasen' na' gosaque' txen len legaque', na' lecze zan bene' griego bene' chesonxen Diosen' na' zan no'ole blao lecze gosejle'e.

⁵ Perw gwnita'ch bene' Israel bene' bi chesejle'e xtiža' Diosen'. Legaque' gosacxi'ede' Pablon' len Silasen' na' bosyotobe' xonj bene' mal bene' chesaš lagüe ya'a na' gosaque' txen gosone' cont gwyche' žaš doxen ciudan'. Nach bene' že' lo ciudan' ja'aque' liž ben' le' Jasón chesacde' gesybeje' Pablon' len Silasen' liže'na'.

⁶ Cate' besežine' liž Jasónna', noch no bene' ca' nita'. Nach cate' bi besyeželde' Pablon' len Silasen', na' gosoxe' Jasónna' len yebał bene' chesonxene' Jesuscriston' na' goseche'e legaque' lao bene' ca' chesenabia' ciudan', na' bososye'e gosene':

—Bene' ca' nita' liž benga chesaše' chesebeque' da' zed doxen, na' na'a ba besele'e gan' zoacho nga.

⁷ Jasón ni ba blebe' legaque' ližen', na' bi chesone' can' ža ley che César ben' nac la'zelagüe bene' gwnabia' chechon' chi' ciuda Roman', na' chesene' zoa yeto rey bene' le Jesús bene' nabi'e chio'.

⁸ Na' cate' gosende' diža'na', bene' lo ciuda ca' len bene' gwnabia' chegaque' ca' gosebecche' žaš.

⁹ Nach Jasónna' len bene' lježe' ca' bosožie' mechw cont bene' gwnabia' ca' bososane' legaque', con še bich yesyežin Pablon' na' Silasen' lo ciudan', chesene'.

Pablon' len Silasen' ja'aque' yež Berea

¹⁰ Nach že'na' bene' ca' chesonxene' Jesucriston' lagüe ciuda Tesalónican' bosyose'e Pablon' na' Silasen' cont ja'aque' yež gan' že' Berea. Na' cate' besyežine' nach ja'aque' lo' yodao' che bene' Israel ca'.

¹¹ Na' bene' Israel ca' že' Berean' zjanacche' bene' šagüe' clcl ca' bene' Israel ca' že' Tesalónican' na' besyebede' bosozenague' xtiža' Jesucriston' dan' bosozejni'i Pablon' len Silasen' legaque'. Na' tža tža besyeyiljue' gan' nyoj da' ca' bosozejni'i bene' ca', cont yesenezde' še le can' žan.

¹² Na' zane' gosejle'e xtiža' Xancho Jesucriston' na' lecze zan bene' griego ca' na' zan no'ole blao.

¹³ Nach bene' Israel ca' že' Tesalónican' bene' ca' cbi chesejle' che Jesucriston', gosende' diža' ba zoa Pablon' len Silasen' Berean' chosozejni'ide' xtiža' Diosen'. Nach gosa'aque' ja'aque' Berean' na' gosone' cont bene' Berea ca' lecž gosone' contr Pablon'.

¹⁴ Perw na' bene' Berea ca' chesejnilaže' Jesucriston' la' bososa'te' Pablon' gwyeye' cho'a nisdao'. Na' ca' nac Silasen' len Timoteon', legaque' besyega'ane' Berean'.

¹⁵ Na' to čop bene' Berean' ja'aque' jasesane' Pablon' ciuda dan' nzi' Atenas. Na' cate' besyeya'aque' jaya'aque' Berean' Pablon' gwsele' rson len legaque' cont Silasen' len Timoteon' lecž šja'aque' cate gan' zoe'na'.

Pablon' bsd blo'ede' bene' Atenas ca'

¹⁶ Na' Pablon' šlac zoe' ciuda Atenasen' chbeze' žin Silasen' len Timoteon', gocchgüe' tole lo' yichjlažda'ogüe' da' ble'ede' da' zan l' gua'a lšaca' da' chesejnilaže' bene' ca'.

¹⁷ Da'nan' bzejni'ide' bene' Israel ca' lo' yodao' chegaque'na' len yezica'chle bene' ca' chesonxene' Diosen'. Na' yogo' ža gwyeye' ga chac ya'a je'e xtiža' Diosen' len bene' ca' že'na'.

¹⁸ Nach bene' ca' že'na' gwzolao chesoe'lene' le' diža'. Bałe' chesejle'e dan' bzejni'i to bene' le' Epicuro, na' yebałe' chesejle'e dan' bosozoj bene' ca' chesene' estoico. Na' bałe' gosene':

—žBin' chon ža benga?

Na' yebałe' gosene':

—Chacljede' gwzejni'ide' chio' che no bene' cobe bene' šejnilaže'cho.

Gosene' ca' le Pablon' ba bzejni'ide' legaque' xtiža' Jesúsen' na' ba be'e diža' Jesúsen' bebane' ladjo bene' guat.

¹⁹ Nach goseche'e Pablon' to latje dan' nzi' Areópago gan' chesedobe bene' blao chegaque' cate' chosoxi'e bi da' chesone'. Nach gose'e Pablon':

—Che'neto' gwzejni'ido' neto' bi da' coben' dan' chsed chlo'edo'.

²⁰ Bina' yeneto' diža' can' nac dan' cho'o nga na' chaclaže'to' nezeto' bi zejen yogo' da' ca'.

²¹ Ca' nac bene' Atenas ca', de costumę chegaque' yogo' ža con chesaše' cheso'e diža' o chosozenague' che bi da' cobe da' de, na' lecž ca' cheson no bene' zito' že' Atenas.

²² Nach Pablon' gwzeche' gachol legaque' gan' chesone' yela' güexi'a na' gože' legaque':

—Le'e bene' Atenas, chacbe'eda' leca chejnilaže'le zan l' gua'a lšaca'.

²³ Cate' gwdia' tnez ble'eda' gan' chonxenle' zan l' gua'a lšaca', na' ble'eda' to latje gan' nyojen žan: “Che Xancho ben' nono nombia'.” Na' ca' nac ben' chonxenle' sin cbi nombia'ine', che benan' chyixjue'eda' le'e.

²⁴ Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon beňachen' cont soe' len chio'.

²⁵ Bibi chyažje Diosen' gwnežjo beñačen' le', na' bibi gac yesone' yesaclene' le'. Diosen' cho'e yela' mban che yogo'lo' beñe', cho'e legaque' biš grasyw na' cho'e legaque' yogo' bi da' zjanape'.

²⁶ Diosen' bene' beñe' nechon', na' toz ca nac yogo' beñač xi'in diaža che'. Na' bsi'e xneze bat nita' to toe' na' ga yesenite'.

²⁷ Diosen' bnite' yogo' beñačen' lo yežlion' cont yeseyiljue' nacle yesone' yesombi'ene' na' yesonxene'ne'. Na' da' li Diosen' bi zoe' zito' len to to chio'.

²⁸ Le' chone' cont zoacho mbancho na' chdacho. Nac da' li can' gosena to čhope beñe' poeta chele ben' goso'e diža' xdan, gosene': "Naccho diaža che Diosen'."

²⁹ Na' dan' naccho diaža che Diosen' bi cheyala' goncho xbab nac Diosen' ca no l' gua'a lsaca' de oro, de plata o de yej. Chesaljaže' beñačen' chesone' da' ca'.

³⁰ Cani' Diosen' be'e latje goson beñačen' con ca gwna xbab čegaque' yela' cbi chejni' čegaque', perw na'a Diosen' chone' mandadw yogo'lo' beñe' že' doxen yežlion' yesebeyičje' da' malen' chesonen'.

³¹ Diosen' chačlaže' cuejyichjcho da' malen', le ba mbeje' Jesucriston' gone' yela' justis che yogo' beñač na' gwnežjue' castigw che yogo' beñe' cbi chesejnilaže' le', na' Diosen' zejzce' to licha dan' gone' ca'. Na' Diosen' ba nžie' bia' bat gone' yela' justis che beñač. Na' dan' bosban Diosen' Jesucriston' ladjo beñe' guaten', nezecho Jesucristwnan' gone' yela' justis che beñačen'.

³² Cate' beñe' Atenas ca' beyož gosende' gwna Pablon' yesyeban beñe' guat ca', ba'le' gosezi diže' le' na' yeba'le' gose'ene'.

—Na' gwzenagto' xtižon' yeto ža yoble.

³³ Can' goc beza' Pablon' latje gan' že' beñe' ca'.

³⁴ Perw ba' beñe' Atenas ca' gosaque' Pablon' txen na' gosonxene' Jesucriston'. Na' beñe' ca' gosaque' Pablon' txen len to beñe' byo le Dionisio na' yeto no'ole le Dámaris. Na' Dionisio' naque' txen len beñe' gwnabia' ca' ben' cheson yela' güexi'a gan' nzi' Areópagó.

18

Ca goc šlac zoa Pablon' Corinto

¹ Gwde goc da' ca', Pablon' beze'e ciuda Atenasen' na' gwyeje' ciuda gan' nzi' Corinto.

² Cate' bžine' Corinton' bežague' to beñe' Israel le' Aquila beñe' naque' beñe' distritw Ponto, na' len no'ol che' ben' le Priscila. Za' besyežingale' Corinton' zeya'aque' nación Italia, le rey Claudio, ben' chnabia' ca hora' doxen gan' mbane naciónna', bene' mandadw besyežaš yogo' beñe' Israel ca' že' ciuda Roma. Nach Pablon' gwyeje' jañe'e Aquilan' len Priscilan'.

³ Xšingaque' naquen chesone' yo'o de lache', na' toze ca nac xšin Pablon'. Nach bega'ane' gosonite' txen na' gosone' žinna' txen.

⁴ Na' yogo' ža che Dios Pablon' gwyeje' yodao' che beñe' Israel ca' jazejni'ide' legaque' che Jesucriston', cont ba' beñe' Israel len ba' beñe' bi zjanac beñe' Israel yesejnilaže'ne'.

⁵ Nach Silasen' len Timoteon' gwde gosa'aque' distritw Macedonian' besežine' gan' zoa Pablon', na' cana'č Pablon' bsane' xšinen' cont gota'č latje gwdixjue'ede' xtiža' Jesúsen' na' bzejni'ide' beñe' Israel ca' Jesucristwnan' naque' beñe' chesebeze' se'la' Diosen' yedenabi'e.

⁶ Perw beñe' Israel ca' beseže'e Pablon' na' bosožie' yela' ya' che'. Nach Pablon' gwšibe' xe'na' cont blo'e chbeyyichje' legaque', gwne':

—Bibi do'la' napa' dan' cuiayi'le to'li tocañe. Le'e naple do'la'. Na' na'a šjased šjalo'eda' beñe' ca' bi zjanac beñe' Israel.

⁷ Nach bechoje' lo' yodao'na' na' beze'e bežine' liž to beñe' le Justo. Justo na'na' zoe' chonxene' Diosen' na' liže' zoan cuit yodao'na'.

⁸ Na' to beñe' le' Crispo naque' beñe' gwnabia' che yodaon'. Na' Crispon' len yogo' beñe' lo' yo'o che' gosaque' txen chesejle'e che Xancho Jesucriston'. Na' yezan beñe' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis.

⁹ Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize.

¹⁰ Neda' zoa' len le' na' bi goña' latje no gone le' da' mal, le beñe' zan že' lo' ciuda nga beñe' chesonxene' neda'.

¹¹ Ca' goquen' bega'an Pablon' Corinton' tgüiz yogašje bsd blo'ede' legaque' xtiža' Diosen'.

¹² Na' ca tiempen' ben' le Galión naque' gobernador distritw gan' nzi' Acaya. Nach beñe' Israel ca' nita' ciuda Corinto beñe' cbi chesonxen Jesucriston' gosaque' toze gosone' contr Pablon'. Na' goseče'ene' jasesane'ne' gan' chon gobernadores' yela' justisen'.

¹³ Na' cate' besežine'na' gose'e gobernadores':

—Benga chde' chgo'oye'le' beñe' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zejen to li len ley chechon'.

¹⁴ Baçh zoa ñe Pablon' cate' gobernador Galiónna' gože' bene' Israel ca':
—Ca nac xya dan' chagwle nga, šaca' naquen to da' xinj o to da' malchgua, gonan' yela' justis.

¹⁵ Perw naquen che diža', na' che bene', na' che ley çhelen'. Da'nan' le gwye' nacle gonle. Bi co'o lo na' gona' yela' justis che dan' nac ca'.

¹⁶ Nach bešaše' legaque' gan' chone' yela' justisen'.

¹⁷ Nach bene' ca' bi zjanac bene' Israel gosenize' Sóstenes ben' ba nac bene' gwnabia' che yodaon', gosot goseyine' le' lao gobernador Galiónna', perw bena' bibi cuent bene' legaque'.

Pablon' beyeje' Antioquían' da' yoble

¹⁸ Na' bega' anch Pablon' ciuda Corinton' yezan ža beyož goc da' ca', na' cate' beze'ena' gože' bene' ca' chesonxen Jesucriston': "Nayežagcho", nach beze'e t xen len Priscilan' na' Aquilan'. Ja'aque' to yež da' nzi' Cencrea gan' bšib yichj Pablon' da' baçh beyož bene' to da' gwlo'o cho'e lao Diosen' gone'. Na' beyožen' Pablon', Aquilan' na' Priscilan' besyeyo'e lo' barcw da' zej nación Siria.

¹⁹ Na' cate' besyeyine' ciuda Efeson' besyechoje' lo' barcon', na' Priscilan' len Aquilan' besyega'ane' Efeson'. Na' Pablon' gwyeje' yodao' che bene' Israel ca' je'lene' bene' ca' ba zjandob' na' xtiža' Dios.

²⁰ Na' bene' ca' že' lo' yodaon' gosata'yoede' le' yega'anche' len legaque', perw bi goclaze'.

²¹ Nach gože' legaque':

—Nayežagcho, le chonen byen soa' lni dan' šo' ciuda Jerusalénna', perw güidchcza' dena'a le'e yeto še Diosen' gone' latje.

Nach beze'e ciuda Efeson' na' beyo'e lo' barcon' zeyeje'.

²² Cate' bežine' ciuda Cesarean' bechoje' lo' barcon' na' gwyeje' Jerusalénna' na' bguape' tiox bene' ca' chesedop chesežag chesonxene' Jesucriston'. Nach beze'e beyeje' ciuda Antioquían'.

²³ Gwde to tiemp zoe' Antioquían', nach gwze'e da' yoble gwyeje' to to yež dan' nita' distritw Galacia na' Frigia, bene' çhaçh laže' bene' ca' chesonxene' Jesucriston'.

Apolos gwduxje'ede' xtiža' Diosen' ciuda Efeson'

²⁴ Na' ca tiemp na' bžin to bene' Israel ciuda Efeson' bene' le Apolos. Naque' bene' ciuda Alejandria. Le' chac cho'e diža' güen lao yogo' bene', na' ba nsede' binlo doxen Xtiža' Diosen' dan' nyoj.

²⁵ Apolosen' chejle'e dan' bzejni' Juanna' che Xancho Jesúsen' na' nezde' can' bzoe' bene' nis caten' besyetinjde' xtola'gaquen'. Na' Apolosen' be'e diža' do yichj do laže' bzejni'ide' binlo che Jesúsen', la'czla' con dan' bsed blo'e da' Juan na'zen' nezde'.

²⁶ Nach Apolosen' gwzolao be'e diža' che Xancho Jesucriston' lo' yodao' che bene' Israel ca' sin cbi chaž chžebe'. Na' cate' Priscilan' na' Aquilan' gosende' can' chzejni'i Apolosen', legaque' gosebejže' le' na' bosozejni'ichde' le' che Jesucriston' da' ca' bina' nezde'.

²⁷ Gwdena' cate' Apolosen' bene' xbab šeje' distritw gan' nzi' Acaya, bene' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' bexue' che bene' ca' chesonxen Jesucriston' distritw Acaya cont bene' ca' bosolebe' le'. Na' Diosen' nzi'ilaže' bene' Acaya ca' na' ba goclene' zane' cont chesejnilaže' Xancho Jesucriston'. Na' cate' bžin Apolosen' Acayan' be'lene' legaque' diža' da' goclenchguan' legaque'.

²⁸ Bzejni'ide' yogo'lo' bene' gože'ne' clelen' cheson bene' Israel gualaž chen' bi chesejle'e che Jesúsen'. Bzejni'ide' legaque' can' nyoj Xtiža' Diosen' žan Jesúsen' naque' Cristo ben' chesebeze' yedenabi'e.

19

Šlac gwzoa Pablon' ciuda Efeson'

¹ Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' ba' bene' chesonxene' Jesucriston'.

² Na' gože' legaque':

—¿Zedesoa Spiritw che Diosen' lo' yichjlažda'olen' caten' gwzolao chejnilaže'le Jesucriston'?

Nach gose'e le':

—Bi nezeto' še zoa Spiritw che Diosen'.

³ Nach Pablon' goze'e legaque':

—¿Bi dižan' chejle'e da' gwzoale nisen' še ca'?

Nach gose'e le':

—Gwzoato' nis can' bzejni'i da' Juanna'.

⁴ Nach gož Pablon' legaque':

—Da' Juanna' bzoe' bene' nis cate' besyetinge xto'la'gaque' na' lecze gože' legaque' cheya'la' yesonxene' bena' za' se'la' Diosen'. Na' da' gwne' ca' be'e diža' che Jesucriston'.

⁵ Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejnilaže' Xancho Jesúsen'.

⁶ Nach Pablon' gwxo'a ne'ena' yichj to toe' na' Spiritw che Diosen' gwzoan lo' yichjlaždao' to toe', nach gosene' diža' da' cbi chesejni'ide' na' goseyixjue'ede' bi dan' gož Diosen' legaque'.

⁷ Na' yog'o' bene' ca' zjanac ca do šižine'.

⁸ Na' do šone bio' Pablon' bsd blo'ede' bene' ca' chesedop chesežag lo' yodao' che bene' Israel ca' dan' zoa Efeson'. Bi bžebe', na' bzejni'ide' legaque' na' gwneyoede' legaque' yeson cuingaque' lo' na' Diosen' cont nabi'e' legaque' len xbab chegaquen'.

⁹ Na' bchoj bal bene' güedenag bene' cbi chesejle'cze', na' lao bene' ca' že' yodao'na' gosene' diža' ya' che xtiža' Jesucriston' dan' chzejni'i Pablon'. Da'n'an' Pablon' bechoje' gan' že' bene' ca' na' bebeje' ben' ba chesonxene' Jesucriston' na' gwche'e' legaque' gan' zoa to yo'o' xen che to bene' le' Tiranno na' bzejni'ide' legaque' yog'o' ža.

¹⁰ Na' gwzoo Pablon' chop iz bzejni'ide' bene' ca', na' can' goc, yog'o' bene' že' distritw Asia gosende' xtiža' Xancho Jesúsen', bene' zjanac bene' Israel lente bene' bi zjanac bene' Israel.

¹¹ Na' Diosen' bchine' Pablon' cont bene' yela' guac da' besyebanchgüe bene'.

¹² Na' jasesane' no bay no lache' da' ba bchelen Pablon' gan' zjade bene' güe' na' la' chesyeyactede' bi yižgüe' chese'ede', na' bene' ca' yo'o' nyaz da' xigüe' yichjlažda'ogaque'na' lecze besyechojen.

¹³ Lecze chesaš bal bene' Israel chesyebeje' da' xigüe' da' zjajo'o' lo' yichjlaždao' bene' na' gosaclaže' yosochine' la Xancho Jesúsen' cont yesyebeje' da' xigüe' ca', nach gose'e' da' xigüen'.

—Len yela' chnabia' che Jesúsen' ben' choe' Pablon' xtiže'na' chonto' mandadw yechojle.

¹⁴ Na' zoa to bhoz gwnabia' che bene' Israel le' Eseva, na' nita' gaže xi'ine'. Na' bene' quingan' bosochine' la Jesúsen' gosaclaže' yesyebeje' da' xigüen'.

¹⁵ Nach goc to šlas chesone' ca' cate' to da' xigüen' boži'in xtižen', gožen legaque':

—Nombi'a Jesúsen' na' ba benda' diža' che Pablon', perw bi nombi'a le'e' cont šejli'a xtiža'len'.

¹⁶ Nach bena' yo'o' nyaz da' xigüen' bxite' gwnize' bene' ca' betlate' legaque' na' gwcheze' xalana'gaque'. Nach bosyoxonje' liž bena' ga'alyide' na' bedo chen zjanaque' dan' bene' legaque' zi'.

¹⁷ Na' goslas diža' can' goquen' gosenezete yog'o' bene' že' Efeson', bene' Israel lente bene' cbi zjanac bene' Israel. Nach yogüe' besežebe' na' gosache'ede' Xancho Jesúsen' naque' bene' zaque'.

¹⁸ Nach bene' zan ba chesejle'e' xtiža' Xancho Jesúsen', na' zane' gosexoadole' lao bene' ca' chesedop chesežag chesonxene' Jesucriston' cheso'e' diža' che da' malen' ba gosone'.

¹⁹ Na' bene' ca' gosac bene' guaža' na' bene' güene' ya'a' bosyotob libr chegaquen' na' gosoxen' bosozeyen' lao bene' lježe' bene' chesonxene' Jesucriston'. Na' besyebeje' cuent ca do gaca'te' zaca' libr ca' na' bžinen šiyon mil mechw plata, na' to to mechw plata ca' zacan' do tža žin.

²⁰ Can' goc, bene' zan gosende' xtiža' Xancho Jesucriston', na' gwyanch bene' bosozenague' che'.

²¹ Nach gwde goc da' ca' Pablon' bene' xbab yeyeje' Jerusalenna', na' goclaže' yedie' šjayne'e' bene' ca' že' yež gan' mbane distritw Macedonia len Acaya. Nach bene' xbab yeyož yeyeje' Jerusalenna' lecze cheya'la' šeje' ciuda Roma.

²² Na' gwleje' chope bene' chesonlene' le' xšin Diosen' na' gwsele' legaque' distritw Macedonian', zjale' Timoteo na' Erasto, perw na' le' bega'anche' distritw Asian' yeto chope ža.

Bene' ca' besegue'ede' Pablon' gosebecchgüe' da' zed ciuda Efeson'

²³ Na' gwche' to da' zed gual ciuda Efeson', le nita' bene' beseže'e' xtiža' Jesúsen' dan' bsd blo'e Pablon'.

²⁴ Quinga goc: gwzoo to bene' le' Demetrio bene' chon yodao' dao' de plata da' naquen' ca nac yodao' gan' zoa xonax Diana ben' chesonxene'. Na' bene' ca' gosonlene' žinna' gosonchgüe' gan, le gwda'ochguan.

²⁵ Nach btobe' bene' ca' goson žin txen len le' na' noche bene' goson žin dan' nac ca', na' gože' legaque':

—Nezele ca nac žin dan' nlancho choncho nga, chonlenchon gan xen.

²⁶ Na' ba beneczele na' ba ble'eczele can' chon to bene' le Pablo chsd chlo'ede' bene' lo' ciuda Efeso checho nga na' lecze chsd chlo'ede' zan bene' že' doxen distritw Asia nga, che'e' legaque' bibi zaca' l' gua'a' Isaca' da' cheson benachen' cont chesejnilažen'. Na' bene' zan ba chosozenague' che' na' chesebejyichje' dan' chejnilaže'cho.

²⁷ Le gonšč xbab nacle goncho, le xož yesene' che žin dan' choncho nga, na' gague lezen, san lecz xož yesone' cont yodao' che xonax Diana chechon' yega'anen ca to da' bibi zaca' na' len yela' chze na' yela' zaca' che xonaxen'. Na' nezele ca nac xonax Diana chechon', yogo' cze bene' distritw Asia nga na' bene' gate' tezechle chesonxene' le'.

²⁸ Beyoż gosende' xtiza' Demetron' beselocchgüe' na' bososye'e gosene':

—Leca bene' zaca' xonax Diana che chio' bene' Efeso.

²⁹ Nach gwche' da' zed doxen lo ciudan', na' gosaque' toze' jaseņize' chope bene' distritw Macedonia bene' gosaque' txen len Pablon', toe' le Gayo na' yetoe' Aristarco. Na' gosexobe' legaue' besežine' gan' chesedobe yogo' bene' lo ciudan'.

³⁰ Na' Pablon' goclaze' šo'e gan' zjandobe bene' ca' cont güe'lene' legaue' diža', perw bene' ca' chesonxene' Jesucriston' lo ciudan' bi goso'e latje šo'e.

³¹ Bał bene' zjanaque' bene' gwnabia' distritwna' zjanac xmigw Pablon' na' lecze gosesele' rson gose'e Pablon' bi šeje' gan' zjandobe bene' ca'.

³² Na' bene' ca' zjandoben' gosone' sšag juisyw. Gwde gwdele bososya'a to toe'. Na' bene' zan bi zjaņezde' bičen' zjandobe'na'.

³³ Bene' Israel ca' bosožigue' to bene' le Alejandro lao bene' ca' že'na' cont be'lene' legaue' diža', na' bosozejni'ide' le' bin' cheyla' ne'. Na' Alejandron' gwłis ne'e cont gwñabe' nite' šize yosozenague' diža' dan' güe'e laogaquen' gwzoe' rson che bene' ca' chesejnilaže' Jesucriston'.

³⁴ Perw cate' besele'ede' le' gosacbe'ede' lecze naque' bene' Israel, na' besyezolagüe' da' yoble bososye'e, gosene':

—Bene' zaca' juisyw xonax Diana che chio' bene' Efeso.

Ca do chop hor bososye'e ca' da' bi chesonxen bene' Israelen' xonax chegaquen'.

³⁵ Na' bene' güezoj chegaquen' caņe goc bebecžie' legaue'. Na' gože'ne':

—Le'e bene' gualaž, yogo' bene' že' doxen yežlion' zjaņezde' naquen checho gapši'icho yodao' che xonax Dianan'. Naque' bene' zaque', le l gua'a lsaca' chen' blažon' le'e yaba.

³⁶ Na' nono gac na' da' yoble. Da'nan' le soa šize na' bich gonje' da' bi zejen.

³⁷ Na' ca nac bene' quinga nche'ele nga, bibi na' yesebane' lo' yodao' checho ca' na' neca nacho chosožie' yela' ya' che xonax Diana chechon'.

³⁸ Na' Demetrio nga len yezica'chle bene' lježe', še chac bi chac chegaque' len bene' yoble, nita' bene' gwnabia' chechon' cont yesone' yela' justis chegaquen', con šja'aque' yeso'e legaue' part še ca'.

³⁹ Na' še bichle da' chñable gac, cheyla' goncho to yela' güexi'a cont choglaon.

⁴⁰ Perw ca nac žaš da' nga chac na'a, xož бага'cho choncho cont gobiern can' že'cho nga, na' bibi de ye'gacchone' še yesenabe' bixchen' goc žaš da' nga chac na'a.

⁴¹ Beyoż gože' legaue' ca' bene' mandadw besyežaše'.

20

Pablon' gwyejche' distritw Macedonia na' nación Grecia

¹ Nach cate' beyoż gwche'ži da' zeden', Pablon' goxe' bene' Efeso ca' chesonxen Jesucriston' cont ja'aque' gan' zoe'na' na' bene' chach laže'gaque' cont yesenite' yesejnilaže' Jesucriston'. Nach gože' legaue': "Nayežagcho", na' goseyela' lježe' na' beze'e beyeje' da' yoble distritw Macedonia.

² Na' gwdie' to to yež da' zjachi' gala'ze Macedonian' bene' chach laže' bene' ca' chesonxene' Jesucriston', na' beyožen' gwyejche' nación da' nzi' Grecia.

³ Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwņezde' zjachi'nao' bene' Israel ca' le'. Da'nan' bene' xbab yeza' ni'e yedie' gan' mbane distritw Macedonia na'le.

⁴⁻⁵ Na' xonj bene' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale bene' ca': Sópater, bene' yež Berea, na' Aristarco len Segundo bene' zjanac bene' ciuda Tesalónica, na' Gayo bene' yež Derbe, na' Timoteon' na' chope bene' za'ac distritw Asia, Tíquico len Trófimo.

⁶ Na' gwde ĩnin' cate' chesagüe' yetextil da' bibi levadura nchixen, neda' len Pablon' gwza'to' Filiposen' na' goc gayo' ža cate' bžinto' ciuda Troas gan' ba nita' bene' ca' chesebeze' neto', nach gwzoato' na'ze gaže ža.

Can' goc šlac zoa Pablon' Troas

⁷ Na' cate' bžin ža dmigw besedobe bene' ca' chesonxene' Jesucriston' lo ciuda Troasen' na' gwyejto' güe'ej gwdagwto' txen len legaue', na' Pablon' bzejni'ide' legaue' xtiza' Diosen'. Na' dan' ba zoa yeza' Pablon' ca gwęeze nach be'e diža' bžinte do chel.

⁸ Na' yogo'to' ndop nžagto' to lo' yo'o de šon cuia, yo'oto' lo' cuarten' dan' zoa yichjen cha'te, na' zjaze da' zan yi' lámpara.

⁹ Na' to bi' güego' lebe' Eutico žiabe' cho'a ventan. Na' Pablon' toŋ zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo' yo che'ele. Nach cate' besyecose'be' bi' guat besyecose'.

¹⁰ Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' beŋe' ca':

—Bi žeble, mbanczbe'.

¹¹ Nach Pablon' begüe' da' yoble na' gosagüe' na' bezolagüe' cheyo'e diža' len legaque'. Ne' choe'te' dižan' ca' cate' gwyeni'. Nach beze'e.

¹² Nach bi'na' blažo' cho'a ventanna', beŋe' ca' že'na' besyech'e'ebe' besyebchgüede' dan' mbanczbe'.

Gosa'aque' ciuda Troasen' na' ja'aque' ciuda Mileto

¹³⁻¹⁴ Nach bxi'ato' len Pablon' neto' bebialaoto' beyejo' lo' barcw bežinteto' ciuda gan' nzi' Asón na' Pablon' gwyazlaže'che' begüe'e nez bela'te' Asónna' cont gwyo'e lo' barcon' txen len neto'. Nach gwyejto' ciuda gan' nzi' Mitilene.

¹⁵ Bezsa'to' Mitilenen' na' beteyo bežinto' gała'ze to yežlio da' chi' lo' nesdaon' gan' nzi' Quo. Na' gwde yeto ža bežinto' gan' chi' yeto yežlio lo' nesdaon' da' nzi' Samos. Na' bechojto' lo' barcon' gwyejto' yež dan' nzi' Trogilio gan' bega'anto' tže' bezi'laže'to'. Nach beteyo bezyo'oto' lo' barcon' na' bežinto' ciuda Mileto.

¹⁶ Ca' bento' bi' gwdeto' ciuda Efeson', le Pablon' bi' goclaže' šede' yež ca' zjachi' do distritw Asian'. Chachyende' yob žine' Jerusalénna' še gała' soe' na' ža lni' dan' nzi' Pentecostés.

Pablon' bšajlene' bene' chosogüia chesene'e bene' ca' chesonxen Jesucriston' Efeson'

¹⁷ Na' šlac zoato' ciuda da' nzi' Mileto Pablon' goxe' beŋe' Efeson' beŋe' chosogüia chesene'e yezica'chle beŋe' ca' chesonxene' Jesucriston'.

¹⁸ Na' cate' besela'aque' Pablon' gože' legaque':

—Nezele can' bena' caten' gwzoo' distritw Asia gan' zoa lažlen', bena' da' güen šlac gwzoo' len le'e gwzolaotia' ža nechw žan' bžina' na'.

¹⁹ Gwzoo' bena' xšin Diosen' na' bi' benxen cuina'. Zan ni'a gwchežchgua' čhele. Na' da' zan da' bosochi' bososaca' beŋe' Israel ca' neda'.

²⁰ Bzejni'ida' le'e yogo' dan' byažje šejni'ile, neca bezi'laža', bzejni'ida' le'e do gan' chdop chžagle' na' len liž to tole.

²¹ Bzejni'ida' bene' zjanac bene' Israel gualaž chia' lente beŋe' cbi zjanac beŋe' Israel can' chaclaže' Diosen' yesyetiŋje xtoła'gaquen' na' yesejnilaže' Xancho Jesucriston'.

²² Na' na'a yeya'a Jerusalén, le Spiritw čhe Diosen' chonen byen yeya'a, na' bi' nezda' bin' gac chia' yežina' na'.

²³ Con nezda' to to yež gan' ba bedia' Spiritw čhe Diosen' ba bzejni'in neda' doła' gata' ližya na' gac bichle da' saca'zi'a.

²⁴ Perw bi' chi' yichja' čhe da' ca' saca'zi'a. La'czla' še yesote' neda' chzanda' yela' mban chia'. Toze da' chi' yichja' ša'lao gona' yogo' dan' gwlo' Xancho Jesucriston' lo' na' gona', na' soa' mbalaz lo' yichjlažda'oguan' šlac chonan', le Xancona' gwleje' neda' cont chyixjue'eda' diža' catequen' nži'ilaže' Diosen' beŋachen'.

²⁵ Ca' nac le'e, ba bzejni'ida' le'e čhe yela' chnabia' čhe Diosen', perw na'a ne tole bich le'ele neda'.

²⁶ Da'nan' chnia' le'e bibi doła' napa' še nole cuiayi'.

²⁷ Bač bzejni'ida' le'e yogo' dan' chaclaže' Diosen' nezele, bibi bcuaša'.

²⁸ Da'nan' cheyala' cuec yichje čhe yogo'lol dan' ba bzejni'ida' le'e na' lecze ca' le gwsed le gwlo'e yezica'chle beŋe' chesedop chesežag chesonxene' Xancho Jesucriston' cont yosozenague' čhe dan' ba bzejni'ida'. Le gon ca' le Spiritw čhe Diosen' ba gwlejen le'e cont gwzejni'ile yezica'chle beŋe' chesonxene'ne'. Jesucriston' bnežjw cuine' bedelaj xchene' beque'e xtoła'chon' cont bozoe' chio' binlo len Diosen' da' yoble.

²⁹ Nezda' cate' bich zoa' len le'e yesela'ac beŋe' yese'nde' yesexoayague' le'e cont cuejyichje bich gwzenagle čhe Jesucriston'.

³⁰ Ladjw le'e yesechoj beŋe' yososed yosolo'ede' diža' güenlaže' gualaz da' yososed yosolo'ede' diža' li. Yesone' ca' cont ga'ole dan' yososed yosolo'e legaque'.

³¹ Da'nan' le gwsaca' cont nono yesexoayag le'e. Na' le gon xbab, le šon izen' ba gwzoo' bzejni'ida' le'e na' gwŋeyoeda' le'e do ža do yel gwchežtia' čhele.

³² Na' na'a beŋe' migw, Diosen' gaclene' le'e na' xtiže'na' gwzejni'ichen can' chacde' le'e. Na' xtiže'na' gaclenen le'e cont šjayzoalenle Diosen' txen len yezica'chle beŋe' ba gwlej Diosen' zjanaque' lo' ne'e.

³³ Bi chzelaža' bi' da' de čhe beŋe', neca chzelaža' xmechwgaque' na' neca xagaque'.

³⁴ Nezczele can' bena' žin cont bžel da' byažjda' len da' beseyažje beŋe' ca' gosenite' len neda'.

³⁵ Na' bena' žinna' ca' cont blo'eda' le'e cheyała' gaclencho bene' še bi cheseyažjde'. Na' šjasa'laže'le can' gwna Xancho Jesúsen': "Mbalazech zoacho caten' chnežjwcho bi dan' chnežjwcho bene' clcl ca caten' chesoŋe' chio' bi dan' chesoŋe' chio'."

³⁶ Na' beyož be' Pablon' dižan' nach bzoa xiben' txen len yogo' bene' ca' na' bosol güiže' Diosen'.

³⁷ Na' yogo'lole' gosebeže' che Pablon' na' goseyele' le' na' bosonope' ne'ena'.

³⁸ Nach gosa'aque' len neto' bžinteto' gan' beyo'oto' lo' barcon'. Da' juisyw gosacde' dan' gože' legaque' bich yesele'ede' le'.

21

Pablon' beyeje' Jerusalén

¹ Beyož bze diža' lježto' len bene' ca' nach beyo'oto' lo' barcon' na' zjaydato' liča bžinteto' gan' chi' to yežlio lo' nisdaon' da' nzi' Cos, na' beteyon' bežinto' gan' chi' yeto yežlio lo' nisdaon' da' nzi' Rodas, nach beza'to' bežžinto' ciuda Pátara.

² Na' cate' bežinto' Pátaran' bželetu' yeto barcw dan' chzan' šejen distritw Fenicia, na' beyo'oto' lo'enna'.

³ Na' ba zjaydato' lo' barcon' cate' ble'eto' yežlio dan' chi' lo' nisdao' dan' nzi' Chipre, chin' šla'a rovesle. Nach bedeto' zjaydato' gan' mbane distritw Siria. Nach cate' bežžinto' ciuda gan' nzi' Tiro besyeletje' yoa' da' zonsa' barcon' na' neto' bechojto' lo' barcon'.

⁴ Na' jaydiljwto' bene' ca' chesonxene' Jesucriston' Tiron' na' bega'anlento' legaque' to xman. Na' Spiritw che Diosen' bzenen legaque' cont gosata'yoede' Pablon' bi šeje' ciuda Jerusalénna'.

⁵ Perw na' cate' ba gwde to xman beza'to', na' yogüe' len xi'ingaque' len xo'olgaque' gosa'aque' len neto' cho'a yežen' na' bzoa xibto' len legaque' bol güižto' Diosen' cho'a nisdaon'.

⁶ Beyožen' bze diža' lježto' na' gwdeła' lježto', nach beyo'oto' lo' barcon' na' legaque' besyeya'aque' zjaya'ac ližgaque'.

⁷ Na' beza'to' ciuda Tiron' bežinto' gan' že' ciuda Tolemaida. Nach beyetjto' lo' barcon' jayna'to' bene' ca' chesonxene' Jesucriston' lo' ciuda Tolemaidan' na' bega'anlento' legaque' tža.

⁸ Na' beteyo beza'lento' Pablon' na' bežinto' Cesarean' na' jayga'anto' liž Felipe ben' naque' txen len bene' ca' yexop ben' chesaclene' postlw ca' len žin bixjw da' gota'. Na' Felipen' zoateže' cho'e diža' che Jesucriston'.

⁹ Felipen' nita' tap xi'ine' no'ol güego' na' chosozende' bene' bi dan' ba gož Diosen' legaque'.

¹⁰ Zan ža ba gwzoato' liž Felipen' cate' bla' to bene' distritw Judean' bene' le Agabo, lecze chaque' chzende' bene' bi dan' ba gož Diosen' le'.

¹¹ Nach Agabon' gwŋabe' xpant Pablon' na' bchejen' ni'a ne'e, na' gože' neto':

—Spiritw che Diosen' ba bzenen neda' bene' Israel ca' že' Jerusalénna' yosocheje' ni'a na' ben' nac che' bant nga na' yesone' le' lo' na' bene' ca' bi zjanac bene' Israel.

¹² Cate' beyož beneto' can' gwna Agabon', neto' len bene' Cesarea ca' gota'yoeto' Pablon' bi šeje' Jerusalénna'.

¹³ Nach Pablon' gwne':

—Bi cuežle chia' o gonle ga soayaša'. Chzane cuina' yosocheje' neda' na' yesote' neda' Jerusalénna' dan' chyixjue'eda' xtiža' Xancho Jesúsen'.

¹⁴ Na' cate' goche'eto' bibi gac gonto' cont cbi šeje' ciuda Jerusalénna', nach bich bi gožto'ne', con gwnato':

—Gac con can' ža Xancon'.

¹⁵ Nach bsini'ato' beza'to' zjaydato' Jerusalén.

¹⁶ Na' to chope bene' Cesarean' bene' chesonxen Jesucriston' gosa'aque' txen len neto', na' goseche'e neto' liž to bene' le Mnason. Bena' ba goc šša chonxene' Jesucriston'. Naque' bene' Chipre, perw ba zoa liže' Jerusalénna'. Na' ba bosoxi'e soato' liže'na'.

Pablon' bežine' Jerusalénna' jane' Jacobon'

¹⁷ Na' cate' bežinto' ciuda Jerusalénna' bene' lježto' ca' že'na' besyebede' bosoguape' neto' tiox.

¹⁸ Na' beteyo gwejlento' Pablon' jana'to' Jacobon', na' bžinto'na' ba zjandop zjanžag yogo' bene' blao ben' chosogüia chesene'e yezica'chle bene' ca' chesonxene' Jesucriston' na'.

¹⁹ Nach Pablon' bguape' legaque' tiox na' beyožen' be'lene' legaque' diža' doxen can' ba ben Diosen', le zan bene' bi zjanac bene' Israel ba chesonxene' Jesucriston' gan' ba gweje' je'lene' legaque' xtiža' Diosen'.

²⁰ Na' cate' bosozenague' dan' gož Pablon' legaque', nach goso'e yeła' choxclen che Diosen' na' gose'e Pablon':

—Bene' migw, ñezdo' zan mil bene' Israel gualaž checho ca' ba chesonxene' Jesucriston' na' yogüe' chesacde' chonen byen goncho yogo' da' ca' zjanyoj le'e ley chechon' dan' bzoj Moisés.

²¹ Na' zane' ba zjanende' chsed chlo'edo' bene' Israel gualaž chechon' nita' laž bene' zito' bich cheyala' yesone' can' ža le'e ley chechon' na' bi yesezoa' xi'ingaque' ca' señw dan' že' circunciación.

²² ¿Nacxe ye'to' le'gaque'? le zane' yesežag nga cate' yesende' bačh zo' nga da' yoble.

²³ Güen goncho quinga: nita' tap bene' nga bene' zoa to da' zjango'o cho'en lao Diosen' na' chesaclaže' yesone' can' gosenen'.

²⁴ Na' cheyala' čhi'o le'gaque' yodao' blaon' na' gono'ne' txen čixjxo' beyixe' ca' gwnežjwle bxozen' gote' cont yexi' yeyachle can' ža leyna'. Na' yeyožen' gac yosošib yichjgaque' can' zjango'o cho'en. Gono' ca' len le'gaque' cont yogo' bene' yesacbe'ede' bi chzo' ley chechon' to šla'ale can' chesenen', san chono' can' žanna'.

²⁵ Na' ca' nac bene' ca' bi zjanac bene' Israel bene' ca' chesonxene' Jesucriston' yež yoble, ba bzojto' le'gaque' can' nac yela' güexi'a chechon', gožto'ne' bi yesagüe' yela' guagw dan' chesene' naquen che l' gua'a l'sacan' chesejnilaže' bene', na' bi yesagüe' chen, na' bi yesagüe' be chat chosošoque' l'ba'ba', lecze bi yesata'lene' no'ole bi nac xo'olgaque' o' bene' byo bi nac bene' čhegaque'.

Gosezene' Pablon' yodao' blaona'

²⁶ Beteyo gwza' Pablon' gwčhe'e bene' ca' tap cont yesyexi' yesyeyache' yodao' blaona' can' ža' ley čhegaque'na'. Nach Pablon' gwyo'e gana' zoa bxozen' gwdixjue'ede' le' bi ža yañen' yeyož yesaque' xi'laže' cont yosonežjue' beyixe' ca' gote' che to to le'gaque'.

²⁷ Bačh zoa gac gaže ža chesone' can' ža leyna' cont chesyexi' chesyeyache', nach gozej Pablon' lo' yodao' blaona'. Na' bał bene' Israel ca' za'ac distritw Asian' besele'ede' le' lo' yodaon' na' gosego'oyele' bene' že' do na' cont yesezene' Pablon'.

²⁸ Bososya'adie', gosene':

—Le'e bene' gualaž, le gon txen sencho benga. Chde' doxen chsed chlo'ede' contr yež Israel chechon', na' contr ley chechon' dan' bzoj da' Moisésen', na' contr yodao' checho nga. Na' na'a ba none' yeto da' mal juisyw contr yodao' dan' nac che Dios chechon', ba gwlo'e bene' bi zjanac bene' Israel lo'enna'.

²⁹ Gosene' ca' neče da' besele'ede' Pablon' lo' ciudan' chdalene' to bene' ciuda Efeso le' Trófimo, na' gosacde' še Pablonan' gwčhe'e le' lo' yodao'na', la'czla' bi bene' ca'.

³⁰ Na' gosončgüe' to žašyey. L'a' besedobte bene' zan cho'a yodaon' na' gos'o'e lo' yodaon' gosenize' Pablon', besyebeye' le' na' la' bosyoseyjwte' puert ca'.

³¹ Na' ba zoa yesote' le' cate' gwneze' ben' yo'o lo' ne'e soldadw che nación Roma ben' že' lo' ciudan'. Cate' gwnežde' ba chac to žašyey juisyw doxen ciudan',

³² nach btobe' soldadw ca' len bene' gwnabia' čhegaque' ca', na' gosa'aque' zja'acsese' gan' čhi' da' zeda'. Na' cate' bene' ca' chesote' Pablon' besele'ede' ba besežin soldadw ca' len bene' gwnabia' čhegaque' ca', la' gosebezte' bich goseyine' Pablon'.

³³ Cate' ben' yo'o lo' ne'e yogo' soldadon' bžine' gan' že' bene' ca', na' bene' mandadw gosoxe' soldadw che' ca' Pablon' na' bosocheje' le' čhope gden. Nach gwñabde' bene' ca' že'na' no nac Pablon' na' bi bene'.

³⁴ Na' bene' ca' že'na' bososya'adie', gwde gwdele chesena to toe'. Na' gwde čbi gwyejni'i ben' yo'o lo' ne'e soldadw ca' bin' chac catec sšag chesone', nach bene' mandadw gosečhe'e Pablon' cuartel.

³⁵⁻³⁶ Nach yogo' bene' ca' zjana'ogüe' le'gaque' chesosye'e zjambeque' to žaš juisyw. Na' cate' besežine' cho'a nepe' che cuartelen' goselen' soldadw ca' Pablon' neče dan' chesaclaže' bene' ca' yesenize' le', na' yogo' bene' ca' chesosye'e, chesene':

—Le gote'.

Pablon' be'lene' bene' zan ca' diža'

³⁷ Bačh cheso'e lo' cuartelen' cate' Pablon' gože' ben' yo'o lo' ne'e soldadw ca':

—¿Gono' latje gua' to čhope diža'?

Nach bena' gože'ne':

—¿Chaco' diža' griego?

³⁸ ¿Bi naco' bene' nación Egipto ben' gwda btob tap mil bene' güet bene' bat ngaze' na' gwčhe'e le'gaque' latje dašen' gan' chesone' contr gobiernen'?

³⁹ Nach Pablon' gože'ne':

—Gague benan' neda'. Neda' naca' to bene' Israel na' ciuda blao gan' mbane distritw Cilician' dan' nzi' Tarso nac laža'. Ben goclen beñ latje güe'lena' bene' quinga diža'.

⁴⁰ Nach bena' bnežjue' latje. Nach Pablon' gwzeche' lo nepen' bene' señw len ne'e cont bene' ca' ze'na' gosenite' šize bosozenague' che'. Nach gwzologüe' be'e diža' len legaque' diža' hebreo.

22

¹ Gože' legaque':

—Bene' gole len bene' xcuide', le gwzenag diža' dan' gua' laole nga.

² Na' cate' gosache'ede' chņe' legaque' diža' hebreo gosenite' šize. Nach Pablon' gože' legaque':

³ —Neda' naca' bene' Israel. Golja' ciuda Tarso gan' mbane distritw Cilicia, perw gwcha'ogua' ciuda Jerusalén ni. Na' bseda' len maestrw blao ben' le Gamaliel. Bzejni'ide' neda' doxen can' ža ley che da' xozxta'ocho ca'. Na' godca' chonchgua' can' chazlaže' Diosen', cayanen' chaque le'e za'acle nga na'a.

⁴ Na' bchi bsaca' zan bene' ca' chesejniłaze' Jesucriston', goclaža' gotto' legaque'. Na' gwxena' no bene' byo na' no no'ole chesonxene' le' na' gwche'egaca'ne' ližya.

⁵ Bxoz ben' naquech bene' blao na' nochle bene' gole blao ca' chesenabia' nación Israel chechon' zjanežde' can' bena'. Legaque' gosone' yiš dan' bexua' gwy'a ciuda Damascon' gan' godca' sena' baltez bene' chesonxen Jesucriston' cont che'egaca'ne' Jerusalén ni par gonto'ne' castigw.

Pablon' cho'e diža' can' goc che' cate' Diosen' bocobe' yichjlažda'ogüe'
(Hch. 9:1-19; 26:12-18)

⁶ Na' šlac zya'a ciuda Damascon' ca do guagwbiž cate' to be'ni' gual da' za' yaba gwyechjen neda'.

⁷ Na' gwbiža' lo yon' benda' to bene' gože' neda': "Saulo, Saulo žbixchen' chchi chsaco' neda'?"

⁸ Nach boži'a xtižen', goša'ne': "žNo le' bene'?" Nach gwne': "Nedan' Jesús bene' Nazaret na' neda' chchi chsaco'."

⁹ Bene' ca' zya'alena'na' besežebchgüe' besele'ede' be'nin', perw bi gosejni'ide' dan' gož Jesúsen' neda'.

¹⁰ Nach goša'ne': "žBin' cheyała' gona' Xana'?" Nach Xana' Jesúsen' gwne': "Beyas na' gwyetjeze ciuda Damascon', na' cate' žino'na' to bene' ye'e le' dan' cheyała' gono'."

¹¹ Na' gwčoła' catec gwna'chgua' be'nin', nach bene' ca' zya'alena' txen gosoxe'de' taca' cont bžinto' Damascon'.

¹² Na' to bene' le Ananías zoe' ciuda Damascon' ben' chonxene' Diosen' do yichj do laže' na' chzenague' che yogo' ley dan' bzoj Moisésen'. Na' yogo'loł bene' gualaž checho ca' ze'na' cheso'e xtiža' Ananiasen' naque' bene' chon da' güen.

¹³ Ananíasna' bide' gan' zosan' na' cate' ble'e nach gože' neda': "Saulo, bele'e." Na' beyož gwne' ca' la' bele'eteda' na' ble'eda' le'.

¹⁴ Nach gože' neda': "Dios ben' chonxencho na' ben' benxen da' xozxta'ocho ca', len' ba gwleje' le' cana'te cont neždo' can' chaclaže' gono', na' ba ble'edo' Xi'ine' ben' nac la'zelagüe' bene' chon da' güen, na' ba bendo' xtiže'."

¹⁵ Nachen' go'o xtižen' len bene' zan bene' že' lo yežlion' gwzejni'igacdo'ne' da' ca' ba bendo' na' ba ble'edo'."

¹⁶ Na' lecz gož Ananíasen' neda': "žBičhen' cuezo'? Yo'o so' nis. Na' nabdo' Xancho Jesucriston' cont yeya'yeyibe' yichjlažda'oguoñ' len da' malen'." Can' gože' neda'.

Diosen' gwleje' Pablon' cont be'e xtižen' len bene' ca' bi zjanaque' bene' Israel

¹⁷ Na' gwdena' beyeda' ciuda Jerusalén ni na' gwy'a'a lo' yodao' blaon' jel güiža' Diosen', na' šlac choł güiža'ne' ble'edagüeda' Xancho Jesucriston'.

¹⁸ Na' Xanchon' gože' neda': "Bi šedo' chojo' ciuda Jerusalén ni, le bi yosozenag bene' quinga xtižo' dan' go'o čian'."

¹⁹ Nach goša'ne': "Xana', legaque' zjanežde' neda' gwy'a'a to to yodao' jet jatina' bene' ca' chesonxene' le' na' bseyjwgaca'ne' ližya.

²⁰ Na' lecz naca' bene' ca' txen cate' gosote' Esteban ben' be' xtižon', na' neda' gwna'a xadon che bene' ca' gosot le'."

²¹ Nach Xancho Jesucriston' gože' neda': "Bchoj na' seła' le' zito' go'o xtižan' len bene' ca' bi zjanac bene' Israel."

Pablon' len ben' yo'o lo ne'e soldadw ca'

²² Bene' ca' zjandoben', nga zelao bosozenague' xtiža' Pablon', beseže'e da' be'e diža' che bene' zito' bene' bi zjanac bene' Israel, nach gosezologüe' chososye'e, chesene':

—Le got bona'. Bich cheyała' bane'.

²³ Bososya'adie' na' beselocchgüe' bosozała' xagaque' ca'ale na' gosaše' bište yon' bosozalen' lo be'.

²⁴ Cate' ble'e ben' yo'o lo ne'e soldadw ca' can' chesonen' nach bene' mandadw gosego'o soldadw ca' Pablon' lo' cuartelen' na' yeseyine'ne' cont güe'e diža' bi da' malen' ba bene'. Goclaze' nezde' bichen' bene' lo' ciudan' chososya'adie' che'.

²⁵ Na' ba zjančeje' Pablon' cont yeseyine' le' cate' gože' to soldadw ben' zena' bene' chnabi'e lao to gayoa soldadw:

—Can' ža ley, bi de Isens chinle neda' sin cbi nezele še bin' nona', le neda' naca' bene' nación Roma.

²⁶ Beyož gože' bene' gwnabia' che soldadon' ca' la' gwyejte ben' lao ben' yo'o lo ne'e yogo' soldadw ca', ježe'ne':

—Gwsaco' bin' gondo' ben' ba bdolan', le naque' bene' nación Roma.

²⁷ Nach ben' yo'o lo ne'e soldadw ca' gwyeje' lao Pablon' gože'ne':

—Gwna neda' žle bene' nación Roma le'?

Nach Pablon' gože'ne':

—Bene' nación Roma neda'.

²⁸ Nach ben' yo'o lo ne'e yogo' soldadw ca' gože' Pablon':

—Mechw xen gwxaqueda' cont naca' cuent len bene' nación Roman'.

Nach Pablon' gože'ne':

—Neda' golja' naca' bene' nación Roma.

²⁹ Nach bene' ca' ba nita' cont yeseyine' Pablon' la' besyecuaste' cuiten', na' ben' yo'o lo ne'e yogo' soldadw ca' lecz bžebe' dan' ba bčeje' Pablon' cont yeseyine'ne'.

Gosele' Pablon' gan' chosoxi'a bene' ca' chesenabia' Israelen'

³⁰ Nach beteyo ben' yo'o lo ne'e soldadw ca' gwseže' gdena' nchej Pablon'. Na' bene' mandadw besedobe bžoz gwnabia' ca' len yogo' bene' gole blao ca' chesenabia' nación Israelen' cont nezde' bi dan' chosocuiše' Pablon'. Na' cate' ba besedobe bene' ca' nach gwleje' Pablon' na' gwsele' le' gwzeche' laogaquen'.

23

¹ Nach Pablon' gwne'e bene' gole blao ca' chesenabia' nación Israelen' na' gože' legaque':

—Bene' migw, ža na'aža nezda' lo' lažda'ogua' ba bena' can' chazlaže' Diosen'.

² Nach Ananías ben' nacch bžoz blao bene' mandadw len bene' ca' zjaze cuit Pablon' yesebaže' cho'ena'.

³ Na' Pablon' gože'ne':

—Diosen' gone' le' castigw, bene' güexoayag! Chi'o nga cont gono' yela' justis chia' can' ža ley chechon' na' chono' contr ley beno' mandadw yesebaže' choa'.

⁴ Bene' ca' že' gała'ze gose'e Pablon':

—Bi cheyała' yoži'o xtižen' ca', le naque' bžoz blao che Dios.

⁵ Nach Pablon' boži'en gwne':

—Bene' migw, bi gwnezda' še benga bžoz blaon'. Nezda' Xtiža' Diosen' dan' nyojen žan: “Bi yoži'ile diža' zi' len bene' gwnabia' chelen'.”

⁶ Pablon' gocbe'ede' bene' ca' chesenabia' nación Israelen' zjanaque' chople. Bałe' chesejle'e can' chsed chlo'e bene' ca' zjansi'e saduceo na' yebałe' can' chsed chlo'e bene' ca' zjansi'e fariseo. Nach Pablon' gože' bene' ca' že'na':

—Bene' migw, naca' bene' fariseo, na' naca' xi'in bene' fariseo. Na' zoa' nga chonle yela' justis chia' neče chejli'a yesyeban bene' guat ca'.

⁷ Beyož gwne' ca' bene' fariseo ca' len bene' saduceo ca' ben' zjandop zjanžag na' gosezolagüe' chosošaše', na' besechoje' chople.

⁸ Le bene' saduceo ca' chesene' bi yesyeban bene' guat ca' na' bi chesejle'e nita' angl o nochle spiritw yoble. Na' bene' fariseo ca' chesejle'e yesyeban bene' guat ca' na' chesejle'e nita' angl na' nita' nochle spiritw.

⁹ Yogo' ben' že'na' chesosye'e chosošaše'. Nach to chope bene' zjansed ley dan' bžoj Moisésen', ben' zjanac bene' fariseo, gosezože'e gosone' Pablon' txen, gosene':

—Bibi da' mal non benga. Še no spiritw o no angl ba gwnele' le', bi cheyała' goncho contr le', le contr Diosen' goncho še ca'.

¹⁰ Leca gwche' to žaš chen na' ben' yo'o lo ne'e yogo' soldadw ca' bžebe' še yosozoxj yosotine' Pablon'. Nach bene' mandadw besežin soldadw che' ca' cont jasyeleje' Pablon' ladjo bene' ca' na' besyeče'ene' cuartelen' da' yoble.

¹¹ Nach že' beteyon' Xancho Jesucriston' bžine' gan' de Pablon' na' gože'ne':

—Bi žebo' Pablo. Can' ba bi'o xtižan' Jerusalén ni, lecz ca' cheyała' go'o xtižan' ciuda Roma.

Bosoxi'e yesote' Pablon'

¹² Na' beteyo bał bene' Israel besedobe' na' bosoxi'e yesote' Pablon'. Na' gosechogbi'en, gosene':

— Diosen' gone' chio' castigw še ye'ej gagwcho sin cbiņa' gotcho Pablon'.

¹³ Nde čhoa bene' bosoxi'e yesote' Pablon'.

¹⁴ Nach ja'aque' gan' že' bχoz gwnabia' ca' len bene' gole bene' blao ca' chesenabia' nación Israelen' na' gose'e legaque':

— Bač gwčhogbia'to' gon Diosen' neto' castigw še ye'ej gagwto' sin cbiņa' gotto' Pablon'.

¹⁵ Na' le yotobe lježle le gon yela' güexi'a gwxe cont nabele ben' yo'o lo ne'e yogo' soldadw ca' cueje' Pablon' yide' laolen', gwde'ele za' yeyiljwyožechle bi da' xinj ba none'na'. Na' neto' cue'na'oto'ne' tnez gotto'ne' cate' za' le'e gan' nita'len'.

¹⁶ Na' zoa to bi' byo bi' nac xi'in bene' zan Pablon' na' lebe' benebe' da'na' chesacde' yesonde' le'. Na' gwyejbe' cuartelen' jazenebe' Pablon'.

¹⁷ Nach Pablon' goxe' to bene' chnabi'e to gayoa soldadw na' gože'ne':

— Ben goclen gwče' bi' nga lao bene' gwnabia' chelen'. De to da' ye'be' le'.

¹⁸ Bene' gwnabia' che soldadon' gwče'e bi'na' lao ben' yo'o lo ne'e yogo' soldadw ca' na' gože' le':

— Pablo ben' de ližya goxe' neda' na' gwñabe' goclen lagua' cont zedesana' bi' nga laguon', že' de to da' ye'be' le'.

¹⁹ Nach ben' yo'o lo ne'e yogo' soldadw ca' beχue' na'be' gwče'ebe' to šla'ale gwñabde'be':

— ¿Bi che'ndo' nao' neda'?

²⁰ Nach bi'na' gožbe' le':

— Bene' blao che bene' Israel gualaž čheto' ca' ba bosoxi'e yesenabe' cuejo' Pablon' gwxe na' yosode'ede' selo'ne' gana' chesežag bene' gwnabia' čhegaquen' cont yeseyiljwyože' bi da' xinj non Pablon'.

²¹ Perw bi' šejli'o čhegaque'. Nde čhoa bene' ca' yesebe'na'ogüe' Pablon' tnez cont yesote' le' na' ba gosechogbi'en bibi yese'ej yesagüe' šlac biņa' yesote'ne'. Na' ba chesebeze' gwzenago' čhegaque' cont cuejo' Pablon'.

²² Nach ben' yo'o lo ne'e soldadon' bose'e bi'na' na' gože'be':

— Gwsaco' bi go'o diža' che rsonņa' ba bedesano' lagua' nga.

Gosesele' Pablon' lao gobernador ben' le Félix

²³ Nach ben' yo'o lo ne'e yogo' soldadw ca' goxe' chope bene' gwnabia' ben' chesenabia' to gayoa güeje soldadw na' bene' mandadw yososiņa'a čhegaque' cont šja'aque' ciuda Cesarea do cheda ga šeže'le na' yeseche'e čhop gayoa soldadw bene' yesa'ac ni'aze na' gayonši bene' yesebia cabayw na' yečhop gayoa soldadw bene' yesože' lanza.

²⁴ Lecze gože' legaque' čhyažje cabayw be cuia Pablon', le le'na' yeseče'e gana' zoa gubernadore' ben' le Félix, na' yesape' Pablon' cont bibi gac che' tnez.

²⁵ Nach bzoje' to cart che gubernadore' da' bgože' legaque', žan:

²⁶ “Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiox.

²⁷ Bene' Israel ca' ba gosezene' benga na' ba bosoxi'e yesote'ne', perw cate' gwñezda' naque' bene' nación Roma, gwy'a'a len soldadw chia' ca' jasla'ne' lo na'gaquen'.

²⁸ Na' cont nežda' bičhen' chosocuiše' le', gwčhi'ane' gan' chosoxi'a bene' gwnabia' che nación Israelen'.

²⁹ Nach gwñezda' chosocuiše' le' che bize da' chesac che' len ley čhegaque'na', na' bi načo bi da' mal ba none' cont yesote' le' o cont gate' ližya.

³⁰ Perw na' ba gwñezda' ba bosoxi'a bene' Israel ca' yesote' le', da'nan' la' chsel'a'tia'ne' laguo' le' na' lecze bena' mandadw len bene' ca' chosocuiš le' šja'aque' laguo' na' yesene' bin' chesac čhegaque' len le'. Si'xenšco' yogo' da' quinga čhneyoeda' le'. Claudio Lisias.”

³¹ Nach soldadw ca' gosone' can' ben bene' gwnabia' čhegaquen' mandadw, besyebeje' Pablon' na' šeže'le gosegüe'e nez len le' besežine' yež da' nzi' Antipatris.

³² Na' cate' gwyeni' besyebi'i soldadw ca' ja'ac ni'aze' jaya'aque' cuartelen' na' bene' ca' gosebia cabayon' ja'ac'lene' Pablon'.

³³ Na' cate' besežine' ciuda Cesarean' bosonežjue' gubernadore' carten' zjanože'na' na' lecž gosone' Pablon' lo ne'e.

³⁴ Na' gubernadore' cate' beyož blabe' carten' gwñabde' Pablon' ga bene' naque'. Na' cate' gwñezde' naque' bene' distritw Cilicia,

³⁵ nach gože'ne':

— Gwzenaga' bin' nao' cate' yesela'ac bene' ca' chosocuiš le'.

Nach bene' mandadw bososeyju'e Pablon' lo' yo'o gan' chbe' rey Herodesen' cate' chone' yela' justis.

24

Pablon' be'e diža' lao gobernador Félix

¹ Cate' bačh goc gayo' ža zoa Pablon' ciuda Cesarean', nach bžin Ananías ben' nac bžoz blaoch che bene' Israelen' na' nčhe'e to čhope bene' gole blaoc čhegaque' na' len to bene' le Tértulo ben' chac chne' lao bene' gwnabia'. Na' ja'aque' lao gobernadore' gosagüe' xya če Pablon'.

² Na' cate' jasexi'e Pablon', Tértulon' gwdagüe' xya če', gože' gobernador Félixen':

—Si'xeno', señor gobernador, za'to' laguo' nga. Binlo juisyw zoa nación chechon' na' da' zan da' šagüe' ba chac da' chnabi'o neto'.

³ Gate'tez zoato' žato' choxcleno' can' chono'na', señor gobernador, catec chbeto' can' chnabi'ona'.

⁴ Na' cont bi goneto' le' bichle zed, chata'yoeda' le' gwzenago' šlož dao' dan' zedenato' na'a.

⁵ Ben' ba goxo' laguo' nga, nezeto' naque' to bene' chbecchgua da' zed. Chde' doxen yežlion' chone' cont neto' bene' Israel chacto' čhople. Na' naque' bene' blaoc len bene' ca' chesene' bene' nazareno lagüe chesejnilaže' Jesús ben' nac bene' yež Nazaret.

⁶ Na' goclaže' gone' da' mal juisyw lo' yodao' čheton' na' da'nan' gwzento'ne' cont čhogbia'to' če' con can' ža ley čheton'.

⁷ Perw na' gwyaz Lisiasen' ben' nac bene' gwnabia' če soldadw ca' na' beque'ene' lo' na'ton'.

⁸ Na' gože' neto' cheyała' yidto' laguo' nga cont gwcuisto'ne'. Guac ņabdo' Pablon' cuino' cont nezdo' nac da' li can' chcuisto'ne' nga.

⁹ Nach bene' Israel ca' za'aclene' Tértulon' gosaque' toze len le' gosene' le can' naquen.

¹⁰ Nach gobernadore' bene' señw len Pablon' cont ne', na' Pablon' gwzolažüe' gwne':

—Nežda' ba goc zan iz chono' yela' justis če nación ni, na' da'nan' chbeda' gwzoo' rson čhian' laguon'.

¹¹ Na'a chac šižinw ža gwyaa' Jerusalénna' jenxena' Diosen'. Na' guac ņabdo' bene' ca' besele'e neda' še leca' naquen.

¹² Bi nacho besele'ede' chacyoža' len no bene' lo' yodao' blaon' ne lo' yodao' yoble o gate'teze lo' ciudan'.

¹³ Na' bibi gac yeson bene' quinga cont yosolo'e napa' doła' ca dan' chosocuiše' neda'.

¹⁴ Bi gwcuaša' diža', da' li chonxena' Diosen' ben' gosonxen da' xoxxta'oto' ca', la'czla' chonxena'ne' can' cheson bene' ca' zjanao' da' cobe dan' bi chesazlaže' bene' quinga, na' chejli'a če yogo'loł Xtiža' Diosen' dan' nyoj le'e ley čheton' na' da' ca' bosozoj bene' ca' gosole' xtiža' Diosen' cani'.

¹⁵ Na' zoa' lez yosban Diosen' bene' ca' ba gosat, bene' güen lente bene' mal. Lencze bene' gualaž čhia' can' nite' lez gon Diosen' ca'.

¹⁶ Da'nan' zoa' čhi' yichja' chona' can' chaclaže' Diosen' neče nezda' lo' yichjlažda'ogua' bibi doła' napa' lao Diosen' ne lao benačhen'.

¹⁷ 'Ba goc zan iz zoa' zito' na' za' bela'a Jerusalénna' na'a cont bnežjua' mechw da' btoba' da' gaclenen bene' yaše' ca', na' lecz ca' jasana' yelaten' lo' yodao' blaon'.

¹⁸ Ca' goquen' zoa' lo' yodao' blaon' ba bexi beyacha' can' cheyała' gacto' cont chnežjwto' bi dan' chnežjwto' lao Diosen', cate' to čhope bene' Israel za'ac Asia besele'e gan' zoa'na'. Na' bi nacho mbeca' žaš, neca ndop nžaga' bene' zan.

¹⁹ Na' bene' ca' za'ac distritw Asian' cheyała' yesid cuine' yosocuiše' neda' laguo' nga še bi da' mal chesacde' chona'.

²⁰ Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'.

²¹ Še toz dan' bi chesazlaže' dan' goše'gaca'ne' caten' zjandob bene' ca' chesenabia', gwnia': "Ca nac yela' justis čhia' dan' chonle na'aža, chonlen dan' chejli'a gwžin ža yesyeban bene' ca' ba gosat."

²² Gobernador Félixen' ba nezde' can' chosozejni' bene' ca' ba chesejle' če Jesucriston', na' cate' bende' can' gwna Pablon', bich goclaže' gone' yela' justis če' ca hora', gwne':

—Cate' yid Lisiasen' ben' nac bene' gwnabia' če soldadw ca', cana' yeyož gwzenaga' can' nac dan' chagwle xya nga.

²³ Nach bene' mandadw beče' xan soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jasena' bene' migw čhen' le' jasesane' bi dan' byažjde'.

²⁴ Nach beza' gobernador Félixen' ciuda Cesarean', perw cate' gwde to čhope ža bežine' da' yoble nčhe'e no'ol če' ben' le Drusila. Na' Drusilan' naque' no'ole Israel. Nach gobernadore' bene' mandadw gosaxe' Pablon' da' yoble na' bzenague' be' Pablon' diža' gwne' yogo'loł bene' cheyała' yesejnilaže' Jesucriston'.

²⁵ Nach Pablon' be'lenche' le' diža' can' cheyała' gaccho beņe' güen lao Diosen', na' can' gwsaca'cho cont bi goncho da' mal, na' lecze be'lene' le' diža' can' gon Diosen' cate' žin ža gone' justis che yogo' beņach na' gwnežjue' castigw che yogo' beņe' bi chesejnilaže' le'. Na' gobernador Félixen' bžebe' na' gože' Pablon':

—Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

²⁶ Gobernadores' goncde' še gwnežjo Pablon' le' mechw cont yosane' le'. Da'nan' goxe' Pablon' güeltze be'lene' le' diža'.

²⁷ Ca' chac gwde chop iz nach yeto beņe' yoble beņe' le Porcio Festo gwdie' blane' xlatje'. Na' Félixen' goclaže' yega'aņe' binlo len beņe' Israelen' cate' ba bechoje' gobernador, da'nan' bene' mandadw bega'aņ Pablon' ližyan'.

25

Pablon' bzoa rson che' lao gobernador Feston'

¹ Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gwyeye' Jerusalénna'.

² Nach bžoz gwnabia' ca' len nochle beņe' blao che beņe' Israel ca' ja'aque' jasene'e le' cont bosocuiše' Pablon'.

³ Na' gosata'yoede' Feston' gone' mandadw šjasesane' Pablon' Jerusalén. Gosata'yoede' le' gone' ca' le gosaclaže' yesebe'na'ogüe' Pablon' cont yesote'ne' tnez.

⁴ Na' gobernador Feston' boži'e xtiža'gaque', gwne':

—Yega'aņche' Cesarean' gan' die' ližyan' le' neda' bich chžeda' ša'a na'.

⁵ Na' le cuej no beņe' gwnabia' chele seła'le legaque' len neda' cont yosocuiše' le' lagua' gan' gona' yela' justis še bi da' xinj ba none'.

⁶ Nach gwzoa gobernadores' len legaque' Jerusalénna' do xono' o do ši ža na' gwdena' beze'e beyeje' Cesarean'. Na' beteyo gwchi'e gan' chone' yela' justisen' na' bene' mandadw gwyej Pablon' lagüen'.

⁷ Nach cate' bžin Pablon' lagüen' ba nita' beņe' Israel ca' za'ac Jerusalénna' na' la' gosechjte' le' na' gosezolagüe' bosocuiše' le' chesene' da' zan da' mal juisyw ba bene', perw bi blo'elaon še diža' li cheso'e.

⁸ Nach Pablon' bzoa rson che', gwne':

—Bibi doła' napa' len ley che neto' beņe' Israel ne len yodao' blao cheton' na' ne len rey César ben' chnabia' doxen nación Roman'.

⁹ Na' Feston' goclaže' yega'aņe' binlo len beņe' Israel ca', da'nan' gože' Pablon':

—ŽBi che'ndo' sao' Jerusalén gona' yela' justis chion' na'le che yogo' da' ca' chosocuiš beņe' quinga le'?

¹⁰ Nach Pablon' gwne':

—Rey César en' ba nzoe' le' cont gono' yela' justis, na' cheyała' gac yela' justis chia' laguo' nga. Ca nac beņe' Israel quinga, le' nezczedo' bibi da' xinj na' gona' len legaque'.

¹¹ Šaca' ba gwdapa' doła' o bichle da' ba bena' da' cheyała' gata', bi žia' bi gata'. Perw bibi nona' ca nac dan' chosocuiše' neda' nga, na' nono zaca' gwde neda' laogaque'na'. Da'nan' chnaba' tia' lao rey César en' cont gone' yela' justis chian'.

¹² Nach Feston' bene' yela' giüxi'a len beņe' gwnabia' che' ca' bi yesone' len Pablon' nach gože'ne':

—Ba gwñabo' tio' lao rey César na' lagüe' nan' šejo'.

Gobernador Feston' bdie' Pablon' lao rey Agripan'

¹³ Na' cate' ba gwde yeto chope ža, rey Agripa len no'ol che' ben' le Berenice besežine' Cesarean' bedeseguape' Feston' tiox.

¹⁴ Na' cate' gwneze gobernador Feston' nite' yezan ža, nach be'lene' rey Agripan' diža' che Pablon', gože'ne':

—Zoa to beņe' nyixjw Félixen' ližya nga cate' bechoje'.

¹⁵ Na' cate' gwya'a Jerusalénna' bžoz gwnabia' ca' na' nochle beņe' blao che beņe' Israel ca' gosenabe' choglaguan' cont gaque' castigw.

¹⁶ Perw na' goše'gaca'ne' bi de costumbr che chio' beņe' nación Roma gwdecho beņe' yesaque' castigw še bi yesyedilagüen' len beņe' ca' chosocuiš le' cont yosozoa rson chegaque'.

¹⁷ Nach cate' besela'aque' nga beteyo la' gwche'tia' gan' chona' yela' justis na' bena' mandadw gosebeje' Pablon'.

¹⁸ Na' cate' bosocuiš beņe' ca' le', ne toz da' mal dan' chacda' yosobague'de' le' bibi gosene'.

¹⁹ Dan' chac chegaque', bi chejnilaže' Pablon' can' chesejnilaže' legaque', na' cheso'e diža' che to beņe' ba got, beņe' le Jesús, na' Pablon' že' mbancze'.

²⁰ Cate' bich bi bežellaža' gona' ca dan' chesac čhegaquen' na' goša' Pablon' še chaclaže' yodia'ne' Jerusalén cont gac yela' justis čhen' che da' ca' chosobague'de' le'.

²¹ Nach Pablon' gwnabe' šeje' gone' yela' justis che' lao rey César Augusto, na' bena' mandadw beyeyjue' šlac gac gwdia'ne' lao rey Césaren'.

²² Nach rey Agripan' gože' Feston':

—Chaclaža' gwzenaga' can' choe' ben' dižan'.

Nach Feston' gože' le':

—Gwxe gwzenago' che' šeca'.

²³ Nach beteyo gosacxenchgua rey Agripan' len Berenice cate' goso'e gana' chi' gobernadoren', na' lecz zjachi' bene' ca' chesenabia' soldadw ca' na' yogo' no bene' blao čhe ciudad'. Na' gwdena' Feston' bene' mandadw jasexi'e Pablon'.

²⁴ Na' Feston' gwne':

—Rey Agripa, na' len yogo' le'e že'le nga len neto', ca nac benga ze laole nga, yogo' bene' Israel bene' že' Jerusalén len bene' že' Cesarea nga ba gose'e neda' benga naque' bene' mal na' yogo'cze' chesene' bi cheyala' bane'.

²⁵ Na' ba gwnabyoža' na' gota'bia' bibi none' da' zaca' choglaguan' che' gate'. Na' ba gwnabe' tie' lao rey César gone' yela' justis che', na' ba gwcheba' gwdia'ne' ciuda Roma na' ale gan' zoa rey Césaren'.

²⁶ Na' chacžejaža', le bibi chežellaža' gwzoja' reyen' yapa'ne' bin' none'. Da'nan' bach gwleja'ne' laole nga, na' chbechgüeda' chbeja'ne' laguo' le' rey Agripa, cont yeyož gwzenagcho che' na' gata' bi da' gwzoja'.

²⁷ Chacda' bi naquen to liča sel'a'ne' Roman' sin chi gwzoja' še bin' none'.

26

Pablon' bzo'e' rson che' lao rey Agripan'

¹ Nach rey Agripan' gože' Pablon': —Guac nao' bi da' gaclenen le'.

Nach Pablon' gwlis ne'en lao bene' ca' gwzologüe' bzoa rson čhen', gwne':

² —Chbechgüeda' rey Agripa, ba gosone' latje gua' diža' laguo' nga na'a ca nac dan' chosocuiš bene' Israel gualaž checho ca' neda'.

³ Le' nombi'o costumbr che chio' bene' Israel na' nezdo' can' chesacyož bene' gualaž checho ca' legače'. Da'nan' chata'yoeda' le' gapšco' yela' chxenlaže' gwzenago' čhia' nga.

Quinga ben Pablon' cate' bi'na' šejnilaže' Criston'

⁴ 'Yogo' bene' Israel gualaž čhechon' zjanezde' can' ba gwzoa' chonxena' Diosen' cate' ne' nactia' bidao', caten' gwzoa' laža' lente caten' gwzoa' ciuda Jerusalén.

⁵ Na' še chese'nde' yeso'e diža', leče zjanezde' goca' txen len bene' ca' zjansi'e fariseo cate' nactia' bi' xcuide' na' bene' fariseo ca' chesonche' yogolo' costumbr gole can' nyoj ley čhechon' clel can' cheson yezica'ch bene' Israel gualaž checho ca'.

⁶ Na' legaque' chesagüe' xya čhia' neče chejli'a gwžin ža cate' Diosen' yosbane' bene' guat ca' can' gože' da' xoxxta'ocho ca'. Neče da'nan' zoa' nga na'aža' cont gac yela' justis čhian'.

⁷ Bene' zan lo šižinw cue' chio' bene' Israel nite' chesebeze' batcan' yosban Diosen' bene' ca' ba gosat, can' že' gone'. Da'nan' chesonxene' le' do ža do yel. Lecz neda' zoa' lez gac ca', na' da'nan' ba' bene' Israel gualaž čhechon' chosocuiše' neda' nga rey Agripa.

⁸ Na' le'e čhi'le chzenagle čhia', žbixčhen' chaquele nono šejle' dan' yosban Diosen' bene' ca' ba gosat?

Cana' Pablon' bgue'ede' bene' chesejnilaže' Criston'

⁹ 'Cana' neda' goda' cheyala' gue'eda' bene' ca' chesonxen' Jesús ben' nac bene' Nazaret, na' da' zan benchgua' contr legaque'.

¹⁰ Bene' zan bene' chesejle' che Jesús'en' Jerusalénna' gwduxjua' ližya, gwdapa' yiš dan' bosozoj bxož gwnabia' ca' cho'en diža' napa' yela' gwnabia' cont gona' ca'. Na' cate' gosechoglagüe' yesote' no bene' ca', goca' toze can' bosoxi'e yesone'.

¹¹ Na' zan las gwya'a to to yodao' jasaca' legaque' cont yesebeyičhje' bich yesonxene' Jesús'en'. Na' catec bgue'eda' legaque' gwya'a yež zito' jalagšiba' legaque'.

Da' yoble Pablon' cho'e diža' can' goc che' cate' Diosen' bocobe' yichjlažda'ogüe'

(Hch. 9:1-19; 22:6-16)

¹² 'Can' goc to ža cate' zya'a ciuda Damascon', noxa' yiš che bxož gwnabia' ca' dan' žan gwčhi gwsaca' bene' ca' chesonxene' Jesús'en'.

¹³ Ca do guagwbiž zya'a ngua'a nezen' señor rey, cate'cze ble'eda' to be'ni' juisyw da' za' le'e yaba, chseni'čhen ca gwbižen', na' gwyechjen neda' len bene' ca' zya'alena' txen.

¹⁴ Na' yogo'to' gwbiḡto' lo yon', na' neda' benda' to bene' chne' diža' hebreo gwne': "Saulo, Saulo ḡbix'chen' chḡhi chsaco' neda'? Dan' chondo' neda', chone zi' cuino' ca chon to go'n be chlibe lo ya dan' zoa lao carroš cheban'."

¹⁵ Nach boḡ güiža'ne', goža'ne': "¿No le' bene'?" Nach Xana' Jesúsen' boži'en, gwne': "Neda' Jesús na' neda' chḡhi chsaco'."

¹⁶ Beyas, le baḡ blo'elagua' le' na' ba gwleja' le' gono' xšina' na' go'o diža' che da' nga ba ble'edo' na' che bichle dan' za' le'edo' da' za' gwlo'eda' le'.

¹⁷ Na' na'a seḡa' le' gan' že' bene' ca' bi zjanac bene' Israel. Na' bi goḡa' latje no got le', ne bene' Israel gualaž chio' ca' na' ne bene' bi zjanac bene' Israel.

¹⁸ Chseḡa' le' gan' že' bene' bi zjanac bene' Israel na' gwzejni'ido'ne' cont yesebejyichje' da' malen' zjanone' na' yesone' da' güen. Chaclaža' yesyechoje' lo na' Satanás dan' chnabia' da' xigüe' ca' na' yosozenague' che Diosen' cont nitlao xtola'gaque', na' lecz checlaža' yesaque' t xen len nochle bene' chesejnilaže' neda' bene' ba zjanac lo na' Diosen'."

Pablon' bsd blo'ede' bene' xtiža' Criston'

¹⁹ 'Ca' goc chia' rey Agripa, bzenaga' ca dan' gož Jesúsen' neda' zoe' yaban' caten' ble'edagüeda'ne' tnez.

²⁰ Zgua'tec jazejni'ida' bene' ca' že' ciuda Damasco xtiže'na' na' gwdechle jazejni'ida' bene' ca' že' Jerusalénna' len bene' že' doxen distritw Judean', goše'gaca'ne' cheyala' yesebejyichje' xtola'gaque' na' yosozenague' che Diosen' na' yesone' da' güen cont gacbia' ba gosebejyichje' da' malen'. Can' bzejni'ida' bene' Israel gualaž checho ca' lente bene' ca' bi zjanac bene' Israel.

²¹ Na' neche dan' chona' ca', bene' gualaž checho bene' chesegue'ede' neda' gosezene' neda' yodao' blaon' na' gosaclaže' yesote' neda'.

²² Perw na' Diosen' zoe' chaclene' neda', na' da'nana' zoacza' cho'a xtižen' ža na'aža len yogo'lolle že'le nga, le'e nacle bene' blao lente le'e bi nacle bene' blao. Bi nacho bichle chzejni'ida' bene' da' bi bzoj da' Moisésen' len yezica'chle ben' goso'e xtiža' Diosen' cani'.

²³ Gosene' Criston' ben' za' seḡa' Diosen' saca'zi'e na' gate' na' gaque' bene' nechw yebane' ladjo bene' guat ca'. Na' lecz gosene' le'na' gwzende' bene' Israel len bene' bi zjanac bene' Israel can' cheyala' yesone' cont šo' be'ni' che' lo' yichjilažda'ogaque'.

Pablon' goclaže' šejnilaže' rey Agripan' Jesucriston'

²⁴ Ca' cho'e dižan' cate'cze gobernador Feston' gwne' zižje gože'ne':

—ḡChactonton' Pablo! Dan' ba bsdteco' nan' baḡ chactonto'.

²⁵ Nach Pablon' gože' gubernadore'n:

—Bi chactontar' señor gobernador, san diža' lin' cho'a, diža' da' zaca' gwzenago'.

²⁶ Na' rey Agripa nga nomb'e da' quinga choa' diža' chen, da'nana' bi chžeba' choa' diža' lagüe' nga. Nežda' chache'ede' choa' diža' li, le dan' goc che Jesúsen' bi nacho goquen bagaše'ze.

²⁷ Le' rey Agripa, ¿chejli'o da' ca' bosozoj bene' ca' goso'e xtiža' Diosen' cani'? Nežda' chejli'on.

²⁸ Nach rey Agripan' gože' Pablon':

—¿Chacdo' bedao' co'oyelo' neda' cont šejnilaža' Jesucriston'?

²⁹ Nach Pablon' gože'ne':

—Chnaba' lao Diosen' žin ža cate' le' len yezica'chle bene' že' nga šejnilaže'le Jesucriston' can' chejnilaža'ne', še yob o še ne' chžach, perw cbi gata'le ližya can' dia' neda'.

³⁰ Beyož gwna Pablon' ca' bezoža' rey Agripan' len no'ol chen' Berenice, na' len gobernador Feston' na' len bene' ca' gosebe' len legaque'.

³¹ Nach cate' ba besyeyo'e ga yoble, rey Agripan' na' gobernador Feston' gose' lježe':

—Bi nacho ba non benga da' zaca' gate' o da' zaca' chixjwchone' ližya.

³² Nach rey Agripan' gože' Feston':

—Šaca' bi gwḡnabe' tie' lao rey Césaren' cont gac yela' justis che'na' guac yosan'chone'.

27

Gosesele' Pablon' ciuda Roman'

¹ Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo na' to xan soldadw bene' le Julio. Na' Julion' naque' t xen len soldadw ca' ben' zjansi'e Batallón che Augusto. Na' neda' Lucas gwzoa' len Pablon'.

² Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beža'to' ciuda Cesarean'. Na' za'len Aristarcon' neto'. Naque' bene' ciuda Tesalónica dan' chi' distritw Macedonia.

³Nach ža beteyo bžinto' ciuda da' nzi' Sidón. Na' xan soldadw ben' le' Julio bencze' güen len Pablon', be'e latje gwyeye' gan' že' bene' migw che' ca' cont bosonežjue' le' bi dan' byažjde'.

⁴Na' cate' bechojto' ciuda Sidónna' beza'to' bedeto' gala'ze gan' nla' yežlio dan' chi' lo' nisdao' dan' nzi' Chipre. Chečhjchgua be' clele ca horen', na' yežliona' bcue'ejen neto' len be'na'.

⁵Na' beyož gwdeto' lo nisdao' dan' de gala'ze gan' zjambane distritw Cilicia na' distritw Panfilia, nach bžinto' ciuda dan' nzi' Mira dan' chi' gan' mbane distritw Licia.

⁶Na' ciuda Miran' xan soldadon' bželde' yeto barcw da' za' ciuda Alejandria da' za' šej distritw Italia, na' bene' mandadw gwyo'oto' lo'en txen len Pablon'.

⁷Nach gwza'to' zejto' lo nisen' da' yoble. Zan ža zejto' šolaže', cane bžinto' gwdeto' ciuda gan' nzi' Gnido. Na' dan' ne' chečhj ben' clele gan' zejton', da'n'an' bi goc šejto' licha, nach gwca'ato' zejto' chcue'ej cuinto' len yelate' yežlio dan' nga'an lo' nisdao' dan' nzi' Creta, gan' bitec gwyechj be', na' gwdeto' gala'ze gan' zoa to ya'a da' nzi' Salmón.

⁸Na' zejto' gala'ze ga zoa yo biž chcue'ej cuinto', cane bžinto' gan' nzi' Buenos Puertos gala'ze yež dan' nzi' Lasea.

⁹Goc zan ža zejto' ca' na' bačh chžebto' šjažiyai' cuinto' lo' nisdao', le ba bžin tiemp zag cate' chečhjchgua be'. Nach Pablon' gwneyoede' bene' ca' yesebeze' na'ze.

¹⁰Gože' legaque':

—Le'e bene' le'e chsa'le barcon', ba chacbe'eda' can' zejcho nga cane chac chzan', xož cuiyai' barcon' len yoa' chelen', na' lente chio' yo'ochio lo' barcon' xož cuiyai'cho.

¹¹Nach xan soldadw ca' bzenagche' che xan barcon' na' che ben' chsa' len clal ca che Pablon'.

¹²Le bi nac latje güen cho'a nisdao' gan' zoaton' ga'anto' tiemp zaguen', na' gwyan bene' ca' gosacde' cheyala' sa'to' šejto' še gonen žinto' Fenice gana' soato' šlac te da' zaguen'. Fenice naquen to yež ga chac cho'o barcw gan' mbane Creta na' bi chactec zag, le šla'ale nla' ga chla' gwbiž na' šla'ale ga chxa gwbiž.

To be' gual gwyechjen lo nisdao'

¹³Cate' gwzolao chečhj to be' goł dan' za' che'elle na' bene' ca' chososa' barcon' gosacde' guac šja'acche' gan' gosaclaže', nach gozsa'to' zejto' lo nisen' da' yoble to lcue'ej che Cretan'.

¹⁴Gague goc sša cate' ba chac to be' gual da' nzi' Noreste chečhjchguan clele gan' zej barcon'.

¹⁵Na' chžiga'chguan barcon'. Bibi goc yesone' cont šejchto'. Na' btoblaže'to' gwžiga' ben' barcon' len neto' con can' chečhjenna'.

¹⁶Nach bžinto' to lcue'ej yežlio da' nga'an lo' nisen' dan' nzi' Claudia, gan' bitec chečhj be'. Na' barcw cha'o gan' yo'oton' nxoben to barcw dao' da' chon žin choslan bene' cate' chac bi da' chac che barcw xenna'. Na' cane goc bocueto' barcw daon' lo' da' cha'ona'.

¹⁷Beyoža' bčejto' barcw cha'ona' do gual cont gwlo'oto' fuers čhen. Na' besežebe' gaga' barcon' to latje gan' nac yox da'na' nzi'in Sirte, nach bosoletje' lache' xen dan' chonen cont chžiga' ben' barcon'. Nach con zejto' lo nisen' con gan' gwyej barcon'.

¹⁸Beteyo ba chož nisen' lo' barcon' da' chečhjchgua ben', nach gosešaše' yoa' dan' nsa' barcon' gwzolao bosozala'šazen' lo' nisen'.

¹⁹Na' ža gwyone goclento' legaque' bzala'to' xšinlaz barcon' lo' nisen'.

²⁰Zan ža bi blo'elao gwbižen' na' šeže'le bibi beljw ble'eto', do ža do yel goc yejw na' gwyechj be', na' bich gwzoato' lez yelato'.

²¹Bačh goc sša bi chagwto', nach Pablon' gože' bene' ca':

—Le'e bene', chac quinga dan' bi bzenagle chia' caten' gwnia' le'e bi sa'cho Cretan', na' dan' bi bzenagle chia', ba gwžiyai' yoa' che barcon' len xšinlazen.

²²Perw na'a bi soayaše'le, ne tole cbi cuiyai' yela' mban čele, san barcw ngazen' cuiyai'.

²³Neda' chonxena' Diosen' na' ba ben' cuina' lo ne'e, na' le' ba gwsele' to angl bene' blo'elagüe' neda' nže'e.

²⁴Nach angla' gože' neda' diža' nga: "Bi žebo' Pablo. Cheyala' žino' lao rey César ben' chi' ciuda Roma, na' da'n'an' yelao', bibi gac chio', na' lez yosla Diosen' yogo' bene' ca' že' lo' barcon'."

²⁵Na' dan' gwna anglen' ca', bene', le yebe. Nezda' Diosen' gone' gac dołoł can' gož anglen' neda'.

²⁶Da' gac checho yecho'onen chio' yo biž da' nga'an late' lo' nisen'.

²⁷Na' cate' ba goc žta'gwbiž zejto' lo nisen' nžiga' ben' neto' nile nale lo nisdao' dan' nzi' Adria, nach ca do chel bene' ca' zjansa' barcon' gosache'ede' ba zejto' gala'ze yo biž.

²⁸Nach beseletje' to plom lo' nisen' cont bosochixe' ca do gaca'te' sitjw nac nisen'. Beyož bosochixen'na' gosenezde' goquen šino'tchoa metr. Nach goseždie' yelate' na' bosochixen' da' yoble na' ca horen' goquen gažechoa metr.

²⁹ Na' besežebe' šjati'i barcon' vej lo' nisen', nach beseletje' tap ya xen dan' že' ancla, bosochjen' xan barcon' cont gosoxen' len, na' do chesežebze' chesebeze' batcan' šeni'.

³⁰ Nach bene' ca' zjansa' barcon' gosaclače' yosyoxonje'. Besyeletje' barcw dao' dan' ncuca' xina' barcon', con bosode'ede' yeseletje' ancla ca' dan' ncuca' lagüen'.

³¹ Nach Pablon' bol güiže' xan soldadw ca', gože'ne':

—Še bene' quinga bi yesyega'ane' lo' barcw nga, bi yelacho.

³² Nach soldadw ca' gosechogue' don' zjanca' barcw daon' bososanen' lo' nisa'.

³³ Do šbal Pablon' gwzolaog wwnyoeede' yesagw bene' ca' že' lo' barcon', gože' legaque':

—Ba chac žta'gwbiž zoale bi chtasle na' bi che'ej chagwle.

³⁴ Chata'yoeda' le'e le gagw cont soale binlo, le ne tole ca cuiayi'.

³⁵ Beyož gwne' ca' beḡue' to yetextil, be'e yela' choxcen che Diosen' lao yogo' neto' že'to' lo' barcon' na' gwxi'e to pedasen' gwdagüen'.

³⁶ Nach yogo'to' bebeto' na' lec gwzolaoto' gwdagwto'.

³⁷ Chop gayoa gayonšino'to' nacto' že'to' lo' barcon'.

³⁸ Na' beyož gwdagwto' ca beljeto', nach trigon' da' ne' nga'añch lo' barcon', gosebejen' bosozalen' lo' nisaon' cont barcon' bich goctequen ži'.

Goxj barcon'

³⁹ Cate' gwyeni' bi zjanomb'e yežlion' gan' besežinen', perw besele'ede' de to latje ga žia nisen' šize na' cho'enna' nac laše' lo' yox. Nach gosaque' toze gosaclače' yesone' cont žin barcon' šjačhen' laše' lo' yoxen'.

⁴⁰ Na' gosechogue' do che ancla ca', gosebejychjen' lo' nisen'. Lecze goseseže' do dan' bosochje' yag dan' chsa' barcon' liča na' godelise' lache' dan' zoa yičhj barcon' cont bžiga' ben' len, nach zja'aque' cho'a yo bižen'.

⁴¹ Na' gosedi'e ga chedił nisaon' len yeto da' yoble, na' jačhaz lagüe barcon' lo' yoxen', bich goc tan. Na' nisen' gwzolaog bzoxyen barcon' catec fuers nsan'.

⁴² Nach soldadw ca' gosaclače' yesote' pres ca' cont bi yeseyele' nisen' na' yosyoxonje'.

⁴³ Perw xan soldadw ca' goclače' yosle' Pablon', da'nana' bžone' yeson soldadw ca' can' chesačlače' yesonen'. Bene' mandadw len pres ca' še noe' chac chyela' nisen' zgua'tec legaque' yesexite' lo' nisen' cont yesyechoje' yo biž.

⁴⁴ Na' bene' mandadw bene' ca' bi chac yeseyela' nis yosochine' no yagla' o bichle xšinlaz barcon' cont yesyežine' lo' yo. Na' can' gosone' na' yogüe' besyežine' lo' yo bižen'.

28

Dan' goc che Pablon' šlac zoe' Malta

¹ Cate' bechojto' lo' nisaon' bžinto' yo bižen', bene' ca' že'na' gose'e neto' ba bžinto' gan' nzi' Malta, naquen to yež dan' chi' to lo' yežlio da' nga'nen lo' nisaon'.

² Na' bene' ca' že'na' gosaque' bene' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacchgua zag.

³ Nach Pablon' btobe' xonj xis bcue'en lo' yin', cate' bchoj to bel be nac venen lo' xis ca' gwdi'inba' ne'e gola'ditban'.

⁴ Na' besele'e bene' Malta ca' nała'dit bel'en na' Pablon', na' gose' lježe':

—Benga naclje' bene' güet bene'. Da'nana' la'czla' bele' lo' nisen', Diosen' bi güe'e latje banche'.

⁵ Nach Pablon' con gwžib ne'ena' lo' yin' na' bexope bel'en, na' bibi gocde'.

⁶ Yogo' bene' ca' chesebeze' batcan' solao gata' ne'en yi' o batca' gate'. Gosebeze' šša na' besele'ede' bibi gocde'. Nach gosone' xbab yoble, gosene' naque' to bene' šejnilaže'cho.

⁷ Na' bene' gwnabia' che doxen Malta le' Publio na' yežlio che' zjaden gała'ze latje gan' bžinton', na' blebe' neto', gwzoato' ližen' šone ža.

⁸ Na' xa Pablon' chacšenchgüede' yo'e da' la na' che'ede' yiž chen. Nach Pablon' gwyo'e gan' de'na' bol güiže' Diosen', nach gwxo'a ne'en yičhj bene' güen' na' beyaque'.

⁹ Beyožen' jasexi'e yezica'chle bene' lagüe yeža' bene' chese'ede' yižgüe' na' gwnabde' Diosen' yeyone' legaque', na' lecze besyeyaque'.

¹⁰ Na' da' zan da' güen goson bene' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

Pablon' bžine' ciuda Roman'

¹¹ Bega'anto' Malta šon bio', nach gwza'to' zejto' lo' nisen' yo'oto' to lo' barcw da' za' ciuda Alejandria da' gwlezen latjen' šlac gwde da' zaguen'. Na' mben le'e barcon' l' gua'a lšaca' che bene' ca' le' Cástor na' Pólux.

¹² Na' bžinto' ciuda dan' nzi' Siracusa gan' bega'anto' šone ža.

¹³ Nga gozza'to' cont bžinto' yež da' nzi' Regio. Na' bega'anto' tža. Nach gwzolao chechj be' dan' za' che'elje, na' beza'to' da' yoble beteyo bežžinto' ciuda da' nzi' Puteoli na' bechojto' lo' barcon'.

¹⁴ Nga bežagto' bene' lježto' chesonxene' Jesucriston' Puteoli na' gosenabe' gwzoato' len legaque' to xman. Na' gwdena' gwza' ni'ato' zejto' Roman'.

¹⁵ Na' cate' za' žinto' ciuda Roman' gosenaze bene' lježto' že' Roman' ba zoa žinto', na' bale' bedeseleze' neto' latje gan' nzi' šone Tiend na' yebale' lagüe ya'a dan' nzi' Che Apio. Cate' ble'e Pablon' legaque' be'e yela' choxclen che Diosen' na' gwbede' lo' yichjlažda'ogüe'.

¹⁶ Na' cate' bžinto' Roman', xan soldadw ca' bene' yezica'chle pres ca' lo' na' bene' gwnabia' che soldadw ca' nita' na', perw be'e latje gwzoa Pablon' toze' ga yoble na' con gwzoa to soldadw gwdape' le'.

Pablon' be'e xtiža' Jesucriston' Roman'

¹⁷ Beyon ža bžinto', Pablon' goxe' bene' blao che bene' Israel ca' že' ciuda Roman'. Na' cate' beyož besedobe'na' gože' legaque':

—Bene' migw, bene' gualaž checho ca' že' ciuda Jerusalén gosezene' neda' gosone' neda' lo' na' bene' gwnabia' che nación Roman', la'czla' bibi bena' contr bene' gualaž ca' na' ne contr costumbr che da' xoxzta'ochon'.

¹⁸ Nach bene' gwnabia' che nación Roman' gosenabyože' na' gosaclaže' yososane' neda' cate' gosache'ede' bibi nona' da' zaca' yesote'nda'.

¹⁹ Nach bene' gualaž ca' že' Jerusalénna' bosozoncze' yososane' neda'. Da'n'an' gwñaba' tia' lao rey Césaren' cont gac yela' justis chia'. Perw bi nacho gagua' xya che bene' gualaž checho da' gosonde' neda' ca'.

²⁰ Da'n'an' zoa' nga bač goxa' le'e cont le'eda' le'e na' güe'lena' le'e diža'. Na' ncheja' gden ni neče dan' zoa' lez yosban Diosen' bene' ca' ba gosat, cacze zan chio' bene' Israel zoacho lez.

²¹ Nach bene' ca' gose'ene':

—Bibi cart na' la' laoto' nga dan' za' distritw Judean' da' bosozoj bene' Jerusalén ca' güen' diža' še bin' chac len le', na' nono bene' gualaž na' la' bene' ne mal chio'.

²² Perw chaclaže'to' yeneto' go'o diža' che dan' chejli'o che Jesús'en, le nezeto' doxen chesene' che le'e chejle'le che'.

²³ Na' bosozie' bia' to ža cont šjasene'e le' da' yoble, na' cate' bžin žan' bene' zan ja'aque' gan' zoen'. Nach Pablon' be'lene' legaque' diža' do ža. Be'e diža' che dan' cheyala' gwzenagcho che Diosen' ben' chnabia' doxen, na' bzejni'ide' legaque' da' ca' zjanyoj le'e ley dan' bzoj Moisésen' na' len dan' bosozoj yezica'chle bene' goso'e xtiža' Diosen' can' che Jesucriston', cont yesejle'e che'.

²⁴ Na' bal' bene' ca' gosejle'e xtižen' da' be'e na' yebale' bi gosejle'en'.

²⁵ Dan' bi gosone' toz ca' yesone' xbab, gwzolao besyeya'aque'. Nach Pablon' gože' legaque': —Dan' gož Spiritw che Diosen' da' Isaiasen' dan' bzoje' che da' xoxzta'ocho ca' naquen da' li, žan:

²⁶ Gwyej gož bene' gualaž chio' ca' xtižan':

Da' li yenele, perw na' bitw šejni'ile bi zeje dan' yenelen'.

Na' da' li le'ele, perw bi gache'ele bi zejen dan' le'elen'.

²⁷ Nacle bene' güedenag na' bač natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjle xtoła'le cont yeca'an na' yocoba' yichjlažda'olen'.

²⁸ Che'nda' nezele ba gwzolaon na'a Diosen' chsele' bene' cheseyixjue'ede' xtižen' len bene' bi zjanac bene' Israel cont yosozenague' che' na' gata' yela' mban chegaque' toli' tocanē.

²⁹ Beyož gwna Pablon' ca', bene' Israel ca' besyežaše' chesacyožchgüe' che dan' gwnen'.

³⁰ Na' čop iz nya' gwzoa Pablon' ciuda Roman' to yo'o ga chyixjue', na' blebe' yogo'lol bene' jaseñe'e le'.

³¹ Na' bzejni'ide' legaque' Diosen' chnabi'e doxen, na' lecz bzejni'ide' che Xancho Jesucriston'. Nono bžon gwzejni'ide' bene', na' be'e xtiža' Diosen' con can' goclaže'.

CART DAN' BZOJ POSTLW SAN PABLO ĆHE BEÑE' CA' ŽE' ROMA

¹ Neda' Pablo chzoja' le'e. Chona' bite'tez dan' ža Xancho Jesucriston'. Diosen' gwleje' neda' cont naca' postlw che', na' gwsele' neda' cont chyixjue'eda' diža' güen che'.

² Diosen' ba gwzolağüe' bzende' beñačen' diža' güen che', bene' cont gwnita' bene' goso'e xtižen' cani' na' bozozojen'.

³ Na' diža' güen che Diosen' chzejni'in chio' che Xi'ine' Xancho Jesucriston'. Len' golje' benač lo diaža che da' rey David.

⁴ Na' Spiritw che Diosen' blo'en Xancho Jesucriston' naque' dogualje Xi'in Dios na' nape' yela' guac, le Jesucriston' bebane' ladjo bene' guat ca'.

⁵ Na' neto', da' chejnilaže'to' Xancho Jesucriston', Diosen' bene' da' güenchgua len neto', le gwleje' neto' na' gwsele' neto' chyixjue'eto' xtižen'. Na' gwsele' neto' chyixjue'eton' cont šanch bene' yesejnilaže'ne' na' yosozenague' che'. Na' Xancho Jesucriston' soe' blaoch cate' bene' že' yogo' nación yosozenague' che Diosen'.

⁶ Can' naquen, Diosen' ba gwleje' le'e cont nacle lo na' Jesucriston'.

⁷ Chzoja' da' nga par yogo' le'e že'le Roman' le'e ba mbej Diosen' cont nacle lo ne'e. Diosen' chacde' le'e. Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'olen'.

Pablon' goclaže' šjane'e bene' ca' chesejnilaže' Jesucriston' ciuda Roma

⁸ Zgua'tec ni'a le'e Jesucriston' zoe' chaclene' neda' cont choa' yela' choxclen che Diosen' par yogo' le'e, le bene' ca' že' doxen lo yežlion' cheso'e diža' can' chejnilaže'le Criston'.

⁹ Nezcze Diosen' yogo' ni'a cate' chol güiža'ne' chnaba' gaclene' le'e. Naque' ben' chejnilaža' do yichj do laža' na' chona' xšinen' choa' diža' güen che Xi'ine' Jesucriston'.

¹⁰ Chnaba' lao Diosen' gone' latje yedena'a le'e še ca' chnalaže' gona', le ba chac šša zelaža' yida'.

¹¹ Chaclaža' yedena'a le'e na' gwzejni'ichda' le'e cont soachačhle šejnilaže'le Diosen'.

¹² Na' le'e len neda' soacho gončačhlaže' lježcho dan' chejnilaže'cho Jesucriston'.

¹³ Bene' migw, che'nda' nezele zan ni'a ba goclaža' yida' yedena'a le'e, perw bina' gac yedena'a le'e. Chaclaža' yida' gona' xšin Diosen' gan zoale cont šanle gwzenagle che Jesucriston' ca ba goc yeziča'chle yež ga ba gwya'a.

¹⁴ Nezda' cheyala' gua' diža' güen che Jesucriston' len yogo'lol bene', bene' že' ciudan', na' bene' že' yiže', na' bene' chesac let'r na' bene' cbi chesac let'r.

¹⁵ Da'n'an' che'nchğüeda' gua' xtižen' len le'e že'le Roman' can' ba bian' ga yoble.

Diža' güen che Jesucriston' nsan'yela' guac che Diosen'

¹⁶ Bi cheto'eda' gua' diža' güen che Jesucriston', le xtižen' nsan'yela' guac che Diosen' cont bene' chesejle' čhen gata'yela' mban čhegaque' toli tocaņe. Nsan'yela' guac len neto' bene' Israel, na' lecze len le'e bi nacle bene' Israel.

¹⁷ Na' diža' güen che Jesucriston' chzejni'in chio' še bene' yesejnilaže' Jesucriston', Diosen' gone' legaue' bene' güen, na' bi de bichle da' gac goncho cont gaccho bene' güen len le'. Can' nyoj Xtiža' Diosen' žan: "Diosen' že' bene' chejnilaže' le' naque' bene' güen len le' na' gata'yela' mban che' toli tocaņe."

De xtoła' beñačen'

¹⁸ Diosen' zoe' yaban' na' ba blo'ede' beñačen' toli tocaņe yesesaca'zi' yogo' bene' cbi chesejnilaže' le' na' chesone' da' xinj. Na' da' chesone' da' xinjen' bi chesaclaže' yesombia' bene' yoble diža' li che Diosen'.

¹⁹ Na' Diosen' gone' yesezaca'zi'e, le ba zjaņezde' zoe' da' ba blo'ede' legaue' can' ba benen'.

²⁰ Bi chle'echo can' nac Diosen', na' bi chle'echo can' zoe' chnabi'e, perw nezecho de yela' guac che' can' bene' bxie' yežlion', na' yogo' beñač chesele'ede' da' ca' ba bene'. Da'n'an' bibi de da' yosode'e beñačen' yesene' bi zjaņezde' še zoe'.

²¹ La'czla' zjaņezde' zoa Diosen', bi chesonxene' le', neca cheso'e yela' choxclen che'. Xbab čhegaquen' bibi zacan' na' zjaņchol yichjlažda'ogüen' yela' bi chejle' čhegaquen'.

²² Chesene' zjanaque' bene' sina' perw chesone' xbab da' bibi zaca'.

²³ Chosozoe' Diosen' to šla'ale la'czla' naque' la'zelagüe' bene' zaca' na' zoe' toli tocaņe. Na' gualaz le', chesejnilaže' no l' gua'a lsaca' che beñač bene' te che, na' no l' gua'a lsaca' che be zoa xil, che be žia tap ni'a na'ba' na' che no be xiğüe'.

²⁴ Da'n'an' Diosen' ba gwlejyichje' legaue' cont chesone' da' xinj can' ža lo' lažda'ogaquen', na' bale' ba chesonchğüe' da' nac yela' zto' len cuerp čhegaquen' toe' len yetoe'.

²⁵ Diosen' gwlejjichje' legaque' cont chesone' yela' zto', le legaque' gosebejjichje' diža' li che Diosen' na' chesejle'e che da' güenlaže'. Chesejnilaže' da' ca' ben Diosen' na' bi chesejnilaže' Dios ben' cheyała' šejnilaže'cho na' gonxencho toli tocaņe. Ca'czen' gacšca.

²⁶ Da'nan' Diosen' gwlejjichje' legaque' cont chesone' yela' zto' con da' žan lo' yichjlažda'ogaque'. Can' chac, nita' no'ole bene' bich chesone' can' cheyała' yeson no'olen', san cheseque'e ljež no'olgaque' cont chesone' len legaque' da' bi cheyała' yesone'.

²⁷ Na' nita' bene' byo bene' bitw chese'nde' yesenitalene' no'ole, san chesezelaže' ljež bene' byogaque' nach cheseca'a lježe' cont chesone' yela' zto'. Na' dan' ba chbiayi' cuerp chegaquen', naquen castigw da' cheyała' yesezi'e yela' güen da' xinj chen'.

²⁸ Bi chesaclaže' benachen' yosozenague' che Diosen', da'nan' ba gwlejjichje' legaque' len xbab mal chegaquen'. Da'nan' nite' chesone' da' bi cheyała' yesone'.

²⁹ Chesonchgüe' yogo' da' xinj. Bene' byo chesatalene' no'ole bi nac no'ol chegaque', na' no'olen' chesatalene' bene' byo bi nac bene' chegaque'. Chesexi'e bene'. Chesezelaže' bi da'e de che bene'. Zjanaque' bene' xi'a juisyw, chesegue'e lježe', chesot lježe', chesedile', cheseziye'e, zjanacchgüe' bene' güedenag, na' chja'aque' chjaseleje' diža' che bene'.

³⁰ Chesene' mal che bene' yoble, chesegue'ede' Diosen', na' bibi bala'añ chesezoe' bene' yoble. Chesa'laže'. Chesonxen cuine' cheso'e diža' zjanaque' bene' güen. Chesaljlaže' bichle da' mal da' yesone'. Bi chosozenague' che xaxne'e.

³¹ Bi chesejni'ide'. Bi chesone' da' ba gosene' yesone'. Bi chesacde' bene' yoble. Bi chesyezi'xen che lježe' na' bi chesyeyaše' lježe'.

³² Zjanezde' Diosen' že' toli tocaņe yesezaca'zi' ben' cheson da' ca'. Na' la'czla' zjanezde' can' že', con nita'cze' chesone' da' xinjen' na' chesyebede' cate' bene' yoble chesone' can' cheson legaquen'.

2

Diosen' zejzce' to licha da' chone' castigw che xtoła'chon'

¹ Še nacho che bene' yoble da' xinjen' chone', bibi zaca' ye'cho Diosen' gague bi xtoła'cho de, note'tez nacho. Cate' chnecho che da' chon bene' yoble, na' cheyechjen chio', le toz can' choncho len da' cheson legaque'.

² Nezecho še choncho da' xinj ca nac da' ca' ba gwnian', Diosen' gone' cont saca'zi'cho che xtoła'chon' na' zejzce' to licha da' gone' ca'.

³ Čhaquele Diosen' bi gone' da' saca'zi'cho cate' chnecho che da' xinj da' chon bene' yoble na' chontecho can' chesone'na'? Bi cheyała' gaguecho bi gone' da' saca'zi'cho, le gonczen'.

⁴ Či chachbe'ele Diosen' nacchgüe' bene' šagüe' na' bene' xenlaže' len chio' napcho doła' na' chone' ca' cont gache'echo da' xinjen' choncho na' yetinjchon?

⁵ Le'e bi chetinjle xtoła'len' nacle bene' yid, na' chonle cont Diosen' ža'ache' le'e na' gonche' ga saca'zi'le cate' žin ža' čhogbi'e che benachen'. Cana' gwlo'e zejzce' to licha can' čhogbi'en saca'zi' to to benač che xtoła'gaquen'.

⁶ Na' cana' to tocho saca'zi'cho o gone' ga gac güen checho con ca nac da' ba bencho.

⁷ Na' še chejiljwlaže'cho nac goncho cont šjayzoacho len Diosen' toli tocaņe, na' cont yebe Diosen' chio', na' cont gone' gaccho bene' zaca', soacho goncho da' güen bite'teze da' gwžaglačo. Nach Diosen' gone' cont bancho toli tocaņe.

⁸ Na' še zoacho choncho con da' chazlaže'cho na' bi chzenagcho diža' li che Diosen', san zoacho chzenagcho che da' malen', Diosen' ža'ayichje' chio' na' gone' ga saca'zi'cho toli tocaņe.

⁹ Yogo' benač bene' chon da' xinj saca'zi'e na' žaglagüe', zgua'tec žaglao neto' bene' Israel na' tech yezica'chle bene'.

¹⁰ Yogo'cho še choncho da' güen, Diosen' gone' cont šjayzoacho mbalaz len le' na' gone' cont gacxencho, na' gone' cont soacho binjo len xbab dan' yo'o lo' yichjlažda'ochon'. Zgua'tec gone' ca' len neto' nacto' bene' Israel, na' techle gone' ca' len le'e bi nacle bene' Israel.

¹¹ Toz ca chon Diosen' len yogo'lol benač.

¹² Bene' bi zjanombi'e ley dan' bzoj da' Moisésen' na' chesone' da' xinj, Diosen' gone' yesebiaye'e gague lagüe dan' bi zjanombi'e leyna', san lagüe dan' zjanezde' chesone' da' xinj. Na' bene' zjanombi'e leyna' na' chesone' da' xinj, Diosen' gone' ga yesebiaye'e da' bi chesone' can' žanna'.

¹³ Gague con yenecho can' ža leyna' cont Diosen' ne' naccho bene' güen len le', san goncho can' žanna', nach Diosen' ne' naccho bene' güen len le'.

¹⁴ Bene' bi zjanac bene' Israel na' bi zjanombi'e ley dan' bzoj Moisésen', tgüje lo' lažda'ogaquen' chonen cont chesone' da' güen can' ža leyna' cheyała' yesone', na' la'czla' bi zjanombi'e leyna' dan' zoa yichjlažda'ogaquen' chžian bia' yesone' da' güen, naquen ca to ley len legaque'.

¹⁵ Nachia' zjanezde' lo' lažda'ogaque' cheyała' yesone' da' ca' nžia' bia' leyna' yesone', le chesone' late' güejen. Na' zjanezde' lo' yichjlažda'ogaquen' še da' chesone' naquen güen o še naquen mal.

¹⁶ Can' gac caten' žin ža Diosen' gone' lo' na' Jesucriston' čhoglagüen' che to tocho ca' nac xbab chechon' da' ba bencho na' bichle da' ba bencho bagaše'ze še naquen güen o še naquen mal. Can' chnia' cate' chyixjue'eda' diža' güen che Jesucriston'.

Beñe' Israel bi chesone' can' ža' leyna'

¹⁷ Na' le'e nacle beñe' Israel gualaž čhia', šeca chonle xbab zoale binlo len Diosen' da' nsedle ley dan' bzoj Moisésen', na' šeca cha'laže'le dan' nombia'le Diosen'.

¹⁸ Nezele bin' chazlaže' Diosen' na' chache'ele bin' nac da' güen na' bin' nac da' mal, le nsedle xtižen'.

¹⁹ Chaquele zaca'le cont co'ole be'ni' lo' yichjlaždao' beñe' bi nombia' Diosen'.

²⁰ Na' chaquele guac gwzejni'ile bene' cheson clele nac cheyała' yesone', na' chaquele guac gwsed gwlo'ele bene' cobe xtiža' Diosen', le nombia'le diža' li' chen' na' len nsan' doxen da' cheyała' nezele.

²¹ Le'e chsed chlo'ele beñe' yoble, čbixchen' bi chsed chlo'e cuinle? Le'e žale bi cheyała' no cuan, čbixchen' chbanle?

²² Le'e žale nono gata'len no'ole bi nac no'ol che', na' no'olen' bi gata'lene' ben' bi nac beñe' che', čbixchen' chonle da' che'le beñe' bi gone'? Le'e chgue'ele l' gua'a l'saca' da' chesejni'laže' bene' čbixchen' chjalanle bi da' de lo' yo'o gan' že' l' gua'a l'saca' ca'?

²³ Cha'laže'le da' nsedle ley da' bzoj Moisésen', perw chzoale Diosen' to šla'ale da' bi chonle can' ža' leyna'.

²⁴ Chac can' nyoj Xtiža' Diosen' žan: "Da' chonle da' xinj, beñe' bi zjanac beñe' Israel chesene' mal che Diosen'."

²⁵ Še choncho can' ža' leyna' zaca'czen dan' ba gwzoacho señw lo' cuerp chechon' da' zejen chio' beñe' Israel naccho yež che Diosen'. Perw še bi choncho can' ža' leyna', bibi zejen da' ba gwzoacho señw dan' nzi' circuncisión.

²⁶ Beñe' bi naque' beñe' Israel bi zoe' señua', na' še chone' can' ža' ley che Diosen', Diosnan' ne' naque' txen len chio' zoacho señua'.

²⁷ Na' beñe' cheson can' ža' leyna', la'czla' bi zjanaque' beñe' Israel na' bi zjazoe' señw dan' nzi' circuncisión lo' cuerp chen', chesone' cont nachia' de xtoła' le'e nsedle leyna' perw bi chonle can' žan'na'.

²⁸ Bi načo naccho dogualje beñe' Israel da' na'ocho costumbr che nación chechon' na' dan' zoa señw lo' cuerp chechon'.

²⁹ Naccho dogualje beñe' Israel gague dan' choncho can' ža' leyna' da' nyojen, san da' chejni'laže'cho Diosen' do yichj do laže'cho na' ba be'cho latje bocobe Spiritw che Diosen' yichjlažda'ochon'. Da'n'an' Diosen' güe'e diža' güen checho, la'czla' še notno chne güen checho.

3

¹ Čbi da' güen da' chga'añ che chio' beñe' Israel da' goljcho lo' diaža che da' xozxta'ochon' še ca'? Čbi da' güen da' chga'añ da' ba zoacho señw da' nzi' circuncisión?

² Da' xen da' chga'añ. Na' da' blaoch da' chga'añ, Diosen' bnežjue' da' xozxta'ocho ca' Xtižen' da' nyojen par yogo' beñach.

³ Na' la'czla' zan beñe' gualaž checho bi gosejle'e čen, bi načo Diosen' bi gone' güen can' gwne' gone' len chio' naccho nación che'na'.

⁴ Goncze' con can' že'na'. Yogo' ni'a Diosen' chne' diža' li, la'czla' še žin ža' cate' yogo'lol beñe' yesene' diža' güenlaže'. Chac can' nyoj Xtiža' Diosen' žan: Le' gwlo'edo' beñachen' le cho'o diža' li.

Na' ca' nac beñe' ca' cheson xbab bi chono' can' žon', yesache'ede' chonczo' can' žo'na'.

⁵ Bał beñe' chesene' cate' choncho da' xinj chlo'en ca' beñe' güen nac Diosen', na' chesene' Diosen' bi zeje' to li' še chone' cont saca'zi'cho che da' xinj dan' chonchon'.

⁶ Clelen' chesone' xbab. Šaca' Diosen' bi chone' da' zej toli, bi gac gone' yela' justis che chio' beñach. Perw gonczen'.

⁷ Na' nita' bał beñe' chesone' xbab clele, chesene': "Cate' choe'cho diža' güenlaže' chlo'en ca' beñe' güen juisyw nac Diosen' da' cho'e pur diža' li. Da'n'an' bi cheyała' ne' napcho dola' cate' chonlaže'cho."

⁸ Lecze chesonlaže' bał beñe' chesene' neda' bzejni'ida' guaque goncho da' mal cont gac da' güen. Da' cheyała'cze gon Diosen' cont sacazi' note'tez beñe' ža' ca'.

Yogo'cho napcho dola' lao Diosen'

⁹ ¿Bixen' ša? ¿Naquech chio' bene' Israel bene' güen ch ca bene' bi zjanac bene' Israel? Bi naccho ca'. Ba bzejni'ida' toz ca nac che chio' bene' Israel len che bene' bi zjanaque' bene' Israel, yogo'cho de xtoła'cho.

¹⁰ Na' Xtiža' Diosen' nyojen žan:

Nono zoa bene' zej to licha, ne toe'.

¹¹ Nono nła' bene' chejni'i cont gwzenague' che Diosen',

nono nła' bene' cheyljue' le'.

¹² Yogo' benach ba zjanque'e nez mal.

Yogüe' ba zjanaque' ca to da' bibi zaca'.

Ne to nono zoa bene' chone' da' güen.

¹³ Len xtiža'gaquen' chesexoayague' bene'.

Ca zban chła' cho'a ba che bene' guat še bi nyeyjon binlo, ca' zban chła' xtiža'gaquen'.

Na' ca venen che bel znia nac xtiža'gaquen' da' cheso'e.

¹⁴ Pur diža' mal diža' bya' ze' cho'agaquen'.

¹⁵ Con bize da' chosode'ede' cont chesote' bene'.

¹⁶ Gate'teze chja'aque' zjanse'e yela' yaše' yela' zi' ca nac da' chesone'.

¹⁷ Bi chesezoe' binlo len lježe'.

¹⁸ Bi chesežebe' Diosen' len bi da' mal chesone'.

¹⁹ Na' nezecho Diosen' bene' chio' bene' Israel ley chen'. Da'n'an' ne tocho bi chac nacho bibi xtoła'cho de, le bi choncho can' žanna'. Nachen' Diosen' ze' si'cho castigw che xtoła'chon', con can' ze' che yogo' benach, le yogüe' bi chesone' can' ža ley chen'.

²⁰ Bi nacho zoa bene' naque' bene' güen len Diosen' da' chone' yogo' da' ža leyna', le notno chon ca'. Leyna' chlo'en chio' naccho bene' güen da' xinj.

Bene' šejnilaže' Jesucriston' gague' bene' güen len Diosen'

²¹⁻²² Na' na'a Diosen' ba blo'e can' goncho cont gaccho bene' güen len le', na' bich bi ze' che da' ca' ža leyna' cheyala' goncho, san ze' cheyala' šejnilaže'cho Jesucriston' cont gaccho bene' güen len le'. Doxen Xtiža' Diosen' dan' nyojen cani'te chzejni'in cheyala' šejnilaže'cho Jesucriston' cont gaccho bene' güen. Na' toz can' chon Diosen' len yogo'lol benach.

²³ Le yogo'cho ba bencho da' xinj, na' ne tocho bi naccho bene' güen can' chaclaže' Diosen' gaccho.

²⁴ Perw na' Diosen' nži'ilaže'de' chio', na' gague bi chzi'e par ze' naccho bene' güen len le', le Cristo Jesús'en' ba bnitlagüe' xtoła'chon'.

²⁵ Diosen' gwsele' Jesucriston' bnežw cuine' gosote'ne' neche xtoła' benach. Na' note'teze bene' yesejnilaže'ne' nitlao xtoła'gaque'. Diosen' gwsele'ne' cont nachia' zeje' to licha da' gwdape' yela' chxenlaže' bezi'xene' xtoła' bene' ca' gwnita' cani' bene' gosejnilaže'ne'.

²⁶ Na' lecze gwsele'ne' cont nachia' zeje' to licha da' ze' che yogo' chio' chejnilaže'cho Jesús'en' naccho bene' güen.

²⁷ Bi cheyala' gonxen cuincho güe'cho diža' naccho bene' güen. Šaca' choncho doxen dan' ža leyna' zaca' gonxen cuincho güe'cho diža' naccho bene' güen, perw nono chon can' ža leyna'. Con da' chejnilaže'cho Jesucriston', da'n'an' zaca' cont yeyaccho bene' güen len Diosen'.

²⁸ Can' naquen, note'tez bene' chejnilaže' Jesucriston', Diosen' ze' naque' bene' güen len le' da' chejnilaže'ne', gague lagüe dan' chone' can' ža leyna'.

²⁹ ¿Chaquale Diosen' naque' Dios che chio' naccho bene' Israel ngaze? Lecze naque' Dios che bene' bi zjanac bene' Israel.

³⁰ Le toze Diosen' zoa na' len' ze' che yogo'cho naccho bene' güen len le' con še chejnilaže'cho Jesucriston', na' toz can' chone' len chio' zoacho seřw dan' ze' circuncisión na' len bene' cbi zjazoa seřwna'.

³¹ ¿Chaquale choncho leyna' ca to da' bibi zaca' da' žacho cheyaccho bene' güen len Diosen' cate' chejni'laže'cho Jesucriston'? Bi chonchon ca to da' bibi zaca', san chlo'echo naquen da' zaca'chgua.

4

Can' ben da' Abraham

¹ Na' le'e bene' gualaž chia' len le'e bi nacle bene' Israel, da' xozxta'oto' Abraham ¿bixe nacho che'?

² Šaca' Abrahamna' bene' doxen can' ža leyna', zaca' gonxen cuine' da' naque' bene' güen, san bi bene' doxen can' žanna' na' bibi gota' da' zaca' gonxen cuine' lao Diosen'.

³ Quinga ža Xtiža' Diosen' da' nyojen: "Abrahamna' gwejnilaže' Diosen' na' da'n'an' Diosen' gwne' naque' bene' güen len le'."

⁴ Cate' to bene' chone' žin, chone' gan laxjue' na' xan žinŋa' bi chone' to goclen cate' chnežjue' laxjuen'.

⁵ San to goclen chon Diosen' že' che chio' chejnilaže' chone' naccho bene' güen len le', le' bi choncho da' güen. Choncho da' xinj, na' Diosen' chnitlagüe' da' xinj chechon' še chejnilaže' chone'.

⁶ Lecz da' Davin' be'e diža' ca mba chzoa ben' chnitlao Diosen' xtoŋen' na' bibi cuent chone' še ba ben ben' da' güen o ba bene' da' mal.

⁷ Bzój Davin' da' nga žan:

Mba zoacho še ba bezi'xen Diosen' che da' xinj da' ba bencho.

Mba zoacho še ba bñitlagüe' xtoŋa'chon'.

⁸ Mba zoacho še Diosen' že' checho bibi xtoŋa'cho de.

⁹ ¿Chaquale neto'zen' zoato' señw dan' že' circuncisión gac soato' mba can' gwnen'? Gague neto'zen'. Lencze le'e bi zoale señw dan' že' circuncisión guac soale mba. Nezecho Diosen' gwne' da' Abrahanna' naque' bene' güen len le' da' gweyjnilaže'ne'.

¹⁰ Gwne' che da' Abrahanna' naque' bene' güen len le' cate' biŋa' soe' señw dan' že' circuncisión, gague beyož gwzoen'na' gwne' ca'.

¹¹ Na' gwdechle gwzoe' señwna' cont gwnežde' Diosen' bñitlagüe' xtoŋe' da' ba chejnilaže'ne'. Na' da'nan' Abrahanna' naque' xozxtao' yogo' bene' chesejnilaže' Diosen' cont nitlao xtoŋa'gauen' la'czla' bi zjazoe' señwna'.

¹² Na' lecze naque' xozxtao' neto' bich bi xtoŋa'to' de da' chejnilaže'to' Diosen', neto' zoato' señw dan' že' circuncisión. Perw gague naque' xozxta'oto' da' zoato' señwna', san da' chejnilaže'to' Diosen' can' gweyjnilaže' da' Abrahanna' le'.

Diosen' bene' güen len da' Abrahanna' da' gweyjnilaže'ne'

¹³ Diosen' gože' da' Abrahanna' gone' cont le' len bene' za' yesalje lo diaža' chen' yesac chegaque' doxen yežlion'. Gož Diosen' da' Abrahanna' ca' da' gweyjnilaže'ne'. Da'nan' gwna Diosen' naque' bene' güen gague da' bene' can' ža leyna'.

¹⁴ Šaca' ža Diosen' con bene' yeson doxen can' ža leyna' yesac chegaque' yežlion', bibi zaca' šejnilaže'cho Diosen' šeca', na' bibi zejen da' gwne' gone' güen len bene' za' yesalje lo diaža' che da' Abrahanna'.

¹⁵ Na' leyna' nsan' castigw che benachen', le' bi chesone' can' žanna. Šaca' bibi ley de da' gwžian bia' bi da' cheyala' gon chio' benač, bibi xtoŋa'cho de šeca'.

¹⁶ Can' naquen, note'teže bene' chesejnilaže' Diosen', none' legaque' ca xi'in diaža' che da' Abrahanna', na' Diosen' gone' cont legaque' yesac chegaque' yežlion' can' gože' da' Abrahanna'. Gague neto'zen' nombia'to' ley da' bzój da' Moisésen' gac cheto' yežlion'. Na' nacczen da' li gon Diosen' güen len note'tez bene' chejnilaže'ne'. Na' gone' ca' cont gacbia' to goclen chone' len bene' ca' chesejnilaže'ne' can' gweyjnilaže' da' Abrahanna' le'. Na' da' non Diosen' cuent Abrahanna' naque' ca xozxtao' yogo' chio' chejnilaže' chone',

¹⁷ chac can' gože' da' Abrahanna' gwne': "Ba nzoa' le' gaco' xozxtao' bene' še' nación zan." Dios ben' gweyjnilaže' da' Abrahanna' nape' yeŋa' guac cont yosbane' bene' guat, na' chac chone' cont gac da' biŋa' gac.

¹⁸ Abrahanna' bi gwnežde' nac gac can' gwna' Diosen' gac, san con gwzoe' gweyjl'e' che Diosen' na' gwzoe' lez gon Diosen' cont ñita' bene' zan xi'in diaža' che'.

¹⁹ Gwzoacze' gweyjl'e' can' gož Diosen' le' la'czla' ba naque' bene' gole par soa xi'ine', le' ba zejgale' to gayoa iz, na' no'ol che' Sara naque' bene' güiž.

²⁰ Gwzoateze' gweyjnilaže' Diosen' na' bi gocžejlaže' len da' gož Diosen' le' gone', san gwzoačhače' gweyjnilaže'ne' na' benxene'ne'.

²¹ Abrahanna' gwnežde' Diosen' nape' yeŋa' guac cont gone' can' gwnen'.

²² Da'nan' Diosen' gone' naque' bene' güen da' gweyjnilaže'ne'.

²³ Na' dan' nyojen žan Diosen' gwne' naque' bene' güen da' gweyjnilaže'ne', gague nyojen ca' che Abraham na'zen'.

²⁴⁻²⁵ Lecze nyojen che yogo'cho, le' Diosen' lecze že' naccho bene' güen len le' da' chejnilaže' chone'. Cont gwñitlagüe' xtoŋa'chon' Diosen' gwseŋe' Xancho Jesucriston' bnežjw cuine' gosote' le'. Na' Dios ben' chejnilaže'cho bechis bosbane'ne' ladjo bene' guat ca' cont beyone' chio' bene' güen.

5

Zoacho binlo len Diosen' da' chejnilaže'cho Jesucriston'

¹ Na' ca nac chio', da' ba chejnilaže'cho Xancho Jesucriston', Diosen' ba gwne' naccho bene' güen len le', na' lecze da'nan' ba zoacho binlo len le'.

² Da' chejnilaže'cho Jesucriston', Diosen' zoacze' nži'ide' chio'. Na' chebecho nezecho gone' soacho mbalaz juisyw can' zoa le' cate' šjayzoacho txen len le'.

³ Na' lecze chebe chezaque'cho cate' chzaca'zi'cho, le nezecho še gonxenlaže'cho cate' chzaca'zi'cho, nach gwyo gwchejchcho cate' de bichle da' saca'zi'cho.

⁴ Na' še chonxenlaže'cho cate' chzaca'zi'chon', chlo'en zoačhačcho chejnilaže'cho Diosen'. Na' še zoačhačcho chejnilaže'chone', nezecho šjayzoacho txen len le'.

⁵ Na' dan' zoacho lez šjayzoacho txen len Diosen', bi nacho naquen to da' güenlaže' chaqueo gac checho ca'. Le Diosen' ba gwsele' Spiritw chen' zoan len chio' na' chnen lo' lažda'ochon' žan chacchgüe Diosen' chio'.

⁶ Chio' beñač naccho bene' güen da' xinj na' bibi chac goncho cont yezoacho binlo len Diosen', perw bžin ža cate' Diosen' gwsele' Criston' bnežjw cuine' gote' neče chio' napcho dola'.

⁷ Nono zoa bene' gwnežjw cuine' yesot bene' le' neče bene' yoble, la'czla' še nac ben' bene' güen, o še gwchojlja tgüej bene' yeyaxjde' gwnežjw yela' mban che' yesote'ne' gualaz to bene' šagüe'.

⁸ San Diosen' blo'ede' chacchgüede' chio' da' gwsele' Criston' gote' neče chio' la'czla' zoacho choncho da' xinj.

⁹ Na' dan' got Criston' neče chio', Diosen' že' naccho bene' güen da' chejnilaže'cho le'. Na' Criston' lecze gone' cont bi saca'zi'cho cate' žin žan' Diosen' chogbi'e che yogo'lol bene'.

¹⁰ Cana' bi gwzoacho binlo len Diosen'. Perw Xi'ine' Criston' bnežjw cuine' gote' neče chio' cont bozoe' chio' binlo len Diosen'. Na' na'a ba zoacho binlo len le' na' nezecho zoacze Criston' chone' cont žin ža šjayzoacho len Diosen'.

¹¹ Na' lecze chebecho nombia'cho Diosen', le Xancho Jesucriston' ba bozoe' chio' binlo len le'.

Adánna' gwleque' da' mal yežlio nga, san Jesucriston' gwleque' da' güen

¹² Yela' güedenag che bene' nechw ben' le Adán gwxe da' malen' yežlio nga, na' da' malen' nsan' yela' got. Can' goc, gwzolaoc chesat yogo' beñačen', le yogo'lole' chesone' da' mal.

¹³ Beñačen' gwzolaoc chesoncze' da' xinjen' cate' gwzoate da' Adán, la'czla' biña' gata' ley dan' bzoj da' Moisésen'. Na' gan' bibi ley de, nono chon xbab še cheson bene' da' xinj.

¹⁴ Perw na' gwzolaon len da' Adánna' na' len bene' gwnita' caten' gwbane', bžinten len bene' gwnita' caten' gwban Moisésen', yogo'lole' gosate' can' chesat bene' ža na'aža. La'czla' legaue' bi gosone' güedenag len to da' gož Diosen' legaue' can' ben Adánna', bia'cze yogüe' gosone' da' xinjen'. Adánna' gwleque' yela' goten', san Jesucriston' ben' ba naquen sela' Diosen', len' bxi'e yela' mban toli' tocaņe.

¹⁵ iNža' xen ca dan' gwxe caten' Adánna' bene' da' xinjen' na' ca dan' gwxe cate' Diosen' gwsele' Jesucriston'! Yogo' chio' beñač gatcho lagüe da' ben Adánna' da' xinjen', san yogo' chio' beñač guac soacho mba da' nži'i Diosen' beñačen' na' gwsele' Xi'ine' Jesucriston' cont chaclene' note'tezcho.

¹⁶ Toz Adánna' bi bzenague' che Diosen' na' da'n'an' Diosen' gwne' yesezaca'zi' yogo'cze beñačen' toli' tocaņe che xtola'gaquen'. Nach Diosen' gwsele' toz bene' güen cont bñitlagüe' xtola' note'tezcho chejnilaže'chone' na' beyone' chio' bene' güen la'czla' da' zan da' xinj ba bencho.

¹⁷ De yela' got che chio' beñač neče da' xinj da' ben toz ben' gože' Adán, san mbalaz juisyw chac che chio' beñač neče da' güen da' ben Jesucriston' bnežjw yela' mban che' neče yogo'cho. Diosen' nži'ide' chio', nachen' bibi chčhixjue' chonze' chio' ca bene' güen še chejnilaže'cho Jesucriston', na' none' chio' yela' mban toli' tocaņe cont nabia'cho txen len Jesucriston'.

¹⁸ Can' naquen, da' ben toz Adánna' da' xinj, Diosen' gwchogbi'en saca'zi' yogo' beñačen' che xtola'gaquen'. Na' neče da' güen da' ben toz Jesucriston' da' bnežjw cuine' gosote'ne', da'n'an' ñitlao xtola' note'tezcho chejnilaže'chone', cont none' chio' ca bene' güen.

¹⁹ Len da' xinj dan' ben Adánna' cate' bene' güedenag len Diosen', gwxe da' xinj da' chon yogo' chio' beñač. Na' da' bzenag Jesucriston' che Diosen' na' bnežjw cuine' cont ñitlao xtola' beñačen', da'n'an' note'tezcho chejnilaže'chone' none' chio' ca bene' güen.

²⁰ Cate' Diosen' bnežjue' ley chen' da' bzoj Moisésen' na' gwcha'o gw Xench da' xinj da' goson beñačen', le bi bosozenague' chen. Perw na' la'czla' gwcha'o gw Xen da' malen', gwcha'o gw Xench yela' ži'ilaže' che Diosen' len chio' beñač.

²¹ Can' chac, de yela' got che yogo' chio' beñač da' naccho bene' chon da' xinj, ca'cze Diosen' nži'ide' yogo' chio' beñač cont note'tezcho gaccho bene' güen len le' na' gata' yela' mban checho toli' tocaņe še šejnilaže'cho Xancho Jesucriston'.

6

Bi cheyala' soacho goncho da' xinj san soacho goncho can' chazlaže' Criston'

¹ ¿Nacxen' cheyała' goncho na'a ba nezecho nži'ilaže' Diosen' chio'? ¿Gonchcho da' malen' cont yezi'xenhcze Diosen' che chio'?

² Gague can' goncho. Cate' gwzolao chejnilaže'cho Criston' bich goclaže'cho nabia' da' malen' chio'. Da'nan' guac nacho ba gotcho len da' xinjen' cont bich gonchon.

³ ¿Bi chacbe'ele can' zejen da' gwzoacho nis? Zejen da' chejnilaže'cho Jesucriston' ben' got neče chio', bač nacho ca to beņe' guat len da' xinjen' cont bich gonchon.

⁴ Na' dan' gwzoacho nis leče guac nacho bgaše'cho can' bosocuaše' Criston'. Na' con can' bečhis bosban Xancho Diosen' Criston' ladjo beņe' guaten' len yela' guac xen che', ca'czen' bene' len chio', ba bocobe' yichjlažda'ochon' cont soa cuezcho goncho da' güen.

⁵ Na' can' žacho ba gotcho len da' xinjen' dan' chejnilaže'cho Criston', leče guac nacho bečhis bosban Diosen' chio' can' bečhis bosbane' Criston', le ba bocobe' yichjlažda'ochon'.

⁶ Cana' ne' chnabia' da' malen' chio' len yogo' da' choncho. perw na'a da' chejnilaže'cho Criston' ben' got neče chio', ba none' chio' ca to beņe' guat len da' xinjen' cont bich gonchon na' cont da' mal dan' yo'o lo' yichjlažda'ochon' bich soan nabian' chio'.

⁷⁻⁸ Beņe' ba got bich zoe' chone' da' xinj, na' ca' nacczen len chio' chejnilaže'cho Criston', bich che'necho nabia' da' malen' chio' na' bich zoacho chzenagcho čen. Na' chejle'cho gone' cont soacho bancho len le' na'a na' toli' točane.

⁹ Na' nezecho Criston' beyas bebane' ladjo beņe' guaten' na' gwbat gate' da' yoble le bich soe yela' gotten' le'.

¹⁰ Na' cate' gosote' Criston', tni'aze bnežjw yela' mban che' neče xtoła'chon'. Bich chyažjen gwnežjw cuine' da' yoble, san ba zoalene' Diosen' chone' con bi da' chazlaže' Diosen'.

¹¹ Nach dan' gote' neče xtoła'chon', cheyała' soacho goncho cont da' mal dan' yo'o lo' yichjlažda'ochon' bičh nabian' chio', na' cheyała' soacho txen len Xancho Jesucriston' cont goncho dan' chazlaže' Diosen'.

¹² Da'nan' bi güe'cho latje nabia' da' malen' cuerp čhechon' dan' nac da' gat na' goncho bi da' xinj da' selažen'.

¹³ Bi cheyała' gon cuincho lo na' da' gwxiyen' cont goncho da' mal len cuerp čhechon'. Cheyała' gon cuincho lo na' Diosen' cont goncho da' güen. Guac nacho Diosen' bečhis bosbane' chio' ladjo beņe' guaten' da' bocobe' yichjlažda'ochon'.

¹⁴ Bich nabia' da' malen' chio', le nezecho Diosen' chbede' chio' gague neče da' choncho can' ža ley dan' bzoj da' Moisés, san dan' naque' beņe' šagüe'.

Beņe' chzenag che da' malen' naque' ca beņe' zoa xan, beņe' chnabia' le' cont gonche' da' malen'

¹⁵ ¿Gontezcho da' xinjen' da' nezecho nži'i Diosen' chio' na' nezecho bi chone' cuent še ba bencho da' ža leyna' cheyała' goncho? Bitw goncho ca'.

¹⁶ Nezecho še ba chzenagcho čhe to beņe' cont goncho bite'tez že', choe'cho latje chnabi'e chio'. Na' ca'cze naquen len chio' še chzenagcho che da' malen' na' chontezchon, ba chnabia' da' malen' chio' še ca'; na' bi gac šjayzoalencho Diosen' toli' točane še ca' choncho. San še zoacho chzenagcho čhe Diosen', nachen' zejczcho choncho da' güen na' šjayzoalencho Diosen' toli' točane.

¹⁷ Na' choa' yela' chočlen che Diosen' na'a ba chzenagle do yichj do laže'le xtiža' Diosen' da' ba bzejni'ito' le'e, na' bich chzenagle che da' malen' can' benle' cana'.

¹⁸ Diosen' ba bebeje' le'e lo' da' malen' na' ba ben cuinle lo ne'en cont soale gonle da' güen.

¹⁹ Ba bzejni'ida' le'e bia' diža' che bi da' chac che chio' beñač cont šejni'ile. Nachen' chnia' le'e, con can' gwzoale bentezle da' nac da' yela' zto' len cuerp čhelen', na' benchgualde da' malen', leče can' cheyała' gon cuinle lo na' Diosen' gonle da' güen cont čazlaže' Diosen' can' chonlen'.

²⁰ Caten' ne' zejcho choncho da' malen' bi chzenagcho čhe Diosen' neca choncho da' güen.

²¹ Na' bibi banez na' le'echo che da' mal ca' ba bencho, san na'a ba cheto'echo čen. Beņe' ca' ne' chesontez' da' malen' gata' castigw čhegaque' toli' točane.

²² Na' chio', Diosen' ba bebeje' chio' lo da' malen' na' yo'ocho lo ne'ena'. Da'nan' zejch choncho da' güen can' chazlaže' Diosen' na' šjayzoacho len le' toli' točane.

²³ Še zoacho choncho da' xinjen', gata' castigw čhecho toli' točane cate' gatcho. San Diosen' čonđadze' chio' to da' güen juisyw, chio' chejnilaže'cho Xancho Jesucriston', chone' cont šjayzoacho len Diosen' toli' točane.

7

Naccho ca to beņe' ba got len ley da' bzoj Moisésen'

¹ Beņe' migw, da' nga žia' le'e, le nombia'le ley dan' bzoj Moisésen'. Nezczecho con beņe' ca' zjamban cheyała'cze yosozenague' che leyna'.

² Ca to no'ole nšagna', šlac mban bene' che' cheyała' soalene' le', le can' chon leyna' mandadw gone'. Na' še ba got bene' chen', cana' ba bele' len leyna' da' chon mandadw soalene' bene' chen'.

³ Še no'olen' soalene' bene' yoble šlac ne' mban bene' chen', nape' doła' len leyna' da' chzoa xtoe'. Perw na' še ba got bene' chen', leyna' žan ba guac yošagna'lene' bene' yoble na' bi nacho chone' da' xinj yošagne'e.

⁴ Bene' migw, can' naquen len chio' chejnilaže'cho Criston'. Ba belacho len leyna' da' žan saca'zi'cho che xtoła'chon' toli tocane. Na' ba gwnitlao xtoła'chon' dan' bnežjw Criston' yela' mban chen' gosote'ne' le'e yag cruzen'. Da'n'an' ba zoacho txen len Criston' ben' beban ladjo bene' guaten', na' zoacho cont goncho can' chazlaže' Diosen'.

⁵ Cana' zoacho chzenagcho che da' malen' dan' yo'o lo' yichjlažda'ochon'. Na' cate' gwnezecho can' ža ley dan' bzoj da' Moisésen', nachle be'laže'cho bencho da' malen', na' da' malen' nsan' castigw checho toli tocane cate' gatcho.

⁶ Perw na'a ba belacho len ley da' žan cheyała' si'cho castigw toli tocane, le Criston' beque'e xtoła'chon'. Na' ba chaclaže'cho goncho can' chazlaže' Diosen', na' chonchon gague cont na' Diosen' naccho bene' güen len len', san chonchon dan' ba bocobe Spiritw chen' yichjlažda'ochon'.

Bi güe'cho latje nabia' da' malen' chio'

⁷ Bi cheyała' goncho xbab nac to da' mal ley dan' bzoj da' Moisésen'. Leyna' bzejni'in neda' bi dan' bi cheyała' gona' cont gocbe'eda' chona' da' xinj. Na' gwnežda' naquen mal chzelaža' bi da' de che bene', le leyna' žan: "Bi selaže'le bite'teze da' de che bene'."

⁸ Na' cate' gwnežda' can' ža leyna', nachle da' mal dan' yo'o lo' yichjlažda'oguan' benen gwzelaže'cha'. Da' li cate' bi nezecho can' ža leyna', bi nezecho še choncho da' xinj.

⁹ Neda' gwzoa' to tiemp bi gocbe'eda' bi cheyała' selaža'. Perw cate' bžin ža gwnežda' nžian bia' bi cheyała' selaža', nachle bzenagcha' che da' mal da' yo'o lo' yichjlažda'oguan' na' gwzelaže'cha'. Da'n'an' gwnežda' cheyała' sia' castigw che xtolan' toli tocane.

¹⁰ Leyna' nyojen cont gwzenagcho chen na' gata' yela' mban checho toli tocane, perw da' bi bzenaga' chen, bzejni'in neda' gata' castigw chia' toli tocane.

¹¹ Can' goc, cate' bembia' leyna', da' malen' da' yo'o lo' yichjlažda'oguan' gwxoayaguen neda' cont bencha' da' malen', nach gwchoglaon chia' gata' castigw che xtolan' toli tocane.

¹² Ley dan' bzoj Moisésen' nacczen che Dios, na' to to da' nžian bia' goncho naquen güen na' zejen to liha.

¹³ ¿Nacho leyna' da' naquen güenchguan' chonen cont saca'zi'cho che xtoła'chon' toli tocane? Bi nac len. Da' mal da' yo'o lo' yichjlažda'ochon' bi ben' latje goncho can' cheyała' goncho, na' da'n'an' gwchoglaon checho saca'zi'cho che xtoła'chon' toli tocane. Leynan' da' nac da' güen chlo'en chio' Diosen' chgue'echgüede' da' mal da' choncho.

¹⁴ Nezecho leyna' naquen che Spiritw che Diosen' na' naquen güen, san chio' yo'o da' malen' lo' yichjlažda'ochon' na' zoacho choncho da' xinj.

¹⁵ Bi choncho da' güen da' chaclaže'cho goncho, san da' xinj da' chgue'echo len' choncho. Bi chache'echo bixchen' choncho ca'.

¹⁶ Na' dan' chgue'echo da' mal dan' chonchon', zejen chache'echo nac leyna' güen.

¹⁷ Gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

¹⁸ Nezecho bi naccho bene' güen, le yo'o da' malen' lo' yichjlažda'ochon'. Chaclaže'cho goncho da' güen perw bi chac gonchon.

¹⁹ Bi choncho da' güen da' chaclaže'cho goncho, san choncho da' xinj da' bi che'necho goncho.

²⁰ Da'n'an' chnia', gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

²¹ Can' chac checho, cate' che'necho goncho da' güen, da' mal dan' yo'o lo' yichjlažda'ochonan' chžonen gonchon.

²² Lo' yichjlažda'ochon' chbecho goncho can' ža ley che Diosen',

²³ perw chache'echo, yo'o yeto da' yo'o lo' yichjlažda'ochon' chžonen goncho da' güen, na' lenna' chnabian' chio' cont choncho da' xinjen'.

²⁴⁻²⁵ ¿Nyaše' chac checho! Lo' yichjlažda'ochon' chaclaže'cho goncho can' ža ley che Diosen', perw da' mal dan' yo'o lo' yichjlažda'ochon' chnabian' chio' len cuerp chechon' cont choncho da' xinjen'. ¿Non' soe da' mal dan' yo'o lo' yichjlažda'ochon' cont bi nabian' cuerp chechon' len xbab chechon'? Le dan' chnabia' da' malen' chio' da'n'an' si'cho castigw toli tocane. Choχden Diosen' len' soede' da' mal dan' yo'o lo' yichjlažda'ochon' cont bich nabian' chio', le ba chejnilaže'cho Xancho Jesucriston'.

8

Spiritw che Diosen' chonen chio' yela' mban toli tocanē

¹ Na' na'a da' ba naccho txen len Cristo Jesúsen', bich gata' castigw checho toli tocanē, le ba chzenagcho che Spiritw che Diosen' cont choncho da' güen na' bich chzenagcho che da' malen' dan' yo'o lo' yichjlažda'ochon'.

² Cate' ne' zoacho chontezcho da' malen' nchoglaon checho si'cho castigw che xtola'chon' toli tocanē, perw na'a Spiritw che Diosen' ba bene' chio' yela' mban toli tocanē da' chejnlaže'cho Cristo Jesúsen' na' Spiritw chen' chnabian' yichjlažda'ochon'. Da'nan' bich saca'zi'cho toli tocanē.

³ Ley da' bzoj Moisésen' bi gwzonen yebejen chio' lo' da' malen', le yo'o da' malen' lo' yichjlažda'ochon'. Nach Diosen' gwsele' Xi'ine' Jesucriston' golje' yežlion', goccze cuerp chen' ca cuerp che chio' bene' güen da' xinj. Na' Jesucriston' bnežw cuine' neche xtola'chon' cont da' malen' bich nbian' chio' len xbab da' yo'o lo' yichjlažda'ochon'.

⁴ Diosen' gwsele'ne' cont soacho goncho da' güen can' za ley chen' cheyala' goncho. Le bich chzenagcho che da' malen' dan' yo'o lo' yichjlažda'ochon', san ba zoacho choncho da' güen lagüe dan' chzenagcho che Spiritw che Diosen'.

⁵ Še chzenagcho che da' mal dan' yo'o lo' yichjlažda'ochon', con da' malzen' chebecho choncho; san še chzenagcho che Spiritw che Diosen', chebecho choncho da' ca' chazlaže' Diosen'.

⁶ Le še zoacho chebecho da' malen', nachle si'cho castigw toli tocanē, na' še chebecho da' ca' chazlaže' Spiritw che Diosen', guata' yela' mban checho toli tocanē na' soa cuezcho binlo len xbab dan' yo'o lo' yichjlažda'ochon'.

⁷ Choncho ze bene' chgüe'e Diosen' cate' chebecho da' malen', le cate' chebecho da' malen' bi chazlaže'cho neca chac gwzenagcho che ley chen'.

⁸ Na' še zoacho chzenagcho che da' mal dan' yo'o lo' yichjlažda'ochon', bi chebe Diosen' chio'.

⁹ Na' chio', da' ba bedesoa Spiritw che Diosen' lo' lažda'ochon', bi zoacho chzenagcho che da' malen' da' yo'o lo' yichjlažda'ochon', san zoacho chzenagcho che Spiritw che Diosen'. Na' bene' bi zoa Spiritw che Criston' lo' lažda'ogüen', gague da' li chejnlaže' Criston'. (Spiritw che Criston' lecze naquen Spiritw che Dios.)

¹⁰ Perw na' še ba zoa Criston' len chio', Diosen' že' naccho bene' güen len le' na' lecze šjaycho len le' toli tocanē la'czla' yesat cuerp chechon' neche da' malen' dan' de yežlion'.

¹¹ Diosen' bechis bosbane' Cristo Jesúsen' ladjo bene' guaten', na' lecze gwžin za cate' Diosen' yečhis yosbane' chio' len cuerp checho quinga da' chesat, le Spiritw chen' zoan lo' lažda'ochon'.

¹² Da'nan' bene' migw, chonen byen gwzenagcho che Spiritw che Diosen'. Bi cheyala' gwzenagcho che da' mal dan' yo'o lo' lažda'ochon'.

¹³ Le še soacho gwzenagcho che da' mal dan' yo'o lo' lažda'ochon', saca'zi'cho toli tocanē. Na' še gwzenagcho che Spiritw che Diosen' cont bi gwzenagcho che da' malen', nach gata' yela' mban checho toli tocanē.

¹⁴ Na' note'tezcho še chzenagcho che dan' chzejni'i Spiritw che Diosen' chio', naccho xi'in Dios.

¹⁵ Diosen' bene' chio' Spiritw chen' caten' gwque'e chio' ca xi'ine'. Da'nan' bich chžebcho Diosen' can' chžebcho to bene' znia cate' choncho xšinen'. Bich chžebcho Diosen', san chol güižchone', che'chone': "Xa".

¹⁶ Na' lecze Spiritw chen' chnen lo' lažda'ochon' cont nezecho naccho xi'in Dios.

¹⁷ Na' da' naccho xi'in Dios, gwžin za cate' yogo' da' de che Criston' gaquen checho txen len le'. Na' can' bzanlaže' cuin Criston' gwdi gwxaque', can' cheyala'cze zanlaže' cuincho saca'zi'cho bi da' gac checho cont Diosen' gone' ga gacchgua güen checho txen len le' yaban'.

¹⁸ Yežlio nga de da' chzaca'zi' chzaca'yaše'cho. Perw chacda' bibi zaca'czen cue' yichjcho che da' ca' chac checho, le gwžin za leca mba juisyw gac checho cate' šjayzoacho len Diosen'.

¹⁹ Diosen' bene' benač, bene' beyixe', len bica'chle da' zjade. Na' yogo'cho len bichle da' ca' bene' zoacho lo' juisyw chbezcho batcan' gon Diosen' gacchgua mba che chio' naccho xi'ine'.

²⁰ Na' yogo' da' ca' ben Diosen' bich zjanacšagüen'. Na' gague con to gualazen zjanaquen ca', san Diosen' bžie' bia' zjanaquen ca'. Perw za' yeyonšagüe' Diosen' legaquen len beyixe' ca' na' len chio' benač. Na' txen chbezcho gone' cont gac checho binlo.

²¹ Yogo'cze da' ca' bene' yesebiayin', na' chesebezen batcan' žin za cate' gone' cont yeyac cuerp che chio' naccho xi'in Diosen' da' cobe na' da' zaca'chgua can' nac che Criston', le canan' lecze yesyeyacšagüe' da' ca' cont bich te čhegaquen.

²² Nezecho za na'aža yogo' da' ca' ben Diosen' chesežaglaon ca to no'ole bene' chzan.

²³ Na' gague da' ca'ze chesežaglaon, san lencezo chio' beñaçh chžaglaochi na' chbežgüe'cho. Ba ben Diosen' chio' Spiritw çhen' cont nezecho gwžin ža garquech güen çhecho. Na' chbežgüe'cho lo' lažda'ochon' chbezcho batcan' gon Diosen' cuerp cob chechon' cont gwlo'e ba nque'e chio' ca xi'ine'.

²⁴ Cate' Diosen' bene' yela' mban çhecho toli toçane gwzolaog chbezcho gone' cuerp cobe chechon', na' lenna' ne' chbezcho. Nono zoa ne' chbeze' gac da' nezde' ba goc.

²⁵ Na' še biña' le'echo da'na' chbezcho gac, cheyala' cuezcho gaquen sin cbi çaxaque'laže'cho.

²⁶ Na' Spiritw çhe Diosen' chaclenen chio', le bi nezecho can' cheyala' goncho yoł güižcho Dios, san Spiritw çhe Diosen' çhacbe'en cate' con chebanecho na' cate' bi chezelecho diža' da' güe'lencho Diosen', nach çhnen gualazcho len diža' da' bi chejni'icho.

²⁷ Na' Dios ben' çhna' chgüie' yichjlaždao' yogo'cze bene', chejni'ide' bin' chaclaže' Spiritw çhen' cate' çhnen gualazcho, le ba gwleje' chio' naccho lo ne'e. Na' con da' chaclaže' Diosen' çhnaç Spiriton' lagüen'.

Diosen' de'e chio' na' da'nan' nono soe chio'

²⁸ Na' nezecho bite'tez dan' çhac, Diosen' chone' cont gac güen çhe chio' chaquechone', le ba gwleje' chio' cont naccho lo ne'e can' gwnalaže'.

²⁹ Cate' biña' galjcho Diosen' gwneze' šejnilaže'chone' na' bsi'e xnezen' gac yichjlažda'ochon' güen can' nac yichjlaždao' Xi'ine' Jesucriston'. Bsi'e xnezen' gac Jesucriston' bene' blao lao yogo'cho na' chio' gaccho ca biše' lježe' bi' xcuide'ch.

³⁰ Can' naquen, cani'te Diosen' bsi'e xnezen' gac yichjlažda'ochon' güen can' nac yichjlaždao' Jesucriston' na' gwleje' chio' cont naccho lo ne'e. Lecze beyone' chio' bene' güen len le' na' bene' cont gacghua güen çhecho txen len Jesucriston' yaban'.

³¹ Çatec güenna' çhon Diosen' len chio' ba bsi'e xnezen' gac çhecho yogo' da' ca'! Len' de'e chio', nachen' notno soe chio'.

³² Diosen' bi bžone' saca'zi' Xi'ine' Jesucriston', san gwsele'ne' cont yeque'e xtoła'chon'. Da'nan' nezecho yebede' gone' chio' yogo' bite'tez da' yažjecho.

³³ Diosen' ba gwleje' chio' naccho lo ne'e, na' beque'e xtoła'chon'. Na' notno soe gwcuış chio' lagüen', le ba gwne' bibi xtoła'cho de.

³⁴ Nono zoa no gac gon cont na Diosen' de xtoła'cho. Criston' bzanlaže' cuine' gosote'ne' cont beque'e xtoła'chon', na' beyas bebane' ladjo bene' guat ca', çhi'e çhnabi'e txen len Diosen'. Na' len' çhnie' gualaz chio' lao Diosen'.

³⁵ ÇDe da' gwžon cont Criston' bich gacde' chio'? ÇGwžon no da' mal da' gac çhecho? ÇGwžon no yela' yaše' yela' zi' da' gac çhecho? ÇGwžon no yela' xi'a che bene' chgue'e chio'? ÇGwžon no yela' chbił chdon çhecho? ÇGwžon cate' bi de xalana'cho? ÇGwžon še bi da' xož gac çhecho? ÇGwžon še za' no bene' gote' chio'? Bibi de da' gwžon cont Criston' bich gacde' chio'.

³⁶ ÇChac can' nyojcze Xtiža' Diosen' žan:

Xanto' Dios, da' chejnilaže'to' le' nita' bene' çhesaclaže' yesote' neto' do ža do yel.

Çhesone' xbab nacto' ca to xila' be yesote'.

³⁷ Na' la'czla' yogo' da' mal ca' za'ac len chio', bi çhac çhop laže'cho, san chebechgüecho le nezecho zoacze Criston' çhacde' chio'.

³⁸ Neda' nezda' bibi de da' gac gwžon cont Diosen' len Criston' bich yesacde' chio'. Yela' goten' bi gonen, ne yela' mbanna', ne no angl, ne no da' xigüe', ne no bene' gwnabia', ne da' çhac çhecho na'a o bichle da' za'za'.

³⁹ Ne da' de le'e yaban', ne da' de gabilen', ne bichle da' ben Diosen' bi gac yosožonen cont Diosen' bich gacde' chio'. Ba blo'ede' catec çhacde' chio' dan' gwsele' Xancho Jesucriston' beque'e xtoła'chon'.

9

Diosen' gwque'e bene' Israel ca' ca xi'ine'

¹⁻² Neda' naca' txen len Criston' na' choa' diža' li, bi çhonlaža', çhnia' çhacyaše'chgüeda' na' çhacchgüeda' lo' lažda'ogua' che bene' gualaž çhia' bene' bi çhesejnilaže' Criston'. Spiritw çhe Diosen' chaclenen neda' cont nezda' diža' lin' choa'.

³ Çhacda' gwzanda' cuina' cuiaya'a šeca' da' cuejiže' Diosen' neda' cuit Criston' gonen cont bene' gualaž çhia' ca' yesejnilaže' Criston'. Çhacda' legaque', le gosalj'e zjanaque' bene' Israel ca neda'.

⁴ Diosen' gwque'e xozxtao' neto' bene' Israel ca xi'ine', na' gwzoe' len legaque' lo' be'ni' juisyw. Na' gwne' gaclene'ne', na' bnežjue' legaque' ley da' bzoj Moisésen'. Na' blo'ede'ne' naclen' yesonxene'ne', nach gože' legaque' bichle da' güen da' gone' len legaque'.

⁵ Bene' gole blao bene' za' che'ełte gosaque' xozxtao' neto' bene' Israel. Na' lo diaža çhegaque'na' golje Criston' ben' gwsele' Diosen'. Criston' lecze naque' Dios na' çhnabi'e

yogo'te beñaçh, yogo'te beyixe' na' yogo'loj bichle da' de yežlio nga na' gate'teze. Cheyała' gonxenchone' toli tocañe. Na' can' gonščaczcho.

⁶ Na' bi cheyala' goncho xbab bi ben Diosen' can' gwne' gone' güen len neto' bene' Israel. Gague yogo' neto' goljto' lo diaža che da' Israelen' na Diosen' nacto' bene' Israel, le gague yogo'to' chejnilaže'to'ne'.

⁷ Na' gague yogo' neto' goljto' lo diaža che da' Abrahanna' nacto' dogualje xi'in diaža che', le gague yogo'to' chejnilaže'to' Diosen' can' gwnejnilaže' da' Abrahanna' le'. Quinga gož Diosen' Abrahanna' cani', gwne': "Xi'in diaža che da' Isaaquen' gona' cuent lo diaža chion'."

⁸ Na' dan' gwne' ca' zeje diža' Diosen' chbeje' bene' zjanaque' xi'ine' gague da' gosalj'e lo diaža che bene' Israelen', san bene' chesejle'e gon Diosen' gac čhegaque' can' že' con can' gwyejle' da' Abrahanna', legacze' zjanaque' xi'ine' na' zjanaque' xi'in diaža che da' Abraham.

⁹ Quinga gož Diosen' Abrahanna' gone', gwne': "Cate' žin tiempen' bžia' bia' yida', cana' ba zoa to bi' che no'ol chio' Sara ni."

¹⁰ Na' gague da' na'zen', san lecz ca' Diosen' be'e diža' che xi'in da' Rebecan' bin' gosac choptebe' xi'in da' xoxxta'oto' Isaac.

¹¹⁻¹² Cate' biña' yesalje bi' cuaš ca' na' bibi na' yesombe' cont naçho zjanacbe' bi' güen o bi' mal, Diosen' blo'ede' chbeje' note'tez bene' chaclaže' cont gone' güen len legaque'. Le Diosen' gože' Rebecan': "Bin' galje da' nechw gwzexjw yichjbe' cont bin' za' cože'ben' nabia'be' lebe'." Gwne' ca' cont nezecho chbeje' bene' gac güen čhegaque', gague lagüe da' chesone' bi' da' güen, san cont gac can' chnalažen'.

¹³ Na' ga yoble nyoj Xtiza' Diosen' žan: "Godca' Jacob na' bgue'eda' Esaü."

¹⁴ Bi cheyala' goncho xbab Diosen' cbi chone' da' zej to licha dan' chone' ca'. Zejcze' to licha.

¹⁵ Chone' can' gože' Moisésen' cani'te, gwne': "Yeyaše'laža' con non' chazlaža' ži'ilaže'da'." na' ži'ilaže'da' con non' chazlaža' ži'ilaže'da'."

¹⁶ Diosen' chbeje' bene' cont yeyaše'laže'de' le', gague can' chaclaže' beñaçhen', na' gague da' chesone' bi' da' chesone', san Diosen' cheyaše'laže'de' con non' chbeje' yeyaše'laže'de'.

¹⁷ Na' Xtiza' Diosen' nyojen can' gože' bene' gwnabia' che Egipton', gwne': "Neda' bena' naco' rey cont chlo'eda' bene' yela' guac čhia' da' chona' len le'. Chonan' cont yeseneze bene' že' doxen lo yežlion' zoa' chnabi'a."

¹⁸ Can' naquen, Diosen' cheyaše'laže'de' con non' chazlaže' yeyaše'laže'de', na' lecze bene' zjanaque' bene' güedenag, lecze chazlaže' gone' legaque' bene' güedenag.

¹⁹ Na' da' chon Diosen' ca', guacte gonle xbab nale: "Con can' ba nžia Diosen' bia' chon chio' beñaçh. ¿Bixçhen' že' de xtola'chon' še ca'?"

²⁰ Perw žno nac chio' beñaçh gacyožlencho Diosen'? Ca to no yeso' xguague bi gac yen' bene' ben len: "¿Bixçhen' beno' neda' quinga?"

²¹ Bene' güen yeso' xguaguen' guac gone' con can' chazlaže' len gonan'. Chac chone' ton da' nac xdanchgua na' len gona' na'ze gone' yeto da' gon žin len bite'teze.

²² Na' bi naçho chon Diosen' con can' chazlaže' len chio' beñaçh yogo' ni'a, nžie' bia' gwnežjue' castigw toli tocañe che bene' ca' bi chosozenag che', na' nape' yela' guac cont gone' ca'. Perw chzoede' sša chape' yela' chxenlaže' len legaque' na' gague la' sela'te' legaque' lo yi' gabilen' la'czla' zjazaque' yesebiaye'e.

²³ Chone' ca' le nžie' bia' gone' da' güen juisyw len note'tezcho chejnilaže'chone', chion' cheyaše'laže'de'. Cani'te gwleje' chio' gac da' mba juisyw čecho cate' šjayzoacho len le'.

²⁴ Chion' ba gwleje' gac güen čecho bałcho naccho bene' Israel na' bałcho bi naccho bene' Israel.

²⁵ Can' ža le'e libr dan' bzoj Oseas ben' be' xtiža' Diosen' cani', žan:

Bene' ca' bi zjanaque' yež čhia', neda' Dios nia' legaque' yež čhia',
na' bene' ca' bi godca', yapegaca'ne' chacda' legaque'.

²⁶ Na' yež gan' gož Diosen' bene' ca': "Bi nacle yež čhia'",
na'teze Dios ben' zoa toli tocañe ye'e legaque' xi'ine'.

²⁷ Na' Isaías ben' be' xtiža' Dios cani' gwne' quinga che da' xoxxtao' neto' bene' Israel: "La'czla' chio' bene' Israel šancho ca yox da' chi' cho'a nisdao', bał gacho šjayzoacho len Diosen'.

²⁸ Le Diosen' gone' can' ba nçhoglagüen' len chio' beñaçh, na' bedao'nez gone' doxen can' ba ngüie' gone'."

²⁹ Gac can' ža yeto da' bzoj Isaíasen' cani', žan:

Šaca' Xancho Diosen' ben' nape yela' guac xen bi bocua'añe' to çhope bene' lo nación Israel
çhechon',

ba gwžiai'cho can' gosac che bene' Sodoma na' bene' Gomorra ca'.

Bene' Israel bene' bi chesejnilaže' Criston'

³⁰ Quinga ba goc, bene' bi zjanaque' bene' Israel bi besyeyiljue' nacle yesone' cont Diosen' ne' zjanaque' bene' güen len le', perw bale' ba chesejnilaže' Criston' na' da'nan' ba zjanaque' bene' güen len Diosen'.

³¹ Na' zan bene' Israel gualaž cheto' zjanao' to ley da' chžian bia' naclen' yesone' cont yesaque' bene' güen len Diosen'. Perw bi zjanaque' bene' güen len le', le bi chesone' doxen can' žanna'.

³² Na' bi goc yesaque' bene' güen len Diosen', le gosacde' yesone' da' güen cont yesaque' bene' güen len le' na' bi gosacbe'ede' con bene' yesejnilaže'ne' yesaque' bene' güen len le'. Goc chegaque' ca chac che bene' jati'i to yej.

³³ Quinga nyoj Xtiza' Diosen' chegaque':

Gan' nzi' Sión seła' to bene',

na' bena' zaca'lebe' ca to yej da' chego' bene' na' ca to yej xen da' šjati'i bene' na' biže', le bene' zan bi yesejnilaže' ben' seła'.

Na' note'teze' yesejnilaže' bena' sełan', gwbat yesyetinjde' che dan' gosejnilaže'ne'.

10

¹ Bene' migw, lo' lažda'ogua' che'nchgüeda' bene' Israel gualaž chia' yesejnilaže' Jesucriston' cont gata' yela' mban chegaque' toli' tocaņe, nachen' choł güiža' Diosen' chnaba' gaclene' legaque'.

² Nežda' da' zan da' chesone' chesacde' yebe Diosen' legaque', perw bi chesacbe'ede' bin' chazlaže' Diosen'.

³ Bi chesejni'ide' cheyała' yesejnilaže' Criston' cont yesaque' bene' güen, san chesyeyiljue' bi da' güen da' yesone' chesacde' cont yesaque' bene' güen len le'. Da'nan' bi chesejnilaže' Jesucriston' can' chaclaže' Diosen' yesone'.

⁴ Le yogo' bene' chesejnilaže' Criston' ba besyeyaque' bene' güen len Diosen'. Na' chio' chejnilaže'chone' ba nežečno nono gac gonyane' can' ža ley dan' bzoj Moisésen', neca gac yeyaque' bene' güen da' na'ogüe' lezen.

⁵ Da' Moisésen' bzoje' can' cheyała' gon bene' cont gaque' bene' güen len Diosen', gwne': "Note'teze bene' chone' cayanen' ža leyna', nachen' guac bane' toli' tocaņe."

⁶⁻⁷ Na' chio' ba naccho bene' güen len le' da' chejnilaže'chone', na' bich choncho xbab načo: "¿No gac cue yaban' na' nō gac yetj gan' že' bene' guaten?" šaca' nacle goncho šjaxi'cho Criston' cont gaclene' chio'.

⁸ San diža' güen da' chyixjue'eto' žan: "Ba nombia'cho diža' da' chaclenen chio'. Choncho xbab che len na' choe'cho diža' can' žan." Lenņa' diža' da' chyixjue'eto' bene' cont yesejnilaže' Jesucriston'.

⁹ Che'to' bene': "Še güe'lenle bene' diža' cont yesenezde' chejnilaže'le Jesucriston' na' chzenagle che' da' naque' Xanle, na' še šejle'le lo' yichjlažda'ole Diosen' bechis bosbane' Jesucriston' ladjo bene' guaten', nachen' gata' yela' mban chele toli' tocaņe."

¹⁰ Le cheyała' šejle'cho lo' yichjlažda'ochon' cont yeyaccho bene' güen len Diosen' na' lecze cheyała' güe'lencho bene' diža' che dan' chejnilaže'cho Criston' cont gata' yela' mban checho toli' tocaņe.

¹¹ Xtiza' Diosen' nyojen žan: "Note'tez bene' yesejnilaže' Diosen', gwbat yesyetinjde' che da' gosejnilaže'ne'."

¹² Balcho naccho bene' Israel na' balcho bi naccho bene' Israel, toz can' chon Diosen' len yogo'cho, le Xancho Jesucriston' naque' Xan yogo'loł bene', na' cheyaše'laže'de' note'tezcho chnabcho gaclene' chio'.

¹³ Can' gwne': "Note'tez bene' yesenabe' gaclena' legaque', neda' naca' Xanle yebeja' legaque' lo da' malen'."

¹⁴ Na' žnacxe yeson bene' yesenabe' goclen lagüen' še bi chesejnilaže'ne'? Na' žnacxe yesone' yesejnilaže'ne' še biņa' yesende' xtižen'? Na' žnacxe yesende' xtižen' še nono zoa no güe'lene' legaque' xtižen'?

¹⁵ Na' žnacxe yeson bene' yeseyxjue'ede' xtiža' Diosen' še Diosen' bi sełe' legaque' yeseyxjue'eden'? Chac can' nyoj Xtiza' Diosen' žan: "Chbechgüecho caten' za'ac bene' cheseyxjue'ede' diža' güen chosozejni'ide' guac soacho binlo len Diosen'."

¹⁶ Perw gague yogo' bene' gualaž cheto' chosozenague' diža' güen che Diosen'. Chac can' gwna Isaias ben' be' xtiža' Diosen' cani', gwne': "Xana', nono chzenagtec diža' dan' chzeneto'ne'."

¹⁷ Bia'cze cheyała'cze yesene bene' diža' güen da' chzejni'in che Criston' cont yesejnilaže'ne'.

¹⁸ Na' chnaba': žbiņa' yesene bene' Israel gualaž cheton' diža' güen da' chzejni'in che Criston'? Bač gosenden'. Chac can' nyoj Xtiza' Diosen' žan: Bene' že doxen lo yežlion' ba gosende' xtižen';

ba zej xtižen' doxen.

¹⁹ Na' chnaba' da' yoble; žbi gosejni'i bene' Israel gualaž cheton' diža' dan' chzejni'in che Criston'? Ba gosejni'icdden'. Le da' Moisésen' bzoje' da' gwna Diosen' čhegaque', žan:

Neda' Dios gona' güen len bene' bi zjanac bene' nación chia', na' gue'ele legaque'.

Na' gona' güen len bene' nación ca' bene' bi chesejni'i, na' ža'ale.

²⁰ Nach Isaíasen' ben' be' xtiža' Diosen' cani' bi bžebe' gwđixjue'ede' da' nga gwna Diosen', žan:

Bene' bi besyeyiljw neda', besyeželde' neda'.

Na' bene' bi gosenab neda', blo'elagua' legaque'.

²¹ Na' Diosen' gože' bene' Israel gualaž cheton', gwne': "Yogo' ni'a chneyoeda' le'e cont gwzenagle čhia', na' zoachachle chonle güedenag len xtižan'."

11

Ba| bene' Israel yesejnilaže' Jesucriston'

¹ Bi cheyala' goncho xbab Diosen' bechojlaže' nación Israel četo' to ši'ize. Neda' naca' bene' Israel, golja' lo diaža che da' Abraham na' naca' diaža' che da' Benjamín.

² Biņa' yechojlaže' Diosen' neto' nacto' diaža che ben' gože' Israel, le gwleje' neto' cani'te cont nacto' nación che'. Le gon xbab can' nyoj dan' gwna Elías ben' be' xtiža' Diosen' cani', gwđagüe' xya che da' xozxta'oto' ca', gože' Diosen':

³ "Xana', bene' gualaž čhia' quinga ba gosote' bene' ca' goso'e xtižon', na' ba bosyochinje' mes de yej ca' gan' cheyala' yesonxene' le'. Yetoga neda' zoa' chzenaga' čhio' na' lencze neda' chese'nde' yesote'."

⁴ Nach Diosen' boži'e xtižen' gože'ne': "Ne' nita' gže mil bene' ba gwleja' bene' biņa' yosozoa xibe' yesonxene' l' gua'a lsaca' dan' nzi' Baal."

⁵ Na' ca'cze naquen ža' na'aža, neto' bene' Israel chejnilaže'to' Criston' bi nacto' bene' zan, perw Diosen' ba gwleje' neto' cont chonxento'ne', le nži'ilaže'de' neto'.

⁶ Diosen' gwleje' neto' cont chonxento'ne' da' nži'ilaže'de' neto'. Bi gwleje' neto' lagüe' da' nonto' bi da' güen. Šaca' gwleje' neto' lagüe' da' nonto' bi da' güen, bi naquen con to goclen da' chon Diosen' neto' lo yela' bene' šagüe' che' cate' chbeje' neto' še ca', san naquen to goclenze.

⁷ Zan bene' nación Israel četon', la'czla' chesonchgüe' da' chesacde' cheyala' yesone', bi chesyēželde' naclen' yesone' cont yesaque' bene' güen len Diosen'. Perw Diosen' gwleje' balto' cont šejnilaže'to'ne' na' none' neto' ca' to bene' güen. Na' bene' yezica'chle zjanaque' güedenag len Diosen'.

⁸ Chac čhegaque' can' nyoj Xtiža' Diosen' žan: "Diosen' bene' cont zjanaque' ca' bene' bicze nte. Na' ža' na'aža zjanaque' ca' to bene' bi chle'e len yejlagüen', na' ca' to bene' bi chene len nagen'."

⁹ Na' da' Davin' gwne' čhegaque':

Yogo' da' de da' chesyebede' yesaquen ca' to da' yeben legaque',

na' yesaquen ca' to ga šjaselazoe' yesaque' castigw.

¹⁰ Yesečhoj yichjilažda'ogaquen', na' yedote yesezaca'zi'e can' chzaca'zi' ben' nlegw čože' no'e yoa' zi'i.

Diosen' gwleje' ba| bene' bi zjanac bene' Israel cont chesejnilaže'ne'

¹¹ Nezececho zan bene' Israel gualaž cheton' bi chesejnilaže' Criston'. Na' chnaba', čzjanaque' ca' bene' gwyo'o yeja' ni'e? čše zjanaque' ca' bene' gwbiže' na' gote'? Zjanaque' ca' to bene' con gwyo'o yeja' ni'e na'ze. Da' bi chesejle'e che Criston' de latje cont le'e bi nacle bene' Israel chzenagle xtižen'. Da'n'an' legaque' gwžin ža' yesezelaže' gon Diosen' güen len legaque' ca' ba chone' len le'e bi nacle bene' Israel.

¹² Da' yoble chnia', da' bi chesejnilaže' bene' gualaž četo' ca' Criston', chac ca' cont yezica'chle bene' že' yežlion' yesenite' mba con še yesejnilaže'ne'. Na' da' bchoj nación Israel četon' lo na' Diosen', de latje cont le'e bi nacle bene' Israel soale mba lo na' Diosen'. Perw gwžin ža' cate' yogo'te bene' gualaž četo' yesenite' yesejnilaže' Diosen', na' cana'ch gac mba juisyw.

¹³ Na' le'e bi nacle bene' Israel, che'nda' nezele Diosen' gwsele' neda' cont güe'lena' le'e xtižen' le'e bi nacle bene' Israel. Na' chona' con ga zelao chzaque'da' cont bene' yosozenague' che Diosen'.

¹⁴ Le chaclaža' gona' cont bene' gualaž čhia' ca' yesezelaže' gon Diosen' güen len legaque' can' chone' len le'e chejnilaže'lene', na' gata' yela' mban čhegaque' toli' tocanē.

¹⁵ Diosen' ba bnite' zan bene' Israel gualaž cheton' ca'ale to tiemp cont le'e bi nacle bene' Israel gwbiga'le len le'. Na' gwžin ža' cate' gon Diosen' yesyebiga' yezan bene' gualaž četo' len le'. Na' leca' mba gac cate' yesyebigue' len Diosen'.

¹⁶ De costumbr che neto' nacto' bene' Israel cate' chonto' yetextil, na' chnežjwto' Diosen' to blōl dao' cuazin' cont chlo'eto'ne' doxenen naquen che'. Na' lecze še nacho to loe yaguen' naquen che Diosen', zejen lecze xoze' yaguen' naquen che'. Na' da' xozxta'oto' ca' ben' gosejnilaže' Diosen' cani' zjazaca'lebbe' ca' blōl dao' cuazina' na' ca' loe yaguen'.

¹⁷ Nación Israel cheton' zaca'leben ca' xoze' yag da' ba nchog xan yaga' to lao yag olivo güen na' ba bniten' šla'ale. Na' le'e bi nacle bene' Israel zaca'lebbe' ca' xoze' yag olivo da' ze do yiže', da' ba gwchogue' lagüen na' ba bozooen' yag güen cont beyaquen toze. Nach guac nacho loe yag güenna' ba noxen' le'e na' niže' chenna' chac banlenle.

¹⁸ Bi gaguele naquechle bene' güen ca' bene' Israel gualaž cheto' da' chac chele ca'. Gague le'e chnežjwle yela' mban che loe yaguen', san loe yaguen' chonen le'e yela' mban.

¹⁹ Le'e bi nacle bene' Israel, šeca che'lja lježle: "Diosen' bene' bene' Israel ca' yag da' gwchogue' xozen' cont goc bozooe' chio' gualaz legaue'."

²⁰ Da' li can' žalen'. Perw da' bi gosejnilaže' Criston', Diosen' bene' len legaue' ca' xoze' yag da' ba gwchog xan yaguen' len, na' ba bozooe' le'e lagüe da' chejnilaže' le' Criston'. Da' nan' bi ga'laže'le, san le' gwsaca' cont soačhačhle šejnilaže'lene'.

²¹ Da' bi gosejnilaže' Criston', Diosen' bene' cont gwdi gwxcaca' bene' Israel gualaž cheto' ca' bene' zjazaca'lebbe' ca' xoze' yag güenna', na' lecze ca' gone' saca'zi'le še bi soačhačhle šejnilaže'lene'.

²² Le' gonšč xbab can' nži'ilaže' Diosen' chio' chejnilaže'chone' na' can' chone' cont saca'zi' bene' ca' bi chesejnilaže'ne'. Nachen' cheyala' soačhačhle šejnilaže'lene' cont bi gone' saca'zi'le can' ba bene' len bene' Israel gualaž cheton' bi gosejnilaže'ne'.

²³ Na' Diosen' yebede' si' lo' ne'e bene' Israel gualaž cheto' ca' cate' yesejnilaže'ne', le nape' yela' guac cont yozooe' legaue' binlo len le', nach yesaque' ca' xoze' yag da' bezyone' toze len yag chen da' yoble.

²⁴ Le'e nacle ca' xoze' yag olivo da' ze yiže', Diosen' gwchogue' le'e na' bozooe' le'e lo' xoze' yag güen la'cžla' bi nacle dogualje xozen'. Na' naquechxe yebede' yozooe' bene' Israel gualaž cheto' ca' le'e yaguen' da' yoble bene' ca' zjazaca'lebbe' ca' dogualje xoze' yaguen'.

Bene' zan bene' Israel yesyeyaque' lo' na' Diosen'

²⁵ Bene' migw, che'nda' šejni'ile da' nga da' nono na' neze cont bi ga'laže'le gaguele zaca'chle clcl ca' bene' Israel gualaž cheto' ca'. Diosen' be'e latje zane' zjanaque' bene' güedenag len xtižen' šlac yesejnilaže' bene' bi zjanaque' bene' Israel ben' ba bsi'e xneze yesejnilaže'ne'.

²⁶ Nach gwžin ža yogo' bene' Israel gualaž cheto' ca' yesenita' yesaque' lo' na' Diosen'. Gac can' nyoj Xtiža' Diosen' žan:

To bene' choj lo' ciuda Siön yebeje' le'e lo' da' mal da' chonle,
le'e za'le lo' diaža che da' Jacob.

²⁷ Na' cate' žin ža yeca'a xtoła'len',
cana'ch ba goc can' ba gwnia' gona'.

²⁸ Dan' bi chesejle' zan bene' Israel gualaž cheton' diža' güen che Diosen', da' nan' ba bzooe' šla'ale nación cheton' na' ba gwleje' le'e bi nacle bene' Israel cont chejle'le che'. Perw na' Diosen' ne' chacde' bene' ca', le' gwleje' da' xozxta'oto' ca' cont yesaque' nación che'.

²⁹ Na' Diosen' bi chetinjde' che bene' mbeje' yesaque' nación che', neca chetinjde' che goclen da' chone' len benačhen'.

³⁰ Cana'te le'e bi bzenagle che Diosen' na' da' bi gosaclaže' bene' Israel gualaž cheton' yosozenague' che', nach beyaše'laže' Diosen' le'e na' goclene' le'e cont chzenagle che'.

³¹ Na' da' bi chosozenag bene' Israel gualaž cheto' ca' che Diosen' na'a, chac ca' cont žin ža gwlo'e Diosen' ne' cheyaše'laže'de' legaue' can' cheyaše'laže'de' le'e.

³² Diosen' ba gwchoglagüe' che yogo' benačhen' de xtoła'gague' da' bi chosozenague' che', na' ba bene' ca' cont lecze gwlo'ede' cheyaše'laže'de' yogo'cze'.

³³ Leca bene' sina' Diosen'. Nezczede' yogo'lol. Gwbat šejni'icho da' nžie' bia' gac o da' nžie' bia' gone' lo' yela' sina' che'.

³⁴ Nyoj Xtižen' žan: "Nono neze yogo' xbab che Xancho Diosen'; nono nape yela' sina' cont gwzejni'ide' le' can' cheyala' gonen'.

³⁵ Na' nono cheyala' gon xbab yebi' Diosen' güen len le' še bi da' ba be'ene'."

³⁶ Yogo'lol da' de naquen che Dios. Bene' benačh, beyixe' na' bica'chle da' zjade. Na' lagüe yogo'lol da' bene' zoe' blao. Len' gaxcene' toli tocañe. Can' gacšca.

12

Cheyala' gon cuincho lo' na' Diosen'

¹ Bene' migw, Diosen' ba cheyaše'laže'de' chio'. Da' nan' chneyoeda' le'e le' gon doxen cuinle lo' na' Diosen' na'a mbanle. Le' gonen do yichj do laže'le. Na' le' gac bene' laždao' xilaže' le' can' chazlaže' gonxenchone'.

² Bi goncho ca cheson bene' bi zjanombia' Diosen'. San cheyala' nabecho Diosen' gwše'e xbab chechon' cont yebecho goncho dan' chazlažen'. Na' chaclaže' goncho da' güen, da' chebede' na' yogo' da' zej to licha.

³ Diosen' nži'ilaže'de' neda' na' ba gwsele' neda' cont chyixjue'eda' xtižen'. Da'nan' chnia' bi cheyala' gonxen cuincho, san cheyala' gacbe'echo Diosen' ba godlene' chio' cont chejnilaže'chone' na' none' grasyw checho cont goncho bi da' goncho.

⁴ Can' nac cuerp chechon', zan cuen naquen na' gague toze žin da' cheson to to cuenen.

⁵ Lecze can' naquen len chio', bene' zan naccho chejnilaže'cho Criston' na' yogo' chion' naccho txen len le' na' len lježcho zaca'lebcho ca toze cuerp.

⁶ Diosen' none' grasyw chechon' gwde gwdele da' gon to tocho. Še ba none' checho chixjue'echo bi da' gože' chio', nach cheyala' chixjue'echon na' šejle'cho gaclene' chio' gonchon.

⁷ Na' še Diosen' ba none' checho gaclencho bene', cheyala' gaclencho legaue'. Na' še ba none' checho gwsed gwlo'echo bene', cheyala' gwsed gwlo'echone'.

⁸ Na' še Diosen' ba none' checho neyoecho bene' cont yesone' da' güen, cheyala' neyoecho'ne'. Na' še ba none' checho gwnežjwcho da' chyaže bene', cheyala' gwnežjwchon do yichj do laže'cho. Na' še ba none' checho gaccho bene' blao na' güia na' ljež chio' chonxencho'ne', cheyala' cue' yichjcho güia na'cho legaue'. Na' še ba none' checho yeyaše'cho no bene' yaše', no bene' gole o no bene' güe', cheyala' yebecho gaclencho'ne'.

Da' cheyala' gon chio' chejnilaže'cho Jesucriston'

⁹ Cheyala' gague ljež benačcho do yichj do laže'cho, na' cheyala' gue'echo da' malen' na' soačcho goncho da' nac da' güen.

¹⁰ Ca chaque biše' goljcho, ca'cze cheyala' gaguecho note'teze bene' lježcho na' gonchone' bene' xench ca cuincho.

¹¹ Bi gaccho bene' xagüed, san goncho da' non Diosen' chio' goncho do yichj do laže'cho, le chonxencho Xancho Jesucriston' len dan' chonchon'.

¹² Cheyala' yebecho da' nezecho šjayzoacho len Diosen'. Cheyala' gwyo gwčhejcho cate' chyi chzaca'cho. Na' lecze cheyala' yol güižcho Diosen' zan ni'a yogo' ža.

¹³ Cheyala' gaclencho bene' lježcho bene' chesejnilaže' Diosen' še bi da' cheseyažjde' na' gwlebchone' ližcho še zjanaque' bene' zito'.

¹⁴ Cheyala' nabcho lao Diosen' gac güen che bene' chosoči chososaca' chio'. Nabcho gac da' güen čegaque', gague da' mal.

¹⁵ Cheyala' yebecho txen len bene' chesyebe na' cuežcho txen len bene' chesebež.

¹⁶ Yogo'cho cheyala' goncho toze xbab. Bi cheyala' ga'laže'cho, san yol güižcho bene' yaše' bene' bibi chac na' bi gon cuincho bene' sina'.

¹⁷ Še bi da' mal chone bene' chio', bi načo lecze da' mal yebi'icho len le'. Cheyala' cue' yichjcho goncho da' güen cont yesena bene' le naczen güen dan' chonchon'.

¹⁸ Cheyala' goncho bi da' gac goncho cont soacho binlo len yogo'lol bene'.

¹⁹ Chacda' le'e, nachen' chnia' cheyala' gwdecho to šla'ale bite'teze da' chesone bene' chio'. Diosen' gwyoecze' nac gone' len bene' chosoči chososaca' chio'. Xtižen' nyojen žan: "Xancho Diosen' že': Neda' yoži'a che da' mal da' chesone', na' neda' gwnežjua'ne' castigw."

²⁰ Na' lecze žan: "Še chbil chdon bene' chgue'ede' chio', cheyala' güe'chone' da' ye'ej gagüe; le še goncho güen len le', guacbe'eljede' chone' da' mal."

²¹ Bi güe'cho latje nabia' da' malen' chio' na' yebi'icho mal len bene' chonde' chio' mal, san yebi'icho güen len legaue' cont yesyetiņjde' che da' malen' chesonen'.

13

¹ To tocho cheyala' gwzenagcho che justis bene' chesenabia', le Diosen' bnite' legaue' chesenabi'e.

² Še bi chzenagcho che bene' chesenabia', bi choncho da' nžia bia' Diosen' goncho, na' lecze chyiljwze xtol'a'cho na' gaccho castigw da' bi chzenagcho čegaquen'.

³ Bi cheyala' žebcho bene' ca' chesenabi'e še zoacho choncho da' güen, san še zoacho choncho da' xinj, nachen' žebcho yesone' chio' castigw. Na' cont bi žebcho legaue', con soacho goncho da' güen da' yesyebede'.

⁴ Justis ca' chesone' xšin Dios cont soacho güen. Perw še choncho da' xinj, cheyala' žebcho legaue', le zjanape' yela' chnabia' cont yesone' castigw che note'teze bene' cheson da' mal, le Diosen' none' lo na'gaquen' yosonežjue' castigw che bene' cheson da' mal.

⁵ Da'nan' cheyala' gwzenagcho čegaque' cont bi si'cho castigw na' lecze cont gacbe'echo lo' yichjlažda'ochon' choncho can' cheyala' goncho.

⁶ Lecze da'nan' cheyała' chixjwcho no che bien na' bichle da' cheyała' chixjwcho, cont bene' ca' chesenabia' guac yesone' da' yo'o lo ne'e yesone', na' cheyała' gwzenagcho chegaque', le Diosen' ba bzoe' legaque' cont chesone' dan' cheyała' yesone'.

⁷ Chixjwcho še bi da' čala'cho che bene'. Še čala'cho che bien, chixjwchon. Še čala'cho che impuestw, chixjwchon. Na' gapcho bala'añ bene' cheyała' dap bala'añ. Na' gonxencho bene' cheyała' gacxen.

⁸ Cheyała' chixjwcho doxen bi da' čala'cho che bene', na' lecze cheyała' gaque yogo' ljež benačcho, le še chaquecho legaque', ba choncho da' non ley che Diosen' mandadw goncho.

⁹ Leyna' žan: "Bi gata'lenle no'ole bi nac no'ol chele o bene' byo bi nac bene' chele, bi gotle bene', bi cuanle, bi güe' le diža' güenlaže' che bene' lježle, bi selaže' le bite'teže da' de che bene'." Na' dech da' ža leyna'. Na' yogo'cze da' nžia bia' leyna' goncho, bač chonchon še chzenagcho che dan' žanna': "Le gaque ljež benačle ca chaque cuinle."

¹⁰ Še chaque lježcho, bibi da' mal gonechone'. Da'nan' choncho doxen can' nžia bia' leyna' še ba chaque lježcho.

¹¹ Caten' gwzolaicho chejnilaže'cho Criston' gwnezecho gwžin ža yide' da' yoble. Na' na'a ba za' bagwze yide' da' yoble. Da'nan' bich cheyała' gaccho ca bene' čtas, bene' bi chon xbab.

¹² Yežlio nga zaca'leben ca ga nac čol, le že'chgua bene' cheson da' xinj; san gan' zoa Diosen' naquen ca ga yo'o be'ni'. Nach cheyała' cuejyichjo bich goncho da' xinj na' goncho con da' chazlaže' Diosen', le ba zoa yide Criston' yedyexi'e chio'.

¹³ Cheyała' goncho da' güen, le ba yo'o be'ni' che Criston' lo' yichjlažda'ochon'. Bi cheyała' goncho txen lo' lin' ga chbe' žaš, bi cheyała' gaccho borrašw, bi cheyała' gata'lencho no'ole bi nac no'ol čecho o bene' byo bi nac bene' čecho o goncho bichle da' nac da' yela' zto', na' bi cheyała' tullen lježcho o gue'echo bene'.

¹⁴ Cheyała' gon cuincho lo' na' Xancho Jesucriston' na' cue' yichjcho goncho da' chazlaže' cont da' malen' da' yo'o lo' yichjlažda'ochon' bi nabian' chio'.

14

Toz Diosen' nezde' še bene' lježcho nape' doła'

¹ Še zoa to bene' ba chejnilaže' Criston' na' biña' šejni'ide' nac cheyała' gone', con zoe' chacžejlaže', le gwlebe' gaque' txen len le'e, perw bi gacyožlen'ne' che xbab čhen'.

² Nita' bene' chesejnilaže' Diosen' chesacde' bi zjanape' doła' da' chesagüe' bite'teže yela' guagw, na' lecž nita' bene' yoble biña' yesejni'ide' bite'teže da' ye'ej gagwcho naquen güen lao Diosen'. Da'nan' chesacde' bi cheyała' yesagüe' bela' na' chesagüe' yiže' cuanže.

³ Ben' chagw bite'teže yela' guagw bi cheyała' gue'ede' ben' bi chagüe' bela', na' ben' bi chagw bela' bi cheyała' ne' che ben' chagüe' bela', le Diosen' ba none' chopte' ca xi'ine'.

⁴ ¿Noxe nac chio' gwlaže' čecho še nac chon ben' ba gwlej Diosen' ca xi'ine'? Diosen' naque' Xan xi'ine' ca', na' len' ne' che to tocho še choncho da' güen o še choncho da' xinj. Na' lecze len' gone' cont soačo goncho da' güen.

⁵ Nita' bene' cheson xbab nchoj to ža xen da' zaca'č len Diosen' ca yezica'chle ža ca', na' lecze nita' bene' chesacde' toz ca zaca' yogo' ža ca'. To tocho cheyała' soačo do yichj do laže'cho goncho da' chejni'icho cheyała' goncho.

⁶ Bene' cheson xbab de ža da' zaca'č ca ža ca' yezica'chle, chesebeje' žan' cont chesonxene' Dios. Na' bene' chesacde' toz can' zaca' ža ca', lecze chesonxene' Diosen' chesone' xbabben' ca'. Na' ben' chesagw bite'tez yela' guagw, chesonxene' Xancho Diosen' cate' chesagüen', le cheso'e yela' choxclen che Diosen' che dan' chese'ej chesagüen'. Na' ben' bi chesagw bela', chosožo'ne' yesagüen' da' chesonxene' Diosen' na' lecze cheso'e yela' choxclen che'.

⁷ Ne tocho bi yo'o lo' na'cho gwžiačo bia' can' soa cuezcho šlaque mbancho, na' neca yo'o lo' na'cho gwžiačo bia' nac gatcho.

⁸ Šlac mbancho zoačo cont goncho da' čaclaže' Xancho Jesucriston', na' še gatcho lecze cate' čaclaže' len' gatcho. Can' naquen, mbancho o gatcho, yo'očo lo' na' Xanchon'.

⁹ Cuin Xancho Criston' gote' na' beyas bebane' ladjo bene' guat ca' cont naque' Xan yogo' bene' chesejnilaže'ne' bene' zjamban na' bene' ba gosat.

¹⁰ Bi cheyała' nacho che bene' lježcho zjanape' doła' še bi da' chesone', na' bi cheyała' gue'e lježcho. Yogo'czecho techo lao Criston' cont le' čhogbi'en čecho še de xtoła'cho o še bibi de.

¹¹ Nyojče Xtiža' Diosen' žan:

Xancho Diosen' že':

Da' li naca' Dios, zoa' mbana',

na' yogo' bene' yedesezoa xibgaque' laguan',

na' yogüe' yesene' toz neda' zaca' yesonxen benač.

12 Can' naquen, yogo'czecho yodecho cuent lao Diosen' che bite'teze da' ba bencho šlac mbancho.

Bi goncho da' gwžigan' bene' lježcho gone' da' mal

13 Da'nan' chnia', bi cheyala' necho che bene' lježcho neche bi da' chesone'. Da' cheyala' yechoglaže'cho goncho, cuejyichjcho bi da' choncho še len chžigan' note'teze bene' lježcho gone' da' xinj o še len chonen ca šjabix šjalažoe'.

14 Xancho Jesucriston' bzejni'ide' neda' cont nezda' bi napcho doła' še gagwcho bite'teze yela' guagw. Perw še bene' chone' xbab gape' doła' lagüe da' gagüe' to da' gagüe', naquen mal gagüen' še ca'.

15 Še bene' lježcho chaque' tole lagüe da' chagwcho to da' chone' xbab naquen mal len Diosen', bi chaquechone' še chagwtezechon. Criston' bnejw cuine' gote' neche bene' lježchon', na' chio' bi cheyala' gagwcho bi da' gonen cont gac choplaže' bene' lježchon' cuejyichje' Criston' na' cuiaye'e.

16 Še choncho bi da' chaquecho naquen güen, perw na' bene' lježchon' chesacde' naquen mal, bi gonchon cont bi yesene' choncho da' xinj.

17 Še ba choe'cho latje chnabia' Diosen' chio' len xbab chechon', dan' che'ej chagwchon' bi naquen da' žialao xen len chio'. Da' nac da' žialao xen, goncho da' zej to licha, soacho binlo len Dios na' len bene' lježcho, na' soacho mbalaz da' yo'o Spiritw che Diosen' lo' lažda'ochon'.

18 Še choncho da' zej to licha, na' zoacho binlo len Diosen' na' len lježcho, na' zoacho mbalaz da' yo'o Spiriton' lo' lažda'ochon', da' li chzenagcho che Criston'. Nachen' chebe Diosen' can' chonchon', na' lecze yezica'chle bene' chesene' choncho güen.

19 Da'nan' cheyala' yeyiljwlaže'cho can' goncho soacho binlo tocho yetocho na' can' gaclen bene' lježcho ca' cont yesenita'chache' yesejnilaže' Criston'.

20 Diosen' ba bnitlagüe' xtola' bene' lježcho na' bi cheyala' gagwcho da' gonen gac choplaže' no bene' lježcho na' gone' da' chacde' naquen mal. Nezda' de latje gagwcho bite'teze yela' guagw, perw naquen mal gagwchon še len chonen choplaže' bene' lježcho.

21 Güenczen bi gagwcho bela' neca ye'ejcho vino na' neca goncho bichle da' goncho še len chonen cont bene' lježcho chacchoplaže' o gone' da' xinj o cuejyichje' bich šejnilaže' Criston'.

22 Še nezecho zoacho binlo len Diosen' da' chejnilaže'chone' na' chaquecho bi napcho doła' len bica' da' choncho, chopzcho len Diosen' nezecho. Mbalazen' zoacho še nezecho lo' yichjlažda'ochon' bi napcho doła' len bica' da' choncho.

23 Na' de xtola'cho še chagwcho to yela' guagw na' chacžejlaže'cho chaquecho bilja cheyala' gagwchon, le bite'teze da' choncho še chaquecho naquen mal gonchon, napcho doła' chonchon še ca'.

15

Cheyala' cue' yichjcho bene' lježcho

1 Balcho ba zoachachcho chejnilaže'cho Criston' na' nezecho de latje ye'ej gagwcho bite'teze. Perw cheyala' gapcho yela' chxenlaže' len bene' bina' yesejni'isagüe'de', na' bi goncho con da' žan checho.

2 To tocho cheyala' goncho bi da' güen da' chazlaže' bene' lježcho ca' goncho, cont gaclen legaque' yesejnilaže'che' Diosen'.

3 Goncho ca', le ne Criston' bi bene' con da' gwnazen che', san goc che' can' nyoj Xtiža' Diosen', žan gože' Xe' Diosen': "Bene' besegue'ede' le' na' gosene' diža' bya' chio', lencze chia' neda' gosene'."

4 Na' Xtiža' Diosen' da' bosozoj bene' cani' chzejni'in chio' cont gwoj gwčejcho šejnilaže'cho Diosen' cate' chzaca'zi'cho. Na' še goncho xbab can' žanna', na' gaclenchen chio' cont soacho lez gwžin ža gon Diosen' güen len chio'.

5 Diosen' choŋe' chio' yela' chxenlaže' cont chycho chčejcho cate' chzaca'zi'cho. Na' chnablaža' lecze gone' gac yichjlažda'ole toze tole yetole, con can' chazlaže' Cristo Jesusen'.

6 Na' gone' ca' cont toze can' nale gonxenle Dios ben' nac Xa Xancho Jesucriston'.

Diosen' chaclaže' bene' bi zjanac bene' Israel yesonxene' le'

7 Da'nan' cheyala' le'e to to bene' lježcho binlo ca Criston' chle'ede' to to chio' binlo, chio' chejnilaže'chone'. Goncho ca' cont gaxen Diosen'.

8 Can' goc len Cristo Jesusen', bzejw yichje' ben cuine' ca to bene' güen žin cont goclene' neto' bene' Israel. Blo'ede' diža' li be' Diosen' cate' gože' da' xozxta'oto' ca' gone' güen len legaque'.

9 Na' lecze bid Criston' cont le'e bi nacle bene' Israel lecze gonxenle Diosen' da' ba beyaše'laže'de' le'e. Chac ca nyoj Xtiža' Diosen' dan' žan:

Da'nan' gua' yela' choxcen chio' gan' že bene' bi zjanac bene' Israel,

goła' gonxena' le'.

¹⁰ Na' ga yoble žan:

Le'e bi nacle bene' Israel, le yebe txen len neto' bene' gwlej Diosen' nacto' nación che'.

¹¹ Na' lecze žan:

Yogo' le'e bi nacle bene' Israel, le gonxen Xancho Diosen'.

Yogo'lolle le güe' diža' che yela' gwnabia' che'.

¹² Na' da' Isaias ben' be' xtiža' Diosen' cani' bzoje' da' nga žan:

To bene' gualaž yide', bene' galje' lo diaža che da' Isai.

Le' nabi'e bene' že' to to yež na' to to nación,

na' bene' ca' bi zjanac bene' Israel yesebeze' gaclene' legaque'.

¹³ Diosen' chone' cont chebecho dan' nezecho šjayzoacho len le'. Na' chnaba' gonšque' cont soale mbalaz juisyw na' soa cuezle binlo len xbab da' yo'o yichjlažda'olen' da' zoale chejnilaže'le Criston'. Gonšque' ca' cont Spiritw che Diosen' gaclenen le'e soachachle yebele da' nezele šjayzoale len le'.

¹⁴ Bene' migw, nezda' ba nacle bene' šagüe' bene' chon da' güen, na' nezda' chejni'ichgüe'le na' chac chneyoe lježle.

¹⁵ Pero le'e cart nga ba beyaxjda' gwdiła' le'e cont gonchle xbab, le Diosen' beži'ilaže'le' neda' gwleje' neda'.

¹⁶ Gwleje' neda' cont chyixjue'eda' xtižen' len bene' bi zjanac bene' Israel. Na' Diosen' yebede' da' ba goclena' legaque' cont bale' gosejle'e xtižen' na' gosaque' lo ne'e cate' Spiritw chen' benen lažda'ogaquen' xilaže'.

¹⁷ Chbeda' chona' xšin Diosen' da' ba goclen Cristo Jesúsén' neda' chona'.

¹⁸ Bi cheyaxjda' gua' diža' che bi da' ba ben bene' yoble, san choa' diža' che da' ba ben Criston', le chaclene' neda' choa' xtižen' na' bichle da' chona' cont zan bene' ca' bi zjanac bene' Israel chosozenague' che'.

¹⁹ Spiritw che Diosen' goclenen neda' cont bena' yela' guac na' bichle da' besyebane bene' gate'teze gwya'a be'lena' legaque' xtiža' Diosen', gwzolagua' Jerusalén na' bžintia' gan' nzi' Ilirico. Na' ba gwdixjue'eda' xtižen' doxen gan' gwsele' neda'.

²⁰ Na' ba bena' byen ba bia' diža' güen da' chzejni'in che Criston' gan' nono na' šejnilaže'ne', le bi chaclaža' tia' gwłana' xlatje bene' ba chosozejni'ide' xtiža' Diosen'.

²¹ Da'nán' chac can' nyoj Xtiža' Diosen' žan:

Bene' ca' biña' yesende' xtižen' yesombi'ene',

na' bene' ca' biña' yesenezde' che' yesejni'ide' che'.

Pablon' šeje' Roma

²² Da' chzejni'ida' bene' ga yoble xtiža' Criston', da'nán' bi goc yida' gan' zoalen' la'czła' zan ni'a ba goclaža' yida'.

²³ Cana'te zelaža' yedeña'a le'e, perw na'ach ba beyož bena' da' gwlo'o Diosen' lo na' gona' do nga.

²⁴ Nach cate' ša'a España cana' chacda' tia' yedeña'a le'e. Na' mbalaz soa' yeyož le'eda' le'e na' gaclenle neda' cate' ša'a Españan'.

²⁵ Na' a ša'a Jerusalén šjasana' mechw da' gaclenen bene' lježcho ca' že' na' bene' ca' ba gwlej Diosen' chesejnilaže'ne'.

²⁶ Le bene' lježchon' že' yež ca' zjachi' distritw Macedonia na' Acayan' bosotobe' mechw da' gaclenen bene' lježcho ca' chesejnilaže' Diosen' Jerusalén ben' zjanac bene' yaše'.

²⁷ Bene' ca' bosotoben' besyebede' bosonežjue' mechon', na' naquen to goclen da' cheyała' yesone' len bene' Israel gualaž cheto' ca', le la'czła' legaque' bi zjanaque' bene' Israel, ba zjanone' chegaque' yogo' da' güen da' ba bzejni'i Diosen' neto' bene' Israel, na' da'nán' cheyała'cze yesaclene' bene' gualaž cheto' ca' len da' cheseyažjde'.

²⁸ Cate' bač beyož bena' lo na' bene' Jerusalén ca' mechon' bdooben', cana'ch sa'a ša'a Españan' na' tia' na'a le'e.

²⁹ Na' nezda' Criston' gaclene' neda' la'a gan' zoalen' cont güe'lena' le'e diža' güen che' da' gaclenen yichjlažda'olen' na' soachguacho mba.

³⁰ Bene' migw, nezda' chaquele Xancho Jesucriston' can' chacda'ne' neda', na' Spiritw che Diosen' chonen cont chaque lježcho tocho yetocho. Da'nán', bene' migw, chnaba' gacle neda' txen yol güižcho Diosen' cont gaclene' neda'.

³¹ Nabechone' bi gaca' lo na' bene' gualaž cheto' ca' bene' bi chesejnilaže' Criston' Judean', na' lecze nabechone' cont bene' lježcho ca' že' Jerusalén bene' yo'o lo na' Diosen' yesazlaže' ca' dan' güe'gaca'ne'.

³² Nach še Diosen' goņe' latje, mbalaz yedeña'a le'e na' yeyaclaža' soa' na' len le'e.

³³ Dios ben' chon chzoa chbezcho binlo len xbab da' yo'o lo' yichjlažda'ochon' gaclene' yogo'le len xbab chelen'. Ca'šcaczze gac.

16

Pablon' chguape' tiox bał bene' že' Roma

¹ Chneyoeda' le'e le gon txen len bene' zanchó Febe cate' le'e gan' zoalen'. Ba benchgüe' xšin Diosen' len bene' ca' chesedop chesežag chesonxene' Jesucriston' lo yež Cencrea.

² Le gwlebe' ca cheyała' gonle len ljež chio' yo' ocho lo na' Diosen'. Na' le gaclene' še bi da' chyažjde', le len' ba goclene' bene' zan na' lecze ba goclene' neda'.

³ Le gwguap tiox Priscila len bene' che' Aquila. Legaque' ba gosone' žin che Cristo Jesúsén' t xen len neda'.

⁴ Besezanlaže' cuingaque' yesate' cont bososle' neda' lo na' yela' goten'. Choa' yela' choxclen chegaque' can' gosonen'. Na' lecze yogo' bene' ca' bi zjanac bene' Israel bene' chesedop chesežag chesonxene' Jesucriston' cheso'e yela' choxclen chegaque'.

⁵ Le gwguap tiox bene' ca' chesedop chesežag liž Priscilan' na' Aquilan' chesonxene' Jesucriston'. Na' le gwguap tiox bene' xmigua' Epeneto. Chacda'ne', le naque' bene' nechw bene' Acaya gwejnilaže' Criston'.

⁶ Nach le gwguap tiox María no' olen' ba benchgua xšin Diosen' gan' zoalen'.

⁷ Na' le gwguap tiox bene' gualaž cheto' Andrónico len Junias. Legaque' byobch gosejnilaže' Criston' clal ca neda' na' txen gota'to' ližya. Lecz ca' postlw ca' yezica'chle cheso'e diža' güen chegaque'.

⁸ Le gwguap tiox bene' xmigua' Amplias, le chacda'ne' da' ba chejnilaže' Xancho Criston'.

⁹ Na' le gwguap tiox Urbano ben' chon xšin Criston' txen len chio', na' lecze Estaquis, le chacda'ne'.

¹⁰ Lecze le gwguap tiox xmigua' Apeles. Da' zan ba bene' blo'e chejnilaže' Criston' do yičh do laže'. Na' le gwguap tiox bene' ca' že' liž Aristóbulo.

¹¹ Na' le gwguap tiox bene' gualaž chia' Herodión na' lecze bene' ca' že' liž Narciso, con noe' chesejnilaže' Criston'.

¹² Le gwguap tiox no'ole xmigwcho Trifena len Trifosa, no'ol ca' cheson xšin Xancho Jesucriston'. Na' lecze le gwguap tiox bene' zanchó Pérsida. Chaquechone' da' ba benchgüe' xšin Xancho'.

¹³ Na' le gwguap tiox Rufo. Naque' bene' blao len chio' chejnilaže' cho Xancho Jesucriston'. Na' lecze le gwguap tiox xne'ena', le ba none' neda' ca xi'ine'.

¹⁴ Le gwguap tiox Asíncrito, Flegonte, Hermas, Patrobas na' Hermes len bene' lježcho zjanita' len legaque'.

¹⁵ Na' le gwguap tiox Filólogo na' Julia na' len Nereo na' bene' zanen', na' Olimpas na' yogo' bene' lježcho nita' len legaque'.

¹⁶ Na' cate' chežagle txen le gwnopa' na' lježle cate' chguap lježle tiox cont nachbia' chaque lježle. Na' bene' ca' chesedop chesežag chesonxene' Criston' yogo'te yež gan' ba gwy'a chosguape' le'e tiox.

¹⁷ Bene' migw, chneyoeda' le'e le gwsaca' cont bi gwzenagle che bene' zjanac bene' güetil, bene' chesacłaže' gonle da' xinj, le bi chesone' txen len dan' ba bsedle che Diosen'.

¹⁸ Bi chosozenague' che Xancho Jesucriston' san chosozenague' che da' mal da' yo'o lo yičhlažda'ogaquen' na' chesone' con can' žanna'. Na' cheso'e diža' xdan chosopede' bene' chesejle'daze cont chesexoayague' legaque'.

¹⁹ Yogo'ze bene' zjanезде' chzenagle che bene' chosozejni'ide' le'e, na' danan' chbeda'. Perw chaclaža' gacle bene' sina' cont gwzenagle che da' nac da' güen, gague gwzenagle che da' nac da' mal.

²⁰ Nach Dios ben' chon cont chzoa chbezcho binlo lecze yob gone' cont Satanásen' dan' chnabia' da' xigüe' ca' bi soen nabi'an chio'. Na' Xancho Jesucriston' soašque' gaclenšcace' le'e.

²¹ Timoteo ben' chonlen neda' xšin Criston' nga chguape' le'e tiox, na' lecze ca' cheson bene' gualaž cheto' Lucio na' Jasón na' Sosípater.

²² Neda' Tercio chzoja' cart nga con can' ža Pablon', na' lecze chguapa' le'e tiox, le naccho txen chejnilaže'cho Xancho'.

²³ Lecze Gayo chguape' le'e tiox. Neda' Pablo zoa' liže' na' lecze liže' nga chesežag bene' ca' chesonxen Criston'. Na' lecze Erasto ben' nac lo ne'e mechw che ciudan' chguape' le'e tiox na' len bene' biše' Cuarto.

²⁴ Soašca Xancho Jesucriston' gaclenšque' yogo'le. Na' cašcace' gac.

Chonxene' Diosen'

²⁵ Le gonxench Diosen'. Len' nape' yela' guac cont gaclene' le'e soachachle šejnilaže'lene' can' ža diža' güen da' chyixjue'eda' chzejni'ida' bene' che Jesucriston'. Na' chzejni'ida' xtiža' Diosen' da' nono na' neze cate' za' xete yežlion',

²⁶ perw na'a Diosen' ba bzejni'ide' chio' bi zejen da' ca' none' mandadw bosozoj beŋe' ca' bosozoj Xtižen' cani'. Na' Dios ben' zoa toli tocaŋe chaclaže' šej diža' chen' yogo' yež cont yogo' chio' beŋač šejnilaže'cho Jesucriston' na' gwzenagcho che'.

²⁷ Toze Diosen' zaque' gonxen chio' beŋač, na' tozen' napchgüe' yela' sina'. Na' da' gwsele' Xancho Jesucriston' chaclene' chio', da'nan' chac chonxenchone' toli. Ca'šcacze gac.

CART NECHW DAN' BZOJ POSTLW SAN PABLO CHE BEÑE' CA' ŽE' CORINTO

Pablon' chzoje' beñe' chesedop chesežague' chesonxene' Jesucriston' Corinto

¹ Neda' Pablo chzoja' cart nga. Diosen' gwleje' neda' par naca' postlw che Jesucriston', le can' gwnalaže'. Na' chguapa' le'e tiox txen len beñe' migw checho Sóstenes ben' lecze chejnilaže' Jesucriston'.

² Chzoja' cart nga par le'e chdop chžagle chonxenle Diosen' lo ciuda Corinto. Da' chejnilaže'le Jesucriston', da'nan' Diosen' ba gwleje' le'e cont yo'ole lo ne'e, can' gwleje' yogo' ben' chosol güiže' Xancho Jesucriston' na' zjanaque' le' txen gate'tezechle, le lecze naque' Xangaquen'.

³ Chnaba' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole.

Diosen' chaclene' chio' chejnilaže'cho Criston'

⁴ Yogo' ni'a choa' yela' choxclen che Diosen' par le'e can' chaclene' le'e lagüe chejnilaže'le Jesucriston'.

⁵ Na' da' chejnilaže'lene' chaclenchgüe' le'e cont chejni'ile yogo' da' ba bzejni'i Diosen' le'e na' cont choe'le diža' chen.

⁶ Na' ba chonle cont nacbia' xtiža' Criston' da' chejle'le naquen da' li.

⁷ Spiritw che Diosen' chonen cont chac chonle yogo' da' ca' chyažjen gonle šlac chbezcho yid Xancho Jesucriston' yeto.

⁸ Na' Diosen' gaclene' le'e soačhačhle gonle can' chazlažen' cont bibi doļa' gapple caten' yid Xancho Jesucriston' yeto.

⁹ Diosen' zoacze' chone' can' ba gwne' gone', na' le'na' gwleje' le'e cont nacle txen len Xi'ine' Jesucriston' ben' nac Xancho.

Nža' nža'te chesena beñe' chesonxen Jesucriston' Corinton'

¹⁰ Beñe' migw, le'e chejnilaže'le Jesucriston'. Da'nan' chneyoeda' le'e, le gon txen len lježle na' bich gacle chople o šon taple len da' chonle xbab na' len da' žale.

¹¹ Chnia' ca' beñe' migw, le bene' nita' liž Cloé ba gose'e neda' chdiļe chšašle.

¹² Chnia' chdiļe chšašle, le baļle žale: "Naca' txen len da' chsed chlo'e Pablon'." Na' yebaļle žale: "Naca' txen len da' chsed chlo'e Apolosen'." Na' yebaļle žale: "Naca' txen len da' chsed chlo'e Pedron'." Na' yebaļle žale: "Naca' txen len da' chsed chlo'e Criston'."

¹³ ČChaquale bid Criston' neče to chopzle? ČChaquale nedan' Pablo bnežjw cuina' gota' le'e yag cruz neče le'e? ČZsoale nis cont blo'ele chejnilaže'le neda'? Gague can'.

¹⁴ Choa' yela' choxclen che Diosen' bi bzoa' le'e nis, san Crispo na' Gayo na'zen' bzoa' nis.

¹⁵ Da'nan' noch no zoa len le'e beñe' yesene' bzoa' legaque' nis, le bi chaclaža' no yesena gwzoe' nis cont blo'e chejnilaže' neda'.

¹⁶ Na' neda' lecze bzoa' nis beñe' ca' že' liž Estéfanas, na' bi za'laža' še zoa nochle beñe' bzoa' nis.

¹⁷ Nezda' Criston' bi gwsele' neda' cont gwzoa' beñe' nis san cont chixjue'eda' diža' güen chen'. Na' bi cheyiljua' no diža' da' chaque beñačen' diža' sina' choa' cate' chyxjue'eda' diža' güen chen', le še beñe' yesone' xbab che yela' sina' chia', nach bi yesone' xbab che dan' ben Criston' bnežjw cuine' gosote'ne' le'e yag cruzen', na' lenña' nsan' yela' guac che Diosen'.

Criston' bedelo'ede' yela' guac che Diosen' na' yela' sina' che'

¹⁸ Beñe' ca' yesebiaye'e lagüe bi chesejnilaže' Jesucriston', chesacde' bibi zaca' xtiža' Criston' da' choe'cho che'cho legaque' bnežjw cuine' neče xtoļa'gaque' le'e yag cruzen'. San chio' chejnilaže'chone', chio' ba de yela' mban checho toļi tocaņe, nezecho diža' nan' naquen da' zaca'chgua, le nsan' yela' guac che Diosen'.

¹⁹ Chac can' nyojen žan:

Neda' gona' cont nacbia' gague da' li zjansina' beñe' ca' chesene' zjanaque' beñe' sina'.

Na' gona' cont beñe' ca' chesejni'i da' zan yežlio nga, bibi de gon ca dan' chesejni'ide'.

²⁰ Chacljele čchixe beñe' ca' zjansed yela' sina' che beñačen'? na' čchixe beñe' chososed chosolo'ede' ley che Diosen'? na' čchixe beñe' chac chesene' diža' xdan diža' sina' che dan' chac yežlio nga? Quinga nac čhegaque', Diosen' ba blo'e yela' sina' čhegaquen' bi naquen da' sina'.

²¹ Diosen' naque' beñe' sina' na' ba bene' cont yela' sina' che beñačen' bi chaclenen legaque' yesombi'ene'. Le Diosen' chazlaže' con beñe' yesejle' xtiže' dan' choe'to' gata'

yela' mban chegaque' toli tocane, la'czla' yezica'chle bene' chesacde' bibi zaca' xtižen' dan' choe'ton'.

²² Bene' Israel gualaž cheto' chesenabe' yesele'ede' yela' guac cont yesejle'e bin' ža Diosen', na' bene' chesac diža' griego cheseyiljue' no diža' da' chesacde' naquen da' sina'.

²³ San neto' chyixjue'eto' xtiža' Criston' can' bnežjw cuine' gosote'ne' le'e yag cruzen'. Na' bene' Israel gualaž cheto' ca' bi chesazlaže' da' chyixjue'eto' na' bitw chesejle'en. Na' bene' bi zjanaque' bene' Israel lecze chesacde' bibi zaca' dižan' chyixjue'eton'.

²⁴ Perw chio' ba gwlej Diosen' naccho xi'ine', la'aczla' še naccho bene' Israel o še bi naccho bene' Israel, nezecho Diosen' blo'e yela' guac chen' na' yela' sina' chen' dan' gwsele' Criston' bnežjw cuine' neče chio'.

²⁵ Bene' ca' bi chesejnilaže' Diosen' chesacde' bi nac Diosen' bene' sina' lagüe da' be'e latje got Criston' le'e yag cruzen', na' chesacde' chlo'en bibi yela' guac nap Diosen'. Perw gague can', san xbab che Diosen' naquen da' sina'ch ca xbab che beñachen', na' nape' yela' guac xench ca beñachen'.

²⁶ Bene' migw chia', le gon xbab can' nacle cate' Diosen' gwleje' le'e cont nacle xi'ine'. Gague zanle nacle bene' sina' len xbab che beñachen', gague zanle nacle bene' chnabia', gague zanle goljle lo diaža che bene' blao.

²⁷ Diosen' ba gwleje' chio' naccho xi'ine' la'czla' bibi yela' sina' che yežlio nga napcho, na' chesaque beñachen' bibi chac goncho; nach Diosen' chaclene' chio' len yela' guac che' na' yela' sina' che' cont bene' zjanac bene' sina' len xbab che beñachen' yesacbe'ede' na' yesacde' zto'.

²⁸ Diosen' ba gwleje' chio' naccho xi'ine', zanco naccho no bene' yixe', no bene' chesegue'e beñach, na' gwleje' chio' cont gwlo'ede' bene' zjanaque' blao len beñachen' bibi zjazaque' len le'.

²⁹ Diosen' bene' cont nono gac gonxen cuine' lagüen'.

³⁰ Diosen' ba none' chio' txen len Cristo Jesúsén', na' Criston' nse'e yela' sina' che Diosen' na' naque' la'zelagüe bene' güen bene' laždao' xilaže'. Na' dan' naccho txen len Criston', chone' chio' yela' sina' chen', na' yela' bene' güen chen', na' yela' bene' laždao' xilaže' chen', na' ba beque'e xtoła'chon'.

³¹ Da'n'an' Xtiža' Diosen' nyojen žan: "Bi cheyala' gonxen cuincho san gonxencho Xanchon'."

2

Pablo be'e xtiža' Criston' ben' gosote' le'e yag cruz

¹ Bene' migw, cate' bedetižjue'eda' xtiža' Diosen' len le'e, bitw bia' diža' zdebe da' bi gwyejni'ile na' gague bia' diža' xdan cont gaquele naca' bene' sina'.

² San bečoglaža' be'lena' le'e diža' che Jesucriston' can' bnežjw cuine' gosote'ne' le'e yag cruz neče xtoła'chon', na' bi be'lena' le'e bichle diža'.

³ Na' cate' gwzoa' len le'e gocbe'eda' bibi chac gona', na' leca bžeba' na' gola' gwxyziza' bena' xbab še bi gwzenagle xtižan'.

⁴ Na' diža' da' be'lena' le'e gague bian' len yela' sina' che beñachen' cont co'oyela' le'e gwzenagle chia', san Spiritw che Diosen' goclenen neda' len yela' guac chen' na' benen cont bzenagle.

⁵ Goclaža' šejnilaže'le Criston' gague neče yela' sina' che beñachen', san neče da' gwša' Diosen' xbab chelen' len yela' guac chen'.

Spiritw che Diosen' chonen yela' chejni'i

⁶ Na' len bene' ba zjayolagüe' chosozenague' che Diosen' choe'cho diža' sina' da' za' che Diosen', bi zan' che yežlio nga ne che bene' blao o bene' gwnabia' zjanita' na'a, le te che bene' ca' na' te che yela' sina' chegaquen'.

⁷ Diosen' ba bzejni'ide' neto' to yela' sina' da' nono gwyejni'i cani', to da' bi'e xnezen' gac cate' biña' xe yežlion', le cana'te bi'e xnezen' yid Criston' yeque'e xtoła'chon' cont soacho mbalaz toli tocane.

⁸ Na' ne toze bene' gwnabia' bene' že' yežlio nga bi gosejni'ide' yela' sina' che Diosen', le šaca' gosejni'iden', bi bosode'e Xancho Jesucriston' ben' nac bene' zaca' juisyw le'e yag cruzen' še ca'.

⁹ Na' Xtiža' Diosen' da' nyojen žan:

Nono zoa bene' ba ble'ede' da' güen da' gon Diosen' len bene' ca' chesacde' le'.

Nono na' yende' diža' can' gone',

neca na' yesone' xbab lo' lažda'ogüen' can' gaquen'.

¹⁰ Perw Diosen' ba bene' cont Spiritw chen' bzejni'in chio' can' gone', le Spiriton' chejni'in tcho'a yogo' da' chon Diosen', na' nezen da' ngaše' len beñachen'.

¹¹ Can' naquen len beṇaḇen', nono neze bi xbab chon beṇe' yoble, con to tocho nezecho bi xbabben' choncho. Na' ca'cze naquen len Diosen', con Spiritw ɕhe' na'zen' nezen bi xbab chone'.

¹² Na' Diosen' ba beṇe' chio' Spiritw ɕhen' cont nezecho yogo' da' güen da' chon Diosen' len chio' laḡue nži'ilaže'de' chio'. Da'nān' bi choncho xbab can' cheson beṇe' bi chosozenag ɕhe Diosen'.

¹³ Na' cate' choe'lento' le'e xtiža' Criston', gague choe'to' diža' len yela' sina' ɕheton', san choe'to' diža' da' bzejni'i Spiritw ɕhe Diosen' neto', na' beṇe' ba yo'o Spiritw ɕhe Diosen' lo' yichjlažda'ogaquen', legaɕe' chesejni'ide' da' ɕhed chlo'eto'ne'.

¹⁴ Na' beṇe' bi yo'o Spiritw ɕhe Diosen' lo' yichjlažda'ogaque' bi chesejle'e ɕhe diža' da' chon Spiritw ɕhe Diosen' neto' da' choe'to' len legaue', san chesacde' naquen to da' bibi zaca'. Na' bi chesejni'ide', le bi yo'o Spiriton' lo' yichjlažda'ogaque' cont gaclenen legaue' yesejni'iden'.

¹⁵ Na' cate' yo'o Spiritw ɕhe Diosen' lo' yichjlažda'ochon' chacbe'echo ɕhe bite'teze še naquen da' zaca', perw beṇe' bi yo'o Spiritw ɕhen' lo' lažda'ogaquen', bi zaca' yesene' še da' choncho naquen da' zaca'.

¹⁶ Na' Xtiža' Diosen' da' nyojen žan: "Nono zoa chejni'i xbab ɕhe Diosen' cont gwzejni'ide' Diosā'." Perw Diosen' ba beṇe' chio' Spiritw ɕhe' cont šejni'icho xbab ɕhe Criston'.

3

Gaccho txen len nochle beṇe' cheson xšin Diosen'

¹ Beṇe' migw, bi goc gua' xtiža' Diosen' len le'e can' chona' len beṇe' chosozenag ɕhe Spiritw ɕhe Diosen', le ne' chzenagle ɕhe xbab ɕhezle. Da'nān' zaca'leble ca bidao'.

² Cate' gwzoloa be'lena' le'e xtiža' Diosen' žinten ža' na'aža, biṇa' šejni'ile da' ca' chaclaže' Diosen' šejni'ile. Da'nān' ba bsd blo'eda' le'e da' bi naquen zdebe šejni'ile.

³ Chzenagle ɕhe xbab ɕhezle na' da'nān' bi chac šejni'ile xtiža' Diosen' da' naquen zdebe. Da' chgue'e lježe na' chdiḷe chšašle, nacia' chzenagle ɕhe xbab ɕhezle can' cheson beṇe' bi chesejnilaže' Criston'.

⁴ Chnia' chonle ca beṇe' bi chesejnilaže' Diosen', le ballē žale: "Nacto' txen da' ɕhed chlo'e Pablo", na' yeballe žale: "Nacto' txen da' ɕhed chlo'e Apolos."

⁵ Le gon xbab chia' neda' Pablo na' che Apolosen', con nacto' beṇe' güen xšin Dios. Na' Diosen' bene' cont gwzejni'laže' le Xāncho Criston' cate' be'lento' le'e xtižen', na' lecze gwleje' to to neto' cont gonto' con da' chnalaže'.

⁶ Neda' zaca'leba' ca to beṇe' goz, le be'lena' le'e xtiža' Diosen' da' nechw, na' Apolosen' zaca'lebe' ca' beṇe' chyilen, le bsd blo'ede' le'e gwdechle. Na' toz Diosen' chone' cont chac cosešen'. Ca'cze goc len le'e, Diosen' bene' cont gwyejle'le xtižen' da' be'lento' le'e.

⁷ Bitec bi zaca' neda' da' be'lena' le'e xtiža' Diosen' da' nechw, na' neca Apolosen' da' bsd blo'echde' le'e, san Diosen' zaca'chgüe' da' bene' cont gwyejle'le xtižen'.

⁸ Bene' chyixjue'ede' xtiža' Diosen' da' nechw na' bene' chyixjue'eden' da' gwchope txen chesone' xšin Diosen'. Na' Diosen' gone' cont to toe' yesenite' mbalaz con can' gosone' xšine'na'.

⁹ Neto' chzejni'ito' le'e xtiža' Diosen', guac naḇo nacto' beṇe' goz go'oṇ ɕhe Diosen' na' le'e nacle yežlio gan' chac žinṇa'.

Na' le'e chdop chžagle chonxenle Criston' lecze zaca'leble ca to yo'o ɕhe Diosen'.

¹⁰ Na' guac naḇo neda' naca' to beṇe' chac chon yo'o na' neda' bxia' len yo'ona', le Diosen' goclene' neda' chon bxia' xšinen' gan' zoalen'. Na' na'a nita' beṇe' yoble chosozejni'ide' le'e, na' guac naḇo chesebeque' ze'en. Na' note'teze beṇe' gacde' gone' xšin Diosen' cheyala' gonyāne' xbab še xšinen' gonon txen len lene yo'o dan' ba gwlecan'.

¹¹ Na' nono gac cuec bichle lene yo'o, le ba gwlecan', na' Jesucristo beṇe' chejnilaže'cho, len' naḇo naque' lene yo'ona'.

¹² Na' bite'teze ze'e da' chozoa beṇe' lo' lene yo'ona', chchejen con nac nonen', še nonen' de oro, de plata, de yej da' zaca', de yag o de yix o de dod. Na' ca'cze nac bite'teze da' choncho chaquecho chonchon par Diosen', chchejen še naquen da' zaca'.

¹³ Na' cate' žin ža yid Criston', gone' cont gacbia' ɕhe da' ben to tocho še naquen da' zaca' o še bitw naquen. Na' yogo' da' bencho da' bi naquen da' zaca', Diosen' yonitlagüen' len yi' ɕhe'na' can' chac che to yo'o de yag, de yix o de dod cate' cheyen.

¹⁴ Na' še bencho da' naquen da' zaca', lenṇa' bi yeniten, na' Diosen' gone' cont soacho mbalaz da' benchon.

¹⁵ Na' še dan' benchon' bi naquen da' zaca', da' ca' benchon' yesebiayin' lo' yi' ɕhe Diosen' na' bitec soacho mbalaz, con nachguaze gac yechojcho bi šeycho.

¹⁶ ¿Ba beyanlaže'le chio' chdop chžagcho chonxencho Jesucriston' yogo'cho txen zaca'lebcho ca to yodao' gan' chesonxene' Diosen'? ¿Ba beyanlaže'le zoa Spiritw che Diosen' len chio'?

¹⁷ Na' še no gone' cont chio' chdop chžagcho chonxencho Criston' cuejyichjcho diža' li chen', Diosen' gwnežjue' castigw toli tocane che bene' gon ca', le Diosen' zoe' len chio' na' naccho lo ne'e.

¹⁸ Bi siye' cuinle. Note'tezle še chaquele nacle bene' sina' len yela' sina' che yežlio nga, cheyala' gache'ele yela' sina' chelen' bi gaclenen le'e len Diosen'. Na' cheyala' gacle ca to bene' bibi chejni'i cont Diosen' gone' le'e yela' sina' chen'.

¹⁹ Bene' bi chesejnilaže' Diosen', yela' sina' chegaquen' bi naquen da' zejen len Diosen'. Na' Xtiža' Diosen' nyojen žan: "Bene' ca' chesacde' zjanaque' bene' sina', Diosen' gone' cont yela' sina' chegaquen' gwžiyain' legaque'."

²⁰ Na' yeto gan' nyojen žan: "Xancho nan' nezde' da' yesede che xbab che bene' sina' ca'."

²¹ Da'n'an' bi cheyala' ga'laže'le da' nacle txen len note'teze bene' chsed chlo'ede' le'e, le yogo'lo' bi da' de zjanaquen' chele cont yesaclenen le'e.

²² Neda', len Apolosen', na' len Pedron', gwseja' Diosen' neto' cont chaclento' le'e. Na' yežlio nga na' yela' mbanna', na' yela' goten', na' da' de na'a na' da' gata' bate'teze, yogo' da' ca' zjaden cont yesaclenen le'e.

²³ Na' nacle lo na' Criston' na' Criston' naque' lo na' Diosen'.

4

Da'yo'o lo na' postlw ca' yesone'

¹ Cheyala' gache'ele neto' ba gwdixjue'eto' xtiža' Diosen' len le'e nacto' bene' güen xšin Diosen'. Diosen' ba bzejni'ide' neto' da' nono gwneze cani' cont gwsed gwlo'eton' bene'.

² Na' chonen byen gonto' can' ngüe'e lo na'to' gonto'.

³ Na' ca naca' neda', bibi nonen len neda' še no justis che yežlio nga o še le'e nale bi chona' can' cheyala' gona'. Na' neca chni'a' che cuina' še chona' can' cheyala' gona'.

⁴ Lo' lažda'ogua' chacda' bibi do'la' napa' len bite'tez da' chona', perw gague da'n'an' na Diosen' chia' bibi xtola' de. Xancho Jesucriston' ne' še chona' can' cheyala' gona' o še bi chonan'.

⁵ Da'n'an' bi cheyala' žialaole nale che note'teze bene' še chone' can' cheyala' gone' o še bi chone'. Caten' yid Xancho Criston' yeto, canan' gone' cont nezecho da' nono neze na'a, na' gone' cont gache'ele can' nac xbab da' yo'o lo' yichjlaždao' benačhen'. Na' cana' na Diosen' še nocho chon güen.

⁶ Bene' migw, ba be'lena' le'e xtiža' Apolosen' na' xtiža' cate' bzejni'ida' le'e, cont soale gonle can' ža Xtiža' Diosen', le bi cheyala' ga'laže'le da' nacle txen len to bene' chsedde' le'e na' gue'ele yetoe'.

⁷ Na' ¿bixchen' chaquele zaca'chle ca yezica'chle bene'? Diosen' bene' yogo' da' de chele, na' da' ben' Diosen' yogo' da' de chele, bi cheyala' ga'laže'le.

⁸ Chacljele bibi chyažjele na' chacljele ba nacle bene' zaca'chgua len Diosen' na' guac nabia'le ca no rey, na' chaquele bi chyažjele neto'. Yebeto' šaca' da' li nacle ca no rey can' chaquelen' cont soato' mbalaz txen len le'e.

⁹ Chacda' Diosen' ba bene' cont bene' že' yežlion' yesele'ede' neto' postlw ca bene' zjanac la'zelagüe bene' bibi zaca', ca bene' nchoglaon chegaque' yesate'. Na' benačhen' len angl ben' že' gan' zoa Diosen' chesene'e can' chac cheto' ca to bene' chne'e to da' yežejde'.

¹⁰ Na' da' chonto' xšin Criston' da'n'an' bene' zan chesacde' bibi zaca'to', perw le'e, dan' ba chejnilaže'le Criston' chaclaže'le yesacde' nacle bene' sina'. Chesacde' bibi chac gon neto', perw le'e chaclaže'le yesacde' guac gonle bite'teze. Chesonxen bene' le'e na' chesegue'ede' neto'.

¹¹ Ža na'aža zan ni'a chdeto' gwbin chbił chdonto', bibi xa'ana'to' de, chesebaže' bene' neto' na' bibi ližto' de.

¹² Len ni'a na'to' chonto' žin cont chachanto'. Cate' chesezi'diža' bene' neto', con chnabto' nite' mbalaz, na' cate' chosoči chososaque' neto', chyo chchejto' bi da' chesonde' neto'.

¹³ Cate' chesene' cheto', choł güižto' legaque' diža' šagüe'. Na' ža na'aža nita' bene' zan chesonde' neto' ca to no beb dao' o to no da' naquen zban da' ba becho'onen.

¹⁴ Chzoja' da' nga gague cont gaquele zto' san cont gwzejni'ida' le'e, le nacle ca xi'in'a' na' chacda' le'e.

¹⁵ Na' la'czla' bene' zan yesaclaže' yososed yosolo'ede' le'e che Criston', bi yesenita' zane' yesacde' le'e ca xale. Perw neda' naca' ca xale, le neda' gwžialagua' gwdixjue'eda' le'e diža' güen che Jesucriston' cont chejnilaže'lene'.

¹⁶ Na' da'n'an' chneyoeda' le'e gonle can' chonan'.

¹⁷ Da' nan' chsel'a Timoteon' gan' zoalen'. Lecze ba nona'ne' ca xi'ina', le bzejni'ida'ne' cont chejnilaže' Xancho Jesucriston', na' zoacze' chone' can' cheyala' gone'. Na' chsela'ne' cont šjays'e'ede' laže'le' can' gwzoa gwleza' šlac bzejni'ida' le'e' che Criston', na' da' bzejni'ida' le'e' naquen lebe len da' chzejni'ida' bene' gate'teze chesedop chesežague' chesonxene' Criston'.

¹⁸ Na' ba'le' cha'laže'le' chaquele bich yida' gan' zoalen'.

¹⁹ Perw chacda' yob yida' gan' zoalen' še Diosen' gonšque' latje. Na' cate' yida', cana'ch yedena'a bene' ya'laže' ca' še yesone' can' chesenen'.

²⁰ Cate' Diosen' chnabi'e' yichjlaždao' bene', dan' chesonen' chlo'en yela' guac chen', gague xtiža'gague' na'zen' gwlo'en še chnabi'e' yichjlažda'ogaque'.

²¹ ¿Nac chaclaže'le' gona'? ¿Yida' gan' zoalen' na' gona' le'e' castigw, še yida' gwlo'a chacda' le'e' na' yedeya' diža' šagüe' len le'e'? Le gon xbab naquen' chaclaže'le' yedeyena'.

5

To bene' gwzoalene' xna'zie' ca xo'ole'

¹ Chesene' to le'e' zoalen'le xna'zile ca xo'olle. Da' nga naquen to yela' zto' xen, ne bene' ca' bi chesonxen Diosen' bi chžinlaže' yesone' ca'.

² Na' la'czla' tole chonle da' malen' nac ca', chaquele güenchgua chonle lao Diosen'. Cheyala' yegüine'le na' cheyala' yebejle ben' chon ca' len le'e'.

³ La'czla' bi zoa' na' len le'e, zoaccho txen na' ba gwchoglagua' can' cheyala' gonle len ben' chon da' malen', can' gonle la'czla' ca zoa' len le'e'.

⁴ Nach cate' ndop nžagle chonxenle Xancho Jesucriston', le gon xbab naccho txen, na' zoacze Xancho Jesusen' chaclene' le'e' len yela' guac chen'.

⁵ Nach le cuej ben' ca'ale na' le gone' lo na' Satanás dan' chnabia' da' xigüe' ca' cont gonen can' chaclažen' len le'. Le gon ca' cont še yoša'šca yichjlažda'ogüe' na' bi cuiaye'e toli tocane cate' žin ža yid Xancho Jesusen' yeto.

⁶ Bi cheyala' gaguele chonchguale güen lao Diosen'. ¿Bi chacbe'ele chcha' o da' malen' cate' cho'echo latje, can' ža diža' dan' chesene': "Late'ze levadura da' chosočhine' cate' chesone' yetextil chonen cont cheyas doxen cuazin'?"

⁷ Bene' Israel gualaž cheto' bi chesagüe' yetextil da' nchixen levadura lo lni pascw cheto' na' bi cheso'e latje yega'an ne late'ze levaduran' lo' ližgague' lo lnin'. Na' ca'cze chio' chejnilaže'cho Criston' bi cheyala' güe'cho latje šo' da' malen' yichjlažda'ochon'. Cheyala' cuejyichjo yogo' da' malen' cont gaccho ca to bene' cobe, le Criston' bnežjw cuine' gote' cont bocobe' yichjlažda'ochon', na' len chio' Criston' zaca'lebe' ca to be gosot bene' Israel gualaž cheton' lo lni pascon'.

⁸ Da'nan' cheyala' cuejyichjo bite'teze da' mal, cont gaccho ca to bene' cobe, soacho do yichj do laže'cho na' goncho da' zej to li.

⁹ Cana' bzoja' to cart gwnia' bi cheyala' soacho binlo len bene' chosozoa xtoe' na' bene' cheson bichle da' nac da' yela' zto' len cuerp čegaque'.

¹⁰ Gwnia' bi gac soacho binlo len bene' cheson da' nac yela' zto', na' bene' chesezelaže' bi da' de che bene', na' bene' cheseque'e da' de che bene' na' bene' chesonxene' l'gua'a lsaca'. Na' can' gwnia' bi gac soacho binlo len legaque', cho'a diža' che ljež chio' chejnilaže'cho Criston'. Le šaca' choa' diža' bi gac soacho binlo len note'tez bene' cheson ca', bich gac bi goncho lo yežlio nga še ca'.

¹¹ San da' žia' cheyala' goncho, bi soacho binlo len to bene' lježcho bene' chejnilaže' Criston' še nzoa xtoe' o še chone' bichle da' nac da' yela' zto' len cuerp čhe', o še chzelaže' da' de che bene', o chejnilaže' l'gua'a lsaca', o chzi'diže' bene', o naque' bene' borrašw o bene' gwban. Neca cheyala' gagwlencho bene' lježcho bene' cheson ca'.

¹² Bi naquen checho čogbi'acho che bene' bi chesejnilaže' Criston' še da' chesone' naquen güen o naquen mal, san chio' chdop chžagcho chejnilaže'cho Criston' cheyala' čhogbi'acho che lježcho še chesonteze' da' mal.

¹³ Na' Diosen' čogbi'e' che xto'la' bene' ca' bi chesejnilaže' Criston', san le'e, le yebej bena' gwnia' chon da' malen' ladjwle.

6

Bene' Corinto chesejnilaže' Criston' chesagüe' xya che lježgague' lao justis ca'

¹ Chebanda' čele can' chonle da' chagwle xya tole yetole na' chjana'le bene' bi chosozenag čhe Diosen' cont chesone' yela' justis čele. Cheyala' nabe lježle le'e' ba gwlej Diosen' nacle lo ne'e' cont legaque' yesone' yela' justis čele.

² ¿Bi nezele žin ža cate' chio' naccho lo na' Diosen' goncho yela' justis čhe yezica'chle bene' že' yežlio nga? Na' še goncho yela' justis čegaque', guac goncho yela' justis čhe bi da' dao' da' bitec zjazaca'.

³ Na' lecze žin ža goncho yela' justis che angl ca'. Na' naquechxe goncho yela' justis che bi da' cheson bene' lo yežlio nga.

⁴ Na' cate' gagwle xya che lježle, bi šejle lao bene' bi chesejnilaže' Criston' cont yesone' yela' justis chele, le xbab čhegaquen' bi naquen da' zaca'čgua len chio' chejnilaže'cho Criston'.

⁵ Žia' ca' cont yeto'ele che dan' chonle na' bich gonle ca'. ŽNe tole bi nacle bene' sina' cont gon yela' justis che lježle cate' bi chac chele?

⁶ ŽDa'nana' chjntagwle xya che lježle len justis ca' bene' bi chesejnilaže' Criston'?

⁷ Da' chacyož len lježle na'zen' chlo'en leca clelen' chonle. Mbalazech zoale šaca' chdele ca'ale še bi da' chone bene' lježlen' le'e. Yejni'a güe'le latje yeseque'e bi da' de čhele.

⁸ Perw le'e chca'ale bi da' de che lježle na' da' zan da' chone lježle.

⁹ ŽBi nezele bene' ca' zjanaque' bene' mal lao Diosen' bi yesyežine' yaban' gan' zoa Diosen' chnabi'e? Bi güe'le latje no gonle le'e. Nita' bene' chosozoa xtoe' na' bene' cheson bichle da' yela' zto' da' nac ca'. Na' nita' bene' chesonxen l' gua'a lsaca'. Na' nita' bene' chesata'lene' no'ole bi nac no'ol čhegaque' o bene' byo bi nac bene' čhegaque', na' nita' bene' byo bxej.

¹⁰ Nita' bene' chesebane' na' bene' chesezelaže' bi da' de che bene', na' bene' borrašw, na' bene' chesezi'diža' lježgaque' na' bene' cheseziye'e bene' yoble cont yeseque'e da' de čhegaque'. Na' ne to bene' chon da' mal dan' zjanac ca' bi yesyežine' yaba gan' zoa Diosen' chnabi'e.

¹¹ Balle benle da' mal dan' zjanac ca', perw na'a da' chejnilaže'le Xancho Jesúsen', Spiritw che Diosen' ba benen cont beyac lažda'olen' xilaže', na' benen cont nacle lo na' Diosen' na' cont nacle bene' güen len le'.

Cheyała' goncho da' güen len cuerp čechon'

¹² Da' li can' chesena bene', de latje goncho bite'teze, perw nezecho gague yogo' da' gonchon' naquen güen. Na' la'czla' še de latje goncho bite'teze, bi cheyała' güe'cho latje nabia' bi dan' gonchon' chio'.

¹³ Na' da' li can' chesena yebale', chesene': "Nsa' le'echon' par yela' guagw na' decze yela' guagw par gagwchon žinten lo' le'echo." Perw na' le'echon' len yela' guagon', chopten žin ža te čhegaquen. Na' cuerp čechon' bi nsa'chon cont gata'len xtocho o goncho bichle yela' zto' nac ca'. San nsa'chon cont gonxencho Xancho Jesucriston'. Na' Xancho Jesucriston' lecze chaclene' chio' len cuerp čechon'.

¹⁴ Diosen' bosbane' Xancho Jesucriston' ladjo bene' guat ca', na' lecze žin ža cate' yosbane' chio' ladjo bene' guat ca' len yela' guac čhen'.

¹⁵ ŽBi nezele naccho txen len Criston' na' cuerp čechon' zjanaquen che? Na' bi cheyała' goncho cuerp čechon' da' nac che Criston' lo na' no'ole zle'.

¹⁶ Note'teže še chata'le len no'ole bi nac no'ol čhele o bene' byo bi nac bene' čhele, cuerp čhelen' gaquen toze len cuerp čhen', can' ža Xtiža' Diosen' da' nyojen žan: "Bene' ca' čhope yesaque' toze cuerp."

¹⁷ Perw note'tezcho cate' chon cuincho lo na' Xancho Jesucriston', yichjlažda'ochon' chaquen toze len yichjlažda'ogüen'.

¹⁸ Da'nana' bi cheyała' gata'lencho no'ole bi nac no'ol čhecho o bene' byo bi nac bene' čhecho o goncho bichle yela' zto' da' nac ca'. Yezica'chle da' mal ca' bitec chosožiyain' cuerp čechon', perw da' ca' zjanac ca' chosožiyain' cuerp čechon'.

¹⁹ ŽBi chache'ele Spiritw che Diosen' zoan lo' yichjlaždao' to tocho ca' zoa to bene' liže'? le Diosen' ba gwsele' Spiritw čhen' zoan lo' yichjlaždao' chio' chejnilaže'cho Criston', na' bi gac goncho con bi žan čhecho.

²⁰ Na' da' zaca' xen da' ben Xancho Criston' cont bechojcho lo na' gwxiyen'. Da'nana' cheyała' goncho can' chazlaže' Diosen' len cuerp čechon' na' len yichjlažda'ochon', le chopten zjanaquen che'.

7

Pablon' cho'e diža' che yela' güešagna'

¹ Na' che dan' chnabele neda' le'e cart čhelen', še bene' byon' bi chaclaže' si'e no'olen' gaque' xo'ole, güenna' chone'.

² Perw na' že'čgua bene' chesedalene' no'ole bi nac no'ol čhegaque', na' bene' cheson bichle da' nac da' yela' zto' len cuerp čhegaquen', na' da'nana' yejni'a gwšagna'le na' to to bene' byo soa xo'ole' na' to to no'ole soa bene' che'.

³ Na' to to bene' byo cheyała' gone' da' naquen gone' len no'ol che' na' to to no'ole cheyała' gone' da' naquen gone' len bene' che'.

⁴ No'olen' bi gac ne' to gualaze' nac gone' len cuerp čhen' na' neca bene' byon' bi gac ne' to gualaze' nac gone' len cuerp čhen', san cheyała' yosozenag che lježe'.

⁵ Na' le'e nšagna'le bi gwžonle gonlen lježle da' cheyała' gonle len cuerp chelen', perw še naquen yela' güexi'a che choptele guaccze bi gonlen to term dao' cont soatezle yol güižle Diosen'. Na' te termen' yezoalen lježle da' yoble, le Satanás dan' chnabia' da' xigüe' ca' co'oyelan' le'e gonle da' mal še leca žan soalen lježle.

⁶ Ba gwnia' yogo' da' ca' cont nezele de latje soa xo'olle, perw gague nacho chon Diosen' mandaw gwšagna'le.

⁷ Chebeda' šaca' soa yogo'le can' zoa' neda' nono xo'ola' zoa. Perw nža'le grasyw da' non Diosen' to tocho che bi da' goncho.

⁸ Na' le'e nac to gualazle, chacda' güen ch bi gwšagna'le, na' lecze le'e ba got bene' chele bi yošagna'le, san soale to gualazle can' zoa' neda'.

⁹ Perw še leca žan soalenle no'ole o soalenle bene' byo, yejni'a gwšagna'le cont bi nabia' yela' chzelažen' le'e.

¹⁰ Na' le'e no'ole le'e nšagna'le, chona' mandaw bi yela'ale len bene' chelen'. Na' gague neda'ze žia' ca', le naquen da' chon Xancho Criston' mandaw.

¹¹ Na' še no'olen' yele'e len bene' che', cheyała' soa to gualaze' bi yeque'e bene' yoble o cheyała' yeyeje' šjayzoalene' bene' che' da' yoble. Na' lecze le'e bene' byo le'e nšagna'le, bi yela'ale len xo'ollen'.

¹² Na' le'e bene' yezica'chle, nia' can' chona' xbab cheyała' gonle, la'czła' Xancho'n' bibi gwne' che da' ca'. To to le'e bene' byo še ba nšagna'lenle no'ole bi chejnilaže' Criston' na' chaclaže' soalencze' le', bi cheyała' yela'ale len le'.

¹³ Na' to to le'e no'ole še ba nšagna'lenle bene' bi chejnilaže' Criston' na' chaclaže' soalene' le', bi yela'ale len le'.

¹⁴ Bi naquen mal lao Diosen' soalenle bene' chele o no'ol chele bene' bi chejnilaže' Criston', le Diosen' chi' yichje' choptele dan' chejnilaže'lene' tole. Šaca' bi naquen ca', xi'ine' ca' zjanacbe' ca' xi'in' bene' bi chesejnilaže' Diosen', perw gague can', le lente legacbe' chi' yichj Diosen' dan' chejnilaže'lene' tole.

¹⁵ Perw še bene' chele o no'ole chele bi chejnilaže' Criston' na' bich chaclaže' soalene' le'e, le yela'a, le Diosen' chaclaže' soacho binlo len lježcho.

¹⁶ Na' le'e no'ole še gonle güen len bene' chele na' le'e bene' byo še gonle güen len no'ol chelen', guacte gonen cont yesejnilaže' Criston'.

¹⁷ To tocho cheyała' soacho goncho da' non Xancho Diosen' lo' na'cho goncho cate' gwleje' chio' naccho xi'ine'. Chona' mandaw yesone' ca' gate'teze chesedop chesežague' chesonxene' Criston'.

¹⁸ Še ba zoale señw dan' že' circuncisión cate' gwlej Diosen' le'e nacle xi'ine', bi gonle cont yenit señon'. Na' še biña' soale señon' cate' gwlej Diosen' le'e nacle xi'ine', bi nable yosozoe' le'e señon'.

¹⁹ Bibi nonen len Diosen' še nsa'cho señw che circuncisión o še bi nsa'chon. Da' naquen da' zeje, cheyała' goncho con bi chaclaže' Diosen'.

²⁰ Con can' naccho caten' gwlej Diosen' chio' naccho xi'ine', ca'tezeczen' cheyała' soa cuezcho.

²¹ Še nacle esclavo cate' Xancho Diosen' gwleje' le'e, bibi sa'laže'le che dan'. Perw še guata' latje chixjwle cont chojle lo' na' xanlen', le chixjon na' yechojle.

²² Na' la'czła' še nacle esclavo che bene' cate' Xancho Criston' gwleje' le'e, Criston' ba naque' Xanle' na'a, gague benachen'. Na' chio' biña' gaccho esclavo che bene', nac Criston' Xancho, na' guac nacho naccho esclavo che'.

²³ Da' zaca' xen da' ben Xancho Criston' cont bechojcho lo' na' gwxiyen'. Da'n'an' bi cheyała' goncho xbab no' benach' naque' xancho.

²⁴ Bene' migw, da' yoble žia' le'e, con can' naccho cate' gwlej Diosen' chio' naccho xi'ine', can' soa cuezcho, le lao Diosen' chzoa chbezcho.

²⁵ Na' can' cheyała' gac che no'ol güego' ca', Xancho Criston' bi bene' mandaw can' gac chegacbe', perw neda' nia' can' chacda' cheyała' gac, na' ba beyaše' beži'ilaže' Xancho'n' neda', na' da'n'an' diža' da' choa' zaca'czen gwzenagle chen.

²⁶ Ba za' da' saca'zi'cho na'a, na' da'n'an' chacda' güen ch soa cuezcho con can' ba zoacho.

²⁷ Le'e nšagna'le, bi yela'ale len xo'olle, na' le'e biña' soa xo'olle, bi chiljw xo'olle.

²⁸ Perw bi nacho naquen mal še gwšagna'le, na' neca naquen mal še no'ol güego' gwšagna'. Con da' zan da' zed de yežlio nga che bene' zjanšagna', na' chaclaža' bi gac chele ca'.

²⁹ Bene' migw, chaclaža' nia' le'e da' nga: Bich chega'an' yezan iz cont goncho dan' ngüia Diosen' goncho. Da'n'an' le'e zoa xo'olle cheyała' soale gonle xšin Diosen' ca' bene' nono xo'ole' zoa.

³⁰ Na' še de da' yegüine'le, cheyała' soale gonle xşin Diosen' ca bene' bi chegüine'. Na' še zoale mbalaz, cheyała' soale gonle xşine' ca bene' bi zoa mbalaz. Na' še si'le bi da' si'le, cheyała' soale gonle xşin Diosen' ca bene' bibi gwxi'e.

³¹ Na' še bi da' chchinle da' de yežlio nga, bi cheyała' cue' yichjle che len, le da' te che yogo' da' chle'echo yežlio nga.

³² Na' chaclaža' bi cue' yichjle che da' ca' chac yežlio nga. Bene' nono xo'ole' zoa nlatje' gone' xbab che xşin Xancho Diosen' na' che bi da' chaclaže' Xancho' gone'.

³³ Perw bene' nşagne'e chi' yichje' che da' chac yežlio nga, le chone' xbab che bi da' chaclaže' xo'olen' gone', na' gague gac gone' xbab che toz Diosen'.

³⁴ Na' lecze nža' can' chac che no'ole nşagna' na' che no'olen' bi nşagna'. No'ole bi nşagna' mbec yichje' che xşin Xancho Diosen' na' chon cuine' lo ne'e do yichj do laže'. Na' no'ole nşagne'e chbec yichje' che da' chac yežlio nga na' bi da' chaclaže' bene' che' gone'.

³⁵ Ba gwnia' ca' gague cont gwžona' gwşagna'le san cont gaclena' le'e. Con chaclaža' gaquele Xancho Diosen' do yichj do laže'le sin cbi gwžonen gonle can' chazlaže'.

³⁶ Na' še to bene' chacde' cheyała' gü'e latje gwşagna' xi'ine' no'ole, na' še no'olen' ba ngole' na' chaclaže' gwşagne'e, nacczen güen gone' can' ba gwchoglaže' gone' na' gü'e latje gwşagna' xi'inen'. Bi naquen mal gwnežjue' xi'ine' no'olen' bene' chnabe' le'.

³⁷ Perw še zoa to bene' chacde' güenchnono si' xi'ine' no'olen' na' bi nacho chonen byen gwşagna'be', nacczen güen gone' can' chazlažen' na' bi gwnežjue' bi' chen' gwşagna'be'.

³⁸ Can' naquen, bene' chnežjue' bi' chen' chşagna'be' chone' güen, na' bene' bi chnežjue'be' chone' güenchn.

³⁹ Na' note'teze no'ole nşagna', cheyała' soe' len bene' che'. Perw še ba got bene' che', guac yeque'e bene' yoble, con še bene' chejnilaže' Xancho Criston'.

⁴⁰ Perw chacda' neda' soache' mbalaz še yega'ane' to gualaze', na' chacda' xbab chian' naquen toze len xbab che Spiritw che Diosen'.

8

Yela' guagw da' chosožia bene' lao l' gua'a lsaca' chesejnilaže'

¹ Na' gwnable nac cheyała' goncho len yela' guagw da' chosožie' lao l' gua'a lsacan' chesejnilaže'. Da' li yogo'cho chejni'icho bibi zjazaca' l' gua'a lsaca' ca'. Na' cate' choncho xbab che da' chejni'icho, con chonex cuincho, perw cate' chaque lježcho, cheyiljwlaže'cho nacle goncho cont gaclen lježcho.

² Na' še chaquecho ba gwyejni'icho to da' zejen, cheyała' gache'echo bibi de da' chejni'icho ca cheyała' šejni'ichon.

³ Perw cate' chaquecho Diosen', nachle Diosen' nombi'e chio'.

⁴ Gwnable še guac gagwcho yela' guagw da' chosožia bene' lao l' gua'a lsacan' chesejnilaže'. Nezecho l' gua'a lsaca' ca' bibi zjazacan', na' toz Diosen' zaque' šejnilaže'chone'.

⁵ Da' li de da' zan da' chesena benačnen zjanaquen xangaque' da' chesejnilaže'. Na' la'czla' nita' bene' chesejnilaže' da' de yaba na' yežlion' chesene' da' ca' zjanaquen xangaque',

⁶ chio' nezecho toze Xacho Diosen' zaque' gonxencho, na' le' bene' cont gwxe yogo'te da' zjade na' zoacho cont gonxenchone'. Na' nezecho toze Jesucriston' naque' Xancho, na' le' bene' yogo' benačh, beyixe' na' bichle da' zjade, na' le' chone' yela' mban checho.

⁷ Gague yogo' bene' lježcho bene' chesejnilaže' Criston' chesejni'ide' da' nga nezecho. Ba le' zjayolagüe' chesone' xbab bene' zaca' l' gua'a lsaca' ca', na' cate' chesagüe' yela' guagw da' ba bžia bene' lao l' gua'a lsacan', chesacde' chesagüe' da' naquen che l' gua'a lsacan'. Da'n'an' lo' yichjlažda'ogaque' chesacde' malen' chesone', le bina' yesejni'isagüe'de' naquen' naquen.

⁸ Na' yela' guagon' bibi zaca' gonen cont yebe Diosen' chio', neca chžonen yebede' chio' še bi gagwcho to yela' guagw o še gagwchon'.

⁹ Perw ba le' bene' bina' yesejni'isagüe'de' gague bi nonen len Diosen' še bin' ye'ej gagwcho. Na' neche legaque' cheyała' gwsaca'cho can' goncho cont bi goncho ca yeselažoe' lo da' malen' neche dan' che'ej chagwchon'.

¹⁰ Le'e nezele nono nac l' gua'a lsaca' ca', na' da'n'an' guac cue'le ye'ej gagwle ga chesone' lni' che l' gua'a lsacan' sin cbi bi do la' gaple. Na' bene' bina' šejni'ide' cate' le'ede' che'ej chagwle da'na', nach gacde' lecze guac gone' ca', perw lo' yichjlažda'ogüe' gacde' da' malen' chone'.

¹¹ Na' guacte gwžiyi'cho bene' lježcho yela' chejni'i' checho, la'czla' Criston' bnežjw cuine' gote' neche le'.

¹² Cate' choncho cont bene' lježcho chesone' to da' ža yichjlažda'ogaque' naquen da' mal, choncho contr Criston' še ca'.

¹³ Da'n'an' chnia' še dan' chagua' bela' chonen cont bene' lježa' lažoe' lo da' mal, gwbatech gagua'ba' cont ca lažoe' lo da' malen'.

9

Pablon' že' naque' dogualje postlw

¹ Nezele neda' naca' postlw na' guac naba' gonele neda' ca chonle len yezica'chle postlw ca'. Neda' ble'eda' Xancho Jesúsen' na' bena' xšine' gan' zoale na' da'nan' chejnilaže'lene'.

² Na' la'czla' še yezica'chle bene' bi chesejle'e naca' postlw, perw le'e chejle'le chia', le da' chejnilaže'le Xancho' ben' gwseła' neda', chlo'en da' li naca' postlw.

³ Quinga choži'a xtiža' bene' ca' chesene' bi gwseła' Diosen' neda' naca' postlw:

⁴ Guac naba' yeson bene' da' ye'ej gagua' šaca' chaclaža' gona' ca'.

⁵ Na' guac gwšagna'lena' no'ole chejnilaže' Criston', na' yechi'ane' gan' šjena' xšin Diosen', can' chon Pedron', na' can' cheson yezica'chle postlw ca' na' can' cheson bene' biše' Xancho'.

⁶ ¿Bixchen' neda' len Bernaben' lao yogo' postlw ca' chonto' žin len ni'a na'to' cont si'to' da' ye'ej gagwto' na' chixjwto' bichle gastw cheto' da' de šlac chyixjue'eto' xtiža' Diosen'?

⁷ Nono soldadw zoa bene' nacho cuinze' chyixjue' gastw che'. Na' nono gaz yag uvas še bi gagüe' uvasen' cate' chbian. Na' lecze ca' nono bene' chyoe šib xila' ca' nacho bi che'eje' late' xiže'ba' cate' chsien'.

⁸ Na' dan' žia' nga bi naquen con xbab cheza', le lez can' ža ley dan' bzoj da' Moisésen'.

⁹ Quinga bzoje' le'e ley: "Bi gwseyjwle cho'a go'n ca' šlac chosolej chosošošjba' trigon' cont choj xen." Na' gague da' chi' yichj Diosen' che go'n ca' bene' cont byojen žan ca'.

¹⁰ San že' ca' chzejni'czde' chio' che bene' ca' cheson xšin Diosen'. Da'nana' že' bene' chgua'ane' go'n na' bene' chonšagüe' trigw cheyała' yesenite' lez yesezi'e late' güeje cosešen'.

¹¹ Na' ca' neto' ba bzejni'ito' le'e xtiža' Diosen', le gon xbab žnaquen da' zcha'och ca' da' cheyała' gonle šaca' gonle da' ye'ej gagwto' na' bichle da' chyažjeto'?

¹² Naquen da' cheyała'cze gonle dan' choe'le da' cheseyaže' yezica'chle bene' chososed chosolo'ede' le'e, perw nachen da' cheyała' gonle gonle neto' da' chyažj chchine neto' clcl ca' legaque'.

Perw bi gwnabto' gonle neto' da' chyažj chchineto'. Chyo chchejlaže'to' bite'teze da' chac cheto' cont bibi gwžon šanch le'e gwzenagle diža' güen che Criston'.

¹³ Nezele bene' cheson mandadw lo' yodao' che neto' bene' Israel chesacbane' len da' chosonežjw bene' Israel gualaž cheton' che yodaon', chosyocua'ane' late' güeje beyixe' ca' chesote' lao Diosen' chesagüe'ba'.

¹⁴ Na' ca'czen' non Xancho Criston' mandadw, bene' chosozenag xtižen' cheyała' yosonežjue' da' cheseyaže'ben' cheseyixjue'ede' diža' güen chen'.

¹⁵ Perw neda' bi gwnaba' gonle da' chyažj chchinda', na' gague chzoja' da' nga cont gonle ca'. Yejni'acle gata' clcl ca' naba' gonle da' chyažjda', le chebechgüeda' dan' bibi gan chona' chyixjue'eda' xtiža' Criston'.

¹⁶ Bi gac nia' chona' to goclen cate' chyixjue'eda' diža' güen che Jesucriston', le Diosen' gwleje' neda' chyixjue'edan' na' chonen byen gona' can' že'na'. Nyaše'chguaze naca' neda' še bi chixjue'edan'.

¹⁷ Šaca' chona' to da' ža xbab chia' chyixjue'edan', guac nia' zaca'czen sia' bi da' gonle neda' ca' laxjua'. Perw chona' da' gwlo'o Diosen' lo' na' gona', na' gague chona' to da' ža xbab chezan'.

¹⁸ Na' še nable bi chcu'aanen len neda' da' chyixjue'eda' xtiža' Diosen', nach nia' chcu'aanen da' chbechgüeda' bibi laxjua' chzia' chyixjue'eda' xtižen', la'czla' zaca'cza' si' laxjua'.

¹⁹ Bi naca' xmos bene', perw chzexjw yichja' chon cuina' ca' xmos yogo'te bene' cont šanch bene' yesejnilaže' Criston'.

²⁰ Cate' zoa' len bene' Israel gualaž cheton', chona' can' cheson legaque' na' chona' ca' nac costumbr che ley dan' bzoj Moisésen' cont yosozenague' cate' güe'lena' legaque' xtiža' Diosen', la'czla' nežda' bi chonen byen ga'oguan' cont soa' binlo len Diosen'.

²¹ Na' cate' zoa' len bene' bi zjanombia' ley dan' bzoj Moisésen', bi na'ogua' costumbr da' non leyna' mandadw, le chaclaža' yosozenag bene' ca' bi zjanombia' leyna' cate' choe'lena' legaque' xtiža' Diosen'. Perw bi nacho chzoa' ca'ale dan' ža Diosen', le chzenaga' can' ža Criston'.

²² Na' cate' zoa' len bene' chesacde' da' zan bi de lsens goncho, bi chona' da' ca' chesacde' naquen mal goncho, la'czla' nežda' bi naquen mal. Chona' ca' cont gac gwzejni'ichda' legaque'. Chon cuina' lebe len yogo'lol bene' cont gaclena' legaque' na' bale' yesejnilaže' Criston'.

²³ Chi' yichja' yosozenague' diža' güen che Criston' cont soa' mbalaz txen len yezica'chle bene' chosozenague' xtiža' Criston'.

²⁴ Nezecho cate' chosoxonj zan bene' cont choj to bene' gon gan, yogüe' chesa'acsese', la'czla' tozen' gon gan na' si'e premio. Na' ca' chesa'acsese' bene' ca' do yichj do laže', ca' to to chio'

cheyala' soacho gwzenagcho che Diosen' do yichj do laže' cho cont gone' soacho mbalaz cate' yežincho gan' zoen'.

²⁵ Bene' güitj ca' chosochejlaže' bi chesone' con can' ža cuerp chegaquen' cont chesaque' bene' gual, le chesaclaže' yesone' gan cate' yeseyitje' na' yesezi'e premio, la'czla' dan' chesezi'en naquen to da' te che. Na' chio', chzenagcho che Diosen' cont si'cho to da' güen da' bi te čen.

²⁶ Da'nan' bi gona' ca to bene' chxonj, to bene' bi neзде' ga cheyala' yežine', o ca to bene' chdile' len ponet, bene' bi neзде' ga cuaže'.

²⁷ Bi chzenaga' che da' mal cate' žan gona' da' mal len cuerp chian', san chona' con ga zelao chzoeda' cont chona' can' chazlaže' Diosen'. Le neзде' še gwzenaga' che da' malen', bi yebe Diosen' neda' la'czla' ba gwdixjue'eda' xtižen' len bene' yoble.

10

Cheyala' na'yane'cho cont bi goncho da' malen'

¹ Bene' migw, chaclaža' nezele Diosen' gwzoe' len yogo'lo' da' xozxtao' neto' bene' Israel cate' besyechoje' Egipto, le yogüe' gosenite' xan to bejw gan' gwyo'o Diosen', na' Diosen' bene' cont yogüe' gosodie' nisdao' da' nzi' Nisdao' Xna.

² Na' yogüe' gosaque' tzen len da' Moisésen' cate' gwče'e legaque' gan' gwžialao bejon' laogaque' na' cate' gosodie' nisdao'.

³ Na' yogüe' gosagüe' toze yela' guagw da' bnežw Diosen' legaque'.

⁴ Na' yogüe' gose'eje' toze nis da' bnežw Diosen' legaque'. Na' nis da' gose'eje' bchojen lo yej, na' guac nacho Criston' goque' yej gan' bchoj nisen', le Criston' gwyejlene' legaque'.

⁵ Na' la'czla' Diosen' goclene' yogüe', zane' bi gosone' cont yebe Diosen' legaque', na' da'nan' gosebiate'e latje dašen'.

⁶ Na' yogo' da' goc chegaque' chzejni'in chio' bi cheyala' selaže' cho goncho bi da' mal can' goson legaque'.

⁷ Da'nan' chnia' le'e, bi šejnilaže' cho l' gua'a lsaca' can' goson bal' da' xozxta'oto' ca'. Le nyoj Xtiža' Diosen' žan: "Gosebi'e gose'ej gosagüe' na' gosenite' gosone' lni."

⁸ Na' lecze bi cheyala' gata'lencho no'ole bi nac no'ol checho o bene' byo bi nac bene' checho. Can' goson zan da' xozxta'oto' cani', na' da'nan' šonechoa mile' gosate' yela' güen da' xinj chegaquen' lao toze ža.

⁹ Bi cheyala' goncho Xancho Criston' prueba še gone' can' ba gwnen'. Cani' bal' da' xozxta'oto' ca' bi gosejle'e Diosen' gaclene' legaque' can' gwnen', na' Diosen' gwsele' beł znia gosotba' legaque'.

¹⁰ Na' lecze bi cheyala' bixjwcho len Diosen' can' goson bal' da' xozxta'oto' ca' cani', na' Diosen' gwsele' to angl che' bene' betue' legaque'.

¹¹ Yogo' da' ca' gosac chegaque' zjanyojen le'e Xtiža' Diosen' cont chosozejni'in chio' nac cheyala' goncho zoacho na'a, le ba zoa yeyož yežlion'.

¹² Da'nan' note'tezcho še chaquecho ba zoachagcho chejnilaže' cho Jesucriston', cheyala' na'yane'cho naquen' goncho cont bi lažo' cho lo da' malen'.

¹³ Bite'teze da' mal da' žan goncho o da' chac checho, bi nacho zdebechle chac checho can' chac che note'teze bene'. Diosen' zoacze' chaclene' chio' can' žen', bi cho'e latje gac checho da' bi soecho. Na' chzejni'ide' chio' nac goncho cont soecho bi goncho da' malen'.

¹⁴ Da'nan' bene' migw ben' chacda', le cuejyichj yogo' bi da' cheson bene' chesejnilaže' l' gua'a lsaca' ca'.

¹⁵ Ba chejni'ile na' guac gonle xbab che da' quinga chzejni'ida' le'e cont šejni'ile choa' diža' da' zaca'.

¹⁶ Na' da' ca' che'ej chagwcho chjayze'echo bi zejen len chio' da' got Criston', choe'cho yela' choxclen che Diosen' cate' che'ej chagwchon. Na' dan' che'ejcho zejen chio' chejni-laže' chone' naccho tzen len Criston' can' blalj xchene' cate' gosote'ne'. Na' dan' chagwcho late' güeje, zejen naccho tzen len cuerp che Criston'.

¹⁷ Na' can' nac toze yetextil da' chzoxjcho chagw yogo'cho late' güejen, lecze ca' yogo' chio' chejnilaže' cho Criston' naccho toze len lježcho, le toze yetextilen' chagwcho tzen.

¹⁸ Le gon xbab can' cheson bene' Israel gualaž cheto' ca', chesote' beyixe' cate' chesonxene' Diosen', na' note'tez bene' chesagüe' xpela' ben' chesoten' zjanaque' tzen chesonxene' le'.

¹⁹ Bi chaclaža' gonle xbab žia' l' gua'a lsaca' ca' zjanaquen da' zaca' o yela' guagw da' chjasežia bene' laogaquen naquen nža'le len bite'teze yela' guagw.

²⁰ Gague can', le cate' bene' chosožie' bi da' chosožie' lao l' gua'a lsacan' dan' chesejnilažen', chosožien' lao da' xigüe' ca', gague lao Diosen', na' bi chaclaža' gacle tzen len da' xigüe' ca'.

²¹ Bi gac ye'ej gagwcho da' che'ej chagwcho chjayze'echo bi zejen da' got Xancho Criston' na' lecze ye'ej gagwcho gonxencho da' xigüe' ca'. Bi gac ye'ej gagwcho chopten.

²² Ža'a Diosen' chio' še goncho ca'. Na' bi naccho bene' gual ca' Diosen' cont soecho bi da' gone' gac c̄echo.

Bi goncho da' chaque bene' lježcho naquen mal

²³ Chesene': "De latje goncho bite'teze", perw nezecho gague yogo' da' choncho naquen güen, na' la'czla' še de latje goncho bite'teze, gague yogo' da' choncho chaclenen chio'.

²⁴ Ne tocho bi cheyla' goncho da' naquen güen len chio'ze, san goncho xbab še naquen güen len bene' lježcho.

²⁵ Bite'teze bela' chesote' lagüe' ya'a le gagon' na' bi nable še bosozien' lao l̄ gua'a lsacan' chesejnilaže', cont bi gaczejlaže'le še nable doła' gagwlen.

²⁶ Le Xtiža' Diosen' nyojen žan: "Čhe Xancho Dios yežlio nga, benach, beyixe' na' yogo'te da' zjade lo yežlion'."

²⁷ Na' cate' bene' bi chesejnilaže' Criston' chesaxe' chio' gagwcho ližgaque', še šejcho nach guac gagwcho bite'teze da' yeseñe' gagwcho sin cbi nabcho še bosozien' lao l̄ gua'a lsacan', le Diosen' bi che'nde' gaczejlaže'cho še napcho doła' che'ej chagwchon.

²⁸ Perw še no ye' chio': "Da' nga bosozie' lao l̄ gua'a lsacan'", bi gagwchon cont bene' gwna ca' bi gacde' lenczcho chejnilaže'cho l̄ gua'a lsacan', o gacde' napcho doła' chagwchon.

²⁹ Bi n̄acho naquen da' mal len Diosen' gagwchon, con naquen da' mal len ben' gwna ca'.

Na' ch̄nable žbixchen' cheyla' cuejyichjcho bich goncho bi da' choncho še bene' lježcho chesacde' napcho doła' chonchon?

³⁰ Na' chonle xbab žbixchen' ža bene' lježcho choncho da' mal chagwcho to yela' guagw še choe'cho yela' choxclen čhe Diosen' neche len?

³¹ Quinga naquen, cate' che'ej chagwcho o bite'teze da' choncho, cheyla' gonchon cont gacxen Diosen'.

³² Na' bi cheyla' goncho bite'teze da' choncho še gonon cont bene' yoble yeselažoe' lo da' mal, la'czla' še zjanaque' bene' Israel' gualaž cheton', o še bene' bi zjanaque' bene' Israel, o še ljež chio' chdop chžagcho chonxencho Diosen'.

³³ Can' chona' neda', bite'teze da' chona' cheyljwlaža' nacle gona' cont to to bene' soe' mba. Na' bi cheyljwlaža' nacle gona' da' gaclen cuina' san da' gaclen bene' zan cont gata' yela' mban čhegaque' toli tocañe.

11

¹ Neda' chona' con can' ben Criston', na' ch̄neyoeda' le'e gonle can' chonan'.

Can' cheyla' yeson no'ol ca' cate' chdop chžagcho chonxencho Diosen'

² Na' na'a chnia' le'e chonle güen zoale chjayze'ele neda' na' chonle ca ba bzejni'ida' le'e.

³ Na' chaclaža' šejni'ile da' nga. Yogo' bene' byo cheyla' yosozenague' čhe Criston', le Criston' naque' blaoch ca legaque', na' yogo' no'ole cheyla' yosozenague' čhe bene' che', le bene' chen' naque' blaoch ca no'olen'. Ca'cze chon Criston', chzenague' čhe Xe' Diosen', le lezne' naque' blaoch ca le'.

⁴ Note'teze bene' byo še nzoa xlape' cate' choł güiže' Diosen' šlac ndop nžagle t̄xen o cate' chyixjue'ede' bi da' ža Diosen', naquen da' yela' zto', le zejen bi nac Criston' bene' blaol len le'.

⁵ Na' note'teze no'ole še choł güiže' Diosen' o chyixjue'ede' xtiža' Diosen' sin cbi gwcuāše' yichje' cate' chdop chžagle t̄xen, naquen yela' zto' par bene' čhe', le naque' blaoch ca le'. Na' no'olen' chon ca' naque' lebe len no'ol ca' nšibdi yichjgaque', no'ole ca' bibi yela' zto' zjanombi'e.

⁶ Na' še no'olen' bi chaclaže' gwcuāše' yichje' can' ba gwnian', yejni'a gwšib doxen yichjen'. Da'n̄an' še chaquele zto' gwšiblen, nach gwcuāše'czlen can' cheson yezica'chle no'ol ca'.

⁷ Na' le'e bene' byo, bi cheyla' gwcuāše' yichjlen' cate' yol güižle Diosen' o cate' chixjue'ele bi da' ba gwna Diosen' le'e, le Diosen' gwleje' le'e cont gwlo'ele bene' nacchgüe' bene' zaca'. Na' le'e no'ole, Diosen' gwleje' le'e cont gwlo'ele nac bene' che to tole bene' zaca'.

⁸ Diosen' bi bene' bene' byo len žit costiy čhe no'olen', san gwleje' žit costiy čhe bene' byo nechon' benen' no'ole.

⁹ Na' Diosen' bi bene' bene' byon' cont gaclene' no'olen', san bene' no'olen' cont gaclene' bene' byon'.

¹⁰ Da'n̄an' no'ol ca' cheyla' yosocuaše' yichjgaque' cont yosolo'e nac bene' byon' blaoch ca legaque', le angl ca' chosocuaše' laogaque' lao Diosen'.

¹¹ Perw naccho t̄xen len Xancho Jesucriston' la'czla' še naccho bene' byo o še no'ole, na' bi cheyla' yeson no'olen' xbab bi cheseyažide' bene' byo na' n̄eca bene' byo yeseñe' xbab bi cheseyažide' no'olen'.

¹² Naquen da' li Diosen' gwleje' žit costiy che bene' byo na' benen' no'ole, na' lecze naquen da' li yogo' bene' byo zoa no'ole gwaxan le', na' Diosen' bene' yogo' beñaçh len bica'chle da' zjade.

¹³ Le gon xbab chele na' gacbe'ele bi chazlaže'cho cate' to no'ole choł güiže' Dios sin cbi chcuase' yichje', le can' nac costumbr chechon'.

¹⁴ Na' lecze bi chazlaže'cho še bene' byo bi gwšib yichjen' na' con chosožien' ca cheson bene' bxej.

¹⁵ Perw no'olen' xdanchgua nac yiša' yichjgaquen' cate' žian' da' toņe, na' Diosen' none' yiša' yichjgaquen' gaquen to da' gwcuašen' yichjen'.

¹⁶ Še nole chaqule gwšašle che da' nga ba gwnia', cheyała' nezele neto' postlw bi choe'to' latje yesone' nža'le gate'teze chesodop chesežag bene' chesejnilaže' Diosen'.

Bi chjasyeze'ede' Criston' cate' chese'ej chesagüe'

¹⁷ Na' de yeto da' nia' le'e, le bi chonle güen cate' chdop chžagle chonxenle Criston' na' bi chaclenen le'e, san chonen mal.

¹⁸ To da' bi chonle güen, chesene' cate' chdop chžagle chonxenle Criston' bi chonle txen len lježle, na' chacda' nacljan' li can' chesenen'.

¹⁹ Na' ca'ljan' cheyała'cze gac da' bi chon lježle txen, le chlo'en non' chejnilaže' Criston' do yichj do laže' na' non' gague da' li chejnilaže'ne'.

²⁰ Na' cate' chežagle chagwle txen, bi chonle xbab bnežjw cuin Xancho Jesucriston' neche xtoła'chon', la'czła' chdop chžagle cont šjayze'elen.

²¹ To tole che'ej chagwle da' chyob chdoxe'le, neca chbez lježle. Da'n'an' balle ne' chdonle cate' chedagwle na' yeballe che'ej chagwᵗattele na' chože'le.

²² Yejni'a yega'an ližle ye'ej gagwle clcl ca gagwle lao bene' yaše' bene' bi de chegaque'. Da' chonle ca', nacia' chgue'e lježle bene' cheyała' yesaque' txen len le'e da' chonxenle Diosen', na' chonle cont chesaque' tole da' bi de chegaque'. Na' naquen malchgua da' chonle ca', bi gac ni'a chonle güen.

Chjayze'echo bnežjw cuin Xancho Criston' neche xtoła'chon'

(Mt. 26:26-29; Mr. 14:22-25; Lc. 22:14-20)

²³ Xancho Jesúsen' bzejni'ide' neda' can' šjayze'echo da' bnežjw cuine' neche xtoła'chon'. Na' neda' ba bzejni'ida' le'e can' goquen', že' cate' Judasen' bdie'ne' lo na' ben' besegue'ede' le', Xancho Jesúsen' beᵗue' to yetextil.

²⁴ Na' be'e yela' choxclen che Diosen' na' beyož be'e yela' choxclen che' na' bzoxjen', na' gwne': "Le gagw yetextil nga. Lenna' naquen cuerp chia' da' chnežjua' neche xtoła'le. Na' quinga gonle šjayze'ele bi zejen len le'e dan' gwnežjw cuina' yesote' neda'."

²⁵ Na' lecze ca' bene' cate' beyož gosagüe' xše', beᵗue' to vas nis uvvas na' gwne': "Dan' yože lo vas nga zejen da' cobe dan' gwna Diosen' gone' gaclene' le'e. Na' lalje xchenan' cont gac can' gwne' gonon'. Na' bate'teze ye'ejle ca da' nga chona' che'ejle na'a, le šjayze'e bi zejen len le'e dan' gwnežjw cuina' yesote' neda'."

²⁶ Nachen' yogo' ni'a cate' chagwcho yetextilen' na' cate' che'ejcho nis uvvasen' chjayze'echo can' bene'na', na' chyixjue'echo can' bnežjw cuine' gote' neche xtoła' beñaçhen'. Na' can' gonchczcho šlac biña' yide' da' yoble.

Naquen' goncho cate' chjayze'echo yela' got che Xancho Jesúsen'

²⁷ Can' naquen, še chagwcho yetextilen' na' che'ejcho nis uvvasen' cont chjayze'echo yela' got che Xancho Jesúsen' perw še bi chonxenchone' cate' choncho ca', napcho doła', le chonchon ca da' bibi zaca' cuerp che' dan' bnežjue' na' xchene' da' blalje neche xtoła'chon'.

²⁸ Da'n'an' cheyała' gonyane'cho xbab še choncho can' chazlaže' Diosen' cate' za' gagwcho yetextilen' na' ye'ejcho nis uvvasen' cont šjayze'echo yela' got che Xancho Jesúsen'.

²⁹ Le še ye'ej gagwcho sin cbi gonxencho Xancho Jesúsen' da' bnežjw cuine' gote' neche xtoła'chon', Diosen' gone' chio' castigw.

³⁰ Na' zanle bi zoale güen na' chacšenele na' bal bene' ba gosate' da' bi gose'ej gosagüen' do laže'.

³¹ Na' še gacbe'echo na' goncho byen soacho binlo len Xancho Diosen', bi gone' chio' castigw cate' che'ej chagwchon.

³² Na' cate' napcho dola' can' che'ej chagwchon, Xancho Diosen' chone' chio' castigw cont yetinjecho da' malen' choncho na' bi si'cho castigw toli tocaņe can' yesezi' bene' bi chesejnilaže'ne'.

³³ Da'n'an' bene' migw chia', cate' chdop chžagle txen che'ej chagwle, le cueze lježle na' ye'ej gagwle txen.

³⁴ Na' še chbił chdonle, yejni'a yega'an ližle ye'ej gagwle, clcl ca gon Diosen' le'e castigw can' chonle caten' chdop chžagle. Na' che bichle da' chaclaža' gwzejni'ida' le'e, cate' yida' gan' zoalena' nach nia' can' gonlen'.

12

Spiritw che Diosen' chaclenen to tocho cont choncho bi da' choncho

¹ Na' bene' migw, chaclaža' nezele ca chon Spiritw che Diosen' chaclenen to to chio' chejniłaze'cho Jesucriston'.

² Nezele cate' bina' šejnilaze'le Criston' gwyejle'le diža' güenłaze' na' da'n'an' gwyejnilaze'le l gua'a lsaca' da' bibi biš grasyw nye'.

³ Na' da'n'an' chaclaža' šejni'ile da' nga na'a. Note'teze bene' že': "Chgue'eda' Jesúsen'", bi zoa Spiritw che Diosen' len le', perw bene' že': "Jesúsen' naque Xana'", že' ca' da' zoa Spiritw che Diosen' chaclenen le'.

⁴ Toz Spiritw che Diosen' zoa, perw nža' nža' da' chaclenen to tocho choncho o nezecho.

⁵ Toz Xancho Jesucriston' chonxencho la'czla' nža' nža' ca chon to tocho xšinen'.

⁶ Na' la'czla' nža' nža' da' chon to tocho, toz Diosen' chone' cont to tocho chac choncho xšinen'.

⁷ Nacia' zoa Spiritw che Diosen' len chio', le chonen cont to tocho chac choncho da' chaclenen yogo'cho.

⁸ Diosen' ba nsi'e xnezen' chon Spiritw chen' cont bałcho chac chzejni'icho bene' yoble xbab sina' chen', na' lecze Spiriton' chonen cont yebałcho nezecho to da' nezecho na' chzejni'ichon bene'.

⁹ Na' lecze toz Spiritw chen' chonen cont bałcho chejniłaze'chguacho Diosen' na' chac bite'teze da' chnabechone'. Na' da' chaclen Spiriton' chio', bałcho chac choncho cont chesyeyaque bene' chesacšene.

¹⁰ Na' lecze Spiritw nan' chonen cont bałcho chac choncho yela' guac, na' bałcho chac chyjxue'echo bi da' ba gwna Diosen' chio'. Na' Spiritw che Diosen' chonen cont bałcho chache'echo che da' chesena bene' o da' cheson bene' še zan' che Diosen' o še zan' che da' xigüe' ca', na' Spiriton' chonen cont bałcho choe'cho gwde gwdele diža' da' bi nsedcho, na' yebałcho chac che'cho bene' lježcho bi zeje diža' ca'.

¹¹ Toz Spiritw che Diosen' chaclenen yogo'cho cont choncho yogo' da' chaclažen' gon to tocho.

Yogo' chio' chejniłaze'cho Criston' naccho toze can' nac cuerp chechon'

¹² Cuerp chechon' nsan' zan part, perw zjangoden' txen na' naquen toze. Na' lecze ca' chio' chejniłaze'cho Criston' naccho toze len le' na' len bene' lježcho ca'.

¹³ Na' chio' naccho bene' Israel na' yebał chio' bi naccho bene' Israel. Bałcho naccho esclavo na' yebałcho bi naccho. Perw yogo'czcho gwzoacho nis par blo'echo ba ben Spiritw che Diosen' cont naccho txen len Criston', na' lecze toze Spiritw che Diosen' zoan lo' yichjlaždao' yogo'cho.

¹⁴ Cuerp chechon' nsan' zan part, na' nža' can' nac to to parten'.

¹⁵ Ni'acho guac nan: "Bi naca' toze len cuerpen', le bi naca' ne'en." Perw la'czla' še nan ca', naquen toze len cuerpen'.

¹⁶ Na' nagcho guac nan: "Bi naca' toze len cuerpen', le bi naca' yejlagüen'." Perw la'czla' še nan ca', naquen toze len cuerpen'.

¹⁷ Šaca' doxen cuerp chechon' naquen yejlaoch, bi gac yenecho. Na' šaca' doxen cuerpen' naquen nagcho, bi gac le'echo.

¹⁸ Perw Diosen' bžie' bia' nsa' cuerp chechon' zan part da' cheson žin con can' gwyazlaže'.

¹⁹ Na' bi nya' cuerp chechon' šaca' nsan' toze part.

²⁰ San cuerpen' nsan' zan part da' naquen txen cont naquen toze cuerp.

²¹ Da'n'an' yejlaochon' bi gac yen' na'chon': "Bi chyažjda' le'." Na' neca gac ye' yichjchon' ni'achon': "Bi chyažjda' le'."

²² Na' la'czla' bał part cuerp chechon' chaquecho bitec naquen da' gual, perw chyažjehon.

²³ Na' la'czla' bał part cuerp chechon' chaquecho bitec bi zacan', perw chi' yichjchon, da'n'an' cheyacw xacho. Na' part che cuerp chechon' da' bi chaclaže'cho le'e bene', chcuša'e'chon len xacho.

²⁴ Perw part da' nsa' cuerp chechon' da' naquen xdan, bi chcuša'e'chon. Na' Diosen' none' cont chi' yichjcho che part ca' da' bi zjanaquen xdan.

²⁵ Na' none' cuerp chechon' toz cont to to parten' chapši'i lježen lebze na' chesonen žin txen.

²⁶ Na' še guecho chac, bi zoa güen doxen cuerp chechon' še ca'. Na' še to parten' chaquecho xdan o chac chonen güenchgua, doxencho chebecho.

²⁷ Na' chio' chejnilaže'cho Criston', yogo'cho ngode'cho txen len le' na' yogo'cho txen naccho cuerp chen', na' guac nacho to tocho naccho ca to part güeje cuerp chen'.

²⁸ Na' ca nac chio' chdop chžagcho chonxencho Criston', da' nechw Diosen' gwleje' neto' nacto' postlw, na' da' gwchope gwleje' ba| bene' cont cheseyixjue'ede' da' ba gož Diosen' legaue'. Na' da' gwyone gwleje' yeba| bene' chososed cheselo'ede' xtižen'. Na' lecze gwlej Diosen' bene' cheson yela' guac, na' gwleje' bene' cheson cont cheseyaque bene' chesacšene, na' gwleje' bene' chesaclene' bene' yoble cate' bi da' cheseyažjde'. Na' gwleje' bene' chesenabia' chio' chdop chžagcho chonxencho Criston', na' gwleje' bene' chac cheso'e gwde gwdele diža' da' bi zjansede'.

²⁹ Gague yogo'cho naccho postlw. Gague yogo'cho chac chyixjue'echo bi da' ba gwna Diosen'. Gague yogo'cho chac chsed chlo'echo bene' xtižen', na' gague yogo'cho chac choncho yela' guac.

³⁰ Gague yogo'cho chac choncho cont cheseyaque bene' chesacšene. Gague yogo'cho chac choe'cho gwde gwdele diža' da' bi nsedcho. Gague yogo'cho chac chozejni'icho bi zejen diža' ca'.

³¹ Le yeyiljwlaže' gaclen Spiritw che Diosen' le'e cont gac gonle da' ca' zjanacch da' zaca'. Na' de yeto da' zaca'ch naquen' cheya|a' soa cuezcho.

13

Cheya|a' gague lježcho

¹ La'czla' še chaccho gwde gwdele diža' da' chesac be|a|chen' na' da' chesac angl ca', perw še bi chaque ljež be|a|chcho, bibi zaca'cho. Zaca'lebcho ca ya da' chonen sšag cate' chososižen' o ca platiy da' chososiž bene' güecuež.

² Na' la'czla' še ba goclen Spiritw che Diosen' chio' cont chac chyixjue'echo bi da' ba gwne' chio', bibi zaca'cho še bi chaque ljež be|a|chcho. Na' la'czla' še nezecho yogo'lo| da' nono na' neze, na' la'czla' še chejni'icho yogo'lo| da' naquen da' zaque', bibi zaca'cho še bi chaque ljež be|a|chcho. Na' la'czla' še leca chejnilaže'cho Diosen' cont chone' bite'teže da' zdebe cate' ch|nabechone' gonen', bicze bi zaca'cho še bi chaque lježcho.

³ Na' še gwnežjwcho bene' yaše' yogo' bi da' de checho na' gwnežjw cuincho yosozey bene' chio', bi gaclenen chio' lao Diosen' še bi chaque lježcho.

⁴ Še chaque lježcho, chapcho yela' chxenlaže' len legaue', na' choncho güen len legaue', bi chgue'echo legaue' še chac güen chegaue', na' bi chonxen cuincho len xtiža'cho, na' bi cha|laže'cho.

⁵ Na' cate' chaque lježcho bi choncho nacteže len legaue', bi choncho xbab che cuincho, bi chbixjwcho, na' bi chgo'olaže'cho.

⁶ Na' cate' chaque lježcho bi chbecho še chon bene' lježcho da' mal, san chbecho še chone' da' zej to |i.

⁷ Na' cate' chaque lježcho, chapcho yela' chxenlaže' bite'teže da' chesonde' chio', na' choncho xbab güen che yogo'lo| bene', na' zoacho lez yesone' güen yogo' las, na' chyo chchejlaže'cho bite'teže da' chesone bene' chio'.

⁸ Gwbat te che da' cheya|a' gague ljež be|a|chcho. Perw gwžin ža cate' noch no chixjue'e bi da' ba gož Diosen' le', na' gwžin ža cate' bich yesoe' bene' gwde gwdele diža' da' bi zjansede', na' gwžin ža cate' bich yažje bichle da' šejni'icho.

⁹ Bi|a' nezecho na'a yogo' da' za' nezecho, na' bi|a' gac chixjue'echo bin|o yogo'lo| da' ba gož Diosen' chio'.

¹⁰ Perw gwžin ža cate' gon Diosen' cont yogo' da' de gaquen can' cheya|a' gaquen. Cana' te che da' bi naquen ca cheya|a' gaquen.

¹¹ Cate' goccho bidao' be'cho diža' can' chesoe' note'teže bidao' diža', bencho xbab can' cheson note'teže bidao' xbab, na' gwyejni'icho can' chesejni'i bidao'. Na' na'a ba gwcha'ocho na' ba gwlejiyichjo bich choncho can' cheson bidao'.

¹² Na'a bi|a' nezecho bin|o da' nac che Diosen'. Zaca'lebcho ca bene' chne'e to |o spejw da' bitec chlo'e bin|o. Perw gwžin ža cate' le'echo bin|o na' nezecho doxen da' nac che Diosen', na' canan' gombia'chone' bin|o ca bin|o nombi'e chio'.

¹³ Nachen' da' quinga šone non Diosen' mandadw goncho to|li toca|e: šejnilaže'chone', soacho lez gone' ga gacch güen checho, na' gaguecho Diosen' na' ljež be|a|chcho. Na' da' zejechen goncho lao da' ca' šone, gaguecho Diosen' len ljež be|a|chcho.

14

Bene' ca' chesoe'lene' Diosen' diža' da' bi zjansede'

¹ Cheya|a' cue' yichjle gaguele Diosen' na' len ljež be|a|chle, na' lecze cheya|a' selaže'le gaclen Spiritw che Diosen' le'e gonle con bi da' chaclažen' gonle. Na' lao da' ca' chaclenen

bene' bi da' chesone', da' zaca'chen da' cheseyixjue'ede' bi da' ža Diosen'. Lenŋa' cheyała' selaže'chgualē gonle.

² Balcho chon Spiritw che Diosen' cont chac choe'lencho Diosen' gwde gwdele diža' da' bi nsedcho. Na' cate' choe'lenchone' dižan' nac ca', bi choe'lencho benachen' diža', le notno chejni'i xtiža'chon', con naquen diža' da' choŋ Spiritw che Diosen' choe'lenchone' la'czła' bi chejni'ichon.

³ Perw bene' chyxjue'ede' bi da' ba gwna Diosen', chaclene' bene' yoble yesenita'chache' yesejnilaže' Diosen', na' yesenite' mbalazech, na' cheseyeyacxenlaže' še bi da' chesac chegaque'.

⁴ Cate' choe'cho gwde gwdele diža' da' bi nsedcho, yichjlažda'ocho na'zen' chaclenen. Perw še chyxjue'echo bi da' ba gwna Diosen', chaclenen yogo' chio' chdop chžagcho chonxencho Criston'.

⁵ Yebeda' šaca' yogo'le gac güe'lenle Diosen' gwde gwdele diža' da' bi nsedle, perw yebechda' juisyw šaca' yogo'le gac chixjue'ele bi da' ye' Diosen' le'e. Lenŋa' zejechen clēl ca' güe'lenchone' gwde gwdele diža' šlac ndop nžagcho chonxencho Diosen'. Le še nono zoa no gwzejni'i bi zejen gwde gwdele diža' dan' chon Spiriton' nacho, bitw gaclenen bene' ljezcho yesenita'chache' yesejnilaže'ne'.

⁶ Bene' migw, nezda' bi gaclenen le'e še güe'lēna' Diosen' gwde gwdele diža' da' bi chejni'ile caten' yedēna'a le'e. Perw gaclenen le'e še gwzejni'ida' le'e bi da' ba bzejni'i Diosen' neda'. Na' gaclenczen še gwzejni'ida' le'e bichle da' nezda' che Diosen', o bi da' ba gože' neda' cont chixjue'eda' le'e, o še gwsed gwlo'eda' le'e bi zeje xtižen'.

⁷ Ca' nac bžejo, bi mbanen perw zoa ši'in cate' chcuež bene' len, na' lecze ca' arpan' cate' chyin bene' len. Na' še toz nota da' chcuež ben' len bžejoa' o toz nota da' chyin ben' cate' chyiŋe' arpan' bate'teze, nono gache'e bin' chosocueže' še bi yosoše'e güeltze nota dan' chosocuežen'.

⁸ Cate' zoa to bene' chcueže' trompeta cont cheseneze soldadw ca' naquen' yesone', še bi gwcužežen' binlo, bi yesejni'ide' cheyała' šja'aque' lo gwdile.

⁹ Ca'cze naquen len chio', še güe'lencho Diosen' diža' da' bi chesejni'i bene', bi gaclenen legaque', le len legaque' naquen ca' che bene' chšalj toze'.

¹⁰ Nezecho bene' že' doxen yežlion' gwde gwdele diža' da' chesaque', na' to to benač chesejni'ide' dižan' goljelene'.

¹¹ Na' še chio' bi chaccho diža' da' chac yeto bene', nezecho naque' bene' zito' len chio' na' naccho bene' zito' len le'.

¹² Na' dan' chi' yichjle gaclen Spiritw che Diosen' le'e cont gac gonle bi da' chaclaže'le gonle, ca'czen cheyała' cue' yichjle gaclenen le'e gonle da' gaclen lježle cont yogo'le soačhačle šejnilaže'le Diosen'.

¹³ Na' še Spiritw che Diosen' gonen cont güe'lencho Diosen' gwde gwdele diža' da' bi nsedcho, cheyała' nabcho lecze gaclenen chio' gwzejni'icho bene' bi zeje diža' dan' choe'lencho Diosen'.

¹⁴ Le cate' Spiriton' chonen cont choļ güiža' Diosen' len diža' da' bi nседа', con nezda' lo' yichjlažda'ogua' choe'lēna' Diosen' diža', perw bi chona' xbab čen, le bi chejni'idan'.

¹⁵ Quinga cheyała' goncho cate' choļ güižcho Diosen', cheyała' güe'lenchone' bite'teze diža' da' choŋ Spiritw čen' chio' la'czła' še bi chejni'ichon, na' lecze cheyała' güe'lenchone' diža' da' chejni'icho. Na' cheyała' golcho bite'teze da' choŋ Spiritw che Diosen' golcho la'czła' še bi chejni'ichon, na' lecze cheyała' golcho da' chejni'icho.

¹⁶ Le še chonxencho Diosen' o choe'cho yela' choxclen che' len diža' da' bi chejni'i bene' yoble, bene' bi chesejni'i dižan' choe'chon' bi gac yesonxene' Diosen' txen len chio'.

¹⁷ La'czła' še choe'cho yela' choxclen che Diosen' binlo, perw bi chaclenen bene' yoble še bi chesejni'ide' xtiža'chon'.

¹⁸ Choa' yela' choxclen che Diosen' da' choe'lencha'ne' gwde gwdele diža' da' bi nседа' clēl ca' le'e.

¹⁹ Perw cate' ndop nžagcho chonxencho Criston' yejni'a gua' gayo'ze diža' da' yesejni'i bene' cont gwzejni'ida' legaque', clēl ca' gua' ši mil diža' da' bi yesejni'ide'.

²⁰ Bene' migw, bi cheyała' šo'cho xbab che bidao' biŋa' šejni'i, san šo'cho xbab che bene' chejni'i. Perw len da' malen' cheyała' gaccho ca' bidao' bi' biŋa' gon da' mal.

²¹ Xtiža' Diosen' nyojen žan: "Neda' Dios gona' cont bene' zito' yeso'lene' bene' Israel quinga xtiža', perw ne ca'cze bi yosozenague' chia'." Can' ža Xancho Diosen'.

²² Da'nan' nezecho Diosen' chčhine' gwde gwdele diža' da' choe'lenchone' cont bene' bi yesejnilaže'ne' yesacbe'ede' zoacze' len chio'. Na' chio' chejnilaže'chone', Spiritw che Diosen' chonen cont bene' cheseyixjue'ede' chio' bi da' ba gož Diosen' legaque'. Can' chone' chzejni'ide' chio'.

²³ Le gon xbab nac gac še šlac ndop nžag yogo'cho txen chonxencho Criston' yogo'cho güe'lencho Diosen' gwde gwdele diža' da' bi nsedcho, na' yesela' bal' bene' bi chesejni'i naquen' choncho chonxenchone' o bene' bi chesejnilaže'ne', legaque' yesene' chactontcho.

²⁴ Perw še bene' ca' bi chesejnilaže' Diosen' o bene' ca' bi chesejni'i naquen' chonxenchone' yesela'aque' šlac yogo'cho chzejni'i lježcho bi da' ba gož Diosen' chio', nach yesache'ede' zjade xtola' cate' yesende' xtiža' yogo'cho, na' yesyetiñjde' da' malen' chesonen'.

²⁵ Le yesache'ede' Diosen' nombi'e xbab da' chesone' lo' yichjlažda'ogüen', nach yosoza xibe' yesonxene' Diosen' na' yesene': "Da' licze zoa Diosen' len bene' quinga."

Cheyała' gonxencho Diosen' binlo na' bi gonchon nacteze

²⁶ Bene' migw, cate' chežagle chonxenle Diosen' quinga gonle: Balle de to da' golle gonxenle Diosen', na' balle de da' gwsed chon'e lježle, na' balle de da' ba gož Spiritw che Diosen' le'e, na' balle de gwde gwdele diža' da' güe'le da' bi nsedle, na' yeballe chaclaže'le chixjue'ele bi zejen gwde gwdele dižan' ba gwna bene' lježen'. Naquen' güen gonle yogo' da' ca' con še gonlen ga gaclenen lježle.

²⁷ Na' še nole güe'lenle Diosen' gwde gwdele diža' da' bi nsedle, le güen', perw do chopzle o še šonzle na' tgüeje tgüejle, na' tena' choj bene' yozejni'ide' bi zejen diža' dan' ba be'le.

²⁸ Na' še nono zoa no yozejni'i bi zeje dižan', bi cheyała' güe'le dižan' zižje gan' ndop nžaglen', con lo' lažda'ole na'zen' güe'lenle Diosen' diža', še ca'.

²⁹ Na' še chixjue'ele bi da' ba gwna Diosen', lecze do chopzle o šonzle chojle chixjue'elen šlac ndop nžagle na' yezica'chle bene' yosozenague' na' yesone' xbab še dan' žalen' naquen' lebze len Xtiža' Diosen' dan' nyoj.

³⁰ Na' še šlac tole choe'le diža', Diosen' gwzejni'ide' yetole to da' chixjue'ele, cheyała' cuezle na' güe'le latje chixjue'e ben' yeto dižan'.

³¹ Yogo'le guac chixjue'ele da' gož Diosen' le'e, perw gonlen tgüeje tgüejle cont yogo'le šejni'ichle na' gaclenen le'e.

³² Na' le'e chyixjue'ele bi da' ba gwna Diosen', cheyała' chixjue'elen con baten' naquen' güen chixjue'elen.

³³⁻³⁴ Le Diosen' chaclaže' gwsa'le binlo da' chonle caten' chdop chžagle chonxenlne' na' bi gonlen nacteze.

Na' caten' chdop chžagle chonxenle Criston', cheyała' gwžonle yesoe' no'ol ca' diža' šlac ndop nžagle, can' chesežone' gate'teze chesedop chesežague' chesonxene'ne'. Cheyała' yesenita' no'ol ca' yosozenague', le can' ža leyna'.

³⁵ Na' še bi da' chesaclaže' no'ol ca' yesenežde', guac yesenabde' bene' chegaque' cate' yesyežin ližgaque', le naquen da' yela' zto' še no no'ole güe'le diža' šlac ndop nžagcho.

³⁶ Le gon xbab, gague le'e gocle bene' nechw bene' gwyejnilaže' xtiža' Criston', na' bi nacho nezechle ca' bene' chesedop chesežag ga yoble chesonxene'ne'.

³⁷ Še nole chaquele chac chyixjue'ele bi da' ba gwna Diosen' o še chaquele chaclen Spiritw che Diosen' le'e len bichle da' chonle, nachen' cheyała' gache'ele da' quinga chzoja' le'e naquen da' non Xancho Criston' mandadw goncho.

³⁸ Na' note'teze bene' bi chejle'e še Xancho Criston' bene' cont bzoja' da' quinga, bi zaca' šejle'cho che' bite'teze da' že'.

³⁹ Na' quinga naquen bene' migw, le cuec yichjle gaclen Spiritw che Diosen' le'e cont chixjue'ele bi da' na Diosen', na' bi gwžonle yesoe' bene' gwde gwdele diža' da' chnežjw Spiritw che Diosen' yeso'e.

⁴⁰ Perw binlo gonle yogo' da' chonle cate' chdop chžagle na' bi gonlen nacteze.

15

Beban Criston' ladjo bene' guaten'

¹ Bene' migw, chaclaža' gonle xbab che diža' güen che Criston' da' ba be'lena' le'e. Ba bzenagle chen na' zoachachle chejle'len.

² Na' nezele šjayzoale len Diosen' še soatezle gwzenagle che diža' güen chen'. Na' še bi gwzenagle chen, bibi zejen da' žale chejle'len'.

³ Diosen' bzende' neda' da' quinga da' zjanaquen la'zelagüe' da' zejen na' bach gwdixjue'edan' le'e. Criston' bnežjw cuine' gote' cont beque'e xtola'chon' con can' nyoj Xtiža' Diosen'.

⁴ Nach bosocuaše'ne', na' beyon ža beyas bebane' ladjo bene' guat ca' con can' nyoj Xtiža' Diosen'.

⁵ Nach jaylo'elagüe' Pedron' na' gwdechle jaylo'elagüe' yezica'chle postlw ca'.

⁶ Beyoža' jayežlo'elagüe' gwdete gayo' gayo' bene' to ši'ize, bene' chesonxene' le'. Na' zan bene' ca' ne' zjamban, la'czla' bałe' ba gosate'.

7 Nach jayzlo'elagüe' Jacobo. Gwde na' jayzlo'elagüe' yogo' postlw ca'.

8-9 Bzebte bedyelo'elagüe' neda', zaca'leba' ca' bi' golje cate' bina' žin ža, le cana' bchi bsaca' bene' ca' chesedop chesežag chesonxene' Criston'. Na' da'nan' chacda' bicze zaca' yososi'e neda' postlw.

10 Perw Diosen' nži'ilaže'de' neda' na' gwleje'nda' naca' postlw che', na' choncha' xšinen' clel ca' bene' lježa' ca' yezica'chle. Na' nežda' gague chonan' neda', san Diosen' chaclene' neda' cont chonan'.

11 Da'nan' bibi nonen še xtiža' nedan' ba bzenagle o še xtiža' nochle postlw ca', le toze can' chyixjue'eto' che Criston' na' can' nac dan' ba chejle'le chen'.

Yesyeban bene' guat ca'

12 Yogo' neto' chyixjue'eto' beban Criston' ladjo bene' guat ca'. Da'nan' čbixchen' ža balle bi yesyeban bene' guat ca'?

13 Šaca' naquen diža' li dan' žale bi chosban Diosen' bene' guat ca', zejen bi beban Criston' še ca'.

14 Na' šaca' Criston' bi bebane' ladjo bene' guat ca', bibi zaca' xtižen' da' be'lento' le'e na' bibi zejen da' chejnilaže'lene' še ca'.

15 Ba be'lento' le'e diža' güenlaže' gwnato' Diosen' bosbane' Criston' ladjo bene' guaten' šaca' naquen diža' li dan' žale bi chosbane' bene' ba gosat.

16 Le šaca' bi chosbane' bene' ba gosat, lecze bi bosbane' Criston'.

17 Šaca' naquen da' li Diosen' bi bosbane' Criston', bibi zejen da' chejnilaže'chone' na' bi nacho beque'e xtolachon'.

18 Šaca' naquen da' li bi bosbane' Criston', ba gosebiayi' yogo' bene' ba gosat bene' gosejnilaže' Criston' še ca'.

19 Na' šaca' da' zoacho lez šjayzoalencho Criston' cate' yeza'cho yežlio nga naquen da' güenlaže', yela' zi' xench chac che chio' chejni'ilaže'cho Criston' clel ca' che yezica'chle bene' še ca'.

20 Perw na' da' li Diosen' bosbane' Criston' ladjo bene' guat ca', na' da'nan' nezecho žin ža yosbane' yezica'chle bene' chesejnilaže'ne' še ba gosate'.

21 Gwxe yela' goten' yežlio nga da' gwzoa' to bene' bene' da' mal, na' lecze ca'czen' goc, to bene' bene' cont žin ža yebancho ladjo bene' guat.

22 Le gwxe yela' goten' cate' Adanna' bene' da' malen', da'nan' yogo' benačen' chesate'. Nach Criston' bene' cont yogo' bene' yesaque' txen len le' yesenite' toli tocanē.

23 To tocho yebancho ladjo bene' guaten' cont soalencho Criston' cont caten' ba bsi'e xnezena'. Criston' gwžialagüe' bebane' ladjo bene' guat ca' na' cate' yide' da' yoble chio' chejnilaže'chone' lecze yebancho ladjo bene' guat še ba gotcho.

24 Nach te che yežlio nga. Na' Criston' gwnitlagüe' yela' chnabia' che yogo' bene' chesegue'ede' Diosen' na' yeque'e yela' chnabia' che yogo' da' xigüe' ca'. Na' yeyožen' Criston' gone' lo na' Xe' Diosen' yogo' da' nłane' chnabi'e na' yogo' non' chnabi'e.

25 Diosen' bžie' bia' zoa Criston' chnabia'che' ca' yogo' bene' ca' na' bichle da' ca', na' Diosen' gone' cont žin ža cate' gwlej gwšoše' bene' ca' na' bichle da' ca' bi cheson txen len le'.

26 Na' cate' yeyož gwlej gwšoše' yogo' bichle da' bi chon txen len le', nach gwcuzeze' yela' goten'.

27 Diosen' ba nsi'e xnezen' cont yogo' lo da' zjade zjanaquen lo na' Criston'. Perw bi nacho zejen Diosen' naque' lo na' Criston', san Diosen' nsi'e xnezen' cont yezica'chle bene' na' bica'chle da' zjade yesaquen lo na' Criston'.

28 Nach cate' ba ben Diosen' cont yogo' da' zjade ba zjanaquen lo na' Criston', nach Criston' gwlo'e lecze le' naque' lo na' Xe' Diosen'. Can' gac cont yogo' benač na' yogo' angl yesache'ede' Diosen' naque' Xangaque', na' lecze yesache'e da' xigüe', beyixe' na' bichle da' zjade.

29 Nita' bene' chesezoe' nis gualaz bene' ba gosat. Na' bibi zejen da' chesone' ca' šaca' bi žin ža yesyeban bene' guat ca'.

30 Na' neto' yogo' ža nita' bene' chesaclaže' yesote' neto' da' choe'to' xtiža' Criston', na' bibi zejen zoa chbezto' ca' šaca' bi yesyeban bene' guat ca'.

31 Bene' migw, choa' diža' li chnia' chbechgüeda' ba chejnilaže'le Xancho Jesucriston', na' lecze ca' choa' diža' li chnia' yogo' ža chzanlaže' cuina' gac bi da' gac chia'.

32 Guac nacho bež znia' ba gwdilla' Efeso nga ga ba gosedabaga'chgua bene' neda'. Na' bibi zejen ba bchejda' yogo' da' ba gosonde' neda' šaca' bi yesyeban bene' guat ca'. Na' šaca' bi yesyeban bene' guat ca', yejni'a goncho can' ža dižan' žan: "Ye'ej gagwtezcho, le gwxezen' gatcho."

33 Bi güe'le latje yesonlede' le'e. Da' li can' ža to diža' da' de, žan: "Bene' chejlen bene' cheson da' mal lecze solao gone' can' chesone'na'."

³⁴ Le yeyon xbab šagüe' na' cuejyichjele xbab mal dan' chonlen', le balle biña' šejni'ile che Diosen'. Chnia' ca' da' chaclaža' gaquuele zto' che da' malen' chonle.

Cuerp che bene' yesyeban ladjo bene' guat ca'

³⁵ Balle nabljale nac gac yesyeban bene' guat ca' o nac gac cuerp čhegaquen' cate' yesyebane'.

³⁶ Nchoļ yichjlažda'olen' še chaquele bi gac yesyebane' ladjo bene' guat ca'. Nezecho to to xoa' dao' da' chazcho cheyala' yexinjen cont la' yel dao'.

³⁷ Na' caten' chazcho, bi chazcho yel daon', san chazcho xoa', nach chexinjen cont la' yel daon'. Na' can' chac len bi da' chazcho, con xsen' chazcho na' chla' yag dao' čhen.

³⁸ Diosen' chone' cont chla' yag dao' dan' chazchon', bi chla' yag yoble da' bi gozcho.

³⁹ Na' gague toze ca' nac cuerp che chio' benač len cuerp che be žia tap ni'a na'ba'. Nža' cuerp che benač na' nža' cuerp che be žia xil, na' lecze nža' cuerp che be chesaš lo' nis.

⁴⁰ Nža' cuerp che benač, nža' cuerp che beyixe', na' nža' da' ca' chle'echo le'e yaban', gwbiž, bio' na' beljw ca'. Na' nža' yela' xdan che gwbiž, bio' na' beljw ca', na' nža' yela' xdan che benač na' che beyixe' ca' chesaš lo' yežlion'.

⁴¹ Na' nža' ca' chseni' gwbiž, nža' ca' chseni' bio' na' lecze nža' ca' chseni' to to beljw ca'.

⁴² Nach cate' yesyeban bene' ca' ba gosat, cuerp čhegaquen' bi gaquen ca' cuerp da' gosape' cate' gosebane'. Cuerp čhegaque' da' bosocuaše' lo' ban' ba beyožon', perw cuerp cobe čhegaquen' gague da' te čhen.

⁴³ Bibi zaca' cuerp che bene' guat ca', zjanaquen cuerp šen, na' cheyožon', da'nan' hcuaše'chon lo' ba. Perw bene' gosejnilaže' Criston', cate' yesyebane' ladjo bene' guat ca' yesyeyac cuerp čhegaque' da' güen juisyw na' da' gual.

⁴⁴ Cuerp čhegaquen' zjanaquen de bela' čhen cate' chosocuašen' perw cate' yesyebane' ladjo bene' guat ca' nža' ba zjanac cuerp čhegaquen', le yesyeyaquen cuerp cobe da' yeson con can' ža Spiritw che Diosen'. Nezecho cuerp čhechon' da' de na'a naquen de bela' čhen, na' lecze cheyala' nezecho žin ža cate' yeyaquen da' cobe na' gonen con can' ža Spiritw che Diosen'.

⁴⁵ Xiža' Diosen' nyojen žan Adán bene' goc bene' nechw gwzoe' gwbane' cani'. Na' na'a zoa Criston' zaca'lebde' ca' Adánna', le Criston' chone' yela' mban toli tocaņe.

⁴⁶ Na'a cuerp čhechon' bi naquen to da' chzenag che Spiritw che Diosen', perw žin ža yeyaquen da' cobe na' gwzenaguen che Spiriton'.

⁴⁷ Diosen' bene' bene' nechw len bište yo cont gwzoe' lo' yežlio nga, perw Xancho Criston' ben' zaca'lebde' ca' bene' nechon' ze'e yaba.

⁴⁸ Na' chio' benač, cuerp čhechon' naquen ca' cuerp che bene' nechon' da' ben Diosen' len bište yo, da'nan' naccho che yežlio nga. Na' chio' chejnilaže'cho Criston', žin ža cate' cuerp čhechon' yayaquen da' cobe can' nac cuerp che Criston' bene' za' yaba.

⁴⁹ Na'a šlac zoacho yežlion' naccho ca' bene' ben Diosen' len bište yo, perw cate' žin ža šjayzoacho yaban', gaccho ca' Cristo ben' za' yaba.

⁵⁰ Bene' migw, chnia' le'e bi gac yežincho yaba gan' zoa Diosen' len cuerp čhechon' de bela' čhen. Da' te che cuerp checho quinga, da'nan' bi gac šjayzoalenchon len Diosen' toli tocaņe.

⁵¹ Chnia' le'e to da' nono gwņeze cani', gague yogo'chon' gatcho, perw yogo'chon' yeža' can' gaccho.

⁵² Bedao'nez, ca' bedaon' chžode' yejlaochon', yeža' can' gaccho cate' cuež trompeta che Diosen'. Cuež trompetan' na' yesyeban yogo' bene' ba gosat bene' gosejnilaže' Criston'. Na' cuerp čhegaquen' yesyeyaquen da' cobe da' bi yesat na' lecze ca' chio' ne' mbancho yeža' cuerp čhechon'.

⁵³ Le cuerp čhechon' da' mbanecho yežlio nga da' te čhen. Naquen da' chat, na' cheyala' yayaquen da' cobe da' bi gat, da' bi gožo' na' da' bi te che.

⁵⁴ Cate' ba beyac cuerp čhechon' da' cobe da' bi gat na' bi te čhen, cana' ba goc can' nyoj Xiža' Diosen' gan' žan: "Diosen' gwzoede' bcueze' yela' goten', na' choņe' yela' mban toli tocaņe.

⁵⁵ Bich soe yela' goten' chio' da' yoble. Gwbatech gatcho šo'cho lo' ba."

⁵⁶ De yela' got čhecho na'a le chio' benač choncho da' mal. Da' neze chio' benač can' ža ley che Diosen' cheyala' goncho na' bi chzenagcho gonchon, da'nan' chnabia' da' malen' chio'.

⁵⁷ ChoχcLen Diosen' gwsele' Xancho Jesucriston' beque'e xtoļa' chio' chejnilaže'chone'. Da'nan' bi soe yela' goten' chio', san de yela' mban toli tocaņe čhecho.

⁵⁸ Da'nan' bene' migw chia', chacda' le'e na' chņeyoeda' le'e le soačhač len toze xbab. Na' le gonchgua xšin Xanchon', le nezczecho cate' choncho xšinen' chejnilaže'chone', gague da' chondadzchon'.

16

Beñe' Corinto chosotobe' mechw cont yesaclene' beñe' Jerusalén ca'

¹ Nach ñia' naquen' gonle cate' gwtooble mechw da' gaclenen beñe' ca' chesejnilaže' Diosen' Jerusalénna'. Le gon can' bena' mandadw yeson beñe' ca' chesedop chesežag chesonxene' Criston' to to yež da' zjachi' distritw Galacia.

² Yogo' ža dmiġw to tole cheyała' cuejle late' güeje mechw según gaca'te' benle gan lagüe' xman. Na' co'ošagüe'le mechon' cont den cate' yida' gan' zoale na' gague za' gwtooblen cate' yedenä'a le'e.

³ Nach cate' la'a gan' zoalen', cana' gwzoja' cart da' yesože' beñe' ca' chaclaže'le šjasesane' xmechwlen' Jerusalénna'.

⁴ Na' še chonen byen ša'a, cuina' čhi'a legaque' Jerusalénna'.

Pablon' chone' xbab šjane'e beñe' Corinto ca'

⁵ Na' yida' gan' zoale cate' yeyož yedia' Macedonia, le cheyała' šjajna'a beñe' lježcho ca' nita' na'.

⁶ Na' chacda' yega'añlena' le'e do thio' do chop bio' o še yega'aña' doxen tiemp zag, nach gaclenle neda' cate' yeza' ša'a gate'teze ša'a.

⁷ Bi chaclaža' yedenä'a le'e ña'a, le con teza' še ba za'a, na' chaclaža' soa' šša len le'e cate' yida' še Xancho Diosen' gonšque' latje.

⁸ Chaclaža' yega'aña' Efeso nga žinch ža gała' ĩni dan' že' Pentecostés.

⁹ Le beñe' zan že' nga beñe' chesacclaže' yosozenague' che Criston' na' lecze že' beñe' zan beñe' bi chesacclaže' čixjue'eda' xtižen'.

¹⁰ Na' še la' Timoteon' gan' zoalen', le gwlebe' na' le gwzenag che' cont bi žebe' gwsed gwlo'ede' le'e, le can' chona' xšin Xancho Diosen', lecz can' chonen'.

¹¹ Ne tole bi cheyała' gonle xbab bibi zaca' da' chsed chlo'ede', san soale güen len le' na' gaclenle' cate' yeze'e cont yeyede' gan' zoa' nga to šagüe' to güen, le chbeza'ne' txen len yezica'chle beñe' lježcho ca'.

¹² Na' ca' nac Apolosen', gota'yoeda'ne' lecze šejlene' Timoteon' gan' zoalen', txen len yezica'chle beñe' lježcho ca' yesaclene' le'. Perw bi chaclaže' šeje' ña'a, na' šeje' cate' soe' to latje.

Yeto čope diža' da' choe'len Pablon' beñe' Corinto ca'

¹³ Le soa le ña' can' chonlen', na' le soa len toze xbab šejnilaže'le Criston'. Bi žeble, san le soačhač gonle can' chazlaže' Diosen'.

¹⁴ Na' le gaque lježle bite'teze da' chonle.

¹⁵ Beñe' miġw čhia', nezele beñe' ca' že' liž Estéfanas gosaque' beñe' nechw gosejnilaže' Criston' distritw Acayan' na' ba gosaclenchgüe' yezica'chle beñe' lježcho beñe' chesejnilaže'ne'.

¹⁶ Da'nan' chneyoeda' le gwzenag čegaque' na' gonle can' chesenen', na' le gwzenag che nochle beñe' cheson xšin Diosen' na' chesaclene' beñe' lježcho ca' can' chesone'na'.

¹⁷ Chebeda' ba besela' Estéfanas, Fortunato, na' Acaico gan' zoa' nga. Legaque' ba gosaclene' neda' cont bich chacyaše'da' dan' bi zoale nga len neda'.

¹⁸ Ba gosone' cont beyaclaža' can' ba gosoncze' len le'e cana', na' da'nan' cheyała' güe'cho yela' choxclen čegaque' che dan' ba gosonen'.

¹⁹ Beñe' ca' chesedop chesežag chesonxene' Criston' doxen distritw Asian' chosoguape' le'e tiox. Na' Aquila na' Priscila na' beñe' ca' chesežag ližgaque' chesonxene' Criston' lecze chosoguapchgüe' le'e tiox.

²⁰ Nach yogo' beñe' lježcho že' nga chosoguape' le'e tiox. Na' cate' chdop čžagle txen, le gwnopa' na' lježle cate' gwguap lježle tiox cont gacbia' chaque lježle.

²¹ Cuincza' neda' Pablo chzoja' late' dao' le'e cart nga chguapa' le'e tiox.

²² Na' še ñe' nčixže balle bi chaquele Xancho Jesucriston', Diosen' gone' cont cuiaye'e toli tocañe. Xancho Jesucristo, yidšco' da' yoble.

²³ Gaclenšca Xancho Jesucriston' le'e.

²⁴ Chacda' yogo' le da' naccho txen chejnilaže'cho Cristo Jesusen'. Da' na'zen' žia' le'e.

CART GWCHOPE DAN' BZOJ POSTLW SAN PABLO CHE BENE' CA' ŽE' CORINTO

Postlw Pablo chzoje' bene' chesonxen Jesucriston' ciuda Corinto

¹ Neda' Pablo naca' postlw che Jesucriston', le can' chaclaže' Diosen'. Chzoja' cart nga che le'e chdop chžagle chonxen le Diosen' lo ciuda Corinto, na' che note tezechle bene' že' doxen distritw Acaya bene' ba gwlej Diosen' cont zjanaque' lo ne'e. Neda' len bene' migw checho Timoteo chguapto' le'e tiox.

² Na' chnabeto' Xacho Diosen' na' Xancho Jesucriston' yesaclene' le'e na' yesone' cont soa cuezle bin lo len xbab da' yo'o lo' yichjlažda' olen'.

Da' ca' gwđi gwxaca' Pablon'

³ Cheyala' soacho gonxencho Diosen', le naque' Xa Xancho Jesucriston', na' Jesucriston' lecze chonxene' le'. Xacho Diosen' cheyaše' cheži'ilaže'de' chio' na' len' cheyoe'xene' chio' cate' chac bi da' chac checho.

⁴ Ba cheyoe'xene' neto' len yogo' da' chzaca'zi'to' cont chac cheyoe'xento' yezica'chle bene' cate' bi da' cheseyi chesezaque'. Can' cheyoe'xen Diosen' neto', lecze can' cheyoe'xento' bene'.

⁵ Leca chyi chzaca'to' can' gwđi gwxaca' Criston', na' ca'cze leca cheyoe'xen Diosen' neto' da' chejnilaže'to' Criston'.

⁶ Da' zan da' chac cheto' da' chsed chlo'eto' xtiža' Diosen', perw zaca'czen' cont cheyoe'xento' le'e len da' chzaca'zi'le na' chaclenen le'e cont šjayzoale len Diosen'. Na' cheyoe'xen Diosen' neto' cate' bin' chac cheto', cont lecze neto' cheyoe'xento' le'e len bi da' chac chele. Na' cheyoe'xento' le'e cont chzoele cate' chzaca'zi'le can' lecze chzaca'zi' neto'.

⁷ Chbezto' gwyo gwčhejle da' chac chele, le nezetto' caten' chzaca'zi'le can' chzaca'zi' neto', Diosen' lecze cheyoe'xene' le'e can' cheyoe'xene' neto'.

⁸ Bene' migw, chaclaža' nezele can' gwđi gwxaca'to' caten' gwzoato' distritw Asia. Gwđi gwxaca'chguato', con bich bi goc gonto' na' bento' xbab gatzeto'.

⁹ Da' li bento' xbab lo' yichjlažda'oto' ba za' yela' goten'. Na' goc cheto' ca' cont gocbe'eto' bi soeczeto' gwyo gwčhejto' dan' chzaca'zi'ton' san cheyala' šejnilaže'to' Diosen' cont gone' chač laže'to', Dios ben' chosban bene' guat ca'.

¹⁰ Na' caten' bento' xbab gatzeto' catec da' gosonde' neto', Diosen' bosle' neto' cont bi gotto' na' ne' choslacze' neto' na'a. Na' zoato' lez yoslache' neto' bate'teze.

¹¹ Zoato' lez yoslacze' neto' cont še gaclen le neto' yo' güižlene' cheto'. Na' še zan le gon le ca', nach lecze zan le güe'le yela' choxclen che' cate' ba goclene' neto'.

Pablon' gwžede' šeje' ciuda Corinto

¹² Chbeda' choa' diža' can' chonto', le nezetto' lo' lažda'oto' chonto' güen len le'e do yichj do laže'to' na' lecze len note tezechle bene'. Bi nacho chonto' güen neče da' nacto' bene' sina', san da' nži'ilaže' Diosen' neto', da' nan' chaclene' neto' chonto' güen len yogo' lo' bene'.

¹³ Cart quinga chzajtto' le'e, bi gon le xbab še naquechle zejen, san šejni'ilen con can' nyojen, na' zoa' lez šejni'ilen bin lo'.

¹⁴ Na' zoa' lez žin ža cate' gacbe'eyane'le cont yebele güe'le diža' nacle neto' txen, can' ba chacbe'ele late' dao' na'a. Na' cate' žin ža yid Xancho Jesúsen' da' yoble, yebele güe'le diža' nacle neto' txen na' neto' yebetto' güe'to' diža' nacto' le'e txen.

¹⁵ Cana' godca' yedena'a le'e cont da' yechop ni'a soacho txen, le bena' xbab yebele yedena'a le'e.

¹⁶ Goclaža' tia' yedena'a le'e caten' gwy'a'a Macedonia na' lecze goclaža' yedia' gan' zoalna' cate' beza' Macedonian'. Na' godca' yeyoža' gaclen le neda' yeya'a Judean'.

¹⁷ Do laža' godca' gona' ca', gague chona' con can' žan chia' ca' cheson ba' bene' bi chesejnilaže' Diosen', to chesene' yesone' to da' yesone' na' to chesene' bi yesonen'.

¹⁸ Ca Diosen' chone' con can' že', lecze ca' neto' chnato' do laže'to' cate' chnato' to da' gonto'.

¹⁹ Na' lecze Jesucriston' bene' naque' Xi'in Diosen', toz can' naque' bate'teze, na' nac da' li yogo' can' gwnen', con can' gwđixjue'eto' xtižen' len le'e, neda', Silvano na' Timoteo.

²⁰ Na' yogo' da' güen da' ba gwna Diosen' gone', nezecho gonen' da' gwsele' Jesucriston'. Da' nan' len yela' chaclen che Jesucriston' chonxencho Diosen' che'chone': "Gacšca ca'."

²¹ Na' Diosen' chone' cont neto' na' le'e zoačhačcho chejnilaže'cho Criston'. Na' bene' chio' Spiritw che'na' cont gac goncho xšinen'.

²² Na' lecze zoa Spiriton' lo' yichjlažda'ochon' cont nezecho Diosen' ba gwque'e chio' ca' xi'ine' na' cont nezecho yogo' da' güen da' gwne' gone', žin ža cate' gonen'.

²³ Da' biṇa' yida' da' yoble Corinto gan' zoalen' yedeṇa'a le'e can' gwnia' gona', biṇa' yida' cont bi yedetiḷa' le'e che da' malen' chonḷe. Diosen' nombi'e yiḅhjaḷaḷda'ogua' na' nezde' choa' diḷa' ḷi chnia' ca'.

²⁴ Nezetō' gague neto' ye'to' le'e da' ni da' na' šejle'le. Ba zoaḅhaḅle chejnilaḷe'le Criston', na' neto' con chaclento' le'e cont soachle mbalazch.

2

¹ Ca' goquen' beḅhoglaḷa' bi yedeṇa'a le'e, ḷe goḅbe'eda' šaca' bedeṇa'a le'e gocyāše'cho.

² Na' šaca' bena' cont gocyāše'le, nono zoa no yeyon cont yezoa' mbalaz, ḷe ba bena' cont gocyāše'laḷe'le še ca'.

³ Bzoja' carten' ca' cont cate' yida' gan' zolna' bich gonḷe da' mal da' gonen gacyāše'da', ḷe cheyaḷa' gonḷe cont yebeda'. Na' zoa' lez ḷeḅze mbalaz soa le'e cate' gonḷe soa' neda' mbalaz.

⁴ Bzoja' le'e do cheḡuine'laḷa', da' gwzoachgua' gocyāše'da' che dan' chonḷen', na' gwcheḷchgua' chele. Na' da' bzoja' carten' ca', gague gwzelaḷa' yegüine'le, san gwzelaḷa' gacbe'ele ḷeca chacda' le'e.

Gwne' cheyaḷa' yesyezi'xene' che bene' ben da' malen'

⁵ Da' ḷi gocyāše'da' can' ben bena' ben da' malen', perw gague neda'zen' gocyāše'da'. Yogo'czle ba gocyāše'laḷe'le late' güeje can' ba goquen'. Chnia' gocyāše'le late' güeje cont bi nia' benche' chio' zi'ch ca cheyaḷa' nia'.

⁶ Ndop nḷagle txen gwchoglaole castigw che', na' da' na'zen' cheyaḷa' si'e.

⁷ Bich güe'ḷne' castigw, san yezi'xenḷe che' na' ḷe gon ḅhaḅ ḷaḷe' cont soede' yela' chacyāše'laḷe' chen' na' bi cuejyichje' Diosen'.

⁸ Da'nān' chṇeyoeda' le'e ḷe gon cont gacbe'ede' chaquelene'.

⁹ Ba bzoja' le'e cana' cont gwneḷzda' naquen' chonḷe, še chzenagle ḅhia' len yogo' dan' gwnia' gonḷe.

¹⁰ Na' na'a chaclaḷa' nezele note'teḷe beṇe' chezi'xenḷe che', ḷeḅze neda' chezi'xena' che'. Na' cate' chezi'xena' che beṇe', še zoa da' cheyaḷa' yezi'xena', chezi'xenan' lao Criston', na' ba bezi'xena' che bena' cont chaclena' le'e.

¹¹ Na' chezi'xencho che beṇe' cont Satanás dan' chnabia' da' xiḡüe' ca' bi soen gonen chio' gan, ḷe nezecho can' chaclaḷen' siye'czen chio'.

Pablon' goclaḷe' yeḷague' Titon'

¹² Cate' bḷina' Troas gan' gwḷixjue'eda' diḷa' güen che Criston', nacbia' Diosen' ba bene' cont bene' ḷe' na' gosacḷaḷe' bosozenague'.

¹³ Perw benchgua' xbab che beṇe' miḡw checho Titon' da' bi bḷine' na'. Da'nān' goša' beṇe' ca: "Nayeḷagcho", na' beza' beya'a distritw Macedonian'.

Zocho mbalaz da' nombia'cho Criston'

¹⁴ Choḅclen Diosen', none' cont Jesucriston' ba bebeje' chio' ḷo na' gwxiyen' na' mbalaz cheḅhe'e chio' soacho len le'. Na' gate'teḷe zoacho, Diosen' chone' cont chesacbe'e beṇe' naquen da' güen juisyw nombia'cho Criston'.

¹⁵ Diosen' chebede' choncho cont chesacbe'e beṇe' naquen da' güen juisyw yesejnilaḷe' Criston'. Na' baḷe' chesejnilaḷe'ne' na' de yela' mban ḅhegaque' toli tocaṇe, na' yebaḷe' bi chesejnilaḷe'ne' na' chesebiaye'e.

¹⁶ Na' beṇe' ca' chesebiayi' bi chesyebede' can' chonchon', ḷe che'chone' yesebiaye'e. Na' beṇe' chesejnilaḷe'ne' chesyebede', ḷe ba goclenchone' cont ba de yela' mban ḅhegaque' toli tocaṇe. Perw chio' bi chaccho to gualazcho gwlo'echo beṇe' ca güeṇṇa' naquen yesejnilaḷe' Criston'.

¹⁷ Beṇe' zan chosoše'e diḷa' da' cheso'e che Diosen' cont chesyebede' beṇe' len xtiḷa'gague' na' chosoneḷjue' ḷegaque' mechw. Neto' bi chonto' ca', san do ḷaḷe'to' choe'to' diḷa' lao Diosen' da' nacto' Criston' txen, ḷe Diosen' gwseḷe' neto' choe'to' xtiḷen'.

3

Da' cobe da' gwna Diosen' gone' cont gaclene' beṇachen'

¹ Bi gonḷe xbab chonxen cuinto' choe'to' diḷa' quinga. Nezele chonto' xšin Diosen' do ḷaḷe'to', na' bi chyaḷḷen goḅe'to' cart cont nezele nac nacto', na' neca chyaḷḷen gwzøjle cart da' goḅe'to' cate' šejto' ga yoble.

² Chaqueto' le'e da' gwḷixjue'eto' xtiḷa' Criston' len le'e cont gwyejnilaḷe'lene'. Na' yogo'ze bene' guac yesele'ede' can' ba boša' yiḅhjaḷda'olen' na' guac yeseṇezde' can' chonto' xšin Diosen'.

³ Gwyejnilaḷe'le Criston' caten' be'lento' le'e xtiḷen', na' Spiritw che Diosen' bocoben yiḅhjaḷda'olen'. Na' da' nacbia' becobe yiḅhjaḷda'olen' zaca'chen ca no cart da' nyoj to ḷe'e yiš o ca ley che Diosen' da' nyoj to ḷe'e yej.

⁴ Cheyaxjeto' žato' ca' le Criston' zoe' chaclene' neto' cont nezeto' chonto' can' chazlaže' Diosen'.

⁵ Nezeto' bi chac bi gonto' to gualazto', na' nezeto' gague neche bi da' ba ben neto' bchoj xšin Diosen' güen, le Diosen' chone' cont chac bite'teze da' chac.

⁶ Na' Diosen' ba bene' cont chac chyixjue'eto' da' coben' da' gwne' gone' gaclene' chio' beňach. Na' da' coben' bi naquen ca ley che' dan' byoj cani' chzejni'in chio' beňach cuiayi'cho yela' güen da' mal chechon', san na'a Spiritw čhen' chonen yela' mban toli tocane che chio' chejnilaže'chone'.

⁷ Cate' Diosen' bnežjue' da' Moisésen' ley che' dan' byoj le'e yej ta'a ca', bene' cont bene' Israe' ca' gosacbe'ede' ley čhen' naquen da' zaca'. Na' cana' catec gocitechgua cho'ala' Moisésen', bi goc yesena' bene' Israel ca' cho'alagüen', la'czla' gwdechle bega'a yela' chactiten' šolaže'. Na' ley nan' con bzejni'in beňachen' cuiayi'cho yela' güen da' mal chechon'.

⁸ Da'n'an' nezecho leca zaca'ch da' chon Spiritw čhe Diosen' na'a cont gata' yela' mban checho toli tocane.

⁹ Diosen' blo'e yela' zaca' che ley čhen' la'czla' bzejni'in chio' beňach si'cho castigw da' bi choncho can' žanna'. Na' zaca'ch xtiža' Diosen' da' de na'a da' chzejni'in cheyone' chio' bene' güen.

¹⁰ Da' naquen da' zaca'chgua cani', bičh naquen da' zaca' na'a, le ba de yeto da' zaca'chgua da' xench.

¹¹ Na' da' blo'e Diosen' yela' zaca' che da' ben žin šložze cani', cheyala' gache'echo leca da' xench zaca' da' coben' da' bi te che.

¹² Na' da' nezeto' gague da' te che da' cobe da' ba gwđixjw Diosen' cont chaclene' beňachen', da'n'an' bi chedi'ito' chyixjue'eto' xtižen' sin čhi chžebto'.

¹³ Da' Moisésen' bcuaše' cho'alagüen' len to lache' bxin cont bene' Israel ca' bi besele'ede' čhenit late' güeje yela' chactit che cho'alagüen'. Perw na'a gague chcuša'e'to' yela' zaca' che da' chon Diosen'.

¹⁴ Bene' Israel gualaž čheto' ca' bi gosejni'ide', ne ža na'aža bi chesezejni'ide' cate' chosolabe' ley dan' byoj cani' gan' nyoj da' ca' gwna Diosen' gone' gaclene' legaque'. Con bene' ca' chesejnilaže' Criston' chesejni'ide' bi zejen.

¹⁵ Ža na'aža cate' bene' Israel gualaž čheto' ca' chosolabe' da' ca' bzoj Moisésen', zjanaquen ca to da' ngaše' len legaque' yela' bi chejle' čhegaquen'.

¹⁶ Perw note'teze' cate' chesejnilaže' Xancho Criston', da' ca' zjanyoj bich chesaquen ca to da' ngaše' len legaque'.

¹⁷ Xancho Criston' naque' toze len Spiritw čhe Diosen'. Na' cate' ba zoa Spiritw čhe Xancho' lo' yichjlaždao' bene', bach zoe' binlo len Diosen'.

¹⁸ Yogo' chio' chejnilaže'cho Criston', yela' zaca' juisyw čhe Xancho Criston' bich ngašen' len chio', na' ba zejech cheyaquechcho bene' güen can' nac le', le zoa Spiritw čhe Xancho Criston' lo' lažda'ochon' chocoben xbab čhechon'.

4

¹ Diosen' beyaše' beži'ilaže'de' neto' na' gwleje' neto' cont chyixjue'eto' xtižen'. Da'n'an' bi cheche'eto' chyixjue'eton'.

² Na' bibi chonto' bagaše'ze ca no da' nac da' yela' zto'. Bi chončeto' bene' na' neca choša'to' xtiža' Diosen' cont yesyebe bene' chosozenag xtiža'ton'. San chle'ecze Diosen' chyixjue'eto' xtižen' con can' naquen cont yogo' bene' yesene xtiža'ton' yesenezde' lo' lažda'ogaquen' choe'to' diža' li.

³ Con bene' ca' ba zjambiyi' yela' bi chejle' čhegaquen', legacze' bi chesejni'ide' diža' güen dan' choe'lento' legaque'.

⁴ Le bene' bi chesejle' xtiža' Diosen' chosozenague' čhe Satanás dan' chnabia' da' xigüe' ca' latje da' yosozenague' čhe Diosen', na' Satanásen' chonen cont nčhoj yichjlažda'ogaquen'. Da'n'an' diža' güen čhe Criston' bi chšenin' lo' yichjlažda'ogaquen' ca to be'ni' cont yesenezde' Criston' naque' bene' zaca' juisyw. Cayane' nac yichjlaždao' Diosen' nac yichjlaždao' Criston', na' toz can' chesone'.

⁵ Na' ca nac diža' da' chyixjue'eto', chyixjue'eton' gague cont gwzenagle čhe neto', san cont gwzenagle čhe Jesucriston' ben' naque' Xancho. Na' da' chaqueto' Jesucriston', zoato' chonto' bite'teze da' chaclenen le'e.

⁶ Na' Dios ben' gwne' gata' be'ni' yežlio nga gan' goc čhoj, ba gwlo'e be'ni' čhen' lo' yichjlažda'ochon' cont nombia'cho Jesucriston' ben' nac bene' zaca' juisyw, na' cate' ba nombia'chone' chache'echo can' nac yela' bene' zaca' čhe Diosen'.

Pablo cho'e xtiža' Diosen' lagüe' da' chejnilaže'ne'

⁷ Cuerp checho quinga da' chesat zjazaca'leben ca to che'e nis da' naquen de gona'. Perw Diosen' ba gwlo'e be'ni' chen' lo' yichjlažda'ochon' na'a šlac ne' mbancho len cuerp checho quinga cont gache'echo bibi chac goncho še bi gone' yela' guac xen chen' cont gac bi da' goncho.

⁸ Na' neto', da' zan da' chyi chzaca'to', perw bi chbejyichjto' xšin Diosen'. Zan ni'a bi chežellaže'to' nacle gonto', perw nezeto' Diosen' chaclene' neto'.

⁹ Chosolagšibe' neto', perw Diosen' bi chbejyichje' neto'. Chosoči chososaque' neto', perw Diosen' bi cho'e latje yesote' neto'.

¹⁰ Gate'teze chejto', con yogo' ni'a chosoči chososaca' bene' neto' na' chesaclaže' yesote' neto' can' gosote' Jesúsen'. Na' Diosen' cho'e latje chac cheto' ca' cont nacia' zoacze Jesúsen' chaclene' neto' šlac mbanto' len cuerp cheto' quinga.

¹¹ Na' šlac ne' mbanto', yogo' ža nita'cze bene' chesaclaže' yesote' neto' lagüe' da' chyixjue'eto' xtiža' Jesúsen'. Na' chac cheto' ca' cont nacia' zoacze Jesúsen' chaclene' neto' šlac mbanto' len cuerp cheto' quinga da' yesat.

¹² Can' chac, tža tža chesaclaže' yesote' neto', san le'e ba de yela' mban chele toli tocaņe.

¹³ Xtiža' Diosen' nyojen žan: "Chejnilaža' Diosen' na' da'n'an' choa' diža' che'." Na' ca ben' bzoj da'na' gwejnilaže' Diosen', ca'czen' chejnilaže'to'ne' na' da'n'an' choe'to' xtižen'.

¹⁴ Le nezeto' Dios ben' bosban Xancho Jesúsen' ladjo bene' guat ca' lecze žin ža yosbane' chio' še ba gotcho, na' neto' t xen len le'e šjayzoacho gan' zoe'na'.

¹⁵ Neche le'e bžaglaoto' yogo'lol da' ba goc cheto'. Le chaclaže'to' gac zanco gaclenchgua Diosen' chio' cont šejnilaže'cho Xancho Jesúsen', na' lecze gac zanco güe'cho yela' choxclen che' catec bene' zacar' naque'.

¹⁶ Da'n'an' bi chjažaque'laže'to'. La'czla' tža tža zej chaxo'ch cuerp cheto' quinga, lecze tža tža Diosen' chocobche' yichjlažda'oto'.

¹⁷ Job te che bite'teze da' dao' da' chžaglaoch yežlio nga. Na' da' ca' chyi chzaca'cho chesaclenen chio' cont soacho mbalaz juisyoch cate' šjayzoacho len Diosen' toli tocaņe, na' lenna' da' zaca'ch ca bite'tezhle.

¹⁸ Nachen' bi chi' yichjcho che da' chle'echo yežlio nga, san chi' yichjcho che da' bi chle'echo. Le yesede che da' ca' zjade yežlio nga da' chle'echo, na' da' ca' bi chle'echo, gague da' yesede čhegaquen, nita'czen toli tocaņe.

5

¹ Cuerp chechon' zaca'leben ca to yo'o da' bi chzibia'. Na' nezecho še ba byinjen, Diosen' ba none' to yo'o güen checho yaban' da' soa toli tocaņe; na' lenna' gague naquen to da' ben benačh.

² Na' šlac ne' zoacho mbancho yežlio nga, chbežyaše'cho lo' lažda'ocho zelaže'chguacho šjayzoacho lo' yo'o da' non Diosen' checho yaban'.

³ Chona' xbab cuerp čobe da' gone' zaca'leben ca to xacho da' chyažjen chazcho cate' yežincho yaba.

⁴ Da' li chio' ne' chžaglaoch len cuerp checho quinga chbežyaše'cho lo' lažda'ochon'. Gague da' chaclaže'cho gatcho, san chaclaže'cho yeža' cuerp checho quinga da' te chen len to da' soa toli tocaņe.

⁵ Na' Diosen' gwleje' chio' cont šjayzoacho len le' na' gwsele' Spiritw chen' zoan lo' yichjlažda'ochon' cont nezecho dech da' gone' checho.

⁶ Da'n'an' bi chaczējaže'cho, le nezecho šlac mbancho len cuerp checho quinga biņa' šjayzoacho len Xancho Criston'.

⁷ Na' la'czla' biņa' le'echo da' ca' gone' checho, zoacho chejnilaže'chone'.

⁸ Na' da'n'an' bi chaczējaže'cho, le chaclaže'cho cuejyichjcho cuerp checho quinga cont šjayzoacho len Xancho Criston'.

⁹ Nachen' zoacho choncho da' chazlaže' cont yebede' chio' šlac ne' mbancho na' cate' ba gotcho.

¹⁰ Le to tocho cheya'a' techo lao Criston' gan' chone' yela' justisen' cont čhogbi'en checho na' gone' soacho mbalaz o saca'zi'cho con can' ba bencho šlac mbancho, še bencho da' güen o da' mal.

Benachen' guac yesenite' binlo len Diosen'

¹¹ Na' dan' nezeto' yogo'cho yodecho cuent lao Xancho Criston' che yogo'lol da' ba bencho, da'n'an' chņeyoeto' bene' yosozenague' che'. Diosen' nezde' do laže'to' chņeyoeto' bene' yosozenague' che', na' zoa' lez lecze le'e chache'ele lo' lažda'olen' zoato' chonton' do laže'to'.

¹² Bi nacho chonxen quinto' da' yoble dan' chnia' ca', san chnia' ca' cont yebele can' chonton' na' nezele naquen' yoži'ile xtiža' bene' ca' chesenelagüe' cheto'. Bene' ca' chesa'laže'

da' ba zjansede' na' da' zjanaque' no zjanaque'. Bibi xbab chesone' che can' nac yichjlažda'ogaquen'.

¹³ Še chaquele chactontto' can' ba benton', le gon xbab bento' con can' gwna Diosen'. Na' še chaquele zoašagüe'cze yichjlažda'oto', le gon xbab chonto' bi da' chonto' cont chalentto' le'e.

¹⁴ Leca chaque Criston' chio' na' da'n'an' chonto' xšinen'. Na' nezecho toz Criston' bnežjw cuine' gote' neche yogo'cho, na' da' naccho txen len le' guac nacho yogo'cho ba gotcho len le'.

¹⁵ Bnežjw cuine' gote' neche yogo' chio' beňach, cont soa cuezcho goncho can' chazlaže' na' bich soa cuezcho goncho con ca žan checho. Gote' na' bebane' ladjo bene' guaten' neche chio'.

¹⁶ Neto' cate' biňa' šejnilaže'to' Criston' goqueto' bibi zaque', le bento' xbab zaca' bene' še no naque' lo yežlio nga o še bi da' de che'. Perw na'a bich chonto' xbaben' ca' che Criston' o che note'teze bene'.

¹⁷ Na' note'tezcho še naccho Criston' txen, Diosen' ba bocobe' yichjlažda'ochon'. Na' bich chebecho da' ca' bebecho cana' na' bich choncho can' bencho cana'. Zoacho ca bene' cobe.

¹⁸ Diosen' bozoe' chio' binlo len le' na' bene' cont beyaccho ca bene' cobe cate' gwyejni-laže'cho Criston'. Na' gwlo'e lo na'cho ye'cho bene' can' yesenite' binlo len Diosen'.

¹⁹ Ye'cho legaque' Diosen' gwsele' Criston' cont note'teze bene' yesejni-laže' le' yesenite' binlo len Diosen', na' Diosen' bich gone' cuent che da' xinj dan' ba gosone'. Can' cheyała' ye'cho bene' cont yesenite' binlo len Diosen'.

²⁰ Criston' gwsele' chio' ca cuine' na' Diosen' chaclaže' neyoecho bene' ca cuince Criston' chņeyoede' legaque', ye'chone'. "Le soa binlo len Diosen'."

²¹ Criston' bibi da' mal bene'. Perw na' Diosen' bene' cont Criston' gwxcac'zi'e neche xtoła'chon' cont none' chio' bene' güen da' chejni-laže'chone'.

6

¹ Neto' chonto' xšin Diosen' txen len le'. Da'n'an' chņeyoeto' le'e, le gon can' chazlaže' Diosen' cont gwlo'ele naquen to da' zaca'chgua da' beyaše' beži'ilaže'de' chio'.

² Nyoj can' gwne':

Cate' bžin ža goc da' bžia' bia', cana' bzenaga' chio'.

Na' cate' bžin ža benan', cana'chen' godlena' le'.

Na' dan' nyojen ca' zejen na'a bač bžin žan' chaclen Diosen' beňachen', le ža na'aža chnežjue' yela' mban toli tocañe che bene' chesejni-laže' Jesucriston'.

³ Bi chonto' bite'teze da' gwžon cont bene' bi yesejni-laže'ne', le chaclaže'to' bibi gata' da' yesenlagüe bene' che xšin Diosen' da' chonto'.

⁴ Da'n'an' bite'teze da' chonto' chlo'eto' chonto' xšin Diosen' ca cheyała'. Chyo chčhejto' cate' chosoči chososaca' bene' neto', cate' chzaca'zi' chzaca'yaše'to', na' cate' za'ac bichle da' mal len neto'.

⁵ Zoa cate' goseyine' neto', cate' goseyixjue' neto' ližya, na' cate' gosebeque' žaš che xtiža'ton'. Zan las bento' žin gual, na' gwlejšto' bišgal na' gwbił gwdonto'.

⁶ Na' da' chi' yichjto' chonto' xšin Diosen' can' chazlažen', bitw bi da' yela' zto' chonto'. Chzejni'ito' bene' len yela' chejni'i che Diosen', napt'o yela' chxenlaže' len yogo'loł bene' na' chonto' güen len yogo'lole'. Chonto' con can' chzejni'i Spiritw che Diosen' neto', na' do laže'to' chaqueto' yogo'loł bene'.

⁷ Zoato' chzejni'ito' bene' diža' li, na' chonto' yogo'loł da' chonto' len yela' guac che Diosen'. Na' da' zoato' chonto' da' zej to liča, chaclenen cont soeto' tilłento' da' malen' na' cont bi gwzenagto' che gwxiyen'.

⁸ Zoato' chonto' xšin Diosen' can' chazlaže' cate' chesonxen bene' neto' na' cate' chesegue'ede' neto', cate' chesene' güen cheto' na' cate' chesene' mal. Choe'to' diža' li, cate' bene' chesejle'e cheto' na' cate' bene' chesacde' chonlaže'to'.

⁹ Bał bene' bi chesejle'e chonto' da' zaca', perw yebałe' zjanезде' chonto' da' zaca'. Zan las chonto' xbab gatzcto', perw ne' mbanto'. Na' la'czła' yogo' da' ca' chac cheto', biňa' yesote' neto'.

¹⁰ Da' zan da' chac cont gacyaše'to', perw chbeto' lo' lažda'oton'. Nga'anyaše'to', perw chonto' cont bene' zan nite' mbalaz. Na' la'czła' bibi de cheto', yogo'loł bi da' de naquen cheto' da' nacto' Criston' txen.

¹¹ Le'e bene' Corinto, bač be'lento' le'e yogo' diža' da' yo'o lo' lažda'oton', le chacchgüeto' le'e.

¹² Nži'ilaže'to' le'e, perw le'e bitec nži'ilaže'le neto'.

¹³ Chata'yoeda' le'e ca chon to bene' len xi'ine', le gaque neda' ca chacda' le'e.

Spiritw che Diosen' zoan lo' yichjlaždao' chio' chejni-laže'chone'

¹⁴ Bi cheyała' gaccho txen len bene' bi chesejnilaže' Criston'. Še Diosen' ba none' chio' bene' güen len le', bich gac goncho txen len bene' cheson da' malen'. Chio' yo'o be'ni' che Criston' lo' yichjlažda'ochon' bi cheyała' goncho txen len bene' bi yo'o be'ni' chen' lo' yichjlažda'ogaque'.

¹⁵ Criston' bi chac gone' txen len Satanás dan' chnabia' da' xigüe' ca', na' ca'cze bene' chejnilaže' Criston' bi cheyała' gone' txen len bene' bi chejnilaže' Criston'.

¹⁶ Nezecho bi gac še' l' gua'a lsaca' da' chesejnilaže' bene' lo' yodao' gan' chejnilaže'cho Diosen', na' ca'cze bi chac soa Diosen' len chio' chejnilaže'chone' še zoa bichle da' chejnilaže'cho. Chac can' gwna Diosen':

Soa' len legaque' na' talena' legaque'.

Neda' Dios naca' ben' yesejnilaže' na' legaque' yesaque' yež chia'.

¹⁷ Da'n'an' cheyała' goncho can' gwna Xancho Diosen':

Le yechoj len bene' bi chesejnilaže' neda' na' bi gacle toze len legaque'.

Na' bi gonle da' xinjen'.

Nachen' yebeda' soa' len le'e.

¹⁸ Na' gaca' Xale, na' le'e gacle xi'ina'.

Can' ža Xancho Dios ben' nape la'zelagüe yela' guac xen.

7

¹ Le'e bene' chacda', ba nezecho can' gwna Diosen' gone' güen len chio'. Da'n'an' cheyała' cuejyichjcho bich goncho bite'te ze da' xinj da' gwchenen cuerp chechon' o yichjlažda'ochon'. Na' cheyała' gapcho Diosen' bala'an gwzenagcho che' tža tža na' šejch gaccho bene' güen can' chaclaže'.

Ba bža' xbab che bene' Corinto ca'

² Le gague neto'. Ne tole bibi beneto'. Ne tole bi bzejni'ito' clele, na' ne tole bi gwziye'to'.

³ Gague žia' ca' cont tila' le'e, le can' ba gwnia' cana', chacda' le'e na'a šlac mbancho na' lecz ca' gacda' le'e cate' ba gota'.

⁴ Nežda' lo' lažda'ogua' gonle can' chazlaže' Diosen', na' chbeda' choelena' bene' diža' ca güenna' chonle. Ba beyacxenlaža' da' gwnežda' chonle güen, na' zoa' mbalaz la'czla' da' zan da' chac chia'.

⁵ Cate' bežinto' Macedonian' bibi latje gota' cont yezi'laže'to' len da' gwdi gwxcato'. Gwnita' bene' bososašlene' neto' na' lecze bžebo' lo' yichjlažda'oto' goqueto' nac gacto'.

⁶ Na' Dios ben' cheyoe'xene' bene', beyoe'xene' neto' da' bela' Titon'.

⁷ Na' beyacxenlaže'to' gague da' bele'e na'zen' san da' bedeye'e diža' chebede' can' chonlen'. Na' be'e diža' zelaže'le yedena'to' le'e da' yoble. Na' že' chegüine'le che dan' ba goquen' na' chi' yichjle gonle can' gwnian'. Nachen' leca bebecnda' gwnežda' da' ca'.

⁸ Chache'eda' gocyäše'le can' gwnia' le'e carten' bzoja' le'e. Na' gwdechle betinjda' da' bena' cont gocyäše'le, perw na'a bich chetinjda' da' gwsela' carten', le šložzen' gocyäše'le.

⁹ Chbeda' na'a, le goclenen le'e cont begüine'laže'le che da' xinjen' benle na' betinjle chen, can' goclaže' Diosen'. Na' can' goquen' bi bchojen mal dan' gocyäše'len'.

¹⁰ Cate' ba bencho da' xinj, Diosen' chaclaže' yegüine'cho che dan' benchon' na' yetinjechon. Na' chone' yela' mban toli tocañe che chio' chetinj xtoła'chon', na' leca mbalazch soacho še ba betinjecho xtoła'chon'. Perw bene' zan cate' chesegüine'laže' bi chesyetinjde' xtoła'gaquen', nach yesebiaye'e.

¹¹ Chebe Diosen' can' begüine'len', le goclenen gwzelaže'le benle can' gwna Diosen'. Goclaže'le gwlo'ele bich chonle txen len ben' ben da' xinjen', san bža'ale che da' xinjen' benen'. Bžeble yedeyena' le'e castigw na' gwzelaže'le gonle ca' yebeda'. Nach be'le castigw che ben' ben da' xinjen'. Nachia' bich bi xtoła'le de can' benlna'.

¹² Na' ca' nac carten' bzoja' le'e, gague gwche' yichja' che ben' ben da' xinj na'ze, o che ben' bende' ca', san gwche' yichja' che le'e cont gacbe'ele lao Diosen' ne' chaquele neto' na' ne' chaclaže'le gonle can' che'to' le'e.

¹³ Na' na'a ba beyacxenlaže'to' da' bzenagle četo'.

Na' lecze chebecgüeto' ca' mbalaz zoa' Titon', le yogo'le benle ga bezoa' Titon' binlo len xbab da' yo'o lo' yichjlažda'ogüen'.

¹⁴ Goša' Titon' nežda' gonle güen. Na' bi cheto'eda' da' goša'ne' ca', le ca' da' li zjanac yogo' da' chzejni'ito' le'e, lecz ca' da' li bchoj dan' gožto' Titon', na' nachia' be'to' diža' li.

¹⁵ Na' ba chacchde' le'e cate' chjayze'ede' da' bzenagle che' na' da' bžeble caten' gwnezele benle da' xinjen'.

¹⁶ Da'n'an' chebeda' na' nežda' yeyož gonle can' chazlaže' Diosen'.

8

Besezande' da' gota' chegaque' gosaclene' bene' yoble

¹ Bene' migw, chaclaže'to' nezele can' ba goclen Diosen' to cuen to cuen bene' ca' chesedop chesežag chesonxene' Criston' to to yež gan' mbane distritw Macedonian'.

² Gocchgua yeła' yaše' yeła' zi' chegaque', perw Diosen' bene' cont gwnita'chgüe' mbalaz lo' yichjlažda'ogaquen' na' besyebechgüede' bosotobe' mechw xen cont gosaclene' bene' yoble.

³ Nežda' na' choa' diža' bosonežjochgüe' da' beseyažje bene' yoble la'czla' bibi gota' chegaque', na' con xbab chegaczen' gosone' ca'.

⁴ Goseņeyoede' güe'to' latje yosonežjue' mechw cont yesaclene' bene' ca' chesejnilaže' Diosen'.

⁵ Na' gosonche' can' bento' xbab yesone', le zgua'tec goson cuingaque' lo' na' Xancho Criston' na' lecze goson cuine' lo' na' neto' dan' gosaclaže'chgüe' yesone' can' chazlaže' Diosen'.

⁶ Da'nan' ba gota'yoeto' Titon' yeyede' yeto gan' zoale cont gaclene' le'e yeyož gwtoble mechw dan' goclene' le'e gwzolaole btoble cana'.

⁷ Güenchgua chonle chejnilaže'chgüale Criston' na' choe'chgüale xtižen', da' zan da' chejni'ile che Diosen', chonchgüale xšinen', na' chaquechgüele neto'. Lecze le gon güenchgua na' le gwtobe da' cheseyažje bene'.

⁸ Bi chona' byen gwnežjwle mechon', san chaclaža' gonle xbab še chaquele Diosen' na' še chaque lježle do laže'le can' goson bene' Macedonian' da' chesacde' Diosen' na' lježgaque'.

⁹ Nezele leca nži'ilaže' Xancho Jesucriston' chio'. Da' chacde' chio' bcua'ane' yogo'lol da' šagüe' da' de che' gan' zoe' len Diosen' na' bide' golje' bene' yaše' yežlio nga, bedeyene' cont yogo' dan' de che' gaquen checho naccho txen len le'.

¹⁰ Nachen' gwzejni'ida' can' chacda' naquen güen gonle. Godgüiz goclaže'le gaclenle bene' yaše' ca' na' gwzolaole btoble mechon' do yichj do laže'le.

¹¹ Na' chacda' güen yeyož gwtoblen na'a do yichj do laže'le can' gwzolaole, na' gwnežjwle can ca zelao saque'le.

¹² Note'tezcho še do laže'cho chaclaže'cho gwnežjwcho bi da' gwnežjwcho, Diosen' yebede' la'czla' late'ze da' de da' gwnežjwchone'. Bi chnabe' gwnežjwchone' da' bi de checho.

¹³ Bi žia' gonle cont bich bi yega'an chele na' gata' che bene' yoble.

¹⁴ Con chaclaža' gata' da' chyažje yogo'le. Šlac na'a de che le'e, cheyała' gaclenle bene' ca' cheseyažjde'. ¿Chixe še gwžin ža cate' gata' chegaque' na' le'e chyažjele? Cana'chen' yesaclene' le'e cont gata' da' chyažje yogo'le.

¹⁵ Nach gac can' nyoj Xtiža' Diosen' žan: "Bene' botobe' da' zcha'o, bitw nacho becho'onen che', na' bene' botobe' late'ze, gata'cze da' byažjde'."

Titon' na' bene' lježe' ca'

¹⁶ ChoχcLen Diosen' bene' cont Titon' zelaže'chgüe' gaclene' le'e con can' zelaža' neda'.

¹⁷ Na' cate' goša'ne' yedene'e le'e da' yoble cont gaclenche' le'e, bebede', le to gualaze' bene' xbab yeyede' gaclenche' le'e.

¹⁸ Na' chsela'to' yeto bene' lježcho len Titon'. Na' to cuen to cuen bene' ca' chesedop chesežag chesonxen Jesucriston' cheso'e diža' che benga chsela'to', chesene' binlo chyxjue'ede' diža' güen che Jesucriston'.

¹⁹ Nachen' lecze gosebeje' le' cont sa'lene' neda' cate' ša'a gan' že' bene' lježcho ca' šjasana' mechw dan' chtobcho. Na' gwnežjwcho mechon' cont gacxen Xancho Jesucriston' na' cont gwlo'e chbele chaclen bene' lježe'.

²⁰⁻²¹ Yo'o yichjto' gonto' da' nac güen lao Xancho' na' lao benachen', le mechw xenna', na' bi chaclaže'to' yesene' chonto' clele len len.

²² Na' lecze chsela'to' yeto bene' lježcho len legaue'. Zan ni'a ba ble'eto' chone' xšin Diosen' do yichj do laže' na' na'a leca žan yide' gan' zualen' da' nežde' zelaže'chgüale gonle can' chazlaže' Diosen'.

²³ Na' ca nac Titon', chone' xšin Diosen' txen len neda' cont chaclento' le'e. Na' bene' ca' yehope, zjanite' chesone' cont Criston' chacxene', na' bene' ca' chesedop chesežag chesonxene' Jesucriston' gosebeje' legaue' na' chesesele' legaue'.

²⁴ Da'nan' chnia' le gon güen len legaue' cont bene' ca' chesonxene' Criston' to to yež yesenezde' chaquele legaue', na' le gwlo'e chonle güen can' gwnato' cate' be'to' diža' güen chele.

9

¹ Bi chonen byen gwzoja' le'e nia' cheyała' gwnežjwle mechw da' gaclen bene' chesejnilaže' Criston' ga yoble.

² Nežda' chaclaže'le gaclenle legaque'. Na' ba be'lena' bene' Macedonia ca' diža' cont yesenezde' le'e zoale distritw Acaya chaclaže'le gaclenle bene' yaše' ca' na' gwzolaole btoble mechon' godgüiz. Da'nan' bene' ca' že' zan yež distritw Macedonia leče ba chesone' ca'.

³ Perw bia'cze chsela' bene' ca' len Titon' cont diža' dan' ba bia' chele catec güenna' chonle bi gaquen ca da' güenlaže'. Chaclaža' yeyož gwtole mechua' cont ba den cate' yida'.

⁴ Le še sa'len no bene' Macedonia neda' cate' yedeña'a le'e da' yoble, na' yeto'eda' chele še bina' gata' mechua', na' leče le'e yeto'ele da' bi benle can' gwnia' gonle.

⁵ Da'nan' godca' güen yesebialao bene' lježcho ca' šone yeside' gan' zoalen' cont yesaclene' le'e yeyož gwtole mechw dan' gwnale gwnežjwle. Nachen' gwnežjwlen do yichj do laže'le, gague gwnežjwche'elen.

⁶ Le gon xbab can' chesene': "Bene' chaz late'ze, late'ze chelape', na' bene' chaz da' zča'o, da' zča'o chelape'."

⁷ Da'nan' to tole cheyała' gwnežjwle gaca'te' da' chebele gwnežjwle, na' bi gwnežjwche'elen, san gwnežjwlen do laže'le, le chebe Diosen' bene' zoa mbalaz chzande' bi da' chnežjue'.

⁸ Diosen' nape' yela' guac cont chaclenchgüe' chio' len bite'teze da' chyažjecho. Na' chac chone' cont chata' yogo'loł da' chyažjecho bate'teze neče gac gwnežjwcho da' chyaže bene' yoble na' goncho bichle da' güen.

⁹ Quinga nyoj Xtiza' Diosen' che bene' chzande' da' de che', žan: Ba bnežjue' da' beseyaže zan bene' yaše'.

Na' bi ganlaže' Diosen' da' güen dan' benen'.

¹⁰ Diosen' chone' cont chata' no xoa' bin' na' bichle da' chazcho; chone' cont chata' da' che'ej da' chagwcho. Leče le' gone' cont gata' bichle da' chyažjele na' cont čha'o xenchen, na' gone' cont šejchle gonchle da' güen.

¹¹ Bite'teze da' chac chele, Diosen' gone' cont gata' da' zča'o da' gwnežjwle bene' yoble. Nach cate' šjanežjwto' bene' yaše' ca' dan' ba btoble, yeso'e yela' choxclen che Diosen'.

¹² Le da' gwnežjwle da' cheseyaže bene' chesejnilaže' Jesucriston' ga yoble, bene' zan yeso'e yela' choxclen che Diosen'.

¹³ Na' cate' bene' yaše' ca' yesezi'e mechon' chtoble, gwlo'en chzenagle diža' güen che Criston' do yichj do laže'le. Nach legaque' yeso'e yela' choxclen che Diosen' da' gwseła'le da' zča'o mechw da' gaclenen legaque'. Leče yeso'e yela' choxclen che' da' chaclenle yogo' bene' chesejnilaže' Criston'.

¹⁴ Na' do chesacde' le'e yosol güiže' Diosen' yeseñabe' gaclenche' le'e, le nacbia' ba nži'ilaže'chgua Diosen' le'e.

¹⁵ Choxclen Diosen' gwsele' Xancho Jesucriston' len chio'. Bibi diža' de da' nacho catec zaca' goclenna' da' bene' len chio' gwsele'ne'.

10

Diosen' gwleje' Pablon' cont bzejni'ide' bene'

¹ Chesena bał bene' chžeba' tiła' le'e cate' zoa' len le'e na' con cate'ze zoa' zito' chzoja' cart chdila' le'e. Bi naquen ca', san chneyoeda' le'e diža' šagüe' ca' Criston' gwneyoede' bene' diža' šagüe' da' goque' bene' xenlaže' na' bene' šagüe'.

² Chneyoeda' le'e gonle da' güen cont bi tiła' le'e caten' yedetiła' bene' chesacde' chona' con can' žan čhia'.

³ Na' la'czla' zoato' lo yežlion' na' nacto' benačhze, cate' chdillenton' da' malen' bi chdillenton' ca' benačhze.

⁴ San Diosen' none' neto' yela' guac cont chozeto' chlej chšoštjo' yogo' da' chon gwxiyen', le bi soeto' tillenton' to gualazto'.

⁵ Can' chac, Diosen' chaclene' neto' chonto' cont chosozexjwyichj bene' chosozenague' che Criston' na' chesebejyichje' xbab mal čhegaquen' na' bichle da' cheseza'laže' da' chžonen yesombi'e Diosen'.

⁶ Na' cate' yeyož gata'bia' še yogo'le gwzenagle che Diosen', cana' ngüiatio' gončo' castigw che nole bi chzenagle che'.

⁷ Le gon xbab che dan' chle'ele chonto'. Še nole chaquele nacle txen len Criston', le yeyon xbab leče neto' nacto' txen len le'.

⁸ Na' bi yeto'eda' güe'cha' diža' yelate' can' ba bian', le chebeda' gwseła' Xancho Criston' neto' cont bzejni'ito' le'e diža' da' goclenen le'e, gague da' bžiyain' le'e.

⁹ Bi chaclaža' no gacde' še chzoja' cart quinga cont gwšeba' le'e.

¹⁰ Bene' ca' chesenelagüe' chia' chesene' cate' zoa' zito' chzoja' cart znia ca' che no bene' gwznabia', na' chesene' bi chac bi gona' cate' zoa' len le'e na' bi choa' diža' da' zaca' gwzenagle.

¹¹ Beñe' ca' chesenelagüe' chia' cheyała' yesenezde' can' žato' le'e cart da' chzajt'o' le'e cate' zoato' zito', lecz ca' gonto' cate' yedesoato' len le'e.

¹² Bi chaclaže'to' gonlebet'o' beñe' ca' chesonxen cuingaque'. Chesacde' güenchgua chesone', le to toe' con chesena' lježe' cont chesene' chesonche' güen chlel ca cheson beñe' lježe', na' bibi zejen chesone' ca'.

¹³ Neto' bi gonxen cuinto'. Con güe'to' diža' che da' ca' ca' goclen Diosen' neto' bento' gan' ba gwsele' neto', le lecz gan' zoalen' ba gwsele' neto'.

¹⁴ Da'n'an' bi chonlaže'to' cate' choe'to' diža' che da' ba bento' gan' zoalen', le nacto' beñe' nechw bzejni'to' le'e diža' güen che Criston'. Šaca' bi bento' žin gan' zoalen' chonlaže'to' choe'to' dižan' ca', perw benton'.

¹⁵ Na' bi güe'to' diža' che da' ben beñe' yoble, bi nato' neto' benton'. Zoato' lez šejnilaže'chle Criston' cont gaclenle neto' gonchto' xšin Diosen' gan' zoalen'.

¹⁶ Na' chaclaže'to' chixjue'eto' diža' güen che Criston' ga naquen zito'ch ca gan' zoale na'. Chaclaže'to' chixjue'eton' ga nono na' chixjue'eden' cont güe'to' diža' che xšin Diosen' da' ba bento' na' bi güe'to' che da' ba ben beñe' yoble.

¹⁷ Bi cheyała' gonxen cuincho, san cheyała' gonxencho Xancho Dios.

¹⁸ La'czła' še to beñe' ñe' chone' güen, bi naquen da' šejle'cho. Perw še Xancho Diosen' ñe' chone' güen nachen' ñezecho da' li chone' güen.

11

Pablon' na' beñe' ca' cheson cuingaque' postlw

¹ Chaclaža' gwzenagle yeto čop diža' güen da' gua' che cuina' la'czła' še chaquele naquen diža' da' bibi zaca'. Le gwzenag chia'.

² Neda' bzejni'ida' le'e xtiža' Criston' da' nechw cont gwejnilaže'lene', na' Diosen' chone' cont chacda' le'e do yichj do laža'. Na' chaclaža' gaquele toze Criston' cont zaca'le gona' le'e lo ne'e, gacle ca to no'ol güego', no'ole napši'i cuine' da' chacde' toz beñe' byo beñe' si' le'.

³ Chxožda' yeseziye' beñe' le'e cont bich šejnilaže'le Criston' do laže'le na' bich gaquele toz le'. Can' gwziye' bejen' da' no'ole nechon', no'olen' gože' Eva, da' nacha' be xigüe'.

⁴ Cate' chesela'ac beñe' gan' zoale na' chosozejni'ide' le'e che Jesüsen' nža'le can' ba bzejni'to' le'e, o chosozejni'ide' nža'le che Spiritw che Diosen' o che diža' güen čhen', la' chzenagtele chegaque'. Da'n'an' chxožda' yeseziye'e le'e.

⁵ Ba nonle beñe' ca' ca postlw chele na' chonxenle legaque'. Na' neda' zaca'cha' ca legaque'.

⁶ La'czła' bi choa' diža' xdan ca chesoe' legaque', ba ble'eczele yogo' dan' ba bento' na' nezczele chejni'to' xtiža' Diosen' binlo.

⁷ Čaquele malen' bena' bibi laxjua' gwxia' cate' be'lena' le'e diža' güen che Diosen'? Ben cuina' ca to beñe' bibi zaca' da' bibi laxjua' gwxia' cont bena' ga zoachle mbalaz.

⁸ Gwxia' mechw da' goson beñe' ca' chesedop chesežag chesonxene' Criston' ga yoble cont be'lena' le'e xtiža' Diosen'.

⁹ Na' cate' gwzoo' len le'e, la'czła' bi gota' da' byažjda', bi gwnabdan' le'e. Beñe' ca' zeya'ac Macedonia gosone' da' byažjda' cont bi benda' le'e zed, na' bate'teze gwbatech gonda' le'e zed gonle da' chyažj chčhinda'.

¹⁰ Chebeda' chac chnia' bibi gan' chona' chyixjue'eda' xtiža' Diosen' len le'e o len beñe' že' yež yoble ga mbane distritw Acayan'. Na' can' ñezda' chaclen Criston' neda' choa' diža' li, can' ñezda' gwbat gonda' le'e zed cont gonle da' chyažj chčhinda'.

¹¹ Perw gague da' bi chacda' le'e bi gonda' le'e zed. Diosen' ñezde' chacda' le'e.

¹² Na' gonchcza' can' chona' bibi laxjua' chzia' cont bi žel bi yosode'e beñe' ca' yesene' toz can' chesone' len da' chon neto', le can' chesaclaže' yesene'.

¹³ Legaque' bi zjanaque' dogualje postlw. Con chosozejni'ide' diža' güenlaže' na' chesonlede' le'e cont gaquele gwseła' Criston' legaque'.

¹⁴ Bi yebanele can' chesonen', le ca'czen' chziye' Satanásen' chio', cheyon cuinen ca to angl beñe' chactitchgua cont gaquecho naquen to angl güen beñe' za' gan' zoa Diosen'.

¹⁵ Na' ca'czen' cheson beñe' ca' chosozenag čhen, chesonlede' le'e cont gaquele chosozejni'ide' diža' güen. Perw žin ža yezezaca'zi'e toli tocanje yela' güen da' mal čegaquen'.

Da' ca' gwđi gwxcaca' Pablo da' naque' postlw

¹⁶ Da' yoble žia' le'e, bi gaquele chona' xbab da' bibi zaca' can' chon beñe' bi chejni'i. Perw la'czła' še chaquele chona' xbab da' bibi zaca', le gwzenag chia' šlac gua' to čhope diža' güen che cuina'.

¹⁷ Gua' diža' güen che cuina' la'czła' ñezda' Xancho Criston' bi be'e diža' güen che cuine'. Guan' ca beñe' chon xbab da' bibi zaca', beñe' bi chejni'i.

¹⁸ Beñe' zan cheso'e diža' güen che cuingaque' che bi da' ba gosone' o bi da' ba goc čegaque', na' ca'czen' gona' neda'.

¹⁹ Ba non cuinle bene' sina' na' da' na' ljan' chbele chzenagle che bene' cheson xbab da' bibi zaca'.

²⁰ Chzenagle che bene' ca' ba gosone' le'e ca xmosgaque'. Choe'le latje cheseziye'e le'e cont chnežwle legaque' bi da' de chele na' chontezle bi da' chesene'. Chesonxen cuingaque' na' chesebaže' le'e cont chzenagle chegaque', na' bia'cze choe'le latje chosozejni'ide' le'e.

²¹ Chonljale xbab bžebto' le'e dan' bi beneto' le'e ca'.

Na' da' yoble gua' diža' ca bene' chon xbab da' bibi zaca', le bite'teze diža' güen da' cheyaxje bene' güe'e che cuine' note'teze naque', lecze cheyaxjda' gua' dižan' nac ca' che cuina'.

²² Chesonxen cuingaque' da' gosalje' gan' že' bene' chesaque' diža' hebreo. Nezczele lecze goljelena' bene' chesaque' diža' hebreo. Na' chesonxen cuingaque' da' zjanaque' bene' Israel. Nezczele lecze bene' Israel neda'. Na' chesonxen cuingaque' da' gosalje' lo diaža che da' Abraham. Na' nezeczele lecze diaža che da' Abrahanna' neda'.

²³ Chesene' Criston' gwsele' legaque' cont yesone' xšine'. Nezczele Criston' gwsele' neda' na' ba bencha' xšinen' ca legaque'. Si'xenle dan' choa' diža' ca bene' chon xbab da' bibi zaca', ca bene' bi chejni'. Ba bencha' žin gual ca legaque', zan ni'ach ba goseyin justis ca' neda' da' choa' xtiža' Diosen' clcl ca da' ba goc che legaque'. Na' zan ni'ach bene' ca' chesegue'ede' neda' ba goseyixjue' neda' ližya clcl ca dan' ba goc che bene' ca' chosozejni'ide' le'e. Na' zan ni'a ba bela' cbi gota'.

²⁴ Gayo' ni'a goseyin bene' Israel gualaż chia' neda' tašjw de yid togaljechoa ni'a güeje.

²⁵ Šone ni'a bene' justis ca' goseyine' neda' xis. Na' tni'a bosotacue' neda' yej yelate'ze ca gosote' neda'. Na' cate' zya'a yež zito' to lo' barcw, šon ni'a bochinj nisdaon' barcon', na' cane bžina' yo biž. Na' lo šon ni'an beyinjenna', tni'a gwdeła' nisdaon' tža tyel.

²⁶ Zan ni'a ba gwy'a yež zito' jatixjue'eda' xtiža' Criston'. Zan ni'a cane goc gwdia' yegw ca'. Zoa cate' goca' lo na' bene' gwban. Zoa cate' bene' Israel gualaż chia' gosaclaže' yesote' neda', na' zoa cate' bene' bi zjanaque' bene' Israel gosaclaže' yesote' neda'. Na' zan ni'a do lo ciuda, do ga nono bene' že' na' do lo nisdaon' yelate'ze bi gota'. Na' yogo' ža chaš bene' chesonlaže' chesene' zjanaque' žino' txen na' chxožda' yosožiaye'e xšin Diosen' dan' chonan'.

²⁷ Zan ni'a ba bena' xšin Diosen' benten ga jažaque'chgüeda', na' zan ni'a bchejda' bi gwtasa'. Nombi'a yeļa' chbił chdon, le zan ni'a bi gota' da' ye'ej gagua'. Na' lecze zan ni'a beyaga' bi gota' xa' da' byažjda'.

²⁸ Da' zanch da' ba gwdi gwxcaca' da' bi choa' diža', na' lecze yogo' ža chi'chgua yichja' nac chac che le'e chdop chžagle chonxenle Criston' to to yež.

²⁹ Note'tezle cate' bi zoachachle len Criston' o bi chzoele gonle can' chazlaže' Diosen', chacyaše'chgüeda' cacze nacho nedan' chona' ca'. Na' lecze cate' bene' chesego'oyele' le'e cont chonle da' mal, leca chacda' lo' yichjlažda'ogua' na' chža'a dan' ba chonle can' že'na'.

³⁰ Na' da' chonen byen güe'cha' diža' che cuina', nach gua' diža' che da' ca' chlo'en bi chac bi gona' to gualaza'.

³¹ Dios bene' cheyała' gonxencho toli tocane nezde' choa' diža' li. Len' naque' Xa Xancho Jesucriston' na' chonxen Jesucriston' le'.

³² Na' yeto da' goc chia', cate' gwzoa' ciuda Damasco, bene' goc gobernador šlac gwnabia' rey Aretas bnite' bene' gosape' cho'a puert da' zoa le'e ze'e da' nychj ciudan' cont yesezene' neda' cate' yechoja'.

³³ Perw bene' lježcho ca' gosegüe'e neda' to lo' žome xen na' besyeletje' neda' to cho'a ventan le'e ze'e da' nychje ciudan' cont bi gosezene' neda'.

12

Da' ble'edagüe' Pablon'

¹ Bi chazlaža' güe'cha' diža' güen che cuina', san gua' diža' che da' ca' da' ba ble'edagüe'da' na' da' ca' ba bzejni' Xancho Criston' neda'.

²⁻³ Ba chejnilaža' Criston' cate' goc chia' quinga ba goc žta' iz. Diosen' bene' neče gwya'a yaban' gan' zoen'. Bi nezda' še gwya'a len cuerp chia', Dios nan' nezde'.

⁴ Con nezda' bžina' gan' zoa Diosen' na' benda' bene' ca' že' na' cheso'e diža' zaca' da' bi chac nia', diža' zaca' da' bi de latje güe' benač yežlio nga.

⁵ Šaca' žan gonxen cuina', yejni'a gonxen cuina' che da' ca' ba blo'e Diosen' neda', perw bi žan gonxen cuina' che bi da' ba bena' neda'. Con gua' diža' che da' ca' ba goc chia' da' chosolo'en bi chac bi gona' to gualaza'.

⁶ Šaca' žan gonxen cuina', da' zan da' güen ba bena' da' gac gua' diža' chen, diža' da' naquen da' li, gague da' güenlaže'. Perw bi gua' diža' che bi da' güen da' ba bena', le bi chaclaža' no gonxench neda' ca cheyała'. Yejni'a yesone' xbab še zaca' con ca nac da' chesele'ede' chona' na' can' chesende' choa' xtiža' Diosen'.

⁷ Cont bi ga'laža' che da' ble'edagüe'da' na' da' ba bzejni'i Xancho Criston' neda', Diosen' be'e latje chžaglagua' len to da' zoa cha'an ca cha'a yeše' lo cuerp chia' nga, na' leca chaclaže' Satanäsen' gacda' tole da' chac chia' ca'.

⁸ Šone ni'a ba gwñabda' Xancho Criston' yeque'e dan' chžaglagua' len cuerp chian'.

⁹ Nach Xancho' gože' neda': "Bi yeca'a dan' chžaglaguon', san soacza' gaclena' le'. Lezen da' chyažjido'. Cate' bi chac bi gono', canan' gacbe'edo' chaclena' le' cont gono' bi da' cheyała' gono'." Da'nän' chbeda' güe'cha' diža' che da' ca' chosolo'en bi chac bi gona' še Criston' bi chaclene' neda' len yela' guac chen'.

¹⁰ Na' da'nän', cont gacxen Criston', chbeda' bite'teze da' chac chia' da' chlo'en chyažjida' gaclene' neda'. Chbeda' cate' chesezi'diža' bene' neda', cate' bi de da' chyažjida', cate' bene' chosolagšibe' neda', na' cate' bichle da' chžaglagua', le cate' chac chia' ca', cana'ch chaclenčh Criston' neda' len yela' guac chen'.

Pablon' gwche' yichje' che bene' chesonxen Criston' Corinto

¹¹ Ba bia' diža' benxen cuina' ca chon bene' bi chejni'i. Le'e cheyała' güe'le diža' chia' naca' bene' zaca', perw bi chonle ca'. Da'nän' benen byen bia' dižan' ca'. Da' juisyw chonxenle bene' ca' ba nonele ca postlw chele. Na' neda' ne late'ze bi chyažjen cont gaca' bene' zaca' ca legaque'. Žia' ca' la'czła' chacbe'eda' bibi zaca' šaca' bi zoa Diosen' len neda'.

¹² Ba ble'ele naca' dogualje postlw, le cate' gwzoo' len le'e, Diosen' blo'e zoa yela' guac chen' len neda' na' bene' cont goc bichle da' zaca' yesyebane bene', na' goclene' neda' bhejida' yogo' da' goc chia' šlac bena' xšinen' gan' zoalen'.

¹³ Toze ca güenna' bena' len le'e na' can' bena' len bene' yež yoble ga chesedop chesežague' chesonxene' Criston', con da' bi bia' latje gonle da' chyažj chchinda'. Le si'xen da' malen' bena' bi benda' le'e zed.

¹⁴ Chaclaža' yida' deña'a le'e da' gwyoņe ni'a. Na' bi gonda' le'e zed cate' yida'. Bi chaclaža' gonle neda' bi da' de chele, con chaclaža' gwzenagle chia' na' gon cuinle lo na' Criston'. Ca no bidao' bi cheyała' gwnežjwbe' bi da' chyažje xaxna'be', san xaxna'be' cheyała' gwnežjue' da' chyažje lebe', ca'czen' naquen len le'e na' len neda'.

¹⁵ Chbeda' chzanda' bite'teze da' de chia' na' lente cuina' cont gaclenča' le'e, la'czła' šlac neda' chaquechda' le'e, le'e bi chaqueteclē neda'.

¹⁶ Na' balle, la'czła' chache'ele bi benda' le'e zed len da' byažj bchinda', žale gwziya'a le'e.

¹⁷ ĽBi nezele bi gwziya'a le'e cate' gwseła' note'teze bene' ca' ba gwseła' gan' zoale na'?

¹⁸ Gwņeyoeda' Titon' bedene'e le'e na' gwseła' yeto bene' lježcho len le'. ĽBi nezele bi gwziye' Titon' le'e? Le' len neda', toz can' chonto', na' toz can' chaclaže'to' gaclento' le'e.

¹⁹ ĽChaquele ba bia' diža' quinga cont nezele bibi da' xinj chonto'? Gague da'nän' ba bia' dižan' ca'. Ba gwnia' yogo' da' ba gwnia' cont chaclena' le'e gonchle xbab can' chazlaže' Diosen', le chacda' le'e. Diosen' nežde' yogo' da' ba gwnia' le'e, na' naca' Criston' txen chzejni'ida' le'e.

²⁰ Con chžeba' cate' yedena'a le'e še gata'bia' bi chonle güen can' chaclaža' gonlen', na' še ba chonle da' mal, bi šo'laže'le can' gona' len le'e. Chacda' chixe še chdiē chšašle na' chgue'e lježle o chloc lježle o chazlaže'le gac güen che cuinzle. Chixe še chne che lježle, še chchitjle diža', še cha'laže'le o še de da' zed chele.

²¹ Chžeba' cate' yedyena'a le'e še gata'bia' zanle bina' cuejyichjle da' malen' ba benle, na' bina' yetinjele che da' yela' zto' chonle, che da' nzoa no xtole, o da' chata'lenle no bene' bi nac bene' chele o no'ole bi nac xo'olle. Na' Diosen' gone' yeto'eda' chele na' yegüine'da' chele še naquen ca'.

13

Pablon' že' gone' castigw che no chon da' malen'

¹ Na'a gac šone ni'a yedena'a le'e. Cate' gagwcho xya che note'teze bene', guata'bia' nape' dola' še yotiē can' chesena chope o šone bene' cheso'e diža' can' goquen'.

² Goša' le'e šlac gwzoo' len le'e caten' bedena'a le'e da' gwchope, bi yeyaše'da' bene' ca' goson da' xinjen' še bi yesyetinjde', na' gona' castigw che yogo' nochle chon da' xinjen'. Na' da' yoble žia' ca' na'a šlac zoa' zito' len le'e.

³ Chaclaže'le gona' to da' gwlo'en chne Criston' len neda'. Da'nän' gona' castigw che none chon da' xinjen'. Na' Criston' gwlo'e yela' guac xen che' cont saca'zi'le che da' xinj da' nonle.

⁴ Na' la'czła' Criston' ben cuine' ca bene' bibi chac gon cate' gosote'ne' le'e yag cruzen', zoe' na'a da' nape' yela' guac xen che Diosen'. Na' lecze neto' nacto' txen len Criston' ben cuinto' ca bene' bibi chac gon, perw gwlo'eto' le'e zoa yela' guac che Diosen' len neto'.

⁵ Le gonyane' xbab chelen' še da' li chejnilaže'le Jesucriston'. Nach gacbe'ele zoe' len le'e še da' li chejnilaže'lene'.

⁶ Na' zoa' lez lecze gacbe'ele zoe' len neto' na' nacto' postlw che'.

⁷ Choł güižto'ne' čhele chñabto' bich bi da' mal gonle, gague cont gache'ele zoa Jesucriston' len neto', san cont soale gonle da' güen. Le toze ca nonen še chesache'e beñe' zoe' len neto' o še bi chesache'ede'.

⁸ Na' bibi castigw gonto' le'e še chzenagle diža' li čhe Jesucriston', con gaclento' le'e, še ca'.

⁹ Yebeto' gonto' ca beñe' bibi yeła' chnabia' nape', con še le'e ba chnabia'le chonle can' cheyała' gonle. Na' zoacztó' choł güižto' Diosen' chñabto' gaclene' le'e gonle doxen can' cheyała' gonlen'.

¹⁰ Ba bzoja' da' quinga za' yedena'a le'e cont yetiñjele xtoła'len' na' bi yažjen gona' znia len le'e. Diosen' gwsele' neda' naca' postlw čhe' na' beñe' neda' yeła' chnabia' cont gaclena' le'e, gague cont gwžiaya'a le'e.

¹¹ Beñe' migw chia', chñaba' gacšca güen čhele. Le cuec yichjle gonyane'le yogo' da' chaclaže' Diosen' gonle. Le gon čačh laže'le len bi da' chac čhele. Le gac toze len ljež le'e chejniłaže'le Criston', na' le soa binlo tole yetole. Diosen' chacde' chio' na' chone' cont chzoa chbezcho binlo len xbab da' yo' o lo' yichjlažda'ochon', nachen' chñaba' soaščacze' len le'e.

¹² Le gwnopa' na' lježle gwguap lježle tiox cate' chežagle txen, cont gachia' chaque lježle tole yetole.

¹³ Yogo' beñe' ca' chesejniłaže' Criston' do nga chosoguape' le'e tiox.

¹⁴ Na' chñaba' Xancho Jesucriston' gaclenščacze' le'e. Na' Diosen' gonšque' gache'echle chacde' le'e, na' gonšca Spiritw čhe Diosen' cont xbab čhele gaquen toze len xbab čhen. Da' na'zen' chzoja'.

CART DAN' BZOJ POSTLW SAN PABLO CHE BENE' GALACIA CA'

Pablon' chguape' tiox bene' ca' chesonxene' Criston' Galacia

¹⁻² Neda' Pablo chzoja' le'e chdop chzagle chonxenle Criston' yež ca' zjachi' distritw che Galacia. Neda' len yogo' bene' lježcho ca' nite' nga chguapto' le'e tiox. Gague benač gwlej neda' cont gona' xšine', san Jesucriston' txen len Xe' Diosen' ben' bosban le' ladjo bene' guat ca', legaque' gosebeje' neda' cont naca' postlw chegaque'.

³ Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole.

⁴ Jesucristnan' bnežjw cuine' neče xtoła'chon' cont bich goncho txen len da' malen' chac lo yežlio nga. Bene' ca' le can' gwyazlaže' Xacho Diosen'

⁵ ben' cheyała' gonxencho toli tocaņe. Na' ca'šcacze goncho.

Bich bi yeto diža' de da' gac nacho diža' güen che Diosen'

⁶ Diosen' gwleje' le'e cont Xi'ine' Criston' gaclene' le'e. Na' chebanda' can' chonlen' bedao'nez ba chbejyichjle Diosen' na' chzenagle che yeto da' chaquele naquen diža' güen.

⁷ Perw bi naquen diža' güen. Con nita' bene' chososed chosolo'ede' xtiža' Diosen' clele na' chesone' cont chaczējaže'le che diža' güen che Criston' dan' bsd blo'eto' le'e.

⁸ Šaca' neto' chixjue'eto' yeto da' bi naquen diža' güen che Criston', chnabda' Diosen' gone' cont cuiayi'to'. Na' la'czla' to angl bene' za' gan' zoa Diosen' chixjue'ede' yeto da' bi naquen diža' güen che Criston', lecze chnaba' gon Diosen' cont cuiaye'e.

⁹ Can' ba gwnian', lecze can' žia' da' yoble na'a: še note'teze bene' ba chyixjue'ede' xtiža' Criston' nža'le can' ba nsedlen, chnaba' gon Diosen' cont cuiaye'e toli tocaņe.

¹⁰ Chnia' ca' cont na Diosen' chona' güen, gague cont yesena benačhen' chona' güen, na' gague cont yebe benačhen' neda'. Šaca' chi' yichja' nacle gona' cont yebe benačhen' can' chonan', bi chzenaga' che Criston' šaca'.

Diosen' gwleje' Pablon' na' gwsele'ne' cont goque' postlw

¹¹ Bene' migw, che'nda' nezele diža' güen che Criston' dan' ba be'lena' le'e bitw naquen xbab che benač.

¹² Gague benačhen' bzenden' neda', na' neca nacho benačhen' bene' cont gwyejni'idan', san cuin Jesucriston' bzejni'ide' neda' diža' güen chen'.

¹³ Ba beneczele diža' can' ba bena' cate' ne' na'ogua' costumbr che neto' bene' Israel. Leca bchi bsaca' bene' ca' chesonxene' Criston', goclaža' yesyenite'.

¹⁴ Na' gwche'chgua yichja' che costumbr dan' gosa'o da' xozxta'ogua' ca' na' bsdchan' cled ca zan bene' l gualja' bene' lecze zjanac bene' Israel.

¹⁵ Perw cate' biņa' galjtia', Diosen' bžie' bia' gona' xšinen'. Gwleje' neda' cont gonan', le nži'ide' neda'. Na' cate' bžin ža ben Diosen' can' gwchoglagüen' gone',

¹⁶ nach bene' cont bembia' Xi'ine' Jesús. Na' bzejni'ide' neda' cont chyixjue'eda' xtiža' Jesúsen' len bene' ca' bi zjanac bene' Israel. Na' cate' ben Diosen' ca' len neda' notno gwñabda' gwzejni'ide' neda'.

¹⁷ Na' neca gwya'a Jerusalenna' cont postlw ca' yososed yosolo'ede' neda', bene' ca' gwlej Diosen' cont chesone' xšine' cate' neda' za' gonan'. San la' gwya'atia' gan' nzi' Arabia, na' gwdechle beza' Arabia bežina' Damasco.

¹⁸ Na' gocch šon iz gwya'a Damascon', nach beza' beya'a Jerusalenna' cont bembia' Pedron' na' jaso'a len le' žta'gwbiž.

¹⁹ Perw bitw bšaga' yezica'chle postlw ca' san toze Jacobo bene' biše' Xančhon'.

²⁰ Nezeze Diosen' da' nga chzoja' naquen diža' li.

²¹ Nach gwya'a yež ca' zjachi' gan' nzi' Siria na' Cilicia.

²² Na' bene' ca' chesodop chesežag chesonxene' Criston' yež ca' zjachi' distritw Judean', legaque' biņa' yesombi'e neda' ca hora'.

²³ Con ba gosende' chesena bene' čhia': "Ben' bchi bsaque' neto' bich chone' ca'. Ba chyixjue'ede' cheyała' šejnilaže'cho Criston', la'czla' cana' goclaže' gone' cont nono yesejni-laže' Criston'."

²⁴ Na' bene' Judea ca' chesejni-laže' Criston' gosonxene' Diosen' cate' gosende' can' chonan'.

2

Yezica'chle postlw gosazlaže' can' chon Pablon'

¹ Na' gocch žta' iz gwy'a Jerusalénna' nach da' yoble gwy'a len Bernabén', na' lecze gwchi'a Titon'.

² Diosen' bzejni'ide neda' cheyała' ša'a, na' da'nán' gwy'a. Na' btoba' bene' ca' zjanaque' blao len bene' ca' chesonxen Criston' Jerusalénna' na' legacze' bzejni'ida' bin' chyixjue'eda' len bene' ca' bi zjanaque' bene' Israel cate' choe'léna' legaue' diža' güen che Criston'. Bzejni'ida' legaue' bin' chsed chlo'eda', le goclaža' yesenezde' cont bi yesene' bibi zaca' dan' chona' na' da' ba bena'.

³ Ca' goquen' bitw chole gosone' byen soa bene' lježa' Titon' señw dan' nzi' circuncisión la'czła' bi naque' bene' Israel.

⁴ Goc ca' la'czła' gwnita' bal' bene' gosaque' txen len bene' lježcho ca' Jerusalénna' ca' hora', bene' gague do laže' gosejnilaže' Criston', con bedesene'e še na'oto' costumbr ca' zjanyoj le'e ley che neto' bene' Israel. Legaue' gosaclaže' yesone' byen ga'oto' costumbr ca', la'czła' nezecho chebe Diosen' chio' dan' chejnilaže'cho Criston', gague dan' choncho can' ža leyna'.

⁵ Perw neto' ne lateže bi bzenagto' che legaue', le goclaže'to' bi gata' da' gwžon gwzenaguechle diža' güen che Criston' da' naquen da' li.

⁶ Na' ca' nac bene' ca' gosac bene' blao len bene' ca' chesejnilaže' Criston' Jerusalénna', bitw gosazlaže' gwša'a can' chsed chlo'eda' che Criston'. (Žia' ca' la'czła' bitw bi nonen len neda' še gosaque' bene' blao o še bi gosaque', le len Diosen' tozce can' zjazaca' yogo'loj bene'.)

⁷ Gosacbe'ede' Diosen' ngüe'e lo' na' chyixjue'eda' diža' güen che Criston' len bene' ca' bi zjanaque' bene' Israel can' ngüe'en lo' na' Pedron' chyixjue'eden' len bene' Israel gualaž cheto' ca'.

⁸ Le Diosen' ben' chaclene' Pedron' len yeła' guac chen' cont chyixjue'ede' xtiža' Criston' len bene' Israel gualaž cheto', leczen' chaclene' neda' len yeła' guac chen' cont chyixjue'eda' xtiža' Criston' len bene' bi zjanaque' bene' Israel.

⁹ Can' goquen', Jacobon' len Pedron' len Juanna', bene' zjanacch blao len bene' ca' chesejnilaže' Criston' Jerusalénna', cate' legaue' gosacbe'ede' can' chaclen Diosen' neda' chona' xšinen', nach gosoxe' taca' len taca' Bernabén' cont bosolo'e zjanaque' txen len neto' na' gosazlaže' can' chonto'. Le gosacde' güencze gonto' xšin Diosen' len bene' ca' bi zjanac bene' Israel na' legaue' yesonen' len bene' Israel gualaž cheto' ca'.

¹⁰ Toze dan' gose'e neto' gonto', gaclento' bene' yaše' ca'. Na' da' licze chi'chgua yichja' chona' ca'.

Pablon' gwdile' Pedron' gan' nzi' Antioquía

¹¹ Na' gwdechle gwy'a gan' nzi' Antioquía. Na' šlac zoa' na' bid Pedron', na' gwdila'ne' can' chone', le bla'alaon chone' da' mal.

¹² Cate' za' bžine' Antioquán', gwzologüe' che'ej chagüe' txen len bene' ca' chesejnilaže' Criston' la'czła' bi zjanaque' bene' Israel; perw gwdechna' cate' besežin bene' Jerusalén ben' gwseła' Jacobon', bich goclaže' ye'ej gagüe' txen len bene' ca' bi zjanaque' bene' Israel. Bžebe' še bi yesena bene' ca' cheson xbab note'teze bene' chejnilaže' Criston' cheyała' soe' señw dan' že' circuncisión.

¹³ Nach yezica'chle bene' Israel ca' chesejnilaže' Criston' lecze besyebixe' bich gose'ej gosagüe' txen len bene' ca' bi zjanaque' bene' Israel, na' gosego'oyele' Bernabén' cont lencze' bebixe'. Na' gosone' ca' cont yesebe bene' Jerusalén ca' legaue', la'czła' gosenezde' bi naquen mal yese'ej yesagüe' txen len bene' ca' bi zjanaque' bene' Israel.

¹⁴ Goche'eda' bi chesone' can' cheyała' gon chio' nombia'cho diža' li che Criston'. Na' da'nán' gwdila' Pedron' lao yogo' bene' ca' chesedop chesežag chesonxene' Criston', goša'ne': "Le' naco' bene' Israel, perw ba gwlejšichjo' costumbr che chio' bene' Israel cont chono' txen len bene' ca' bi zjanaque' bene' Israel. Da'nán' bitw cheyała' gono' byen yeson bene' ca' bi zjanaque' bene' Israel can' nac costumbr che chio' bene' Israel."

Con bene' chesejnilaže' Jesucriston' zjanaque' bene' güen len Diosen'

¹⁵ Neto' goljto' nacto' bene' Israel na' bitw goljto' ladjo bene' ca' cbi chesonxen Diosen'.

¹⁶ Perw ba nezeto' Diosen' bitw že' nacto' bene' güen len le' neche da' chonto' can' ža ley dan' bzoj da' Moisésen'. Con bene' chesejnilaže' Jesucriston' zjanaque' bene' güen len Diosen'. Da'nán' lencze neto' chejnilaže'to' Criston' cont Diosen' že' cheto' ba nacto' bene' güen lagüe'na'; že' ca' gague neche dan' chonto' can' ža leyna'. Le bi nacho zoa' bene' nac bene' güen len Diosen' neche chone' bi da' ža leyna'.

¹⁷ Bal' neto' bene' Israel ba chejnilaže'to' Criston' cont Diosen' none' neto' ca' bene' güen. Da'nán' chacbe'eto' toz ca' bene' güen da' xinj nacto' len bene' bi zjanac bene' Israel. Perw bi nacho Criston' chone' cont nacto' bene' mal. Leca' clelen' cheson bene' xbab še chesacde' ca'.

¹⁸ Nezecho bi chyažjen ga'ocho costumbr che da' xozxta'o neto' bene' Israel cont gaccho bene' güen len Diosen'. Na' še ba gwlejšichjo' costumbr ca' na' yezola'cho yeya'ochon da' yoble, gwlo'elaon naccho bene' güen da' xinj.

¹⁹ Ley dan' bzoj da' Moisés ba bzejni'in neda' bi naca' bene' güen len Diosen', le bi chona' can' žanna'. Perw dan' bi gwzoen yeyonen neda' bene' güen len Diosen', da'n'an' bich chonxenan', san yo'o yichja' soacza' gwzenaga' che Diosen'.

²⁰ Criston' bnežjw cuine' gote' neče xtolan', na' dan' chejnilaža'ne' da'n'an' ba none' neda' ca to bene' guat len da' xinjnen' cont bich gonan'. Na' bich zoa' to gualaza', san Criston' zoalene' neda'. Na' dan' chona' na'a chonan' con can' ža' Xi'in Diosen' ben' chejnilaža'. Len' chacde' chio' na' bnežjw cuine' gote' neče chio'.

²¹ Diosen' nži'ilaže'de' chio' na' da'n'an' gwsele' Criston', perw chzoacho to šla'ale dan' bnežjw cuine' gote' še chaquecho naccho bene' güen len le' neče choncho dan' ža leyna', le bitw byažjen bnežjw cuin Criston' neče chio' šaca'.

3

Naccho bene' güen len Diosen' dan' chejnilaže'cho Criston'

¹ Le'e bene' Galacia, nchol yichjlažda'olen'. žNo gwziye' le'e cont chaquele cheyala' gonxenle costumbr che da' xoxxta'oto' ca'? Ba bzejni'iyane'da' le'e che dan' got Criston' le'e yag cruzen' neče chio'.

² Da' ngazen' chnabda' le'e: žZoa Spiritw che Diosen' lo' yichjlažda'ole neče dan' chonle can' ža ley dan' bzoj da' Moisésen'? Bitw naquen ca', san zoan len le'e neče dan' chejnilaže'le Criston'.

³ Spiritw che Diosen' gwyo'on lo' yichjlažda'olen' caten' gwzolao chejnilaže'le Criston'. žDa' leca nchol yichjlažda'olen' chaquele chyažjen gonle can' ža leyna' cont yeyož gacle can' chazlaže' Diosen'?

⁴ Da' zan da' bosochi bososaca' bene' le'e dan' chejnilaže'le Criston'. žNa' bixe zacan' byo bchejele len da' ca' še na'a chaquele cheyala' gonle can' ža leyna'?

⁵ Nezele Diosen' ba bene' Spiritw chen' zoan len le'e na' chone' yela' guac da' chle'ele neče chejle'le xtiža' Criston' dan' bzeneto' le'e, gague chac ca' neče dan' chonle bi dan' ža leyna'.

⁶ Da' Abrahanna' gwejnilaže' Diosen', na' da'n'an' Diosen' gwne' naque' bene' güen lagüen'.

⁷ Da'n'an' cheyala' nezele yogo' bene' chesejnilaže' Diosen', Diosen' none' legaque' ca xi'in diaža che da' Abrahanna'.

⁸ Diosen' bžie' bia' gone' len le'e bi nacle bene' Israel can' chone' len neto' bene' Israel, con note'tezcho chejnilaže'chone' none' chio' bene' güen lagüen'. Da'n'an' Xtižen' dan' nyojen žan gože' da' Abrahanna' diža' güen qui cate' biža' žin ža gaquen': "Dan' chejnilažo' neda' gona' güen len bene' ca' že' yogo' nación."

⁹ Na' can' naquen, Diosen' chone' güen len bene' ca' chesejnilaže'le' can' bene' güen len da' Abrahanna' ben' gwejnilaže'ne'.

¹⁰ Na' note'tez bene' chon xbab gaque' bene' güen len Diosen' lagüe' chone' bi dan' ža ley dan' bzoj da' Moisésen', da' mal juisyw gac che' še ca', le nyoj Xtiža' Diosen', žan': "Da' mal juisyw gac che note'tez bene' še bi nita'teze' yesone' yogoloj can' ža leyna' bate'teze."

¹¹ Na' Xtiža' Diosen' nyojen, žan': "Bene' chesejnilaže' Diosen' zjanaque' bene' güen lagüe', na' da'n'an' guata'cze yela' mban čhegaque' toli tocaņe." Na' da' žan ca' nezecho bitw že' che note'tezcho naccho bene' güen lagüen' neče choncho bi dan' ža leyna' goncho.

¹² Na' leyna' bi žan cheyala' šejnilaže'cho Diosen', san con žan': "Note'teze bene' chon doxen can' ža leyna' gac bane' toli tocaņe."

¹³ Perw Criston' bnitlagüe' xtoła'chon' cont bi gac da' mal juisyw checho dan' bi chzoecho goncho doxen can' ža leyna'. Bnežjw cuine' goc da' mal juisyw che' laz chio'. Goc che' can' nyojen, žan': "Da' mal juisyw chac che note'tez bene' chesote' chosode'ene' le'e yag."

¹⁴ Goc ca' cont lencze le'e bi nacle bene' Israel šejnilaže'lene' na' soale mbalaz ca mbalazen' gwzoo da' Abrahanna' dan' gwejnilaže' Diosen'. Nachen' da' chejnilaže'cho Cristo Jesüsen', Diosen' gwsele' Spiritw chen' zoan len chio' can' gwne' gone'.

Ley dan' bzoj da' Moisésen' na' dan' gwna Diosen' gone' len da' Abrahanna'

¹⁵ Bene' migw, gwzejni'ida' le'e len da' nga chac yežlio nga: Cate' to bene' chze'e yiš o chone' testament, bi nacho cate' beyož bosochele' can' gwne' gone' cbi gone' can' žanna' o gwzanche' can' žanna', la'czla' naquen to da' chon benačhze.

¹⁶ Na' ca nac dan' gož Diosen' Abrahanna' gone' da' güen len le' na' len xi'in diaža che', Xtiža' Diosen' dan' nyojen bi choen' diža' che zan diaža che da' Abrahanna', san choen' diža' che toze', na' zejen Cristo.

¹⁷ Na' dan' gož Diosen' Abrahanna' gone' gac da' güen che', chzaca'leben ca to yiš dan' chosoza' bene', le Diosen' bitw gwše'e can' gwne' gone'. Na' ba gwde tap gayoa šichoa iz gož Diosen' da' Abrahanna' gone' gac da' güen che' cate' bene' cont bzoj da' Moisésen' ley chen'.

Perw la'czla' Diosen' bnežjue' leyna', bitw nacho cbi chone' can' gwne' gone' len Abrahanna' na' len xi'in diaža che' ca'.

¹⁸ Šaca' Diosen' že' con bene' cheson doxen can' ža leyna' zjanaque' bene' güen, bitw chone' da' güen che xi'in diaža che da' Abrahanna' can' ba gwne' gone' šaca'. Perw Abrahanna' goque' bene' güen len le' da' gweyjele'e gon Diosen' can' gože'ne'.

¹⁹ Še naquen ca' žbixčen byažje ley dan' bzoj da' Moisésen'? Diosen' bnežjuen' da' xoxxta'oto' bene' Israel cate' ba gwde tiemp che da' Abrahanna' cont gosacbe'ede' bi chesone' can' non Diosen' mandadw yesone'. Na' bžie' bia' gonen žin šlac biña' yid Criston' ben' gwna Diosen' galje' lo diaža che da' Abrahanna', na' che le' be' Diosen' diža' caten' gwne' gone' güen len xi'in diaža che da' Abraham. Na' ca nac leyna', Diosen' bene' cont angl ca' bosonežjuen' da' Moisésen'. Na' Diosen' bchine' Moisésen' bzejni'ide' xoxxta'oto' bene' Israel ca' can' žanna'.

²⁰ Perw cate' Diosen' gože' da' Abrahanna' gone' güen che', cuincze' bzejni'ide' da' Abrahanna', na' bi byažjde' bene' yoble gwzejni'ide' le' can' gone'.

Da' chzejni' leyna' chio'

²¹ Na' bitw cheyała' gaguecho ley dan' bzoj da' Moisésen' chonen clele len da' gwna Diosen' gone' la'czla' leyna' bitw gac yocoben yichjlažda'ochon'. Šaca' gac yocoben yichjlažda'ochon' guac goncho can' ža leyna' nach gaccho bene' güen len Diosen' šaca'.

²² Perw Xtiža' Diosen' dan' nyojen žan yogo'lol benachen' yesezi'e castigw toli točanē neche xtoła'gaquen', na' con bene' yesejnilaže' Jesucriston' nitlao xtoła'gague' can' bsi Diosen' xnezen', cont gac güen chegaque' can' gwne' gac che xi'in diaža che da' Abrahanna'.

²³ Ca nac neto' bene' Israel, cate' biña' nezeto' cheyała' šejnilaže'to' Criston', nchoglaon četo' si'to' castigw toli točanē dan' nombia'to' leyna' na' bitw chonto' can' žanna'.

²⁴ Len neto' leyna' zaca'leben ca to bene' chgüia chne'e xi'in bene', da' zan da' chi'ebe' gombe' na' da' zan da' chi'ebe' bi gombe'. Perw na' ba bid Criston', na' note'tezcho chejnilaže'chone', Diosen' že' naccho bene' güen len le'.

²⁵ Na' dan' ba bid Criston' leyna' bich naquen ca bene' chgüia chne'e neto' bene' Israel, neto' chejnilaže'to'ne'.

²⁶ Yogo' chio' chejnilaže'cho Cristo Jesús'en' naccho xi'in Dios.

²⁷ Na' note'tezcho še ba gwzoacho nisen' cont blo'echo naccho txen len Criston', ba chzolao chac yichjlažda'ochon' can' nac yichjlažda'ogüen'.

²⁸ Na' tozece can' zaca'cho lao Diosen' še naccho bene' Israel o še bi naccho, na' še naccho bene' esclavo o še bi naccho, na' še naccho bene' byo o še naccho no'ole. Yogo'cho ba naccho ca toze bene' neche dan' naccho txen len Cristo Jesús'en'.

²⁹ Na' dan' naccho txen len Criston', lao Diosen' naccho xi'in diaža che da' Abraham, na' gon Diosen' güen len chio' can' gwne' gone' len xi'in diaža che da' Abrahanna'.

4

¹ To bene' gwñi'a še zoa xi'ine', bi'nan' gac lo na'be' da' de che'. Perw na' šlac ne' nache' bidao' bitw nacho mbalazech chac chebe' clcl ca che to bene' güen žin la'czla' žin ža gac lo na'be' yogo' dan' de che xaben'.

² Bene' güen žin ca' nite' lo' yo'o chosogüia chesene'ebe' na' chesenabi'ebe' šlac biña' čha'obe' na' šlac žin ža co'o xaben' lo na'be' dan' de čhen'.

³ Can' goc len neto' bene' Israel šlac biña' yid Criston', gwxaca'lebto' ca xi'in bene' gwñi'an'. Na' leyna' gwzaca'leben ca bene' ca' chesenabia' xi'in bene' gwñian' šlac biña' žin ža si'be' dan' de che xaben'.

⁴ Perw cate' bžin ža bžia Diosen' bia' gwsela' Xi'inen' yežlio nga, gwxa' to no'ole le'. Na' Xi'in Diosen' lecze benen byen bzenague' che leyna'.

⁵ Na' len' bedeyene' cont yogo' chio' chejnilaže'chone' ba non Diosen' chio' ca xi'ine' na' zoacho mbalaz dan' nezecho bich chonen byen gonxencho costumbr ca' da' zjanyoj le'e ley che neto' bene' Israel.

⁶ Na' cont nezecho ba non Diosen' chio' ca xi'ine', ba gwsele' Spiritw čhen' dan' lecze naquen Spiritw che Xi'ine' Criston', zoan lo' lažda'ochon'. Na' Spiriton' chaclenen to tocho cont chol güižcho Diosen' che'chone': "Xa".

⁷ Nachen' dan' ba non Diosen' chio' ca xi'ine' bich cheyała' soacho ca to esclavo len dan' non leyna' mandadw goncho. None' chio' ca xi'ine' na' chone' güen len chio' doxen can' gwne' gone' len xi'in diaža che da' Abrahanna'.

Pablon' chi' yichje' nac cheson bene' ca' chesejnilaže' Criston'

⁸ Cate' biña' gombia'le Diosen', gweynilaže'le da' ca' bi cheyała' šejnilaže'cho, na' legaquen gosenabian' xbab čhele.

⁹ Perw *na'a* ba nombia'le Diosen', o še güenč *na*cho Diosen' ba nombi'e le'e. Na' chebančgüeda' *chele* dan' chebiga'le coşxanle na' da' yoble chonxenle costumbr ca' ca no che da' ye'ej gagwcho, che ža ca', na' che cuerp chechon', na' cho'ele latje chesenabian' xbab chele la'czla' bitw zjazacan' cont yesaclenen chio'.

¹⁰ Ba chonxenle costumbr che no ža *lni*, che bio' ca', che tiemp ca' na' che iz ca'.

¹¹ Chžeba' še bich chzenagle che dan' ba bsed blo'eda' le'e, le še bich chzenagle čhen, ba gwžiaiyi' dan' bena' len le'e.

¹² Bene' migw, chata'yoeda' le'e gache'ele costumbr che neto' bene' Israel dan' zjanyoj le'e leyna' bi yesaclenen le'e lao Diosen' ca chache'eda' bi yesaclenen neda' lao Diosen'. Na' caten' bedesoa' len le'e cana', bitw *na*cho ba benle mal len neda'.

¹³ Nezecele bega'anlena' le'e da' nechw dan' gocšenda' na' gwđixjue'eda' diža' güen che Criston' len le'e.

¹⁴ Na' dan' gocšenda' ca hora' zacan' gue'ele neda', perw bitw bgue'ele neda', san do yichj do laže'le bleble neda' ca šale bleble to no angl che Dios o ca šale cuin Jesucriston'.

¹⁵ Mbalaz gwzoale cate' gwzoa' len le'e cana'. žBixčhen' bich chebele xtižan' *na'a*? Nezda' da' leca goqule neda' bzanele bite'teže da' de chele na' goclaže'le lente cuinle zanele gaclenle neda'.

¹⁶ Na' *na'a* žba chaqule chgue'eda' le'e dan' choe'lena' le'e diža' *lin'*?

¹⁷ Bene' ca' chososed chosolo'ede' le'e *na'a* leca zjachi' yichjgaque' le'e, perw gague cont yesone' güen len le'e, san cont yesyebeje' le'e bich gonle txen len neto', na' cont cue' yichjle legacze'.

¹⁸ Naqueczen güen yesebe' yichj bene' le'e bate'teže, gague cate'zen' zoa' len le'e, con še yesone' güen len le'e.

¹⁹ Xi'indagua', da' yoble chžaglagua' lo' lažda'ogua' neče le'e can' chžagla to no'ole bene' chzan, na' bich žaglagua' ca' cate'ch gac yichjlažda'olen' can' nac yichjlaždao' Criston'.

²⁰ Yebechgüeda' šaca' netec *na'a* zoa' len le'e na' šaca' gac *nia'* chonle güen, perw leca chacžejlaža' chele.

Da' Agar na' da' Saran'

²¹ Le'e chaclaže'le gonxenle costumbr che neto' bene' Israel dan' zjanyoj le'e ley dan' bzoj da' Moisésen' žbina' yenele can' ža dan' nyojen?

²² Žan gwnita' chope xi'in da' Abrahanna' bi' byo, tobe' gwzan to no'ol ben' goque' esclava che' na' yetobe' gwzan no'ol checze', no'ole nga bi goque' esclava.

²³ Na' bin' gwzan no'ole esclavan' goljbe' dan' gwzoalen da' Abrahanna' le', perw bi' gwzan no'ol checze', goljbe' neče Diosen' gože'ne' san no'ol čhen' la'czla' naque' no'ol güiž.

²⁴ Na' dan' goc che no'ol ca' chzejni'in chio' che chop dan' gwna' Diosen' gone' cont gaclene' bene' Israel ca'. No'ole esclava ben' le Agar zaca'lebde' ca ley dan' ben Diosen' mandaw' bzoj da' Moisésen'. Bzojen' par da' xoxzta'o neto' bene' Israel lo ya'a Sinaí, na' bene' ca' zjazaca'lebde' ca esclavos.

²⁵ Na' doxen nación Israelen' zaca'leben ca da' Agaren' no'ole esclava che da' Abrahanna'. Diosen' bnežjue' da' xoxzta'oto' ca' leyna' lo ya'a Sinaín' gan' nzi' Arabia, na' ža *na'a*ža bene' Israel gualaž čheto', bene' guac *na*cho bene' Jerusalén, ne' zjanaque' ca esclavos neče chesacde' chonen byen yesa'ogüe' costumbr ca' dan' ža leyna'.

²⁶ Perw chio' chejnilaže'cho Criston' naccho txen len yogo' bene' šjaya'aque' yaba gan' zoa Diosen' gan' lecze nzi' ciuda Jerusalén. Na' nezecho bitw chonen byen ga'ocho costumbr ca' dan' ža leyna'.

²⁷ Quinga ža Xtiža' Diosen' dan' nyojen:

Bebe no'ole güiž, no'ole cbi chzan,

bosya'a yela' chbe chio', le' bina' gaco' bes che yela' san^{na}'.

Chacdo' bi chaque Diosen' le' da' nono xi'ino' zoa,

perw nita' zanch xi'ino' clel ca nita' che no'olen' ba gwzan xi'in bene' byon' gwzoalene'.

²⁸ Bene' migw, xi'in da' Abrahanna' bin' le Isaac goljbe' neče gož Diosen' Abrahanna' san no'ol čhen' la'czla' goque' no'ole güiž. Na' ca'cze chio' chejnilaže'cho Criston', Diosen' none' chio' ca xi'in diaža che da' Abrahanna' bin' goljbe' neče goc dan' gož Diosen' le'.

²⁹ Bi' che da' Agaren', bin' goljbe' neče gwzoalen da' Abrahanna' le', bchi bsaca'be' Isaaquen' bin' ben Spiritw che Diosen' cont gwzan da' Saran'. Ca'cze naquen ža *na'a*ža, bene' ca' chesa'o costumbr ca' dan' ža leyna' chosoči chososaque' chio' chejnilaže'cho Criston'.

³⁰ Na' Xtiža' Diosen' dan' nyojen žan Diosen' gože' da' Abrahanna': "Bebej no'ole esclavan' len bi' čhen', le bitw gwnežjua'be' dan' gwnia' gwnežjua' bi' gwzan no'ol chio'na'."

³¹ Da'n^{an}' bene' migw, nezecho zaca'lebcho ca xi'in da' Saran', gague ca xi'in da' no'ole esclavan'.

5

Bi cheyala' yesa'ogüe' costumbr da' bi zjazaca'

¹ Caten' gweynilaže'cho Criston', le' bebeje' chio' lo yogo' da' choncho chaquecho chebe Diosen' chio' lagüe dan' chonchonña'. Da'nan' bi cheyala' yeyonxencho costumbr da' bi zjazacan' len Diosen'.

² Neda' Pablo žia' le'e to da' žialao. Še soale señw dan' nzi' circuncisión ña'a ba chejnilaže'le Criston', bibi zacan' dan' ba gwzoloa chejnilaže'lene' še ca'.

³ Da' yoble žia' le'e, note'teže bene' soe' señw dan' nzi' circuncisión, leče cheyala' gone' yogo'lo' bite'teže dan' ža ley dan' bzoj da' Moisésen'.

⁴ Na' še chaquele gonle doxen can' ža leyna' cont gacle bene' güen len Diosen', ba chzoale Criston' to šla'ale še can' chaquele, na' bich chonle xbab catequen' nzi'ilaže' Diosen' chio'.

⁵ Da' chejnilaže'cho Jesucriston' zoa Spiritw che Diosen' lo' lažda'ochon', na' chonen ga chebecho nezecho Diosen' ne' naccho bene' güen len le' cate' yežincho gan' zoe'na'.

⁶ Ca nac chio' chejnilaže'cho Cristo Jesúsén', bitw bi nonen len Diosen' še ba zoacho señw da' nzi' circuncisión o še čbi zoachon. Le dan' naquen da' žialao xen len Diosen', soateze soacho šejnilaže'cho Criston' na' gaque lježcho cont gacbia' chejnilaže'chone'.

⁷ Cana' gwzoale chonle can' chebe Diosen', perw ña'a žnon' ba ben cont bich chzenagle che diža' li che Diosen'?

⁸ Dios ben' gwleje' le'e nacle xi'ine', bitw ñacho le'na' chone' cont chzenagle che diža' yoble.

⁹ Le gon xbab can' ža diža' nga: "Late'ze levadura chonen cont chas doxen cuazina'."

¹⁰ Perw na' zoa' lez gon Xancho Jesucriston' cont gwzenagle chia'. Na' Diosen' gwnežjue' castigw che bene' chon cont chacžejaže'le, note'teže naque'.

¹¹ Bene' migw, ca nac neda', šaca' ne' chsed chlo'eda' ñia' yogo' bene' byo cheyala' yesezoe' señw dan' že' circuncisión cont yesenite' binlo len Diosen', bilja chosoči chososaca' bene' Israel gualaž chian' neda' šaca', le can' chososed chosolo'e legaque'. Perw dan' žia' Criston' bnežjw cuine' gote' le'e yag cruzen' cont soacho binlo len Diosen', da'nan' bi chesazlaže' xtižan'.

¹² Na' ca nac bene' ca' cheson cont chaquele bilja chebe Diosen' le'e še bi zoale señon', yebeda' šaca' yesečog cuingaque' yelate'.

¹³ Bene' migw, Dios ben' gwleje' chio' cont naccho xi'ine' chaclaže' nezecho bich chonen byen ga'ochó dan' ža ley cont soacho binlo len le'. Perw bitw cheyala' goncho bite'teže da' mal dan' ža lažda'ochon' goncho. Dan' cheyala' goncho, cheyala' gaclen lježcho lagüe dan' chaque lježcho tocho yetocho.

¹⁴ Na' ba zoaczcho choncho yogo'lo' can' ža leyna' še choncho can' nyojen žan: "Cheyala' gaque lježcho ca chaque cuincho."

¹⁵ Perw še chacyožlen lježcho o chdillen lježcho, chžiai'cho dan' non Diosen' cont naccho toze.

Can' goncho še gwzenagcho che Spiritw che Diosen'

¹⁶ Chnia' le'e to da' zejen, cheyala' soateze soacho goncho can' chaclaže' Spiritw che Diosen'. Na' še goncho ca', bitw gwzenagcho che da' mal dan' yo'o lo' yichjlažda'ochon'.

¹⁷ Cate' chzenagcho che da' mal dan' yo'o lo' lažda'ochon', bitw choen' latje gwzenagcho che Spiritw che Diosen'. Na' cate' chzenagcho che Spiritw che Diosen', bi choncho con can' žan checho. Na' dan' zoa Spiriton' len chio', da'nan' bitw choncho da' mal dan' ža lažda'ochon' goncho.

¹⁸ Na' še chzenagcho che dan' chsed chzejni'i Spiritw che Diosen' chio', bich chonxencho costumbr ca' dan' ža ley dan' bzoj da' Moisésen'.

¹⁹ Nachia'cze bene' ca' chosozenag che da' malen' dan' yo'o lo' lažda'ogaque' chesone' bite'teže da' mal quinga: chesata'lene' no'ol bi zjanac no'ol chegaque' o bene' byo bi zjanac bene' chegaque'; chesebede' chesone' bichle da' yela' zto' len cuerp chegaque';

²⁰ chesejnilaže' l' gua'a šaca'; chosozenague' xtiža' bene' ca' cheseñelen da' xigüe'; chesegue'e lježe'; bitw nite' binlo len lježe'; chesacxi'a lježe'; cheseloque'; zjachi' yichje' gac güen che cuingacze' sin čbi yesone' xbab nac gac che lježe'; bitw chesone' txen len lježe';

²¹ chesezelaže' bi da' de che bene' yoble; chesote' lježe'; zjanaque' bene' borrašw; zjalene' no lni gan' chac žaš; na' chesone' bichle da' mal dan' zjanac ca da' mal quinga ba gwnia'. Na' da' yoble chnia' le'e can' ba gwnicza', nono yežin yaban' gan' zoa Diosen' chnabi'e še chone' da' xinj ca' zjanac ca'.

²² Perw na' še chzenagcho che Spiritw che Diosen', goncho yogo' da' quinga: gaquecho ljež benačcho; soacho mbalaz dan' nombia'cho Diosen'; soacho binlo len xbab dan' yo'o lo' yichjlažda'ochon'; gapcho yela' chxenlaže' len ljež benačcho bite'teže da' chesonde' chio'; goncho güen len bene' yezica'chle; gaccho bene' šagüe' len yogo'lo' bene'; goncho bi da' si' lo' na'cho goncho;

²³ gaccho beñe' gwzejwlaže'; bitw soacho goncho con can' žan checho. Na' še choncho da' güen can' chaclaže' Spiritw che Diosen', bitw bibi ley de da' nan choncho da' mal.

²⁴ Na' chio' ba naccho txen len Cristo, bich choe'cho latje nabia' da' malen' chio' cont goncho can' žanna'.

²⁵ Spiritw che Diosen' ba benen yela' mban toli tocañe checho, na' da'nan' cheyala' soacho goncho can' chaclažen'.

²⁶ Na' bi cheyala' ga'laže'cho gaquecho leca beñe' güen naccho, le še goncho ca', chonen cont yeseža'a beñe' lježcho chio' na' yesegue'ede' chio'.

6

Cheyala' gaclen lježcho

¹ Bene' migw, še to beñe' lježchon' ba blažoe' bene' da' mal, chio' chzenagcho che Spiritw che Diosen' cheyala' gaclenchwne' yetinjden' cont yezoe' binlo len Diosen'. Na' cheyala' gwsaca'cho, le xož leceze chio' lažo'cho goncho da' malen'.

² To tocho cheyala' gaclen beñe' lježcho ca' bite'teze da' chesac chegaque', le can' gwna Criston' chaclaže' goncho.

³ Na' še goncho xbab naccho beñe' güen cate' bi naccho, chziye'ze cuinchon' še ca'.

⁴ To tocho cheyala' goncho xbab še dan' ba benchon' naquen da' güen o da' mal. Na' yebecho še ba bencho da' nac güen, perw bitw goncho xbab güenč ba ben chio' clel ca beñe' yoble.

⁵ Le to tocho čogľao Diosen' checho še bencho güen o še bencho mal.

⁶ Še no chsed chlo'e chio' xtiža' Diosen', cheyala' gwnežjwchone' late' bi da' šagüe' da' güen da' de checho.

⁷ Bitw güe'le latje no si'ye' le'e, bitw gac gwcuša'e'cho da' choncho len Diosen'. Le še goncho da' mal, gone' cont si'cho castigw; na' še goncho da' güen, gone' cont soacho mbalaz. Can' zeje diža' dan' žan: "Con dan' chazcho, lenna' yelapcho."

⁸ Ben' chon can' ža da' mal dan' yo'o lo' lažda'ogüe', gwžin ža cuiaye'e toli tocañe; perw ben' chon can' chazlaže' Spiritw che Diosen', Spiriton' gonen cont bane' toli tocañe.

⁹ Na' bitw cheyala' yeche'echo goncho da' güenna', le gwžin ža cate' Diosen' gone' cont soacho mbalaz juisyw, con še bi cuejyichjo choncho can' chaclažen'.

¹⁰ Da'nan' cheyala' goncho güen len yogo'lol bene' bate'teze de latje, na' chonchen byen goncho güen len beñe' chesejnilaže' Criston' clel ca len yezica'chle beñe'.

Yeto čope dan' che' Pablon' legaque'

¹¹ Le na'šc letr cha'o quinga, le cuina' chzoja' le'e.

¹² Beñe' ca' chesacľaže' yesone' byen soale señw dan' že' circuncisión chesacde' yesyebe beñe' Israel gualaž četo' ca' legaque' še ba bosozoe' le'e señon'. Chesyejilwlaže' nacle yesone' cont nono yosoči yososaca' legaque' da' chesejle'e Criston' bnežjw cuine' neče chio' cate' gote' le'e yag cruzen'.

¹³ Beñe' ca' chesene' cheyala' soale señon' zjachi' yichjgaque' ley dan' bzoj da' Moisésen' perw ne legaque' cbi chesone' can' žanna'. Con chesacľaže' soale señon' cont yesonxen cuingaque' lao beñe' Israel gualaž četon'.

¹⁴ Ca nac neda', bitw gonxen cuina', san gonxena' Xancho Jesucriston' dan' bnežjw cuine' gote' le'e yag cruzen' neče chio'. Bitwbi nonen len neda' še benačnen' yesyebede' neda', le neda' bich chebeda' da' ca' chesena benačnen'.

¹⁵ Na' len chio' chejnilaže'cho Cristo Jesúsén' nezda' bibi nonen še zoacho señw dan' že' circuncisión o še bi zoachon, perw zaca'čgua dan' ba bocob Diosen' yichjlažda'ochon'.

¹⁶ Lao Diosen' naccho dogualje beñe' Israel še ba chejnilaže'cho Jesucriston'. Na' chnaba' gaclen Diosen' yogo'le ba zoale chzenagle che' cont soa cuezchle binlo len xbab chele, na' leceze chnaba' yeyaše' yeži'ilaže'de' le'e.

¹⁷ Na' na'a chnabšca' bich gonle güedenag len xtižan', le cuerp chia' nga nsan' yiž che dan' bosochi bososaca' beñe' neda' neče chyixjue'eda' xtiža' Xancho Jesúsén'.

¹⁸ Bene' migw, chnaba' soašca Xancho Jesucriston' gaclenšque' le'e len xbab dan' yo'o yichjlažda'olen'. Da' na'zen' chzoja' na'a.

CART DAN' BZOJ POSTLW SAN PABLO ÇHE BEÑE' CA' ŽE' EFESO

Pablon' bzoje' bene' chesejnilaže' Criston' ciuda Efeso

¹ Neda' Pablo naca' postlw çhe Jesucriston' con can' gwnalaže' Diosen'. Na' chzoja' le'e zoale Efeso le'e nacle lo na' Diosen' da' chejnilaže'le Criston'.

² Chnabda' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab çhlen'.

Diosen' chaclençgüe' chio' da' ngode'cho txen len Criston'

³ Cheyała' gonxencho Diosen' ben' nac Xa Xancho Jesucriston' na' le' leçze chonxene' Diosen'. Chio' naccho txen len Criston', Diosen' ba bene' chio' yogo' da' chyažje yichjlažda'ochon' cont šjayzoacho len le' yaban'.

⁴ Na' da' bnežyw cuin Criston' neçe chio', da'nan' Diosen' gwleje' chio' cate' bina' xe yežlion' cont gaccho bene' laždao' xilaže' na' bibi dola' gapcho lagüen'.

⁵ Diosen' çacde' chio' cate' bina' soacho. Da'nan' bsi'e xnezen' none' chio' ca xi'ine' con can' gwnalaže', na' da'nan' gwsele' Jesucriston' neçe chio'.

⁶ Cheyała' soaczcho gonxencho Diosen' catec nži'ilaže'de' chio', le gwsele' Jesucriston' ben' çacde' cont le' goclencgüe' chio'.

⁷ Caten' got Criston', blalj xçhene' neçe da' xinjen' ben chio' chejnilaže'chone'. Da'nan' Diosen' bezi'xene' xtola'chon', le nži'ilaže'çhgüede' chio'.

⁸ Na' chonçgüe' güen len chio', çhone' chio' doxen yela' sina' na' yela' chejni'i da' chyažjecho.

⁹ Na' bzejni'ide' chio' da' gwnalaže' da' nono gwneze cani' da' bžie' bia' gac.

¹⁰ Le Diosen' bžie' bia' žin ža cate' yogo' bene' že' yaba len bene' že' yežlion' yosozenague' çhe Criston' na' yesaque' txen len le'.

¹¹ Ca nac chio' naccho txen len Criston', Diosen' bsi'e xnezen' none' chio' ca xi'ine' cont gac lo na'cho da' chaclaže' goņe' chio'. Na' Diosen' chone' cont çac dan' çhsi'e xnezen' na' chone' da' nežde' naquen güen.

¹² Cani'te neto' bene' Israel ba chbezto' yid Criston', le zgua'tec gwlej Diosen' neto' cont gonxento'ne' da' naque' bene' zaca' juisyw.

¹³ Na' leçze ca' le'e, cate' benele diža' güen çhe Criston' dan' nac da' li na' gwnezele chaclaže' goņe' yela' mban checho toli toçane, nach gwyejnilaže'lene'. Da'nan' leçze le'e ba nacle txen len Criston', na' Spiritw çhe Diosen' bžimen zoan lo' yichjlažda'olen', can' gwne' soan. Na' Spiriton' zoan len chio' cont nezecho ba non Diosen' chio' ca xi'ine'.

¹⁴ Leçze zoan lo' yichjlažda'ochon' cont nezecho žin ža gac lo na'cho yogo' da' ca' za' goņch Diosen' chio' naccho xi'ine' cate' goņe' cuerp cobe çhechon'. Na' goņche' chio' da' ca' cont gonxencho' da' naque' bene' zaca' juisyw.

Pablon' gwnabe' gwnežyw Diosen' bene' chesejnilaže'ne' yela' sina' çhe'

¹⁵ Da'nan' cate' benda' diža' can' chejnilaže'le Xancho Jesúsen' na' can' çhaquele yezica'chle bene' chesejnilaže'ne', gwzolagua'

¹⁶ choa' yela' choçcled çhe Diosen' neçe le'e cate' choł güiža' Diosen', na' bi cheži'laža' çhona' ca'.

¹⁷ Dios ben' chonxen Xancho Jesucriston', ben' nac Xe' na' ben' nac bene' zaca' juisyw, len' choł güiža'. Na' çhnabda'ne' cue' yela' sina' çhen' lo' yichjlažda'olen' na' gaçlene' le'e cont gombia'çhlene'.

¹⁸ Na' çhnaba' šo' be'ni' che' lo' yichjlažda'olen' cont nezele bi da' güenna' zoacho lez gone' len chion' ba gwleje' naccho xi'ine'. Na' çhnaba' gone' cont nezele catec güen juisyw nac yogo' da' ca' za' gone' yesaquen çhe chio' chejnilaže'chone'.

¹⁹ Na' leçze çhnaba' šo' be'ni' che' lo' yichjlažda'olen' cont nezele leca nape' yela' guac xen cont gaçlene' chio' chejnilaže'chone'. Blo'e yela' guac xen juisyw çhe'

²⁰ cate' bosbane' Criston' ladjo bene' guaten'. Na' gwde bosbane'ne' nach nzoe'ne' cuite' yaban' gan' çhesenabi'e txen.

²¹ Le Criston' çhnabi'a'che' ca note'teže angl. Çhnabi'a'che' ca beñaçh, na' ca da' xigüe', na' ca bi da' chesejnilaže' bene', na' ca note'težeçhle çhesenabi'a' na' na' tiemp da' za' za'.

²² Diosen' ba gwlo'e lo na' Criston' yogo' bene' na' bica'chle da' zjade cont le' çhnabi'e. Na' Diosen' bzoe' Criston' ca Xancho cont çhnabi'e yogo' chio' chejnilaže'chone'.

²³ Da'nan' chio' chejnilaže'chone' zaca'lebcho ca to cuerp, na' Criston' zaca'lebe' ca yichj cuerpen'. Guac načo nya' Criston' neče chio' chejnilaže'chone'. Na' Criston' zoe' chnabi'e doxen.

2

Diosen' chacde' chio'

¹ Na'a Diosen' ba bocobe' yichjla'ažda'olen' da' chejnilaže'le Criston'. Cana' gwzoale bentezle da' malen' na' gwdaple doła' lao Diosen'. Da'nan' gocle ca bene' guat da' bi bzenagle che'.

² Con gwzaczle benle da' mal can' cheson yezica'chle bene' bi chesejnilaže' Diosen', na' bzenagle che Satanás dan' chnabia' da' xigüe' ca' dan' zjanyechjen benachen'. Na' ža na'aža Satanásen' ne' chnabian' yichjlažda'o' bene' bi chosozenag che Diosen'.

³ Na' ca'cze gwzoa yogo'cho, gwzoatezcho bencho bi da' mal can' gwnan checho na' bi da' mal da' gwzelaže' yichjlažda'o'chon'. Na' da' bebecho da' malen' lo' yichjlažda'o'chon', da'nan' gwchoglaon checho si'cho castigw che xtoła'chon' toli tocaņe, can' gac len yezica'chle bene' bi chosozenag che Diosen'.

⁴⁻⁵ Goccho ca bene' guat len yichjlažda'o'chon' da' gwzoacho bentezcho da' malen'. Na' šlac ne' naccho ca', Diosen' leca beyaše' beži'ilaže'de' chio' na' gocchgüede' chio'. Na' lagüe da' nži'ilaže' Diosen' chio', da'nan' bocobe' yichjlažda'o'chon' cate' gwyejnilaže'cho Criston', na' bene' yela' mban checho toli tocaņe.

⁶ Na' da' bocobe' yichjlažda'o'chon', guac načo bene' len chio' can' bene' len Cristo Jesúsén' cate' bosbane' le' ladjo bene' guat ca'. Na' da' naccho txen len Criston', mbalaz bač zoacho chbezcho len le' na'a can' soacho cate' yežincho yaban' gan' chi'ena'.

⁷ Diosen' goclene' chio' ca' cont tiempen' za' za' gwlo'echde' catequen' nži'ilaže'chgüede' chio', le gonchgüe' zanch da' güen len chio' naccho txen len Cristo Jesúsén'.

⁸ Da' nži'ilaže' Diosen' chio', ba bene' yela' mban checho toli tocaņe cate' gwyejnilaže'cho Criston'. Con bene' to goclen, gague neče bi da' güen da' ben chio'.

⁹ Le Diosen' bi chaclaže' güe'cho diža' o gaquecho bnitagüe' xtoła'chon' neče bi da' güen da' ba bencho.

¹⁰ Diosen' bene' chio' na' cate' gwyejnilaže'cho Cristo Jesúsén' bocobe' yichjlažda'o'chon' cont soacho goncho da' güen. Cate' biņa' soacho, bsi'e xņezen cont soacho goncho da' güen.

Bene' Israel na' bene' bi zjanaque' bene' Israel, Criston' bozoe' legaque' binlo toe' yetoe'

¹¹ Da'nan' le gon xbab can' goc len le'e cana', le'e goljle bi nacle bene' Israel can' nac neto'. Canan' neto' che' lježto': "Chio' zoacho señw da' že' circuncisión", na' che'to' le'e: "Bi zoale señw da' že' circuncisión" (señw da' chosozoa bene' Israel gualaž cheto' ca' lo cuerp che bi' byo dao' ca').

¹² Na' le gon xbab can' gwzoale cana', bi nombia'le Criston', bi nacle nación che Diosen' ca neto' bene' Israel nacto', na' Diosen' bi gwne' gaclene' le'e can' gwne' gaclene' neto' bene' Israel. Bi gwzoale lez šjayzoale len Diosen' na' neca gwyejnilaže'le Diosen' lo yežlio nga.

¹³ Perw Criston' bnežjw cuine' gosote'ne' na' blalj xchene' neče chio'. Na' na'a da' chejnilaže'lene' ba nacle txen len Cristo Jesúsén'. Na' ba nacle toze len neto' bene' Israel, la'czla' cana' gocle bene' zito' len neto' na' len Diosen'.

¹⁴ Cana' neto' bene' Israel na' le'e bi nacle bene' Israel bgue'e lježcho. Perw Criston' ba bene' cont naccho toze na' ba bozoe' chio' binlo tocho yetocho.

¹⁵ Caten' bnežjw cuine' gote', boze' ca'ale ley da' bzoj da' Moisésén' len yogo' da' žan cheyała' goncho. Na' bzoen' ca'ale cont bozoe' chio' chejnilaže'chone' binlo tocho yetocho na' beyone' chio' to yež cobe che', chio' naccho bene' Israel lente chio' bi naccho bene' Israel.

¹⁶ Da' bnežjw cuine' gote' le'e yag cruzen', zoacho binlo len Diosen', chio' naccho bene' Israel na' chio' bi naccho bene' Israel, na' lece naccho toze na' bich chgue'e lježcho.

¹⁷ Na' Criston' caten' bide' yežlion' bedeye'e diža', gwne' benachen' guac yesenite' binlo len Diosen', gwđixjue'eden' len le'e bi nacle bene' Israel, le'e bi nombia'le xtiža' Diosen' cana', na' lente neto' nacto' bene' Israel, neto' nombia'to' xtižen'.

¹⁸ Le chio' chejnilaže'cho Criston', chio' naccho bene' Israel na' len chio' bi naccho bene' Israel, toz Spiritw che Diosen' chaclenen chio' cont choe'lencho Diosen' diža'.

¹⁹ Da'nan' le'e bi nacle bene' Israel bich nacle ca bene' zito' len Diosen'. San yogo' chio' chejnilaže'cho Criston' ba naccho txen, le Diosen' ba none' chio' ca bene' lo' yo'o che'.

²⁰ Chio' chejnilaže'chone' zaca'lebcho ca to yo'o de yej. Na' neto' postlw na' yezica'chle bene' chesoe'lene' le'e xtiža' Criston' zaca'lebto' ca lene yo'ona'. Na' Jesucriston' zaca'lebe' ca yej squin che yo'ona'.

²¹ Na' chio' naccho txen len Criston' lecze zaca'lebcho ca yej da' zjancua' zjangoden' gan' chac yo'o de yeja'. Zjangoden' txen na' zej cha' yo'ona'. Ca'cze chio' naccho txen len Xancho Criston' na' len lježcho, na' naccho ca to yo'o gan' zoa Diosen'.

²² Le'e txen len neto' na' len note'teze bene' chesejnilaže' Criston' naccho ca to yo'o gan' zoa Diosen', le zoa Spiritw chen' lo' yichjlažda'ochon'.

3

Diosen' gwleje' postlw Pablon' cont jatixjue'ede' xtižen' len bene' bi zjanac bene' Israel

¹ Na' da' naquen ca', neda' Pablo choł güiža' Diosen' neče le'e. Dia' ližya nga da' chyixjue'eda' xtiža' Cristo Jesúsen' len le'e bi nacle bene' Israel.

² Chacda' ba nezeljele nži'ilaže' Diosen' neda' na' bsi'e xnezen' chzejni'ida' le'e xtižen'.

³ Ba bzejni'ide' neda' da' nono gwneze, can' ba bzoja' le'e to chope diža' le'e cart nga.

⁴ Cate' gwlable cart nga gacbe'ele chejni'ida' da' nono gwyejni'i cana' che Criston'.

⁵ Cana' Spiritw che Diosen' bi bzejni'in bene' da' nono gwneze che Criston', perw na'a ba bzejni'in neto' postlw che Diosen', na' ba bzejni'in nochle neto' gwleje' cont choe'to' xtižen', neto' nacto' lo' na' Diosen'.

⁶ Da' nga bzejni'in neto', le'e bi nacle bene' Israel txen len neto' nacto' bene' Israel si'cho da' gwna Diosen' gone' che chio' naccho xi'ine' neče da' chejnilaže'cho Cristo Jesúsen', na' txen naccho ca toze bene', na' txenna' chaclen Diosen' chio' can' gwne' gone'.

⁷ La'czla' bitec bi zaca', Diosen' gwleje' neda' len yela' guac chen' cont chyixjue'eda' diža' güen chen'.

⁸ Chacda' ne late'ze bibi zaca' ladjo yogo' bene' ba gwlej Diosen' zjanaque' lo' ne'e. Bia'cze nži'ilaže'de' neda' na' gwleje' neda' cont chyixjue'eda' len bene' bi zjanac bene' Israel catec da' zan da' güen juisyw gone' len yogo' chio' chejnilaže'cho Criston'.

⁹ Na' Diosen' gwlo'e lo' na' chzejni'ida' yogo'loł bene' da' nžie' bia' gac. Gwzolaoten cate' gwxe yežlion', nono gwneze da' nžie' bia' gac, con toz Diosen' gwnežde', Dios ben' bene' yogo'loł bene', yogo' beyixe' na' yogo' bichle da' de.

¹⁰ Le Diosen' nžie' bia' bene' ca' zjanac angl blao che' na' angl gwnabia' zjanita' yaban' yesele'ede' can' chone' len chio' chdop chžagcho chonxencho Jesucriston', cont yesacbe'ede' nape' yela' sina' len yogo'loł da' chone'.

¹¹ Chone' can' bžie' bia' gone' caten' bina' xe yežlion', le cani'te bsi'e xnezen' sele' Xancho Jesucriston'.

¹² Na' naccho txen len Criston' da' chejnilaže'chone'. Da'n'an' bi chžebcho Diosen', san chbecho nezecho chac choe'lenchwne' diža'.

¹³ Nachen' chņeyoeda' le'e bi gacžejaže'le che da' chac chia' nga chyi chzaca' lagüe da' chyixjue'eda' xtiža' Jesucriston' len le'e. Naquen da' yebele, gague da' gacžejaže'le.

Criston' chacde' chio' chejnilaže'chone'

¹⁴ Na' da' naquen ca', chzoa xiba' choł güiža' Xa Xancho Jesucriston'.

¹⁵ Le' bxie' yogo' diaža che chio' zoacho yežlio nga na' che bene' že' yaba.

¹⁶ Diosen' naque' bene' zaca' juisyw na' nape' la'zelagüe' yela' guac xen. Nachen' chņabda'ne' gone' ga soa Spiritw chen' lo' lažda'olen' cont soa chačh laže'le len yela' guac chen'.

¹⁷ Chņaba' soateze soa Criston' len le'e da' chejnilaže'lene'. Na' chņaba' soaczle gaquele Diosen' na' gaque lježle do yichj do laže'le.

¹⁸ cont gac šejni'ile txen len yezica'chle bene' zjanaque' lo' na' Diosen' catec chaquechgüe Criston' chio'. Da' xen chaquechgüede' chio', con bi cheyož yedo ca chacde' chio'.

¹⁹ Le bina' šejni'icho catec chaquechgüede' chio'. Na' lecze chņaba' zej gacchle bene' güen doxen can' nac Diosen'.

²⁰ Na' Diosen' chac chone' yogo'loł, na' chone' da' gualch ca da' chņabechone' o da' choncho xbab gone'. Na' chone' cont Spiritw chen' zoan lo' yichjlažda'ochon' chaclenen chio' len yela' guac chen'.

²¹ Na' chio' chdop chžagcho chonxencho Criston', cheyała' gonxencho Diosen' na'a na' toli tocaņe da' gwsele' Cristo Jesúsen' neče chio'. Na' can' gonšcaczcho.

4

Naccho toze len yogo' bene' chesejnilaže' Criston'

¹ Neda' dia' ližya nga da' chyixjue'eda' xtiža' Xancho Jesucriston'. Nachen' chņeyoeda' šejšcale gonle güen can' cheyała' goncho da' gwlej Diosen' chio' naccho xi'ine'.

² Na' chata'yoeda' le'e bi gonxen cuinle, san le gon xbab bitec bi zaca'le; na' gacle bene' šagüe' na' gapple yela' chxenlaže' len bene' lježle na' le gacde' bite'teze yesone'.

³ Spiritw che Diosen' ba nonen chio' toze da' chejnilaže'cho Criston', na' le gon con ga zelao saque'le cont soaczele gonle toze xbab len bene' lježe, le Diosen' ba bozoe' le'e binlo tole yetole.

⁴ Yogo' chio' chejnilaže'cho Criston' naccho ca toz bene', na' toz Spiritw che Diosen' zoan lo' yichjlaždao' yogo'cho. Na' cate' Diosen' gwleje' chio' cont naccho xi'ine', lecze bene' cont toz can' zoacho lez gone' güen len chio'.

⁵ Toz Jesucriston' naque' Xancho, na' toz can' chejnilaže'chone', na' toz ca zejen cate' chzoacho nis.

⁶ Na' toz Diosen' chonxencho ben' nac Xa yogo'cho. Len' chnabi'e yogo'cho, na' chchine' yogo'cho choncho xšinen', na' zoacze' len yogo'cho.

⁷ Na' Criston' chaclene' to tocho na' none' checho gwde gwdele da' gon to tocho.

⁸ Da'nan' nyoj Xtiža' Diosen' žan:

Cate' beyepe' yaban' bebeje' bene' zan lo na' gwxiyen' cont bechi'e legaque'.

Na' bi'e che beñačen' da' gac gon to toe'.

⁹ Na' can' žan: "Beyepe' yaban'", zejen betje' golje' beñač yežlio nga na' gwden' gote' bgaše'.

¹⁰ Na' ben' betj golje' beñač, lecze len' beyepe' yaban' gan' zoa Diosen', na' na'a zoe' chnabi'e doxen.

¹¹ Na' lecze len' none' che balcho naccho postlw, na' none' che balcho chyixjue'echo bi da' ba gwne', na' none' che yebalcho chje'cho diža' güen chen' len bene' bina' yesenden', na' yebalcho none' checho chgüia chna'cho bene' chesonxene' le' na' chsed chlo'echo legaque'.

¹² Can' chon Criston' cont chio' naccho lo ne'en chac choncho xšinen'. Na' chonchon cont to to chio' naccho toze len le' zejeh gaccho can' chazlažen'.

¹³ Diosen' chaclaže' yogo'cho gaccho toze šejnilaže'cho Xi'inen' do yichj do laže'cho na' gombia'chone' binlo. Chaclaže' gacyane'cho can' cheyała' gaccho, na' gaccho bene' güen can' nac Criston'.

¹⁴ Na' še gaccho ca', bich šo'cho xbab ca che to bidao', šejcho qui šejcho ca'ale na' ocho to to yela' chejnilaže' da' chesaljaže' bene' güenlaže' na' bene' gwxiye' cont chesonlede' chio'.

¹⁵ Na' cheyała' güe'lencho bene' diža' li, perw gaccho bene' šagüe' len legaque' cont yesache'ede' le chaquechone'. Goncho ca' cont zejeh gaccho bene' šagüe' bene' güen can' nac Criston' ben' chnabi'e chio'.

¹⁶ Cate' to to cuen cuerp chechon' ngoden' na' noxe' lježen len bela' na' len žit na' len bechj bnja ca' da' ncan', na' to to cuenen chesonen ž'in, nach doxen cuerp chechon' chonen žin ca cheyała'. Na' ca'cze chio' chejnilaže'cho Criston' ngode'cho txen cont to tocho goncho da' non Diosen' checho goncho, na' yogo'cho txen zej gaccho bene' šagüe' na' zej gaquech lježcho.

Diosen' ba bocobe' yichjlaždao' chio' chejnilaže'chone'

¹⁷ Da' nga chnia' le'e, Xancho Criston' none' mandaw gwzejni'idan' le'e: bi cheyała' soacho goncho xbab ca cheson bene' bi chesejnilaže' Diosen', le bibi zacan'.

¹⁸ Nchol yichjlažda'ogaque'. Na' bi zjanape' yela' mban toli tocače ca da' non Diosen' chio', neca chesejni'ide' che Diosen', le zjanaque' bene' güedenag len le'.

¹⁹ Bibi zto' zjanombi'e che da' malen' chesone', na' con chesonteze' yogo' yela' zto', na' chesezelaže' yesenite' yesonche' da' malen'.

²⁰ Le'e ba nsedle can' ža Criston' na' nezele bi cheyała' goncho ca',

²¹ le chacda' ba benele dižan' gwne' lo' yichjlažda'olen', na' neto' lecze ba bzejni'ito' le'e diža' li čen'.

²² Nezele bich cheyała' gwzenagcho che da' malen' da' chzelaže' lažda'ochon' goncho, can' bencho cana' cate' yela' gwzelaže' chechon' ne' chonlen chio' cont bentezcho da' malen'.

²³ San na'a cheyała' gwša'cho xbab da' choncho lo' yichjlažda'ochon'.

²⁴ Cheyała' güe'cho latje yocobech Diosen' yichjlažda'ochon' cont soacho goncho da' zej to li can' chon le', na' gaccho bene' laždao' xilaže' can' chazlaže' le'.

²⁵ Da'nan' bich gonlaže'cho, san güe'len lježcho diža' li, le ngode' lježcho naccho ca toze bene'.

²⁶ Na' cate' chža'acho bi cheyała' goncho da' xinj. Cheyała' yob yeyacxenlaže'cho na' bich ža'acho do ža.

²⁷ Na' bi güe'cho latje cont Satanás dan' chnabia' da' xigüe' ca' nabian' xbab chechon' cont goncho da' xinj.

²⁸ Na' nole še ba yolaole chbanle, bich cheyała' cuanle. Cheyała' gonle žin da' nac güen len ni'a na'le cont gata' da' gwnežjwle bene' chyažj chchine'.

²⁹ Na' bi cheyała' güe'cho bite'teze diža' zban, san güe'cho diža' šagüe' len yogo'lol bene', con can' chyažje to toe' cont gaclenen le'. Goncho ca' cont xtiža'chon' gaquen da' zaca' gwzenag bene'.

³⁰ Na' bi goncho cont yeyaše'laže' Spiritw che Diosen', le Diosen' ba bene' ga zoan lo' yichjlažda'ochon' cont nezecho naccho xi'ine' na' nezecho žin ža yedyexi'e chio'.

³¹ Cheyała' cuejyichjcho yogo' da' mal, bich gonchon. Bich co'olaže'cho, bich ža'acho, na' bich güe'cho diža' loc diža' lžej. Bi necho che bene', neca gaccho bene' xi'a.

³² San cheyała' gaccho bene' šagüe' na' yeyaše' lježcho tocho yetocho. Na' cheyała' yezi'xen che lježcho bite'tez da' chesonde' chio' con can' bezi'xen Diosen' checho cate' gwyejnilaže'cho Criston'.

5

Cheyała' goncho can' chon Diosen'

¹ Nachen' cheyała' soacho goncho can' chon Diosen', le naccho xi'ine' na' chacde' chio'.

² Cheyała' soacho gague lježcho ca Criston' chacde' chio' na' bnežjw cuine' gote' neče chio'. Na' chebe Diosen' da' bene' ca', can' chebe bene' to da' chla' zix.

³ Da' naccho lo' na' Diosen' cheyała' gue'echo da' malen'. Gwbatech cheyała' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto' len cuerp chechon'. Na' bi cheyała' selaže'cho da' de che bene'.

⁴ Bi cheyała' güe'cho diža' da' naquen da' yela' zto' o bite'teze diža' le'e, diža' da' bibi zaca' da' bi nca' xneze, le bi zejen güe'cho dižan' zjanac ca'. San cheyała' soacho güe'cho yela' choxclen che Diosen'.

⁵ Nita' bene' byo ben' chesata'lene' no'ole bi nac xo'olgaque' na' nita' no'ole ben' chesata'lene' bene' byo bi nac bene' chegaque', na' nita' bene' chesyebede' dan' naquen da' yela' zto'; na' nita' bene' chesezelaže' bi da' de che bene'. Ba nezecele bene' ca' cheson da' malen' zjanac ca' bi yesyežine' yaban' gan' chnabia' Criston' len Diosen'. (Na' ca nac bene' chesezelaže' bi de che bene', toz ca malen' chesone' len da' cheson bene' chesejnilaže' l'gua'a l'sacan'.)

⁶ Bi güe'le latje no siye' le'e len diža' güenlaže'. Diosen' chnežjue' castigw toli tocane che bene' ca' bi chosozenag che', bene' cheson da' mal ca' ba gwnia'.

⁷ Da'n'an' bi cheyała' gaccho txen len bene' cheson ca'.

⁸ Cana' nchoł yichjlažda'ochon', perw na'a ba yo'on be'ni' che Xancho Criston', na' cheyała' soacho goncho da' güen can' chaclaže' Diosen' gon chio' nombia'chone'.

⁹ Na' še ba gwyo'o be'ni' che Criston' lo' yichjlažda'ochon', nach gaccho bene' šagüe' na' goncho da' güen da' zej to l'icha.

¹⁰ Cheyała' gwsedcho cont nezecho can' chaclaže' Xancho Criston' goncho.

¹¹ Bi cheyała' goncho txen len da' malen' cheson bene' ca' zjančoł yichjlažda'ogaque', le chesone' da' bibi zaca'. San cheyała' gwzejni'icho legaque' da' malen' chesone',

¹² le naquen da' cheto'echo güe'cho diža' che da' ca' chesone' do bagaše'ze.

¹³ Na' cate' be'ni' che Criston' šon' lo' yichjlaždao' bene', nach yesache'ede' che bite'teze da' chesone' še naquen da' mal, le be'ni' chen' chzejni'in be'nachen' che xbab chegaque' na' bi da' chesone' še naquen güen o še naquen mal.

¹⁴ Da'n'an' nyojen quinga che note'teze bene' chon da' malen':

Naco' ca bene' chtas na' ca bene' guat da' bi chzenago' che Diosen'.

Bzenag che' cont Criston' cue'e be'ni' lo' yichjlažda'oguo'.

¹⁵ Nachen' cheyała' soacho na'cho dan' choncho. Cheyała' goncho da' naquen da' sina', gague goncho ca bene' bi chejni'.

¹⁶ Na' yogo' ža cheyała' goncho can' chazlaže' Diosen', le na'a že'chgua bene' chesone' da' malen'.

¹⁷ Bi goncho ca bene' bibi xbab nye'. Cheyała' šejni'icho can' chaclaže' Diosen' goncho cont gonchon.

¹⁸ Na' bi cheyała' gaccho bene' borrašw, le bene' chesezožde' chosožiai' cuine'. San chio' cheyała' güe'cho latje soachgua Spiritw che Diosen' lo' lažda'ochon' n'abian' chio' len da' choncho.

¹⁹ Cheyała' gwšaljlen lježcho no salmos na' gollen lježcho no himnos o bichle da' ža Spiritw che Diosen' gołcho. Na' cheyała' nechon na' gołchon do yichj do laže'cho gonxencho Xancho Jesucriston'.

²⁰ Yogo' ni'a cheyała' güe'cho yela' choxclen che Xacho Diosen' che yogo' da' chone' chaclene' chio'. Na' Xancho Jesucriston' zoe' chaclene' chio' cont güe'cho yela' choxclen che'.

Can' cheyała' soalen bene' lo' yo'o chechon'

²¹ Da' chapcho Diosen' bala'añ cheyała' gwzejjw yichjcho gwzenagcho tocho yetocho.

²² Na' le'e no'ole, le'e nšagna'le, to tole cheyała' gwzenagle che bene' chele, le chzenagle che Xancho Criston' cate' chzenagle chegaque'.

²³ Diosen' nzoe' bene' chele cont zjanacche' blao ca le'e, can' nzoe' Criston' nacche' blao ca chio' chdop chžagcho chonxenchone'. Le chion' guac nacho naccho cuerp che Criston', na' le' none' chio' yela' mban toli tocane.

²⁴ Na' ca chio' chonxenchone Criston' cheyala' gwzenagcho che', ca'czen' le'e no'ole le'e nšagna'le, to tole cheyala' gwzenagle che bene' chele yogo' bin' chese'e le'e.

²⁵ Na' le'e bene' byo le'e nšagna'le, to tole cheyala' gague no'ol chelen' con can' chaque Criston' chio' chonxenchwne' na' bnežjw cuine' neche chio' cate' gosote'ne'.

²⁶ Na' cont gwlo'e chio' lo na' Diosen', beyone' lažda'ochon' xilaže' cate' gwyejle'cho xtižen'.

²⁷ Na' bene' ca' cont yebede' chio' cate' yežincho lagüen', bibi xtoła'cho gata' na' ne bichle da' mal yo'o nyaz lo' yichjlažda'ochon', san gac lažda'ochon' xilaže' lagüen'.

²⁸ Na' con can' nži'ilaže' Criston' chio', can' cheyala' ži'ilaže' to to bene' byo no'ol čhen'. Le'e bene' byo, to tole cheyala' ži'ile no'ol čhelen' can' nži'ile cuerp čhelen', le nži'icze cuinle cate' chonle ca'.

²⁹ Nono zoa no chgue'e cuerp che', san yogo'cho nži'icho cuerp čhechon' na' chapši'ichon. Na' can' chon Criston' len chio' chonxenchone', nži'ide' chio' na' chapši'e chio'.

³⁰ Na' chone' ca' da' naccho ca to cuen güeje cuerp čhen', ca žit da' yo'e na' ca xpele'.

³¹ Na' Xtiža' Diosen' nyojen žan: "Da'nan' bene' byo le'e len xaxne'e na' si'e no'olen' gwšagna'lene' le' na' yesaque' toze."

³² Diža' quinga ba bzoja' naquen to da' nono gwyejni'i cani', perw chnia' naquen to da' chzejni'in chio' chdop chžagcho chonxenchone Criston' cont nezecho can' cheyala' soacho len le'.

³³ Na' lecze ca' le'e bene' byo le'e nšagna'le, to tole cheyala' gague no'ol chele can' chaque cuinle, na' le'e no'ole nšagna'le, to tole cheyala' gaple bala'an bene' chele.

6

¹ Na' le'e bidao', le gwzenag che xaxna'le, le can' cheyala' gon chio' naccho txen len Xancho Criston'.

² Cate' Diosen' bnežjue' xozxta'oto' ca' ley čhen', gwne': "Le gap bala'an xaxna'le." Na' goquen da' nechw da' bžie' bia' yesone' da' nsa' to da' güen da' gone' len legaque' še yosozenague' čhen, gwne': "Le gap bala'an xaxna'le

³ cont gac güen chele na' cont banle sša lo yezlio nga."

⁴ Na' le'e nita' xi'inle, le yosgol le yoscha'o bi' chele ca' binlo, diža' šagüe' gwzejni'ile legacbe' cont yosozenagbe' che Xancho Criston' na' gague con gonle ga yeseža'a yeselocbe'.

⁵ Na' le'e mos, le gwzenag che xan žin chelen' do laže'le na' le yeyiljwlaže' naquen' gonle da' yesazlaže' to toe', le lecze chzenagle che Criston' caten' chzenagle čhegaque'.

⁶ Le gwzenag čhegaque' do yichj do laže'le, gague cate'zen' chesene'e can' chonlen', le nacle bene' güen xšin Criston', na' can' chaclaže' Diosen' goncho.

⁷ Na' cheyala' güe'laže'cho goncho žin che bene' cont yebe Xancho Criston' chio', gague cont yebe bene' nac xan žin na'ze.

⁸ Goncho ca', le nezecho bite'teze da' güen da' choncho, Xancho Criston' gone' cont žin ža yebi'in güen len chio', chio' naccho esclavos na' len chio' bi naccho esclavos.

⁹ Na' le'e nacle bene' xan žin, le gon güen len bene' ca' cheson xšinle. Bitw co'ole legaque' šeb, le Xancho Diosen' zoe' yaban' chna'cze' can' chonlen', na' lecze chna'cze' can' cheson bene' güen žin čhelen', na' toz can' chone' len yogo'lo! bene' note'teze zjanaque'.

Can' goncho cont Satanásen' bi gonen chio' gan

¹⁰ Nachen' bene' migw, da' naccho txen len Xancho Criston', cheyala' soachachcho šejnilaže'chone', le nape' yela' guac xen cont chaclene' chio'.

¹¹ Cheyala' gon cuincho gual doxen can' chaclaže' Diosen' goncho, cont soachachcho bi šejle'cho che Satanás dan' chnabia' da' xigüe' ca' cate' chyljwlažen' siyen' chio'.

¹² Le gague bene' nac bela' chenna' chdillencho, san chdillencho da' xigüe' ca', da' ca' besyeyaquen da' mal, na' bichle da' chesenabia' bene' že' yežlio nga bene' nčho! yichjlažda'ogaque' len da' malen'. Chdillencho yogo'lo! spiritw mal ca' gate'teze chesašen.

¹³ Da'nan' cheyala' gon cuincho gual doxen can' chaclaže' Diosen', cont Satanásen' bi soeczen chio' ža cate' tillenen chio'. Na' cate' ba bencho can' chazlaže' Diosen', nach cheyala' soachachcho len le'.

¹⁴ Na' cont soachachcho bi siye' Satanásen' chio', cheyala' güe'cho diža' li yogo' ni'a. Na' še goncho ca', gaclenen chio' ca da' chčhej soldadon' cho'a li'e. Na' cheyala' goncho da' nac güen yogo' ni'a, le še goncho ca', gwcu'e'jen chio' ca xa soldadon' da' naquen de ya chcue'e'jen cho'alcho'e.

¹⁵ Na' cheyała' soacho probnidw güe'lencho bene' diža' güen che Criston' da' chzejni'in can' guac soacho binlo len Diosen'. Na' še soacho probnidw güe'lenchon bene', gaclenen chio' can' chaclen xel soldadon' le'.

¹⁶ Na' da' zejehen ca bichle da' goncho, cheyała' soačhačho šejnilaže'cho Diosen'. Na' še soačhačho šejnilaže'chone', nach gaclenen chio' cont bi gwzenagcho che Satanásen'. Gaclenen chio' ca escudo da' chčin soldadon' chaclenen le', chosolen yi' che flechas ca' da' chesala'ninen zja'aquen gan' zien', na' chcue'ejen le' len da' ca' zja'ac yesejidjon cuerp chen'.

¹⁷ Na' cheyała' yosa'laže'cho Criston' ba bene' yeła' mban checho toli tocañe, cont gaclenen chio' ca chaclen lapa' de ya da' chčin soldadon'. Na' lecze Xtiža' Diosen' da' ben Spiritw che Diosen' cont nyojen, le gonchgua xbab chen cont gaquen len le'e ca to spada da' chčin soldadon'.

¹⁸ Na' do tiemp cheyała' yol güižcho Diosen' nabcho yogo' da' chzejni'i Spiritw chen' chio'. Na' cheyała' gagcho bene' banlaže' na' yol güižchone' sin cbi yeche'echo, nabcho gaclene' yogo' bene' ba gwleje' cont zjanaque' lo ne'e.

¹⁹ Na' le nab gon Diosen' latje gua' xtižen', na' le nab bi žeba' gua' diža' tcho'a gwzejni'ida' bene' diža' güen che Criston' da' nono gwneze can'.

²⁰ Le Diosen' gwsele' neda' ca gualaze' cont bia' xtižen', na' da'nan' dia' ližya nga. Nachen' le nabe Diosen' gaclene' neda' bi žeba' gua' xtižen' tcho'a can' cheyała' guan'.

Pablon' chone' čačh laže'gaque'

²¹ Chsela' bene' migw checho Tíquico güe'e diža' doxen can' chac cont nezele can' chac chia' na' yogo' da' chona'. Chaquecho Tíquicon' da' naque' txen len chio' chonxenko Criston' na' zoateze' chone' xšin Xancho Criston' can' cheyała' gone'.

²² Nachen' chsela'ne' cont nezele can' chac cheto' na' cont gone' čačh laže'le.

²³ Chnaba' lao Xacho Diosen' len Xancho Jesucriston' yesonšque' cont yogo'le chonxenle Criston' soa cuzle binlo len yichjlažda' olen', na' lecze yesonšque' cont yogo'le gaque lježle na' soačhačle šejnilaže'lene'.

²⁴ Soščacze Diosen' gaclene' yogo' bene' chesacde' Xancho Jesucriston' sin cbi yesebeze'. Da' na'zen' chzoja'.

CART DAN' BZOJ POSTLW SAN PABLO ĆHE BENE' CA' ŽE' FILIPOS

Pablo bzoje' carten' šlac die' ližya

¹ Neda' Pablo chseļa' cart nga txen len bene' lježa' Timoteo. Chopte neto' gwlej Diosen' cont chonto' xšinen', bite'tezen' že'. Na' chzoja' cart nga Ćhe yogo' le'e zoale ciuda Filipos, le'e yo'ole lo na' Diosen' lagüe chejnilaže'le Cristo Jesúsen'. Na' le'e nchojle chgüia chna'le bene' lježle chesejnilaže'ne', na' le'e nchojle chonle žin bixjw da' chata' ladjo le'e chdop chžagle chonxenlne', decze da' nia' le'e len cart nga.

² Chnabšca' lao Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab da' yo'o lo' yichjlažda' olen'.

Pablo chnabde' Diosen' gaclene' bene' ca' chesejnilaže' Criston' Filipos

³ Yogo' ni'a cate' chjayze'eda' le'e, choa' yela' choxcen Ćhe Diosen' ba naccho txen chejnilaže'chone'.

⁴ Na' yogo' ni'a cate' choj güiža' Diosen', chbeda' chnaba' gaclene' le'e.

⁵ Na' choa' yela' choxcen chen' naccho txen chejle'cho diža' güen Ćhe Jesucriston', gwzolaoten cate' za' gwyejnilaže'ln'e'.

⁶ Na' da' nga nezda', Diosen' gwzolağüe' chone' to da' güen lo' yichjlažda'olen' cana', na' gone' cont yeyož yeyac yichjlažda'olen' can' chazlažen' cate' žin ža yid Jesucriston' da' yoble.

⁷ Da' cheyaļa'cze gona' xbab chele ca', le chacchgüeda' le'e. Na' nezda' Diosen' ba goclene' le'e can' ba goclene' neda' šlac dia' ližya nga, na' šlac ba gwidxjue'eda' diža' güen Ćhe Criston' len bene' bi gosejle'e chen, bzejni'ida' legaque' naquen diža' li.

⁸ Diosen' nezde' chacchgüeda' yogo'le, le Cristo Jesúsen' chone' cont chacda' le'e.

⁹ Na' chnabda' Diosen' gonšque' cont gaquechln'e' na' gaqueche lježle na' lecze šejni'ichle yogo'lol da' chaclaže' Diosen' šejni'ile na' gache'ele bi da' naquech güen gonle cont gaclen lježle.

¹⁰ Chnaba' da' ca' cont gache'ele bin' chazlaže' Diosen' gonle, na' lecze cont soacze do laže'le na' bibi doļa' gapple cate' žin ža yid Criston' da' yoble.

¹¹ Nach gaclen Jesucriston' le'e gonchguale da' nac güen, na' Diosen' si'e yela' bala'an' na' yezica'chle bene' yesonxene' Diosen' can' chonlen'.

Pablon' chacde' Criston' do yichj do laže'

¹² Bene' migw, che'nda' nezele yogo' dan' ba goc Ćhia' ba gosaclenen cont bene' zanch gosende' diža' güen Ćhe Criston'.

¹³ Le yogo'lol soldadw gop ca' cheson žin Ćhe bene' gwnabia' nga, na' yezica'chle bene' že' do nga zjanezde' dia' ližya neĆhe choa' xtiža' Criston'.

¹⁴ Na' bene' zan bene' lježcho že' nga lecze ba chesejnilaže'chgüe' Xancho Criston' da' ba besele'ede' can' chaclene' neda' šlac dia' ližya nga. Da'n'an' legaque' lecze ba cheseyaxjchde' cheso'e xtiža' Diosen' sin ca' chesežebe'.

¹⁵ Da' li bale' cheseyixjue'ede' xtiža' Criston' da' chesacxi'ede' neda' na' da' chesaclaže' yesacĆhe blaoch ca' neda', perw yezica'chle bene' ca' cheseyixjue'eden' do laže'.

¹⁶ Na' bene' ca' to cuen cheseyixjue'ede' xtiža' Criston' cont yesacxen cuine', gague cheseyixjue'eden' do laže'gague'. Chesone' xbab zoayaša' da' cheseyixjue'eden'.

¹⁷ Na' bene' ca' yezica'chle cheseyixjue'eden' lagüe chesacde' Criston' na' chesacde' neda', le zjanezde' neda' dia' ližya nga neĆhe chzejni'ida' bene' bi chesejle'e diža' güen Ćhe Criston', chape'gaca'ne' naquen da' li.

¹⁸ Perw bibi nonen len neda' še cheseyixjue'eden' do laže' o še gague do laže', con chebeda' cheso'e diža' Ćhe Criston' da' nac diža' li.

Na' dechcze da' chebeda',

¹⁹ le nezda' yechoja' güen len da' quinga chac Ćhia' lagüe dan' chnabde' gaclen Diosen' neda' na' lagüe dan' zoa Spiritw Ćhe Jesucriston' len neda' chonen Ćhach laža'.

²⁰ Da'n'an' zoa' lez gaclen Diosen' neda' gua' xtiža' Criston' sin cbi žeba'. Na' la'czla' še soacha' o la'czla' še gata', chaclaža' si' Criston' yela' bala'an' na' a len da' gona' na' len da' gag Ćhia' con can' ba gwxi'e yela' bala'an'.

²¹ Chzelaža' gacxen Criston' len bite'tez da' chona' šlac ne' mbana', na' lecze nezda' soa' mbalazchgua cate' ba gota', le šjayzoalena'ne'.

²² Perw še soacha' yežlio nga na' gonĆha' xšin Xancho Criston' cont šanch bene' yesejni-laže'ne', o še gata', bi nezda' non' nac güenĆh.

²³ Naquen zdebe nia' non' naquech güen, še soacha' o še gata', le yebeda' gata' na' šjayzoa' len Criston', na' mbalazech soa' neda', še ca'.

²⁴ Perw lecze chona' xbab le'e chyažjele soacha' bancha'.

²⁵ Na' da' chache'eda' chyažjele soacha', nezda' soacha' len le'e cont gaclena' soachle mbalaz da' chejnilaže'le Criston' na' soačhačhle šejnilaže'lne'.

²⁶ Na' cate' yechoja' nga soacha' len le'e da' yoble, yebele güe'le diža' can' ben Cristo Jesús'en' cont bechoja' ližyan'.

²⁷ Na' bite'teze gac, le soa le gon da' güen can' cheyala' gon chio' ba bzenagcho che diža' güen che Criston'. Le gon ca' cont še yedena'a le'e o še bi yedena'a le'e, con che'nda' yenda' rson chele zoačhačhle len toze xbab, chonle txen len bene' lježle, na' chonle con ca zelao chzaque'le cont yezica'chle bene' yosozenague' xtiža' Criston' da' ba chejnilaže'le,

²⁸ neca žeble še bi yesone bene' le'e neche chesegue'ede' le'e. Še bi žeble da' yesonde' le'e, gonen cont yesache'ede' ba zoa yesebiaye'e toli tocane; lecze gonen cont yesache'ede' Diosen' gone' cont šjayzoale len le'. Yogo' da' ca' zjanaquen da' gon Diosen'.

²⁹ Na' Diosen' ba bsi'e xnezen' gacxen Criston', gague lagüe da' chejnilaže'lene' na'zen', san lecze gacxene' da' yosochi yososaca' bene' le'e neche chejnilaže'lene'.

³⁰ Le'e len neda', toz can' chosochi chososaca' bene' chio'; na' ba ble'ele can' bchejda' len da' ba gosonde' neda' cana', na' ba nezele can' chac chia' na'a.

2

Criston' chaxene' da' bzande' yela' zaca' che' cont bide' golje' benačh

¹ Nezda' zoale mbalaz da' chejnilaže'le Criston', nezda' chaclaže'le gonle da' güen lagüe dan' chaque Criston' le'e, nezda' zoa Spiritw chen' len le'e, na' nezda' chaque lježle na' cheyaše'laže'lene' cate' bi da' chesac che'.

² Da'n'an' chņeyoeda' le'e, le gon cont yebechgüeda' nezda' lecze yogo'czle nacle toz len lježle, na' yogo'czle toz can' zoale chaquele Criston', toz can' chonle xbab, na' toz can' chaclaže'le gac.

³ Bibi cheyala' goncho cont gac güen che cuinzcho na' bibi goncho cont gacxen cuincho, san cheyala' gwzexjwlaže'cho na' goncho xbab zaca'ch bene' lježcho clel ca chio'.

⁴ Ne tocho bi cheyala' cue' yichjcho che cuinzcho, san cheyala' cue' yichjcho che dan' gaclenen bene' lježcho ca'.

⁵ Cheyala' goncho xbab ca xbab da' ben Cristo Jesús'en'.

⁶ Le la'czla' naque' Dios, bzande' yela' chnabia' che' na' yela' bala'añ xen che' dan' nape' lagüe da' naque' toz len Xe' Diosen' cont bide' golje' benačh.

⁷ Bzoe' to šla'ale yogo' da' zaca' dan' gota' che', na' ben cuine' bene' güen xšin Diosen' cate' golje' benačh.

⁸ Na' ba naque' benačhen' bzexjwlaže' cont bene' con can' gwna Xe' Diosen'. Bzenague' che' cont bnežw cuine' gosote'ne' le'e yag cruz ca chesote' bene' malchgua.

⁹ Da'n'an' Diosen' benxenchgüe' le' na' bsi'e xnezen' cont Jesucriston' naque' Xan benačh, angl da' xigüe' na' yogo' bichle da' de, na' cont Jesucriston' chnabia'che' ca note'tezechle.

¹⁰ Na' žin ža cate' yogo'lol benačh na' yogo'lol angl ca' yosozoa xibgaque' lao Jesucriston', bene' že' yaba, yežlion' na' gate'tezechle. Na' lecze ca' yeson da' xigüe' ca'.

¹¹ Yogo'lol bene' yo'o biš grasyw yosozexjwyichje' yesene' le Jesucriston' nape' la'zelagüe yela' gwnabia' xen. Na' Xancho Diosen' gacxene' cate' yogüe' yesene' ca'.

Bene' chesejnilaže' Criston' zjazacalebde' ca be'ni'

¹² Da'n'an' bene' migw, con can' ba gwzoale bzenagle chia' cate' gwzoa' len le'e, ca'czen' chonchen byen gwzenagle chia' na'a bi zoa' len le'e. To tole le gon cont nacbia' Diosen' ba bene' le'e yela' mban toli tocane, na' le soa cueze gwsaca'le gonle can' chazlaže' Diosen'. Le gon ca' do chžeble, le nezecho bi soecho da' malen' še ba chzenagcho chen.

¹³ Na' Diosen' chone' cont che'nele gonle can' chazlažen', na' chaclene' le'e chonlen.

¹⁴ Le gon yogo' dan' chazlaže' sin cbi gacyožlenlne', neca žeše'le che'.

¹⁵ Le gon ca' cont yesache'e bene' chonle can' chazlaže' Diosen' sin cbi doła' gaple. Bibi da' xinj gonle. Bi gonle ca cheson bene' laždao' mal ben' chesonchgua clele. Nach gacle ca to da' chšeni' len yezica'chle bene' že' yežlio nga,

¹⁶ güe'lenle legaque' xtiža' Criston' da' nsa' yela' mban toli tocane. Še gonle ca', nach cate' yid Criston' da' yoble, yebechgüeda' can' benlen' na' nezda' dan' bžaglagua' bena' xšin Diosen' gan' zolen', gague bendadzan'na'.

¹⁷ Le'e chzane cuinle chonle xšin Diosen' lagüe dan' chejnilaže'lene', na' da'n'an' zacalebde' ca to beyiže' be ba gosot bene' cont bosozeye'ba' gosonxene' Diosen'. Na' neda', chebeda' chzanda' yela' mban chia' cont gac doxen can' chazlažen', na' da'n'an' zacaleba' ca to vino da' chosolalje bene' lao Diosen' cate' chesonxene'ne'.

¹⁸ Le yebe len neda' da' chzane cuina' gac da' gac chia', na' le soa mbalaz can' zoa' neda'.

Timoteo na' Epafrodito

¹⁹ Zoa' lez gon Xancho Jesúsen' latje yob selá' Timoteo gan' zoalen', le yebechgüeda' yenda' can' ba chonlen'.

²⁰ Le nono nochle zoa bene' selá' bene' chi'chgua yichje' gac güen chele can' chi' yichj Timoteon'.

²¹ Yezica'chle bene' con zjachi' yichjgaque' che dan' chac chegaque', na' bi zjachi' yichje' can' chaclaže' Jesucriston' gac.

²² Perw nezezele ca zoacze Timoteon' chone' da' zaca', na' nezele can' ba goclene' neda' cont gwidxjue'eda' xtíza' Diosen' zan yež. Ca bene' chaque xe' zoe' chaclene'ne' len xšinen', can' zoa Timoteon' chaclene' neda'.

²³ Da'nán' zoa' lez guac sela'ne' gan' zoalen' cate' la' nezteda' nac gac chia' nga,

²⁴ na' selá'ne' la'czlá' chejli'a gon Xancho Criston' cont lecze neda' yob yedena'a le'e.

²⁵ Na' lecze chacda' chonen byen yesela' bene' lježcho Epafrodito gan' zoalen', ben' gwselá'le nga cont chaclene' neda' len bi da' chyažjda'. Ba bene' xšin Diosen' txen len neda', na' lecze ba gwdi gwxaca'to' txen.

²⁶ Che'nchgüede' yele'ede' le'e, na' leca da' chacde' gwnezele gocšende'.

²⁷ Na' da' li gocšenchgüede', yelate'ze ca gote', perw Diosen' beyaše'de' le', na' bi nacho toz le' beyaše'de', san lecze beyaše'de' neda' cate' beyone' le', le da' zan da' ba goc chia' na' nyaše'chgua goc chia' šaca' gote'.

²⁸ Da'nán' zelaže'cha' yesela'ne' gan' zoalen' cont soale mbalaz yežagle da' yoble na' cont bich soayaše'le che'.

²⁹ Le gwlebe' binlochgua da' naque' txen len chio' chejnilaže'cho Xancho Criston', na' le gon xbab ba bene' to da' zaca', na' lecze ca' le gon xbab che nochle bene' chon can' ba benen'.

³⁰ Le yelate'ze ca gote' da' bzane cuine' goclene' neda' nga len xšin Criston', can' goncze le'e šaca' zoale nga len neda'.

3

Soa cuezcho goncho can' chazlaže' Diosen'

¹ Na' na'a bene' migw, cheyala' soacho mbalaz da' chejnilaže'cho Xancho Criston'. Bi chacda' zed chozoja' che da' ca' ba bzoja', le chyažjen gonchle xbab čhen.

² Le gwsaca' cont bi gwzenagle che bene' ca' chesene' cheyala' soale seřw dan' že' circuncisión da' yesechogue' lo cuerp čhelen', le zjanaque' bene' zban na' chesyelalde' chesone' da' mal.

³ Le de to seřw čhecho cont nezecho naccho xi'in Dios. Seřwna' naquen da' ba beñ Diosen' chio' Spiritw čhen' cont chaclenen chio' chonxenčhene'. Chebechgüecho chejnilaže'cho Cristo Jesúsen', na' bi zoache lez gata' bichle da' gaclenen chio' lao Diosen', ca no seřw da' zoa lo cuerp čhechon' o bichle da' goncho.

⁴ De da' zan da' guac gona' xbab gaclenen neda' lao Diosen' šaca' chacda' yebe Diosen' neda' neče da' ba bena' o nac naca'. Nono zoa no nacho ba benche' da' zan da' yebe Diosen' ca neda'.

⁵ Le naca' bene' Israel na' golja' lo diaža che da' Benjamín, na' bosozoe' neda' seřw che circuncisión to xmanzda'. Na' goljlena' diža' hebreo da' nac xaxna'a bene' chesaque' diža' hebreo. Na' bsedyana' ley dan' bzoj da' Moisésen' con can' chosozejni'i bene' fariseo ca' len.

⁶ Na' leca gwche' yichja' diža' gole che bene' Israel gualaž chia'. Da'nán' bchi bsaca' bene' ca' chesejnilaže' Criston'. Na' con ga zelao gwzoeda' bzenaga' che yogo' dan' ža ley čheton' cheyala' gonto' o bi cheyala' gonto'.

⁷ Na' cana' bena' xbab yogo' da' ca' yesaclenen neda' cont yebe Diosen' neda', perw na'a ba chache'eda' bi yesaclenen. Ba bchojyichja' da' ca' cate' gwyejnilaža' Criston', le gočbe'eda' bi yesaclenen neda' lao Diosen'.

⁸ Na' na'a da' nombi'a Xana' Cristo Jesúsen' naquen da' zaca'chgua len neda'. Bibi zaca' yogo' da' ca' goda' cana' yesaclenen neda' lao Diosen'. Yogo' da' ca' bebeda' cana' ba zjanaquen ca to da' bibi zaca' len neda', na' nonan' ca to beb da' ba gwcho'ona' cont gombia'cha' Criston'.

⁹ Le zelaže'chgua' gaca' toz len Criston', na' zelaža' na Diosen' naca' bene' güen len le'. Na' nezda' ne' naca' bene' güen len le' da' chejnilaža' Criston', gague lagüe da' chona' bi da' ža ley dan' bzoj Moisésen' cheyala' goncho. Le con bene' chesejnilaže' Criston' none' legaque' ca bene' güen.

¹⁰ Chaclaža' gombia'cha' Criston' na' gombi'a yela' guac che' dan' nape' lagüe bebane' ladjo bene' guaten', na' chzanlaže' cuina' saca'zi'a can' gwdi gwxaca' le'. Na' ca Criston' gote' neče xtolan', chaclaža' gaca' ca to bene' guat len da' malen', bich gonan'.

¹¹ Zoa' chbeza' ca', le cheyiljwlaža' nacle gona' cont yečhis yosban Diosen' neda' ladjo bene' quat ca' cate' ba gota'.

Pablo chaclaže' gac yichjlažda'ogüe' can' nac yichjlaždao' Criston'

¹² Bi nia' bačh nac yichjlažda'ogua' can' cheyała' gaquen, le bina' gaquen can' nac yichjlaždao' Cristo Jesúsen'. Perw chona' con ga zelao saqueda' cont gaquech yichjlažda'ogua' can' nac che le', le ba gwleje' neda' naca' xi'ine'.

¹³ Bene' migw, nezda' bina' gac yichjlažda'ogua' can' cheyała' gaquen, perw ba bchojyichja' yogo' da' ca' gosac da' zaca' len neda' cana' na' yogo' bin' ba bena', na' chi' yichja' da' mbalaz da' chbeza' gac.

¹⁴ Chona' con ga zelao saqueda' cont Diosen' yebede' neda' cate' yežina' gan' zoen'. Le Diosen' gwleje' neda' cont gac yichjlažda'ogua' can' nac yichjlaždao' Cristo Jesúsen' lagüe da' chejnilaža'ne'.

¹⁵ Na' yogo'cho še ba zej chaccho can' chaclaže' Diosen' gaccho, cheyała' goncho xbaben' ca', na' še yo'ochi bichle xbab yoble, Diosen' gwzejni'iden' chio'.

¹⁶ Perw na' cheyała' soaczcho goncho can' ba bzejni'i Diosen' chio'.

¹⁷ Bene' migw, le gon can' chona' neda', na' le na' can' cheson yezičha'chle bene' cheson can' ba bzejni'ida' le'e, cont gonle can' chesonen'.

¹⁸ Da' yoble žia' can' ba gwnia' zan las, can' zjanita' bene' zan, nachbia' chesegue'ede' Criston' ben' bnežjw cuine' gote' le'e yag cruzen' neče xtoła'chon'. Na' chbeža' da' chesone' ca'.

¹⁹ Žin ža yesebiayi' bene' ca' toli točane, le chesyebchde' chese'ej chesagüe' cled ca yesonxene' Diosen'. Chesaclaže' cheso'e diža' che bi da' yela' zto' da' chesone', na' zjachi' yichje' tlaoze da' chac yežlio nga.

²⁰ Perw chio', bich choncho xbab nac lažcho yežlion', le nezecho naquen gan' zoa Xancho Jesucriston' ben' non' chio' yela' mban toli točane, na' chbezcho batcan' yide' da' yoble.

²¹ Na' caten' yide' da' yoble, gone' cont cuerp checho quinga da' bitečbi zaca' yesyeyaquen da' cobe, na' yesaqlen leca güen can' ba nac cuerp che le'. Gone' ca', le nape' yela' guac neče gone' cont yogo'lol' da' zjade yosozenaguen che'.

4

Cheyała' soacho mbalaz da' chejnilaže'cho Criston'

¹ Na' na'a bene' migw, chacda' le'e na' che'nchgüeda' le'e lježcho da' yoble. Chbechgüeda' da' chejnilaže'le Criston', na' zoa' mbalaz neče le'e. Le'e bene' chacda', le soačhač šejnilaže'le Xancho Jesucriston'.

² Na' chneyoeda' le' Evodia, na' leče ca' le' Síntique, le soašca binlo na' le gac txen tole yetole da' chejnilaže'le Xancho'.

³ Na' ca nac le' bene' lježa', len' beno' xšin Diosen' do yichj do lažo' txen len neda' cana', na' chneyoeda' gacleno' no'ol quinga yesyenite' binlo len lježe' da' yoble, le legaque' ba gosone' xšin Diosen' txen len neda' na' len Clemente na' len yezičha'chle bene' lježcho ca', na' zjanyoj la yogo' bene' ca' le'e libr che Diosen' gan' zjanyoj la bene' ba zjanape' yela' mban toli točane.

⁴ Le yebe yogo'te ža da' chejnilaže'le Xancho Jesucriston'. Da' yoble žia', le yebe.

⁵ Le gon cont yogo'lol' bene' yesenezde' nacle bene' šagüe', le ba zoa yid Xancho' da' yoble.

⁶ Bi gacle tole bite'teze da' chac chele, san le yol güiž Diosen', nable gaclene' le'e bite'teze da' chac, na' le güe'e yela' choxclen cate' bi da' nabelene'.

⁷ Nachen' Diosen' gone' soa cuezle binlo len xbab da' yo'o lo' yichjlažda'olen' lagüe da' chejnilaže'le Cristo Jesúsen', cont bi gacle tole. Na' cate' le' ba chone' cont zoa chbezcho binlo len xbab chechon', neca gacbe'echo bixchen' zoachguacho binlo.

Cheyała' cue' yichjcho che da' zjanac güen

⁸ Na' da' la'zelagüe dan' chaclaža' neyoeda' le'e bene' migw, cue' yichjle che diža' li, che dan' nac da' zaque', che dan' zej to licha, che dan' bibi da' mal nsa', che dan' naquen binlo, na' che da' zaca' yebecho. Bite'teze da' naquen da' güenchgua na' bite'teze da' chazlaže' Diosen', le cuec yichjle che dan' zjanac ca'.

⁹ Da' ca' bzejni'ida' le'e, yogo' dan' benele gwnia' cate' bsed blo'eda' le'e can' cheyała' gonle, na' da' ca' ba ble'ele chona' neda', da' ca' le gon. Na' Dios ben' chon cont chzoa chbezcho binlo len xbab da' yo'o lo' yichjlažda'ochon' soacze' gaclene' le'e.

Can' gosaclen bene' Filipos ca' Pablon'

¹⁰ Chbechgüeda' lao Xancho Cristo Jesúsen' da' ba chi' yichjle chaclenle neda' da' yoble. Nezda' gwzoale chonle xbab chia', perw bi benen gaclenle neda'.

¹¹ Na' žia' da' qui gague neče byažjda' da' ca' byažjda', le Diosen' ba bzejni'ide' neda' cont zoa' mbalaz cate' de da' chyažjda' na' cate' bibi de.

¹² Ba yolagua' yeḷa' yaše' yeḷa' zi', na' yolagua' yeḷa' šagüe'. Diosen' ba bzejni'ide' neda' cont zoa' mbalaz bite'teze chac chia', cate' de da' che'ej chagua' na' cate' chbiḷ chdona', cate' de bichle da' chyažjda' na' cate' bibi de.

¹³ Chac chona' bite'teze da' cheyaḷa' gona', ḷe zoa' Criston' len neda' chaclene'nda'.

¹⁴ Perw beḷe güen gwseḷa'le da' goclennen neda' cont naccho txen len dan' chyzi chzaca' nga.

¹⁵ Na' le'e zoale Filipos, nezele caten' beyož gwyejle'le diža' güen che Criston' dan' bia' len le'e, beḷe txen len neda' cate' beza' distritw Macedonian', gwseḷa'le da' byažjda', na' nono nochle beḷe' ca' chesedop chesežag chesonxene' Criston' yež yoble goson ca'.

¹⁶ Le cate' ne' zoa' Tesalónica gwseḷa'le da' byažjda' zan ni'a.

¹⁷ Perw gague chzelaža' bi da' gonḷe neda', san chzelaža' soacze gonḷe güen cont yebe Diosen' le'e.

¹⁸ Ba beḷe doxen da' cheyaḷa' gonḷe na' da' zcha'och ca'te' da' cheyaḷa' gonḷe. Ba decze da' zcha'o chia' na'a. Bibi chyažjda', le ba ben Epafrodito da' gwseḷa'le chia'. Na' da' gwseḷa'le zaca'leben ca to yal da' chḷa' ziḡ da' chzey bḡozen' lao Diosen', ḷe Diosen' chebede' can' benlen'.

¹⁹ Na' Dios chia' nan' goncze' yogo'te bi da' chyažjele lagüe chejnilaže'le Cristo Jesúsén', ḷe yogo' da' de yo'on ḷo ne'e.

²⁰ Cheyaḷa' gonxencho Xancho Diosen' toḷi tocaḇe. Can' gonščaczcho.

Pablon' zelagüe' bzede' legaque' diža'

²¹ Le gwguap tiox yogo'loḷ beḷe' Filipos ca' yo'o ḷo na' Diosen' da' chesejnilaže' Jesucriston'. Beḷe' ḷježcho ca' nita' nga len neda' chguapto' le'e tiox.

²² Na' lecze yogo' beḷe' Roma quinga ba yo'o ḷo na' Diosen' chosoguape' le'e tiox, lente beḷe' ca' cheson žin che rey ben' nac ḷa'zelagüe' beḷe' gwnabia' ben' chi' Roma.

²³ Xancho Jesucriston' soašque' gaclenšque' le'e len xbab da' yo'o ḷo' yičhḷažda'olen'. Da' na'zen' chzoja'.

CART DAN' BZOJ POSTLW SAN PABLO ĆHE BENE' CA' ŽE' COLOSAS

Pablon' chzoje' bene' chesonxen Jesucriston' ciuda Colosas

¹ Jesucriston' gwleje' neda' Pablo cont naca' postlw ĉhe', le can' chazlaže' Diosen'. Neda' t xen len bene' lježcho Timoteon' chguapto' le'e tiox.

² Chzoja' le'e zoale Colosas, le'e chejnilaže'le Criston' na' nacle lo na' Diosen'. Chnaba' gaclenšca Xacho Diosen' le'e na' gone' cont soa cuezle binlo.

Pablo chnabde' Diosen' gaclene' bene' ca' že' Colosasen'

³ Yogo' ni'a cate' choł güižto' Dios ben' nac Xa Xancho Jesucriston' choe'to' yela' choxc len ĉhe' can' chonlen'.

⁴ Le ba beneto' diža' can' chejnilaže'le Cristo Jesús en' na' can' chaquele yogo' bene' ca' yezica'chle zjanaque' lo na' Diosen'.

⁵ Na' nezeto' chejnilaže'lene' na' chaquele legaue' lagüe da' zoale lez šjayzoale len Diosen'. Caten' gwzola o bzenagle ĉhe xtiža' Diosen' da' naquen da' güen na' da' li, gwyejni'ile gac ĉhele ca'.

⁶ Na' xtiža' Diosen' da' ba bzenagle ba goslasen doxen, na' bene' zan ba chosozenague' ĉhen. Na' legaue' lecze chesone' güen ca gwzola o le'e chonle caten' gwyejni'ile diža' li da' chzejni'in nzi'ilaže' Diosen' le'e, na' ne' chonle güen ža na'aža.

⁷ Chaqueto' Epafras ben' bzejni'ide' le'e xtiža' Criston'. Chone' xšin Diosen' can' chon neto', na' zoateze' chone' can' ža Criston' da' chaclaže' gaclene' le'e.

⁸ Len' ba gože' neto' ba ben Spiritw ĉhe Diosen' cont chaquele Diosen' na' chaquete lježle.

⁹ Da'n an' caten' gwnezeto' ca güenna' chonle, gwzolaoto' yogo' ni'a cate' choł güižto' Diosen' chnabto'ne' gaclene' le'e. Chnabto' goñ Spiritw ĉhen' le'e yogo' cuen yela' sina' na' yela' chejni'i cont nezele nacyanen' chaclaže' gonle.

¹⁰ Chnabto' soale gonle can' cheyala' gon chio' nombia'cho Xancho n', cont yebede' yogo' dan' chonle. Na' chnabto' gaclene' gonle zan cuen da' güen na' gaclene' šejch gombia'ln'e.

¹¹ Chnabto' gac len Diosen' le'e len yela' guac xen ĉhe' cont soatezle šejnilaže'lene' na' gaple yela' chxenlaže' bite'tezen' chac.

¹² Na' chnabto' soale mbalaz güe'le yela' choxc len ĉhe Xacho Diosen', le le'na' ba gwleje' chio' ba naccho lo ne'e cont šjayzoacho len le' gan' yo'o be'ni' juisyw.

¹³ Bebeje' chio' lo na' gwxiyen' cate' da' cholen' ne' chnabian' yichjlažda'ochon', na' gwlo'e chio' lo na' Xi'ine' Jesucriston' ben' chacde', cont na'a gwzenagcho ĉhe le'.

¹⁴ Na' Xi'in Diosen' bnežjw cuine' gote' cont beque'e xtoła'chon' na' chezi'xen Diosen' ĉhecho.

Criston' bozoe' chio' binlo len Diosen'

¹⁵ Criston' naque' cayanen' nac Xe' Dios ben' nono chle'e. Ba zoacze Criston' cate' bina' xe yežlion' na' cate' bina' gata' yogo'loł da' de le'e yaban' na' lo yežlion'.

¹⁶ Criston' bene' yaban' na' yežlion', bene' bene' že' yaba na' yežlio, len bica'chle da' zjade yaban' na' yežlio nga. Bene' da' ca' chle'echo na' da' ca' bi chle'echo. Bene' cont nita' angl gwnabia' ca' na' da' ca' besyeyac da' xigüe' ca' na' bichle da' ca' chesenabia' yichjlaždao' bene' ca' bi chosozenag ĉhe Diosen'. Na' Criston' bene' cont nita' bene' ca' na' yogo' da' ca' cont gacxene'.

¹⁷ Criston' ba zoacze' cate' bina' nita' yogo'loł da' de le'e yaban' na' lo yežlion'. Na' yogo' bite'teze da' zjade zjanaquen con can' zjanaquen, le Criston' zoacze' chone' cont zjanaquen ca'.

¹⁸ Na' Criston' chnabi'e chio' chdop chžagcho chonxenchone'. Len' bxie' yela' mban toli tocan'e ĉhe bene' chesejnilaže'ne', na' naque' bene' nechw bebane' ladjo bene' guaten' ben' bich nabia' yela' goten' le'. Da'n an' naque' la'zelaogüe bene' blao na' chnabi'e yogo'loł bene' na' bica'chle da' zjade.

¹⁹ Na' Diosen' chazlaže' dan' nac yichjlaždao' Criston' cayanen' nac yichjlaždao' le' na' dan' nac yela' guac ĉhe Xi'ine' Criston' doxen can' nac yela' guac ĉhe le'.

²⁰ Na' lecze chazlaže' yozoe' binlo len le' yogo' bene' že' yaban' na' yežlion', le Xi'ine' Criston' bnežjw cuine' blalj xchene' le'e yag cruzen' cont gac yesenite' binlo len le'.

²¹ Cana' bi nombia'le Diosen'. Bgüe'elne' na' gwzoale benle da' malen'. Perw na'a ba bozoa Criston' le'e binlo len Diosen',

²² le bnežjw cuine' neče chio' caten' gosote'ne'. Na' beyone' lažda'ochon' xilaže' cont bibi dola' gapcho cate' yežincho lao Diosen', na' bibi de da' zaca' yosociše' chio' lagüen'.

²³ Na' še soacho šejnilaže'cho Criston' na' soačhačho len toze xbab, na' soateze soacho lez šjayzoacho len Diosen' can' gwzelaže'cho gac checho cate' bzenagcho xtižen' da' nechw, nachen' bibi doła' gapcho cate' yežincho lao Diosen'. Na' diža' güen čhen' ba bžinen doxen yežlion' cont beñačen' chesenden', na' Diosen' gwleje' neda' Pablo chyixjue'edan'.

Diosen' gwleje' Pablon' cont bsed blo'ede' bene' chesonxen Criston'

²⁴ Da' zan da' chyi chzaca' lagüe da' chyixjue'eda' xtiža' Diosen' len le'e bi nacle bene' Israel. Na' le'e chdop chžagle chonxenle Criston' nacle ca cuerp che'. Na' chbeda' chžaglagua' yogo' da' chaclaže' Criston' žaglagua' da' gaclenen le'e. Na' cate' chžaglagua' neda', guac načo cuin Criston' chžaglagüe'.

²⁵ Diosen' gwleje' neda' chyixjue'eda' xtižen' len le'e chdop chžagle chonxenle Criston', cont gwzejni'ida' le'e doxen can' zeje xtižen'.

²⁶ Cani' nono na' neze da' güen da' chon Diosen' len bene' chesejnilaže'ne', perw na'a Diosen' ba bzejni'iden' chio', chion' naccho lo ne'e.

²⁷ Diosen' chaclaže' nezecho leca güen juisyw chone' len note'tezcho chejnilaže'chone', la'czla' bi naccho bene' Israel. Cana' nono gwneze gone' da' güen juisyw len note'tezcho, perw na'a Diosen' ba bzejni'ide' chio' zoacze Criston' len chio' chejnilaže'chone' na' da'nan' zoacho lez šjayzoacho len Diosen' gan' yo'ochgua be'ni'.

²⁸ Choe'lena' yogo' bene' diža' che Criston', chata'yoeda' yogüe' yosozenague' che', na' chzejni'ida' yogüe' xtižen' cont yesejni'iden' binlo, le chaclaža' yogo' bene' chesejnilaže' Criston' yesaque' cayanen' chaclaže' Diosen'.

²⁹ Da'nan' chona' con ga zelao chozoda' chyixjue'eda' bene' xtižen', na' chaclenčgüe' neda' len yela' guac xen čhen'.

2

¹ Chaclaža' nezele chončgua' ga zelao chozoda' cont chaclena' le'e na' bene' lježcho že' Laodicea na' yezica'chle bene' lježcho biña' yesele'ede'nda'.

² Chaclaža' gona' chač laže'le cont yichjlažda'olen' yesaquen toze lagüe da' chaque lježle. Na' chaclaža' nezeyane'le can' cheyala' gonle xbab cont šejni'ile da' ba bzejni'i Diosen' chio' che Criston' da' nono gwneze cani'.

³ Criston' nse'e doxen yela' sina' na' yela' chejni'i che Diosen' cont gwzejni'iden' chio'.

⁴ Chnia' ca' cont nono siye'e le'e len diža' da' chaque naquen xdan.

⁵ Na' la'czla' bi zoa' na'le len le'e, zoa' chona' xbab chele na' chebeda' nezda' chonle can' cheyala' gonle na' zoačhačhle chejnilaže'le Criston'.

⁶ Na' na'a, con can' ba gwzolaole chejnilaže'le Criston' na' ba nonlene' Xanle, con can' soačhačhle len le'.

⁷ Le soačhač le šejnilaže'ch Criston' can' ba bsedlena', cont gacle ca to yag da' ba gwyaz loen sitjw. Na' le soa le güe'čgua yela' choxclen che Diosen' can' chaclene' le'e.

Criston' ba bocobe' yichjlažda'ochon'

⁸ Le gwsaca' cont nono co'oyele' le'e gwzenagle che diža' sina' che yežlio nga da' naquen da' güenlaže'. Bene' že' yežlion' chosozejni'ide' da' zan da' chesene' cheyala' goncho da' bibi jazaca', na' bitw chosozejni'ide' che Criston'.

⁹ Yichjlaždao' Criston' naquen' cayanen' nac yichjlaždao' Diosa', na' nac yela' guac che Criston' doxen can' nac yela' guac che le'.

¹⁰ Na' Criston' chnabia'che' ca note'teze angl blao na' ca note'teze da' xigüe', na' chio', da' chejnilaže'chone', bich bi chyažjecho cont soa cuezcho binlo.

¹¹ Na' lecze da' naccho txen len Criston' de to checho da' zaca'leben ca señw da' že' circunsióñ, perw bi naquen señw da' bzoa bene' lo cuerp chechon', san da' ba bocob Criston' yichjlažda'ochon' cont da' malen' bich chnabian' chio'.

¹² Na' da' gwzoacho nis caten' gwyejnilaže'chone', zejen con can' got Criston' neče xtoła'chon', lecz ca' chio' ba naccho ca to bene' guat len da' malen' cont bi gonchon. Zejen bgaše'cho can' bgašen', na' lecze zejen bechis bosban Diosen' chio' ladjo bene' guat ca' can' bene' len Criston'. Zejen ca' le chejle'cho Diosen' bosbane' Criston' len yela' guac čhen'.

¹³ Cana' gwxaca'lebocho ca to bene' guat len yichjlažda'ochon' da' bi bzenagcho che Diosen' na' gwzoacho bzenagcho che da' malen'. Nach Diosen' bene' len chio' can' bene' bosbane' Criston' ladjo bene' guat ca', le bocobe' yichjlažda'ochon' na' bezi'xene' xtoła'chon'.

¹⁴ Bi bencho yogo'lol can' ža ley che Diosen' cheyala' goncho, na' bencho da' žan bi cheyala' goncho. Da'nan' gota' xya checho len leyna' na' nchoglaon checho saca'zi'cho toli tocane. Perw Criston' bnežjw cuine' bosode'ene' le'e yag cruza' neče doła' xya chechon', na' da'nan' nezecho Diosen' ba bñitlagüe' xtoła'chon'.

¹⁵ Criston' cate' gote' le'e yag cruza' beque'e yela' gwnabia' che da' xigüe' ca' na' blo'ede' beñačen' ba blej bšošen'.

Cue'yichjcho che da' ca' zjazacan' len Diosen'

¹⁶ Bi gwzenagle che bene' ca' chesena chonle mal che'ej chagwle bi da' che'ej chagwle, o bene' chesene' chele da' bi chonle no za lni, o bene' chesena qui ca' goncho cate' naquen bio' che'en, o bene' chesena za ni za na' nac za che Dios.

¹⁷ Yogo' da' ca' con bosozejni'in late'lasze che Criston', perw na'a da' bid Criston' bich chyažjecho da' ca', le ba nombia'chone'.

¹⁸ Bi gwzenagle še no bene' chzejni'ide' cheyala' gon cuinle ca to da' bibi zaca' cont soale binlo len Diosen', o bene' chzejni'ide' cheyala' gonxenle no angl o gonle bi da' že' ble'edagüede', le bi chebe Diosen' bene' cheson da' ca'. Bene' ca' chosozejni'ide' ca' chesacde' xbab da' chesaljaže' zaca'chguan, len bitw bi zacan',

¹⁹ le bi chosozenague' che Criston'. Perw chio' chdop chžagcho chonxenchone', Diosen' none' cont Criston' chnabi'e chio' ca' yichjchon' chnabian' cuerp chechon'. Na' naccho txen len le' na' len bene' lježcho ca to cuen güeje cuerp chechon' ngoden' txen, le xpela'chon' na' bechj bnia' ca' zjanoxen' len con ca non Dios chegaguen.

²⁰ Chio' naccho txen len Criston', guac nacho Criston' ba none' chio' ca to bene' guat len da' xinjen' cont bi gonchon, ca bene' guaten' goc le' le'e yag cruzen'. Da'n'an' bi cheyala' gwzenagcho cate' chesena bene' da' zan da' goncho cont soacho binlo len Diosen', le bi naccho bene' che yežlion'. ¿Bixchen' chzenagle che yela' sina' che yežlio nga da' ca' chesene' cheyala' gonle na' da' ca' chesene' bi cheyala' gonle?

²¹ Chesene': "Bi goxe'le da' nga", "Bi ye'ej gagwle da' na'", "Bi canle da' na'".

²² Na' yogo' da' ca' chesene' bi goxe'cho, bi ye'ej gagwcho na' bi cancho, da' chesede chen cate' chchinchon, na' dan' chesene' cheyala' goncho len da' ca', con xbab chegaczen'.

²³ Guacte goncho xbab nac da' sina' da' chesene' cheyala' goncho, na' goncho xbab gaclenen chio' gonxencho Diosen', le chesene' cheyala' gwchi gwsaca' cuincho na' gon cuincho ca to da' bibi zaca'. Perw bibi zejen goncho ca', le bi chaclenen chio' cont bitw gwzenagcho che da' malen'.

3

¹ Can' bechis bosban Diosen' Criston' ladjo bene' guat ca', lecze can' bocobe' yichjlažda'ochon'. Da'n'an' cheyala' cuec yichjcho goncho can' chazlaže' Diosen' na' cuec yichjcho gac can' chebe Criston' ben' zoa yaba chnabi'e txen len Diosen'.

² Na' cheyala' yebecho da' naquen da' zaca' len Diosen', gague da' naquen da' zaca' len benachen'.

³ Le guac nacho Criston' ba none' chio' ca to bene' guat len da' malen' cont da' malen' bich nbian' chio', na' mbancho len Criston' na'a cont naccho txen len Diosen'.

⁴ Criston' none' chio' yela' mban toli tocañe. Na' cate' le' yide' da' yoble, šjayzoacho txen len le' gan' yo'ochgua be'ni'.

Can' bencho cana' na' can' cheyala' goncho na'a

⁵ Da'n'an' cheyala' cuejyichjcho da' mal da' žan goncho len cuerp chechon' dan' nac che yežlio nga. Bitw gata'lencho no'ole bi nac no'ol checho o bene' byo bi nac bene' checho. Bitw goncho bichle da' yela' zto' len cuerp chechon' neca yebecho bi da' nac da' yela' zto'. Bitw selaže'cho goncho bite'teze da' mal, neca selaže'cho da' zan da' gata' checho, le toz ca malen' nac yela' chzelažen' len da' cheson bene' chesejnilaže' l' gua'a lsaca' ca'.

⁶ Žin ža cate' Diosen' gone' cont bene' cheson da' ca' yesezaca'zi'e toli tocañe.

⁷ Le'e lecze gwzoale cana' benle da' mal ca' ba gwnia'.

⁸ Perw na'a cheyala' cuejyichjle yogo' da' mal. Bitw ža'a lježle, bitw locle, bitw gacle bene' xi'a len lježle, bitw nele che lježle, na' bitw güe'le diža' zban.

⁹ Na' bich güe'len lježle diža' güenlaže'. Ba gwlejyichjle da' mal da' gwnabia' yichjlažda'olen' cana' na' bich cheyala' gwzenagle chen da' yoble.

¹⁰ Ba chzenagcho che Dios ben' ben chio', le ba bocobe' yichjlažda'ochon'. Na' tža tža chzejni'ide' chio' cont zej chacch xbab chechon' can' nac chen'.

¹¹ Na' chio' ba bocob Diosen' yichjlažda'ochon', bibi nonen še naccho bene' Israel o še bi naccho. Bibi nonen še zoacho señw da' že' circuncisión o še bi zoachon, na' bibi nonen še naccho bene' zito', la'czla' še za'cho gan' že' bene' bi chesejni'i, na' bibi nonen še naccho esclavo o še bi naccho. Da' naquen da' zeje, ba chejnilaže'cho Criston' na' len' zoe' len yogo'cho.

¹² Diosen' gwleje' chio' cont naccho lo ne'ena' na' chacde' chio'. Da'n'an' cheyala' yeyaše'cho bene' na' gaccho bene' šagüe' len yogo'lol bene'. Bi cheyala' ga'laže'cho, san gaccho bene' chzejwlaže' na' gapcho yela' chxenlaže' len yogo'lol bene'.

¹³ Na' cheyala' gwdecho ca'ale še bi chac checho len bene' lježcho na' yezi'xencho še bi da' ba gosonde' chio', yezi'xencho con can' ba bezi'xen Xancho Criston' checho.

¹⁴ Na' yeto da' zejechen goncho ca yogo' da' ca', cheyała' gaque lježcho, le še chaque lježcho gaclenen goncho yogo' da' ca' can' cheyała' gonchon.

¹⁵ Diosen' gwleje' chio' cont soa cuezcho binlo, na' cheyała' gwzenagcho che Criston' na' gacbe'echo yogo'cho naccho toze cont soa cuezcho binlo. Na' lecze cheyała' soacho güe'cho yela' choxclen che Diosen'.

¹⁶ Cheyała' soacho goncho xbab che xtiža' Criston' na' gwzenagcho chen, na' lecze soacho gwzejni'i lježcho na' neyoe lježcho len doxen yela' sina' che Diosen' cont yogo'cho goncho da' güen. Na' cheyała' golcho no salmos, no himnos, na' bichle da' ža Spiritw che Diosen' golcho, na' güe'cho yela' choxclen che Diosen' lo' yichjlažda'ochon'.

¹⁷ Na' bite'teze da' goncho na' bite'teze diža' güe'cho, cheyała' nabcho gaclen Xancho Jesúsén' gonchon can' chazlaže', na' güe'cho yela' choxclen che Xacho Diosen' con can' chaclen Xancho Jesúsén' chio' chonchon'.

Can' cheyała' goncho len lježcho

¹⁸ Le'e no'ole nšagna'le, to tole le gwzenag che bene' chele, le can' cheyała' gon chio' chejnilaže'cho Xancho Criston'.

¹⁹ Na' le'e bene' byo nšagna'le, to tole le gaque no'ol chele na' bi gonle znia len legaue'.

²⁰ Na' le'e bi' bixjw, le gwzenag che yogo'lol bi da' yesena xaxna'le, le can' chazlaže' Xancho Criston' gonle.

²¹ Na' le'e nacle xaxna' bi' bixjw, bi gonle cont yeseloc bi' chele ca', le še gonle ga yeselocbe', yesaquebe' zdebe yosozenagbe' chele.

²² Na' le'e chonle xšin bene', le gwzenag yogo'lol can' ža xan žinna' gonle. Bitw gonlele xan žinna' gonle ca' bene' chonchgua žin cate'zen' chne'e le'e, san le gon žinna' do yichj do laže'le da' chejnilaže'le Diosen'.

²³ Na' bite'teze da' gonle, le gonen do yichj do laže'le cont yebe Xancho Criston', gague contze yebe bene'.

²⁴ Nezczele Xancho Criston' gone' cont yežincho gan' zoen' še soacho goncho can' chazlažen'. Na' zoacho cont goncho con can' ža Xancho Criston'.

²⁵ Na' note'tezcho še bi choncho can' cheyała' goncho, Xancho Diosen' gone' saca'zi'cho neče dan' ba bencho. Na' toz can' chon Diosen' len yogo'lol bene'.

4

¹ Na' le'e nacle xan žin, le gon güen na' le gac bene' šagüe' len bene' cheson xšinlen', le nezczele Criston' ben' zoa yaban' naque' Xanle.

² Yogo'te ža cheyała' nabcho gaclen Diosen' chio' len da' choncho na' len bichle da' chac checho, na' cheyała' güe'cho yela' choxclen che', na' bi cheyała' güedcho yol güižcho Diosen'.

³ Na' le nabe Xancho Diosen' gone' cont gac güe'lento' bene' xtiža' Criston' da' biña' yesejni'ide', le neče dan' ba bia' xtiže'n'an' dia' ližya nga.

⁴ Na' le nabe Diosen' gaclene' neda' gwzejni'ida' bene' diža' güen che Criston' binlo cont yesejni'iden'.

⁵ Cheyała' soacho goncho güen len bene' biña' yesejnilaže' Criston' na'a šlac de latje.

⁶ Na' cheyała' güe'cho diža' šagüe' diža' da' zejen len yogo'lol bene', na' cheyała' goncho xbab nac yoži'icho xtiža' yogüe'.

Pablo chguape' bene' miğw che' ca' tiox

⁷ Bene' lježcho Tíquico ye'e le'e yogo'lol can' chac chia'. Chaquechone', le zoacze' chaclene' neda' can' cheyała' gone' na' chone' xšin Xancho Criston' txen len neda'.

⁸ Ba gwseła'ne' gan' zoalen' cont nezele can' chac cheto' na' cont gone' chač laže'le.

⁹ Na' txen len le' zeza' bene' lježcho Onésimo ben' nac bene' gualaž chele. Zoacze' chejnilaže' Criston' can' cheyała' gone' na' chaquechone'. Legaue' yese'e le'e yogo' da' ba chac nga.

¹⁰ Aristarco die' ližya nga txen len neda', na' le' chguape' le'e tiox. Na' lecze Marcos ben' nac biše' ljež Bernabé chguape' le'e tiox. Ba gwnia' can' cheyała' gonle güen len le' cate' le'e gan' zoalen'.

¹¹ Nach Jesús ben' lecze le' Justo lecze chguape' le'e tiox. Šonze bene' Israel ca' chesaclene' neda' len da' chona' cont bene' zan yosozenague' che Diosen' na' nabi'e yichjlažda'ogaquen'. Ba gosonchgüe' chač laža' can' ba gosaclene' neda'.

¹² Nach lecze bene' gualaž chele Epafras chguape' le'e tiox. Chone' xšin Criston' na' yogo' ni'a cate' chol güiže' Diosen' chnabchgüe' gwzejni'i Diosen' le'e yogo'lol da' chaclaže' gonle cont soachachle gonlen na' gacle cayanen' chazlaže' Diosen'.

¹³ Che'nda' nezele zoateze' chol güiže' Diosen' neče le'e chejnilaže'le Criston' le'e nita'le Colosas, Laodicea na' Hierápolis.

¹⁴ Nach Lucas ben' chon rmed, ben' chaquecho, chguape' le'e tiox na' lecze ca' Demas.

¹⁵ Le gwguapšca tiox bene' lježcho ca' že' Laodicea, len Ninfas na' bene' ca' chesedop chesežag chesonxene' Diosen' ližen'.

¹⁶ Na' cate' yeyož gwlabl cart nga, le gwnežjon bene' ca' chesedop chesežag chesonxene' Diosen' Laodicean' cont yosolaben'. Na' lecze le gwlab dan' gwsela' che bene' Laodicean'.

¹⁷ Na' le ye' Arquipo chneyoeda'ne' gwza'lagüe' gone' dołol xšin Diosen' da' gwlo'o Xancho Criston' lo ne'e gone'.

¹⁸ Cuincza' neda' Pablo chzoja' late' dao' da' nga le'e carten'. Bi ganlaže'le can' dia' ližya nga. Diosen' soašque' gaclenšque' le'e. Da' na'zen' chzoja' ņa'a.

CART NECHW DAN' BZOJ POSTLW SAN PABLO CHE BEÑE' CA' ŽE' TESALÓNICA

Pablo bzoje' beñe' Tesalónica ca' ben' chesonxene' Jesucriston'

¹ Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chñabto' lao Xacho Diosen' na' lao Xancho Jesucriston' yesaclene' le'e na' yesone' ca soa cuezle binlo len xbab dan' yo'o lo' yichjlažda' olen'.

Beñe' Tesalónica bosolo'ede' chesejle'e che Jesucriston'

²⁻³ Yogo' ni'a cate' chol güižto' Xacho Diosen' choe'to' yela' choxclen che' par yogo'le. Na' cate' chol güižto'ne' chjayza'laže'to' yogo'lo' da' güen dan' chonle dan' chejnilaže'le Diosen' na' chaquelne'. Na' chjayza'laže'to' can' zoachachle chbezle yid Xancho Jesucriston' yeto.

⁴ Nežeto' beñe' migw, Diosen' chacde' le'e na' ba gwleje' le'e cont nacle lo' ne'e.

⁵ Na' diža' güen da' bzejni'ito' le'e che Jesucriston' gague naquen con to diža'ze. Spiritw che Diosen' goclenen neto' bzejni'ito' le'e len yela' guac chen na' nežeto' diža' dan' bzejni'ito' le'e naquen da' li. Na' nezele can' bento' da' güen šlac gwzoato' len le'e cont goclento' le'e.

⁶ Na' le'e zoale chonle da' güen can' ba ben neto' na' can' ben Xancho Jesucriston'. Bzenagle dan' gwdixjue'eto' le'e che Jesucriston', na' Spiritw che Diosen' chonen cont chbele chzenaglen, la'czla' da' zan da' ba gwdi gwzaca'le dan' ba bzenagle chen'.

⁷ Na' da' zoale chonle da' güenna', beñe' ca' chesejnilaže' Jesucriston' distritw Macedonia na' distritw Acaya ba zjaņezde' naquen cheyała' yesone'.

⁸ Doxen ba bzenele beñe' xtiza' Xancho Jesucriston', gague beñe' že' Macedonia na' Acaya na'zen'. Na' ca'cze yogo'ze beñe' ba zjaņezde' can' chejnilaže'le Diosen', na' da'nan' bi chyažjen güe'to' diža' chele.

⁹ Na' beñe' zan cheso'e diža' ca güen beñle len neto' caten' bedena'to' le'e na' cheso'e diža' can' benle gwlejyichjle bich chejnilaže'le l' gua'a šsaca' chele ca', san na'a ba chejnilaže'le ben' nac dogualje Dios ben' zoa toli tocaņe.

¹⁰ Na' cheso'e diža' can' chbezle yetj Xi'ine' Jesúsen' yaban' yide' yežlio nga yeto, ben' bosban Diosen' ladjo beñe' guaten'. Na' dan' chejnilaže'cho Jesúsen' ba bosle' chio' cont bi saca'zi'cho cate' žin ža beñe' bi chosozenague' che Diosen' yesałe'chgüede' toli tocaņe.

2

Pablon' gwzoe' Tesalónican'

¹ Beñe' migw, le'e nezele dan' bedena'to' le'e goclenchguan le'e.

² Na' nezele can' gwdi gwzaca'to' cate' gwyejto' Filipos, na' can' gosezi'diža' beñe' ca' neto' dan' gwdixjue'eto' che Jesucriston'. Perw Diosen' goclene' neto' cont bi bžebto' gwdixjue'eto' diža' güen che' len le'e la'czla' beñe' zan bosožone' chixjue'eton'.

³ Dan' gota'yoeto' le'e gwzenagle che Diosen' bitw nacho bzejni'ito' le'e clele, neca go-claže'to' gonto' da' mal, na' neca bento' xbab gonleto' le'e.

⁴ San zoato' choe'to' diža' can' chazlaže' Diosen' ben' ba gwleje'nto' par chyixjue'eto' diža' güen che'na'. Na' chyixjue'eton' gague cont yebe beñe', san cont yebe Diosen' ben' neze bin' yo'o lo' yichjlažda' ochon'.

⁵ Nezele can' bento', ne tni'aze bina' gwpeto' le'e len xtiza'ton', na' neca benleto' le'e cont gonle cheto' bi da' de' chele. Cuiñ Diosen' nežde' can' naquen.

⁶ Na' neca cheyljwlaže'to' nacle gonto' cont yesonxen beñe' neto'. Neca nacho chaclaže'to' gonxenle neto', na' neca chaclaže'to' yezica'chle beñe' yesone' ca'. Zaca'to' gonto' ga gwzenagle cheto' la fuers da' gwseła' Criston' neto' choe'to' xtize'na', perw bitw chonto' ca'.

⁷ Nži'ito' le'e cacze no'ole šagüe' nži'ide' xi'ine' bi' chosgol chosča'ogüe'.

⁸ Na' dan' chaqueto' le'e, be'lento' le'e diža' güen che Diosen'. Na' gague da' na'zen' bento', leče bzanlaže' cuinto' bento' ga zelao gwzaque'to' cont goclento' le'e, le chaqueto' le'e.

⁹ Za'laže'czle beñe' migw, cate' gwzoato' len le'e benchguato' žin con ga zelao gwzoeto'. Bento' žin do ža do yel cont cbi bi gastw bzoato' le'e. Can' bento' gwdixjue'eto' le'e diža' güen che Diosen'.

¹⁰ Txenczen' nezele len Diosen' gwzoato' do laže'to' cate' gwzoato' len le'e chejnilaže'le Jesucriston'. Benczto' con can' chazlaže' Diosen' cont ne to cono gwna napt'o' dol'a'.

¹¹ Nezele can' gota'yoeto' le'e gonle da' güen na' can' bento' chach laže' to tole gonlen. Bento' can' chon to beñe' byo len xi'ine'.

¹² Bento' mandadw gonle da' güen ca cheyala' gon chio' naccho lo na' Diosen', le ba gwleje' chio' par nabia'cho txen len le' na' par gone' gac da' mba juisyw checho cate' šjayzoacho len le'.

¹³ Bate'teze choe'to' yela' choxcen che Diosen' dan' bzenagle xtiže'na' caten' gwđixjue'eton' le'e. Zache'ele bi naquen xtiža' benač, san naquen xtiža' Dios dan' choe'to'. Na' xtiža' Diosen' dan' chejle'le chša'an xbab dan' yo'o lo' yichjlažda'olen'.

¹⁴ Na' bene' migw, ba goc chele can' goc che bene' chesedop chesežag chesonxene' Jesucriston' zan part Judean'. Bene' Israel gualaž chegaque' bosochi bososaque' legaque', na' lecze can' bosochi bososaca' bene' gualaž chelen' le'e.

¹⁵ Na' bene' Israel ca' gosote' Xancho Jesucriston' con can' gosote' da' bene' gosole'ne' legaque' xtiža' Diosen' cani'. Na' lecze can' gosone' bosolağšibe' neto'. Na' ža na'aža ne' nite' chesone' da' bi chazlaže' Diosen' na' chesegue'ede' yogo'lo' benačen',

¹⁶ le chosožone' gwzejni'ito' yezica'chle bene' bi da' cheyala' goncho cont gata' yela' mban checho toli tocañe. Can' chesone' do tiemp choszanzch xto'la'gaquen' na' Diosen' ba chža'achgüe' legaque'.

Pablo goclaže' šjajne'e bene' nita' Tesalónica

¹⁷⁻¹⁸ Na' neto' bene' migw, cate' zoato' ga bi chle'e lježcho, chjayze'eto' le'e. Da'n'an' cate' ba goc sša biña' le'e lježcho ba chacžejaže'to' chele na' goclaže'to' yedena'to' le'e. Na' to chop ni'a godca' yida', perw Satanás dan' chnabia' da' xigüe' ca' bi benen latje.

¹⁹⁻²⁰ Chebeto' chonchuale güen na' da'n'an' zoato' lez soachguato' mbalaz cate' yid Xancho Jesucriston' da' yoble, le yebede' bzjeni'ito' le'e cont chzenagle che'. Da' li le'e chonle cont chbeto' na' cont zoato' mbalaz.

3

¹⁻² Na' bich gwzoeto' dan' bi chle'e lježchon'. Da'n'an' bechoglaže'to' gwsela'to' bene' lježcho Timoteon' gan' zoalen' na' neto' bega'anto' Atenas. Timoteon' chone' xšin Diosen' na' chone' txen len neto' chyixjue'eto' diža' güen da' chzejni'in bene' che Criston'. Gwsela'to'ne' bedeyata'yoede' le'e bi soayaše'le na' bedeyene' chach laže'le cont zoachachle chejnilaže'chle Criston'.

³ Gwsela'to'ne' gan' zoalen' cont ne tole bi gacžejaže'le bixchen' chyi chzaca'le. Ba nezele chio' chejnilaže'cho Criston' cheyala' saca'zi'cho lo yežlio nga.

⁴ Caten' gwzoalento' le'e bzeneto' le'e leca yosochi yososaca' bene' chio'. Na' nezele ba chac can' gwnato'na'.

⁵ Na' dan' bi gocxenlaža' dan' biña' la' rson chelen', nachen' gwsela' Timoteon' gan' zoalen' cont nezda' še do laže'le chejnilaže'le Criston'. Le bena' xbab godca' še ba gwzoe gwxiyen' benlen le'e. Le še ba benlen le'e, con bendadzeto' xšin Diosen' len le'e še ca'.

⁶ Perw na' bela' Timoteon' dan' bide' gan' zoalen' na' be'lene' neto' diža' güen, gwne' zoale chejnilaže'le Criston' na' chaquele yogo'lo' bene'. Na' lecze gwne' chjayze'ele neto' na' zelaže'le yežagcho da' yoble lecze can' chaclaže' neto'.

⁷ Ca'czen' bene' migw, chžaglaoto' na' chyi chzaca'to', perw ba beyacxenlaže'to' gwnezeto' can' zoateze zoale chejnilaže'le Criston'.

⁸ Da' li ba beyacxenlaže'to' na' zoato' mbalaz dan' zoachachle chejnilaže'le Xancho Criston'.

⁹ Na' da'n'an' leca chbeto' lao Diosen' can' chonle na' leca choe'chguato' yela' choxcen che' can' chonlen'.

¹⁰ Leca chol güižto'ne' do ža do yel chnabeto'ne' gone' ga yele'e lježcho da' yoble cont gwzejni'ichto' le'e na' šejchle šejnilaže'chlene'.

¹¹ Chnabeto' Xacho Diosen' len Xancho Jesucriston' yesone' latje yedena'to' le'e.

¹² Na' chnabeto' Xancho' gone' cont gaquech lježle tole yetole na' gone' ga gaquechle yogo' benačen' con catezen' chaqueto' le'e.

¹³ Chnabeczeto'ne' gone' cont soachachle šejnilaže'lene' na' gac lažda'olen' xilaže' lao Xancho Diosen' sin cbibi dola' gable cate' yid Xancho Jesús'en' da' yoble nche'e yogo'lo' bene' ba gwlej Diosa' cont zjanaque' lo ne'e.

4

Pablon' bzejni'ide' can' che'ne Diosen' yesezoa yesebeze'

¹ Na'a bene' migw, bač bsd blo'eto' le'e gonle can' chazlaže' Diosen', na' bač zoale chonle ca'. Na' can' ža Xancho Jesucriston' chata'yoeto' le'e na' chonto' mandadw šejchle gonchle dan' chazlaže' Diosen'.

² Ba nezczele bica' da' ca' bento' mandadw gonle na' zjanaquen con ca' ža Xancho Jesús'en'.

³ Diosen' chaclaže' soatez soacho gaccho bene' laždao' xilaže'. Bi chazlaže' gata'lencho no'ol bi nac no'ol checho o bene' byo bi nac bene' checho.

⁴ Chaclaže' neze to tole naquen' cheyała' soalen xo'ollen' sin cbi gapple doła' na' gonelene' ca bene' zaca'.

⁵ Bitw gonle can' cheson bene' bi zjanombi'e Diosen', con chesezoalene' no'olen' contze yesone' can' chzelaže' lažda'ogaquen'.

⁶ Ne tole bitw gonle da' bi cheyała' gonle na' siye' bene' lježle na' soalenle no no'ol che'. Ba be'czto' diža' bosniseto' le'e can' gon Xancho Diosen' cont yezezaca'zi'chgua bene' cheson bite'tez da' xinjen' zjanac ca'.

⁷ Diosen' gwleje' chio' cont gaccho bene' laždao' xilaže', gague cont goncho bi da' xinj da' zjanac ca'.

⁸ Da'nan' note'tez le'e še bi chzenagle che da' qui ba bzejni'ito' le'e, gague xtiza' benachen' chzoale ca'ale, san Diosa' chzoale ca'ale. Len' bene' chio' Spiritw chen' na' Spiriton' naquen laždao' xilaže'.

⁹ Bitw chyažžen gwzoja' le'e can' cheyała' gague ljež chio' chejnilaže'cho Jesucriston'. Dios nan' ba bsedde' le'e cont chaque lježle tole yetole.

¹⁰ Na' da' li ba chaquele yogo' bene' lježcho ca' nita' doxen Macedonian'. Na' chata'yoeto' le'e bene' migw, le gaguech legaue'.

¹¹ To tole le yeyiljwlaže' bi žin gonle cont soa cuezle binlo can' nonto' mandadw na' bitw tale gwgüia na'le bi cheson bene' yoble.

¹² Le gon can' ba gwnia' cont bene' bi zjanaque' txen len chio' yesache'ede' chonle güen, na' lecze cont bibi gac falt še bi dan' chyažj chchinele.

Can' gac cate' yid Criston' da' yoble

¹³ Bene' migw, chaclaže'to' nezele can' yesac che bene' gosejnilaže' Jesucriston' na' ba gosate'. Chaclaže'to' nezelen cont bi yegüine'le ca cheson bene' bi nita' lez šjasyezoe' len Jesucriston'.

¹⁴ Nezecho gosot bene' Jesúsen' na' bebane' ladjo bene' guat ca'. Lecze nezecho Diosen' gone' cont yid Jesúsen' da' yoble nche'e bene' ca' ba gosat con bene' gosejnilaže' le'.

¹⁵ Na' diža' nga chzeneto' le'e naquen dan' non Xancho Jesúsen' mandadw gwzeneto'. Chio' mbancho na'a chejnilaže'chone', še ne' mbancho cate' yide' da' yoble, bitw nacho yobch yežagchone' clel ca' bene' ca' ba gosat.

¹⁶ Na' ca nac Xancho Jesúsen', cuine' yetje' le'e yaban', na' ne' zižje gone' mandadw yesyeban bene' guaten', na' to angl blaona' ne', na' yenecho cuež trompeta che Diosen'. Nach bene' ca' ba gosat bene' gosejnilaže' Criston', legaue' zgua'tec yesyebane' ladjo bene' guaten'.

¹⁷ Na' ca yeyoža', chio' chejnilaže'chone' še ne' mbancho yežlio nga, gon Diosen' cont yeyepcho txen len legaue' le'e yaban' to lo' bejw na' yežagcho Xancho Jesúsen' le'e yaban'. Nach šjayzoacho len le' toli tocañe.

¹⁸ Da'nan' le gon chach laže' lježle tole yetole güe'le diža' can' gaca'.

5

¹⁻² Bene' migw, bitw chyažžen gwzoja' cont gwzenda' le'e bi ža bi hor yid Xancho Jesúsen' yeto. Nezele con yalzelaže'le žin ža žin hor can' chžin bene' gwban bene' chda šeže'le.

³ Na' šlac chesena bene': "Mba zoacho, bibi chac checho", cate' concze žin ža yesebiaye'e. Can' chac che no'ole cate' yalzelaže' chaque' bes che yela' san, ca'czen' zjajalzelaže' yesebiayi' bene' ca' bi chesejnilaže'ne'. Bitw gac yosoxonje'.

⁴ Perw chio' bene' migw, bi nchole yichjlažda'ochon', da'nan' bitw gac checho can' chac che bene' chzenyal gwbanna' le'.

⁵ Diosen' ba bzejni'ide' chio' nombia'chone' na' be'ni' chen' ba chsenin' len chio'; da'nan' bitw nchole yichjlažda'ochon'.

⁶ Cheyała' gonyañe'cho xbab naquen' chaclaže' Diosen' goncho na' nabia' cuincho goncho can' chazlaže'na'.

⁷ Bene' ca' cbi chosozenag che Diosen' zjazaca'lebe' ca bene' zjantas na' ca bene' chesezože.

⁸ Perw ba bzejni'i Diosen' chio' cont bi goncho can' chesone'na'. Da'nan' cheyała' nabia' cuincho goncho can' chazlažen'. Cheyała' šejnilaže'cho Diosen' na' gague lježcho na' yebecho dan' nezecho šjayzoacho len Diosen'. Še goncho yogo' da' ca' gaccho ca soldadw ben' nyaze' to de ya da' chcue'ejen le' cont bibi chac che' cate' chdile' len bene'.

⁹ Gague gwlej Diosen' chio' cont saca'zi'cho che xtoła'chon'. Gwleje' chio' cont šejnilaže'cho Xancho Jesucriston' na' šjayzoacho len le'.

¹⁰ Na' Jesucriston' bnežjw cuine' neche chio' cate' gosot bene' le' cont šjayzoacho len le' la'czla' še mbancho o še ba gotho cate' yide' da' yoble.

¹¹ Da'nan' le gonch can' ba chonle, le gon chach laže' lježle tole yetole na' le gaclench lježle cont soachachle šejnilaže'le Jesucriston'.

Pablon' bzejni'ide bene' chesejnlaže' Jesucriston' can' cheyala' yesone'

¹² Chata'yoeto' le'e bene' migw, gaple bala'an' bene' ca' cheson xšin Xancho Jesucriston' chosogüia chesene'e le'e na' chosozejni'ide' le'e naquen' cheyala' soa cuezle.

¹³ Gapchgualne' bala'an' na' gaquechgüele legaque' dan' chesone' xšin Diosen' do laže'. Na' le soa binlo len lježle tole yetole.

¹⁴ Ca'cze bene' migw, le tile bene' bi chesaclaže' yeson žin, le gon chach laže' bene' chesacde' zdebe chosozenague' che Jesucriston', na' le gaclen bene' bina' yesejni'ide' naquen' cheyala' yesone'. Le soa le gap yela' chxenlaže' len yogo'lol bene'.

¹⁵ Še bi da' mal cheson bene' len le'e, le gon byen bi yoži'ile da' mal len legaque'. Le yeyiljwlaže' naclen' gonle güen len lježle tole yetole na' len note'tez bene'.

¹⁶ Do tiemp le yebe.

¹⁷ Le soateze le soa le yol güiž Diosen'.

¹⁸ Le güe' yela' choxclen che Diosen' bite'tez da' chac chele, le da'nan' chaclaže' gon chio' chejnilaže'cho Cristo Jesúsen'.

¹⁹ Bitw gwžonle gon Spiritw che Diosen' can' chaclažen' gonen len le'e o len bene' yoble.

²⁰ Bi gwzoale ca'ale dan' chesena bene' cheso'e diža' dan' ba gož Diosen' legaque'.

²¹ Na' le gonyane' xbab che yogo'lol diža' da' cheso'e cont soale gwzenagle che da' nac güen.

²² Na' bitw gonle bite'tez da' nac da' mal.

²³ Diosen' chone' ca chzoa chbezcho binlo len xbab dan' yo'o lo' yichjlažda'ochon'. Na' chnabda'ne' gone' cont lažda'olen' gacyanen' xilaže'. Na' lecze gonšque' cont bibi da' mal gonle len yichjlažda'olen' neca len cuerp chelen' cont bibi doła' gaple caten' yid Xancho Jesucriston' yeto.

²⁴ Diosen' ben' ba gwleje' chio' cont naccho xi'ine' chone' con da' že' gone', na' da'nan' gone' cont gac lažda'ochon' xilaže'.

Pablon' gwnabe' gaclen Diosen' bene' Tesalónican'

²⁵ Bene' migw, le soa le nab gaclen Diosen' neto'.

²⁶ Na' cate' chežagle le gwnopa' na' lježle cont nachbia' chaque lježle.

²⁷ Chona' mandadw gwlable cart nga ga yesene yogo'lol bene' lježcho ca' nita' gan' zolna', le can' chaclaže' Xancho Jesucriston' gonle.

²⁸ Na' soateze Xancho Jesucriston' gaclenšque' le'e. Da' na'ze chzoja' na'a.

CART GWCHOPE DAN' BZOJ POSTLW SAN PABLO CHE BEÑE' CA' ŽE' TESALÓNICA

Pablon' bzoje' bene' Tesalónican' bene' chesonxen Jesucriston'

¹⁻² Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chñabto' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab dan' yo'o lo' yichjlažda' olen'.

Cate' yid Criston' da' yoble Diosen' gwnežjue' da' yezezaca'zi' bene' bi chosozenag che'

³ Bene' migw, neto' cheyala' soateze soato' güe'to' yela' choxclen che Diosen' che dan' chonlen'. Cheyala' gonto' ca' da' zejle chejnilaže' chle Diosen' na' zej chaquech lježle.

⁴⁻⁵ Da'n'an' chbeto' choe'to' xtiža' len' len yezica' chle bene' ba gwlej Diosen' na' chesežague' chesonxene' Jesucriston' ga yoble. Choe'to' diža' ca güen chonle dan' chyo chchejele chejnilaže' le Jesucriston' la' czla' da' zan da' chac chele na' chosoči chososaca' bene' le'e. Da'n'an' nezecho Diosen' zejzce' to' licha da' nchogbi'e zaca' le par yeyejele yaban' gan' zoe' chnabi'e.

⁶ Na' Diosen' zeje' to' licha da' gone' cont yezezaca'zi' bene' ca' chosoči chososaque' le'e.

⁷ Na' lecze zeje' to' licha da' gwcueze' yogo'te dan' chyi chzaca'chon'. Gwcuezen' cate' le'echo yetj Xancho Jesús'en' le'e yaban' len angl che' ca' bene' zjanse'e yela' guac che'. Yetje' nychjide' yi' bel.

⁸ Na' gwnežjue' da' yezezaca'zi' bene' ca' bi zjanombi'e Diosen', na' neca chosozenague' che diža' güen dan' chzejni'in che Xancho Jesucriston'.

⁹ Legaque' yezezaca'zi'e toli' tocañe. Gwbat šjasenyite' len Xancho Jesucriston' ben' nac bene' zaca' juisyw na' nape' yela' guac xen.

¹⁰ Cate' žin žan' yid Jesucriston' da' yoble, chio' chejnilaže' chone' na' naccho lo' ne'e gwlo'echo naque' bene' zaca' juisyw na' yebanecho catec bene' güen naque'. Nacto' txen len le'e da' ba chejle' le che diža' dan' be'lento' le'e.

¹¹ Da'n'an' zoatez zoato' chñabeto' Diosa' gaclene' le'e gonle güen cont yebede' ba gwleje' le'e par nacle xi'ine'. Na' chñabeto'ne' gaclene' le'e len yela' guac chen' cont yeyož gonle' yogo' da' güen da' ba gwchoglaole gonle' na' len bica'chle dan' che'nele gonle' dan' chejnilaže' lene'.

¹² Chñabto' gonle' cont Xancho Jesucriston' gacxene', na' le' gone' ga gacxenle txen len le', le Dios chechon' na' Xancho Jesucriston' nita'cze' chesaclene' le'e.

2

Choj ben' gonchgua güedenag len Diosen'

¹ Bene' migw, da' yoble chnia' le'e ca' gac cate' yid Xancho Jesucriston' yeto, yotobe' chio' šjayzoacho txen len le'.

² Chñeyoeto' le'e bitw gaczejlaže' le o žeble še no yid yedezejni'ide' le'e, ne' Spiritw che Diosen' žan ba bžin ža yid Jesucriston' da' yoble. Na' neca gaczejlaže' le še bi da' yenele o še la' no cart güenlaže' da' chesena bene' gwseja' neto', žan ba bžin ža yid Jesucriston'.

³ Bi güe'le latje no siye' le'e še bi yesene' o še bi da' yesone'. Le cate' za' yid Xancho Jesús'en' da' yoble, bene' zan yesase' yesyedabague' Diosen'. Lecze cana' choj to bene' blao bene' gonchgüe' güedenag len Diosen'. Benan' ba naquen yeyeje' lo' yi' gabilen'.

⁴ Gaque' bene' ya'laže' na' gue'ede' Diosen' na' lecze ca' gue'ede' bite'tezech da' chesejnilaže' bene'. Na' cui'e lo' yodao' blao gan' chesonxene' Diosen', gon cuine' ca' Dios cont yesonxen bene' le'.

⁵ Ži'Bi za'laže' le cate' gwzoa' len le'e bzejni'ida' le'e can' gac cate' yid Jesucriston' da' yoble?

⁶ Na' na'a nezezcle bi dan' chžon choj bene' blao ben' gonchgua güedenag len Diosen', perw cate' ba bžin ža bžin hor, cana' choje'.

⁷ Ba nita' bene' chesonchgüe' güedenag len Diosen' na'a, perw ne' ngaše' can' chesone'. Na' gwžin ža cate' bich soa dan' gwžon yesyedabaga' chgüe' Diosen'.

⁸ Cana' chen' choj bene' blaon' ben' gonchgua güedenag len Diosen'. Nach Xancho Jesús'en' yide' nychjhgüede' be'ni', na' cate' bene' blaon' le'ede' le' nach Xancho'n' güe' e diža' na' ši'en goten le'. Can' gone' yonitlagüe' ne'.

⁹ Na' cate' choj bene' blaon' ben' gonchgua güedenag len Diosen', Satanás dan' chnabia' da' xigüe' ca' gonen cont gapchgüe' yela' guac, na' gone' da' yesyebane bene' contze gonlede' legaque'.

¹⁰ Yogo'te da' mal gone' gonlede' bene' ba naquen yesebiaye'e toli tocanē. Yesebiaye'e da' bi chesejle'e diža' lin', le lena' zaca' yesejle'e cont gata' yela' mban chegaque' toli tocanē.

¹¹ Na' da'nān' Diosen' güe'e latje yeseziye'e legaque' cont yosozenague' diža' güenlaže'.

¹² Nach yezezaca'zi'e toli tocanē da' bitw gosejle'e diža' li che Xancho' san besyebede' da' malen'.

Diosen' chbeje' bene' na' chone' cont gac šjasyenite' len le' toli tocanē

¹³ Bene' migw, chaque Xancho Jesucriston' le'e. Na' neto' cheyala' soatez soato' güe'to' yela' choxclen che Diosen' da' gwleje' le'e cate' biña' xe yežlion' cont šjayzoale len le'. Na' cate' gwzolao chejle'le diža' li che Diosen' nach gwsele' Spiritw chen' chonen cont nacle bene' laždao' xilaže'.

¹⁴ Neche da'nān' gwlej Diosen' le'e, na' dan' gwyejle'le diža' güen che Jesucriston' da' be'lento' le'e, žin ža gon Diosen' cont soale mba juisyw can' zoa Xancho Jesucriston'.

¹⁵ Da'nān' bene' migw, le soa chačh le gwzenag do yichj do laže'le che dan' bzejni'ito' le'e, diža' dan' ba be'lento' le'e na' dan' ba bzojto'.

¹⁶⁻¹⁷ Xacho Diosen' chacde' chio'. Gague da' te che dan' bene' cont beyone'xenlaže'cho, na' zoacho lez gonche' güen len chio', le nži'ilaže'de' chio'. Na' chnabda' cuin Xancho Jesucriston' len Xacho Diosen' yesone' chačh laže'le na' yesaclenšque' le'e cont yogo' da' gonle na' diža' da' güe'le yesaquen güen.

3

Gwnab Pablon' yosoļ güiže' Diosen' gaclene' le' len bene' lježe' ca'

¹ Na'a bene' migw, yol güižšcale Diosen' gaclene' neto' cont yob šjadixjue'to' che Xancho Jesucriston' doxen, na' cont bene' yezica'chle yesebete' yosozenague' can' ba ben le'e.

² Lecze nabšquele Diosen' yosle' neto' lo na' bene' mal bene' cheson clele, le gague yogo' bene' chesejnilaže' Jesucriston'.

³ Xancho Jesucriston' zoatez zoe' chone' can' že' gone', na' gaclene' le'e cont soačhačhle šejnilaže'lene'. Na' lecze gwcuas gwcue'eje' le'e len da' malen'.

⁴ Na' nezeto' chaclencze' le'e cont chonle da' ba bento' mandadw gonle na' cont nita'czle gonlen.

⁵ Chnabda' Xancho Jesucriston' gone' cont nezele catec chaque Diosen' chio'. Na' lecze chnabda'ne' gone' cont gwyo gwčhejle len da' chy chzaca'le can' gwzoa Criston' byo bcheje' len da' gwdi gwxaque'.

Pablon' bene' mandadw yesone' žin

⁶ Bene' migw, chzeneto' le'e can' chon Xancho Jesucriston' mandadw, bi cheyala' gonle txen len note'tez bene' lježchon' bene' bi chesaclaže' yesone' žin, le bi chesone' ca nac da' bsd blo'eto' legaque'.

⁷ Neto' benczto' žin cate' gwzoato' len le'e, na' da'nān' nezele can' cheyala' gonle.

⁸ Cuent cheto' güe'ej gwdagwto'. Bžaglaoto' bento' žin do ža do yel cont güe'ej gwdagwto', na' bi gwnabeto' le'e da' byažje bchineto'.

⁹ Zaca'czto' ša gwnabeto' le'e da' ye'ej gagwto' cate' bento' xšin Diosen' gan' zoalen', perw bi goclaže'to' gonto' ca', le goclaže'to' gwlo'eto' le'e ca cheyala' gonle.

¹⁰ Caten' gwzoato' len le'e bžiato' bia' gwnato': "Še no bi gon žin, bi cheyala' gagüe'."

¹¹ Perw na' ba beneto' diža' chesene' balle bitw bi žin chonle, con chdale chacle diža'.

¹² Na' še nole chonle ca', chata'yoeda' le'e na' chona' mandadw gonle can' ža Xancho Jesucriston', bich tale ca', san le yezolaošaze le yeyon žin cont gac si'le da' ye'ej gagwle.

¹³ Na' le'e bene' migw, bitw yeche'ele gonle da' güen.

¹⁴ Na' še no bene' chon güedenag len dan' ba bzojto' nga, le gon xbab non' chon ca' na' bich gonle txen len le' cont gacde' zto' che dan' chone'na'.

¹⁵ Perw bitw gue'elne', san gwzejni'ilne' diža' šagüe', le naque' bene' lježcho.

Pablon' gwnabde' Diosen' gaclene' bene' Tesalónica

¹⁶ Na' chnabda' Xancho Jesucriston' ben' chone' cont soa cuezcho binlo len xbab da' yo'o lo' yichjlažda'ochon', gonščacze' cont soa cuezle ca' yogo'te ža bite'teze da' chac. Len' soaščacze' len yogo'le.

¹⁷ Na' cuincza' neda' Pablo chzoja' late' dao' le'e cart nga chguapa' le'e tiox. Can' chonca' len yogo' cart dan' chsela' cont nachbia' nedan' chselan', le ba nombia'le letr chian' can' chzojan'.

¹⁸ Xancho Jesucriston' gaclenšque' yogo'le. Da' na'zen' chzoja' na'a.

CART NECHW DAN' BZOJ POSTLW SAN PABLO CHE TIMOTEO

Pablo chzoje' cart che Timoteo

¹ Neda' Pablo chzoja' cart nga chio' le' Timoteo. Naca' postlw che Jesucriston', le' Diosen' len Xancho Jesucriston' gosone' mandadw chona' xšinen'. Dios nan' noŋe' chio' yela' mban toli' tocanē na' Xancho Jesucriston' chone' cont zoacho lez šjayzoacho len le' toli' tocanē.

² Chzoja' le' Timoteo, le' naco' ca dogualje xi'ina' da' bzejni'ida' le' cont chejnilažo' Criston'. Na' chnablaža' nita' Xacho Diosen' len Xancho Jesucriston' yesyeyaše' yesyeži'ilaže'de' le' na' yesaclene' le', na' yesone' cont soa cuezo' binlo len xbab da' yo'o lo' yichjlažda'oguoŋ'.

Nita' bene' chosozejni'ide' diža' güenlaže'

³⁻⁴ Caten' gwza'a Efeson' gwy'a'a Macedonian' gwneyoeda' le' cont bega'ano' Efeson' neče nita' bał bene' chosozejni'ide' bene' Efeso ca' diža' güenlaže'. Con bi cheyož yedo chesonchgüe' xbab che diaža che da' xoxxta'ochō ca' na' cheso'e zan cuent che legaque'. Na' da' yoble chneyoeda' le' gono' mandadw bich yosozejni'ide' che da' ca'. Dan' chosozejni'ide' chonē ga yesaczejlaže' bene', na' bi chaclenen yesone' dan' gwlo'o Diosen' lo' na'cho gon chio' ba chejle'cho xtižen'.

⁵ Na' gono' mandadw yesone' güen, le' chaclaža' yesenite' yesaque lježe'. Na' cont bibi gwžon yesaque lježe', cheyała' yesaque' bene' laždao' xilaže', cheyała' yesone' dan' nezecho naquen güen yogo' ni'a, na' cheyała' yesejli'e diža' li che Diosen' do yichj do laže'.

⁶ Bene' ca' chosozejni'ide' diža' güenlaže' bi chesone' ca', na' da'nān' cheso'e diža' da' bibi zaca'.

⁷ La'czła' chesaclaže' yosozejni'ide' ley dan' bzoj Moisésen', bi chesejni'ide' dižan' cheso'e na' nēca chesejni'ide' da' ca' chesene' cheyała' goncho.

⁸ Nezecho ley nan' naquen güen con še gwghinchon can' cheyała' gwghinchon.

⁹ Na' lecze nezecho ley nan' gague chosbagan' bene' cheson da' güen, san chosbagan' bene' cheson da' mal na' bene' cheson güedenag len dan' nonen mandadw goncho. Chosbagan' bene' bi chosozenag che Diosen', na' bene' chesonteze' da' malen', na' bene' bi chesape' Diosen' bala'aŋ nēca chesonxene'ne', na' bene' chesot no xaxna'gaque', na' len nochle bene' güet bene'.

¹⁰ Lecze chosbagan' bene' chesata'lene' no'ole bi nac xo'olgaque' o bene' byo bi nac bene' chegaque', na' no bene' byo bene' chesata'lenteze' ljež bene' byoe' gualaz no'ole, na' bene' cheseče'xoxje' bene' yoble cont chesote' legaque' chesezi'e mechw, na' bene' ca' chesonlaže', na' bene' ca' cheso'e diža' güenlaže' lao justis, na' note'teze bene' cheson da' zej clele len diža' güen da' ba bzejni'i Diosen' chio'.

¹¹ Na' diža' güen da' ba bzejni'i Diosen' chio' zaca'chguan, na' Dios ben' zoa mba juisyw, le'na' ba gwlo'en lo' na' chyixjue'edan' bene'.

Pablon' cho'e yela' choxclen che Diosen' na' che Jesucriston'

¹² Choa' yela' choxclen che Xancho Jesucriston' ben' chon cont chac chyixjue'eda' xtiže'na'. Choxclenen' chacde' gona' xšinen' can' chazlaže' na' da'nān' gwleje'nda' gonan'.

¹³ Gwleje' neda' la'czła' cana' bia' diža' bya' che' na' bgue'eda'ne' na' bchi bsaca' bene' ca' chesonxene' le'. Na' la'czła' bēna' ca', Diosen' beyaše' beži'ilaže'de' neda', le' biŋa' šejnilaža'ne' ca' hora' na' biŋa' gacbe'eda' chona' clele.

¹⁴ Nach Xancho Jesucriston' nzi'ilaže'chgüede' neda' na' goclene'nda' cont gweyjnilaža'ne', na' na'a chacda'ne' na' lecze chacda' yezica'chle bene'.

¹⁵ Da' nga naquen to diža' li da' zaca' šejle'cho: Jesucriston' bide' yežlio nga cont beque'e xtoła' chio' bene' güen da' xinj. Na' chacda' neda' naca' bene' la'zelagüe gwyanch xtoła'.

¹⁶ Na' la'czła' naca' bene' la'zelagüe gwyanch xtoła', Jesucriston' beyaše'de' neda' na' bezi'xene' chia' cont blo'e napchgüe' yela' chxenlaže'. Bene' ca' cont bene' za' za'ac yesacbe'ede' nape' yela' chxenlaže' xen na' yesejnilaže'ne' na' gata' yela' mban chegaque' toli' tocanē.

¹⁷ Cheyała' gonxencho Diosen' ben' nac Rey chechon' toli' tocanē. Gague da' te chen'. Zoacze' la'czła' bi chle'echone' na' naque' la'zelagüe bene' sina'. Totc le' zaque' gonxencho na' gapchone' bala'aŋ toli' tocanē. Na' can' gonšcaczcho.

¹⁸ Xi'ina' Timoteo, ben xbab che dižan' gosoe' bene' ca' bosozende' le' can' gwna Diosen' chio' cana'. Na' can' ba gose'e le' gono' xšin Diosen', lecze can' chneyoeda' le' gonon' do yichj do lažo', la'czła' še gacdo' zdebe gonon'. Soačhačo' šejnilažo' Diosen', na' soatezo' gono' cont neždo' lo' laždaguo' bibi da' mal chono'.

¹⁹ Bał beñe' chesontez'e da' malen' la'czła' zjaneztede' lo' lažda'ogüe' bi cheyała' yesonen', na' da'nan' ba gosebejyichje' bich chesejnilaže' Diosen'.

²⁰ Can' goc che Himeneo na' che Alejandro. Da'nan' ba gwñabda' Diosen' yesaque' lo na' Satanás dan' chnabia' da' xigüe' ca', na' gonen con ca chaclažen' len legaque' cont yesache'ede' bi cheyała' yeseneye'e che Diosen'.

2

Dan' cheyała' nabecho Diosen' gone'

¹ Na' dan' nac da' žialao xen gon chio' chonxencho Diosen': cheyała' nabecho Diosen' gone' bi dan' chyažje chio' lente dan' cheseyažje yogo'lol beñe', na' nabechone' gaclene' yogo'lol beñe', na' güe'cho yela' choxclen che Diosen' che bi da' güen da' chesac che yogüe'.

² Cheyała' nabecho Diosen' gaclene' bene' gwnabia' ca', no rey, no gobernador na' nochle bene' ca' chesenabia', cont soa cuescho binlo na' bibi gwžon gonxencho Diosen', neca gata' da' gwžon goncho bichle da' cheyała' goncho.

³ Naquen güen nabecho Diosen' gaclene' yogüe' na' naquen da' chazlaže' Diosen', Dios ben' none' chio' yela' mban toli tocañe.

⁴ Le chaclaže' gwnežjue' yela' mban toli tocañe che yogo'lol beñe' na' chaclaže' yesejni'ide' diža' li che'.

⁵ Toz Diosen' zoa beñe' zaca' yesonxen yogo'lol beñe', na' lecz toz ben' chozoe' chio' binlo len Diosen', le'na' Jesucriston' ben' golje beñač.

⁶ Jesucristw nan' bnežjw cuine' gote' neche da' mal da' goson yogo'lol beñač, na' cate' bžin ža Diosen' bžie' bia', cana' bene' cont goseneze beñačen' che'.

⁷ Na' Diosen' gwleje' neda' cont naca' postlw che' na' cont chyixjue'eda' xtiže'. Choa' diža' li, bi chonlaža', le naca' Criston' txen, gwleje'nda' cont chzejni'ida' bene' ca' bi zjanac beñe' Israel diža' li che' cont yesejnilaže'ne'.

⁸ Na' dan' che'nda' gac gate'teze chesedop chesežague' chesonxene' Diosen', chaclaža' bene' ca' yosol güiže' Diosen' yesaque' bene' laždao' xilaže' cont yeselis na'gaquen' laogüen' sin cbi yeseže'e bene' o yosošašlene' bene'.

⁹ Na' ca' nac no'ol ca' chesonxen Jesucriston', bi cheyała' yesebec yichjgaque' še nite' xdanchgua, še yosoguale' bga o ret de oro o de perlas dan' naquen da' zaque', še nac yiša' yichjen' xdanchgua, na' še nac xagaque' da' chzaca' la'ay.

¹⁰ San cheyała' yesebec yichjgaque' yesone' da' güen ca' chaclaže' Diosen' yeson yogo' beñe' chesejnilaže'ne'.

¹¹ Na' no'ol ca' lecze cheyała' nite' šize yosozenague' che beñe' ca' chososed chosolo'ede' xtiža' Diosen', na' yesone' con da' yese'ene'.

¹² Neda' bi chona' latje cont no'ol ca' yosozejni'ide' beñe' byo latje lagüe', na' neca choña' latje yesenabi'e beñe' byo. Cheyała' yesenite' šize,

¹³ le cate' Diosen' bene' beñačen' zgua'tec bene' Adánna' na' gwdechle bene' Evan'.

¹⁴ Na' cate' Satanás dan' chnabia' da' xigüe' ca' gwžoayaguen bene' nechw ca', gague gwžoayaguen Adánna', san gwžoayaguen Evan' cont bene' dan' gwna Diosen' bi gone', na' da'nan' beyaque' beñe' güen da' xinj.

¹⁵ Perw na' la'czła' no'ol ca' chesežaglagüe' chesezan xi'ingaue', žin ža šjasyenite' len Diosen' še zjanite' chesejnilaže'ne' na' še zjanite' chesacde'ne' na' chesacde' yezica'chle beñe', na' še zjanite' chesone' can' chazlaže' Diosen' len yela' sina' da' ba bnežjue' legaque'.

3

Can' yeson beñe' ca' yosogüia yesene'e yezica'chle beñe' yesogene' Diosen'

¹ De to diža' da' zaca' šejle'cho da' žan: "Beñe' chesaclaže' yosogüia yesene'e yezica'chle beñe' chesonxene' Diosen', chesaclaže' yesone' to da' güen, še ca'."

² Na' beñe' gwłane' gone' žin dan' nac ca' cheyała' soateze' gone' da' güen yogo' ža sin cbi gone' da' zaca' tiłchone'. Cheyała' soa toz no'ol che', na' cheyała' gague' beñe' yo'o xbab, na' gague' beñe' chnabia' cuine' chone' da' güen, na' gague' beñe' chon da' zej toli cont beñe' yoble yesape' le' bala'an. Cheyała' yebede' gwlebe' beñe' liže', na' cheyała' gague' beñe' chac chzejni'ide' xtiža' Diosen' binlo.

³ Beñe' chzože bi gac gwłane' žinna'. Bi cheyała' gague' beñe' yolao chdile chšaše'. Cheyała' gague' beñe' šagüe' beñe' chon güen len yezica'chle beñe', na' bi cheyała' gague' beñe' chon zña, neca selaže'chgüe' gone' gan mechw.

⁴ Na' cheyała' gague' beñe' neze can' gone' cont xi'ine' ca' na' nochle beñe' nita' liže' yosozenague' che' na' yesape' le' bala'an.

⁵ Le še bi nezde' nac gone' cont xi'ine' ca' yosozenagbe' che' na' yesapbe' le' bala'an, bi gac gone' cont beñe' chesedop chesežag chesonxene' Diosen' yosozenague' che'.

⁶ Bi cuejle bene' za' chzolao chejnilaže' Diosen' cont gwgüia ne'e bene' ca' chesonxene' Diosen', le bene' coben' xož gonxen cuine' na' tena' Diosen' güe'e le' castigw še gone' ca'. Can' goc che Satanásen' cani'te cate' benxen cuinen na' Diosen' bebejen' gan' zoe' na'.

⁷ Na' bene' cuejle cheyala' soe' gone' cont bene' ca' bi zjanac txen yesenezde' chone' güen, le še gone' da' malen' yesene' bene' che' na' Satanásen' co'oyelan' le' gonche' da' malen'.

Bene' ca' yeson žin bixjw

⁸ Na' lecze cate' cuejle bene' yeson žin bixjw da' chata' len bene' ca' chesonxene' Diosen', le cuej bene' cheson güen cont gapcho legaque' bala'an. Lecze cheyala' yesaque' bene' chesoe' diža' li da' šejle' cho, bene' bi zjayolagüe' chesezožde', na' bene' bi yesezelaže' yeseni'e che xšin Diosen' dan' yesone' na'.

⁹ Cheyala' yesaque' bene' chesejle'e cayanen' ba bzejni' i Diosen' chio' che Jesucriston' dan' nono gwneze cana', na' bene' cheson da' güen cont yesenezde' lo' yichjlažda'ogüe' chesone' can' chazlaže' Diosen'.

¹⁰ Na' cate' za' cuejle bene' ca' yeson žin bixjw na', le na'yane' can' chesonen', na' še gata' bia' chesonen' binlo bibi chesechoe', nachen' cuejle legaque'.

¹¹ Na' no'ol ca' yeson xšin Diosen' lecze cheyala' yesone' cont gapchone' bala'an. Bi cuejle no'ole chnie' che bene' o no'ole yolagüe' sožde', san cuejle no'ol ca' yesenite' yesone' can' chazlaže' Diosen'.

¹² Na' cate' cuejle bene' byo yeson žin bixjw da' chata' ladjo bene' ca' chesonxene' Diosen', le cuej bene' zoa toze no'ol che', na' bene' chon cont bi' che' ca' na' nochle bene' nita' liže' chosozenague' che'.

¹³ Le še bene' ca' cheson žin bixjon' yesone' binlo dan' yo'o lo na'gaque' yesone', nach yesenilaže' chgüe' Jesucriston' sin cbi yesežebe', na' yezica' chle bene' yesape' legaque' bala'an.

Da' chejni'icho che Diosen' dan' nono gwneze cana'

¹⁴ Chzoja' le' da' quinga da' cheyala' gonle la'czla' zoa' lez yob yida' gan' zon',

¹⁵ cont še šeda' ba nezdō' nac cheyala' yeson bene' ca' zjanac diaža che Diosen', le chio' chdop chžagcho chonxencho Jesucriston' naccho diaža che Diosen' ben' zoa toli tocane. Na' chio' chdop chžagcho chonxenchone' yo'o lo na'cho choncho cont chesombia' bene' diža' li che Diosen'.

¹⁶ Da' licze da' zaca' chgua dan' ba bzejni' i Diosen' chio'. Cana' nono gwneze da' quinga dan' bzejni'ide' chio' che Jesucriston', žan:

Diosen' bide' golje' benach,

na' Spiritw che Diosen' blo'en naque' bene' güen juisyw.

Na' bene' ca' zjanac angl che Diosen' bedesene'e le'.

Na' bžin ža Diosen' bene' cont beyepe' yaba gan' yo'ochgua be'ni'.

Na' bene' ca' cheso'e xtižen' ba goseyixjue' eden' len bene' že' nación zito',

na' zan bene' že' lo yežlion' ba chesejle'e che'.

4

Žin ža bal bene' yesebejyichje' diža' li che Diosen'

¹ Na' Spiritw che Diosen' ba ben' diža' li cont šejni'icho žin ža cate' bal bene' yesebejyichje' diža' li che Diosen' dan' chejle'cho na' yesejle'e che bi da' yeson da' xigüe' ca' cont yesežoayaguen legaque'.

² Da' xigüe' ca' yesonen cont nita' bene' yosozejni'ide' diža' güenlaže' da' siyen' bene', na' bene' ca' yosozejni'ide' diža' güenlažen' bibi yesacde' lo' yichjlažda'ogüe' caten' yeseziye'e bene'.

³ Yosožone' yosožagna' bene' na' yosožone' ye'ej gagwcho bal yela' guagw, la'czla' Diosen' bene' cont zjade yela' guagw ca' cont chio' chonxencho Criston' na' nombia'cho diža' li chen' gagwchon na' güe'cho yela' choxcen che'.

⁴ Yogo' dan' ben Diosen' naquen güen na' bi naquen da' gue'echo, con še güe'cho yela' choxcen che' caten' gagwchon.

⁵ Na' nezecho guac gagwcho bite'teze yela' guagw, le ba gwna Diosen' naquen güen, na' güe'cho yela' choxcen che' cate' gagwchon.

Can' gon Timoteo xšin Diosen'

⁶ Ca nac bene' ljež chio' chonxencho Jesucriston', cheyala' gwzejni'ido' legaque' da' quinga ba gwnia' le' cont gacleno' legaque' can' chazlaže' Jesucriston', le gwleje' le' cont gwzejni'ido' bene'. Lecz gonen chachlažo' še gwzejni'ido' bene' xtiža' Diosen' dan' chejle'cho, le naquen to diža' güen, na' ba bzenago' chen do yichj do lažo'.

⁷ Bi gwzenago' che diža' güenlaže' dan' chesaljlaže' bene' bi chesonxene' Diosen'. Ben byen soaczo' gono' can' chazlaže' Diosen'.

⁸ Nezecho cate' chda ni'a na'cho chaclenen cuerp chechon' late'. Perw na' cate' choncho can' chazlaže' Diosen', chaclenchen chio' cont zoa chbezcho binlo na'a na' lecze ca' cate' šjayzoacho len le' toli tocaņe.

⁹ Can' ža to diža' dan' zaca' šejle'cho na' dan' zaca' gwzenagcho čhen do yichj do laže'cho.

¹⁰ Na' cont choncho can' chazlaže' Diosen', da'nan' chonchguacho xšinen' na' chy chchejlaže'cho cate' chzi'diža' beņe' chio', le nezecho Diosen' zoe' toli tocaņe na' zoacho lez gone' güen len chio'. Le' chaclaže' gwnežjue' yela' mban toli tocaņe che yogo' beñač, na' can' nacczen gone' len beņe' chesejnilaže' Jesucriston'.

¹¹ Da'nan' bzejni'i beņe' da' ca' ba gwnian' na' ben mandadw yosozenague' che yogo'czen.

¹² Bi go'o latje yosoza beņe' le' šla'ale lagüe da' naco' beņe' xcuide'. Len xtižo' na' len da' chono' ben güen cont yogo' beņe' chesejnilaže' Criston' yesape' le' bala'an. Len xtižo' na' len da' chono' blo'e legaque' ca cheyała' yesacde' Diosen' na' beņe' lježgaque', ca cheyała' yesenita'chache' yesejnilaže'ne' na' ca cheyała' yesaque' beņe' laždao' xilaže'.

¹³ Na' na'a šlac biņa' yida' da' yoble, gwlec yichjo' gwlabo' Xtiža' Diosen' dan' nyojen len beņe' ca' chesedop chesežag chesonxene' Jesucriston'. Na' gwņeyoede' yosozenague' čhen na' bzejni'ide' bi zejen.

¹⁴ Bi gatlažo' dan' gwlo'o Diosen' lo nao' gono' caten' gosexo a na' beņe' blao ca' yichjon', beņe' ca' chosogüia cheseņe'e ljež chio' chonxencho Diosen', bosozende' le' gwlej Diosen' gono' xšinen'.

¹⁵ Cheyała' cuec yichjo' do yichj do lažo' gono' da' ca' gwlej Diosen' le' gono' cont yogo' beņe' yesele'ede' zejcho' chono' da' güen.

¹⁶ Na' gwsaco' can' soa cuezo' cont soačhačo' gono' con can' chazlaže' Diosen' na' soačhačo' gwzejni'ido' beņe' xtiža' Diosen' con can' naquen. Ben ca' cont gaclenen le' na' lecze gaclenen beņe' ca' chosozenag xtižon' cont šjayzoalenle Diosen' cate' žin ža.

5

Can' cheyała' gon Timoteo len yezica'chle beņe' chesejnilaže' Criston'

¹ Še no beņe' byo gole chone' bi da' mal, bi tilo'ne', san gwņeyoede' cuejyichjen', con ben xbab naque' xao'. Na' še no beņe' xcuide' chone' bi da' mal, gwņeyoede' cuejyichjen', con ben xbab naque' beņe' bišo'.

² Na' še no no'ol gole chone' bi da' mal, gwņeyoede' cuejyichjen', con ben xbab naque' xnao'. Na' še no no'ol xcuide' chone' bi da' mal, gwņeyoede' cuejyichjen', con ben xbab naque' beņe' zano'. Cheyała' gwsaco' cont gaco' beņe' laždao' xilaže' len legaque'.

³ Chio' čhdop chžagcho chonxencho Criston' cheyała' gwnežjwcho da' cheseyažje no'ol ca' ba gosat beņe' čhegaque' še da' li zjanaque' beņe' chyaž čhčhine.

⁴ Perw še nita' no xi'ingaque' no xesoagaque', bzejni'ide' legaque' cheyała' yosonežjue' da' cheseyažje no'ol ca', le no'ol ca' ba bosogole' legaque', na' Diosen' chaclaže' yesone' güen len legaque' cont yosolo'e chesejnilaže'ne'.

⁵ No'ol ca' nono zoa beņe' gwnežjw'legaue' da' cheseyažjde' na' zjanaque' dogualje güezebe, yesenite' lez gaclen Diosen' legaue' na' do ža do yel yesenite' yeseñabde'ne' gaclene' legaue'.

⁶ Perw no'ol güezeb ca' chesacde' yesone' con ca' žan čhegaque', len Diosen' yichjlažda'ogaquen' naquen ca che to beņe' ba got la'czla' ne' zjambane'.

⁷ Ben mandadw neče beņe' ca' chesedop chesežag chesonxene' Jesucriston' yesone' can' žia' nga na' bibi da' mal yesone' da' zaca' no tile' legaue'.

⁸ Še no beņe' bi chaclene' cont gata' da' chyažje beņe' zjanac diaža che', ba bzoe' šla'ale xtiža' Diosen' dan' chejle'cho čhen, na' malech chone' ca beņe' bi chesejnilaže' Jesucriston'. Na' leca da' mal chone' še bi chaclene' beņe' lo' yo'o che'.

⁹ Quinga nezdo' no no'ol güezeb ca' cheyała' gwčhelo' le'e yiš cont beņe' ca' chesedop chesežag chesonxene' Jesucriston' yosogüe'ej yosoguağüe'ne' na' yosonežjue' bichle da' cheseyažjde'. Cuejle no'ol gol ca' beņe' ba gwde gayon iz, no'ole goc toze beņe' che'.

¹⁰ Cuejle con no'ol ca' zjaneže beņe' ba gosončgüe' da' güen, ca no da' quinga: še bosgole' bi' che' binlo, še blebe' beņe' liže', še goclene' yezica'chle beņe' chesonxene' Diosen', še goclene' beņe' ca' cheseyi chesezaque', o še ba beņe' bite'tezechle da' güen.

¹¹ Beņe' ca' chesedop chesežag chesonxene' Jesucriston' bi cheyała' yesego'o lo na'gaque' yosogüe'ej yosoguağüe' no'ol güezeb xcuide' ca'. Le no'ol ca', gwžin ža yesaclaže' yosyošagne'e da' yoble,

¹² Na' yesape' doła' še yesebejyichje' xšin Criston' dan' gosečebe' yesone'.

¹³ Na' lecze no'ol güezeb xcuide' ca' bi naquen güen gwco'olaochwne' yeselaže' to to liž beņe', cont bi yesaque' beņe' xagüed, na' cont bi yesaque' beņe' güetob diža'. Bi yeselaže' to to liž beņe' yesezi'diže' bi chac, le bi cheyała' yesone' dan' nac ca'.

¹⁴ Da'nan' chaclaža' no'ol güezeb xcuide' ca' yosyošagne'e da' yoble na' yesezanche' cont yosyosgole' xi'ingaque' na' yosogüia yesena' ližgaquen' binlo, na' bi yesone' cont bene' ca' cheseague'ede' chio' yesene' chesone' da' mal.

¹⁵ Chnia' ca' le nita' bal' no'ol güezeb xcuide' ca' ba gosebeyjichje' Criston' na' chosozenague' che Satanäsen'.

¹⁶ Note'tez bene' chejnilaže' Criston', še nita' no'ol güezeb lo diaža čhegaque', cheyala' yosonežjue'ne' da' yese'ej yesagüe' cont bibi da' zed yesone' len bene' ca' chesedop chesežag chesonxene' Criston'. Nach con no'ol ca' nono zoa yesaclen legaque', legacze' cheyala' yesego'lo lo na' bene' ca' chesedop chesežag chesonxene' Criston'.

¹⁷ Na' ca nac bene' blao ba zjanchoj chosogüia chesene'e bene' ca' chesedop chesežag chesonxene' Criston' to to yež, še chesene'e bene' ca' binlo, da' xen cheyala' yesacxene', na' cheyala' gwnežjwchone' da' yesacbande'. Na' zaca'che' yesacxene' še cheseyixjue'ede' xtiža' Diosen' na' chosozejni'ide' bene' bi zejen.

¹⁸ Cheyala' yesacxene' na' gwnežjwchone' da' yesacbande', le nyoj Xtiža' Diosen' žan: "Bitw gwseyjwle cho'a go'n cont ca' gagwba' cate' chlej chšošjba' trigon' neče choj xen'." Na' lecz nyojen žan: "Bene' güen žin cheyala' si' laxjue'."

¹⁹ Bi gono' cuent cate' no bene' gagw xya che to bene' blao bene' nchoj chgüia chne'e bene' lježe' chesonxene' Criston' še bi zoa yeto bene' o yečhope bene' co' da' balj.

²⁰ Na' še da' li ba bene' da' malen', cheyala' tilo'ne' lao bene' ca' chesedop chesežag chesonxene' Criston' cont yezica'chle bene' ca' yesežebe' yesone' da' malen' nac ca'.

²¹ Na' toze can' cheyala' gono' len note'teze bene', bitw nacho bal' bene' gonxenchguachone' na' yebale' gonchone' nacteze. Na' Diosen' len Xancho Jesucriston' na' len angl bene' ca' zjanchoj chesone' mandadw che' zjanezde' chona' mandadw gono' yogo' da' ca' ba gwnia' nga.

²² Bitw yob cuejo' bene' güia ne'e lježe' cont gague leno' gapo' doła' še ben' gwlejon' gone' da' mal. Gwsaco' cont bibi doła' gapo'.

²³ Na' dan' tolize chac li'o, bi ye'ejo' toze nis, san güe'ej late' güeje vino.

²⁴ Bal' bene' nacbja' chesone' da' mal na' yogo'ze bene' zjanezde' can' chesonen' la'czla' bina' žin ža yesezi'e castigw čhen. Na' bal' bene' chesone' da' malen' dan' ngaše' na' da' bi nacbja', perw žin ža gwlo'elaon.

²⁵ Na' lecz ca' naquen len bene' ca' cheson da' güen, nacbja' še da' güenna' chesone', na' la'czla' gague nla' da' güenna' chesone', bi nacho yega'ancze bagaše'ze dan' chesonen'.

6

¹ Na' bene' ca' chesejnilaže' Criston', bene' zjanac esclavos, cheyala' yesacbe'ede' bene' ca' zjanaque' xan žin čhegaquen' zjazaque' cont yosozenague' čhegaque'. Cheyala' yesape' legaque' bala'an' cont nono ne yela' ya' che Diosen', neca no ne che dan' chzejni'ichon'.

² Bene' ca' zjanac esclavos, še xangaque' lecze chesejnilaže' Criston', bi cheyala' yesone' xbab bi yosozenague' čhegaque' neče zjanaque' txen chesonxene' Criston', san nachle cheyala' yesone' žinna' do laže'che' na' cheyala' yesacde' xan žin ca' ca' bene' biše', lagüe zjanaque' txen chesejnilaže' Criston'. Bzejni'i da' ca' ba gwnia' cheyala' yesone' na' gwneyoe bene' yosozenague' čhen.

Cheyala' soacho mbalaz len da' de čecho

³ Nita' bene' chosozejni'ide' xbab čegacze' na' bi chososed chosolo'ede' diža' li čhe Xancho Jesucriston' dan' ba blo'eda' le', na' chosozejni'ide' clele, chesene' bi chonen byen soacho goncho can' chazlaže' Diosen'.

⁴ Bene' ca' chosozejni'ide' dan' zej clele chesonxen cuingaque', chesacde' zjanezde' da' zan, len bibi chesejni'ide'. Chosošaše' che no diža' o che bichle da' bi naquen da' zaque', chesacxi'e lježe', chesacyože' len lježe', chesezi'diža' lježe', na' chesacde' chesacxi'a bene' legaque'.

⁵ Con bi cheyož chedo chesedil' chosošaše', le ba yo'o da' malen' lo' yichjlažda'ogüe' na' bi zjanombi'e diža' li čhe Diosen'. Con chesacde' yososed yosolo'ede' xtiža' Diosen' cont yesaque' bene' gwni'a. Bi gono' txen len ben' cheson ca'.

⁶ Da' li zoachguacho binlo cate' choncho can' chazlaže' Diosen' na' cate' zoacho mbalaz len bi da' dao' de čecho.

⁷ Ga'alcho bla'cho yežlion' na' ga'alcho cate' yeza'cho.

⁸ Na' še de da' che'ej chagwcho na' še de xalana'cho da' chyažjecho, cheyala' soacho mba len da' ca'.

⁹ Bene' ca' chesezelaže' yesaque' bene' gwni'a chosozenague' che da' malen' na' chese-lažoe' lo na' gwxiyen'. Chesezelaže' da' zan da' gata' čhegaque' da' yesede čhen, na' da' ca' chesezelaže' chesonen mal len legaque' na' žin ža yesebiaye'e.

¹⁰ Bene' chzelaže' mechw nach chzenague' che bite'teze da' mal. Na' nita' bene' ba gosebejyichje' diža' li che Diosen' dan' chesezelaže' mechon', na' da' zan dan' chosožaglaochgüe' yela' güen da' mal chegaque'na'.

Cheyała' cuec yichj Timoteon' gone' xšin Criston'

¹¹ Na' ca nac le' Timoteo, bi gono' can' cheson bene' ca', le Diosen' gwleje' le' cont gono' xšinen'. Cuec yichjo' gono' da' zej to licha, ben con can' chazlaže' Diosen', soachacho' šejnilažo'ne', goque bene', byo bchejlaže' cate' de da' saca'zi'o, na' goc bene' šagüe'.

¹² Gwlec yichjo' ben con ga zelao saquedo' cont gono' yogo' dan' chazlaže' Diosen'. Na' bebe dan' šjayzo' len Diosen' toli tocaņe, le Diosen' gwleje' le' šjayzo' len le', na' ba bi'o diža' lao bene' zan žo' chejnilažo'ne'.

¹³ Dios ben' chnežjo yela' mban che yogo' benachen', che beyixe' ca' na' che bica'chle da' zjamban, na' Jesucristw ben' be' diža' li lao Poncio Pilato, gwne' Diosen' gwsele'ne', legaque' zjanezde' chona' mandadw

¹⁴ gwzenago' che yogo' dan' ba gwnia' le', na' bi go'o latje ten ca'ze, cont bi gono' da' zaca' no tile le'. Bzenag che yogo' dan' bena' mandadw gono' žinte ža yid Xancho Jesucriston' da' yoble.

¹⁵ Le cate' žin ža gwžia bia' Diosen', nach yide' da' yoble. Toz Dios nan' chnabi'e doxen na' zoachgüe' mba. Len' naque' Rey ben' chnabi'e yezica'chle rey ca', na' naque' Xancho ben' chnabi'e yezica'chle bene' gwnabia'.

¹⁶ Totec Dios nan' bi nacho žin ža gate'. Na' catec yo'ochgua be'ni' gan' zoen', nono gac bigue' gala'ze gan' zoe'na'. Nono zoa yežlio nga bene' ba ble'ede' Diosen' na' nono gac le'e le'. Cheyała' gonxenchone' le' chnabi'e toli tocaņe. Na' can' gonšcaczcho.

¹⁷ Na' ca nac bene' ca' chesejnilaže' Criston', bene' zjanac bene' gwni'a lo yežlio nga, gože' bi yesaque' bene' ya'laže'. Na' yo'o legaque' bi yesone' xbab yesenite' mba lagüe zjanaque' bene' gwni'a, le yob te che bite'tez da' de chegaque'. Yo'o legaque' yesezoe' lez yesenite' mbalaz len Dios ben' zoe' toli tocaņe. Toga le' chone' chio' yogo' da' güen da' chyažjecho na' da' chbecho.

¹⁸ Na' yo'one' yesenite' yesonchgüe' da' güen, yesone' yogo' cuen da' güen can' chazlaže' Diosen', nach lecze yo'one' yesezande' da' de chegaque' cont yesaclene' bene' na' yesebede' yesone' ca'.

¹⁹ Še yesone' ca', na' gaquen ca to yela' gwni'a da' bi te chen, le Diosen' chaclaže' yesaclene' bene', na' gone' cont yesenite' mba cate' šjasyenite' len le' toli tocaņe še yesone' ca'.

Pablon' chžože' carten'

²⁰ Timoteo, gwlecchgua yichjo' che yogo' dan' ba bzejni'i Diosen' le'. Bi gwzenago' che bene' chosošalj diža' da' bibi zaca', ne che dan' chesene bene' dan' bi zej lebe len diža' li che Diosen'. Chesonlaže' chesene' cheso'e diža' sina'.

²¹ Bene' bosozenague' che dižan' nac ca' ba gosebejyichje' diža' li che Diosen' da' chejle'cho na' bich chesejnilaže'ne'.

Chnabšca' gaclen Diosen' le'. Da' na'zen' chzoja'.

CART GWCHOPE DAN' BZOJ POSTLW SAN PABLO CHE TIMÓTEO

Pablon' chzoje' Timoteon'

¹ Neda' Pablo naca' postlw che Jesucriston', le Diosen' gwnalaže' gwsele' neda' chyixjue'eda' can' gwne' gone' cont note'teze bene' yesejnilaže' Jesucriston' gata' yela' mban chegaque' toli tocanē.

² Na' chzoja' le' Timoteo, ba nona' le' ca xi'ina'. Chnaba' lao Xacho Diosen' na' lao Xancho Jesucriston' yesaclenšque' le' na' yesyeyaše'laže'de' le', na' yesonšque' ca so' binlo len xbab da' yo'o lo' yichjlažda'oguoñ'.

Cheyala' güe'cho diža' che Jesucriston'

³ Chonxena' Diosen' do yichj do laža' can' goson da' xozxta'ogua', na' nezda' lo' yichjlažda'ogua' chona' can' chazlaže' Diosen'. Na' yogo' ni'a cate' choi güiža' Diosen', lagüe ža na' šeže'le, choa' yela' choxclen che dan' chonon'.

⁴ Chjaza'laža' gwchežo' cate' beza' gan' zon', na' zelaža' le'e lježcho da' yoble, le yebechgüeda' še ca'.

⁵ Na' chona' xbab can' chejnilažo' Diosen' do yichj do lažo' can' zgua'tec goson taguo' Loida na' xna'o Eunice, na' nezda' lecz ca' chono' le' na'a.

⁶ Da'nana' chneyoeda' le' da' yoble, güe'lažo' gono' da' gwlo'o Diosen' lo' nao' gono' caten' gwxoā na'ton' yichjon'.

⁷ Diosen' bene' chio' Spiritw chen' zoan lo' lažda'ochon', na' Spiriton' chaclenen chio' cont bi žebcho, na' chonen chio' yela' guac cont goncho can' chazlaže' Diosen'. Lecze chaclenen chio' cont chaque lježcho na' cont choncho da' zejen na' güe'cho diža' da' zaca'.

⁸ Da'nana' chneyoeda' le', bi yeto'edo' chixjue'edo' xtiža' Xancho Jesucriston', na' neca yeto'edo' chia' la'czla' dia' ližya nga da' chzenaga' che Jesucriston' na' chyixjue'eda' xtižen'. Cheyala' gono' can' chonan' na' gwyo gwchejlažo' bi da' gac chio' cate' chixjue'edo' diža' güen chen', le zoa Diosen' chaclene' chio' len yela' guac chen'.

⁹ Diosen' ba none' chio' yela' mban toli tocanē na' gwleje' chio' cont naccho lo' ne'en. Na' bene' ca' da' nži'ilaže'de' chio', gague neche bi da' güen bencho. Cate' biña' xe yežlion' bsi'e xneze sele' Jesucriston' cont gaclene' chio'.

¹⁰ Na' na'a Diosen' ba blo'e nži'ilaže'de' chio', le ba gwsele' Jesucriston' ben' choñ yela' mban chechon' toli tocanē. Na' žin ža gwcuez Jesucriston' yela' goten' na' gone' cont chio' chejle'cho diža' güen chen' šjayzoacho len le' toli tocanē.

¹¹ Na' Diosen' gwleje' neda' naca' postlw che' na' gwsele'nda' cont chyixjue'eda' diža' güen che Jesucriston' na' chsed chlo'eda' bene' bi zjanac bene' Israel.

¹² Na' dan' chona' ca', chžaglagua' da' quinga chac chia', perw bi cheto'eda' chen, le nombi'a Diosen' ben' chejnilaža'. Ba ben cuina' lo' ne'e, na' nezda' nape' yela' guac gone' cont ne' soačhača' šejnilaža'ne' caten' žin ža yid Jesucriston' da' yoble.

¹³ Soačhačo' gwzejni'ido' bene' diža' zaca' can' ba bendo' chzejni'idan', na' soatezo' šejnilažo' Jesucriston' na' gacdo'ne' do yichj do lažo'.

¹⁴ Be' latje gaclen Spiritw che Diosen' le' cont soatezo' gwzejni'ido' bene' diža' li da' bsd blo'eda' le'e, le zoa Spiriton' lo' lažda'ochon'.

¹⁵ Nezdo' Figelo na' Hermógenes len yezica'chle bene' migw chia' ca' že' distritw che Asia ba gosebejyichje'nda'.

¹⁶ Na' chnaba' gaclenšca Xancho Diosen' Onesiforo len bene' lo' yo'o che', le bi beto'ede' chia' da' dia' ližya nga, san zan ni'a bedetipe' laža' nga.

¹⁷ Cate' bide' Roma nga, bene' byen beyiljue' neda' con cate'ch beželde'nda'.

¹⁸ Nezdo' lecze da' zan bene' goclene' neda' cate' gwzoa' Efeso. Chnaba' lao Xancho Diosen' gacšca güen che' cate' žin ža yid Xancho Jesucriston' da' yoble.

2

Cheyala' gwyo gwchejcho len da' saca'zi'cho

¹ Xi'indagua', chnaba' soačhačo' šejnilažo' Jesucriston' lagüe' da' nži'ilaže'de' le'.

² Na' yogo' da' ba bendo' gwdixjue'eda' lao bene' zan, da' ca' bsd blo'en bene' yosozenag chen do yichj do laže'gaque', bene' ca' guac yosozejni'iden' bene' yoble.

³ Na' byo bčej len da' saca'zi'o šlac chono' xšin Jesucriston'. Goc ca to soldadw bene' bi chžeb bi gac che'.

⁴ Nezecho bene' zej yela' soldadon' bi chac gon xšine' šlac zeje' lao gwdila', san chbejyichjen' cont gone' bin' ža ben' nac xan soldadw ca'.

⁵ Na' nezecho bene' chja'ac lo güitj cheyala' yesone' cayanen' ba bosoxi'e yesone' cate' yesejitje', cont gac yesezi'e da' yesone' gan.

⁶ Na' leze nezecho bene' chelale chone' žin yixe' chzi'e da' nechw da' chbia lao coseš čhen'.
⁷ Ben xbab čhe da' quinga ba gwnia' le', na' Xancho Jesucriston' gaclene' le' šejni'ido' yogon'.

⁸ Ben xbab čhe Jesucristw ben' beyas bebane' ladjo bene' guaten', ben' nac xi'in diaža čhe da' rey Davin'. Čhe len' chzejni'ida' cate' chyixjue'eda' diža' güen čhe'.

⁹ Na' da' chyixjue'eda' diža' güen čhen' chosoči chososaque'nda' na' dia' liža nga ca to no bene' mal juisyw. Perw nezdá' bibi gac yesone' cont bi gas laje xtiža' Diosen' lo yežlion'.

¹⁰ Da'nán' chzanlaže' cuina' gac bi da' gac čhia' lagüe da' chyixjue'eda' xtiža' Diosen', le čaclaža' yezica'chle bene' ba gwleje' cont gata' yela' mban čhegaque' toli tocane yesejnilaže' Jesucriston', na' žin ža šjasyezen' len le' toli tocane gan' chac da' güen juisyw.

¹¹ Diža' quinga zjanaquen da' li:

Še chejnilaže'cho Criston' ben' got neče xtoła'chon',
 chio' leče naccho ca to bene' guat len da' xinjen' cont bich gonchon.

Na' con can' bosban Diosen' Criston' ladjo bene' guaten',
 leče ca' bocobe' yichjlaždao' chio' cont šjayzoacho txen len le'.

¹² Na' še soachachcho šejnilaže'chone' bite'teze chac čhecho, leče gone' cont nabia'cho txen len le'.

San še cuejyichjcho Criston', leče le' cuejyichje' chio'.

¹³ Na' la'czla' še chio' bi goncho can' gwnacho goncho,
 Diosen' zoe' chone' con da' ba gwne' gone',
 le Diosen' bi gac gwše'e da' ba nžie' bia' gone'.

Ben' chon xšin Diosen' binlo

¹⁴ Bi go'o latje yesanlaže' bene' ca' chesejnilaže' Jesucriston' da' ca' ba bzejni'ida'. Na' yosnisdo' legaque' naquen mal len Xancho Diosen' yesedił yosošašen lježe' čhe bize diža'. Bibi zejen yesone' ca', le cate' bene' chesende' chesedił chosošaše', chonen cont bi yesejle'e čhe xtiža' Diosen'.

¹⁵ Ben con ga zelao saque'do' cont yebe Diosen' can' chonon' na' cont bi gacdo' zto' lagüen' can' chono' xšinen'. Gwsed gwlo'edo' xtižen' to liča.

¹⁶ Bi gono' txen len bene' chesoe'chgüe' bite'teze diža' da' bibi zaca', diža' da' bibi zejen len Diosen', le dižan' zjanac ca' chziyen' bene' yesonche' da' mal.

¹⁷ Dižan' nac ca' chziayin' bene' ca' to yižgüe' mal. Can' ba goc čhe Himeneo na' Fileto,

¹⁸ gosebejyichje' diža' li da' chzejni'in čhe Criston'. Chososed chosolo'ede' chesene' bi soacho lez žin ža yebancho ladjo bene' guaten', le chesene' ba gwde čhe da' ca'. Na' bal' bene' ba chesejnilaže' Criston' chesaczejaže' na'a neče xtiža' bene' ca'.

¹⁹ San chio' zoachachcho chzenagcho diža' li čhe Criston' na' Diosen' chone' cont bi chbejyichjchon. Da'nán' zaca'lebo ca' to lene yo'o da' nac da' gual. Na' nyojcze Xtiža' Diosen' žan: "Diosen' nezde' no bene' zjayo'o lo ne'e." Na' leče nyojen žan: "Note'tez bene' že' chejnilaže' Xancho Diosen', cheyala' cuejyichje' bich gone' da' mal."

²⁰ Nezecho to liž bene' gwni'a de no tas platw na' no yeso' xguag de oro de plata da' zjazaca'chgua. Leče de yeso' xguag de gona', na' de no batia na' bichle de yag da' chesonen žin da' bitec zjazaca'.

²¹ Can' naquen len chio', note'tezcho še cuejyichjcho da' malen', nach Xancho Diosen' gwčhine' chio' neče goncho da' zan da' güen da' chaclaže' goncho. Na' še goncho ca', saca'lebo ca' to tas o to xguag de oro da' zaca'chgua.

²² Na' ca' nac le', cheyala' cuejyichjo' bite'teze da' mal da' chzelaže' lažda'oguo' gono', da' ca' chesezelaže' note'teze bene' güego' yesone'. Beyiljwlaže' nac gono' cont gaco' bene' güen len Diosen' na' cont soachacho' šejnilažo'ne', cont gacdo' Diosen', na' cont soa cuezo' binlo len bene' lježo' ca'. Ben ca' txen len yogo' bene' chesenab goclen lao Xancho Diosen', bene' zjanac bene' laždao' xilaže'.

²³ Bi gono' txen len bene' bi chzejni'ide', bene' chosošaše' cheso'e diža' da' bibi zejen, le xtiža'gaquen' chonen ga chesacyož bene'.

²⁴ Chio' choncho xšin Diosen' bi cheyala' tile gwšašlencho bene'. Cheyala' gaccho bene' šägüe' len yogo'ze bene', cheyala' nezecho naquen' gwzejni'icho' legaque' čhe Diosen', na' cheyala' gapcho yela' chxenlaže' len legaque'.

²⁵ Na' cate' güe'cho consejw čhe bene' bi chesaclaže' yosozenague' diža' li čhe Criston', cheyala' güe'lencho legaque' diža' šägüe', na' cuezcho gaclen Diosen' legaque' yosoša' xbab čhegaquen' cont yosozenague' čhe diža' li čhen'.

²⁶ Can' goncho cont Diosen' gwnežjue' legaque' to xbab šagüe' na' yesyechoje' lo na' Satanás dan' chnabia' da' xigüe' ca', le chonen cont nite' chesone' con can' chazlažen'.

3

Naquen' yeson bene' cate' ba zoa yid Xancho Jesucriston' da' yoble

¹ Na' che'nda' šejni'ido' da' nga, cate' žin ža ba zoa yid Xancho Jesucriston' da' yoble, da' zan da' mal gac.

² Bene' zan yesonxen cuingaque', na' zane' yesebec yichje' gata' da' zcha'o xmechwagaque'. Zane' yeso'e diža' ca' güenna' chesone' na' yesaque' bene' ya'laže'. Yeseneye'e che Diosen'. Bi yosozenague' che xaxna'gaque'. Bi yeso'e yela' choxclen che Diosen' na' bi yesape' le' bala'an.

³ Bi yesacde' bene', bi yesyezi'xen che lježe', yesene' mal che bene' yoble, con yesonteze' bite'teze da' mal da' žan čhegaque', yesacchgüe' bene' znia, na' yesegue'ede' bite'tez da' nac da' güen.

⁴ Yosode lježgaque' lo na' bene' chesegue'ede' legaque', bi yesežebe' yesone' bite'tez da' mal, yesone' xbab zjazaca'chgüe', na' yesaclaže' yesone' con da' chpe legacze' na' bi yesaclaže' yesone' xbab che Diosen'.

⁵ Lecze da' zan da' yesone' cont yesaque' bene' chesonxenchgüe' Diosen', perw bi soa yela' guac che Diosen' len legaque'.

Bi gono' txen len bene' ca' cheson da' ca' ba gwnian'.

⁶ Bene' ca' cheson ca' chja'aque' liž no'ole bene' chesejle'daze', na' chesonlede' legaque' len diža' da' cheso'e. No'ol ca' zjadechgua xtoła'gaque', le chesonteze' da' mal can' ža lo' lažda'ogaquen'.

⁷ No'ol ca' chosozenague' che note'teze' že' gwzejni'ide' legaque', perw na' bi chžin ža yesejni'ide' diža' li che Diosen'.

⁸ Cani'te da' Janes na' da' Jambres besegue'ede' Moisésen' na' bi gosaclaže' yosozenague' diža' li da' be'len da' Moisésen' legaque', na' ca'czen' nita' bene' gwxiye' na'a chesegue'ede' diža' li che Diosen'. Nčhol yichjlažda'ogaque' yela' güen da' mal čhegaquen', na' gague da' li chesejnilaže' Diosen'.

⁹ Bi gac yesonlede' bene' sša, le yob gac čhegaque' can' goc che da' Janes na' da' Jambres, žin ža cate' yezica'chle bene' yesacbe'ede' chosozejni'ide' clele yela' bi chejni'i čhegaque'.

Consejw da' zelagüe' da' bnežjw Pablon' Timoteon'

¹⁰⁻¹¹ Na' le' Timoteo, nezcetedo' can' ba bzejni'ida' le' na' can' zoa' chona' da' güen. Neždo' chi' yichja' gona' yogo'loł da' ža Diosen'. Neždo' zoačhača' chejniłaža' Diosen' bite'tez da' chac čhia'. Na' neždo' napa' yela' chxenlaže' len ljež beňača' na' zoacza' chacda' legaque'. Neždo' bi chbejyichja' xšin Diosen' da' chona', la'czla' da' zan da' ba bosochi bososaca' bene' neda'. Na' neždo' da' ca' gosonde' neda' cate' gwzoa' ciuda Antioquía na' cate' gwy'a a yež Iconio len yež Listra, na' can' gwdi gwxcaca'. Na' neždo' Xancho Jesucriston' bosle' neda' lo yogo' da' ca' da' goc čhia'.

¹² Da' li yesenita' bene' yosochi yososaque' note'tez chio' chejniłaže'cho Cristo Jesús'en, chio' chi' yichjcho chzenagcho che'.

¹³ Bene' mal bene' güexoayag ca' šja'acze' yesonche' da' xinjen', yeseziye'e bene' na' lecze yesejle'e che diža' güenlaže' da' yesoe' bene' yoble.

¹⁴ Na' le' Timoteo, cheyala' soačhačo' gwzenago' che da' ca' chejni'ido' che Criston'. Neždo' naquen diža' li, le bzejni'iton' le'.

¹⁵ Cate' nactio' bidao' ba nombi'o Xtiža' Diosen' da' nyojen. Na' Xtiže' nan' chzejni'in chio' cheyala' šejnilaže'cho Cristo Jesús'en' cont gata' yela' mban čecho toli tocañe.

¹⁶ Cuin Diosen' bzejni'ide' bene' ca' bosozoj Xtižen' cont bosozoje' xbab čhen'. Da'n'an' doxen Xtiža' Diosen' dan' nyojen zaca'chguan da' chzejni'in chio' che Diosen', chdižen chio' cate' choncho da' xinj, na' čhejni'in chio' nac goncho cont na' Diosen' choncho da' güen.

¹⁷ Na' chio' chejniłaže'cho Diosen', Xtižen' chzejni'in chio' yogo'loł da' cheyala' nezecho cont soacho goncho yogo' da' güen.

4

¹ Yid Xancho Jesucriston' da' yoble cont gone' yela' justis che yogo' beňach, bene' ne' zjamban lente bene' ba gosat, na' caten' yide' da' yoble nach solao nabi'e yežlio nga. Na' Timoteo, Diosen' len Xancho Jesucriston' zjanezde' chona' mandadw gono' da' quinga:

² Čixjue'edo' xtiža' Diosen' cate' nlatjo' na' cate' chacdo' bi nlatjo'. Be'len bene' diža' cont yesenezde' chesone' da' xinj, gwdił legaque' che da' malen' chesone' cont yesyetingden', na' gwđap yela' chxenlaže' bzejni'ide' da' cheyala' yesone'.

³ Gwžin ža cate' bi yesaclaže' bene' yosozenague' xtiža' Diosen' da' chzejni'icho da' naquen da' li, na' yosotobe' bene' yosozejni'ide' legaque' diža' yoble da' yesazlaže' legacze'.

4 Yesebejyichje' bich yosozenague' che diža' lin' na' yosozenagche' che diža' da' chesaljlaže' bene'.

5 Perw ca nac neda', ba zoa yesote' neda', da' li ba chžin ža šjayzoa' len Diosen' te da' sacazi'o, na' soatezo' go'o diža' güen che Jesucriston' do yičj do lažo'. Ben yogo' da' gwlo'o Diosen' lo nao' gono'.

6 Na' ca nac neda', ba zoa yesote' neda', da' li ba chžin ža šjayzoa' len Diosen'.

7 Na' chebeda' guac nia' do yičj do laža' ba gwdillena' da' chgue'e Diosen'. Ba bena' yogo' lo' da' gwlo'o Diosen' lo na' gona' na' ba gwzoačhača' chejnilaža' Jesucriston' na' ne' zoačhačza'.

8 Na' cate' šjayzoa' len Diosen', gone' cont soa' mba da' bena' güen šlac mbana'. Xancho Jesucriston' zeje' to licha, na' cate' žin ža čhoglagüe' nac gac che yogo' lo' bene', gague neda' zen' gone' soa' mba, san yogo' nochle bene' chesyebede' chesebeze' baten' yide' da' yoble, lecz gone' cont legaque' yesenite' mba.

Da' chaclaže' Pablon' gon Timoteon'

9 Ben byen con ga zelao saque'do' yob yido' nga.

10 Ben ca', le Demas ba gwlejičhje'nda' na' ba zjayde' yež Tesalónica da' chi'chgua yičhje' bin' gata' che' lo yežlio nga. Na' Crescente ba zeje' Galacia na' Titon' ba zeje' Dalmacia.

11 Yetoga Lucas nga'anlen neda' nga. Na' che'šco' Marcos cate' yido', cont gaclene' neda' len xšin Dios da' chona'.

12 Ca nac Tíquicon', ba gwseła'ne' ciuda Efeso.

13 Na' chaclaža' goxo' xadoñ chia' da' bocua'ana' yež Troas liž Carpo cate' yido', na' lecz goxo' libr ca', na' da' žialaoch goxo' yid ca' da' ba zjanyoj.

14 Alejandro bene' güečhač yan' ba benchgüe' mal len neda'. Xancho Diosen' gwnežjue' le' castigw che da' malen' bene'.

15 Na' gwsaco' len le', le chonchgüe' clele len xtiža' Diosen' da' chyixjue'echo.

16 Cate' bosodie' neda' lo na' justis ca' da' nechw, nono gwzoo no gaclen neda', yogo' bene' ca' goda' yesaclen neda' gosebejyichje'nda'. Diosen' yezi'xene' čhegaque' da' bi gosaclene'nda'.

17 Bia'cze Xancho Jesucriston' gwzoalene' neda' na' goclenchgüe' neda' cont bia' xtižen' len yogo' bene' ca' že' na', bene' bi zjanac bene' Israel. Na' bosle' neda' lo na' yeła' goten'.

18 Na' nezda' yoslacze Xancho Jesucriston' neda' lo yogo' da' mal da' gac chia', na' guaclencze' neda' šlac žin ža šjayzoalena'ne' gan' zoe' chnabi'e. Cheyała' gonxenchwne' toli tocañe. Can' gonščaczcho.

Pablo chguape' tiox yeto čope' na' chnablaže' gaclen Diosen' legaque'

19 Gwguapšco' tiox Prisca na' Aquila na' lecz ca' bene' lo' yo'o che Onesíforo.

20 Erasto bega'ane' ciuda Corinto, na' bocua'ana' Tróximo yež Mileto, le gocšende'.

21 Ben con ga zelao saque'do' cont yido' cate' za' žin tiemp zag. Eubulo, Pudente, Lino, Claudia na' len yezica'chle bene' chesejnilaže' Jesucriston' nga chosoguape' le' tiox.

22 Chnaba' soašca Xancho Jesucriston' len le' na' gaclenšca Diosen' yogo'le. Da' na'zen' chzoja'.

CART DAN' BZOJ POSTLW SAN PABLO CHE TITO

Pablon' bzoje' cart nga

¹ Neda' Pablo chona' xšin Diosen' na' naca' postlw che Jesucriston' cont gaclena' bene' ca' gwlej Diosen' yesejnilaže'ne', cont yeseņezde' can' ža diža' li che Diosen'. Na' diža' li čhen' chzejni'in can' goncho da' chazlaže',

² na' chzejni'in zoacho lez šjayzoacho len Diosen' toli tocane. Za' xe yežlion' Diosen' gwne' bene' yesejnilaže' le' šjasjenite' len le' toli tocane, na' Diosen' bi chonlaže' bite'teže da' že'.

³ Na' na'a ba chac da' bžie' bia' gac da' ba chzejni'ida' bene' xtižen', le Dios ben' none' yela' mban checho toli tocane gwlo'e lo na' chyixjue'eda' bene' xtižen'.

⁴ Chzoja' le' Tito, naco' ca dogualje xi'ina' da' bzejni'ida' le', na' naccho txen chejnilaže'cho Jesucriston'. Xacho Diosen' na' Xancho Jesucriston' ben' none' yela' mban checho toli tocane yesaclenšque' le'e na' yesyeyaše'de' le'e na' yesone' cont soa cuezle binlo len xbab čhlen'.

Da' chon Titon' gan' nzi' Creta

⁵ Cate' boca'ana' le' gan' zoa yežlio da' nzi' Creta dan' chi' lo nisdaon', gwnia' gwzozo' gono' dan' chona' cate' gwzoa' na', to to yež cuejo' bene' blao bene' yosozejni'i na' yosogüia yesene'e yezica'chle bene' chesejnilaže' Jesucriston'.

⁶ Na' še zoa bene' zoacze' chone' da' güen cont bibi de da' yosode'e bene' yesene' da' xinjen' chone', še naque' bene' zoa toz no'ol che', še xi'ine' ca' chesejnilaže' Criston', na' še bi zjanaque' bene' chesyedabaga', san chosozenague' cont bi zjalaže' chesone' da' xinj, ca bene' nac ca' cheyala' cuejo' güia na' lježe'.

⁷ Cate' cuejo' bene' co' Diosen' lo ne'e güia ne'e yezica'chle bene' chesejnilaže' Jesucriston', cuejo' bene' zoacze' chone' güen. Bi cuejo' bene' ya'laže', bene' naque' bene' loc, na' bene' borrašw. Bi cuejo' bene' chebede' cueque' žaš, na' neca cuejo' bene' zelaže' gone' da' xinj cont gone' gan mechw.

⁸ Bene' cuejo' cheyala' gaque' bene' chbede' chlebe' bene' zito ližen'. Cheyala' gaque' bene' zoateze' chone' da' güen na' bene' chon xbab, bene' chon da' zej to liča, bene' chon da' chazlaže' Diosen' na' bene' chon con ga zelao chzaque'de' cont chone' bi da' ža Diosen'.

⁹ Cheyala' gaque' bene' zoachache' do laže' chzenague' diža' li che Diosen' da' bzejni'ida' cont gac gwzejni'ide' bene' yoble diža' güenna', na' gone' chačhlaže' cont yesenite' yesejle'e da' naquen da' li, na' gac gwlo'ede' bene' ca' chesene' contr diža' li che Diosen' cont yeseņezde' clelen' chesone'.

¹⁰ Čhnia' gono' ca', le nita' bene' zan bene' Israel gualaž chia' na' yebał bene' yoble chesene' zjanaque' chio' txen, perw bi chosozenague' che Diosen'. Bibi zaca' xtiža'gaque' da' chosozejni'ide', cont chesonlede' bene'.

¹¹ Na' da' zjachi' yichjgaque' yesone' gan mechw, da'nana' chosozejni'ide' da' zej clele. Cheyala' gonle cont yesenite' šize bich yosozejni'ide' diža' güenlažen', le clelen' chesone'. Na' bene' zan len bene' lo' yo'o čhegaque' chesacželaže' che xtiža' Diosen' neče xtiža'gaquen'.

¹² Cana' gwzoa to bene' gwneya'a, goque' bene' Creta, na' gwne' che bene' gualaž che' ca: "Bene' Creta bate'teže zjanaque' bene' güenlaže' na' zjanaque' ca bež znia' yela' güen da' xinj čhegaquen'. Lecze zjanaque' bene' lia na' bene' xagüed."

¹³ Na' da' li can' gwnen'. Da'nana' tilo' legaque' che da' xinjen' chesonen' cont nita'čače' yesejle'e xtiža' Criston'.

¹⁴ Gono' ca' cont bich yosozenague' che diža' güenlažen' chesaljaže' bene' Israel gualaž chia' ca', na' neca yosozenague' che nochle bene' ba gosebeyichje' diža' li che Diosen'.

¹⁵ Diosen' ba none' yichjlažda'ochon' xilaže', na' ne da' chagwcho ne da' choxe'cho bi chžonen gac yichjlažda'ochon' xilaže'. San ca nac bene' yichjlaždao' mal ca', bene' bi chesejnilaže' Criston', bibi de da' naquen da' xilaže' len legaque'. Chesone' xbab mal, na' bibi de cheseza'laže' cate' chesone' da' xinjen'.

¹⁶ Chesene' zjanombi'e Diosen', perw nachia' bi zjanombi'ene', le chesonteze' da' xinjen'. Chesone' da' chgue'e Diosen'; zjanaque' bene' güedenag len xtižen' na' bi chesac yesone' da' güen.

2

Xtiža' Diosen' da' chsed chlo'echo bene' naquen güen

¹ Na' le', cheyala' gwzejni'ido' bene' yesone' can' ža diža' li che Diosen'.

² Bzejni'i bene' byo gol ca' bi yesezožde', san yesenite' cont bene' yezica'chle yesape' legaque' bala'an. Bzejni'i legaque' to toe' cheyala' yesenabia' cuine' cont yesenite' yesone' da'

güen, na' bzejni'i legaque' cheyała' yesenita'chache' yesejnilaže' Diosen'. Cheyała' yesacde' bene' na' yesape' yela' chxenlaže' bite'teze da' chac.

³ Lecze ca' bzejni'i no'ol gole ca' cont yesenite' yesonxene' Diosen', na' bi yesene' che bene', neca yesezožde'. Cheyała' yesenite' yesone' da' güen cont yeseneze bene' yezica'chle can' cheyała' yesone'.

⁴ Na' no'ol gol ca' cheyała' yosozejni'ide' no'ol xcuide' ca' yesenite' binlo len bene' che to toe' na' yesacde' legaque' len bi' chegaque' ca'.

⁵ Na' yosozejni'ide' legaque' cont to toe' yesenabia' cuine' na' yesone' da' zaca' yesone' cont yesaque' bene' laždao' xilaže' len yogo' da' chesone', na' yosogüia yesena' ližgaque' binlo, yesaque' bene' šagüe' na' yosozenag to toe' che bene' chegaque'. No'ole xcuide' ca' cheyała' yesone' güen can' ba gwnian' cont nono ne mal che xtiža' Diosen'.

⁶ Na' lecze cheyała' neyoedo' bene' byo xcuide' ca' cont to toe' yesenabia' cuine' na' yesone' da' cheyała' yesone'.

⁷ Na' le', bite'teze da' gono', ben con da' nac güen cont yesacbe'e bene' yoble naquen' cheyała' yesone'. Cate' chsed chlo'edo' bene', bzejni'i legaque' do lažo', benen cont nacbia' chapo' Diosen' bala' aṅ.

⁸ Bsed blo'e diža' li cont nono na xtižon' naquen mal. Na' še soatezo' gwsed gwlo'edo' diža' li, nachen' bene' ca' chesexi'a chio' yesyeto'ede' da' bi chesyeželde' bi da' mal yesene' checho.

⁹ Gož bene' güen žin ca' yosozenague' che xangaquen' na' yesone' bite'teze da' yese'ene' sin cbi yosyoži'e xtiža'gaquen'.

¹⁰ Bi yesebane' bi da' de che xangaquen', san yesenite' do laže' cont yezica'chle bene' yesele'ede' chesone' güen na' yesacbe'ede' güenna' nac xtiža' Diosen', Dios ben' none' yela' mban checho toli tocaṅe.

¹¹ Diosen' nži'ilaže'de' chio' beṅač na' ba blo'e chaclaže' gone' yela' mban toli tocaṅe che yogo'cho.

¹² Na' da' none' ca' chzejni'in chio' cheyała' cuejyichjo yogo' da' choncho da' bi chazlaže' na' yogo' da' chzelaže'cho gata' checho o da' chzelaže'cho goncho da' bi naquen güen lagüen'. To tocho cheyała' soa cuezcho nabia' cuincho cont goncho da' nac da' zaca'. Na' cheyała' goncho da' zej to liča; na' cheyała' soacho gonxencho Diosen' yežlio nga.

¹³ Le šlac zoacho yežlio nga zoacho mbalaz nezecho žin ža yid Jesucriston' da' yoble nse'e be'ni' juisyw. Naque' Dios checho ben' chonxencho na' ben' none' yela' mban checho toli tocaṅe, na' zaca'chgüe'.

¹⁴ Len' bnežjw cuine' neche chio' cate' gosote'ne' cont bnitlagüe' xtola'chon', na' beya' beyibe' yichjlažda'ochon' len da' malen' cont none' chio' ca' xi'ine'. Na' bene' ca' cont yebecho goncho da' güen.

¹⁵ Can' cheyała' gwzejni'ido' bene'. Na' cheyała' goṅo' chach laže' yesone' da' güen na' tilo' bene' cheson da' xinj, le Diosen' ba gwsele' le' na' ba bene' le' yela' chnabia' cont gwzejni'ido' legaque'. Bi go'o latje yosozoe' le' to šla'ale.

3

Can' cheyała' gon chio' chejnilaže'cho Jesucriston'

¹ Da' yoble yozzendo' bene' chesejnilaže' Jesucriston' cheyała' yosozexjwyichje' yosozenague' che justis ca' na' che bene' gwnabia' chegaque' ca' na' bate'teze cheyała' yesone' da' güen.

² Yozzendo' legaque' bi cheyała' yesene' mal che note'teze bene'. Bi cheyała' yesedił yosošaše', san cheyała' yesaque' bene' šagüe' na' yesape' yela' chxenlaže' len yogo'loł bene'.

³ Chio' lecze bi gwejni'icho cana' na' bencho güedenag len Diosen'. Gwejle'cho diža' güenlažen' na' bentezcho bi da' xinj da' gwzelaže' lažda'ochon'. Gwdacho bencho con da' bebecho. Gwzoacho bxi'a lježcho. Besegue'e bene' chio' na' bgue'e lježcho.

⁴ Perw bžin ža Dios ben' none' yela' mban checho toli tocaṅe blo'ede' chio' catec bene' šagüe' naque' na' catec chacde' chio' beṅač.

⁵ None' chio' yela' mban toli tocaṅe gague neche bi da' güen benchon', san da' beyaše'de' chio'. Nachen' beya' beyibe' yichjlažda'ochon' len da' malen' cate' gwzolao chejnilaže'chone', na' Spiritw chen' bocoben yichjlažda'ochon'.

⁶ Diosen' gwsele' Spiritw chen' zoan lo' yichjlažda'ochon' chaclenchguan chio', le Jesucristw ben' none' yela' mban checho toli tocaṅe gwṅabde'ne' selen'.

⁷ Na' ca' ba beyaše' beži'ilaže'de' chio' cont beyone' chio' bene' güen lagüen' na' cont soa cuezcho nezecho žin ža šjayzoacho len le' toli tocaṅe.

⁸ Da' ca' ba gwnia' nga zjanaquen da' li, na' gono' byen yosozenag bene' ca' gwzejni'ido' chen. Le bene' ca' ba chesejnilaže' Diosen' cheyała' yesebec yichjgaque' yesone' da' güen. Na' da' quinga ba gwnia' zjazaca'chguan na' yesaclenen note'teze bene'.

⁹ Perw bi gono' txen len beṇe' chesediḷ chosošaše' che bize diža' da' bi zejen. Na' bi cuec yichjo' che diaža che da' xozxta' ocho ca'. Bi gono' txen len beṇe' chesediḷ chosošaše' che bi zejen dan' nyoj le'e ley da' bzoj da' Moisésen', le da' chesone' ca' bi chaclenen beṇe' na' bi naqen da' zaca'.

¹⁰ Na' beṇe' ca' cheson cont beṇe' ca' chesedop chesežague' chesonxene' Jesucriston' chesechoje' chople, neyoedo' legaque' bich yesone' ca'. Na' še ba gwneyoedo' legaque' to chope ni'a na' bi chosozenague', yebejo' legaque' ca'ale.

¹¹ Le da' bi chosozenague' nachen' nezecho zjambiaye'e na' zjanape' doḷa' che da' xinjen' chesone'.

Can' cheyaḷa' gon Titon'

¹² Cate' seḷa' Artemas o Tíquico gan' zon', ben con ga zelao saque'do' cont yido' yežagcho lo' ciuda Nicópolis, le ba bechoglaža' yega' ana' na' tiemp zag.

¹³ Na' ben yogo' da' gac gono' par gacleno' Zenas ben' nsed ley, na' Apolos, cate' yesa'aque' gan' zon' cont bibi yeseyažjde' chanez.

¹⁴ Beṇe' lježcho ca' chesejnilaže' Criston' cheyaḷa' yesoe'laže' yesone' da' nac güen na' yesaclene' beṇe' chyažj chchine. Le cheyaḷa' gaccho beṇe' chon da' zaca'.

Beṇe' ljež Pablon' chosoguape' Titon' tiox

¹⁵ Yogo' beṇe' cheson xšin Diosen' txen len neda' nga chosoguape' le' tiox. Na' chṇaba' gwguapšco' tiox beṇe' ca' zoaleno' na', beṇe' ca' chesacde' chio' da' naccho txen chejni-laže'cho Criston'. Diosen' gaclenšque' yogo'le. Da' na'zen' chzoja'.

CART DA' BZOJ POSTLW SAN PABLO CHE FILEMÓN

Pablo chzoje' carten'

¹ Neda' Pablo dia' ližya nga da' chyixjue'eda' xtiža' Cristo Jesúsén'. Chzoja' le' Filemón, na' txen len bene' lježcho Timoteon' chguapto' le' tiox. Chaqueto' le' da' naccho txen choncho xšin Diosen'.

² Na' lecze chguapto' tiox bene' ca' chesedop chesežague' chesonxene' Jesucriston' ližo'. Na' le' Apia, naco' ca bene' zanto', na' le' Arquipo, chono' neto' txen choncho xšin Diosen', lecze chguapto' le'e tiox.

³ Chnabeto' Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab chelen'.

Filemónna' chejnilaže' Jesucriston' na' chacde' bene' lježe'

⁴ Na' le' Filemón, yogo' ni'a cate' chjayze'eda' le' šlac choł güiža' Diosen', choa' yela' choxcen che' can' ba chono'.

⁵ Ba benda' diža' can' chejnilažo' Xancho Jesucriston' na' can' chacdo' lježcho bene' lecze chesejnilaže' Jesucriston'.

⁶ Na' chnaba' gaclen Diosen' bene' ca' ba gosejnilaže' Jesucriston' lagüe be'lenu' legaque' diža' can' chejnilažo'ne'. Chnaba' gaclene' legaque' cont yesacbe'ede' yogo' da' güen juisyw da' chon Diosen' lo' yichjlaždao' chio' chejnilaže' chone'.

⁷ Bene' migw, leca chbeda' na' chac chačh laža' nezda' chacchgüedo' bene' lježcho ca' chesejnilaže' Jesucriston', le chacleno' legaque' cont nita'che' mbalaz.

Gwnabe' yezi'xen Filemónna' che Onésimo

⁸⁻⁹ Dan' chacdo' Criston' na' chacdo' bene' lježo' ca', da'nana' chneyoeda' le' gono' to da' chaclaža' gono'. Da' naca' postlw che Criston' guac gona' byen gono' da' gwžia' bia' gono' šaca' žan gwchina' yela' chnabia' da' yo'o lo' na'. Perw bi žan gona' ca'. Neda' Pablo ba naca' bene' gole na' lecze na'a ba dia' ližya nga da' chyixjue'eda' xtiža' Jesucriston'.

¹⁰ Na' chnaba' goclen laguon' par Onésimo ben' ba nona' ca xi'ina'. Le šlac dia' ližya nga bsd blo'eda'ne' cont chejnilaže' Jesucriston'.

¹¹ Cana' bi goque' mos güen chio', san na'a ba naque' mos güen chio' na' lecze ca' chia' neda'.

¹² Ba chezselane' laguo', na' chneyoeda' le' yolebo'ne' na' yezi'xeno' che', le leca chacda'ne'.

¹³ Zelaža' yega'anlene' neda' cont gaclene' neda', gone' da' cheyala' gono' šlac dia' ližya nga da' chyixjue'eda' xtiža' Jesucriston'.

¹⁴ Perw bi chaclaža' nabda'ne' bi gone', le naquen chio' le' nao' nac gone', cont do lažo' gono' bi da' güen da' gono' na' gague gončhi'on.

¹⁵ Diosen' be'e latje beza' Onésimon' ližon' šlož cont soale txen toli tocané.

¹⁶ Na' na'a bich naque' mos chio' na'ze san naque' ca bene' bišo' da' naque' txen len chio' chejnilaže'cho Xancho Jesucriston'. Leca chacda'ne', na' le' cheyala' gacchdo'ne', gague con ca chacdo' note'teze beñach, san can' chacdo' bene' lježo' chesejnilaže' Xancho'.

¹⁷ Da'nana' še da' li naccho txen chejnilaže'cho Jesucriston', yolebo'ne' cacze chlebo' neda' cate' chedena'a le'e.

¹⁸ Na' še bi da' mal bende' le' o še bi da' chale' chio', neda' chixjuan'.

¹⁹ Cuincza' neda' Pablo chzoja' da' nga, neda' chixjua' bi da' chale'. Na' bibi chnia' che da' chalo' le' chia' neda' da' ba de yela' mban chio' toli tocané.

²⁰ Bene' migw, da' chaquecho Xancho Jesucriston' chaclaža' gono' dan' chnaba' nga ca to goclen chia'. Benšca ca soa' mbalaz, le naccho txen len Criston'.

²¹ Zoa' lez gwzenago' chia' na' goncho' güen clal ca dan' žia' le', da'nana' chzoja' le'.

²² Na' yeto da' chnaba', chaclaža' yedesoa' ližon' cate' yida' gan' zoalen'. Le zoa' lez yob gac yedyena'a le'e can' chñable lao Diosen' cate' choł güižlene'.

Bene' ca' nita' len Pablon' chosoguape' Filemónna' tiox

²³ Epafra die' ližya nga txen len neda' da' chyixjue'ede' xtiža' Cristo Jesúsén'. Na' le' chguape' le'e tiox.

²⁴ Na' lecze ca' bene' ca' chesaclene' neda' len xšin Diosen' nga, Marcos, na' Aristarco, na' Demas, na' Lucas, chosoguape' le'e tiox.

²⁵ Xancho Jesucriston' soašque' len le' gaclenšcace' le'. Da' na'zen' chzoja'.

CART DAN' NYOJ CHE BENE' HEBREO CA'

Diosen' gwsele' Xi'ine' cont be'lene' benachen' diža'

¹ Cani' Diosen' be'lene' da' xozxta'ochó ca' diža' len bene' gwsele' goso'e xtižen'. Zan las gosoe' da' bene' ca' xtižen' na' nža'te ca goso'en to toe'.

² Perw na'a ba zoa žin ža yeyož yežlion' na' Diosen' ba be'lene' chio' diža' dan' gwsele' Xi'inen' bedezejni'ide' chio'. Na' Xi'in Dios nan' bene' yaba na' yežlio nga len yogo' bichle da' de nga na' gate'teze. Na' bengaquen' con can' gwnalaže' Diosen'. Na' gwžin ža gac lo na' Xi'in Diosen' yogo' benach, beyixe', na' bica'chle da' bene'.

³ Na' Xi'in Diosen' chlo'e catec bene' zaca' nac Diosen', le cayane' nac yichjlaždao' Xe' Diosen' nac yichjlažda'ogüen'. Na' Xi'in Diosen' chone' cont yaban', yežlion' na' da' ca' chle'echo le'e yaban' na' yežlion' chesonen žin, le nape' yela' guac cont chac con can' že'. Len' bzanlaže' cuine' gote' cont bexi beyach chio' len xtoła'chon'. Na' beyož bene' ca' beyepe' yaban' zjyachi'e cuit Xe' Diosen' ben' nac bene' zaca' juisyw na' chnabi'e txen len le'.

Xi'in Diosen' zaca'che' ca angl ca'

⁴ Naque' bene' zaca'chgua ca angl ben' cheson žin che Diosen', na' Diosen' bene' cont leca ba chacxenche' ca angl ca'.

⁵ Diosen' bina' ye'e ne to angl ca dan' gože' Xi'inen', gože'ne':

Len' naco' Xi'ina';

na'aža ba blo'a zoaczo'.

Na' bina' güe' diža' che note'teze angl can' bi'e diža' che Xi'inen', gwne':

Neda' gona' cont gachia' naca' Xe',

na' gona' cont gachia' naque' Xi'ina'.

⁶ Na' da' nac Xi'in Diosen' la'zelagüe bene' zaca', da'n'an' cate' Diosen' gwsele'ne' yežlio nga gwne':

Yogo'lol angl chia' cheyala' yesonxene' le'.

⁷ Na' che angl ca' gwne':

Chona' cont angl chia' ca' bene' chesone' žin chia' chesaque' ca be' dan' chechj na' chesaque' ca yi' bel.

⁸ Perw che Xi'inen' be'e diža', gwne':

Len' naco' Dios na' nabi'o toli tocaņe.

Na' leca güen chnabi'o, chono' con da' zej to liča.

⁹ Chebedo' da' zej to liča na' chgue'edo' da' malen'.

Da'n'an' neda' Dios ben' chonxeno' ba bena' cont zoacho' mbalazech ca note'teze bene'.

¹⁰ Na' da' yoble gozna Diosen' che Xi'inen':

Xana' Dios, beno' yežlion' ža gwlaste,

na' yogo' da' chle'echo le'e yaban' lecze le' benon'.

¹¹⁻¹² Na' gwžin ža cate' te che yogo' dan' chle'echo le'e yaban' na' lo yežlion',

perw le' bi te chio'; soaczo' toli tocaņe.

Na' gwša'a le'e yaban' na' yežlion' ca to bene' chša' xe' cate' ba beyoen na' chaze' yeton.

Na' le'e yaban' na' yežlion', gono' len len can' chon to bene' cate' chotob xe'.

Perw le', tozeczce can' gaco' toli tocaņe, gwbat žin ža te chio'.

¹³ Diosen' bina' ye'e ne to angl ca dan' gože' Xi'inen', gože'ne':

Gwche'edo' cuita' nga nabi'a'cho txen,

na' gona' cont yogo' no chesegue'e le' yosozejw yichje' yosozenague' chio'.

¹⁴ Na' ca nac angl ca', yogue' zjanaque' bene' cheson xšin Diosen', na' chsele' legaque' chesaclene' chio' ba gwleje' šjajzoacho len le'.

2

Cheyala' gwzenagcho che Diosen' cont yeque'e xtoła'chon'

¹ Na' da' nac Xi'in Diosen' bene' zaca'ch ca angl ca', do yichj do laže'cho cheyala' gwzenagcho xtižen' da' ba benecho. Le še bi gwzenagcho chen do yichj do laže'cho, guanlaže'chon na' cuejyichjchon.

² Diosen' goclaže' yosozenag da' xozxta'ochó ca' che ley che' dan' goseyixjue'e angl ca'. Da'n'an' Diosen' bnežjue' castigw da' cheyala' si' to toe' bate'tez bi bosozenague' chen, con ca nac da' mal da' gosone'.

³ Gague da' yelacho bi si'cho castigw še bi gwzenagcho xtiža' Xancho Jesús'en' da' gwduxjue'ede' že' chaclaže' goņe' yela' mban checho toli tocaņe. Da' zaca'chgua da' ben

Xancho Jesúsen' cont gata' yela' mban checho toli tocanē. Cuine' gwdixjue'eden' da' nechw, na' bene' ca' gosetalen le' bosolo'ede' chio' le naquen da' li.

⁴ Diosen' bene' cont gosone' da' zaca' yebanecho, na' bnežjue' legaque' zan yela' guac, na' Spiritw chen' benen cont gosone' da' zan da' güen len yela' guac chen. Na' yogo' da' ca' goc con can' gwnalaže' Diosen'. Na' Diosen' bene' ga gosac da' ca' cont nezecho xtiža' Xancho Jesucriston' naquen da' li.

Jesucriston' goque' can' nac chio' benačh

⁵ Na' gague angl can' yesenabia' cate' žin ža gata' yežlio cobe dan' choe'cho diža' čhen.

⁶ Na' de late' Xtiža' Diosen' gan' nyoj diža' da' be'len to bene' Diosen', gwne':

¿Bixčhen' nži'ilažo' neto' benačh? le bitec bi zaca'to'.

Na' ¿bixčhen' chi' yichjo' chacleno' neto'?

⁷⁻⁸ Beno' cont benačhen' zjanaque' blao, na' con angl ca'ze zjanaquech blao ca benačh.

Na' beno' cont benačhen' naque' bene' zaca' na' cont chaxcene'.

Beno' cont yogo'lol' da' zjade yesaquen lo na' benačh, na' len yogo'lol' beyixē' yesacba' lo na'gaque'.

Na' da' ben Diosen' cont yogo'lol' da' de yesaquen lo na' benačhen' na' yogo' beyixē' yesacba' lo na'gaquen', bibi bocua'an Diosen' da' bi gwlo'e lo na' benačhen', la'czla' na'a biña' le'echo yesac yogon' na' yogo'ba' lo na' benačhen'.

⁹ Perw yogo'lol' ba yo'ocze lo na' Jesúsen', la'czla' šlac gwzoe' yežlio nga angl ca' gosacche' blaoch ca le'. Perw na'a da' bzanaže' cuine' gote', da'nān' Diosen' bene' cont chaxcneche' ca legaque' na' cont nachia' naque' bene' zaca' juisyw. Le da' nži'ilaže' Diosen' chio' benačh, da'nān' bžie' bia' got Jesúsen' cont gac yeque'e xtoła' to to benačh.

¹⁰ Diosen' bene' benačh, bene' beyixē' ca' na' bite'tezecle da' zjade cont chaxcene'. Na' Diosen' chaclaže' bene' zan yesaque' xi'ine' na' šjasyezoe' len le' gan' yo'ochgua be'ni', na' güenna' bene' bžie' bia' gwxaca'zi' Jesúsen' cont gac goņe' yela' mban toli tocanē che chio' benačh.

¹¹ Jesúsen' ba gwlo'e chio' lo na' Diosen' na' txen len Jesúsen' naccho xi'in Dios. Da'nān' bi cheto'e Jesúsen' ne' naccho biše' lježe'.

¹² Quinga gwna Jesúsen' gože' Diosen':

Gwzejni'ida' bene' biše' lježa' ca' can' nac yichjlažda'ogoun',

na' txen len bene' ca' zjandop zjanžag chesonxene' le' goła' gonxena' le'.

¹³ Nach Jesúsen' gwne':

Neda' soacha' šejnilaža' Diosen'.

Nach da' yoble gozne':

Nga zoa' txen len bene' ca' gwlo'o Diosen' lo na', bene' ca' ba gwque'e ca xi'ine'.

¹⁴ Chion' ba gwca'a Diosen' ca xi'ine' naccho bene' bela' chen, na' da'nān' Jesúsen' lecze golje' goque' bene' bela' chen cont bnežjo' cuine' gosote'ne'. Na' da' got Jesúsen', da'nān' gwzoede' bzoe' šla'ale Satanás dan' chnabia' da' xigüe' ca' na' dan' choņen yela' got che benačhen'.

¹⁵ Jesúsen' bene' cont bich chžebcho gatcho, can' chesežeb yezica'chle benačh šlac de yela' mban čegaque', chesežebe' yesate'.

¹⁶ Jesúsen' bide' yežlion', gague cont gaclene' angl ca', san cont goclene' chio' naccho xi'in diaža che da' Abrahanna'.

¹⁷ Na' da'nān' benen byen goc Jesúsen' doxen can' nac chio' benačh cont naque' bžoz blao checho lao Diosen'. Na' bnežjw cuine' bñitlagüe' xtoła'chon' na' zoe' cheyaše'de' chio' con can' chazlaže' Diosen'. Na' da' bnežjw cuine' bñitlagüe' xtoła'chon', zaca'lebde' ca bžoz blao che nación Israel chechon' ben' gwyej lao Diosen' bežue' chen che beyixē' cont gwñabe' yezi'xen Diosen' xtoła'gaquen'.

¹⁸ Na' da' bžagłao Jesúsen' cate' gwlo'oyela' gwxiyen' le' gone' da' mal, perw bibi da' mal bene', da'nān' nežde' naclen' gaclene' chio' cate' chgo'oyela' gwxiyen' chio' goncho da' mal.

3

Jesúsen' zaca'che' ca da' Moisésen'

¹ Bene' migw, Diosen' ba gwleje' chio' naccho lo ne'e, na' cheyała' goncho xbab che Cristo Jesús ben' gwsele'. Naque' bžoz blao checho na' ben' chejnilaže'cho.

² Jesúsen' bene' cayaņen' gwna Dios ben' gwseła' le' šlac gwde' yežlion', ca'cze ben da' Moisésen' cate' le' goclene' da' xozxta'ocho ca' can', bene' ca' gosac diaža che Dios.

³ Perw Jesúsen' zaca'che' ca da' Moisésen', le len' bxiē' diaža che Diosen', na' da' Moisésen' naque' con to bene' za' lo diaža che Diosen'.

⁴ Gwnita' benačh bene' bxiē' to to diaža yežlio nga, san ca nac Diosen', len' bxiē' yogo'te da' zjade.

⁵ Da Moisésen' goque' ca xmos Diosen' cate' bene' con can' gwna Diosen' cont goclene' da' xoxxta' ocho bene' ca' gosaque' diaža che Diosen'. Na' da' Moisésen' be'e diža' che da' za' gac da' za' chixjue' e Diosen' benachen' ca tiempa'.

⁶ Perw Criston' bi goque' ca to mos dan' gwzoe' bene' can' gwna Diosen', san da' naque' Xi'in Diosen' da' nan' bene' can' gwnen', na' naque' Xan yogo' chio' naccho diaža che Diosen'. Na' da' li naccho diaža che Diosen' še zoačhačho chejniłaže' chone' na' chebecho nezecho gac güen checho.

Guac soacho mbalaz len Diosen'

⁷ Da' nan' cheyala' gwzenagcho can' ža Spiritw che Diosen' len da' nga da' nyojen, žan: Še Diosen' nie' le'e na'a,

⁸ bi gonle güedenag can' goson da' xoxxta' ole cani' cate' besyedabague' Diosen' latje daš gan' chesaše'.

⁹ Nach Diosen' gwne':

Bi gosejle' e še leda' dan' goša' legaque' gwnežjua' da' yesezaca' zi' e neče xtola' gaquen'.

Bi gosejle' e chia' cate' gosaše' latje dašen', la' cžla' čhoa iz besele' ede' can' bena' len legaque'.

¹⁰ Da' nan' bža' a bene' ca' gwnitan' na' gwnia':

“Yogo' las chesejle' e diža' güenlaže',

na' bi chosozenague' chia' cont yesone' can' chazlažan'.”

¹¹ Nachen' bža' a legaque' na' da' baži gwlo' a gwnia':

“Gwbat nite' mbalaz yesyezi' laže' can' chezi' laža' neda'.”

¹² Bene' migw, bi güe' le latje nabia' da' malen' yichjlažda' ole na' gonen cont cuejyichjle bich šejniłaže' le Diosen' ben' zoa toli točanē.

¹³ Na' šlac na' a ne' decze latje gwzenagcho che Diosen', le neyoe lježle tža tža cont ne tole bi gonle xhaben' clele, gaquele bibi nonen gontezle da' xinj.

¹⁴ Da' li naccho Criston' txen še ne' zoačho chejniłaže' chone' cate' žin ža gatcho, con can' gwzolačho chejniłaže' chone'.

¹⁵ Nyoj Xtiza' Diosen' che chio', žan:

Še Diosen' nie' le'e na'a,

bi gonle güedenag can' goson da' xoxxta' ole cani' cate' besyedabague' Diosen'.

¹⁶ Na' da' žan ca', choen' diža' che da' xoxxta' ocho ca' bebej da' Moisésen' nación gan' nzi' Egipto. Gosende' can' gož Diosen' legaque', perw bi bosozenague', besyedabague' Diosen'.

¹⁷ Da' nan' čhoa iz Diosen' bže' e legaque' neče gosone' da' xinjen', na' gosat ben' besyedabague' Diosen' šlac ne' zjalaže' latje dašen'.

¹⁸ Na' legaque', da' bi bosozenague' che Diosen', da' baži gwlo' e, gwne' bi güe' e latje yesenite' mbalaz yesyezi' laže' can' chezi' laže' Diosen'.

¹⁹ Na' nacbia' da' bi gosejle' e che Diosen', da' nan' bi goc nite' mbalaz yesyezi' laže' can' chezi' laže' le'.

4

¹ Na' ca' nezecho lecze neče chio' Diosen' gwne' bene' yesejle' xtiže' yesenite' mbalaz yesyezi' laže' can' chezi' laže' le'. Da' nan' cheyala' gwsaca' cho cont bi goncho güedenag len le'.

² Chio' ba benecho diža' güen cont gac soacho mbalaz ca diža' dan' gosene da' xoxxta' ocho ca' cani', perw diža' da' gosende' bi goclenen legaque', le bi gosejle' en.

³ Na' chio', še chejle' cho da' ža Diosen', ba zoačho mbalaz chezi' laže' cho can' chezi' lažen'. Na' nyoj da' gwne' che da' xoxxta' ocho ca', žan:

Nachen' bža' a legaque' na' gwlo' a da' baži, gwnia':

“Gwbat nite' mbalaz yesyezi' laže' can' chezi' laža' neda'.”

Na' nezecho Diosen' gwzolačho chezi' laže' cate' beyož bxiē' yaban' na' yežlion' na' bichle da' bene' ža gwlaste.

⁴ Na' zoa late' gan' nyoj Xtiza' Diosen' can' bene' ža gažen', žan:

Xop ža ben Diosen' yaban', na' bichle da' bene' cate' bxiē' yežlion'.

Na' bžin ža gaže, bich bi bene', con gwzoe' mbalaz bezi' laže'.

⁵ Na' lecze nyojen can' gwne', žan:

Gwbat nite' mbalaz yesyezi' laže' can' chezi' laža' neda'.

⁶ Na' ne' naquen da' li bał bene' yesejle' e xtiža' Diosen' na' nite' mbalaz yesyezi' laže' can' chezi' laže' le', na' bene' ca' gosende' diža' güen čhen' cani' bi gosejle' en, na' bi goc yesenite' mbalaz yesyezi' laže' yela' güedenag chegaquen'.

⁷ Na' gwdechle gwne' Diosen' da' yoble gwne': “Na' a guac ni'ta' le mbalaz yezi' laže' le.” Na' bene' cont da' rey David bzoje' da' nga, žan:

Še Diosen' nie' le'e na'a,

bi gonle güedenag.

⁸ Da' Josué gwchi'e da' xoxtao' chio' bene' Israel gan' gosezi'e yežlion' da' bnežjw Diosen' legaque', perw bi bene' cont yesenita' bene' ca' mbalaz yesyezi'laže'. Da'n'an' Diosen' be'e diža' gwdele, gwne' gwžin' ža yesenite' mbalaz yesyezi'laže'.

⁹ Na' da'n'an' bene' ba gwlej Diosen' cont yesaque' lo' ne'e, legaque' guac yesenite' mbalaz yesyezi'laže' ca' mbalazen' gwzooa le' cate' gwzolağüe' chezi'laže'.

¹⁰ Na' bene' ca' ba nita' mbalaz chesyezi'laže' can' chezi'laže' Diosen', bich chesone' can' ža xbab chegaquen', san chesone' can' ža Diosen'. Da'n'an' žacho zjanite' mbalaz chesyezi'laže' can' zoa Diosen' mbalaz chezi'laže' da' beyož bxi'e' yogo' da' zjade.

¹¹ Da'n'an' cheyała' güe'laže'cho šejle'cho xtiža' Diosen' do yičj do laže'cho cont soacho mbalaz yezi'laže'cho can' chezi'laže' Diosen' na' cont bi cuiayi'cho can' gac checho še goncho güedenag len xtižen' can' goson da' xoxxta'ocho ca'.

¹² Xtiža' Diosen' chazen lo' yičjlaždao' bene' chesenden' na' chaclenen bene' chosozenag čen. Na' zaca'leben ca to spada da' nłachgua chop la'a. Perw chonch Xtiža' Diosen' ca to spada, le chlo'en chio' še chzenagcho che Diosen' o še che cuincho, na' chzejni'in chio' che xbab da' yo'o lo' yičjlažda'ochon' na' len yogo' da' chzelaže'cho še naquen güen o naquen mal.

¹³ Bibi de da' bi neze nle'e Diosen', ne to beňach, angl, da' xigüe' o bi da' zjade. Diosen' nežde' yogo'te da' yo'o lo' yičjlažda'ochon'. Na' gwžin' ža nabyožde' chio' che yogo'te da' ba bencho.

Jesúsen' naque' bxož gwnabia' checho

¹⁴ Jesús ben' naque' Xi'in Diosen' ba beyepe' yaban' na' zoe' gan' zoa Diosen'. Na' naque' bxož blao checho bene' la'zelagüe zaca'. Da'n'an' cheyała' soachachcho šejnilaže'chone' can' ba be'cho diža' goncho.

¹⁵ Jesúsen' ben' nac bxož blao chechon' chacbe'ede' bi da' naquen zdebe len chio', le gwxiyen' goclažen' co'oyelan' le' gone' da' mal, na' bžaglagüe' cayaňen' chžaglaio chio', perw bibi da' mal bene'.

¹⁶ Na' dan' zoe' naque' bxož blao chechon' ben' cheyaše'de' chio', da'n'an' cheyała' yoł güižcho Diosen' gan' chi'e chnabi'e, na' bi žebcho güe'lenchone' diža', nabečhone' yezi'xene' checho na' gaclene' chio' bate'teže chacbe'echo chyažjecho gaclene' chio', le nži'ilaže'de' chio'.

5

¹ Yogo' bene' ca' ba gosaque' bxož blao che nación Israel chechon' gosac lo' ne'e šjasesane' bi da' šjasesane' lao Diosen' na' gosote' beyixe' bosolalje' xchengacba' cont Diosen' bezi'xene' xtoła' da' xoxxta'ocho ca'.

² Na' bxož ca' gosape' yeła' chxenlaže' len bene' biña' yesejni'i can' cheyała' yesone' na' len bene' ba nxoayag da' malen' legaque', le lecze beňach bene' güen da' xinj' legaque'.

³ Da'n'an' benen byen bxož ca' gosote' beyixe' na' bosolalje' xchembra' cont gosenabe' yezi'xen Diosen' xtołen' lente xtoła' yezica'chle bene'.

⁴ Na' ne to bxož ca' bi benxen cuine' neca gwlej cuine' cont gaque' bxož blao, san Diosen' gwleje' to toe' gosaque' bxož blao can' gwleje' da' Aarón.

⁵ Na' ca'cze goc len Criston', bitw beyiljue' nac gone' cont gacxene', neca gwlej cuine' cont naque' bxož blao checho, san Diosen' gwleje'ne' na' gože'ne':

Len' naco' Xi'ina',

na'aža ba bena' cont nacbia' zoaczo'.

⁶ Na' ga yoble nyoj yeto da' gwne':

Naco' bxož tołi tocanē can' nac bxož ben' le' Melquisedec.

⁷ Na' Criston' šlac gwzoe' yežlion' boł güiže' Xe' Diosen' ben' nape' yeła' guac cont yosle' le' bi gate', gwne' ziže na' gwcheže' gwñabe' gaclene' le'. Na' da' bzexjw yičj Criston' bene' con can' gwna Xen', na' Xe' Diosen' bzenague' na' goclene'ne' cont bi bžebe' yeła' goten'.

⁸ Na' la'czla' Criston' naque' Xi'in Dios, bžaglagüe' yogo'loł da' ca' goc che' cate' bzenague' che Diosen' cont gwyejni'ide' can' chac che chio' beňach.

⁹ Na' beyož goc che' yogo'loł da' goclaže' Diosen', nach ba guaque' gwnežjue' yeła' mban tołi tocanē che yogo' bene' yosozenague' che'.

¹⁰ Can' naquen, Diosen' gwleje' le' cont naque' bxož blao checho, na' naque' ca bxož Melquisedec.

Gwsaca'cho cont bi cuejyičjcho xtiža' Diosen'

¹¹ Na' ne' de da' zan da' chaclaža' nia' le'e che da' ngan', perw naquen zdebe nian' ca šejni'ilen, le bich chebele šejni'ilen.

¹² Ba gole' gwzejni'ile bene' xtiža' Diosen', perw gualaz da' gonle ca', chyažjele no yozejni'i le'e da' yoble da' ca' bsdle da' nechw. Da'nan' zaca'leble ca to bidao' bina' gac gagw na' con chaže'be'.

¹³ Na' bene' zjanac ca to bidao' ne' chaže', bina' yesejni'ide' xtiža' Diosen' binlo cont yesone' da' zej to licha len Diosen'.

¹⁴ Na' dan' ža xtiža' Diosen' da' naquech zdebe, zaca'leben ca yela' guagw da' chagw bene' gole. Na' bene' chesejni'i lenna' chesacbe'ede' še to da' yesende' o to da' yesone' naquen güen o naquen mal, le ba zjayolagüe' chosozenague' che Diosen'.

6

¹⁻² Cana' betinjecho xtoła'chon', gwejnilaže'cho Criston', na' bsdedcho diža' güen che'. Goccho ca to bene' guat len yichjlažda'ochon' neche da' choncho da' xinj, perw ba betinjecho xtoła'chon' na'a. Bich chyažjen yezolaocho šejnilaže'cho Diosen'. Bich chyažjen gwsedchcho che dan' chesezoa bene' nis o che dan' chxoa na'cho yichj bene' na' chnabcho gaclen Diosen' legaue'. Bich chyažjen gwsedchcho can' gac cate' yechis yosban Diosen' bene' guat ca' o caten' chogbi'en yesezaca'zi' bene' ca' ba goson da' xinj. Ba nsedcho da' ca', na' na'a bač cheyla' gwsedcho xtiža' Diosen' da' nacch zdebe cont gacch yichjlažda'ochon' can' nac yichjlaždao' Criston'.

³ Lenna' goncho na'a še Diosen' gonšque' latje.

⁴ Nita' bene' ba gwyo'o be'ni' che Criston' lo' yichjlažda'ogaue', na' ba chesacbe'ede' can' nac yela' mban da' chon' Criston', na' ba zoa Spiritw che Diosen' lo' yichjlažda'ogaue'.

⁵ Ba zjanezde' xtiža' Diosen' naquen güen na' ba zjanombi'e yela' guac che Diosen' da' za' gwlo'echde' benachen'.

⁶ Na' še žin ža bich yesejnilaže' Criston' na' yesebejyichje' xtižen', bich gac yesyetinjde' che dan' ba gosebejyichje'ne', le lo' yichjlažda'ogaue' chesone' txen len bene' ca' bosode'e Xi'in Diosen' le'e yag cruzen', na' chesone' cont nochle bene' yeseg'e'ede' le'.

⁷ Cheyla' gac yichjlažda'ochon' ca to yežlio güen gan' chesaz bene'. Cheyož chac yejon' zan ni'a, nach chac cosešen'. Na' chata' dan' cheseyaže bene' chesazen'. Na' nachbia' Diosen' chebede' yežlion' nac ca'.

⁸ Bi gaccho ca to yežlio gan' chla' yag yeše' na' bichle yixe' da' nono chagw. Yežlion' nac ca' bibi zacan', na' ba zoa cuejyichj xanen len na' yixe' da' chla' lagüen žin ža šeyen.

Nezecho šjayzoacho len Diosen'

⁹ Le'e bene' migw, chacda' le'e, na' la'czla' ba bia' dižan' ca', nezda' bilja gonle can' cheson bene' chesebejyichje' xtiža' Diosen'. Chacda' gonle güen da' ba gwlej Diosen' le'e cont šjayzoale len le'.

¹⁰ Diosen' zeje' to licha, na' bi ganlaže' can' ba benle xšinen' na' can' ne' chonlen na'a chaclenle yezica'chle bene' chesejnilaže'ne'. Na' chonle ca' da' chaquele Diosen'.

¹¹ Na' chaclaža' to tole soatezle gonchle ca' do yichj do laže'le šlac bina' žin ža gatle, cont nezele šjayzoale len Diosen'.

¹² Chaclaža' bi gacle bene' xagüed len da' ža Diosen'. Na' chaclaža' gonle can' ba goson bene' zan bene' gosenite' gosejnilaže' Diosen' cani', gosejle'e gon Diosen' can' gože' legaue' gone', na' gosape' yela' chxenlaže' cate'ch bžin ža benen'.

¹³ Cate' Diosen' gože' da' Abraham xi'in diaža che' yesaue' bene' zan, bzoa cuine' gwlo'e da' baļi gac can' gwnen', le nono zoa bene' napch yela' gwnabia' ca Diosen'.

¹⁴ Gwne': "Da' li goncza' cont gac güen chio' na' cont yesac xi'in diaža chio' bene' zan."

¹⁵ Na' Abrahanna' gwdape' yela' chxenlaže' šlac gwleze', nach bžin ža gwzolao chac can' gwna Diosen'.

¹⁶ Benachen' zjayolagüe' chosozoe' Diosen' cue'e da' baļi che bi dan' chesene', le Diosen' chnabia'che' ca legaue'. Chesone' ca' cont bene' ca' chesacyože' len legaue' yesejle'e na' yeseyacxenlaže'.

¹⁷ Na' Diosen' bzoa cuine' cue'e da' baļi cont neze bene' ca' zjanac xi'in diaža che da' Abrahanna' gague da' te che dan' gwne' gonen'.

¹⁸ Diosen' bene' chope da' qui: gwne' can' gone' na' lecze bzoa cuine' cue'e da' baļi gac can' gwnen', na' gague da' te bi gac can' gwnen'. Chaclaže' chio' ba betinje xtoła'chon' yebecho nezecho šjayzoacho len le'. Na' Diosen' bi chac güe'e diža' güenlaže'.

¹⁹⁻²⁰ Na' da' nezecho šjayzoacho len Diosen', bi soa xbab chechon' quile ca'le. Jesúsen' ba gwžialagüe' gwyo'e gan' zoa Diosen' gan' nono benach goc šo', na' bene' cont chio' gac šo'cho. Le naque' bžoz blao checho toļi tocaņe, na' naque' ca bžoz Melquisedec.

7

Jesúsen' naque' ca bžoz Melquisedec

¹ Na' Melquisedequen' goque' rey na' gwnabi'e gan' nzi' Salem, na' Dios ben' nac la'zelagüe bene' blao gwleje' le' cont goque' b̄xoz. Na' goquen' Abrahanna' zeze'e lao gwdīle gan' bene' gan gayo' rey, na' Melquisedequen' jašague'ne' na' gw̄dxjue'ede' gac da' güen che da' Abrahanna'.

² Ca horen' Abrahanna' zeze'e zonse'e yogo'lol' da' jaytobe' da' bene' gan lo yela' gw̄dilen', na' gwlequen' ši cuen na' bnežjue' to cuen che b̄xoz Melquisedequen'. Na' Melquisedec zejen diža' "rey bene' zej to liča". Na' goque' rey che bene' zjanite' binlo, le Salem gan' gwnabi'e zejen diža' "zjanite' binlo".

³ Bi nyojen še no goc da' x̄axna' Melquisedequen'. Neca nyojen še no goc x̄ozxta'ogüe', na' neca nyojen baten' golje' na' baten' gote'. Da'nan' žacho Melquisedequen' zaca'lebde' ca Xi'in Dios ben' zoa toli tocañe naque' b̄xoz checho, le bi golje Melquisedequen' lo diaža che nochle b̄xoz, na' neca gwzoa nochle bene' lo diaža che' bene' tie' gwlane' xlatje'.

⁴ Le gon xbab catec bene' blao goc b̄xoz Melquisedequen'. Da'nan' da' x̄ozxta'och Abrahanna' gwleje' to cuen lo ši cuen da' ca' jaytobe' lo na' rey ca' na' bnežjuen' b̄xoz Melquisedequen'.

⁵ Na' da' x̄ozxta'och bene' ca' gosaljē lo diaža che da' Leví, ben' besyeyale' gosaque' b̄xoz che nación Israel chechon', gosone' con can' nyojen le'e ley da' bzoj Moisés, na' bosochixjue' to cuen lo ši cuen yogo' bi da' gota' che yezica'chle bene' gualaž chegaque' ca'. Na' yogo'cze' gosaque' diaža che da' Abrahanna', b̄xoz ca' na' bene' yezica'chle.

⁶ Perw Melquisedequen' la'czla' bi golje' lo diaža che da' Leví, Abrahanna' bnežjue'ne' to cuen lo ši cuen da' ca' jaytobe', na' Melquisedequen' gwnabde' Diosen' gac güen che da' Abrahanna' ben' gwna Diosen' yesac xi'in diaža che' bene' zan.

⁷ Na' nezecho bene' chac ch̄nabde' Diosen' gac güen che bene' yoble zaca'che' ca ben' gac che' da' güenna'.

⁸ Na' bene' ca' zjanac b̄xoz can' ža ley dan' bzoj Moisésen' chesezi'e to cuen güeje lo ši cuen yogo' bi da' de che bene' Israel gualaž chechon', na' b̄xoz ca' zjanaque' con ljež benachcho bene' chesat. Na' che b̄xoz Melquisedequen' ben' gwxi' to cuen lo ši cuen da' jaytob da' Abrahanna', Xtiža' Diosen' choen' diža' che' ca to bene' ne' zoacze.

⁹⁻¹⁰ Na' da' bnežjo Abrahanna' le' da' ca', guac n̄acho da' Leví bnežjue' Melquisedequen' to cuen güeje lo ši cuen da' ca', le gwdechle Levín' golje' lo diaža che da' Abrahanna', na' Leví nan' goque' x̄ozxtao' bene' ca' gosac lo na'gaque' bosotobe' da' ca' bosoxtejo bene' Israel gualaž checho ca' che Diosen'.

¹¹ Na' Diosen' bnežjue' bene' Israel gualaž checho ca' ley chen' caní' cont benen žin t̄xen len da' goson b̄xoz ca' bene' gosaljē lo diaža che da' Levín'. Perw b̄xoz ca' bi goc yesone' cont yichjlaždao' benachen' yesaquen xilaže' len Diosen'. Da'nan' byažjecho bid Jesúsen' naque' b̄xoz checho toli tocañe, na' le' naque' ca b̄xoz Melquisedequen', gague ca da' b̄xoz Aarón.

¹² Na' cont goc zoa Jesúsen' naque' b̄xoz chechon', byažjen bža' ley da' nonen mandadw non' gac b̄xoz.

¹³ Le Xancho Jesúsen' ben' nac b̄xoz chechon' bi golje' lo diaža che da' Leví, na' noch no na' choj lo diaža che Jesúsen' bene' naque' b̄xoz.

¹⁴ Nezczecho Xancho Jesúsen' golje' lo diaža che da' Judá, na' da' Moisésen' bi bzoje' le'e leyna' ga nan bene' galje' lo diaža che da' Judán' guac yesaque' b̄xoz.

¹⁵ Na' nachia' ba bža' leyna', le ba zoa Jesúsen' naque' b̄xoz cobe chechon' na' naque' ca b̄xoz Melquisedequen'.

¹⁶ Bito golje' lo diaža che da' Leví can' gosac b̄xoz ca' bene' goson žin can' ža ley da' bzoj da' Moisésen', san naque' b̄xoz da' bi gwzoe yela' goten' le' na' zoe' toli tocañe.

¹⁷ Quinga nyoj da' gwna Diosen' che', žan:

Naco' b̄xoz toli tocañe, can' nac b̄xoz ben' le' Melquisedec.

¹⁸ Na' b̄xoz ca' gwna Diosen' nita' cana', bich nžie' bia' nite' na'a, le dan' bžia bia' leyna' yesone' bi goc yeca'an xtoła' benachen' to ši'i.

¹⁹ Na' leyna' lecze bi goc gonon cont yesac yichjlaždao' benachen' xilaže' len Diosen'. Perw na'a ba chaquech güen checho, le ba zoa b̄xoz checho bene' ba beca'a xtoła'chon' to ši'i cont zoacho binlo len Diosen' na' chac ch̄nelenchone'.

²⁰ Na' cont nezecho Jesúsen' naque' b̄xoz checho, Diosen' bzoa cuine' gwlo'e da' baļi le soacze Jesúsen' gaque' b̄xoz chechon'.

²¹ Bene' ca' gosaque' b̄xoz can' bzoj da' Moisésen', Diosen' bitw bzoa cuine' cue'e da' baļi cont šejle'cho zjanaque' b̄xoz. Perw nyoj can' gože' Jesúsen', žan:

Diosen' bzoa cuine' gwlo'e da' baļi na' bi gwše'e can' ba gože'ne' gone':

"Naco' b̄xoz toli tocañe can' nac b̄xoz ben' le' Melquisedec."

²² Na' da'nan' zoa Jesúsen' chone' cont nezecho Diosen' gaclene' chio' toli tocañe can' gwne' gone'. Na' can' za' gwne' gaclene' chio' na'a, zaca'chen ca da' gože' da' x̄ozxta'och ca' caní'.

²³ Na' beñe' ca' gosaque' b̄xoz can' ža ley dan' bzoj da' Miosésen', gosaque' bene' zan, le cate' gosat tgüeje tgüeje', la' benita'te bene' yoble.

²⁴ Perw Jesúsen' zoe' toli tocañe, na' da'nan' naque' b̄xoz checho toli tocañe.

²⁵ Da'nan' chac chone' yela' mban toli tocañe che chio' chnabcho yezi'xen Diosen' checho, le zoacze' toli tocañe chnabe' goclen lao Diosen' che chio' chejnilaže'chone'.

²⁶ Na' Jesúsen' nacyane' beñe' chyažjecho gaque' b̄xoz blao checho cont gaclene' chio', le naque' beñe' laždao' xilaže'. Bibi da' xinj none' na' neca none' bi xbab mal, con bibi doła' nape'. Nža'le naque' len beñach beñe' cheson da' xinj. Jesúsen' ba beyepe' zoe' gan' zoa Diosen', na' chnabi'e txen len le'.

²⁷ Nža'le naque' len b̄xoz blao ca' gosenita' cani'. Legaque' tža tža byažjen gosote' beyixe' bosolalje' xchemba' cont gosenabe' bezi'xen Diosen' xtola'gaque', na' gwdechle gosote' beyixe' yoble bosolalje' xchemba' cate' gosenabe' bezi'xen Diosen' xtola' yezica'chle beñe' Israel gualaž checho ca'. Perw Jesúsen' šni'aze bnežjw cuine' neche xtola' beñachen' cate' gosote'ne' le'e yag cruzen', na' bi byažjde' gote' beyixe' gan' gason b̄xoz ca' tža tža neche xtola'gaque' na' neche xtola' beñe' yezica'chle.

²⁸ Beñe' gosac b̄xoz blao can' ža ley da' bzoj da' Moisésen' gosaque' beñe' güen da' xinj can' zjanac yezica'chle beñe'. Na' cate' ba goc zan iz bzoj Moisésen' leyna', Diosen' bzoa cuine' gwlo'e da' bałi zoacze Xi'ine' Jesúsen' naque' b̄xoz blao checho. Na' Xi'ine' Jesúsen' zoacze' toli tocañe na' nac yichjlaždagüen' cayanen' chazlaže' Diosen'.

8

Jesúsen' bene' cont gwzolao chac da' cobe da' gwna Diosen' gone' cont gaclene' chio'

¹ Da' nga zejehen lao yogo' da' ba gwnia': zoa b̄xoz blao chechon' ben' nac cayanen' chazlaže' Diosen', na' ba chi'e yaban' chnabi'e txen len Diosen' ben' nac la'zelagüe beñe' zaca'.

² Chone' žin gan' zoa Xancho Diosen', gague lo' yo'oda' dan' gason beñach cont yesonxene' le'.

³ Na' yogo' b̄xoz blao che beñe' Israel gualaž chechon' nite' chosonežjue' Diosen' bi da' chosonežjue'ne' na' chesote' beyixe' chosolalje' xchemba' lao Diosen'. Na' dan' nac Jesúsen' b̄xoz blao checho, benen byen bnežjw cuine' blalj xchene' neche xtola'chon'.

⁴ Na' šaca' ne' zoe' yežlio nga bi naque' b̄xoz, le nita' b̄xoz che bene' Israel gualaž chechon' chjasesane' bi da' chjasesane' lao Diosen' con can' ža ley dan' bzoj da' Moisésen'.

⁵ Na' beñe' ca', chesone' bi da' chesone' lo' yodao' da' naquen ca l gua'a šaca' che yaban' gan' zoa Diosen'. Na' nezecho naquen ca l gua'a šaca' che yaban' gan' zoa Diosen', le cate' za' gon Moisésen' yodao' dan' chacte chedobe gan' gason b̄xoz ca' žin che Diosen' cani', Diosen' gože'ne': "Yogo' da' ba gwnia' gonle, le gonen cayanen' blo'eda' le' caten' gwzoacho lo ya'an."

⁶ Na' da' chon Jesúsen', da' xen zaca'chen ca da' cheson b̄xoz che beñe' Israel gualaž chechon', na' can' gwna Diosen' gaclene' chio' lagüe da' bnežjw cuin Jesúsen' neche xtola'chon', lecze da' xen zaca'chen ca dan' gože' da' xozxta'ocho ca' cani'.

⁷ Le Diosen' gože' da' xozxta'ocho ca' gac güen chegaque' še yesone' can' ža ley chen', perw bi bosozenague', na' da'nan' byažjen gwduxjue' to da' cobe.

⁸ Na' Diosen' bi bebede' legaque', san gwne':

Gwžin ža cate' nia' to da' cobe da' gona' gaclena' le'e nacle xi'in diaža che beñe' ca' gosenite' Israel,

na' len le'e nacle xi'in diaža che beñe' ca' gosenite' Judá.

Neda' naca' Xanle Dios žia' ca'.

⁹ Nža' can' goša' da' xozxta'ole gona' gaclena' legaque' cani', bži'ilaže' da' legaque' na' bena' cont besyechoje' lo na' beñe' nación Egipto.

Legaque' bi gosone' can' goša'ne' cont gac güen chegaque'.

Na' da'nan' gwleza' bich goclena'ne', neda' Xanle Dios žia' ca'.

¹⁰ Na' quinga gona' gaclena' xi'in diaža che le'e nacle beñe' Israelen' cate' žin ža:

Neda' Xanle Dios gona' cont šo' yichjgaque' da' nona' mandadw yesone',

na' gona' cont yesyebeden' lo' yichjlažda'ogaquen',

na' toza' neda' yesejnilaže',

na' legaque' yesaque' nación chia'.

¹¹ Na' bi yažjen yosozejni'i lježe' cont yesombi'e neda',

neca yažjen yosozejni'i no beñe' biše' lježe',

le cana' yogo'lole' yesombi'e neda',

bi' bixjw lente beñe' nac beñe' gole.

¹² Canan' yezi'xena' xtola'gaquen', na' bich gona' cuent še bi da' malen' ba gosenen'.

13 Na' Diosen' be'e diža' che da' cobe da' gwne' gone' gaclene' nación chechon', na' da'nán' nezecho ba bzoe' to šla'ale da'na' gože' da' xozxta' ocho ca' caní'. Na' da' gole da' ba bzoe' to šla'ale ba zoa yeniten.

9

Yodao' da' zoa yežlion' na' dan' zoa yaba gan' zoa Diosen'

1 Caní' Diosen' gože' da' xozxta' ocho ca' gaclene' legaque' na' gac güen chegaque' še yesone' can' za ley chen'. Na' šlac ne' chon žin da' nechw da'na' gože' legaque' caní', Diosen' bžie' bia' nacle yesonxene' le' na' nacle yesone' yodao' gan' yesonxene' le' yežlio nga.

2 Gosone' yodao' da' nsan' chope cuart. Na' lo' cuart nechon' bosozoe' to candler na' to mes gan' bosocue'e yetextil da' naquen che Dios. Na' cuartna' bososi'en Latje che Dios.

3 Na' bosozie' to lache' lo' yo'ona' cont bchojen chope cuart, na' cuart gwchopen' bososi'en Latje ga Zoa Dios.

4 Na' lo' cuart gwchopen' bosozie' yeto mes de oro gan' bosozeye' yal. Na' goseyixjue' to caj da' bosoguzaje' oro doxenen. Na' lo' cajen' gosegüe'e to yeso' de oro gan' gosegüe'e late' yela' guagw da' nzi' maná, na' gosegüe'e carrot che da' Aarón dan' bexeje. Lecze lo' caj nan' gosego' ošagüe' yej ta'a ca' gan' byoj yogo' dan' bžia bia' Diosen' yesone' cont gaclene' legaque'.

5 Na' cože' cajen' bosonite' chope l' gua'a lsaca' bene' gosone' ca angl bene' bososi'e querubines, cont nachia' zoa Diosen' gan' žia cajen' na' naque' bene' zaca' juisyw. Na' cože' cajen' ladjo angl ca' gan' nžiljo xilgaquen', bosožie' xchen beyixe' cate' gosnabe' yezi' xen Diosen' xtoła' bene' Israel gualaž checho ca' to to iz. Perw bi chonen byen güe'cho diža' na'a doxen can' goca'.

6 Na' beyož gosone' yodaon' na' bosonite' yogo' da' ca' lo'enña', nach yogo' ža bħoz ca' goso'e lo' cuart nechon' na' gosone' can' bžia bia' Diosen' gosone' gosonxene' le'.

7 Na' cuart gwchopen', toz bħoz blao goc gwyo'e lo'enña' tñi'a tgüiz. Na' cate' gwyo'ena' benen byen beħoe' chen che beyixe' bži'en lo' cajen' cont Diosen' bezi'xene' xtołe' na' bezi'xente' xtoła' yezica'chle bene' Israel gualaž checho neche da' xinj da' gosone' sin cbi gosache'ede'.

8 Na' da' bi de lsens šo' nochle bene' lo' cuart gwchopen', Spiritw che Diosen' chzejni'in chio' bina' gac šo' benačen' gan' nac latje ga zoa Diosen' šlac ne' chon žin yodao' nechua' lo' yežlion'.

9 Na' yodaon' len yogo' da' cheson bħoz ca' lo'enña' chlo'en chio' zoacho na'a can' chac yaban' gan' zoa Diosen'. Na' la'czla' da' zan chesoe' bene' Diosen' na' be zan beyixe' chesote' chesonxene' le', bibi yela' guac zjansa' da' ca' cont yesenезде' bibi doła' zjanape' len Diosen'.

10 Na' da' ca' cheson bene' gualaž chechon' lo' yodaon' naquen costumbr che no nis yela' guagw, no beyixe' chesote', na' nacle cha' chyib cuingaque', na' bichle da' zjazacan' par cuerp chegaque' na'ze. Na' ba gosonen žin šlac Diosen' bina' gwše'e costumbr ca' len da' coben'.

11 Na' na'a Criston' naque' bħoz blao checho na' ba bžin ža bxie' costumbr güen ca'. Na' zoe' yaban' naque' bħoz checho lao Diosen', na' gan' zoen' zaca'chen ca' yodao' da' goson benačen' yežlio nga.

12 Na' bi beħoe' chen che no šib no go'ñ dao' cate' gwyo'e gwñabe' cont Diosen' bezi'xene' xtoła'chon', san da' bnežjw cuine' gosote'ne' na' blalj xchene' neche xtoła'chon' tñi'aze le'e yag cruzen', da'nán' goc gwyo'e gan' zoa Diosen' na' ba beque'e xtoła'chon' toli tocaņe.

13 Na' ley da' bzoj da' Moisésen' nyojen žan da' zan da' cheson bene' da' chonen cont bi chesaque' xilaže' len Diosen'. Na' cont yesyeyaque' xilaže' len Diosen' da' yoble, chyažjen gwže'e bħozen' legaque' xchen no šib no go'ñ na' nchixen len de da' chega'an cate' chosozeye' to vaca' dao'.

14 Na' xchen Criston' da' bedelalje' neche xtoła'chon' zaca'chen ca' xchen beyixe' ca', le' xchenen' cheyonen yichjlažda'ochon' xilaže' len da' xinj da' ba bencho. Da'nán' bich nchoglaon checho gatcho neche xtoła'chon', san soaczcho gonxencho Diosen' ben' zoa toli tocaņe. Spiritw che Diosen' godlenen Criston' bnežjo cuine' beque'e xtoła'chon', na' bibi xtoła' Criston' gota'.

15 Criston' bedelalj xchene' cont gwzolao chac da' coben' dan' gwna Diosen' gone' cont soacho binlo len le'. Na' ba bxie' da' coben' cont balteze bene' ba gwlej Diosen' šjasyenite' len le' toli tocaņe. Na' da' got Criston' bedelalj xchene', da'nán' gwnitlao xtoła' bene' yela' gosejnilaže' Diosen' šlac ne' chon žin dan' gwđixjue' da' nechw dan' gwne' gone' cont chio' bene' Israel soacho binlo len le'.

16 Cate' to bene' ba bene' testament, cate'ch ba gota'bia' ba got bena' ben testamenta', cana'ch gac can' žanna'.

¹⁷ Le to testament bi gac can' žan šlac ne' mban ben' ben len. Cate'ch ba gote' canan' gac can' žanna'.

¹⁸ Na' goc ca' len da' nechon' da' gož Diosen' da' xoxxta' ocho ca' gone' gaclene' legaque'.

Da'nan' bžie' bia' bosolalje' xchen beyixe' cont gwxen.

¹⁹ Cate' da' Moisésen' beyože be'lene' da' xoxxta' ocho ca' diža' che yogo' dan' bžia' bia' Diosen' yesone' can' ža ley chen', nach Moisésen' bži'e' legaque' xchen go'ñ dao' na' xchen šib dao' na' nis. Bži'e' legaque' da' ca' len late' yiša' xa xila' da' mben color xna' na' len to xis yiže' dao' da' nzi' hisopo. Lecze bži'en' lao libren' gan' nyoj ley chen'.

²⁰ Na' da' Moisésen' gože' legaque': "Chen ni ben Diosen' mandadw gwžia' le'e cate' gože' chio' nac goncho cont gaclene' chio' gac güen checho can' gwnen'."

²¹ Na' lecz ca' bene' bži'e' chenna' yodaon' na' yeso' ša' ca' bosochine' gan' gosonxene' Diosen'.

²² Ley dan' bzoj Moisésen' nžian bia' gwže'e' bxozen' chen lo yogo'ze bi da' chosochine' cont yeseyaquen xilaže' lao Diosen'. Na' ley na' lecze žan še bina' lalj chen, Diosen' bi yezi'xene' xtoła' beňachen'.

Criston' gote' blalj xchene' cont beque'e xtoła' beňe' chesejnilaže'ne'

²³ Can' goc benen byen bosožie' xchen beyixe' lo' yodaon' na' lo' da' ca' bosochine' yodaon' cont gosonen žin lao Diosen', na' yodaon' naquen con to l' gua' a lsaca' da' chzejni'in can' nac yaban'. Perw da' de yaban' byažjen to chen da' zaca'ch.

²⁴ Na' gan' gwyo'o Criston' gague naquen to yodao' da' naquen con to l' gua' a lsaca' cont nezecho can' nac yaban'. Le' beyepe' yaban' na' gwyo'e gan' zoa Diosen' cont chne' gualaz chio' lagüen'.

²⁵ Bxoz blao che beňe' Israel gualaž checho ca' cheso'e yodaon' tñi'a tgüiz gan' nzi' Latje gan' Zoa Dios na' chosoži'e' chen che beyixe', perw Criston' bi bnežjw cuine' zan ni'a gosote'ne'. Tñi'aze blalj xchene' neče xtoła' beňachen'.

²⁶ Šaca' byažjen blalj xchene' zan ni'a, ba gote' zan ni'a gwzolaon cate' gwxete yežlion', perw bi benen byen gac che' ca'. Bedelalj xchene' tñi'aze cate' gwna Diosen' ba bžin ža che', cont chac cheque'e xtoła' beňach.

²⁷ Na' can' chac che beňachen', žin ža gat to toe' na' te yesate' nach na Diosen' che to toe' še yesezaci'ze o še yesenite' mbalaz.

²⁸ Na' can' yesat beňachen' tñi'aze, ca'cze bnežjw cuin Criston' tñi'aze gosote'ne' cont chac cheque'e xtoła' beňachen'. Nach žin ža yide' da' yoble perw gague cont yeque'e xtoła' beňachen', san cont yeče'e beňe' ca' chesebeze' batcan' yide' nach nite' mbalaz len le'.

10

¹ Ley da' bzoj da' Moisésen' len costumbr da' nžian bia' goncho cate' gonxnencho Diosen' bzejni'in chio' late' lasze che da' güen da' ba chac checho na'a ba bid Criston'. Perw ley na' bi goc yocoben yičhjlazdao' beňe' ca' gosejnilaže' Diosen' la'czla' gosote' beyixe' yogo' iz.

² Šaca' yičhjlazda'ogaque' beyaquen güen cate' gosote' beyixe' ca' na' cate' bxoz ca' bosožie' legaque' xchentan' neče xtoła'gaquen', ba gwnitlao xtoła'gaquen' to ši'ize šaca', na' bich bi yesacde' lo' yičhjlazda'ogüen' che da' xinjen' chesonen'.

³ Perw da' chesote' beyixe' ca' na' bichle da' chesone' neče xtoła'gaquen' to to iz, bi chac yesanlaže' zjanape' doła'.

⁴ Le xchen no go'ñ dao' no šib dao' bi gac yeca'an xtoła' beňach.

⁵ Da'nan' cate' Criston' bide' yežlio nga gože' Diosen': Dan' chesote' beyixe' na' dan' chjasesane' bichle da' chjasesane' laguo', gague da' can' zelažo'.

Zelažo' gwnežjw cuina' gona' can' chazlažo', le da'nan' beno' cont golja beňach.

⁶ Da' chesote' beyixe' chosozeye'ba' laguo' na' yogo' da' ca' chesone' cont yezi'xeno' xtoła'gaquen', gague da' can' chbedo'.

⁷ Da'nan' gwnia' can' nyojle'e libr gan' žan: "Dios chia', za'a nga zedeyena' con can' chazlažo'."

⁸ Zgua'tec Criston' gože' Diosen': "Dan' chesote' beyixe' na' dan' chjasesane' bichle da' chjasesane' laguo', na' dan' chosozeye' beyixe' cont yezi'xeno' xtoła'gaquen', gague da' can' zelažo' na' gague da' can' chbedo'", la'czla' ley na' nžian bia' yogo' da' ca'.

⁹ Nach Criston' gože' Diosen': "Za'a nga zedeyena' con can' chazlažo'". Da'nan' nezecho ba bzoe' to šla'ale dan' bžie' bia' gotcho beyixe' cont yezi'xene' xtoła'chon', na' gualaz len, blalj xchen Criston' cont beque'e xtoła'chon'.

¹⁰ Na' da' ben Jesucriston' con can' gwyazlaže' Diosen' cate' bnežjw cuine' gosote'ne' tñi'aze cani', da'nan' ba beyac yičhjlazda'ocho xilaže' lao Diosen', chio' chejnilaže'chone'.

11 To to bꝛoz che bene' Israel gualaž checho ca' con nita'cze' chesotcze' beyixen' tža tža na' chosoži'e xchemba' can' ža leyna' cheyala' yesone', la'czla' xchen beyixen' bi gac yeca'an xtoła' benachen'.

12 San Criston' tni'azen' bnežjw yela' mban che' na' zaca'czen cont yeca'an xtoła' benachen' toli tocaṇe. Na' beyož bnežjw cuine' zjajchi'e gan' chnabi'e txen len Diosen'.

13 Na' zoe' chbeze' žin ža yosozexjw yichj yogo' bene' chesegue'e le' na' yosozenague' che'.

14 Na' da' bnežjw cuin Criston' tni'aze cani', bene' cont chio' naccho lo na' Diosen' beyac lažda'ochon' xilaže' toli tocaṇe.

15 Na' Spiritw che Diosen' lecze benen cont nezecho naquen ca', le nyojen, žan:

16 Quinga gona' gaclena' legaque' cate' žin ža, gona' cont šo' yichjgaque' da' nžia' bia' yesone', na' gona' cont yesyebeden' lo' yichjlažda'ogaquen', can' ža Xancho Diosen'.

17 Na' nyoj yeto da' ža Spiritw che Diosen', žan:

Na' bich gona' cuent še bi da' malen' ba gosonen' o še bi xtoła'gaque' ba gota'.

18 Na' cate' ba gwnitlao xtoła'chon' bich chyažjen gotcho no beyixe' neče xtoła'chon'.

Cheyala' soacho gonxencho Diosen' neca žebcho

19 Bene' migw, nezecho gac šo'cho gan' zoa Diosen' neca žebcho, le Jesucriston' blalj xchenen' na' beque'e xtoła'chon'.

20 Guac nacho gwsaljue' to nez cobe, to da' chonen chio' yela' mban toli tocaṇe, le da' bnežjw cuine' gote' neče chio', guac šo'cho gan' zoa Diosen' na' bich naquen ca' part yodaon' da' ngaše' len lache' da' ze gan' nono gac šo'.

21 Na' zoa bꝛoz blao chechon' naque' bene' zaca'chgua, na' naque' Xan yogo' chio' gwlej Diosen' cont chejnilaže'chone'.

22 Da'nan' cheyala' soacho gonxencho Diosen' do yichj do laže'cho neca žebcho, na' cheyala' soacho šejle'cho xchen Jesucriston' ba beca'an xtoła'cho, le nezecho ba gwzoacho nis da' chejnilaže'chone'.

23 Na' can' gwzolaicho be'cho diža' gwnacho šjayzoacho len Diosen', ca'cze cheyala' goncho bate'teze, na' da' li šjayzoaczcho len Diosen', le zoacze' chone' con can' gwnen'.

24 Lecze cheyala' yeyiljwlaže'cho nacle gaclen lježcho cont gaquech lježcho tocho yetocho na' gonchcho da' güen.

25 Na' bi cuejyichjcho da' chdop chžagcho txen chonxencho Diosen' ca' chesebeyjichj bal bene'. Cheyala' neyoe lježcho soaczcho šejnilaže'cho Criston', na' gonchcho ca' na'a ba nacbia' ba zoa te che yežlion'.

26 Še ne' chontezechcho da' xinj la'czla' ba nombia'cho diža' li che Criston', bibi de bichle da' gon žin cont nitlao xtoła'chon'.

27 Na' cheyala'cze žebcho gon Diosen' cont saca'zi'cho še ca', na' yeyejcho lo yi' gabilen' gan' cuiayi' yogo' bene' chesegue'e Diosen'.

28 Cani' da' xozxta'ochcho ca' gosote' note'teze bene' bi bzenague' che ley da' bzoj da' Moisésen', bi besyeyaše'de' legaque', con še gwnita' chope o šone bene' toz can' gosote' diža' che da' xinjen' none'.

29 Na' da' mal juisyoch gac che chio' še gue'echo Xi'in Diosen' na' gaquecho bibi zaca' xchen Criston' da' blalj' cont beque'e xtoła'chon' na' še nečo che Spiritw che Dios ben' nži'ilaže'de' chio'. Le da' blalj xchen Criston' gwzolaicho chac da' cobe da' gwna Diosen' gone' gaclene' bene' yesejnilaže'ne'.

30 Nombia'cho Diosen' na' nezecho len' gwne': "Neda' yoži'a che da' mal da' chesone' na' neda' gona' cont yesezaca'zi'e." Na' lecze nyojen žan: "Xancho Diosen' chogbi'e nac gac che bene' ca' ba gwque'e ca' xi'ine'."

31 Na' leca naquen da' žebcho še cuejyichjcho Diosen' ben' zoa toli tocaṇe, le gone' cont saca'zi'cho toli tocaṇe.

32 Perw le šjayza'laže' can' bchejele da' zan da' gwdi gwxcacale cate' beyož gwyo'o be'ni' che Criston' lo' yichjlažda'olen'.

33 Tgüje gosezi'diže' le'e lao yogo' bene' yež na' tgüje cate' gosotlate' le'e na' bichle da' bosochi bososaque' le'e, na' da' juisyw da' goquele cate' gosonde' bene' lježle ca'.

34 Beyaše'le bene' lježcho ca' bene' gosata' ližya na' goclenle legaque', na' gwzoale mbalaz la'czla' bene' besegue'e le'e goseque'e bi da' gota' chele, le nezele de da' zaca'ch chele yaban' da' bi te čen.

35 Da'nan' bi cuejyichjle da' chejnilaže'le Diosen', neca žeble, le žin ža cate' soachgualle mbalaz.

36 Cheyala' gwyo gwchejle cont yeyož gonle yogo'loł da' chnalaza'e Diosen', na' tena' gone' cont soale mbalaz toli tocaṇe can' gwne'.

³⁷ Can' nyoj Xtiža' Diosen', žan:

La' žinte ža yid ben' seļa' gan' zoalen', bich šede'.

³⁸ Na' xi'ina' bene' zjanac bene' güen len neda' yesata' yela' mban che' toli tocanē da' chesejnilaže' neda'.

Na' še bich yesejnilaže' neda', bich yebeda' legaque'.

³⁹ Perw chio' bi nacho ca bene' ca' bich yesejnilaže'ne', bene' yesebiayi'. Chio' zoaczcho chejnilaže'chone' na' šjayzoacho len Diosen' toli tocanē.

11

Da' chejnilaže'cho Diosen' naquen to da' zejen

¹ Še chejnilaže'cho Diosen' nezecho gac da' güen da' chbezcho gac, na' nezecho gon Diosen' gac can' že' da' biņa' le'echo.

² Baļ bene' gwlas ca' bebe Diosen' legaque' da' gosejnilaže'ne'.

³ Da' chejnilaže'chone' chejle'cho con gwnie' na' goc yaban' len yežlion'. Na' bibi bħchine' da' le'echo cate' bene' yogo' da' ca' chle'echo.

⁴ Cani' da' xozxta'ocho Abel gwejnilaže' Diosen' na' da'nān' bnežjue' Diosen' to da' gocch da' güen ca da' bnežjw bene' biše' Cain. Na' dan' bebe Diosen' dan' bnežjw Abelen' le', da'nān' gwneze Abelen' naque' bene' güen len Diosen'. Na' la'czļa' ba got Abelen', da' gwzoe' gwejnilaže' Diosen', naquen ca to da' chņeyoen chio' soaczcho šejnilaže'cho Diosen'.

⁵ Na' lecze da' xozxta'ocho Enoc gwzoe' gwejnilaže' Diosen', na' da'nān' Diosen' bezi' beque'ene' šlac ne' mbane'. Bi gote', con noch no ble'e le'. Na' nyoj Xtiža' Diosen', žan Diosen' bebede' Enoquen' šlac gwzoe' yežlion'.

⁶ Na' Diosen' bi chebede' note'teze bene' bi chejnilaže'ne'. Le note'tez bene' yoļ güiže' Diosen' cheyaļa' šejle'e zoaczce Diosen' na' šejle'e gwnežjue' yela' mban toli tocanē che note'tez bene' nabden' le' do yiħj do laže'.

⁷ Na' ca nac da' Noé, lecze gwejnilaže' Diosen', na' cate' Diosen' bosnisde' le' can' za' gac, gwejle' Noén' can' gož Diosen' le', na' do bžebe' bene' to barcw gan' gwo'e len bene' lo' yo'o che' ca' cont bi gosate' lo nisen'. Na' da' gwejle' Noén' can' gwna Diosen', blo'ede' yezica'chle bene' že' na' zjanape' doļa' da' bi bosozenague' che Diosen'. Na' lecze da' gwejnilaže' Diosen', goc gwna Diosen' naque' bene' güen len le'.

⁸ Da' Abrahanna' lecze gwejnilaže' Diosen'. Da'nān' bzenague' cate' boļ güiž Diosen' le' na' gože'ne' šeje' ga de to yežlio zito' da' gaquen che'. Na' gweje' la'czļa' bi nombi'e latjen'.

⁹ Na' Abrahanna', da' gwejnilaže' Diosen' jasoe' laž bene' zito' da' gwna Diosen' gac che' na' gac che xi'in' diaža che'. Gwzoe' lo' yo'o de lache'ze na' lecž lo' yo'o de lache'ze gwnita' xi'ine' Isaaquen' na' xi'in' xesoe' Jacob bene' lecze gož Diosen' gac yežlion' chegaque'.

¹⁰ Abrahanna' gwzoa gwleze' ca' lo yežlion', le gwnezde' žin ža šjayzoe' gan' zoa Diosen' gan' naquen to ciuda güen da' bi te chen, ciuda da' ben Diosen'.

¹¹ Na' Saran' no'ol nac no'ol che Abrahanna', la'czļa' naque' bene' güiž na' naque' bene' gole par soa xi'ine', Diosen' bene' to yela' guac cont gwzoa xi'ine', le gwejle'e gon Diosen' con can' gwne' gone'.

¹² Ca' goquen' gwzoa bi' che da' Abrahanna' la'czļa' goque' bene' gole par soa xi'ine', nachen' xi'in' diaža che' gosaque' bene' zan can' zjanac beljw ca' na' can' nac yox da' chi' cho'a nisaon' da' nono chac gwlab.

¹³ Yogo' bene' ca' ne' chesejnilaže' Diosen' cate' bžin gosate'. Na' la'czļa' biņa' gac lo na'gaque' dan' gože' legaque' gac chegaquen', bi gosaczējaže', san gwnite' mbalaz gosejle'e gwžin ža gon Diosen' can' gwnen'. Goso'e diža' zjanaque' ca bene' zito' len bene' že' lo yežlion' na' bibi lažgaque' de lo yežlion'.

¹⁴ Na' da' goso'e diža' bibi lažgaque' de yežlion', nachbia' gosezelaže' yesyežine' ga yoble gan' gac lažgaque'.

¹⁵ Šaca' gosone' xbab che yežen' gan' gosaljen' naquen lažgaque', gota' latje jaya'aque' šaca', perw bi gosone' xbabēn' ca'.

¹⁶ Gosezelaže' yesyežine' yaban', le gosejle'e na'len' nac lažgaque', na' goseņezde' nacchen güenč ca yežlion'. Da'nān' Diosen' bi cheto'ede' chegaque' že' naque' Dios ben' chesonxene', na' ba benšagüe' to ciuda gan' zjanite'.

¹⁷ Na' Abrahanna' da' gwejnilaže' Diosen' da'nān' bzenague' cate' Diosen' bene' le' prueba gože'ne' cheyaļa' got xi'ine' Isaaquen' lao Diosen' cont gonxene'ne'. Ba zoa gote' xi'inen' la'czļa' gwnezde' Diosen' gože'ne'.

¹⁸ "Gona' cont nita' xi'in' diaža chio' bene' yesac xi'in' diaža che Isaaquen'."

¹⁹ Da' Abrahanna' bechoglaže' gote'be', le gwnezde' Diosen' chac chosbane' bene' guat. Perw na' Diosen' bi be'e latje gote'be'. Da'nān' guac nacho bosbane'be' ladjo bene' guaten', la'czļa' gague gotbe'.

²⁰ Gwdechle Isaaquen' gweyjnilaže' Diosen'. Da'n'an' gwñabde' Diosen' gone' güen len xi'ine' Jacob na' Esau'.

²¹ Lecze da' Jacoben' gweyjnilaže' Diosen'. Da'n'an' cate' ba zoa gate', gwñabde' Diosen' gone' güen len xi'in' xesoe' ca' bin' gosac xi'in' da' José. Na' b'cheque' yich'je' benxene' Diosen' n'chiše'teze' carrot' che'.

²² Na' da' Josén' gweyjnilaže' Diosen', na' gwey'le'e žin' ža yesyechoj' bene' gualaž' che' ca' Egipton' can' gwna Diosen'. Nachen' cate' ba zoa gate' b'žie' bia' yesyeyo'e žit' be'nat' čhen' cate' yesyeya'aque'.

²³ Cate' golje da' Moisésen', da' leca gosejnilaže' xaxne'en Diosen', bi besežebe' yesyed-abague' dan' b'žia' bia' reyen' yesone', gwne' cheya'la' yesote' bi' byo' čhegaque' ca'. Šone' bio' bosocuaše'be' ližgaquen', le gosacde' nacchguabe' xdan'.

²⁴ Nach bi' no'ol' che rey beque'ebe' boscha'ogüe'be'. Perw cate' ba gwcha'o da' Moisésen' b'žone' yesone' le' ca' xi'in' bi' no'ol' che rey che Egipton', le gweyjnilaže' Diosen'.

²⁵ Da'n'an' gwyazlaže'che' b'žaglagüe' txen len bene' gualaž' che' ca' yogo' dan' bososaca'zi' bene' Egipto ca' legaque', clel ca gone' txen len bene' Egipto ca', le gocbe'ede' yob te che yela' chebe che da' xinj' ca' cheson' legaque'.

²⁶ Goclaže' b'žaglagüe' can' b'žaglao Criston' cont bene' can' gwyazlaže' Diosen', bi gwzelaže' gac che' yogo' yela' gwn'a da' de che bene' Egipto ca', le gwñezde' gwžin' ža gon Diosen' cont soe' mbalaz'.

²⁷ Na' da' gweyjnilaže' Diosen', bi b'žebe' rey cate' b'žin' ža besyechoje' Egipton' la'cz'la' reyna' b'ža'achgüe' legaque', con gwzoacze' bzenague' che Diosen'. Gwñezde' zoacze Diosen' la'cz'la' bi chle'echone'.

²⁸ Nach Moisésen' da' gweyjnilaže' Diosen' b'žie' bia' da' xozxta'ocho ca', bene' že' to to yo'o gosote' to xila' dao' na' bosož'i'e x'chemban' ližgaquen', cont angl' bene' nsa' yela' got bibi' goc gonde' bi' byo' nechw' lo' to to yo'o.

²⁹ Na' da' xozxta'ocho ca' gwnita' cani', da' gosejnilaže' Diosen' da'n'an' Diosen' bene' cont Nisdao' Xnan' goquen' čhople, na' bla' yo biž' gacholen' cont goc goselaguen'. Perw bene' Egipto ca' cate' gosaclaže' leze yeselagüe' n'isdaon', bocuaše' nisa' gan' chesedien', na' gosate' gose'eje' nisen'.

³⁰ Lecze da' gosejnilaže' da' xozxta'ocho ca' Diosen', da'n'an' Diosen' bene' cont bebix' ze'e da' gweyechj' doxen' ciuda Jericó cate' gosechje' ze'en' yogo' ža lao gaže' ža.

³¹ Na' da' no'olen' le' Rahab, no'olen' goque' no'ol' zle', lecze gweyjnilaže' Diosen', na' da'n'an' bi gwžiyae'e txen len yezica'chle bene' Jericó bene' bi bosozenague' che Diosen', le blebe' chop da' xozxta'ocho ca' ližen' cate' jasegüia' jasene' e lažen'.

³² Ba gwnita'ch' bene' zan' bene' gosejnilaže' Diosen', perw bi de tiemp' gua' diža' che da' ben' gože' Gedeón, che da' ben' gože' Barac, che da' ben' gože' Sansón, che da' ben' gože' Jefte', che da' rey David, che da' Samuel, na' che yezica'chle bene' gos'o'e xtiža' Diosen' cani'.

³³ Da' gosejnilaže' Diosen' besechoje' gosone' gan' cate' gosedi'le' len no' rey, na' bale' gosaque' bene' gwnabia' na' gosone' byen' goson' bene' yoble da' güen, yebale' besele'ede' ben' Diosen' bi da' güen da' gwne' gone' len legaque', yebale' Diosen' bene' cont bež' znia' bi gosagwba' legaque' na' bi gosoneba' legaque' zi' cate' gosegüe'e legaque' gan' že'ban'.

³⁴ Lecze da' gosejnilaže' Diosen', bale' bi goseye' cate' bene' bosozale' legaque' lo' yi', yebale' besyele' cate' bene' gosaclaže' yesote' legaque' len spada, yebale' beyon' Diosen' legaque' bene' gual' cate' bich' zjanale', yebale' goclene'ne' gosaque' soldadw' gual' cont gosone' gan' cate' soldadw' bene' zito' gosedi'lene' legaque'.

³⁵ Na' gwnita' no'ol' ca' da' gosejnilaže' Diosen' da'n'an' Diosen' bosbane' no' bene' lo' yo'o čhegaque' ladjo' bene' guat' ca'.

Na' gwnita' bene' yoble, da' gosejnilaže' Diosen' da'n'an' gosate', bi gosaclaže' yesyele' lo' na' bene' mal' ca'. Goso'e latje bosochi' bososaque' legaque', le gosnežde' gwžin' cate' Diosen' yechis' yosbane' legaque' ladjo' bene' guat' ca' cont yesenite' len' le'.

³⁶ Gwnita' yeba' bene' leca gosezi'diža' bene' legaque' na' leca goseyine' legaque', na' bosochje' legaque' gden' na' goseyixjue' legaque' ližya.

³⁷ Na' bene' ca' besegue'e legaque' gosote' legaque', bale' bosochjele' legaque' yej, yebale' bosozoxje' cuerp' chegaquen' len sier, yebale' gosote' len spada. Na' ba' bene' ca' gosejnilaže' Diosen' benen' byen' gosaše' yix'e' zjanyaze' no' xa xila' no' xa šib. Bibi' gota' čhegaque', leca nyaše' gosac' chegaque' catec' bosochi' bososaca' bene' legaque'.

³⁸ Gosaš' goselaže' do latje daš, do ya'adao', do ga ze' bloj' na' ga zoa no' liž' beyix'e'. Yogo' da' ca' goc' che bene' ca' gosejnilaže' Diosen', la'cz'la' zjazaca'chgüe' na' bene' že' yežlio' nga' bi zjazaque' yesenite' txen len legaque'.

³⁹ Diosen' bebede' yogo' bene' ca' da' gosejnilaže' le', perw šlac' gosenite' bi'na' gone' yogo' da' güen' da' gwne' gone' che' xi'in' diaža' che da' Abrahamna'.

⁴⁰ Le goclaze' gone' ga gac che chio' zoacho na'a yogo' da' güen da' gwne' gone', cont txen len bene' ca' gosejnilaže'ne' cani', yeyož gaccho can' chazlažen'.

12

Cheyała' soacho goncho xbab che Jesúsen'

¹ Nezecho ba gwnita' bene' zan gosone' da' güen neche da' gosejnilaže' Diosen', na' dan' gosonen' chzejni'in chio' can' cheyała' goncho. Da'nan' cheyała' gwzoacho ca'ale še bi da' chžonen goncho can' chazlaže' Diosen' na' cuejyichjcho bi da' xinj da' choncho, le da' xinjen' chziye'czen chio'. Na' cheyała' soatezcho goncho can' ža Diosen' sin cbi yeche'echo.

² Jesúsen' bene' cont gwzoloa chejnilaže'cho Diosen' na' gaclene' chio' cont soaczcho šejnilaže'chone' yežintecho gan' zoe'na'. Na' cheyała' soacho goncho xbab ca' Jesúsen' byo bcheje' len da' gwdi gwxaque' cate' gosote'ne' le'e yag cruzen'. Bi bžone' yesonde' le' da' zan da' naquen da' zban juisyw, le gwnezde' za' gon Diosen' cont soe' mbalaz len le'. Na' na'a Jesúsen' ba chi'e chnabi'e txen len Diosen'.

³ Cheyała' goncho xbab can' byo bchejlaže' Jesúsen' len yogo' da' ca' gosone bene' mal ca' le' na' bene' can' gwna Diosen'. Na' ca'cze cheyała' gwyo gwchejlaže'cho goncho can' chazlaže' Diosen' la'czla' še chaquechon zdeb; bi cheyała' yeche'echo.

⁴ Da' zan da' ba bžaglaole chdillenle da' malen', perw bina' lalj xchenle na' bina' yesote' le'e.

⁵ Ba gonlaže'le can' ža Diosen' chneyoede' chio' can' chon bene' chneyoe xi'ine'? Nyoj xtiže'na', žan:

Xi'indagua', bi gacdo' bibi zejen da' chnežjo Xancho Diosen' le' da' saca'zi'o' cate' chono' bi da' xinj,

na' bi gaco' tole cate' chdile' le'.

⁶ Le Xancho Diosen' chzejni'ide' yogo' bene' chacde',

na' chnežjue' da' saca'zi' yogo' bene' ba gwque'e ca' xi'ine' cate' chesone' da' xinj.

⁷ Cheyała' gwyo gwchejlaže'cho cate' Diosen' chone' chio' da' saca'zi'cho, le chonde' chio' ca' benachen' chonde' xi'ingaque'. Le yogo'ze' bidao' chnežjo xaben' lebe' castigw cate' chontezbe' da' xinj.

⁸ Na' še bi chon Diosen' da' saca'zi'cho cate' chontezcho da' xinjen', zeje diža' bi naccho xi'ine', le yogo' bene' ba gwque'e ca' xi'ine' chnežjue' da' yezezaca'zi'e cate' chesontez'e da' xinjen'.

⁹ Yogo' xaxna'cho bososgole' chio' yežlio nga na' gosone' castigw checho cate' bi da' xinj bencho, na' nezecho ca'cze cheyała' yesone'. Nacchxe cheyała' gwzenagcho che Xacho Diosen' bite'teze da' chzejni'ide' chio', cont šjayzoacho len le' toli tocané.

¹⁰ Na' xaxna'chon' to chop izzen' šlac bososgole' chio' gosone' castigw checho con ca' gosaclaže'. San Diosen' nezde' bi da' nac güen par chio', na' chdile' chio' na' chone' da' saca'zi'cho cont gaclenen chio' soacho goncho da' güen na' gac lažda'ochon' xilaže' can' nac lažda'ogüen'.

¹¹ Na' bite'tez da' chyi chzaca'cho, šlac chaquen bi chazlaže'chon, perw cate' ba gwden chaclenen goncho da' zej to licha na' chaclenen soacho binloch len xbab da' yo'o lo' yichjlažda'ochon'.

Diosen' gone' da' saca'zi'cho še bi gwzenagcho che'

¹² Da'nan' le' soa le' gon can' chazlaže' Diosen' sin cbi yeche'ele.

¹³ Le soa le' gon da' güen cont gaclenle bene' ca' ne' chesaczejlaže' naquen' yesone' cont legaque' yosozenagche' che Diosen' na' bi yesebejyichj' xtižen'.

¹⁴ Le yeyiljwlaže' nacle gonle soale binlo len yogo'cze bene', na' le gwzenag che Diosen' cont gac lažda'olen' xilaže', le nono yežin gan' zoa Diosen' še bi nac lažda'ogüen' xilaže'.

¹⁵ Le gaclen lježle cont ne tole bi ganlaže'le catequen' nži'ilaže' Diosen' chio', le cate' chzoloa cho choncho güedenag len Diosen', bedao' chğa'cho chxenen na' guacte gonon cont bene' zan yesonche' da' xinj.

¹⁶ Bi gata'lenle bene' byo bi nac bene' chele o no'ole bi nac no'ol chele. Na' bi gue'ele da' naquen da' zaca' len Diosen' can' ben da' bene' gože' Esaú, ben' bše'ede' to platw yela' guagw da' cheyała' gwnežjo Diosen' le' dan' golje' goque' bene' nechw.

¹⁷ Nezele gwdechle goclaze' yeyac lo' ne'e da' bdie' lo' na' bene' biše', perw bich bi goc bi gone' cont yeyaquen lo' ne'e la'czla' gwcheže' catec gwzelažen'.

¹⁸ Nža'le chac che chio' na'a na' can' goc che da' xozxta'cho cani' cate' Diosen' bnežjue' legaque' ley chen'. Cate' betje' lo' ya'a Sinaí gwyechj yi' bel' ya'ana', gwxoan žen, beyaquen chol, na' gwyechjchgua be'.

¹⁹ Gosende' gwchež to trompeta, na' gosende' be' Diosen' diža' len legaque'. Na' be-sežebchgüe' na' gosata'yoede' Moisésen' bich güe'len Diosen' legaque' diža'.

²⁰ Be-sežebchgüe', le Diosen' ba gožle' legaque' še noe' yesebigue' lo' ya'an cheyała' yesote'ne' yosochele'ne' yej, na' lecz ca' yesone' še len beyixe'.

²¹ Da' zaca' žebcho goc lo ya'an, lente da' Moisésen' gwne': "Łeca chaž chžeba' can' chaquen'."

²² Perw chio' chejnilaže'cho Criston' ba naccho txen len Diosen' ben' zoa toli tocane na' len yogo' angl che' bene' že' yaban' chesonxene'ne', bene' zjanaque' bene' zan juisyw. Da'nan' guac nacho ba gwbiga'cho lo ya'a Sión dan' ľecze nzin' ciuda Jerusalén da' chí' yaba gan' zoa Diosen'.

²³ Na' naccho txen len yogo'ľolte bene' chesedop chesežag chesonxene' Jesucriston' gate'teze, bene' zjanyoj lagaque' ľe'e libr che Diosen' da' de yaban'. Na' yogo' chio' chejnilaže'chone' zaca'ľebcho ca bi' nechw to lo' yo'o, bi' chzi' byen che xaxna'be', ľe si'cho da' güen da' gon' Diosen' chio'. Na' naccho txen len Diosen' bene' choglaogüen' che yogo' beňaç še de xtolá'gaque'. Łecze naccho txen len bene' ca' ba gosat, bene' gosaque' bene' güen lao Diosen' da' gosejnilaže'ne', na' na'a ba beyož zjanacyane' can' chaclaže' Diosen'.

²⁴ Na' naccho txen len Jesús ben' blalj xchene' cont gwzolao chac da' coben' da' gwna Diosen' gone' gaclene' beňachen'. Na' blalj xchenen' cont ba bñitlao Diosen' xtolá' chio' chejnilaže'chone'. Da'nan' xchen Jesús en' zaca'chen ca xchen da' Abelen' da' gwłalj caten' betw bene' bišen' ľe'.

²⁵ Da' mal juisyw še goncho güedenag len Diosen' cate' chñe' chio'. Bene' cont gosezaca'zi' da' xoxxta'ocho ca' cate' gosone' güedenag len xtižen' da' gwñelene' ľegaque' lo yežlion' cani', na' gonche' da' saca'zi' chio' še goncho güedenag len xtižen' da' choe'lene' chio' lo' lažda'ochon' zoe' yaba na'ate.

²⁶ Łeca gwxo' cate' Diosen' betje' lo ya'a Sinain' cont be'lene' da' xoxxta'ocho ca' diža'. Na' na'a ba gwne': "Gwžin ža cate' gona' xo' yežlion' da' yoble, perw gague yežlio na'zen', san lente yogo' da' chle'echo ľe'e yaba."

²⁷ Na' da' gwne' gone' xo' da' yoble, zejen te che yogo' da' ca' ben Diosen' da' chle'echo, perw bi te che Diosen' na' che yogo' da' güen da' chone' da' bi chle'echo.

²⁸ Da'nan' cheyała' güe'cho yeła' choxclen che Diosen' da' gone' cont šjayzoacho mbalaz txen len ľe' gan' chnabi'e, na' gague da' te che da' güen da' gac checho len ľe'. Nach ľecz cheyała' gacbe'echo bene' zaca'chgua nac Diosen' cont gonxenchone' do yichj do laže'cho can' chazlažen'.

²⁹ Cheyała' gwzenagcho chen', ľe Dios chechon' ľeca chgue'ede' da' malen', na' sele' lo yi' gabiľ bene' ca' bi yesyetinjde' che da' xinjen', da'nan' zaca'ľebde' ca' yi' bel'.

13

Da' chazlaže' Diosen' goncho

¹ Bitw gwsanľe gaque ľježle, ľe yogo'cho chejnilaže'cho Jesucriston' naccho ca biše' ľježcho.

² Na' bi ganlaže'le cheyała' gwleble bene' za'ac zito' ližlen' bene' chesejnilaže' Jesucriston'. Baľ xoxxta'ocho ca' cate' bosolebe' bene' zito' ližgaquen' bosolebe' angl bene' gwsela' Diosen' neca gosacbe'ede'.

³ Cheyała' gonľe xbab che bene' ľježcho ca' chesata' ližya cont gaclenľe ľegaque'. Na' cheyała' gonľe xbab can' gale'le šaca' chac chele can' chac che bene' ca'. Na' bi ganlaže'le bene' ľježcho bi da' chosoči chososaca' bene' ľegaque', ľe šlac ne' mbancho, cuerp chechon' guac saca'zin' da' quinga. Na' cheyała' gonľe xbab can' gale'le šaca' chac chele can' chac che bene' ca'.

⁴ Na' ľe'e nšagna'le, yogo'le ľe soa do laže'le len no'ol chele o bene' chele na' bi talenľe bene' yoble, ľe Diosen' gone' saca'zi' bene' chesata'lene' no'ole bi zjanac no'ol chegaque' o bene' byo bi zjanac bene' chegaque'.

⁵ Bi cheyała' selaže'cho mechon', san cheyała' soacho becho bi da' dao' da' de checho, ľe Diosen' ba gwne' che to tocho: "Bi ganlaža' ľe' na' bi cuejyichja' ľe'."

⁶ Da'nan' bibi de da' žebcho, na' to tocho guac nacho:

Xana' Diosen' zoe' chaclene' neda'.

Bi žeba' bi da' gone beňachen' neda'.

⁷ Łe šjayze'e bene' gwnita' bosozejni'ide' ľe'e xtiža' Diosen'. Łe gon xbab can' gosone' cont yogo'ze bene' gosacbe'ede' gosenite' gosejnilaže' Diosen', na' ľe nita' ľe šejnilaže' Diosen' can' gosonen'.

⁸ Na' can' nac yichjlaždao' Jesucriston' nej nase, ca'czen' naque' ža na'aža, na' ca'czen' gaque' toli tocane.

⁹ Bi güe'le latje yeseziye' bene' ľe'e len bi diža' yoble da' chosozejni'ide', ľe nža' xen can' chososed chosolo'e baľe'. Da' chon Diosen' lo' lažda'ochon' neche da' nži'ilaže'chgüede' chio', ľenna' chaclenen' chio', gague da' ca' chesena'bene' cheyała' ye'ej gagwcho. Na' ca' nac da' ca' chesene' cheyała' ye'ej gagwcho cont yebe Diosen' chio', biņa' yesaclenen' bene' ca' chesene' cheyała' gagwchon, na' neca gaclenen' chio'.

¹⁰ Xancho Jesucriston' bnežjw cuine' gosote'ne' neche chio', na' da' chejnilaže'chone' ba gwnitlao xtola'chon'; perw bene' ca' ne' chosolalje' xchen beyixe' na' chosozeye'ba' cate' chesenabe' yezi'xen Diosen' chegaque', da' got Jesucriston' bi chaclenen legaque'.

¹¹ Nezecho tni'a tgüiz bene' nac b̄xoz blao che bene' Israel gualaž checho ca' chesote' beyixe' na' chjasesane' xchemba' lo' yodao' gana' nzi' Latje ga Zoa Dios cont ch̄nabde'ne' yezi'xene' xtola' yogo'lo' gaque'. Nach yezica'chle b̄xoz ca' chosozeye' cuerp che beyixe' ca' cho'a yežen'.

¹² Na' ca' ca'le goc che Jesúsen' dan' gosote'ne' cho'a ciuda Jerusalénna' cate' bnezjw cuine' cont beque'e xtola'chon' len xchene' dan' blaljen'.

¹³ Da'nan' cheyala' šejnilaže'cho Jesúsen' na' cuejyichjcho costumbr gol ca', la'czla' yesegue'e bene' chio' da' choncho ca'.

¹⁴ Gate'tez zoacho lo' yežlio nga da' te chen, perw chbezcho šjayzoalencho Diosen' lo' ciuda da' bi te chen.

¹⁵ Da' ba beca'a Jesucriston' xtola'chon' cheyala' güe'cho yela' choxcen che Diosen' yešlale mbancho, gonxenchone' len xtiža'chon'. Len̄na' da' chaclaže' Diosen' güe'chone'.

¹⁶ Na' cheyala' soacho goncho da' güen na' cheyala' gwnežjwcho con gaca'te da' saque' gwnežjwcho gaclencho bene' bi de chegaque', le chazlaže' Diosen' cate' chonxenchone' choncho ca'.

¹⁷ Le gwzenag che bene' chososed cheselo'ede' le'e xtiža' Diosen' na' le güe' latje yesene' naquen' gonle, le chosogüia chesene'e le'e cont chesaclene' le'e len yichjlažda'olen', na' legaque' cheyala' yosyodie' cuent lao Diosen' še naquen' ba gosone'. Le gwzenag chegaque' cont yesyebede' na' cont da' chesone' bi gaquen to da' zdebe, le še gonle güedenag len legaque', bibi da' güen chga'an chele še ca'.

¹⁸ Le nab cont gaclen Diosen' neto'. Nezet' chonto' can' chazlaže' Diosen' na' chaclaže'to' gonto' con da' naquen güen.

¹⁹ Na' leca chata'yoeda' le'e yo' güizle Diosen' nable yob gac yidcha' gan' zolen'.

Chnabe' gaclen Diosen' legaque'

²⁰ Na' na'a zoa Diosen' chone' cont zoa chbezcho binlo len xbab da' yo'o lo' yichjlažda'ochon'. Len' bechis bosbane' Xancho Jesucriston' ladjo bene' guat, le da' blalj xchenen' le'e yag cruzen' gwzolao chac da' cobe da' gwna Diosen' gone' gaclene' bene' yesejnilaže'ne'; na' gague da' te che dan' gwne' gonen'. Na' da' nzi'ilaže' Xancho Jesucriston' chio', zaca'lebde' ca' to bene' güeye' xila' bene' chon da' güen juisyw len be che' ca'.

²¹ Na' ch̄nabda' Diosen' gaclene' le'e bite'tez da' chyažjele cont soale gonle yogo'te da' güen can' chazlažen', na' gone' cont gac yichjlažda'ochon' cayanen' chaclaže' lagüe da' nombia'cho Jesucriston'. Le gonxen Jesucriston' to'li tocañe. Na' ca' gonšaczcho.

²² Bene' migw, ch̄nabšca' bi gaquele zed da' ba bzoja' le'e ch̄neyoeda' le'e nga, le bitec naquen da' tone.

²³ Na' chzenda' le'e bene' migw checho Timoteon' ba bechoje' ližyan' na' chbeza'ne' nga. Na' še yob yele'e nach chi'ane' cate' yedena'a le'e.

²⁴ Ca' nac neda', chguapa' tiox bene' blao ca' chosozejni'ide' le'e na' chosogüia chesene'e le'e, na' lecze chguapa' tiox yogo' nochle bene' chesejnilaže' Diosen'. Bene' lježcho ca' za'ac Italia lecze chosoguape' le'e tiox.

²⁵ Diosen' gaclenšque' le'e. Da' na'zen' chzoja'.

CART DAN! BZOJ SANTIAGO

Santiagon' chguape' tiox bene' ca' zjanaslas zan yež

¹ Neda' Santiago naca' bene' güen žin che Diosen' na' che Xancho Jesucriston'. Chguapa' le'e tiox, le'e nacle šižinw cue' xi'in diaža che da' Israel, le'e chejnilaže'le Jesucriston' na' naslasle yežlion'.

Nac nezecho can' che'ne Diosen' goncho

² Bene' migw, cheyala' yebechgüecho cate' chac bite'teze da' chac checho.

³ Cate' chac bi da' chac checho chonen chio' prueba še gončhačhlaže'cho šejnilaže'cho Diosen'. Na' nezecho cate' chončhačhlaže'cho chejnilaže'chone', chaclenen chio' cont gapcho yeła' chxenlaže' len bite'teze da' chac checho.

⁴ Na' da'nan' cheyala' gaple yeła' chxenlaže' bite'teze dan' chac chele na' gončhačhlaže'le šejnilaže'le Diosen' cont gacle can' chaclaže' le'.

⁵ Note'tezcho cate' bi nezecho naquen' chaclaže' Diosen' goncho, cheyala' nabechone' gwzejni'iden' chio', na' gwzejni'iczeden'. Le chebede' chaclene' chio', na' bitw chdile' chio' cate' chnabechone' galene' chio'.

⁶ Perw cate' chnabechone' gwzejni'ide' chio', cheyala' šejle'cho chzenagcze' chechon' na' bitw gacžejaže'cho. Bena' chacžejaže' še chzenag Diosen' che', zaca'lebbe' ca nisdao' dan' chas chata' cate' chečj be' lagüen' na' chjatan' nile na'le.

⁷ Ben' chacžejaže' še chzenag Diosen' che', bitw cheyala' soe' lez gwnežjw Diosen' le' bite'teze da' chnabe'.

⁸ Na' ben' chon ca' bitw nežde' bi xbab chone', con šayičj šayen chaque' len bite'teze dan' chonen'.

⁹ Na' bene' migw, le'e chejnilaže'le Diosen', še nole nacle bene' yaše', le soa mbalaz, le nacle bene' zaque' len Diosen'.

¹⁰ Na' bene' migw, še nole nacle bene' gwni'a, le soa mbalaz dan' ba chache'ele lao Diosen' bitw zaca'chle clcl ca yezica'chle bene'; na' yob te che yeła' gwni'an' can' chde che yej ca' zjaze yiže'.

¹¹ Cate' chn'chgua gwbižen' chesecquad yiže' ca', na' cheseyinj laga' che yejen' na' bich chosolo'en xdan. Can' chac len yej ca', lecze can' gac len bene' gwni'a ca', yeyol yenite' lao xšinen'.

Cheyala' soateze soacho šejnilaže'cho Jesucriston' bite'teze dan' chac checho

¹² Še chyo chčejaže'cho len da' chac checho na' chončhačhlaže'cho chejnilaže'cho Diosen', nachen' leca mbalaz zoacho. Na' cate' te dan' chy chzaca'chon', Diosen' gone' cont bancho len le' toli tocanē can' gwne' ban yogo'cho chaquechone'.

¹³ Na' note'tezcho cate' žan goncho da' malen', bitw gac načo Dios nan' chgo'oyele' chio' goncho da' malen', le Diosen' bitw chgo'oyele' bene' yesone' da' mal. Leczē ca' le', bitw bi de da' chgo'oyela' le' cont gone' da' malen'.

¹⁴ Yeła' chzelaže' checho dan' yo'o lo' yičjlažda'ocho chonen cont chzelaže'cho choncho da' mal.

¹⁵ Na' še ba choncho can' ža yeła' chzelaže' dan' yo'o lo' yičjlažda'ocho' na' zoacho choncho da' malen', nach gwžin ža cate' cuejyichj Diosen' chio' na' bitw šjazoacho len le'.

¹⁶ Bene' migw, bitw siye' cuintle gonle xbab Dios nan' chgo'oyele' le'e cont gonle da' malen'.

¹⁷ Dios ben' zoa yaba, le'na' chsele' da' güen da' chac checho na' da' de checho. Xacho Dios ben' ben gwbiž, bio' na' beljw ca' cont chososenin' len chio', chone' cont gac güen checho, na' bitw chše'e ca chone' len chio', bia'cze zoacze' chone' güen.

¹⁸ Gwyazlaže' Diosen' bocobe' yichjlažda'ocho' cate' gwyeyle'cho che diža' li čen'. Na' ba bocobe' yichjlažda'ocho' cont žialaacho len bene' nechw ca' chesejnilaže'ne'. Na' da' ba bocobe' yichjlaždao' chio', nezecho za' gone' ca' len bene' zan.

Can' goncho cont yebe Diosen' chio'

¹⁹ Bene' migw, nezele cheyala' yebecho gwzenagcho che diža' güen, na' cheyala' goncho xbab cate' za' necho, na' nēca la' ža'atecho.

²⁰ Cate' chža'acho, bitw chac goncho güen can' chaclaže' Diosen' goncho.

²¹ Da'nan' cheyala' cuejyichjcho yogo'lo' da' xinjen' ba benchon' na' yogo'lo' da' chgue'e Diosen' da' gwcha'o gw Xenen lo' yichjlažda'ocho cate' bi'na' šejnilaže'chone'. Cheyala' gwzējw yichjcho na' gwzenagcho diža' li che Diosen' dan' ba yo'o lo' yichjlažda'ocho', cont gata' yeła' mban checho toli tocanē.

²² Na' cheyała' goncho dan' ža diža' li che Diosen' goncho, gague con yenezcho can' žanna'. Le še con chenecho can' žanna' na' bi chonchon, chziye'ze cuincho še ca'.

²³ Ben' chene diža' li che Diosen' na' bi chone' can' žanna', zaca'lebbe' ca to bene' chna' cho'alagüen' lo spejw,

²⁴ le con chne'e can' nac cho'alagüen' na' cate' ba beyož gwne'en la' cheyanlažtie' can' naquenna'.

²⁵ Perw bene' zoacze' chzenague' xtiža' Diosen' do yičj do laže' na' chone' can' žanna' sin cbi yeyanlažen', benan' soe' mbalaz, le xtiža' Diosen' chaclenen le' bite'tez da' chone'.

²⁶ Note'tezcho še choncho xbab choncho can' chazlaže' Diosen', perw bi chnabia' cuincho cont bi necho diža' mal, chziye'cze cuincho še ca'. Le še xtiža'chon' bi naquen güen lao Diosen', bitw chebede' bite'tez dan' choncho še ca'.

²⁷ Še goncho can' chebe Xacho Diosen', gaclencho no'ole güezeb ca' na' bi' güezeb ca' še bi dan' cheseyažjde', na' cuejyichjcho bich goncho da' xinj dan' cheson bene' ca' bi zjanombia' Diosen'.

2

Toze can' cheyała' goncho len yogo' bene'

¹ Bene' migw, Xancho Jesucriston' naque' la'zelagüe bene' zaca', na' še chejnilaže'chone', toze can' cheyała' goncho len note'teze bene', bitw nacho balže bene' gonxenchguachone' na' yebale' gonechone' nacteze.

² Še yesela' chope bene' gan' chdop chžagcho chonxencho Jesucriston', na' toe' naque' bene' gwni'a na' nyaze' lache' šagüe' lache' xdan, na' ngo'o xbenen' to niy de oro, na' ben' yeto naque' bene' yaše' na' nyaze' lache' de'exo', toze can' cheyała' goncho len chope'.

³ Bitw naquen güen še gonxencho bene' gwni'a na'ze na' ye'chone': "Gwche'edo' lo yag siy nga ga nac binlo", na' ye'cho bene' yaše'na': "Gwzechateze do dan' na'le", o še ye'chone': "Gwche'etezdo' lo yo".

⁴ Bitw naquen güen lao Diosen' še cuinzcho choglaochon nacho noen' zaque' na' noen' bi zaca'. Xbab chechon' naquen da' mal še goncho ca'.

⁵ Bene' migw, Diosen' ba gwleje' zan bene' yaše' zjanaque' xi'ine' na' chesejnilaže'chgüe' le'. Na' yesenite' mbalaz cate' yesyežine' gan' zoen' chnabi'e, can' gwna Diosen' gac che note'teze chio' chaquecho le'.

⁶ Perw na' chonle bene' yaše' ca' ca bene' bibi zjazaca'. Na' bene' gwni'a ca' chongaclene' ca bene' zjazaca'chgua; len legaquen' chosoči chososaque' le'e na' cheseče'xoxje' le'e lao justis ca'.

⁷ Lecze legaquen' chosožie' yela' ya' che Jesucriston' ben' naccho txen, ben' naque' bene' zaca'.

⁸ Ley dan' nac da' žialao lao yogo' da' ca' nyela' le'e Xtiža' Diosen' žan: "Le gague ljež benačhle ca chaque cuinle." Še da' licze chonle can' žanna' choncze güen.

⁹ Perw ley che Diosen' chchoglaon chele napple doła' še chonxenle bal bene' na' yebale' chongaclene' ca bene' bibi zaca'.

¹⁰ Can' naquen, note'teze bene' zoe' chone' dołol can' ža leyna', perw na' še ba gwchoe' to da' dao', len doxen leyna' chape' doła' še ca'.

¹¹ Diosen' ben' gwna: "Bitw gata'lenle no'ole bi nac no'ol chele o bene' byo bi nac bene' chele", leczen' gwne': "Bi gotle bene'". Na' la'czla' bitw chata'lencho no'ole bi nac no'ol checho o bene' byo bi nac bene' checho, še ba naccho bene' güet bene', bia'cze napcho doła' len leyna'.

¹² Xtiža' Diosen' chaclenen chio' cont bi gwzenagcho che da' malen'. Na' cheyała' güe'cho diža' güen na' soacho goncho bichle can' žanna', le Diosen' gone' da' saca'zi'cho še bi choncho can' žanna'.

¹³ Diosen' gwnežjwchgüe' da' saca'zi' bene' ca' bi chesyeyaše' chesyezi'ilaže'de' ljež benače'. Perw bene' ca' chesyeyaše' chesyezi'ilaže'de' ljež benače', Diosen' yeyaše' yezi'ilaže'de' legaque'.

Bitwbi zejen še con žacho chejnilaže'cho Jesucriston'

¹⁴ Bene' migw, še to bene' že' chejnilaže' Jesucriston' perw bi chone' da' nac güen, bitwbi zejen že' ca'. Bitw chaclenen le' cont gata' yela' mban che' toli tocaņe še con žaze' ca'.

¹⁵ Bal bene' lježcho bene' chesejnilaže' Jesucriston' bi de da' yes'ej yesagüe' na' bi de xałana'gaque'.

¹⁶ Na' še bitw gaclenchone' len dan' cheseyažjde', še con ye'chone': "Le šjaya'ac to šagüe' to güen na' Diosen' gaclene' le'e cont želele dan' chyažjelen'", bitwbi zejen dan' con nacho ca'.

¹⁷ Da'n'an', še con žacho chejnilaže'cho Jesucriston' perw bitw choncho da' nac da' güen, bitwče bi zejen dan' žacho chejnilaže'chonen'.

¹⁸ Nita' bene' chesene' guac yesejnilaže' Jesucriston' la ca yesone' da' nac da' güen. Na' lecze nita' bene' chesene' še chejnilaže'cho Jesucriston' cheyala' goncho da' nac güen. Na' žia' le'e, še nacho chejnilaže'cho Jesucriston' perw bitw choncho da' güen, bitw nacia' še chejnilaže'chone'. Perw še da' li chejnilaže'chone' nach soacho goncho da' güen na' yesache'e bene' le chejnilaže'chonen'.

¹⁹ Chejle'cho toze Diosen' zaque' gonxenchone', na' ca'czen' cheyala' šejle'cho. Perw gague da' ca'zen' cheyala' goncho. Da' xigüe' ca' lecze chesejlen' toze Diosen' naque' bene' zaca' na' chesexizen chesežeben.

²⁰ Chnecho diža' da' bi zejen še con žacho chejnilaže'cho Jesucriston' na' bitw choncho da' güenna', le bi gaclenen chio' še con žacho chejnilaže'chone'.

²¹ Da' xoxxta'ochó Abrahanna' blo'e le gwejnilaže' Diosen' dan' bzenague' che Diosen'. Da'nán' bzande' xi'ine' Isaaquen' gote'be' cont gonxene' Diosen'. Na' dan' bzenague' che Diosen', da'nán' Diosen' gwne' che' le naque' bene' güen len le'.

²² Na' nezecho can' ben da' Abrahanna', gague con gwejnilaže'ze Diosen', san lecze bzenague' che'. Na' dan' bene' ca' blo'e le gwejnilaže' Diosen'.

²³ Da'nán' goc can' nyoj Xtíža' Diosen' che', žan: "Abraham gwejnilaže' Diosen' na' da'nán' Diosen' gwne' naque' bene' güen len le'." Na' lecze nyojen che Abrahanna' goque' bene' xmigw Dios.

²⁴ Can' naquen, gague dan' žacho chejnilaže'cho Dios nan' že' naccho bene' güen len le', san dan' chzenagcho che', da'nán' že' naccho bene' güen len le'.

²⁵ Na' da' Rahab goque' no'ole zle' no'ol con gwej len note'teze bene' byo, perw bzenague' che Diosen' cate' blebe' bene' ca' chope jasegüia jasene'e laže'na'. Na' blo'ede' legaque' yetole nez ga jaya'aque' cont bi jasyxen soldadw che rey legaque'. Na' dan' goclene' bene' ca', blo'e gwejnilaže' Diosen'. Na' gwna Diosen' naque' bene' güen len le'.

²⁶ Quinga naquen: Še to bene' bich nye'e biš grasyw, nacia' naque' bene' guat. Ca'czen' naquen, še bitw choncho da' güen nacia' bitw chejnilaže'cho Diosen' la'czla' žacho chejnilaže'chone'.

3

Choncho da' xinj len xtiža'cho

¹ Bene' migw, nezecho neto' chsed chlo'eto' bene' yoble xtiža' Diosen' saca'zi'chto' še bi gonto' can' žanna'. Da'nán' žia' le'e, gague la' si'te lo na'le gwsed gwlo'ele bene' yoble xtiža' Diosen'.

² Zan ni'a yogo'cho choncho da' xinj. Perw še to bene' bitw chone' da' xinj len xtiže'na', nacchgüe' bene' güen na' gwzoeczde' nabie' doxen cuerp chen' še ca'.

³ Caten' chgo'ochó freno cho'a cabayw ca' cont yosozenagba' checho, na' šja'acba' con gate'teze chaclaže'cho šejlenchoba'.

⁴ Na' lecze bene' ca' chososa' barcw xen ca' chosočhine' yag da'oze dan' chosose'eden' cont chejen con gate'teze chesende', la'czla' še chžiga' to be' gual legaquen'.

⁵ Ca'czen' naquen len lože'chon'. Toze da' dao' rizen' naquen lao cuerp chechon', perw chac chnelenchon diža' da' zjazaca'. Na' ca nac to yi' dao' riz, guac gwzeyen to ya'adao' xen, ca'czen' naquen len lože'chon' cate' chnelenchon diža' mal.

⁶ Lože'chon' naquen to da' chnabia' chonchguan da' xinj juisyw lao doxen cuerp chechon'. Lože'chon' naquen ca to yi' bej da' chla'an chca'an nile na'le chzeyen bite'teze da' de, le še chon'cho diža' malen' chyala'ch yogo'lofte da' xinj dan' chonchon', na' chonen' cont zoacho chochguacho da' xinj yešlale mbancho. Na' che gwxiyen' chzenagcho chonen' choe'cho diža' mal ca'.

⁷ Chac chnabia'cho yogo'te beyixe', be žia tap ni'a na', be žia xil, be chda nxobe le'e, na' be ca' že' lo' nis. Ba gwnita' bene' gosenabi'eba'.

⁸ Perw ne to chio' bitw soecho lože'chon' cont bi güe'lenchon diža' mal. Con zoacho choe'cho diža' malen', na' diža' mal dan' choe'chon' zaca'leben ca venen che to bej znia.

⁹ Len xtiža'chon' chonxencho Dios ben' naque' Xacho. Na' lecze len xtiža'chon' chžiacho yela' ya' che ljež beňachcho bene' ca' ben Diosen' can' nac le'.

¹⁰ Na' cho'acho na' chchoj diža' šagüe' cate' chonxencho Diosen' na' lecze chchoj diža' mal cate' chžiacho yela' ya' che ljež beňachcho. Bene' migw, bitw choncho ca cheyala' goncho.

¹¹ Nezecho ga chal nis bitw žia nis sia na' nis zbapj toz bej.

¹² Na' lecze ca' bene' migw, nezecho to yag yixgüigw bitw chbian frut dan' nzi' aceituna, na' neca yag uvas chbian yixgüigw. Na' lecze ca' ga chal nis, bitw chchoj nis sia to bej ga žia nis zbapj.

Can' goncho še Diosen' ba bene' chio' yela' sina' chen'

¹³ Še note'tezle žale nacle beñe' sina' na' chejni'ile xtiža' Diosen', cheyała' gonle yogo'loł can' chazlaže' Diosen'. Cheyała' gonle da' güen sin cbi gonxen cuinle cont nacia' nacle beñe' sina'.

¹⁴ Perw še chgue'e lježle na' chzelaže'le gacchle beñe' blaoch ca beñe' lježle, bitw cheyała' nale nacle beñe' sina', le con chonlaže'len' še ca'.

¹⁵ Na' še chgue'e lježle na' chzelaže'le gacle beñe' blaoch ca beñe' lježle, bitw nacle beñe' sina', san xbab chelen' zan' che Satanás dan' chnabia' da' xigüe' ca', na' con chonle da' xinjen' can' ža lažda'olen' na' can' cheson beñe' ca' bi zjanombia' Diosen'.

¹⁶ Še chgue'e lježcho na' chzelaže'cho gaccho beñe' blaoch ca legaque', bitw zoacho binlo len legaque' še ca', na' choncho yogo'te da' xinj.

¹⁷ Cate' Diosen' chone' chio' yela' sina' chen', chaclaže'cho goncho yogo' da' nac da' güen. Chaclaže'cho soacho binlo len lježcho na' naccho beñe' xenlaže' na' chzexjw yichjcho cont chzenag che lježcho. Na' lecze cheyaše' cheži'ilaže' lježcho na' choncho da' güen len legaque', na' toz ca choncho len note'tez beñe'. Na' bite'tez da' choncho, chonchon do laže'cho.

¹⁸ Nach še chebecho yesezoa yesebez beñe' binlo na' chaclencho beñe' yezica'chle cont yesezoa yesebeze' binlo, na' chaclenen cont yeson beñe' da' güen.

4

Bitw gac goncho can' cheson beñe' bi zjanombia' Diosen'

¹ Chdile chšašlen lježle, na' chonle ca' dan' yo'o nyaz da' malen' yichjlažda'olen' na' chnabian' le'e cont chonle con ca žan chele.

² Chzelaže'chgualo bi da' gata' chele na' chdile chšašlen lježle na' chaclaže'tele gotle beñe' cont gata' chele dan' chzelaže'len'. Perw bitw gata' dan' che'nelen' lagüete chonle da' xinj na' bi chñabele Diosen' gone' cont gata' dan' chyažjelen'.

³ Na' cate' chñabele Diosen' gone' cont gata' bi dan' gata' chele, bitw chonen', le con che'nele gata' dan' chzelaže'le lo' lažda'olen' cont gonle con nacteze žan chele.

⁴ Na' da' chzenagle che dan' ža xbab chelen' na' chonle can' chzelažen'na', chonle txen len beñe' ca' bi zjanombia' Diosen', na' chonle contr Diosen'. Na' note'tezcho še chaclaže'cho goncho txen len beñe' mal ca', choncho contr Diosen' na' bich chaquechone' ca cheyała'. Zaca'lebcho ca to no'ole nzoa xto, no'ole ben' bich chacde' beñe' che'.

⁵ Chonljale xbab Xtiža' Diosen' bitw bi zacan' gan' nyojen žan: "Spiritw che Diosen' dan' zoan lo' lažda'ochon' chzelaže'chguan gwzenagcho che toz Diosen'."

⁶ Diosen' chaclenchgüe' chio' cont chzenagcho che toz le'. Da'n'an' nyoj Xtiža' Diosen' žan: "Diosen' chone' contr beñe' ca' chesonxen cuingaue', perw chaclene' beñe' ca' chesacbe'ede' bi chosozenague' che' ca cheyała'."

⁷ Da'n'an' cheyała' gon cuincho lo' na' Diosen' na' gwyo gwchejlaže'cho bi gwzenagcho che Satanásen'. Še goncho ca', gwcuseczen ca'ale.

⁸ Le soa le yol güiž Diosen', nach soe' gaclene' le'e. Cheyała' cuejyichje da' xinj da' chonle. Na' še chonle xbab guac gonxencho Diosen' na' gontezcho can' ža lažda'ochon', clelen' chonle xbab' še ca', na' cheyała' güe'le latje yeyon Diosen' yichjlažda'olen' xilaže'.

⁹ Bi cheyała' yebele, san cheyała' yegüine'le neche da' xinjen' ba benlen' na' yeto'ele chen.

¹⁰ Cheyała' gwzexjw yichje lao Xancho Diosen', nach Diosen' gone' cont gacxenle.

Bi cheyała' nacho che lježcho nape' doła'

¹¹ Beñe' migw, bi cheyała' nelaoho che lježcho. Ben' chnelagüe' che lježe' o chosbaguede' lježe', benan' chne' che ley che Diosen' na' chzoe' leyna' ca'ale. Na' nezecho ben' chon ca' bi chzenague' che leyna'. Na' dan' chon cuine' ca beñe' zaque' cont že' che beñe' lježe' nape' doła', chone' ley che Diosen' ca to da' bibi zaca'.

¹² Toz Dios nan' gwdixjue' leyna', na' toz le'na' zaque' choglagüe' che to tocho še napcho doła'. Na' toz le' zaque' gone' cont bi šjaya'ac beñe' lo' yi' gabilen', na' lecze zaque' cont yesele' beñe' lo' yi' gabilen'. Perw chio' bitw zaca'cho nacho che beñe' lježcho zjanape' doła'.

Bitw nezecho bin' gac gwxe güižj

¹³ Na' le gwzenag da' nga: Balje chchogbia'len šejle to ga šejle gonle negosyw cont gonle gan. Na' chbejle to ža cate' šejle na' chchogbia'len yega'anle na' tgüiz,

¹⁴ neca chacbe'ele bi nezecho bin' gac checho o nac goncho gwxe güižj. Yela' mban chechon' zaca'leben ca to bejw, le bejon' šlozže chle'echon na' cheyasen.

¹⁵ Cheyała' nacho: "Še Xancho Diosen' gone' latje bancho, na' goncho to da' goncho."

¹⁶ Perw da' xinjen' choncho še chonxen cuincho chžiacho bia' naquen' goncho sin cbi nabecho Diosen'.

¹⁷ Na' še nezecho cheyała' goncho da' nac güen na' bi chonchon, napcho doła' lao Diosen'.

5

Da' malchgua gac che bene' gwni'a ca' bene' bi chosozenag che Diosen'

¹ Na' ca nac le'e bene' gwni'a, le'e bi chzenagle che Diosen', le soayaše' na' le cuežyaše', le leca za' saca'zi'le.

² Lao Diosen' dan' de chele naquen ca to da' ba chbiayi', na' lache' šagüe' chelen' naquen ca to da' ba chle'e belzila'.

³ Na' mechw chelen' dan' nac de oro na' de plata, len Diosen' naquen ca to da' ba chzen xche'en. Da' nan' žin ža žaglaochguale lo yi' gabilen'. Ba gwche' yichjle tlooze btoble da' scha'o xmechwlen', la'czla' ba zoa goŋ Diosen' da' saca'zi'le.

⁴ Cheyala' gonle xbab can' benle len bene' güen žin chele ca', bene' yaše' ca' besyelap coseš chelen'. Benlele legaue' dan' bitw gwduxwlene' ca cheyala'. Na' dan' bi bnežjwle laxjwgaquen' ca cheyala', chlo'en nacle bene' güen da' xinj. Diosen' chzenague' che bene' güen žin ca' dan' chesyegüine'de', Dios ben' nape la'zelagüe yela' guac xen.

⁵ Zoatezle che'ej chagwšagüe'le na' chonditjele dan' de chele chonle' ca' žan chele, na' bi chache'ele ba zoa goŋ Diosen' da' saca'zi'le. Na' lagüe dan' chonle' ca', zaca'leble ca to beyixe' ben' chgüe'ej chguagwšagüe'cho cont ba chaŋe'ba' cate' žin ža gotchoba'.

⁶ Na' gan' chi'le chonle yela' justisen', ba gwchoglaolen yesote' bene' goson da' güen, bene' bibi gosonde' le'e.

Cuezcho batcan' yid Xancho Jesucriston' da' yoble na' yoł güižcho Dios

⁷ Ca nac le'e bene' migw, le gape yela' chxenlaže' len dan' chyi chzaca'le, le ba zoa yid Xancho Jesucriston' da' yoble. Bene' ca' chesaz, chesenite' chesebeze' cosešen', le cosešen' naquen da' zaca'. Na' chesape' yela' chxenlaže' chesebeze' chde tiemp yejon', le cate' chbeze yejon', cana'chen' chosyotobe' cosešen'.

⁸ Da'nan' bite'teze dan' chyi chzaca'le, cheyala' gape yela' chxenlaže' na' gonchachlaže'le šejnilaže'le Xancho Jesucriston', le ba zoa yide' da' yoble.

⁹ Bene' migw, bitw yosbaga' lježle še bin' chac chele. Še bin' yosbaga' lježle, ba zoa yid Xancho' da' yoble na' choglagüen' chele naple dola'.

¹⁰ Le gon xbab che da' bene' ca' goso'e xtiža' Xancho Diosen' cani'. Leca bosochi bososaca' bene' legaue', perw bia'cze bosoyo bosochije', can' cheyala' gonle.

¹¹ Da' li mbalaz bene' ca' gwnita'teze' gosonchachlaže' gosejnilaže' Diosen' la'czla' be-sežlagüe'. Na' ba benele xtiža' da' Job can' benchachlaže' gwyejnilaže' Diosen', la'czla' da' zan da' gwdi gwxaque'. Perw na' cate' gwde dan' gwdi gwxaquen', Diosen' bene' cont gwzoache' mbalazch clal can' gwzoe' cani'. Can' nac Diosen', leca chazlaže' chaclene' chio', na' leca cheyaše' cheži'ilaže'de' chio'.

¹² Bene' migw, da' naquen da' žialao, gwbat gwzoale no co' da' bałi che bite'teze. Bitw nale yaban' co'on da' bałi chole diža' li, neca nale yežlio nga co'on da' bałi chole diža' li, neca bite'tezechle. Cheyala' güe'cho diža' li da' šejle' bene' cont Diosen' bi choglagüen' checho saca'zi'cho.

¹³ Note'tezcho cate' chac bi da' chac checho, cheyala' yoł güižcho Dios. Na' note'tezcho cate' zoacho mbalaz, cheyala' gołcho gonxenchone'.

¹⁴ Note'tezcho cate' chacšenecho, cheyala' gaxcho bene' ca' gwlejcho cont chosogüia chesene'e chio' chdop chžagcho chonxencho Jesucriston'. Na' yosotope' yichjcho late' set, na' yosol güiže' Dios, yesenabe' yeyaquecho len yela' guac che Xancho Jesucriston' lagüe' da' chejnilaže' chone'.

¹⁵ Na' chio', cate' chöl güižcho Xancho Diosen', cheyala' šejle'cho le chzenagcze' checho cont yeyone' ben' chacšenena', na' še ba bene' da' xinj, güezi'xencze Xancho' che'.

¹⁶ Da'nan' cheyala' xoadola'cho lao bene' lježcho na' yoł güižcho Dios tocho yetocho cont ca' yezoacho güen še bin' chac checho. Na' še naccho bene' güen len Diosen', Diosen' chzenagcze' checho cate' chöl güižchone' na' chone' da' zan da' güen dan' chnabechone' gone'.

¹⁷ Le gon xbab che Elías ben' be' xtiža' Diosen' cani'te. Goque' benač cayanen' nac chio'. Na' cate' boł güiže' Diosen' do yichj do laže' gwŋabe' bi gac yejw, na' Diosen' bzenague' che' na' bitw goc yejon' lao šon iz yogašjo.

¹⁸ Na' yetŋi'a cate' boł güiže' Diosen' gwŋabde'ne' sele' yejon' da' yoble, nach Diosen' gwswelen'. Na' goc coseš che bene' ca' da' yoble.

¹⁹ Bene' migw, cate' to bene' lježcho ba gwlejyichje' dan' nac da' li dan' bzejni'i Diosen' chio', cheyala' gaclenchone' cont yetinjde' xtole'na'.

²⁰ Chaclaža' nezele, cate' choncho cont note'teze bene' chetinjde' xtole'na', chaclenchone' cont chosla Diosen' le' lo yi' gabil, le chezi'xene' xtole'na' la'czla' še naquen da' zan. Da' na'zen' chzoja' ŋa'a.

CART NECHW DAN' BZOJ POSTLW SAN PEDRO

Pedro chzoje' cart nga che bene' ca' zjanaslas chesejnilaže' Criston'

¹ Neda' Pedro naca' postlw che Jesucriston'. Na' chzoja' cart nga che le'e chejnilaže'le Jesucriston', le'e naslasle distritw ca' gan' nzi' Ponto na' Galacia na' Capadocia na' Asia na' Bitinia. Chio' chejnilaže'cho Jesucriston' naccho ca bene' zito' len yezica'chle bene' že' yežlio nga.

² Con can' bsi'e xnezen' gwlatle, Xacho Diosen' gwleje' chio' cont Spiritw chen' bocoben yichjlažda'ochon' na' gwlo'on chio' lo na' Diosen'. Bene' ca' cont chzenagcho che Jesucriston' na' cont Jesucriston' zoacze' cheyone' lažda'ochon' xilaže' dan' blalj xchenen' neche chio' le'e yag cruzen'. Chnaba' soacze Diosen' gaclenchgüe' le'e na' soacze' gone' cont soa cuezle binlochgua len xbab chelen'.

Zoacho lez šjayzoacho len Diosen'

³ Cheyala' gonxenko Diosen'. Le' naque' Xa Xancho Jesucriston', na' Xancho Jesucriston' lecze chonxene' le'. Leca cheyaše' cheži'ilaže' Diosen' chio', na' da'nan' bocobe' yichjlažda'ochon' na' bene' cont zoacho lez šjayzoacho len le', le Jesucriston' beyas bebane' ladjo bene' guat ca'.

⁴ Na' Diosen' gone' ga gac da' güen checho, to da' mbachgua da' bi yenit neca te chen, to da' ngo'ošagüe' cont gaquen checho cate' yežincho yaban'.

⁵ Na' Diosen' len yela' guac xen chen' chcuas chcue'eje' chio' len da' malen' lagüe chejnilaže'chone'. Chone' ca' šlac biņa' žin ža le'echo da' mba da' gone' gac checho caten' šjayzoacho len le'.

⁶ Da'nan' zoachgual mbalaz la'czla' chonen byen da' zan da' chyi chzaca'le šlož güeje na'a.

⁷ La'czla' da' te che oron', benachen' chosozeyen' cont chesyebeje' bi da' nchixen da' bibi zaca'. Na' ca'cze zaca'lebe dan' choe' Diosen' latje chac chele, chaquen cont gwlo'ele še da' li chejnilaže'lene' cate' chac bi da' mal chele. Na' še soatezle šejnilaže'lene', leca zaca'chen clē ca no oro. Nach cate' Jesucriston' yide' da' yoble Diosen' güe'e diža' ne' benle güen na' gone' le'e yela' bala'añ xen na' gone' soale txen len le' gan' yo'ochgua be'ni'.

⁸ Chaquele Jesucriston' la'czla' biņa' le'elne'. Na' la'czla' bi chle'elne' na'a, chejnilaže'lene'. Da'nan' zoale mbalaz juisyw. Na' catec mbalaz zoale con bi chac gwzejni'ile bene' cayañen' chebele.

⁹ Na' da' chejnilaže'le Jesucriston', žin ža šjayzoale len Diosen'.

¹⁰⁻¹¹ Da' bene' ca' goso'e xtiža' Diosen' cani' gosene' yeyaše' yeži'ilaže' Diosen' chio' zoacho na'a. Spiritw che Criston' gwzoan len legaque' bzejni'in legaque' yid Criston' yežlion' na' saca'zi'e na' yeyoža' gwlo'e Diosen' naque' bene' zaca' juisyw. Da'nan' bososedyane' na' besyeyiljwyože' non' seļa' Diosen' gaclene' chio' na' batcan' yide'.

¹² Na' Diosen' bzejni'ide' legaque' che da' ca' bosozoje' cont gosenezde' gaquen che chio' zoacho na'a na' gague che cuingaque'. Na' na'a Spiriton' dan' za' gan' zoa Diosen' ba benen cont gwnita' bene' goseyixjue'ede' le'e diža' güen che Criston', na' diža' güen chen' naquen lebe len dan' bosozoj da' bene' ca' goso'e xtiža' Diosen' cani'. Na' lente angl che Diosen' chesezelaže' yesejni'ide' naquen' chaclen Diosen' chio'.

Cheyala' gac lažda'ochon' xilaže' len yogo' da' choncho

¹³ Da'nan' cheyala' soale len toze xbab na' gonle con ga zelao saque'le cont gonle can' chazlaže' Diosen'. Cheyala' soale yebele gon Diosen' gacchgua mba chele caten' yid Jesucriston' da' yoble.

¹⁴ Na' da' nacle xi'in Dios cheyala' gwzenagle che', na' bich gwzenagle che da' malen' can' gwna lažda'olen' gonle cana' cate' biņa' šejni'ile che Diosen'.

¹⁵ Dios nan' ba gwleje' chio' naccho xi'ine', na' le' naque' bene' laždao' xilaže'. Na' con ca nac le' bene' laždao' xilaže', lecze can' cheyala' gaccho bene' laždao' xilaže' len yogo' da' choncho.

¹⁶ Le Xtiža' Diosen' nyojen žan: "Cheyala' gacle bene' laždao' xilaže', le neda' Dios naca' bene' laždao' xilaže'!"

¹⁷ Chio' choj güižcho Diosen' che'chone': "Xato' Dios". Na' Diosen' chchoglagüen' che to to chio' benač še nocho napcho dola' ca nac da' choncho, na' toz can' chone' len note'tezcho. Da'nan' cheyala' žebcho goncho da' bi chazlaže' Diosen' šlac zoacho yežlio nga.

¹⁸ Nezecho Diosen' ba bebeje' chio' lo da' ca' bosozejni'i da' xozxta'ochō ca' chio' da' bibi zaca'. Na' nezecho ca nac no mechw de plata o de oro na' bichle da' ca' chesede chen, bi goc yesyebjen chio' lo da' ca' choncho da' bibi zaca'.

¹⁹ San byažjen gwseła' Diosen' Criston' blalj xčhene' da' zaca'chgua. Na' le' bnežjw cuine' gote' cont bebeje' chio' lo da' ca' bibi zaca'. Na' Criston' zaca'lebe' ca to xila' dao' be bibi yižgüe' da', be bibi naqueba'. Ben' nac ca' gosot bene' Israel gualaž čheton' cont bezi'xen Diosen' xtola'gaque'.

²⁰ Za' xe yežlion' Diosen' gwleje' Criston' cont bnežjw cuine' neče xtola'chon'. Na' Diosen' gwsele'ne' nga na'a ba zoa te che yežlion' cont chaclene' chio'.

²¹ Na' Criston' chone' cont zoacho chejnilaže'cho Diosen'. Na' Dios nan' bosbane' Criston' ladjo bene' guaten' na' blo'e nac Xi'ine' Criston' bene' zaca' juisyw. Nachen' zoacho chejnilaže'cho Diosen' na' zoacho lez gon Diosen' güen len chio'.

²² Na' da' chaclen Spiritw che Diosen' chio', ba chzenagcho diža' li che Diosen' na' choncho can' že'. Da'nan' ba beyac lažda'ochon' xilaže', na' da'nan' do laže'cho ba chaquecho yezca'chle bene' chesejnilaže' Jesucriston'. Na' ca'cze cheyla' goncho, cheyla' gaque lježcho do yichj do laže'cho, gague gaguechone' de diža'ze.

²³ Xaxna' chio' zoacho yežlio nga zjanaque' bene' chesat, perw gague neche da' goljcho len legaque' naccho xi'in Dios, san naccho xi'ine' da' bocobe' yichjlažda'ochon' cate' gweyje'cho xtižen'. Na' xtižen' zoan toli tocaņe, gague da' te čhen.

²⁴ Chac can' nyojen, žan:

Yogo' beņach chesede che' ca chesede che' no yiže' dao', na' yogo' da' chebe beņachen' yežlio nga da' chesacde' zaca'chguan, zaca'leben ca yej da' žia yiže'.

Chesebiž yiže' ca' na' chesecquad chesebiž yej da' zjažia yiže'.

²⁵ Perw xtiža' Diosen' zoan toli tocaņe, gague da' te čhen.

Na' xtiže' nan' diža' güen da' ba gwdixjue'eto' len le'e.

2

¹ Da'nan' cheyla' cuejyichjcho yogo' bite'teze da' xinj da' choncho. Bi gonlaže'cho, bi goncho contze yesaque bene' naccho bene' güen, bi xi'acho bene', bi nečo diža' mal che bene'.

² Na' ca bi' che'eņ dao' žan yesaže'be' xiže'gacbe', can' cheyla' selaže'cho yenečo xtiža' Diosen', le naquen da' güenchgua, na' cate' chzenagchon chaclenen chio' cont choncho can' cheyla' gon chio' ba de yela' mban chečo toli tocaņe.

³ Le ba chacbe'echo na'a Xancho Criston' naque' bene' šagüe'.

Criston' zaca'lebde' ca to yej squin che yo'o

⁴ Cheyla' gwzenagcho che Xancho Jesucriston' ben' chon' chio' yela' mban toli tocaņe. Bene' zan chesegue'ede' le' la'czla' Diosen' gwleje'ne' cont chaclene' chio' na' zaca'chgüe' len Diosen'. Da'nan' Jesucriston' zaca'lebde' ca to yej güen da' gwlej bene' cont gaquen yej squin ližen', perw bene' goson žinna' bi gosazlažen' na' gosebequen' šla'ale.

⁵ Na' chio' napcho yela' mban da' chejnilaže'cho Jesucriston'. Da'nan' yogo'cho txen zaca'lebcho ca yej ca' da' zjancua' zjangoden' gan' chac yo'o de yejen'. Na' zaca'lebcho ca' liž Diosen' dan' zoe' len chio'. Lecze zaca'lebcho ca bħoz bene' zjanac lo na' Diosen', le naccho lo na' Diosen' na' chaclen Jesucriston' chio' cont zoaczcho chonxenko Diosen' con can' chazlaže'.

⁶ Na' Xtiža' Diosen' nyojen, žan:

Sela' to bene' ciuda Sión na' zaca'lebde' ca to yej da' zaca' da' gwlej bene' cont gaquen yej squin liže'.

Na' note'teze ben' šejnilaže' le', gwbatech yetinjde' da' gwejnilaže'ne'.

⁷ Nach len chio' chejnilaže'chone', Jesucriston' naque' leca bene' zaca'. San bene' bi chesejnilaže'ne', nyojczde da' nga chegaque', žan:

Yej da' bi gosaclaže' bene' güen yo'o ca' yosočhine',

len ba naquen yej squin.

⁸ Na' lecze ca' žan:

Zaca'lebde' ca to yej da' chčhego' bene' na' ca to yej da' chgo'o ni'e na' chjasebiže'.

Nyojen žan chesečhegüe' le bi chosozenague' xtiža' Diosen'; na' Diosen' bžie' bia' yesac chegaque' ca'.

Chio' chejnilaže'cho Diosen' naccho xi'ine'

⁹ Na' chio', Diosen' ba gwleje' chio' cont chejnilaže'chone'. Na' len Diosen' naccho ca rey na' ca bħoz. Gwleje' chio' cont naccho nación che', na' nactecho diaža' che', le chaclaže' čixjue'echo catec da' güen juisyw chone'. Le'na' bebeje' chio' lo da' malen' bencho na' gwlo'e be'ni' xen čhen' lo' yichjlažda'ochon' cont soacho goncho da' güen.

¹⁰ Cana' le'e bi gwejnilaže'le Diosen' na' bi gocle nación che', perw na'a ba nacle nación che'. Cana' biņa' yeyaše'de' le'e, san na'a Diosen' ba beyaše' beži'ilaže'de' le'e.

Cheyała' goncho can' chazlaže' Diosen'

¹¹ Chacda' le'e bene' migw, na' chneyoeda' le'e le gon xbab le yežlio nga bi naquen laže. Da'nan' bitw gonle bite'teze da' xinj da' žan gonle len cuerp chelen', le še gonlen, gwžonen soa yichjlažda'olen' binlo len Diosen'.

¹² Le soa le gon da' güen cont bene' ca' bi chesejnilaže' Diosen' yesele'ede' da' güen da' chonle, na' la'czla' na'a chesezi'diže' le'e chesene' chonle clele, žin ža yesele'ede' chonle da' güen na' yesonxene' Diosen' cate' žin ža čhogbi'en nac gac che to toe'.

¹³ Da' chejnilaže'le Xancho Criston', le gwzenag che yogo' bene' ba bosozoa beňachen' cont yesenabi'e le'e. Le gwzenag che rey ben' chnabia' doxen gan' zoachon',

¹⁴ na' lecze le gwzenag che bene' gwnabia' ca' chsela' reyen'. Le nac lo na'gaque' yesone' castigw che bene' ca' cheson da' xinj na' yesonxene' bene' cheson can' cheyała' yesone'.

¹⁵ Diosen' chaclaže' goncho da' güen cont bene' ca' bi chesejni'i che', ben' zjančhol yichjlažda'ogaque', bi žel diža' da' yeseňe' yosocuiše' chio'.

¹⁶ Cheyała' soa cuezcho mbalaz da' bich yo'ochlo na' gwxiyen', perw bi goncho xbab guacte goncho bi da' xinj. San cheyała' soa cuezcho mbalaz da' yo'ochlo na' Diosen', na' yo'ochlo ne'en cont goncho con dan' chazlaže' goncho.

¹⁷ Cheyała' gapcho bala'an yogo'loł bene'. Na' cheyała' gaque bene' lježcho bene' chesonxene' Jesucriston'. Cheyała' žebcho goncho da' bi chazlaže' Diosen'. Na' cheyała' gapcho bene' gwnabia' chechon' bala'an.

Criston' byo bčheje' dan' gwxcaci'ena'

¹⁸ Le'e chonle žin che bene', le gwzenag che xan žin chele da' chaple legaque' bala'an. Gague tlaoze gwzenagle che xan žin chelen' še zjanaque' bene' šagüe' bene' yo'o xbab, san lecze le gwzenag chegaque' še zjanaque' bene' znia.

¹⁹ Še bibi da' mal nonle na' bia'cze chosoči chososaque' le'e, chebe Diosen' chyo chčhejle len da' chesonde' le'e lagüe nezele chaclaže' Diosen' goncho ca'.

²⁰ Perw bibi zacan' še ba benle bi da' xinj na' chyo chčhejle cate' chesebaže' le'e. San še chosoči chososaque' le'e cate' chonle da' güen na' chyo chčhejle len da' chesonde' le'e, nachle chebe Diosen' le'e.

²¹ Le Diosen' gwleje' chio' cont gwyo gwčhejcho len bi da' yosoči yososaca' bene' chio', na' Criston' gwxcaci'e neče chio' na' byo bčhejde' len da' goc che' cont nezecho ca'czen' cheyała' goncho.

²² Bibi da' xinj ben Criston', ne to diža' güenlaže' bi be'e.

²³ Cate' gosezi'diža' bene' le', bi boži'e dižan' nac ca' len legaque'. Na' cate' bosochi bososaque'ne', bi gwne' yebi'e mal len legaque'. Ben cuine' lo na' Diosen', le gwnežde' Diosen' čhogbi'en yesezaci' bene' ca' con can' cheyała' gac chegaque'.

²⁴ Criston' bnežjw cuine' neče xtola'chon' cate' gosote'ne' le'e yag cruzen'. Da'nan' cheyała' cuejyichjcho da' xinjnen' choncho na' soacho goncho da' güen. Gwxcaci'e cont bozoe' chio' binlo.

²⁵ Goccho ca xila' be gosacžeje, perw na'a ba naccho ca be yo'o lo na' xamba' cont chyoeba', le Criston' chgüia chňe'e chio' na' yo'o lo ne'e lažda'ochon' chcuas chcuc'ejen' len da' malen'.

3*Can' cheyała' yeson bene' zjanšagna'*

¹ Na' lecze le'e no'ole nšagna'le, to tole cheyała' gwzenagle che bene' chele. Bale' bina' yosozenague' xtiža' Diosen', na' še gwzenagle chegaque', yesacbe'ede' xtiža' Diosen' naquen da' güen la'czla' bibi ye'ln'e'. Na' yosozenague' che Diosen'

² cate' yesele'ede' chaple legaque' bala'an na' čhi' yichjle soa cuezle cont lažda'olen' gaquen xilaže' len Diosen'.

³ Na' le'e no'ole, bi načo naquen da' žialao gon cuinle xdan yopa'a no yichjle, gwguala' yenle no bga', gwguala'le no ret, co'ole no niy de oro, na' čhazle lache' šagüe'.

⁴ Dan' nac da' žialao, gac lažda'olen' güen, la'czla' nono chle'e len. Zaca'čguan len Diosen' gaccho bene' nexjwlaže' na' bene' xenlaže', le bi te che yichjlažda'ochon'.

⁵ Gosenita' no'ole cani' no'olen' gosejnilaže' Diosen' na' goson cuine' lo ne'e. Legaque' gosaque' bene' nexjwlaže' na' bene' xenlaže' na' bosozexjwyichjje' cont gosone' bin' gwna bene' che to toe'.

⁶ Da' Sara, no'ol che da' xozxta'oto' Abrahanna', gwzoe' bzenague' che bene' che' na' gože'ne': "Xana". Na' le'e še soatezle gonle da' güen na' bi žeble, nach yesena bene' nacle xi'in da' Saran' lagüe chonle can' benen'.

⁷ Na' le'e bene' byo nšagna'le, lecze cheyała' gacle bene' šagüe' len no'ol chele na' gaplene' bala'an, le bi zjanaque' bene' gual can' nac chio' bene' byo. Na' lecze can' ba nži'ilaže' Diosen' chio' na' nonle' chio' yela' mban toli tocaňe, ca'tezeczen' ba none' len legaque'.

Nachen' cheyała' goncho güen len legaque' cont bibi gwžon gwzenag Diosen' checho cate' choł güižchone'.

Can' goncho še yosoči yososaca' bene' chio' la'czła' choncho da' güen

⁸ Yogo'cho cheyała' goncho toze xbab na' cheyała' yeyaše'cho lo' lažda'ochon' še bi da' chac che bene' lježcho. Cheyała' gaque lježcho do laže'cho ca bene' biše' lježcho, na' cheyała' gaccho bene' šagüe' len bene' lježcho na' bi gon cuincho bene' xen.

⁹ Še bi da' mal cheson bene' len chio', bi načo lecze da' mal yebi'icho len legaque'. Na' še bene' chesezi'diže' chio', bitw yoži'icho dižan' nac ca' len legaque', san načo gac da' güen chegaque'. Le Diosen' ba gwleje' chio' cont goncho ca' na' cont gone' latje soacho mbalaz.

¹⁰ Goncho ca' le nyojen, žan:

Bene' chaclaže' soa cueze' mbalaz,
cheyała' gwsaque' bich güe'e bite'teze diža' mal,
na' gwsaque' bich güe'e bite'teze diža' güenlaže'.

¹¹ Cheyała' cuejyichje' yogo' da' mal na' gone' da' güen.

Cheyała' cuec yichje' gone' con ga zelao saque'de' cont soe' binlo len bene' lježe'.

¹² Le Xancho Diosen' chgüia chne'e bene' ca' cheson da' zej to licha,
na' chzenague' chegaque' cate' chosoł güiže'ne'.

San bene' ca' cheson da' xinj, Diosen' ngüie' gone' cont yesezaca'zi'e.

¹³ Na' nono zoa no gone chio' mal še zoatezcho choncho da' güen do yichj do laže'cho.

¹⁴ Na' la'czła' še tgüej cate' yosoči yososaca' bene' chio' lagüe choncho da' zej to licha, Diosen' gone' soacho mbalaz. Na' bi cheyała' žebcho bene', neca gacžejlaže'cho.

¹⁵ San cheyała' gonxencho Criston' lo' lažda'ochon', le naque' Xancho. Na' bate'teze cheyała' soacho probnidw cont yoži'icho xtiža' bene' še yesenabde' chio' bixchen' zoacho lež šjayzoacho len Diosen' toli tocanę. Na' cheyała' gapcho legaque' bala'an na' güe'lenchone' diža' šagüe'.

¹⁶ Tža tža cheyała' goncho cont nezecho lo' yichjlažda'ochi bibi doła' napcho len Diosen'; nachen' cate' yesezi'diže' chio' da' chejnilaže'cho Criston', yesache'ede' le choncho güen na' yesacde' zto'.

¹⁷ Yejni'a saca'zi'cho neče choncho da' güen, še can' chaclaže' Diosen' gac checho, clcl ca saca'zi'cho neče choncho da' xinj.

¹⁸ Le Criston' lecze gwdi gwxaque'. La'czła' gwyecjez' to licha len Diosen', bnežjw cuine' gote' neče xtola' benač tni'aze, na' da' bene' ca' zaca'czen' toli tocanę. Gote' cont ba bozoe' chio' binlo len Diosen'. Perw la'czła' gosote'ne', beyas bebane' ladjo bene' guaten', dan' ne' zoa spiritiw čen'.

¹⁹ Na' len Spiritw čen' gwyeye' jatixjue'ede' xtiža' Diosen' len bene' ca' ba bzanyeyw gan' yesezaca'zi'e toli tocanę.

²⁰ Legaque' bi bosozenague' che Diosen' ža gwlaste, la'czła' gwdape' yela' chxenlaže' len legaque', gwleze' yosozenague' šlac da' Noén' bene' to barcw xen. Na' to čopga bene' goso'o lo' barcon' na' bi gosebiaye'e lo' nisen', con xono'gue' besyela.

²¹ Na' dan' goc ca' cani' zaca'leben can' ba gwzoacho nisen' lagüe dan' ba de yela' mban checho toli tocanę. Na' gague gwzoacho nisen' cont beyaccho xilaže' len cuerp chechon', san gwñabecho Diosen' beyone' lažda'ochon' xilaže' cont nezecho bibi doła' napcho. Na' ba nac lažda'ochon' xilaže' na'a lagüe beban Jesucriston' ladjo bene' guaten'.

²² Na' na'a Jesucriston' ba beyepe' yaban' gan' chnabi'e txen len Diosen', na' chosozexjw yichj yogo' angl na' yogo' nochle no nape yela' chnabia' chosozenague' che'.

4

Diosen' none' da' gon to tocho cont chaclen lježcho

¹ Criston' goque' bene' bela' čen na' gwxaca'zi'e yežlio nga, da'nann' chio' cheyała' gončachlaže'cho bi gacžejlaže'cho cate' saca'zi'cho. Goncho ca', le cate' ba gwzaca'zi'cho chaclenlen bich chzenagcho che da' malen'.

² Na' še bi chzenagcho che da' malen' šlac ne' mbancho, nach soa cuezcho bi goncho da' mal da' žan gon chio' benač, san soa cuezcho goncho con can' chazlaže' Diosen'.

³ Cana' gwzoale benle con can' cheson bene' bi chesejnilaže' Diosen'. Benle da' nac yela' zto', benle bite'teze da' mal da' gwzelaže' lažda'olen', gwzožele, benle no žaš len lni chelen' na' güe'ejchuale, na' gwyejnilaže'le l gua'a lsaca' da' ca' gwna Diosen' bi cheyała' šejnilaže'chon.

⁴ Na' bene' ca' ne' cheson ca' chesyebande' bich chonle txen len legaque' can' chesaše' chosožiyi' cuingaque', nach chesezi'diže' le'e.

⁵ Perw žin ža cate' Diosen' nabyože'de' legaque' che yogo'loł da' ba gosone', Dios ben' chbeze' čogbi'en nac gac che bene' zjamban len bene' ca' ba gosat.

⁶ Le da'nan' gwsele' bene' goseyixjue'ede' diža' güen che' len bene' ba gosat can' goseyixjue'eden' len chio'. Diosen' goclaže' yesenite' mbalaz toli tocaņe' can' zoa le', la'czla' nchoglagüen' de yela' got che yogo' benach yežlio nga.

⁷ Ba zoa te che yežlion'. Da'nan' cheyala' soacho len toze xbab na' goncho byen goncho can' chazlaže' Diosen' cont bibi gwžon soacho yol güižchone'.

⁸ Na' da' nac da' žialaoch, cheyala' gaque lježcho do yichj do laže'cho, le cate' chaque lježcho chezi'xencho chegaque' bite'teže da' chesonde' chio'.

⁹ Na' cheyala' gwlebcho bene' lježcho cate' yeside' ližchon' sin cbi bixjwcho.

¹⁰ Con can' ba gaclen Diosen' to tocho da' none' chio' grasyw che bi da' chac choncho, can' cheyala' gaclen lježcho len dan' choncho. Cheyala' gwčhincho bite'teže grasyw da' non Diosen' chio' con can' chaclaže' gwčhinchon, le nža' nža'te da' none' che to tocho choncho.

¹¹ Še Diosen' ba none' checho chixjue'echo xtizen', le xtize' na'zen' cheyala' chixjue'echo. Na' še ba none' checho gaclencho bene', cheyala' gaclenchone' do yichj do laže'cho, le Diosen' chone' cont chac chaclenchone'. Cate' bi da' goncho, gonchon ca gacxen Diosen' da' gwsele' Jesucriston' len chio'. Zaca'cze' gonxenchone' toli tocaņe' na' zaca'cze' nabi'e toli tocaņe. Can' gacšca.

Guata da' saca'zi' chio' chejnilaže'cho Criston'

¹² Chacda' le'e bene' migw, na' chaclaža' bi yebanele can' chac chelen' chosoči chososaca'chgua bene' le'e. Bi naquen da' yebanele, san gwlo'en še da' li chejnilaže'le Diosen'.

¹³ Cheyala' yebele caten' chzaca'zi'le da' chejnilaže'le Criston', le chac chele can' goc che Criston' caten' gwxcaca'zi'e. Le yebe caten' chzaca'zi'le cont lecze yebele na' soale mbalaz cate' žin ža le'ele yid Criston' ben' nac bene' zaca'juisyw.

¹⁴ Mbalaz chac chele na'a cate' chesezi'diža' bene' le'e da' chejnilaže'le Criston', le Spiritw che Dios ben' nac bene' zaca'juisyw zoon chaclenlen le'e. Bene' ca' chosoči chososaque' le'e chesene' mal che Criston', san le'e chonxenlne'.

¹⁵ Na' še saca'zi'le, yejni'a gaquen neche chonle da' güen, gague neche da' betwle bene' o gwlanle da' de che bene' o benle bichle da' xinj o blaže' chele len bi da' chac che bene'.

¹⁶ Le še saca'zi'le neche chejnilaže'le Criston', bi cheyala' gaquale zto' can' chac chele, san cheyala' gonxenle Diosen' da' ba chejnilaže'le'.

¹⁷ Ba bžin ža Diosen' ba chone' cont chyi chzaca' chio' naccho xi'ine' neche bi da' xinj da' choncho. Na' dan' chone' ca' zgua'tec len chio' naccho ca bene' lo' yo'o che', nezecho leca gwnežjwche' da' yezezaca'zi' bene' ca' bi chosozenag diža' güen chen'.

¹⁸ Na' ca nac bene' zja'ac to liča, nacchguaže yesyele' bi yezezaca'zi'e toli tocaņe, nach bene' bi chesejnilaže' Diosen' na' chesonteže' da' xinj, gague bi de da' yosla legaque'.

¹⁹ Da'nan' cate' chsi' Diosen' xnezen' chyi chzaca'cho, cheyala' soacho gonczcho da' güen na' gon cuincho lo na' Diosen', le len' bene' chio' benach na' zoacze' chaclene' chio'.

5

Can' cheyala' gon chio' chejnilaže'cho Criston'

¹ Na'achen' de da' nia' le'e nchojle cont chgüia chna' ljež le'e chejnilaže'le Criston'. Neda' lecze nchoja' chona' ca'. Ble'eda' gwxcaca'zi' Criston' na' choe'lena' bene' diža' can' goquen', na' lecze nežda' žin ža šjayzoa' len le' gan' yo'ochgua be'ni' ca le'e šjayzoalenlne'.

² Le güia na' bene' ba gwlo'o Diosen' lo na'le güia na'le, ca no xan xila' chgüia chne'e xila' che' ca'. Le gonen do yichj do laže'le can' chazlaže' Diosen', gague gonlen žan ca žan, neca gonlen cont gonle gan mechw, san le yebe gonlen.

³ Na' ca nac bene' ca' güia na'le, bi gonle znia cont yosozenague' chele, san soatezle gonle da' chazlaže' Diosen' cont yesele'ede' can' chonlen', na' yesache'ede' lecze can' cheyala' yeson legaque'.

⁴ Xancho Jesucriston' zaclebde' ca to bene' güeyoe' xila' bene' chnabi'e nochle güeyoe' xila'. Na' cate' yide' da' yoble, cana'ch gone' soale mbalaz juisyw še ba benle xšin Diosen' can' cheyala', na' gague da' te che yela' zoa mbalaz chelen' ca chde che no premio da' chesone' yežlio nga.

⁵ Nach lecze ca' le'e bene' xcuide', cheyala' gwzexjw yichjle gwzenagle che bene' ca' ba zjanchoj ben' chosogüia chosone'e le'e. Na' yogo'le le gwzexjw yichjle cont gwzenag che lježle, le:

Diosen' chdillene' bene' zjanac ya'laže',
san chaclene' bene' chosozexjwlaže' lagüen'.

⁶ Cheyala' gwzexjw yichjcho gwzenagcho che Dios ben' nape yela' guac xen, cont žin ža gone' ga gacxencho.

⁷ Na' cheyała' gwcua'ancho yogo'loł da' chi' yichjcho chen lo na' Diosen', le len' chgüia chne'e chio'.

⁸ Cheyała' goncho byen goncho da' nac da' zaca', na' cheyała' gwsaca'cho cont Satanás dan' chnabia' da' xigüe' ca' bi co'on chio' to lo nez mal, le chgue'en chio' na' cheyiljwlažen' nac nonen gwziayin' chio', ca to bež znia chosya'aba' chdaba' chyljwba' be gagwba'.

⁹ Cheyała' soačhačho bi gwzenagcho che Satanásen' na' soačhačho šejnilaže'cho Jesucriston', le nezecho bene' lježcho ca' chesejnilaže'ne' gate'tezechle lo yežlion' lecze chesezaca'zi'e can' chac che chio'.

¹⁰ Perw cate' ba gwde da' chyi chzaca'cho šlož dao' na'a, cuin Diosen' gone' cont gacch yichjlažda'ochon' can' chazlažen', cont šejnilaže'chchone', cont soecho gonchcho can' chnalažen', na' cont soacho len toze xbab. Dios nan' nži'ilaže'de' chio' na' chaclene' chio' bite'teze da' chac checho, na' ba gwleje' chio' chejnilaže'cho Criston' cont šjayzoacho txen len le' gan' yo'ochgua be'ni'.

¹¹ Cheyała' soacho gonxenchone' toli tocañe da' naque' bene' zaca' juisyw, na' nabia'che' ca note'tezechle. Can' gonščaczcho.

Pedron' chguape' tiox bene' ca' yosolab carten'

¹² Bene' migw checho Silvano, ben' chacda', zoateze' chone' can' cheyała' gone', na' ba bzoje' xtiža' le'e cart dao' nga. Na' le'e cart nga chneyoeda' le'e soaczle gonle da' güen na' chzejni'ida' le'e Diosen' ba goclene' le'e cont nezele da' li nži'ilaže'chgüede' le'e. Da'nana' cheyała' soaczle šejnilaže'ine'.

¹³ Bene' ca' ba gwlej Diosen' cont chesedop chesežague' chesonxene' Jesucriston' lo ciuda Roma nga chosoguape' le'e tiox, ciudan' da' nsi'a Babilonia. Na' lecze Marcos ben' nona' ca xi'ina' chguape' le'e tiox.

¹⁴ Cate' chdop chžagle txen le gwnopa' na' lježle cate' gwguap lježle tiox cont gacia' chaque lježle.

Na' chnaba' yogo'le chejnilaže'le Criston' soa cuezle binlo len xbab da' yo'o lo' yichjlažda'olen'. Da' na'zen' chnia'.

CART GWCHOPE DAN' BZOJ POSTLW SAN PEDRO

Pedron' bzoje' cart nga che bene' chesonxen Jesucriston'

¹ Neda' Simón Pedro chona' xšin Jesucriston', na' len' gwsele' neda' naca' postlw che'. Chzoja' le'e ba chejnilaže'le Jesucriston' can' chon neto'. Jesucriston' naque' Dios ben' chonxencho na' none' yela' mban checho toli tocañe le zejzce' to liča. Na' da' zaca'chguan chejnilaže'chone'.

² Chnaba' gaclenchgua Diosen' le'e na' gone' cont leca soa cuezle binlo len xbab chelen' lagüe nombia'ln'e' na' nombia'le Jesús ben' nac Xanchon'.

Can' cheyała' gon chio' chejnilaže'cho Jesucriston'

³ Dan' nap Diosen' yela' guac xennan', ba none' chio' yogo' da' chyažjecho cont de yela' mban checho toli tocañe na' cont goncho can' chazlažen'. None' chio' da' ca' lagüe nombia'cho Criston', na' Criston' ben' gwleje' chio' naque' bene' zaca' na' bene' šagüe'.

⁴ Na' da' naque' bene' zaca' bene' šagüe', da'n'an' ba gwne' gaclene' chio' na' gone' da' güen juisyw len chio'. Na' zaca'chguan da' gwne' ca', le da' chaclene' chio' can' gwne', da'n'an' yichjlažda'ochon' chesyeyaquen güen can' nac yichjlažda'ogüen', na' chac chbejyichjcho da' mal da' chžiayin' bene' bi chesejnilaže' Diosen', lagüe chesone' con ca' žan čhegaque'.

⁵ Na' da'n'an' chio' chejnilaže'cho Jesucriston' cheyała' goncho con ga zelao saque'cho cont goncho da' güen, na' cont šejni'ichcho.

⁶ Na' cheyała' goncho con ga zelao saque'cho cont bi nabia' da' malen' chio'. Cheyała' soačhačcho šejnilaže'cho Diosen' caten' chyi chzaca'cho, na' cheyała' soaczcho gonxenchone'.

⁷ Na' cheyała' ži'icho bene' lježcho ben' chesejnilaže' Jesucriston', na' leczce cheyała' gaquecho yogo'ze bene'.

⁸ Le še zejcho chonchguacho yogo' da' ca', nachen' gaccho can' cheyała' gac chio' nombia'cho Xancho Jesucriston', na' xšinen' da' goncho chojen güen.

⁹ Na' note'tez bene' bi chon da' ca' ba gwnia' cheyała' goncho, nchoł yichjlažda'ogüe' na' bina' šejni'išagüe'de' can' cheyała' gone'. Chlo'en ba gonlaže' ba beya' beyib Diosen' lažda'ogüe' len da' xinjen' bene' cana'.

¹⁰ Da'n'an' bene' migw, cheyała' goncho con ga zelao saque'cho cont nezecho da' li ba gwlej Diosen' chio' cont šejnilaže'chone' na' ba bsi'e xnezen' gwque'e chio' ca' xi'ine'. Na' še goncho ca', gwbat cuiayi'cho,

¹¹ na' mbalazchgua gwleb Diosen' chio' cate' šjayzoacho len Xancho Jesucriston' gan' chnabi'e toli tocañe. Jesucristw ben' none' yela' mban checho toli tocañe.

¹² Da'n'an' ba gwčhoglaža' yogo' ni'a güe'lena' le'e diža' che da' ca' ba gwnia' le'e cont šjayze'ele, la'czla' ba nezele can' gwnian' na' zoačhačhle chejnilaže'le diža' li čhe Diosen' dan' nombia'le.

¹³ Nan' chacda' šlac ne' mbana' cheyała' gona' cont šjayze'elen.

¹⁴ Le nezda' yob žin ža gata', con can' ba bzejni'i Xancho Jesucriston' neda'.

¹⁵ Da'n'an' gona' con ga zelao saque'da' cont šjayze'ele can' gwnia' che da' quinga cate' ba gota'.

Postlw ca' besele'ede' cate' Diosen' blo'ede' yela' zaca' che Criston'

¹⁶ Ca nac da' bzejni'ito' le'e che yela' guac che Xancho Jesucriston' na' che dan' yide' da' yoble, bi nacho naquen diža' da' goljlaže' neto' postlw, le ble'eto' len yejlaoto' cate' Diosen' blo'e yela' zaca' che Jesucriston'.

¹⁷ Ble'eto'ne' cate' Xacho Diosen' bnežjue'ne' yela' bala'an' xen na' cate' Dios ben' nac bene' zaca' juisyw bene' cont gwyečhje' be'ni' juisyw na' gože'ne': "Benga Xi'ina' ben' chacda' na' chbe chezaquelaže'chgüeda' che'."

¹⁸ Neto' beneto' can' gwna Dios ben' zoa yaba be'e diža' che', le gwzoato' lo ya'ana' len Xancho Jesucriston' caten' goc ca', ya'a dan' gwlej Diosen' cont goc ca' lagüen.

¹⁹ Napcho Xtiza' Diosen' dan' bosozoj bene' ca' goso'e xtižen' can'i' na' nezecho naquen da' li. Na' güen gonle še gwzenagle che dan' bosozojen', le gwsenin' lo' yichjlažda'olen' ca to yi' da' chseni' ga nac čhoł. Bi cheyała' yeche'echo gwzenagcho čhen tža tža šlac žin ža yid Criston' da' yoble na' co'oche' be'ni' čhen' lo' yichjlažda'ochon'. Na' dan' yide'na' zaca'leben ca dan' chla' beljw xsilen' cate' čeni'.

²⁰ Na' naquen da' žialao xen šejni'icho da' nga: diža' dan' bosozoj bene' ca' goso'e xtiža' Diosen' can'i', ne tozen bi gac šejni'ichon' to gualazcho,

²¹ le ne toz da' ca' bosozoje' bi zan' che xbab čhegacze'. San bene' gosaque' lo na' Diosen' gosenie' dan' gož Spiritw čhe Diosen' legaque' na' bosozojen'.

2

Bene' ca' chosozejni'ide' xtiža' Diosen' clele

¹ Cani' lecze besechoj bał bene' gualaž četo' bene' gosonlaže' gosone' cheseyixjue'ede' xtiža' Diosen', na' ca'czen' yesenita' bene' yosozejni'ide' le'e diža' güenlaže' gwxe güižj. Na' yeseyiljwlaže' nacle yesone' cont yosozejni'ide' le'e diža' güenlaže' da' gwžiyain' le'e sin cbi gacbe'ele. Yosozoe' Xancho Jesucriston' to šla'ale, ben' bnežjw cuine' cont gata' yela' mban checho toli tocaņe. Perw žin ža yesebiaye'e yalzelaže'.

² Bene' zan yosozenague' čhegaque' na' yesone' da' xinj dan' nac da' yela' zto' can' yeson legaque'. Na' neče yesone' ca', yesenita' bene' yesene' bibi zaca' diža' güen che Diosen' da' chlo'en chio' dogualje nez güenna'.

³ Na' bene' güenlaže' ca' yesezelaže' yeseque'e xmechwle. Da'nan' yosozejni'ide' le'e diža' da' yesaljlaže' cont gwnežjwle legaque' mechw. Perw cani'te Diosen' ba nžie' bia' yesebiaye'e.

⁴ Nezecho Diosen' bi bezi'xene' che angl ca' cate' gosone' da' xinj, san gwsele' legaque' lo yi' gabilen' gan' nac leca čol, na' zjanite' zjancheje' gden šlac žin ža gone' yesezaca'zi'e toli tocaņe.

⁵ Neca bezi'xen Diosen' che bene' ca' že' lo yežlion' bene' bi bosozenag che caten' gwzoa da' Noé. Gwsele' yejw sio' juisyw da' bžiyain' legaque'. Na' Noén' gwzoe' gwdixjue'ede' can' cheyala' yesone' da' zej to liča. Da'nan' Diosen' bosle' le' len yegaže bene' lježe'.

⁶ Na' Diosen' lecze bechoglaže' bžiyai'tecze' ciuda Sodoma len ciuda Gomorra cani' yela' güen da' xinj che bene' ca' že'na'. Bzeje' ciuda ca' na' yešinga da' bega'an. Na' bene' ca' cont chosnisde' bene' za' za'ac gwnežjue' castigw čhegaque' še bi yosozenague' che'.

⁷ Na' cate' Diosen' bžiyae'e ciuda ca', bosle' ben' le Lot ben' goc bene' güen len le', le Loten' gocchgüede' zi' lo' lažda'ogüe' che da' yela' zto' goson bene' mal ca' že' ciuda ca'.

⁸ Loten' goque' bene' güen na' bžaglagüe' lo' lažda'ogüe' tža tža ble'ede' goson bene' ca' da' bi cheyala' yesone' na' bende' diža' che da' malen' gosone'.

⁹ Can' naquen, Xancho Diosen' nezde' nac gone' yosle' chio' chejnilaže'chone' lao da' ca' yesonen cuejyichjhone', na' nezde' nac gone' cont bene' ca' bi zjanac bene' güen len le' yesenite' yesezaca'zi'e na'a na' cate'ch žin ža čhogbi'en yesezaca'zi'e toli tocaņe.

¹⁰ Diosen' gwnežjwchgüe' da' yesezaca'zi' bene' ca' chesonteze' da' yela' zto' can' chesezelaže' lažda'ogaquen' yesone' len cuerp čhegaquen'. Bene' ca' bi chesape' Xancho Diosen' bala'an cont yosozenague' che'. Bitw chesežebe' chesone' con bi žan čhegaque', na' neca chesežebe' chesezi'diže' no angl bene' zaca' na' no da' xigüe'.

¹¹ San ca nac angl che Diosen', zjanaque' bene' gualch ca chio' benač na' zjanapche' yela' chnabia' xench ca chio', perw legaque' bi cheseyaxjde' yesezi'diže' no bene' zaca' na' no da' xigüe', san cheso'e diža' šagüe' chosocuiše' bene' ca' na' len no da' xigüe' lao Xancho Diosen'.

¹² Bene' ca' chosozejni'ide' diža' güenlažen', chesezi'diže' da' ca' bi chesejni'ide'. Zjanaque' ca beyixe' be bi chesejni'i. Le beyixen' con nsi' Diosen' xnezen' chesaljba' na' chesenita'ba' cont yesezen benačen' legacba' na' yesote'ba'. Na' ca'cze yesebiayi' bene' ca' chosozejni'i diža' güenlažen',

¹³ yesezaca'zi'e da' chosochi chososaque' bene' yoble. Chesazlaže' chesaše' chese'ej chesagwžatteze' tža tža. Na' cate' chesedobe' txen len le'e cont che'ej chagwle, bi chesacde' zto' da' chesezožde' na' chesagwžate' catec chziye' da' malen' legaque'. Da'nan' zjazacalebde' ca to da' bžigüe' da' dope to lo lache' šiš o ca to yiž xen da' žia cho'alao bene'.

¹⁴ Bate'teze chesele'ede' no'ole, chesezelaže' yesata'lenteze' legaque', na' bi chjasexaque'de' len da' xinjen' chesonen'. Chesežo'oyele' bene' biña' yesenita'čhače' len Jesucriston' cont yesone' da' xinjen' txen len legaque'. Bene' ca' chosozejni'i diža' güenlažen' ba zjayolagüe' chesezelaže' bi de che bene'. Diosen' leca chgue'ede' yogo' da' chesone'.

¹⁵ Le ba gosebejyichje' xnez Diosen' da' zej to liča. Na' ba geseque'e nez malen' can' ben da' Balaam ben' be' xtiža' Diosen' can', ben' nac xi'in da' Beor. Balaanna' gwzelaže' yeseyixjue'ne' len mechw cont nabe' gac da' mal che bene' Israel.

¹⁶ Na' Diosen' bene' cont xpurren' be bi chac čneba' gwneczba' ca to benač na' gwdilba' le' che yela' tont čen', gožba' le' cueze' bich gone' da' xinjen' nac ca'.

¹⁷ Bene' ca' chosozejni'ide' diža' güenlažen' zjazacalebde' ca bej gan' bibi nis žia na' ca bejw da' nžiga' to be' gual. Ba nchoglaon čhegaque' yesezaca'zi'e gabil toli tocaņe ga nacchgua čol.

¹⁸ Le chesoe'chgüe' diža' chesonxen cuingaque' na' chesežo'oyele' bene' za' besyechoj lo da' xinjen' cont da' yoble yesonteze' da' yela' zto' da' chesezelaže' yesone' len cuerp čhegaquen' can' chesoncze bene' ca'.

¹⁹ Bene' ca' chosozejni'ide' diža' güenlaže' chese'e legaque' guac yesenite' mbalaz yesone' bite'ze žan čhegaque', la'cžla' zjanaque' ca to esclavo len da' nac da' yela' zto'. Le note'tezcho naccho ca to esclavo len da' xinjen' cate' choncho con can' žan goncho.

²⁰ Na' bene' ba zjanombi'e Xancho Jesucriston' ben' none' yela' mban checho toli tocanē, ba besyechoje' lo' da' xinj ca' dan' nac da' yela' zto' dan' gosone' cate' bina' yesombi'ene', na' še soe da' xinjen' legaque' na' da' yoble yeso'e latje nabian' legaque' cont yesonchen', da' malch gac chegaque' clel ca caten' bina' yesyechoje' lo da' xinjen' da' nechua'.

²¹ Yejni' a šaca' bi gosombi'e xnez Diosen' da' zej to licha clel ca gosebejyichje' nez güen da' nžia bia' Diosen' šejlencho.

²² Ba goc chegaque' can' ža to diža' li žan: "Beco' na' cheyagwba' dan' ba beyebba' na' cošen' cate' bach bguazjchoba' cheyo'oba' lo gonan' da' yoble."

3

Yid Jesucriston' da' yoble

¹ Bene' migw chia', chacda' le'e, na' da' nga naquen cart gwchope da' chzoja' le'e. Na' ba bzoja' chopten da' chaclaža' gonle xbab che diža' güen da' ba nombia'le.

² Le šjayze'e diža' da' bosozoj bene' ca' gosac lo na' Diosen' ben' gosoe' xtižen' cani'. Na' lecze le šjayze' dan' nžia bia' Xancho Jesucriston' goncho, Jesucristw ben' none' yela' mban checho toli tocanē. Lenŋa' diža' da' ba bzejni'i neto' postlw le'e.

³ Naquen da' žialao šejni'ile da' nga. Na'a ba zoa te che yežlion', na' yesechoj bene' yesonle' che xtiža' Diosen' na' yesenite' yesone' con can' ža xbab mal chegaquen'.

⁴ Na' yesonle' che Diosen' yesene': "ŽBatxen' gac can' gwna Diosen' yid Criston' da' yoble? Bi naquen da' šejle'cho, le toz can' chac ža na'aža lecze can' goc cate' gwnita' da' xoxxta'ocho ca', na' lecze ca'czen' goc caten' gwxe te yežlion'."

⁵ Bene' chesena ca' bi chesaclaže' yesone' xbab can' ba ben Diosen'. Caten' gwxe yaban' na' yežlion', con gwne' yesaquen na' goc can' gwnen'. Gocxe yežlion' lao nisdao' da' nyechj mbi'in doxen, na' bchine' nisen' cate' benen'.

⁶ Nach bžin ža cate' da' ca' bene' bžiaze'en len yejw sio' juisyw da' goc cate' bexoa nisen' lo yežlion'.

⁷ Na' Diosen' lecze ba bžie' bia' yaban' na' yežlion' ne' zjanitan' can' zjanaquen na'a cate' žin ža gac juisyw. Cana' yeseyen cate' gone' yesezaca'zi' bene' mal ca' toli tocanē.

⁸ Na' le'e bene' migw chia', chacda' le'e, na' che'nda' bi ganlaže'le da' nga, len Xancho Diosen' toz ca' nac to ža o to mil iz, bi naquen sša len le'.

⁹ Ba' bene' chesacde' ba chže Xancho Diosen' da' bina' yid Jesucriston' da' yoble can' gwne' yide'. Perw bi nacho chžede', san da' nape' yela' chxenlaže' len chio' benač na' chbeze' da' bi chaclaže' cuiayi' note'tezcho. Chaclaže' yogo'cho yetinje xtoła'chon'.

¹⁰ Na' Xancho Jesucriston' yide' da' yoble cate' bi nane'laže' bene', can' chac cate' cho'o gwban liž bene' šeže'le. Nach ga to sšag xen, na' te che yogo' da' ca' chle'echo le'e yaban', na' yogo' da' de le'e yaban' cuiayin' lo yi' gual, na' yežlion' na' da' de lagüen lecze yeseyen.

¹¹ Na' da' nezecho yesyenit yogo' da' ca' can' ba gwnia', cheyała' gon cuincho lo na' Diosen' na' soacžcho gonxenchone' do yichj do laže'cho.

¹² Na' cheyała' soa cuezcho batcan' žin ža gon Diosen' gac juisyw, na' goncho cont yob gaquen. Žana' šey le'e yaban' na' da' ca' chle'echo le'e yaban' yesyeyonan' lo yi' gual na' yesyeniten.

¹³ Perw chio' zoacho lez le'e yaban' na' yežlion' yesyeyaquen da' cobe can' ba gwna Diosen', na' con bene' cheson da' güen da' zej to licha yesenita' cana'.

¹⁴ Da'n'an' bene' migw chia', šlac chbezcho gac da' ca', cheyała' goncho con ga zelao saque'cho cont soacho binlo len Diosen' cont bibi doła' de da' gwchenen yichjlažda'ochon'.

¹⁵ Na' cheyała' gacbe'echo nape Xancho Diosen' yela' chxenlaže' len chio' benač cont gwzenagcho che' na' gone' yela' mban checho toli tocanē. Lecze can' ba bzoj postlw Pablon' checho ben' chaquecho, cho'e dižan' len yela' sina' da' bnežjw Diosen' le'.

¹⁶ Na' yogo' cart che' ca' chesoen' diža' che da' quinga ba bzoja', la'czla' bzoje' ba' da' nac zdebe šejni'icho. Na' bene' bina' yesejni'i xtiža' Diosen' binlo na' bina' yesezoačhače' yesejnilaže'ne' chesejni'ide' da' ca' clele, can' chesone' len bichle Xtiža' Diosen' da' nyoj, na' da'n'an' zjangüe'e nez da' gwžiyain' legaque'.

¹⁷ Chacda' le'e bene' migw chia', na' ba nezele da' ca' ba bzoja' le'e. Na' le gwsaca' cont bi šejle'le xtiža' bene' bi chosozenag che Diosen', bene' cheson da' zej clele, san le soachach le gwzenag che Diosen'.

¹⁸ Na' zej gacbe'echle catec chaque Xancho Jesucriston' le'e na' zej gombia'chlne', Jesucristw ben' none' yela' mban checho toli tocanē. Cheyała' soacho gonxenchwne' na'a na' toli tocanē. Can' gonšcacžcho.

CART NECHW DAN' BZOJ POSTLW SAN JUAN

Jesucriston' chenezjue' yela' mban toli tocane che bene chesejnilaže'ne'

¹ Chyixjue'eda' le'e che ben' nzi' Xtiža' Dios, ben' chnezjue' yela' mban toli tocane che bene' chesejnilaže'ne'. Ba zoacze' caten' gwxe yežlion'. Neto' postlw bzenagto' xtižen', ble'eto'ne' na' gwdanto'ne'.

² Len' golje' benach na' ble'eto'ne' na' choe'to' diža' žato' mbancze'. Chyixjue'eto' le'e ba zoacze' len Xacho Diosen' caten' gwxe yežlion' na' bedesoalene' chio' benach.

³ Chyixjue'eto' le'e che bena' ble'eto' na' che bena' bzenagto' xtižen' cont gonle neto' txen. Na' ca nac neto', da' li ba nacto' txen len Xacho Diosen' na' len Xi'ine' Jesucriston'.

⁴ Chzojto' le'e cart nga cont soale yebechgüele.

Diosen' naque' la'zelagüe bene' güen

⁵ Neto' bzenagto' be' Jesucriston' diža' che Xe' Diosen' na' chyixjue'eton' le'e, bzejni'ide' gwne' Diosen' naque' ca to be'ni' da' naque' la'zelagüe bene' güen bene' laždao' xilaže'. Bibi da' xinj none'.

⁶ Na' še žacho choncho txen len Diosen' šlac choncho da' xinjen', con chonlaže'cho. Dan' chonchon' bi zejen to li.

⁷ Diosen' naque' la'zelagüe bene' güen bene' laždao' xilaže'. Na' še chio' zoacho choncho da' güenna' can' zoa Diosen' chone' da' güenna', nachen' naccho txen tocho yetocho na' yichjlažda'ochon' chega'anen xilaže' lagüete Xi'ine' Jesucriston' blalj xchene' cont beque'e yogo'lol xtoła'chon'.

⁸ Še žacho bibi xtoła'cho de, chziye'ze cuinchon' na' bi choe'cho diža' li.

⁹ Perw na' še chxoadola'cho lao Diosen', chezi'xene' doła' chechon' na' chnıtlagüe' yogo'te da' xinj da' choncho, le chone' con can' že' na' chone' da' zej to li.

¹⁰ Še žacho bibi da' mal na' goncho, choncho Diosen' ca to bene' güenlaže' na' biña' šejle'cho diža' li chen'.

2

Criston' chnabe' gaclen Xacho Diosen' chio'

¹ Xi'inda'ogua', chzoja' le' cart nga cont cbi gonle da' xinj. Perw na' še no chio' goncho da' xinjen', zoa Jesucriston' ben' chon da' zej to li na' chnabe' yezi'xen Xacho Diosen' checho.

² Jesucriston' blalj xchene' neche xtoła'chon' cont yozoe' chio' binlo len Diosen', na' gague neche xtoła' chio'zen' blalj xchene' san neche xtoła' yogo'lol benach.

³ Na' še choncho can' ža Diosen' nachen' guac nacho ba nombia'chwne'.

⁴ Na' še žacho ba nombia'chwne' na' bi choncho can' že'na', naccho bene' güenlaže' na' diža' li che Diosen' biña' šon' yichjlažda'ochon'.

⁵ Ba chaquecho Diosen' ca cheyala' gaguechone' še choncho con can' že'na', na' še ba choncho ca', nezecho ba nacchone' txen.

⁶ Na' note'tezcho še žacho naccho Diosen' txen, cheyala' soacho goncho da' güen can' ben Jesucriston'.

Dan' ža Diosen' cheyala' goncho

⁷ Le'e bene' chacda', dan' chzoja' nga chona' mandadw naquen' gonle, bi naquen to da' cobe. Naquen to da' gole dan' gwnezele caten' gwzolaole chejnilaže'le Jesucriston', le naquen diža' da' ba benele.

⁸ Na' dan' chona' mandadw naquen' gonle, bia'cze naquen ca to da' cobe, le ba bla' diža' güen che Criston' len benachen' na' ba chzolao chde che yogo' da' ca' da' chgue'e Diosen'. Na' dan' chona' mandadw gonle, Criston' ba blo'ede' naquen da' zaque' na' lec le'e ba chlo'ele naquen da' zaque'.

⁹ Note'tezcho la'czla' žacho ba noncho Diosen' txen, bi naquen ca' še chgue'e lježcho; nac chol lo' lažda'ochon'.

¹⁰ Note'tezcho še chaque lježcho nachen' da' li ba noncho Diosen' txen na' bibi de da' yoslažon' chio' lo da' xinjen'. Lo' yichjlažda'ochon' ba naquen ca to da' yo'o be'ni'.

¹¹ Na' note'tezcho še chgue'e lježcho nac chol lo' lažda'ochon' na' zejcho ca to bene' lchol bene' bi chacbe'e galen' yeque'e, le bi chacbe'echo can' cheyala' goncho.

¹² Ba bzoja' da' quinga par le'e xi'inda'ogua', le Diosen' ba bezi'xene' chele dan' chejnilaže'le Jesucriston' do yichj do laže'le.

¹³ Ba bzoja' da' quinga par le'e bene' gole, le ba nombia'le Jesucriston' ben' ba zoa cate' gwxe yežlion'. Ba bzoja' da' quinga par le'e bene' güego' chaban, le baç gwzoele bi chzenagle che Satanás dan' chnabia' da' xigüe' ca'.

Ba bzoja' da' quinga par le'e xi'inda'ogua' da' ba nombia'le Xacho Diosen'.

¹⁴ Ba bzoja' da' quinga par le'e bene' gole, da' ba nombia'le Jesucriston' ben' ba zoacze cate' gwxe yežlion'. Lecz ca' ba bzoja' da' quinga par le'e bene' güego' chaban da' ngo'o yichjle xtiža' Diosen' na' da'nan' ba gwzoele bi chzenagle che Satanásen'.

¹⁵ Bi selaže'le gacle toze len bene' ca' bi chosozenag che Diosen', na' neca selaže'le gonle can' chesonen'. Note'tezcho chzelaže'cho goncho can' chesonen', bi chaquecho Xacho Diosen'.

¹⁶ Bene' bi chosozenag che Diosen' chesone' da' mal dan' chzelaže' lažda'ogaquen', na' chesezelaže' bi dan' chesele'ede', na' lecz ca' chesa'laže'. Na' yogo' da' ca' chesone' bi naquen che Xacho Diosen', naquen che da' mal dan' de yežlio nga.

¹⁷ Na' da' te che yežlio nga len da' ca' chesezelaže' bene' ca' bi chosozenag che Diosen'. Perw še chio' choncho can' chazlaže' Diosen', soaczcho len Diosen' toli tocaņe.

Nezecho bin' nac da' li

¹⁸ Xi'inda'ogua', ba zoa žin ža te che yežlio nga. Neto' ba bzeneto' le'e gwžin ža yid ben' gonchgua contr Criston', na' na'a bene' zan ba za'aque' chesone' contr Criston'. Da'nan' nezecho ba zoa žin ža te che yežlion'.

¹⁹ Ladjo chio' besechoj bene' ca' chesegue'ede' Criston'. Gague do laže' gosone' txen len chio' chejnilaže'chone'. Le šaca' do laže' gosone' txen len chio', ne' nite' chesonche' chio' txen še ca'. Na' dan' baç besyechoje' nacia' bi zjanaque' chio' txen.

²⁰ Criston' ba bene' chio' Spiritw che Diosen' na' da'nan' yogo'cho nezecho can' ža diža' li che Diosen'.

²¹ Chzoja' le'e da' nga le baç nombia'le diža' li che Diosen', gague nacho bi nombia'lenna', na' lecz ca' nezele ne toz diža' güenlaže' ca' nchixe diža' li che'na'.

²² Bene' güenlaže' ben' ža Diosen' bi gwsele' Jesucriston' golje' beñaç. Ben' že' ca' chgue'ede' Criston', le chzoe' Xacho Diosen' to šla'ale len Xi'ine' Criston'.

²³ Na' note'tez bene' cho'e diža' že' Diosen' bi gwsele' Jesucriston', bitw zoa Xacho Diosen' len le'. Perw note'tez bene' cho'e diža' že' Diosen' gwsele' Jesucriston', zoacze Xacho Diosen' lente Xi'ine' Jesucriston' len le'.

²⁴ Le soa le gwzenag che da' ca' ba bzeneto' le'e caten' gwzolaotele chejnilaže'le Criston'. Na' še soatezle gwzenaglen, nachen' soatezle len Xacho Diosen' na' len Xi'ine' Jesucriston'.

²⁵ Na' da' gwna Jesucriston' goņe' checho, goņe' yela' mban toli tocaņe.

²⁶ Ba bzoja' le'e da' nga bia' diža' che bene' ca' chesaclaže' yesonlede' le'e.

²⁷ Na' Jesucriston' ba bene' chio' Spiritw che Diosen' zoan lo' lažda'ochon' chzejni'in chio' yogo'lol dan' cheyala' nezecho che cuine'. Na' Spiritw che Diosen' choen' diža' li, bi chonlažen'. Na' dan' zoan chzejni'in chio', bi chyažjecho nochle gwzejni'i chio' bi dan' nac da' li. Da'nan' le gwzenag dan' bzejni'i Spiriton' le'e na' le soa len Jesucriston'.

²⁸ Na' na'a xi'inda'ogua', cheyala' soatezcho gwzenagcho che Jesucriston' cont bi žebcho cate' yide' da' yoble na' cont bi yeto'echo na' cont bi nan gwcuase'chone' cate' le'echo ba ble'e.

²⁹ Na' nezecho Criston' zeje' chone' con can' cheyala' gone', lecze ca' nezecho yogo'czecho še zejcho choncho can' cheyala' goncho naccho xi'in Dios.

3

Naquen goncho še naccho xi'in Dios

¹ Le gon xbab catec chaquechgüe Xacho Diosen' chio' da' chne' naccho xi'ine', na' da' licze xi'ine' chio'. Bene' bi chesejnilaže' Diosen' bi chesejni'ide' naccho xi'in Dios, le bi chesache'ede' non' nac Diosen'.

² Xi'inda'ogua', chio' chejnilaže'cho Jesucriston' baç naccho xi'in Dios. Na' biņa' gata'bia' nac gaccho. Con nezecho caten' Jesucriston' yide' da' yoble canan' le'echwne' can' naque' na' yeyac yichjlažda'ochon' can' nac yichjlaždao' le'.

³ Na' note'tezcho še zoacho lez gaccho can' naquen', soacho gwsaca'cho cont lažda'ochon' gaquen xilaže', le nezecho laždao' Jesucriston' naquen xilaže'.

⁴ Note'tez bene' zoe' chone' da' xinjen' chone' clele len ley che Diosen', le cate' choncho da' xinj choncho clele len da' ba bžie' bia' goncho.

⁵ Nezczecho Jesucriston' bide' yežlio nga cont beque'e xtoła' chio' beñaç, na' ca nac Jesucriston', le bibi da' xinj none'.

⁶ Na' še chio' zoacho chzenagcho che', bi zoacho choncho da' xinj, san še zoacho choncho da' xinjen', biņa' šejni'icho che' na' biņa' gombia'chone'.

⁷ Xi'inda'ogua', bi güe'le latje no siye' le'e, še choncho da' güen can' cheyala' goncho, zejcho to licha can' zej Jesucriston'.

⁸ Na' še zoacho choncho da' xinj, naccho xi'in Satanásen', le Satanásen' zoaczen chonen da' xinj cate' gwxete yežlion'. Na' bid Xi'in Diosen' yežlio nga par gwcuzeze' dan' chon Satanásen'.

⁹ Note'tezcho še Diosen' ba gwgue'e chio' ca xi'ine' bi zoacho choncho da' xinj, le ba bocobe' yichjlažda'ochon' na' bich žan goncho da' xinjen' da' zoa Diosen' len chio'.

¹⁰ Na' da' nga chlo'en non' nac xi'in Diosen' na' non' nac xi'in Satanásen': note'tezcho še bi zoacho choncho da' güen, bi naccho xi'in Dios, na' lecz ca' note'tezcho še bi chaque lježcho, bi naccho xi'in Dios.

Cheyala' gaque lježcho

¹¹ Na' da' nga ba beneczecho cate' gwzolaicho chejnlaže'cho Jesucriston': cheyala' gaque lježcho tocho yetocho.

¹² Bi gaccho ca goc da' Caín, goque' xi'in Satanásen' na' beyote' bene' biše'. ¿Nezele bičen' betue' le'? Betue' le' le gwzoe' bene' da' xinj na' bene' bišen' gwzoe' bene' da' güen.

¹³ Da'nax' xi'inda'ogua', bi yebanele cate' bene' ca' bi chosozenag che Diosen' chesegue'ede' le'e.

¹⁴ Nezecho bich mbiayi' yichjlažda'ochon', san ba de yela' mban checho toli tocañe le ba chaque lježcho. Na' še bi chaque lježcho, ne' mbiayi' yichjlažda'ochon'.

¹⁵ Note'tezcho še chgue'e lježcho, lao Diosen' naccho bene' güet bene'. Na' nezecho bene' güet bene' bi de yela' mban che' toli tocañe.

¹⁶ Bzane cuin Jesucriston' neche chio' gosote'ne' dan' leca chacde' chio', da'nax' nezecho can' cheyala' gaque lježcho. Na' ca'cze chio' cheyala' zane cuincho gatcho cont gaclen lježcho še chonen byen.

¹⁷ Na' cate' de da' de checho na' nezecho bene' lježcho chyažden', še bi cheyaše'chone' bi gac nacho chaquecho Diosen'.

¹⁸ Xi'inda'ogua', bi cheyala' gaque lježcho de diža'ze. Cheyala' gaque lježcho do yichj do laže'cho na' soacho gaclen lježcho.

Nac goncho cont bi žebcho Diosen'

¹⁹ Na' nezecho naccho txen len Dios ben' choe' diža' li še chaque lježcho can' gwnia'na', na' še goncho ca', na' gacbe'echo zoacho binjo len Diosen'.

²⁰ Na' še zoa cate' choncho xbab bi zaca'cho par na Diosen' xi'ine' chio', Diosen' zaca'che' ca xbab chechon' na' nezde' yogo'lol. Da'nax' cheyala' gwzenagcho can' žen', gague con can' ža xbab chechon'.

²¹ Le'e bene' chacda', še lo' yichjlažda'ochon' chache'echo bitw napcho doła', nachen' bich chžebcho Diosen'.

²² Na' bite'tez dan' chñabechone' choñczen', le choncho da' nžie' bia' goncho na' can' chaclažen'.

²³ Na' da' nga Diosen' nžie' bia' goncho, šejnilaže'cho Xi'ine' Jesucriston' do yichj do laže'cho na' gaque lježcho tocho yetocho, con can' nžie' bia'.

²⁴ Na' še choncho can' nžie' bian', nach zoacho len Diosen' na' Diosen' zoe' len chio'. Na' quinga nezecho Diosen' zoe' len chio': ba bene' chio' Spiritw čhen' zoañ lo' lažda'ochon'.

4

Spiritw che Diosen' na' dan' chon contr Criston'

¹ Le'e bene' chacda', bi šejle'le che yogo' bene' chesene' cheso'e diža' dan' gož Spiritw che Diosen' legaque', san le gone' prueba še xtiža'gaquen' naquen da' bzejni' Dios o še cbi naquen. Le gone' prueba, le ba chaš bene' zan bene' chesonlaže' chesene' cheseyixjue'ede' dan' gož Diosen' legaque'.

² Na' quinga guac nezecho še Spiritw che Diosen' bzejni'in legaque' dižan' cheso'e: yogo' bene' cheso'e diža' chesene' Jesucriston' naque' Dios golje' beñač, nezecho yo'o Spiritw che Diosen' lo' yichjlažda'ogüe'.

³ Na' bene' cheso'e diža' chesene' Jesucriston' bi naque' Dios golje' beñač, nezecho Spiritw che Diosen' bi yo'on lo' yichjlažda'ogüe'. Bene' ca' cheso'e diža' da' chonen contr Criston'. Na' ba bzeneto' le'e yid da' gon contr Criston' na' na'a ba blan' chonen contr le'.

⁴ Xi'inda'ogua', ba nacle Diosen' txen na' da'nax' bi chejle'le che bene' güenlaže' ca'. Chzoele cbi chejle'le chegaque' neche da' yo'o Spiritw che Diosen' lo' lažda'olen' chzejni'in le'e, na' Spiriton' chnabia'chen ca Satanásen' dan' zoa len bene' ca' bi chosozenag che Diosen' yežlio nga.

⁵ Bene' ca' bi chosozenague' che Diosen' cheso'e diža' che dan' chac yežlio nga, na' da'nax' bene' lježe' ca' chosozenague' chegaque'.

⁶ Ca nac chio', ba naccho Diosen' txen. Da'nan' yezica'chle bene' chosozenague' che Diosen' lecz chosozenague' xtiža'chon'. Na' bene' ca' cbi zjanaque' Diosen' txen bi chosozenague' diža' chechon'. Can' chac nezecho no bene' yo'o Spiritw che Diosen' lo' lažda'ogüe' chzejni'in le' diža' li na' no bene' chzenague' diža' güenlaže' dan' chzejni'i Satanäsen' le'.

Diosen' chacde' beňach

⁷ Le'e bene' chacda', cheyała' soacho gague lježcho tocho yetocho, le Diosen' zoacze' chone' cont chaque lježcho. Na' note'tezcho še chaque lježcho nachen' nacia' naccho xi'in Dios na' nombia'chone'.

⁸ Na' note'tezcho še bi chaque lježcho bi nombia'cho Diosen', le chio' bi choncho can' chonen'. Len' zoacze' chacde' beňachen', le con can' nac yichjlažda'ogüe'.

⁹ Dan' ben Diosen' bzejni'ide' chio' can' chacde' chio', gwsele' laye'e Xi'ine' yežlio nga cont note'tezcho bancho toli tocane še chejnilaže'chone' do yichj do laže'cho.

¹⁰ Bi goquecho Diosen'; lelen' godce' chio' na' gwsele' Xi'ine' Jesucriston' cont bñitlagüe' xtola'chon'.

¹¹ Le'e bene' chacda', dan' chaque Diosen' chio' lecz ca' cheyała' gague lježcho tocho yetocho.

¹² Nono zoa bene' ba ble'ede' Diosen'. Perw na' še zoacho chaque lježcho tocho yetocho, nacia' Diosen' zoacze' len chio' na' ba chaquechone' can' cheyała' gaguechone'.

¹³ Nezecho zoacho len Diosen' na' le' zoacze' len chio' da' ba gwsele' Spiritw chen' zoan lo' yichjlažda'ochon'.

¹⁴ Na' neto' postlw ba ble'eto' na' choe'to' diža' nezeto' gwsele' Xacho Diosen' Xi'inen' cont gwnitlagüe' xtola' note'tez bene' šejnilaže' le'.

¹⁵ Na' note'tezcho še chejle'cho na' choe'cho diža' žacho Jesucriston' naque' dogualje Xi'in Dios, Diosen' zoe' len chio' na' lecz zoacho txen len Diosen'.

¹⁶ Chio' ba nezecho na' chejle'cho chaque Diosen' chio'. Diosen' zoacze' chacde' beňachen', le con can' nac yichjlažda'ogüe'. Na' note'tezcho še zoacho chaquecho Diosen' na' lecz zoacho chaque lježcho, nachen' zoacho len Diosen' na' le' zoacze' len chio'.

¹⁷ Diosen' zoacze' chaclene' chio' cont chaquechone' can' cheyała' gaguechone' na' chaque lježcho can' cheyała' gague lježcho, na' Diosen' chone' ca' cont bi žebcho cate' žin ža gone' yela' justis che yogo' beňach. Na' bi žebcho še zoacho chaque lježcho yežlio nga can' chon Jesucriston'.

¹⁸ Še chaquecho Diosen' ca cheyała', bibi de da' žebcho. Caten' chžebchon' naquen ca to castigw len chio', na' še ne' chžebcho biña' gaguecho Diosen' can' cheyała' gaguechone'.

¹⁹ Chio' chaquecho Diosen' le len' godce' chio' da' nechw.

²⁰ Note'tezcho še chgue'e lježcho, la'czla' žacho chaquecho Diosen', con chonlaže'chon'. žNacxe goncho gaguecho Diosen' ben' bi chle'echo še bi chaque lježcho bene' chle'etecho?

²¹ Na' ba bene' mandadw can' cheyała' gon chio' chaquechone', že' lecz cheyała' gague lježcho.

5

Gwcuascho da' malen'

¹ Note'tez chio' naccho xi'in Dios še chejle'cho Diosen' gwsele' Jesucriston' cont nabi'e. Na' še chaquecho Xacho Diosen', lecz can' gague lježcho, le lecz xi'in Dios bene' lježchon'.

² Cate' chio' zoacho chaquecho Diosen' na' choncho da' bžie' bia' goncho, nezecho lecz zoacho chaquecho yezica'chle xi'in Dios.

³ Še chaquecho Diosen', choncho can' nžie' bia' goncho. Na' dan' nžie' bia' goncho, bi naquen zdebe gonchon.

⁴ Note'tezcho še ba bocob Diosen' yichjlažda'ochon', ba chzoecho chcuascho da' xinj dan' de yežlio nga. Na' dan' chejnilaže'cho Jesucriston', da'nan' chzoecho chcuascho da' xinjen' dan' de yežlion' bi chonchon.

⁵ Na' noch no chzoe'de' chcuase' da' xinj dan' de yežlio nga san bene' ca' chesejle'e Jesucriston' naque' dogualje Xi'in Dios, legaquen' chesezoede' chosocuase' da' xinjen'.

Diosen' cho'e diža' že' Jesucriston' naque' dogualje Xi'ine'

⁶ Quinga ben Jesucriston' šlac bide' yežlio nga, bnežjw cuine' gwzoe' nis na' blalj xchene'. Bi nacho con gwzoaze' nis, san lecz blalj xchene'. Na' Spiritw che Diosen' choen' diža' bene' ca', na' Spiriton' choen' pur diža' li.

⁷ Na' nita' šone' bene' chesegüe'e da' baļi yaban' cheso'e diža' che Jesucriston': Xacho Diosen', len Jesucriston' ben' nzi' Xtiža' Dios na' len Spiritw che Diosen'. Na' toz can' cheso'e diža' che Jesucriston'.

⁸ Lecz de šone da' chesego'on da' baļi chesoen' diža' che Jesucriston' yežlio nga: Spiritw che Diosen', na' dan' gwzoe' nis na' dan' blalj xchenen'. Na' toz ca chesoen' xtižen'.

⁹ Chejle'cho xtiža' beņachen', na' nacch xtiža' Diosen' da' zaca'ch, na' Diosen' ba bi'e diža' che Xi'ine' Jesucriston'.

¹⁰ Na' še chejle'cho Jesucriston' naque' dogualje Xi'in Dios, nezecho lo' lažda'ochon' xtiža' Xacho Diosen' dan' bi'e che' naquen da' li. Na' še bi chejle'cho che Diosen', chonchone' ca to bene' güenlaže' da' bi chzenagcho diža' dan' cho'e che Xi'ine'na'.

¹¹ Na' xtiža' Diosen' chzejni'in chio' guata' yela' mban che beņachen' toli tocaņe še yesejnilaže' Xi'ine' Jesucriston'.

¹² Quinga naquen, de yela' mban checho toli tocaņe še chejnilaže'cho Jesucriston', na' bi de yela' mban checho toli tocaņe še bi chejnilaže'chone'.

Can' beyož cart nga da' bzoj Postlw San Juan

¹³ Ba bzoja' le'e cart nga, le'e chejnilaže'le Xi'in Diosen', cont neze de yela' mban chele toli tocaņe.

¹⁴ Na' bitw chžebcho chol güižcho Diosen', le nezecho chzenague' checho cate' chņabcho lagüen' da' chazlaže'.

¹⁵ Na' cate' nezecho chzenague' checho bite'tez dan' chņabechone', lecz nezecho goņe' da' ca' ba gwņabechone'.

¹⁶ Na' še chache'echo bene' lježcho chone' bi da' xinj da' bi zaca' sela' Diosen' le' lo yi' gabil, cheyaļa' nabecho Diosen' gaclene' le' cont yezoe' binlo len Diosen' da' yoble. Da' xinj da' cheson baļ bene' zacan' sela' Diosen' legaque' lo yi' gabil. Bi žia' nable gaclen Diosen' bene' ca'.

¹⁷ Napcho doļa' še choncho bite'tez da' xinj, perw gague yogo' da' xinj dan' chonchon' sela' Diosen' chio' lo yi' gabilen'.

¹⁸ Nezecho še ba bocob Xacho Diosen' yichjlažda'ochon' bi zoacho choncho da' xinjen' le zoa Jesucriston' ben' nac Xi'in Diosen' chcuase' chio' len dan' chon Satanásen', na' da'nan' bi soen gwžiayin' chio'.

¹⁹ Lecz nezecho Diosen' zoe' len chio', perw bene' ca' bi chosozenague' che', Satanásen' chnabian' yichjlažda'ogaquen'.

²⁰ Na' nezecho ba bid Xi'in Diosen', na' ba bzejni'ide' chio' cont nombia'cho Xe' ben' nac dogualje Dios. Nach zoacho toz len ben' nac dogualje Dios dan' zoacho toz len Xi'ine' Jesucriston'. Len' naque' dogualje Dios na' chnežjue' yela' mban toli tocaņe che bene' chejnilaže' le'.

²¹ Xi'inda'ogua', gague nochle šejnilaže'le san ben' nac dogualje Dios. Da' na'zen' chzoja'.

CART GWCHOPE DAN' BZOJ POSTLW SAN JUAN

Chio' nombia'cho diža' li che Diosen' cheyała' gaque lježcho

¹ Neda' naca' bene' gole blao, na' chzoja' le' no'ole, len' ba gwlej Diosen' chzenago' xtižen', na' len xi'ino' ca'. Da' li chacda' le'e, na' gague nedaze' san lencze' yogo' bene' yezica'chle bene' zjanombia' diža' li che Diosen' chesacde' le'e.

² Chaqueto' le'e da' yo'o diža' li che Diosen' lo' lažda'ochon' na' soan lo' lažda'ochon' gaclenen chio' toli tocaņe.

³ Xacho Diosen' na' len Xi'ine' Xancho Jesucriston' yesaclene' le'e, yesyeyaše' yesyeži'ilaže'de' le'e na' yesone' cont soa cuezle binlo len xbab dan' yo'o lo' yichlažda'olen', le ba nombia'le diža' li che Diosen' na' ba chaque lježle tole yetole.

⁴ Leca gwbeda' cate' gwnežda' bal bi' chio' ca' ba nita'be' chesombe' can' ža diža' li che Xacho Diosen' can' bžie' bia' goncho.

⁵ Dan' cheyała' goncho, no'ole, cheyała' soacho gaque lježcho tocho yetocho. Na' dan' žia' goncho ca', bi naquen to da' cobe; naquen dan' ba bzeneto' le'e caten' gwzolaole chejnilaže'le Jesucriston'.

⁶ Še chaquecho Diosen' goncho da' nžie' bia'. Na' nezele nžie' bia' gaque lježcho, le cate' gwzolaole chejnilaže'le Jesucriston' bzejni'ito' le'e cheyała' gaque lježcho.

Chas' bene' chesonlede'

⁷ Bene' zan chesaše' lo yežlon' chosozejni'ide' clele, le cheso'e diža' che Jesucriston' chesene' bi naque' Dios ben' bide' golje' beņaçh. Note'tez bene' chon ca' naque' bene' gwxiye' na' chone' contr Criston'.

⁸ Bi gwzenagle xtiža'gaque' san le soa le gon cont Diosen' gac gone' soale mbalaz juisyw da' chonle can' chazlaže' gonle.

⁹ Note'tezcho še chzoacho ca' ale dan' bsed blo'e Criston' cont chzenagcho bichle diža' dan' chzejni'i bene' chio', bi zoa Diosen' len chio' še ca'. Na' note'tezcho še zoacho chzenagcho che dan' bsed blo'e Criston', Xacho Diosen' len Xi'ine' Criston' nite' len chio'.

¹⁰ Na' še no bene' yide' gan' zolen' chaclaže' gwzejni'ide' le'e da' bi nac xtiža' Criston', bi gwleblene' ližlen' na' bi gwguaplene' tiox.

¹¹ Cheyała' gonelene' ca', le še gwlebelene' zejen txen chonlenlne' da' xinjen'.

Goclaže' šjane'e legaque'

¹² De da' zan da' nia' le'e perw bich chaclaža' gwzozan' le'e yiš. Zoa' lez yida' gana' zoale na' güe'lena' le'e diža' cho'a cont soacho mbalaz juisyw.

¹³ Xi'in' no'ole bilon', no'ole ben' lecze gwlej Diosen' cont chzenague' che', chosoguape' le'e tiox. Da' na'zen' chzoja' na'a.

CART GWYONE DAN' BZOJ POSTLW SAN JUAN

Postlw San Juanna' cho'e diža' güen che ben' le Gayo

¹ Neda' naca' beñe' gole blao, na' chzoja' cart nga par le', xmigua' Gayo. Da' li chacda' le'.

² Beñe' migw, chñaba' lao Diosen' gac güen chio' na' so' güen ca güenna' ba zoa lo' yichjlažda'oguo'.

³ Leca bebeda' cate' besela'ac to chope beñe' lježcho goso'e diža' can' zoaczo' chono' güen da' chzenago' diža' li che Diosen' do yichj do lažo'.

⁴ Len neda' le'e nacle ca xi'ina', na' bich bi de da' chbechda' ca chbeda' chñezda' chzenagle diža' li che Diosen' do yichj do laže'le.

⁵ Bene' migw, chono' güen dan' chacleno' beñe' lježcho ca' beñe' zjanac beñe' zito'.

⁶ Legaque' ba goso'e diža' len neto' chdop chžagto' nga chonxento' Jesucriston' can' bži'ido' legaque'. Na' cate' yesele'e da' yoble güe'sco'ne' bi dan' yeseyažjde' cont yesyegüe'e nez da' yoble, le legaque' chesone' xšin Diosen'.

⁷ Ba gosa'ac laže' cont cheso'e xtiža' Criston' na' bibi godlen chesezi'e che beñe' ca' bi chesejle'e che Criston'.

⁸ Da'n'an' cheyała' gwlebocho beñe' ca', gaclenchwne' na' gonchone' txen cont yesombia' beñe' diža' li che Diosen'.

Diótrefes chone' da' mal

⁹ Bač bzója' le'e chdop chžagle chonxenle Jesucriston', perw na' Diótrefes chaclaže' gague' la'zelaoze beñe' blao len le'e na' bi chzenague' cheto'.

¹⁰ Da'n'an' caten' yida' dezna'a le'e na' yapa'ne' che yogo' dan' chone' contr neto' na' diža' güenlaže' dan' chñe' cheto'. Na' gague da' na'zen' chone', lecz bi chlebe' beñe' lježchon' liže' beñe' za'ac zito', na' cate' no le'e chaclaže'le gwleble legaque' ližlen' nach chžone' gonle ca', na' chbeje' le'e ladjo lježle chdop chžagle chonxene' Jesucriston' cate' chleble legaque'.

¹¹ Beñe' migw, bi gono' txen len beñe' ca' cheson da' xinjen', san ben txen len beñe' ca' cheson da' güen. Note'tez beñe' zoateze' chone' da' güen, nachbia' nombi'e Diosen', na' note'tez beñe' zoateze' chone' da' xinjen', nachbia' bina' gombi'e Diosen'.

Demetrian' chone' da' güen

¹² Yogo'ze beñe' cheso'e diža' güen che Demetrio na' nachbia' zejlene' diža' li che Diosen'. Lencze neto' choe'to' diža' žato' chone' da' güen, na' nezele choe'to' diža' li.

Can' beyož carten'

¹³ Dech da' zan da' godca' ñia' le'e, perw bich chaclaža' gwzojan' le'e yiš.

¹⁴ Zoa' lez yob yežagcho cont güe'cho diža' cho'a cate' soacho txen.

¹⁵ Soago' binjo len xbab dan' yo'o lo' yichjlažda'oguoñ'. Beñe' migw chion' nita' nga chosoguape' le' tiox. Na' chñaba' gwguapšco' tiox to to beñe' migw cheto' ca' nita' gan' zوالen'. Da' na'zen' chzoja' ña'a.

CART DAN' BZOJ SAN JUDAS

San Judas chzoje' bene' ca' zjanaque' lo na' Diosen'

¹ Neda' Judas naca' bene' güen žin che Jesucriston', na' naca' bene' biše' Jacobo. Chzoja' le'e ba gwlej Xacho Diosen' cont nacle lo ne'en nach zoale chcuas chcue'ej Jesucriston' le'e len da' malen'.

² Chnaba' gon Xacho Diosen' cont gacbe'echle cheyaše' cheži'ilaže' chgüede' le'e, na' gone' cont soa cuezechle binlo len xbab da' yo'o lo' yichjlažda'olen', na' gone' gacbe'echle chachgüede' le'e.

Bene' ca' chososed chosolo'ede' diža' güenlaže'

(2 Pedro 2:1-17)

³ Bene' migw, chacda' le'e, na' ba goclaže'chgua' gwzoja' le'e gwzejni'ida' le'e can' ben Xancho Jesucriston' cont de yela' mban checho toli tocanē. Perw na'a ba chonen byen chzoja' chñeyoeda' le'e soachachle šejle' le diža' li che Diosen' da' bzejni'ide' chio' to ši'ize, chio' naccho lo ne'en.

⁴ Nita' bal' bene' cheseziye'e cont chaquele zjanaque' le'e txen. Bi chosozenague' che Diosen', san chesene' da' nži'ilaže' Diosen' chio' guacte goncho bite'teže da' yela' zto' len cuerp chechon', le chezi'xencze' checho. Na' chosozoe' to šla'ale toz ben' nac dogualje Dios ben' cheyala' yosozenag yogo' benachen' che', na' len Xancho Jesucriston'. Cana'te byoj Xtiža' Diosen' žan bene' cheson ca' yesežaglaochgüe' neche xtoła'gaquen'.

⁵ Na' la'czla' ba gwnezele yogo' can' goquen', chaclaža' gona' cont šjayza'laže' le Xancho Diosen' bosle' da' xozxta'o neto' bene' Israel lo na' bene' Egipto ca', perw gwdechle bžaiye'e balteže' bi gosejle'e che'.

⁶ Na' zan angl bi gosazlaže' yesone' da' gwlo'o Diosen' lo na'gaque' yesone', san gosaclaže' yesacche' bene' blaoch. Nachen' besyechoje' gan' bžia Diosen' bia' yesenite'. Nach Diosen' gwsele' legaque' gan' nacchgua chol, na' zjancheje' gden toli tocanē cont yesezaca'zi'e cate' žin ža gac juisyw.

⁷ Na' lecze ca' bene' gwnita' ciuda Sodoma na' ciuda Gomorra len yezica'chle ciuda ca' zjanyechj zjambi'in' legaquen, gosonchgüe' da' nac yela' zto' len cuerp chegaquen', le gosata'lene' ljež bene' byogaque' gosone' le' ca xo'ole' cont gosone' da' yela' zto' len legaque'. Nach Diosen' gwsele' yi' da' bzeyen ciuda ca' gosebiayi'tecczen'. Na' da' bene' ca', chosnišde' chio' benač gata' castigw lo yi' gabil' toli tocanē che bene' bi yosozenag che'.

⁸ Na' bia'cze bene' ca' chososed chosolo'ede' le'e diža' güenlaže', zjanite' chesone' da' mal na' chesene' besele'edagüede' nac güen dan' chesonen'. Chesone' da' yela' zto' len cuerp chegaquen' bi chesaclaže' yosozenague' che Xancho Diosen', na' chesezi'diže' angl ca' bene' zjazaca'chgua.

⁹ Perw nža'le cheson angl che Diosen', le cani' gwzoa to tiemp cate' angl blao ben' le Miguel gocyože' len Satanás dan' chnabia' da' xigüe' ca' da' goclažen' yeyoan' cuerp che da' Moisésen'. Na' la'czla' Miguelen' naque' angl blao che Diosen', bi beyaxjde' si'diže' Satanásen', san con gožen': "Xanto' Diosen' tile' le'."

¹⁰ Perw bene' quinga chesezi'diže' bite'teže da' bi chesejni'ide'. Na' chesontezē' da' ca' ža cuerp chegaquen' yesone', ca cheson beyixē' be bi chesejni'i, na' da' ca' chesonen' chosožaiyin' legaque'.

¹¹ Nyaše'chgua gac chegaque'. Zjanite' chesegue'e lježgaque' can' ben da' Caín, na' lecze cheso'laže' chesone' da' mal cont yesone' gan mechw can' ben da' Balaam. Chesone' güedenag len bene' ca' gwlej Diosen' cont chesenabi'e legaque' cacze güedenag ben da' ben' gože' Coré cani', na' can' gwžiai' da' Corén' neche yela' güedenag čhen', lecz ca' yesebiaye'e.

¹² Na' cate' le'e che'ej chagwle txen cont chlo'ele chaque lježle, legaque' chesagwxatteže' con nacteže žan chegaque' na' chese'ejchgüe' gualaz da' yesone' güen len bene' lježe'. Na' da' bibi zaca' can' chesone', da'nana' zjazaca'lebde' ca bzigüe' da' dope to le'e lache' šiš, na' lecze zjazaca'lebde' ca bene' güeye' xila' bene' chna' cuine' na' bi chne'e xila' ca'. Lecze zjazaca'lebde' ca bejw da' nžiga' be' da' bi cheyaquen yejw, na' ca to yag xen da' bibi chbian cate' ba bžin tiemp cuian, na' gualaz da' cuian chbižen na' chbixen lo yo.

¹³ Na' neche yela' zton' cheson bene' ca', zjazaca'lebde' ca nisdao' da' chas chata' na' checho'onen bžina' ga nac lo yo cho'a nisdaoen'. Na' zjazaca'lebde' ca beljw da' bich zjažian xišne'en gan' cheyala' yesebian, le Diosen' bžie' bia' yesezaca'zi'e toli tocanē gan' nac leca chol.

¹⁴ Gwzolaon cate' gwzoa da' Adán bžinten cate' gwzoa da' Enoc goc gaže dia che Adánna'. Na' Enoquen' lecze be'e diža' da' bzejni'i Diosen' le' che bene' ca' chososed chosolo'ede' diža' güenlaže', cate' gwne': "Ble'eda' za' Xancho Diosen' len angl zan juisyw che' ca'

¹⁵ cont chogbi'en yesezaca'zi' yogo' bene' zjanape' dola'. Yogo' bene' ca' bi bosozenag che' yesezaca'zi'e toli tocaņe neče da' gosone' da' mal juisyw yela' güedenag chegaquen' na' neče da' gosene' diža' ya' che'."

¹⁶ Na' ca nac bene' ca' chososed chosolo'ede' le'e diža' güenlaže', bate'teze chesežeše' che Diosen', na' bibi chesazlaže'. Con chesonteze' bite'teze žan chegaque'. Len xtiža'gaquen' chesonxen cuingaque' na' chosopede' bene' yoble cont yesone' gan mechw o cont yesaclen bene' legaque'.

San Judas che'e bene' chesonxen Jesucriston' can' cheyala' yesone'

¹⁷ San le'e bene' migw, bene' chacda', cheyala' šjayze'ele diža' nga gosena postlw ca' bene' ca' gwlej Xancho Jesucriston'.

¹⁸ Gosene': "Tiempen' cate' ba zoa yid Xancho Jesucriston', nita' bene' bi yesejle' che Diosen' na' yesonle' che' na' yesonteze' con da' žan chegaque' da' nac yela' zto'."

¹⁹ Na' na'a bene' ca' chesone' cont le'e chejnlaže'le Criston' bi chonle toze xbab, san nža' nža'te ca žale. Chesone' xbab che da' chnalaže' cuerp chegaque', le bi yo'o Spiritw che Diosen' lo' yichjlažda'ogaquen'.

²⁰ Perw le'e bene' migw, chacda' le'e, na' chneyoda' le gonchach laže'le cont soachachle šejle'le diža' li che Diosen' da' zaca'chgua. Na' le yol güiž Diosen' ye'ln'e da' chzejni'i Spiritw čhen' le'e.

²¹ Na' le soa le gon cont gacbe'ele chaque Diosen' le'e. Na' da' cheyaše' cheži'ilaže' Xancho Jesucriston' chio', gone' cont šjayzoalenchone' toli tocaņe. Da'nana' le soa le cueze batcan' gone' ca'.

²² Ba| bene' chesacžejaže' še cheyala' yesone' can' ža Diosen'. Le gwzejni'i legaque'.

²³ Na' bene' ca' ba chesezolagüe' chosozenague' che diža' güenlažen', le gon con ga zelao saca'le cont yesyechoje' lo nez malen' na' le co'o legaque' nez güenna'. Na' yeba| bene' chesonchgüe' da' xinj, na' lecze cheyala' yeyaše'cho legaque', perw do chaž chžebcho, do chgue'echo dan' chesonen' na' cheyala' gwsaca'cho cont bi goncho txen len da' xinjen' chesonen'.

Judasen' chonxene' Diosen'

²⁴⁻²⁵ Cheyala' gonxenchon toz Dios ben' zaca' gonxenchon, ben' none' yela' mban checho toli tocaņe. Dios nan' naque' bene' sina' juisyw. Chac chone' cont bi lažo'cho goncho da' xinj, na' chac chone' cont bibi xtola'cho gata' cate' yežincho lagüen' gan' yo'ochgua be'ni'. Leca yebecho cana'. Diosen' naque' la'zelagüe' bene' zaca' bene' blao, na' zaque' chnabi'e doxen. Naque' Xan yogo' beňach na' yogo' bica'chle da' de. Len' gocxene' cate' biņa' xe yežlion' na' cheyala' gonxenchone' toli tocaņe dan' gwsele' Xancho Jesucriston' chaclene' chio'. Ca'šca gac. Da' na'zen' chzoja'.

JESUCRISTON' BZEJNI'IDE' SAN JUANNA' CHE DA' CA' ZA' GAC

Diosen' bzejni'ide' Jesucriston' diža' quinga

¹ Diosen' bzejni'ide' Jesucriston' diža' quinga cont le' gwlo'ede' bene' ca' chesejnilaže'ne' can' ba zoa gac. Nach ba gwsele' to bene' nac angl che' cont bzejni'iden' neda' Juan, neda' naca' ben' chon xšine'.

² Na' chzoja' diža' li che yogo' da' ba ble'eda', na' nezda' da' li gwna Diosen' gac quinga, le Jesucriston' bzejni'iden' neda'.

³ Mbalaz' bene' ca' yosolab da' nga chzoja' da' bzene Diosen' neda' na' bene' ca' yesende' yosolab bene' yoble len, še da' li yosozenague' čhen, le ba zoa gac can' žanna'.

Juanna' chzoje' bene' ca' chesonxen Jesucriston' yež' ca' gaže

⁴ Neda' Juan chzoja' le'e nita'le gaž yež che Asia chdop chžagle chonxenle Jesucriston'. Diosen' len Spiritw čhen' yesenita'sque' yesaclene' le'e na' yesone' soa cuezle binlo len xbab čhelen', Dios ben' ba zoacze' cate' biņa' xe yežlion', na' soacze' toli tocaņe. Na' Spiritw čhe Diosen' naquen ca gaže spiritw na' zoon lao Diosen' gan' chi'e chnabi'e.

⁵ Na' Jesucriston' lecze soasque' gaclene' le'e na' gone' soa cuezle binlo. Jesucriston' naque' ben' cho'e diža' li che Diosen'. Naque' bene' nechw bebane' ladjo bene' guaten' ben' bich nabia' yela' goten' le'. Na' le' chnabi'e yogo' nochle bene' gwnabia' že' yežlio nga. Dan' chacde' chio' bnežjw cuine' gosote'ne' na' blalj xchene' cont bnitlagüe' xtoła'chon'.

⁶ Nach ba gwleje' chio' cont nabia'cho txen len le' ca no rey na' cont soacho gonxencho Diosen' ca no bžoz, Dios ben' nac Xe' na' lecze naque' ben' chonxene'. Cheyala' gonxenčhone' toli tocaņe, le zoacze' chnabi'e toli tocaņe. Can' gonščacžcho.

⁷ Jesucriston' yide' da' yoble to lo' bejw, na' yogo'lo' bene' yesele'ede' le', lente bene' ca' gosot le'. Na' bene' ca' že' to to latje lo yežlion', yesebežyaše' cate' yesele'ede' le'. Can' žia', na' can' gacšca.

⁸ "Neda' naca' Dios ben' ben yežlion' len yogo' bichle da' de, na' naca' ben' gon cont te čhen. Da'n'an' zaca'lebda' ca letr nechw da' nzi' A na' letr bzebe da' nzi' Z." Can' ža' Xancho Dios ben' nape' yela' guac xen juisyw, ben' ba zoacze' cate' biņa' xe yežlion' na' soacze' toli tocaņe.

Juan ble'edaogüede' leca bene' zaca' juisyw nac Criston'

⁹ Neda' Juan naca' bene' lježle dan' naccho txen chzenagcho che Jesúsen' cont Diosen' chnabi'e yichjlažda' ocho, na' toz can' chosoghi chososaca' bene' chio' neče xtižen', na' txen chaclen Jesucriston' chio' cont chyo chčejecho len yogo' da' chac checho. Da' ba gwduxje'eda' xtiža' Diosen' na' ba bia' diža' che Jesucriston', da'n'an' gosezene' neda' na' gosesele' neda' pres gan' že' Patmos dan' nac to yežlio dao' lo' nisdaon'.

¹⁰ Na' to ža dmigw Spiritw che Diosen' benen cont ble'edaogüeda', na' benda' Jesucriston' čhne' čožan' žižjehgua ca ga chbež trompeta.

¹¹ Na' gože' neda':

—Neda' naca' ben' ben yežlion' len yogo' bichle da' de, na' naca' ben' gon cont te čhen. Da'n'an' zaca'lebda' ca letr nechw da' nzi' A na' letr bzebe da' nzi' Z. Bzoj to le'e yiš da' quinga le'edo', na' seļon' lao bene' ca' nita' gaž yež che Asia chesedop chesežague' chesonxene' neda', yež ca' zjanzi' Efeso, na' Esmirna, na' Pėrgamo, na' Tiatira, na' Sardis, na' Filadelfia na' Laodicea.

¹² Na' gwyechja' gwna'a non' čhne' na' ble'eda' gaže candel' de oro.

¹³ Na' gachoļ candel' ca' gaže, ble'eda' to bene' nac ca to benač perw gočbe'eda' bi naque' benačze. Nyaze' to lache' toņ da' bžinte lo ni'e na' nchej cho'alčo'en ca to bant de oro.

¹⁴ Na' yiša' yichjen' naquen da' šiš ca xa xila' o ca no beye'. Na' yejlagüen' gosactiten ca to yi' da' čala'nin.

¹⁵ Ni'e ca' ble'edan' ca to de bronze da' nlačgua cate' naquen ya'alj xoan lo yi'. Na' ši'en nenen žižjehgua ca chziž yegw cate' dečgua nis.

¹⁶ Na' noxe' gaže beljw len ne'e ličan' na' lo' cho'en chchojen ca to spada da' nla chop la'an. Na' cho'alagüen' goctiten ca gwbiž cate' čhna'chguan.

¹⁷ Na' cate' ble'eda'ne' gwbiža' xni'en gottia' šlat. Nach bli ne'e ličan' gwxoen' yichja' na' gože'nda':

—Bi žebo'. Neda' naca' ben' ben yežlion' len yogo' bichle da' de, na' naca' ben' gon cont te čhen.

¹⁸ Naca' ben' nsa' yela' mban. Cana' gota' perw bebana' ladjo bene' guat na' zoacza' toli tocaņe. Na' naquen lo na' nia' bat yesat to to bene' na' nac gac čhegaque' cate' bačh gosate'.

¹⁹ Na' na'a bzoj diža' che da' ca' ba ble'edo' na' diža' che da' ca' chac na'a na' diža' che da' ca' za' gac.

²⁰ Na' da' nono na' neze che beljw ca' gaže dan' noxa' na' che candeler de oro ca' gaže, zejen quinga: beljw ca' zejen gaže bene' ca' cheso'e xtiža' len gaže cuen bene' ca' chesedop chesežag chesonxene' neda' gan' nzi' Asia. Na' candeler ca' gaže zejen gaž cuen bene' ca' chesonxen neda'.

2

Da' gwna Jesucriston' che bene' ca' chesonxen le' lo ciuda ca' gaže. Da' gože' bene' Efeso ca'

¹ Bzoj ben' choe' xtiža' len bene' ca' chesedop chesežag chesonxene' neda' lo ciuda Efeson', yo'one' neda' noxa' beljw ca' gaže len na' lichan' na' chda' gachoł candeler de oro ca' gaže, na' yo'one' nedan' chapa'ne' diža' quinga:

² "Neze nle'eda' ca' güenna' chonle, can' chchejlaže'le zoale chonchgual xšinan'. Nezda' bi chleble bene' cheson da' xinj, le ba ble'ele can' cheson bene' güenlaže' ca' chesene zjanaque' postlw na' chache'ele bi zjanaque' dogualje postlw.

³ Ba byo bchejle len yogo' dan' ba goc chele na' ba benchgual xšinan' na' bi jaxaque' laže'le.

⁴ Perw da' nga bi chazlaža' can' chonle, da' bich chaquele neda' can' goquele neda' cana'.

⁵ Da'n'an' le gon xbab can' gwzoale goquele neda' na' can' gwzoale bzenagle chia' na' yetinje xtoła'le cont da' yoble gonle güen can' benle cana'. Na' še bi yetinjele xtoła'len', yedeyena' cont bich gacle candeler chia'.

⁶ Perw la'czła' bi chontecle güen, chebeda' chgue'ele da' xinj da' cheson bene' ca' zjanzi' nicolaítas, bene' ca' chesene' guac gontezchle da' xinj, le neda' lecze chgue'eda' can' chesonen'.

⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', neda' goņa' da' gawgle da' chbia lo yag yela' mban da' zoa latje xdan che Diosen'."

Da' gože' bene' Esmirna ca'

⁸ Na' na'a bzoj ben' choe' xtiža' len bene' ca' chesedop chesežag chesonxen neda' ciuda Esmirna, yo'one' naca' ben' ben' yežlion' na' len yogo' bichle da' de na' ben' gon cont te chen, ben' lecze gote' na' bebane' ladjo bene' guat ca', na' yo'one' nedan' chapa'ne' diža' quinga:

⁹ "Neze nle'eda' ca' güenna' chonle. Nezda' chyi chzaca'le. Nezda' nacchgual bene' yaše', la'czła' de chele da' zaca'ch clal ca' yela' gwni'an'. Na' ca' nac bene' Israel bene' ca' chesene' ba gwlej Diosen' legaque' cont gone' güen len legaque', nezda' bałe' chesenie' yela' ya' chele. Perw bi gwleje' ben' cheson ca', le bi chesejnilaže'ne', san zjanaque' dapa' txen chosozenague' che Satanás dan' chnabia' da' xigüe' ca'.

¹⁰ Bi žeble da' ca' za' gac chele, le Satanásen' gonen cont yeseyixjue' bałle ližya cont gata'bia' še soen gonen cuejyichjle xtižan'. Na' lo to chope ža yosoči yososaque' le'e. Le soateze le gwzenag chia' la'czła' še yesote' le'e, na' gona' cont banle neda' tołi tocane.

¹¹ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', bi gac chele can' yesac che bene' yesezaca'zi' tołi tocane dan' žacho yela' got gwchope."

Da' gože' bene' Pérgamo ca'

¹² Na' bzoj ben' choe' xtiža' len bene' ca' chesedop chesežag chesonxen neda' ciuda Pérgamo, yo'one' neda' napa' spada toše' dan' nla chop la'an, na' nedan' chapa'ne' diža' quinga:

¹³ "Neze nle'eda' ca' güenna' chonle. Na' nezda' zoale lo ciuda gan' chnabia'chgua Satanásen', perw zoale chzenagle chia'. Nezda' bi chbejyichjle xtižan' dan' chejle'le na' neca gwlejyichjlen cate' gosote' Antipas ben' be'e xtižan' lo ciuda chelen' gan' že' bene' zan bene' chosozenag che Satanásen'.

¹⁴ Perw de to chope da' chonle da' bi chazlaža'. Le nita' bałle chzejni' lježle guac gontezle da' xinj. Ca'cze nac dan' bzejni' da' Balaam da' rey Balac cani'. Da'n'an' gwsele' no'ole gosego'oyele' bene' Israel ca' cont gosagüe' yela' guagw da' nac che l'gua' la'saca' gosejnilaže' bene' zito' ca' na' cont gosone' da' yela' zto' len cuerp chegaque'.

¹⁵ Na' lecze nita' bałle chzenagle che dan' chgue'eda' dan' chososed chosolo'e bene' ca' zjanzi' nicolaítas.

¹⁶ Da'n'an' le yetinje che da' xinjen' chonle. Na' še bi yetinjele xtoła'len', la' yidtia' yedetiłlena' nole chonle da' xinjen' len spada dan' chchoj choan'.

¹⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', goņa' le'e to yela' guagw da' zaca' da' nono na' le'e lo yežlion', to da' zaca'leben ca' maná, na' goņa' to yej šiš che

to tole gan' voj lale da' naquen to lale da' cobe da' nono nombia', lete le'e gaquen lo na'le gombia'len."

Da' gože bene' Tiatira ca'

¹⁸ Na' bzoj ben' choe' xtiža' len bene' ca' chesedop chesežag chesonxene' neda' lo ciuda Tiatira, na' yo'one' naca' dogualje Xi'in Dios, na' chactit yejlagua' ca to yi' da' čala'nin na' ni'a ca' chesaquen ca bronca da' cheyac ya'alj cate' xoan lo yi'. Yo'one' neda' čapa'ne' diža' quinga:

¹⁹ "Neze nle'eda' ca güenna' chonle, nezda' zoale chaquele neda', chejnilaže'lenda', chonchgual xšinan' na' chchejele bite'teze chac čele, na' nezda' chončle güen na'a clel can' benle cana'.

²⁰ Perw de to da' chonle da' bi chazlaža', le choe'le latje zoa to no'ole naque' txen len le'e, no'olen' zaca'lebe ca da' reina Jezabel. Že' chsed chlo'ede' xtiža' Diosen' perw len diža' güenlaže' čhen' chziye'e bene' chesejnilaže' neda' cont ba'e' chesone' da' nac da' yela' zto' len cuerp čegaquen' na' lecce chesagüe' yela' guagw da' chesena bene' naquen čhe l' gua'a lsaca' chesejnilaže'.

²¹ Ba gwleza' cont yetinjde' čhe yela' zto' dan' chonen', perw bi čaclaže' yetinjden', na' bi'a' cuejyichje' yela' zton' chonen'.

²² Da'n'an' gona' cont gacšende' na' gate' lo cam, na' gona' cont bene' ca' cheson yela' zton' txen len le' lecce yesale'chgüede' še bi yesebejyichje' da' ca' chzejni'ide' legaque' yesone'.

²³ Nach bi' čhe' ca', gona' cont yesatbe'. Nach yogo' cuen bene' ca' chesedop chesežag chesonxene' neda' gate'teze yesacbe'ede' nombi'a yogo'te xbab da' yo'o lo' yichjlaždao' benač, na' gona' cont to toe' soe' mbalaz o saca'zi'e con ca nac da' ba bene'.

²⁴ Na' le'e zoale Tiatiran' le'e bi chonle can' chsed chlo'e no'ole güenlažen' na' neca nsedle dan' chesene' chesejni'ide' čhe Satanásen' dan' nono nombia', bi nia' bichle da' čeya'la' gonle.

²⁵ Con soacze gonle da' güen can' chonle tža tža, cont ne' chonle güen caten' yida' da' yoble.

²⁶ Note'tezle še soele bi cuejyichje' xtižan', na' še soele ne' soatezle gonle can' nona' mandaw cate'čh yida' da' yoble, gona' cont nabia'le nación ca' txen len neda'.

²⁷ Ca Xan' ba bene' cont chnabi'a nación ca', lecce can' gona' cont bene' bi yesebejyichje' xtiža' yesenabi'e txen len neda'. Na' yesenabi'e nación ca' na' žan ca žan bene' nación ca' yosozenague' čegaque', na' bene' ca' bi chosozenag, yosožiaye'e legaque' ca to bene' chzoj to no yeso' xguague.

²⁸ Na' gwnežjua' legaque' beljw xsilen'.

²⁹ Le'e žia nagle da' chene, le gwzenag čhe dan' ža Spiritw čhe Diosen' čhen' le'e chdop čhžagle chonxenle neda' gate'teze."

3

Dan' gože bene' Sardis ca'

¹ Na' lecce bzoj ben' choe' xtiža' len bene' ca' chesedop chesežag chesonxen neda' lo ciuda Sardis, yo'one' napa' Spiritw čhe Dios dan' nac ca gaže spiritw, na' noxa' beljw ca' gaže, na' neda' čapa'ne' diža' quinga: "Neze nle'eda' yogo'lo' dan' chonle. Nezda' nacle ca bene' guat la'čzla' chze čele naple yela' mban toli tocané.

² Le gon xbab can' chonle na' le šejnilaže'ch neda' na' le gwzenag čhia' šlac bi'a' yeyož cuiayi'le, le dan' chonlen' bi naquen can' chebe Dios ben' chonxena'.

³ Le soa le gon xbab čhe xtižan' dan' bosozejni'i bene' le'e na' da' bzenagle čhen cana'. Le gwzenag čhen na' da' yoble cont yetinjle xto'la'len'. Na' še bi gonle xbab yetinjle xto'la'len', žin ža yedexenyala' le'e na' gona' castigw čele ca chzenyal to no bene' gwban cate' chbane'. Bi nezele bi ža bi hor.

⁴ Bia'cze nita' ba'le bene' Sardis bi'a' gonle da' malen' txen len bene' yezica'chle. Na' le'e nac lažda'olen' xilaže' len neda', žin ža gona' lache' šiš čhazle na' talenle neda', le zaca'le cont gonle neda' txen.

⁵ Note'tezle še soele bi cuejyichje' xtižan', žin ža gona' lache' šiš čhazle, na' gwbat yoxia' lalen' le'e libr čhia' gan' nyoj la yogo' bene' zjanape' yela' mban toli tocané, na' güe'lena' Xan' diža' na' len bene' zjanac angl čhe' ca' yapegaca'ne' nacle neda' txen.

⁶ Le'e žia nagle da' chene, le gwzenag čhe dan' ža Spiritw čhe Diosen' čhen' le'e chdop čhžagle chonxenle neda' gate'teze."

Da' gože bene' Filadelfia ca'

⁷ Na' lecce bzoj ben' choe' xtiža' len bene' ca' chesedop chesežag chesonxen neda' lo ciuda Filadelfia, yo'one' naca' bene' laždao' xilaže' juisyw, na' zoateza' chona' can' gwnia' gona'. Napa' xinya čhe da' rey David. Cate' čhsaljua' cont yeso'o bene' gan' zoa Diosen' chnabi'e,

nono gac yoseyjw, na' cate' chseyjua' cont bi yeso'e, nono gac saljw. Yo'one' neda' chapa'ne' diža' quinga:

⁸ “Neze nle'eda' ca güenna' chonle. Nach ba gwsaljua' ca to puert che le'e da' nono gac yososeyjw. Na' la'czla' bi nac zanle, ba chzenagle xtižan' na' bi gwlejyichjen caten' bosochi bososaque' le'e.

⁹ Bał bene' Israel že' gan' zoalen' chesene' ba gwlej Diosen' legaque' cont gone' güen len legaque', perw bi gwleje' legaque', le bi chesejnilaže'ne'. Zjanaque' dapa' txen chosozenague' che Satanás dan' chnabia' da' xigüe' ca'. Na' ca nac legaque', gona' cont žin ža yesape' le'e bala'añ cate' yesacbe'ede' chacda' le'e.

¹⁰ Ba byo bchejle len yogo' dan' gwdi gwxcaca'le na' benle can' nona' mandadw, na' da'nan' gona' yechojle güen cate' žin ža saca'zi' yogo' benačh. Cana' gata'bia' che to to benačh še yosozenague' chia' o še bi yosozenague'.

¹¹ Ba zoa yida' da' yoble. Le soačhačh le šejnilaže'nda' na' gwzenagle chia' cont bibi gwžon soale mbalaz toli tocañe.

¹² Note'tezle še soele bi cuejyichle xtižan', žin ža gona' gacle ca bdope da' zjanita' lo' yodao' blao che Dios ben' chonxena', le yežinle gan' zoa Diosen' na' yega'anlenle' toli tocañe. Na' gwzoja' loxga to tole la Dios ben' chonxena' na' la ciuda che', ciuda Jerusalén da' nac da' cobe da' chi' yaba na' yetjen lo yežlion'. Na' gwzoja' loxga to tole la neda' da' nac da' cobe.

¹³ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

Dan' gože' bene' Laodicea ca'

¹⁴ Na' bzoj ben' choe' xtiža' len bene' ca' chesedop chesežag chesonxen neda' lo ciuda Laodicea, yo'one' chona' cont chac can' chnalaže' Diosen'. Cho'a diža' li da' nac cayanen' che' Diosen' neda'. Txen len neda' ben Diosen' benačh na' yogo'lol bichle da' de le'e yaban' na' lo yežlion'. Yo'one' neda' chapa'ne' diža' quinga:

¹⁵ “Neze nle'eda' ca chonle, bi nacho chgue'ele neda' na' neca chaquele neda'. Yebechda' šaca' chgue'ele neda' o šaca' chaquele neda'.

¹⁶ Na' da' bi chonle cuent gaquele neda', da'nan' ba zoa cuejyichja' le'e bich gona' le'e ca xi'ina'.

¹⁷ Le'e žale zoale mbalaz, žale chonle da' güenchgua, žale bibi chyažjele le chebechgüe Diosen' le'e. Na' bi chache'ele leca bene' zban nacle len Diosen'. Bi chache'ele nacle ca to bene' bi chle'e o ca to bene' laže' ga'alyid da' bi chejni'ile xtižan' neca chzenagle chen.

¹⁸ Da'nan' chnia' le'e cheyała' si'le da' goña' le'e, le naquen da' zaca'ch ca oro dan' ba bosozeye' cont bega'an da' dogualje. Si'le da' goña' le'e cont da' li soale mbalaz. Na' le nab yezi'xena' xtola'le cont gac lažda'olen' xilaže' can' chac xałana' bene' nyaz to lache' šiš xila'. Gonle ca' cont bich le'eda' le'e ca to bene' laže' ga'alyid, bene' cheyała' gaque zto'. Na' le güe' latje yocoba' xbab chelen' cont bich gacle ca to bene' bi chle'e, bene' chyažje rmed che yejlagüe' cont le'ede', san gacbe'ele da' chaclaže' Diosen' gonle.

¹⁹ Note'teze bene' chacda', chdila'ne' na' chnežjua'ne' castigw cate' chone' da' xinj. Da'nan' cheyała' cuec yichjle yetinjele xtola'len'.

²⁰ Chnia' to tole ca to bene' zecha cho'a yo'o chelen' chnie' na' chsiže' le'e puerten'. Note'tezle še gwzenagle chia' na' še saljwle cont šo'a, yedesoa' len le'e na' gona' cont soale mbalaz txen len neda'.

²¹ Na' note'tezle še soele bi cuejyichjle xtižan', žin ža gona' cont cue'lenle neda' gan' chi'a chnabi'a. Can' bena' neda', gwzoeda' cont bena' can' gwna' Xan' nach chi'lena'ne' chnabi'a'to' txen.

²² Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze.”

4

Ben' že' yaban' chesonxene' Diosen'

¹ Beyož bzoja' da' ca' gwne' neda', ble'edaogüeda' nyaljo to puert yaban'. Nach da' yoble benda' gwne' Jesucristw ben' gwne' neda' da' nechw žizječhua cacze žizje chbež to trompeta, gože'nda':

—Gwyep gan' zoa' nga cont gwlo'eda' le' da' ca' za' gac.

² Nach la' bente Spiritw che Diosen' cont ble'edaogüeda' yaban' gan' chi' Diosen' chnabi'e.

³ Na' ble'eda' ben' chi' chnabian' chactite' ca chactit yejese, yej da' nzi' jasje na' da' nzi' cornalina. Na' to da' nac ca to pita' gwyechjen gan' chi'e chnabi'en, na' chactiten ca chactit to yej da' nzi' esmeralda.

⁴ Na' cue'ej cuit Diosen' gan' chi'e chnabi'e zjachi' yetapechoa bene' gwlej Diosen' zjanaque' blao, bene' chesenabi'e txen len le'. Zjanyaze' lache' šiš na' zjazoa corona de oro yichj to togaque'.

⁵ Na' gan' chi' Diosen' chnabi'e chep yes na' chac sšag na' chašjw chtin. Na' lagüen' nita' gaže yi' da' čala'nin. Yi' ca' gaže zjanaquen Spiritw čhe Diosen', na' Spiritw čhe Diosen' naquen ca gaže spiritw.

⁶ Na' doxen lagüe' gan' chi'e chnabi'en nžiljw lo yon' to da' chactit ca vidrw na' nlan' ca to nis nyadi da' nla'xeje.

Na' nita' yetap bene' gan' zoa Diosen'. Tgüjeje' nita' cuite' chop la'ate, yetoe' cože' na' yetoe' lagüe', na' zjažia da' zan yejlaogaque', žia da' žia laogaque' na' lente cože'gaque'.

⁷ Bene' nechw naque' ca to león, na' bene' gwchope ca to go'n, na' bene' gwyone nac cho'alagüe' ca che benach, na' bene' gwdape naque' ca to bsia be ze lo be'.

⁸ Na' dapte bene' ca' to toe' žia xop güje xilgaque', na' zjažia zan yejlaogaque' lo xilen' lente cože' xilen'. Na' do ža do yel bi chososane' chesene':

Łeca bene' laždao' xilaže' juisyw nac Xancho Diosen' ben' nape la'zelagüe yela' guac xen.

Ba zoacze' cate' za' xe yežlion', na' soacze' toli' tocaņe.

⁹ Na' yogo' ni'a cate' bene' ca' tap cheso'e diža' catec bene' zaca' nac Dios ben' chi' chnabia', ben' zoacze' toli' tocaņe, yogo' ni'a cate' chesonxene' le' cheso'e yela' choxclen čhe',

¹⁰ Bene' tapechoa ca' gwlej Diosen' cont zjanaque' blao chosozoa xibe' lao Dios ben' zoa toli' tocaņe chesonxene' le' gan' chi'e chnabi'e na' chosonite' corona čhegaquen' xni'en, chesene':

¹¹ Xanto' Dios, zaco' gonxento' le',

na' soato' le' bala'an na' güe'to' diža' čhe yela' guac xen chion',

le len' beno' yogo'lol da' de,

na' beno' yogo'loľen con ca gwnalažo'.

5

Jesucristw ben' zaca'lebe ca xila' daon' gosot bene' Israel ca' neče xtoła'gaque'

¹ Na' ble'eda' Dios ben' chi' chnabia', len ne'e liča noxe' to yiš da' ndobyoyen na' nyoj chop la'aten na' nreyjon nyišen' gaže seyw.

² Na' ble'eda' to angl gual gwne' žižje gwne':

—¿Non' zaca' gwzoxj seyw ca' cont šaš yišen'?

³ Na' nono bžel bene' zaca' gwzaše' yišen' neča yaban' na' ne yežlion' na' neča gan' že' bene' guat ca'. Ne to nono bžel bene' la'čh le'ezden' nac naquen.

⁴ Na' gwchežčgua' da' nono zoa bene' zaca' gwzaše' yišen' gwlaben' na' neča zaque' na'ze' nac naquen.

⁵ Nach to bene' gwlej Diosen' cont naque' blao gože'nda':

—Bitw cuežo'. Gwna'šc, na' zoa Jesucristw ben' golje lo diaža čhe da' Judá, naque' rey can' nac da' xozxta'ogüe' David, na' da' nape' yela' chnabia' xen zaca'lebbe' ca to bež be nzi' león. Na' le' zaque' gwzoxje' seyw ca' gaže na' gwzaše' yišen', le ba gwzoede' bene' cont gac nitlao xtoła' benachen'.

⁶ Nach ble'eda'ne' zeche' gan' chi' ben' chnabian' na' ladjo bene' ca' tap ben' zjažia xil, do gachoľ bene' blao ca' tapechoa. Ble'eda'ne' ca to xila' dao' ben' ba gosote', ca xila' be žia gaže lozba' na' gaže yejlaoba'. Na' yejlaoban' gaže zejen zoa Spiritw čhe Diosen' doxen lo yežlion' chonen can' ža Diosen'.

⁷ Nach ben' ble'eda' ca to xila' dao' jaži'e yiš dan' noxe' ben' len ne'e liča gan' chi'e chnabi'en.

⁸ Na' cate' jaži'e yišen' bene' ca' tap lente bene' blao ca' tapechoa bosozoa xibgaque' lagüen'. Na' to to bene' blao ca' zjanoxe' to arpa na' to barser de oro gan' chey yal, na' yalen' zejen xtža' bene' ca' zjanac lo na' Diosen', dižan' chesoe'lene' le' caten' chosol güiže'ne'.

⁹ Nach bene' ca' gosole' to da' cobe dan' ža:

Zaco' jaži'o yišen' cont gwzašon' na' gwzoxjo' seyw ca' nyišen',

le bnežjw cuino' gosote' le'.

Blalj xcheno' cont bnitlaguo' xtoła'to',

na' gwxi'o neto' cont nacto' lo na' Dios,

neto' nacto' bene' to to naciön, to to yež, to to diaža na' chacto' gwde gwdele diža' da' de lo yežlion'.

¹⁰ Na' gwlejo' neto' cont nacto' ca rey, na' zoato' chonxento' Dios četon' ca bžoz, na' žin ža nabia'to' lo yežlion'.

¹¹ Nach gwṇa'a na' ble'eda' bene' zan juisyw angl, neca gwzoeda' gwlabane'. Zjazecha angl ca' cue'ej cuit ben' chi' chnabian' na' gan' ze' bene' ca' tap na' bene' blao ca' tapechoa.

¹² Na' benda' cheso'e dižan' zižje chesene':

Jesucriston' bnežjw cuine' neche xtoła' benačen',

na' da'nan' zaca'lebde' ca xila' daon' gosot bene' Israel cont gwṇitlao xtoła'gaque'.

Na' Jesucriston' zaca'cze' gonxenchone',

le chnabi'e doxen, na' yo'o lo ne'e yogo'te da' zjade.

Naque' bene' sina' gual, na' nape' yeła' guac xen.

Cheyla' güe'chone' yela' bala'an,

na' güe'cho diža' naque' bene' zaca' juisyw.

¹³ Na' lecze benda' yogo' bene' ze' yaban' na' yežlion' na' bene' ze' latje che bene' guat, na' bene' zjanita' lo nisdao', cheso'e diža' chesene':

Tołi tocaṇe chonxenchon Dios ben' chi' chnabia'

na' Jesucriston' ben' zaca'lebde' ca xila' daon' gosot bene' Israel cont gwṇitlao xtoła'gaque'.

Zjanape' yeła' bala'an, na' zjanaque' bene' zaca' juisyw,

na' zjanape' yeła' guac xen juisyw toli tocaṇe.

Na' benda' lecze can' gosena be chaš yežlion' na' be chaš le'e yaban' na' lo' nis, na' len yogo' bichle da' zjade.

¹⁴ Nach bene' ca' tap ben' zjažia xil gosene':

—Ca'šcace gac.

Na' bene' blao ca' tapechoa bosozoa xibgaque' gosonxene' Dios ben' zoa toli tocaṇe.

6

Seyw ca' gaže

¹ Ca nac seyw ca' gaže, ble'eda' cate' ben' zaca'lebde' ca xila' daon' be gosot bene' gualaž četo' neche xtoła'gaque' bzoxje' seyw nechon'. Nach bene' ca' tap zjažia xil, toe' gwṇe' zižje, ca zižjen' chašjw chtin yi' gwzio', gwne':

—Da, na' gwṇa' da' nga.

² Na' cate' gwṇa'a, ble'eda' to cabayw be šiš na' ben' žie' cože'ban' noxe' to arcw. Ba bosozoe' to corona yichje' neche da' ba bene' gan lo gwdile, na' na'a ba zeje' da' yoble cont tillene' nochle bene' chesegue'ede' le' na' gone' gan legaque'.

³ Na' ben' zaca'lebde' ca xila' dao' be gosot bene' gualaž četo' neche xtoła'gaque', cate' bzoxje' seyw gwchope benda' gwṇe' yeto ben' žia xil, ben' nac bene' gwchope, gwne':

—Da, na' gwṇa' da' nga.

⁴ Nach bchoj yeto cabayw, na' bena' nacha' be xṇa. Na' ben' žie' cože'ban' gwyo'o lo ne'e gone' cont bene' ze' yežlion' bich yesenite' binlo len lježe' san yesot lježe'. Na' bosonežjue'ne' to spada xen.

⁵ Na' cate' ben' zaca'lebde' ca xila' daon' be gosot bene' gualaž četo' neche xtoła'gaque' bzoxje' seyw gwyone, benda' gwṇe' bene' gwyone ben' žia xil, gwne':

—Da, na' gwṇa' da' nga.

Nach gwṇa'a na' ble'eda' to cabayw gasj na' ben' žie' cože'ban' noxe' to xigonz.

⁶ Na' benda' gwṇe' to bene' do gan' ze' bene' ca' tap ben' zjažia xil, gože' ben' žia cože' cabayw gasja', gwne':

—Gwyej jažiai' trigw na' cebada cont yesaquen gwbin na' cont čop ya trigw saca' laxjue' da' yesone' gan tža žin na' xop ya cebada saca' laxjue' da' yesone' gan tža žin, perw bi gono' cont cuiayi' set na' vino.

⁷ Na' cate' ben' zaca'lebde' ca xila' daon' be gosot bene' gualaž četo' neche xtoła'gaque' bzoxje' seyw gwdape, benda' gwṇe' bene' gwdape ben' žia xil, gwne':

—Da, na' gwṇa' da' nga.

⁸ Nach gwṇa'a na' ble'eda' to cabayw be gaše, na' ben' žie' cože'ban' lie' Yeła' Got. Na' yeto bene' zej cože', lie' Latje Gan' Že' Bene' Guat. Na' gosac lo na'gaque' bosoxie' gwdile gan' gosat bene' zan, na' gosone' cont gosat yezane' gwbin, na' gosone' cont yezan bene' gosate' len yižgüe', na' gosone' cont be znia gosotba' yezane', na' goc ca' lao to tlaw yežlion' dan' gosac lo ne'e.

⁹ Nach cate' ben' zaca'lebde' ca xila' daon' be gosot bene' gualaž četo' neche xtoła'gaque' bzoxje' seyw gayo', ble'eda' mes gan' bene' ca' ze' yaban' chosozeye' bi dan' chosozeye' cate' chesonxene' Diosen', na' xni'a mesen' ble'eda' bene' ca' ba gosot yezica'chle bene' legaque' lagüe dan' bosozenague' xtiža' Diosen' na' lagüe dan' goso'e diža' gosene' chesejnilaže' Jesucriston'.

¹⁰ Na' bene' guat ca' gosene' zižje gosene':

—Xanto' Dios, le' naco' bene' laždao' xilaže' juisyw na' zoaczo' chono' con ca' žo'. ĆBatcan' gono' yela' justis che bene' ca' že' yežlion' ben' gosot neto'? ĆBatcan' gono' cont yesezaca'zi'e da' bosolalje' xčhenton'?

¹¹ Nach Diosen' bnežjue' to to bene' guat ca' tgüeje xagaque' da' šiš da' gosaze'. Na' gože' legaque' yesyezi'laže'che' yeto čop ža šlac yeseza' bene' cheyała' yesat can' gosate' lagüe da' chesonxene' Criston', bene' zjanac ca' biše' lježe'.

¹² Nach ben' zaca'lebde' ca' xila' daon' be gosot bene' gualaž čheto' neče xtoła'gaque', cate' bzojxe' seyw gwxope, gwna'a na' leca gwxo'. Na' gwbižen' beyaquen gasj ca' lache' gasj da' chesaz bene' chesegüine', na' doxen bion' beyaquen xna' ca' chen.

¹³ Na' beljw ca' besejınjen besežinten lo yežlion' can' chyiņj no yixgüigw da' žia lo xyaguen cate' čechj to be' gual da' čhtan len.

¹⁴ Nach le'e yaban' benittecczen ca' to no yiš da' chedoblolen. Na' yogo' ya'a ca' na' no yežlio dao' da' ca' zjachi' lo' nisdaon' bososa' xišnan'.

¹⁵ Nach yogo'loł bene' že' yežlion', yogo' bene' ca' chesenabia' lo yežlion', yogo' xan soldadw, yogo' bene' blao bene' gwni'a, yogo' bene' cheson xšin bene' yoble ca' beyixe', na' len yezica'chle bene', yogo'cze' bosocuaše' cuingaque' do xan bloj, do ladjo yej xen da' zjažia lo ya'a ca'.

¹⁶ Na' gosene':

—Če'šca bdiņj na' yej quinga na' ya'a quinga yesebixen yeseyenen chio' cont bi le'e Diosen' chio', Dios ben' chi' čhnabia', na' yeseyenen chio' cont Jesucriston' ben' zaca'lebde' ca' xila' daon' be gosot bene' neče xtoła'gaque' bi gone' saca'zi'cho.

¹⁷ Le ba bžin ža gac juisyw, na' Diosen' len Jesucriston' leca cheseže'e chio' bi chonxencho legaque', na' nono soe da' yesone' saca'zi'cho.

7

Bene' Israel ca' bene' zjanyiše' seyw čhe Diosen'

¹ Gwdena' ble'eda' tap angl zjazeče' tap squin čhe yežlion' bosozague' ben' cont bi gwyečhjen lo yežlion', lo nisdaon' o gan' ze yag ca'.

² Na' ble'eda' yeto angl bene' za' gan' chla' gwbiž na' noxe' to da' gwčhine' gwčhiše'de' seyw čhe Dios loxga bene' ca' chesonxen le', Dios bene' zoa toli tocaņe. Na' anglen' gwne' zižje bol güiže' angl ca' tap ben' zjanac lo ne'e yesone' gac yela' zi' lo yežlion' len lo nisdaon'.

³ Gože' legaque':

—Bi gwžiai'i'le yežlion', ne nisdaon', ne yag ca' šlac biņa' gwčhiša' seyw čhe Dios čhecho loxga bene' ca' chesonxen le'.

⁴ Na' benda' gwne' bal bene' bčhiše' seyon' bene' za'ac lo yogo' diaža čhe bene' Israel, na' yogüe' gosac to gayoa tapeyon mile'.

⁵ Šižinw mile' za'aque' lo diaža čhe da' Judá, šižinw mile' lo diaža čhe da' Rubén, šižinw mile' lo diaža čhe da' Gad,

⁶ na' šižinw mile' lo diaža čhe da' Aser, šižinw mile' lo diaža čhe da' Neftalí, šižinw mile' lo diaža čhe da' Manasés,

⁷ na' šižinw mile' lo diaža čhe da' Simeón, šižinw mile' lo diaža čhe da' Leví, šižinw mile' lo diaža čhe da' Isacar,

⁸ šižinw mile' lo diaža čhe da' Zabulón, šižinw mile' lo diaža čhe da' José na' šižinw mile' lo diaža čhe da' Benjamín.

Bene' zan zjanyaze' lache' šiš

⁹ Na' gwdena' gwna'a da' yoble na' ble'eda' zjaze bene' zan lao Diosen' gan' chi'e čhnabi'e na' lao ben' zaca'lebde' ca' xila' daon' be gosot bene' Israel neče xtoła'gaque'. Na' nono goc yosolab bal bene' že', le gosaque' bene' zan juisyw, bene' to to nación, to to yež, to to diaža, na' gosaque' bene' chesac gwde gwdele diža' da' de lo yežlion'. Na' yogüe' zjanyaze' lache' šiš na' zjanoxe' zin.

¹⁰ Na' chesyebede' bososye'e gosene':

Xanto' Dios ben' chi' čhnabia' na' Jesucristw ben' zaca'lebde' ca' xila' daon' be gosot bene' Israel neče xtoła'gaque', legaque' ba gosone' yela' mban čhecho toli tocaņe.

¹¹ Nach yogo'loł angl ca' zjaze' cue'ej cuite' gan' chi'e čhnabi'e, na' bene' blao ca' tapechoa na' bene' ca' tap zjažia xil, yogo'lole' jasechaze' cosčo'ale lo yon' gosonxene' Diosen',

¹² gosene':

Chac can' cheyała' gac, Dios čheto'.

Zaca'czo' gonxento' le' toli tocaņe,

le naco' bene' zaca' juisyw,

naco' la'zelagüe bene' sina',

zaco' güe'to' yela' choꝥcɫen çhio' na' güe'to' yela' bala'aṅ çhio' toli' tocane,
chnabi'o doxen, na' napo' la'zelagüe yela' guac xen.
Can' nacczen.

¹³ Nach to bene' blao ben' nac txen len bene' tapechoa ca' gože'nda':

—¿Nezdo' no zjanac bene' quinga zjanyaz lache' šiš na' ga za'aque'?

¹⁴ Na' boži'an goša'ne':

—Le' nezdo' bene' gole, bi nezda' neda'.

Nach gože' neda':

—Bene' quinga ba gosale'de' da' ba gosac chegaque' yežlion'. Na' baçh gwnitlao
xtola'gaque' na' ba zjanyaze' lache' šiš, le chesejnilaže' Jesucristw ben' blalj xçhene' ca xila'
dao' be gosot bene' Israel cont bezi'xen Diosen' xtola'gaque'.

¹⁵ Da'nan' nite' lao Diosen' gan' chi'e chnabi'en chesonxene' le' do ža do yel. Na' Dios ben'
chi' chnabi'e zoe' chape' legaque'.

¹⁶ Bich yesebil' yesedone', na' gwbižen' bich gwzeyen legaque', neca yesacde' zeye'.

¹⁷ Le Jesucristw ben' zaca'lebd'e' ca xila' daon' ben' gosot bene' Israel neçhe xtola'gaque',
len' chgüia chne'e legaque'. Ze' lao Diosen' gachol gan' chi'e chnabi'e na' gone' cont nita'chgüe'
mbalaz. Gone' cont bich yesebeže' neca yesegüine'de'.

8

Seyw gažen'

¹ Gwde gože' neda' ca', nach Jesucristw ben' zaca'lebd'e' ca xila' daon' be gosot bene' gualaž
çheton' bzoxje' seyw gaže da' nyiše' yiša', na' cate' bzoxjen' gocži yaban' do gašj hor.

² Na' ble'eda' gaže angl ca' zjazeche' lao Diosen', na' bnežjue' legaque' tgüeje trompeta.

³ Na' yeto angl bedeseche' cho'a mes de oro da' zoa lao Diosen' gan' chi'e chnabi'e, mesen'
gan' bene' ca' že' yaban' chosozeye' bi da' chosozeye' cate' chesonxene' Diosen'. Na' angla'
noxe' to barser de oro gan' yo'o da' zçha'o yal na' bžien' lo yi' ya'alj da' žia lo mesen'. Anglen'
bene' ca' cont naquen txen len ši'i bene' ca' chesonxene' Diosen' bate'teze chosol güiže'ne'.

⁴ Nach gwyas žen che yala' noxe' anglen' gwloen lao Diosen' len xtiža' bene' ca' chesonx-
ene' le'.

⁵ Nach anglen' gwxi'e ya'alj da' žia lo mesen' gwlo'en lo' barseren' na' bzalen' lo yežlion' na'
gošj gwtinchgua, na' goc bichle sšag, gwyep yes na' gwxo'.

Trompeta ca'

⁶ Nach angl ca' gaže ben' zjanoxe' trompeta ca' bosozoan' cho'agaque' cont yosocuežen'.

⁷ Angl nechon' bcuež trompeta çhen', na' gwche'chgua yej lo yežlion' na' nçhixen yi' na'
çhen. Na' da' zçha'o yežlion' gwžiyai', yelate'ze ca goc gašje yo da' de lo yežlion' gwyeyen,
lente yag da' ze lagüen goseyen, na' lecze yeto ca'ate' yiçe' ga' da' de lo yežlion' goseyen.

⁸ Nach angl gwchope bcuež trompeta çhen', na' to da' nac ca to ya'a xen blažon' lo' nisdaon'
çhala'ninen. Na' yelate'ze ca goc gašje nisdaon' beyaquen çhen.

⁹ Na' yelate'ze ca goc gašje be ca' že' lo' nisdaon' gosatba', na' leze yeto ca'te' barcw ca' chaš
lo nisen' gosebiayin'.

¹⁰ Nach angl gwyone bcuež trompeta çhen' na' to beljw xen blažon' le'e yaba çhala'ninen
ca to yi' yech. Jago'onen lo da' zan yegw na' da' zan ga chal nis lo yežlion', yelate'ze ca goc
gašje yegw ca' na' ga chal nis dan' zjade yežlion' gan' jago'onenna'.

¹¹ Na' beljon' nzin' Da' Zła', na' nisen' gan' jago'onenna' beyaquen zła' na' bene' zan gosat
dan' gose'eje' nisen'.

¹² Nach angl gwdape bcuež trompeta çhen' na' yelate'ze ca goc gašje gwbižen' gwžiyain',
lecze yeto ca'te' bion' gwžiyain' na' lecze yelate'ze ca goc gašje beljw ca' gosebiayin'. Na' da'
ca' gosebiayin' bich bososenin'. Da'nan' gwdena' goc çhol yelate'ze ca goc gašj ža gašj yel, na
goc ca' yogo' ža yogo' yel.

¹³ Nach gwṅa'a na' ble'eda' chda lo be' to angl do gachol le'e yaban' na' benda' gwṅe' zižje,
gwṅe':

—iNyaše'chgua yesac che bene' ca' že' yežlion' yeyož yosocuež angl ca' yešone trompeta
çhegaquen'!

9

¹ Nach angl bene' gayo' bcuež trompeta çhen' na' ble'eda' to beljw da' blažon' le'e yaban'
jago'onen lo yežlion'. Na' beljon' goquen ca to bene' na' Diosen' bnežjue'ne' xinya cont saljue'
yechw zitjwchgua dan' nac lo gabil'.

² Nach gwsaljue' yechon' na' gwyaschgua žen can' chas žen cate' chesebeque' yi' gual to
lo' horn. Na' goc çhol le'e yaban' can' chac cate' chi'chgua žendao', lao gwbižen' len lo be'
goquen çhol catec gwche' ženṅa'.

³ Gan' gwyas ženna' besežaš biše'zo zan gwyašba' lo yežlion', be yeseyižba' bene' can' cheson bejxoni' be chaš yežlio.

⁴ Diosen' gože'ba' bibi yesoneba' yixe' ga, ne da' zjanaze' na' neca yag ca' ze yežlion', san yeseyižba' bene' ca' bi nyiše' sey che Diosen' loxgagaque'.

⁵ Na' bi be'e latje yesotba' legaque', san šašba' gayo' bio' yosoči yososaca'ba' bene' ca'. Na' cate' yeseyižba' bene', yesežagläue' can' chžagläocho cate' chyž bejxonin' chio'.

⁶ Na' cate' žin ža yesomba' ca', bene' že' yežlion' yeseñablaže' yesate', perw bi yesate'; yesaclaže' bich yesenite', perw bi gac can' yesaclažen'.

⁷ Ca nac biše'zo ca', ble'eda' zjanacba' ca cabayw be šja'ac lo gwdiše. Yichjgacban' zjazoa da' nac ca corona de oro. Cho'alaoban' naquen ca cho'alo beñač.

⁸ Zjažiaba' yiša' da' nac ca yiša' yichj no'ole. Layban' zjanaquen ca lay bež znia be nzi' león.

⁹ Na' zjanyazba' to da' nac de ya da' chcue'ejen cuerp čhegacban'. Na' ššag da' chesomba' len xilgacban' chñinen ca chñin cate' chesa'acses cabayw zan zja'acba' lo gwdiše zjanxobba' carret.

¹⁰ Na' lo xban biše'zo ca' zjazoa liba' zjanaquen ca xban bejxoni' cont yeseyižba' bene', na' goc lo na'gacba' yosoči yososaca'ba' bene' že' yežlion' gayo' bio', yeseyižba' legaque'.

¹¹ Angl ben' beyac da' xigüe' dan' chnabia' gabilen' naquen xan biše'zo ca'. Lenña' nzi' Abadón diža' hebreo na' leče nzin' Apolión diža' griego, na' zejen diža' Da' Chžiyain'.

¹² Ba gwde yela' zi' nechon' na' za' za'ac yečhopen.

¹³ Nach bcuež angl gwxopen' trompeta čhen', na' benda' gwne to bene' do gan' zoa mes de oro dan' ze lao Diosen', mes da' žia lozen dapte squin, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'.

¹⁴ Na' bol güiže' angl gwxop ben' noxe' trompetan', gože'ne':

—Besež dap angl ca' ben' besyeyac bene' mal ben' zjanchej cho'a yegw da' nzi' Eufrates.

¹⁵ Nach beseže' angl ca' tap bene' ca' bnita' Diosen' cont yesaše' lo iz, bio', ža na' horen' nžie' bia' yesote' beñač, na' caten' gosaše', yelate'ze ca' goc gašje bene' že' yežlion' gosote'.

¹⁶ Na' gwnita' čhop gayoa millón soldadw čhegaque' zjažie' cože' cabayon'.

¹⁷ Quinga ble'edaogüeda' cabayw ca' na' angl ca' bene' besyeyac bene' mal zjažie' cože'gacba' zjanaque' soldadw. Angl ca' zjanyaze' to de ya da' chcue'ej cho'alcho'gaque' na' yana' chnan' ca color čhe yi' na' chnan' da' azul na' da' gaše. Na' yichj cabayw ca' zjanaquen ca yichj bež znia be nzi' león, na' chchoj yi' cho'agacba' len žen na' len azufre da' čala'ñin.

¹⁸ Yelate'ze ca' goc gašje bene' že' yežlion' gosat len yi' na' len žen na' len azufre da' bchoj lo cho'agacba'.

¹⁹ Na' bosochin cho'agacba' na' len xbangacba' cont gosotba' beñač, na' xbangacban' gosaqen ca beł na' zjansa' yichjen cont goseyi'ñen bene'.

²⁰ Na' bene' ca' beseya'ñ bi gosat cate' gwyas čabayw ca' lo yežlion', legaque' bi besyetiñde' čhe da' mal ca' chesone', neca bososane' da' chesonxene' da' xigüe' ca' na' l'gua'a lsaca' čhegaque' ca' da' zjanac de oro, de plata, de bronce, de yej o de yag, la'czla' l'gua'a lsaca' ca' bi chesele'en, neca chesenen, na' neca chac yesa'aquen.

²¹ Na' neca besyetiñde' cont yesebejyichje' bichle da' mal da' chesone', ca dan' chesote' bene', da' chesone' txen len no bene' guaža', da' chesone' da' yela' zto' len cuerp čhegaquen', na' da' chesebane' da' de čhe bene'.

10

Angl bene' noxe' yiš dao' ndobyoyen

¹ Nach ble'eda' yeto angl gual gwze'e yaban' betje' lo yežlion'. To bejw nyechjen le' na' zoa to pita' yichjen'. Cho'alagüen' chna'titen ca gwbiž, na' yeni'e ca' ble'edan' zjanaquen ca bdope da' čala'ñin.

² Anglen' noxe' to yiš dao' da' ba beyašen. Na' bzoa šla'a ni'e licha lo nisdaon' na' yešla'an bzoe' lo yežlion'.

³ Na' bosye'e zižje ca zižje chosya'a be nzi' león. Na' cate' bosye'e gwne gwzio' gaž ni'a na' to to gwzion' zoa da' gosenan.

⁴ Beyož goc ca' na' ba zoa gwzoja' diža' da' benda' šlac gwne gwzion' cate' to bene' zoa yaba gože'nda':

—Bi gwzojo' dižan' bendo' šlac gwne gwzion', san gwdapen lo' yichjlažda'oguo'.

⁵ Nach angl ben' zoa šla'a ni'en lo nisdaon' na' yešla'an lo yežlion' gwlis ne'e lican' yabale.

⁶ Na' gwlo'e da' bałi gac can' ža Dios ben' zoa toli tocanē, ben' ben le'e yaba len yogo'te da' chle'echo le'enña', bene' yežlion', beñač, beyixe', na' bite'tezechle da' de lo yežlion', na' bene' nisdaon' len be ca' na' da' ca' že' lo'enña'. Gwne':

—Bich cuez Diosen' gone' can' ba nžie' bia' gone'.

⁷ San cate' žin ža gwcuež angl gažen' trompeta čhen', cana'ch gac da' nžia Diosen' bia' gac, can' ba gože' bene' ca' gosoe' xtižen', da' nono gwneze cani'.

⁸ Nach da' yoble ben' zoa yaban' ben' ba benczeda' gwñie' neda', gwne':
—Gwyej jaxi' yiš dao' dan' ba beyaš dan' noxe' angl ben' zecha zoa šla'a ni'en lo' nisdaon' na' yešla'an lo' yežlion'.

⁹ Da' nan' gwy'a gan' zoa anglen' janaba' yišen'. Na' anglen' gože'nda':
—Bexon' gwdagon'. Lo' cho'on gacdon' zix ca' šina' beser, perw lo' li'on yeyaquen zla'.

¹⁰ Nach bexo'a yišen' noxe' anglen' gwdaguan'. Na' lo' cho'an goquen zix ca' šina' beser, perw cate' bedaguan' beyaquen zla' lo' li'an.

¹¹ Nach anglen' gože' neda':
—Da' yoble cheyala' go'o xtiža' Diosen' na' nao' can' gac che zan yež, che zan nación, che bene' chesac gwde gwdele diža' da' de yežlion', na' che zan bene' gwnabia'.

11

Chope bene' gosoe' xtiža' Diosen'

¹ Nach anglen' bene' neda' to ya ca nac da' chosočhine' cate' chosočhixe' yo'o, na' gože'nda':
—Gwyej jachixe yodao' blao na' mes gan' chosozeye' bi da' chosozeye' cate' chesonxene' Diosen', na' gwlabo' bał bene' že' chesonxene' le'.

² Perw bi gwchixo' chy'o'on, le ba naquen lo' na' bene' bi zjanac bene' Israel bene' bi chesejnilaže' Diosen' cont yesone' nacteze chesaclaže' lo' ciuda che Dios lao čhopenon bio'.

³ Na' sela' čhopene' yeso'e xtiža', na' yesaze' lache' gasj ca to bene' chegiüne' na' yeseyixjue'ede' xtižan' lao to mil čhop gayoa gayon ža.

⁴ Bene' ca' čhopene' zjazaca'lebe' ca yag olivos ca' čhopene' ca candler ca' čhopene' da' zjazoa lao Diosen' ben' nac Xan yežlio.

⁵ Na' še no chaclaže' gonxi'e legaue', choj yi' cho'a bene' ca' yeso'e xtižan' na' gwzeyen bene' chgue'ede' legaue'. Can' gac yesat note'teze bene' chende' gonxi'e bene' ca' čhopene'.

⁶ Na' bene' ca' yeseyixjue'ede' xtižan', gac lo' na'gaue' yesone' cont bi gac yejw šlac yeso'e xtižan', na' gac lo' na'gaue' yesone' cont nisen' yeyaquen chen, na' bate'teze yesaclaže', yesone' gac bite'tezehle da' yesežglaol bene' že' yežlion'.

⁷ Perw cate' yeyož yeso'e xtižan', nach choj lo' gabil' gan' nac yechw zitjwchgua to bež xigüe' nizba' legaue' na' gotteba' legaue'.

⁸ Na' bene' ca' že'na' yosyocua'ane' cuerp čhegaquen' gan' chesetolen la cay che ciuda blaon' gan' gosote' Xancho Jesucriston'. Ciudadan' zaca'leben ca ciuda Sodoma na' ca nación Egipto.

⁹ Na' šone ža yo gašje bene' za'ac zan yež na' zan nación, bene' zjanac zan diaža, bene' chesac gwde gwdele diža' da' de lo' yežlion', yesene'e bene' guat ca' na' bi yeso'e latje yesegaše'.

¹⁰ Bene' ca' že' yežlion' yesyebede' da' gosat bene' ca' čhopene', na' yosonežjo lježe' bi da' yosonežjo lježe' da' chesyebede' dan' bich nita' bene' ca' yeso'e xtiža' Diosen' len legaue', le leca zed chesacden'.

¹¹ Na' ble'edaogüeda' gwde šone ža yogašje Diosen' bosbane' bene' ca' čhopene' gosezeche' da' yoble. Na' yogo' bene' besele'e legaue' besežebchgüe'.

¹² Nach bene' ca' gosoe' xtiža' Diosen' gosende' gož Diosen' legaue' žižje:

—Le yeda, le yeyep nga.

Nach bene' ca' chesegue'e legaue' besele'ede' besyeyepe' yaban' to lo' bejw.

¹³ Šlac chesyeyepen' leca gwxo' na' gwžiai' late' ciudadan', na' gaže mil bene' gosat caten' gwxon'. Na' bene' ca' besyega'an besežebchgüe' na' gosonxene' Dios ben' zoa yaba.

¹⁴ Ba gwde yela' zi' gwchopen' na' ža' gac da' gwyone.

Can' goc cate' angl gaže bcueže' trompeta čhen'

¹⁵ Nach angl bene' gažen' bcuež trompeta čhen' na' benda' bał bene' ca' že' yaban' gosene' žižje, gosene':

Doxen yela' chnabia' che yežlion'

bač naquen lo' na' Xancho Diosen' na' lo' na' Cristo ben' gwleje' cont chnabi'e.

Na' Diosen' zoacze' chnabi'e toli' tocaņe.

¹⁶ Nach bene' blao ca' tapechoa ben' zjachi' cue'ej cuit Diosen', jasechaze' cosčo'ale lo' yon' gosonxene' Diosen',

¹⁷ gosene':

Chonto' yela' choxclen čhio' Xanto',

le naco' Dios ben' nap yela' guac xen.

Ba zoaczo' cate' biņa' xe yežlion',

na' soaczo' toli' tocaņe.

Na' ba gwzolao chnabi'o len yela' guac xen chion' cont gac can' chazlažo' doxen.

¹⁸ Beñe' nación ca' že' yežlion' beseže'e le',

perw ba bžin ža gono' yesezaca'zi'e.

Ba bžin ža choglaguo' che yogo' bene' ca' ba gosat še noe' nap doła'.

Na' gono' cont bene' güen xšino' ca' bene' ca' goso'e xtižon' yesenite' mbalaz,

len yogo' bene' gwlejo' cont zjanaque' lo nao', bene' gosonxen le'.

Con yogo' bene' gosonxen le' yesenite' mba, bene' gole len bene' xcuide'.

Łecze ba bžin ža yesebiayi' bene' ca' bosožiyai' ljež benače' yežlion'.

¹⁹ Nach byaljo gan' chesonxene' Diosen' yaban' na' ble'eda' caj gan' že' yej ca' gan' nyoj da' ca' gož Diosen' bene' Israel gualaž cheto' ca' yesone' cont gaclene' legaue'. Na' šlac gwña'a, gwyep yes, gocchgua sšag, gošj gwtin, gwxo' na' gwche'chgua yej.

12

No'olen' na' beł be zoa gaž yichj

¹ Na' ble'edaogüeda' to da' yebanchgüecho le'e yaban', ble'eda' to no'ole na' nyaze' gwbižen' ca xe'. Nljeje' lo bion' na' zoa to corona yichje' da' žian šižinw beljw.

² No'olen' no'e bdao' na' chosye'e, le chaque' bes che yela' sanna'.

³ Na' ble'eda' yeto da' zaca' yebanecho le'e yaban', ble'eda' Satanás dan' chnabia' da' xigüe' ca', ba naquen ca to beł be žia gaž yichj, be xen juisyw. Nacba' be xña na' žia ši lozba' na' zoa tgüeje corona to to yichjban'.

⁴ Na' bta xbamban' cont bchijnjen zan beljw ca' žia le'e yaban' na' beselažon' lo yežlion', yelate'ze ca goc gašje beljw ca' zjažia le'e yaban' bchijnj xbamban'. Na' gwlezbba' xñi'a no'olen' ba zoa sanña' cont yebba' bdao' chen' cate' sane'be'.

⁵ Nach no'olna' gwxxane' to bi' byo bi' nabia' nación ca' na' žan ca žan yosozenague' chebe'. Nach Diosen' beyo'ebe' gan' chi'e chnabi'e.

⁶ Nach no'olen' boxonjde' belen', na' gwyeye' to latje daš da' benšagüe' Diosen' che', gan' yeso'ene' da' ye'ej gagüe' lao to mil chop gayoa gayon ža.

⁷ Gwde na' goc to gwdile yaban', le angl blao ben' le' Miguel na' soldadw che' ca' goseditlene' beł ben' žia gaž yichj lencze angl che belen' bene' ca' besyeyac da' xigüe'.

⁸ Na' belen' len da' xigüe' ca' bi' gosezoen angl ben' zjanac bene' che Dios, na' bich bi latje gota' che belen' yaba, neca che da' xigüe' ca' zjanac leba' txen.

⁹ Angl che Diosen' bosozale'ba' lo yežlion'. Na' łecze bosozale' da' xigüe' ca' lo yežlion'. Belnan' ben' zoa ža gwlaste nacba' gwxiye' na' leba' Satanás, na' ñe' zoaczbba' ña'a chziye'ba' yogo' benačh.

¹⁰ Nach benda' to bene' zoa yaban' gwñe' žižje gwne':

—Bač bžin ža ben Dios chechon' cont bene' ca' chesejnilaže'ne' zjanite' len le'. Bač bžin ža nacbia' Dios chechon' nape' yela' guac xen. Ba bžin ža chnabi'e cont gac con da' cheyala'cze gac. Na' ba bžin ža Criston' ben' gwleje' cont nabi'e bač chnabi'lene' le'. Gac da' cheyala'cze gac, le Satanás dan' ba gwzoo' lao Diosen' do ža do yel bcuišen bene' chesejnilaže' Criston', bač besyebejen'.

¹¹ Na' bene' gosejnilaže' Criston' na' ba gosate', gosezoede' bi' bosozenague' che Satanásen', le gosejle'e Jesucriston' blalj xchene' neche xtoła'gaue' na' goso'e diža' chesejnilaže'ne'. Bene' ca' ba gosat gosache'ede' yejni'a yesate' clal ca yesebejyichje' Jesucriston'.

¹² Yaban' cheyala' gosya'an yela' chebe chen, na' le'e že'le gan' zoa Diosen' cheyala' yebele, perw nyaše'chgua gac che le'e zoale lo yežlion' na' lo' nisdaon', le Satanás dan' chnabia' da' xigüe' ca' ba betjen gan' zoolen' chaclocchguan, le nezen yešložga de latj chen.

¹³ Nach cate' belen' gocbe'eba' bosozale'ba' lo yežlion', blagsesba' no'olen' gwxxan bi' byo daon'.

¹⁴ Perw Diosen' bnežjue' chop xile' da' xen ca xil bsiadao' cont gwyeye' latje daš gan' bi goc žin belen', latje gan' benšagüe' che' gan' yeso'ene' da' ye'ej gagüe' šon iz yo gašje.

¹⁵ Na' bchoj nis zil cho'a belen' goquen to yegw cont bžinen gan' zoa no'olen' na' guan' le'.

¹⁶ Perw Diosen' bene' cont yežlion' goclenen no'olen', byaljon güe'ejen nis dan' bchoj cho'a belen'.

¹⁷ Nach belen' blocchguaba' no'olen' na' gwyejba' jatillemba' yezica'chle xi'ine' da' chosozenague' che Diosen', chesone' con da' že' na' zjanita'čhače' chesejnilaže' xtiža' Jesucriston'.

13

Chope bež xigüe' be ble'e Juan

¹ Na' gwzia' cho'a nisdaon' na' ble'eda' bchoj to bež xigüe' lo' nisdaon'. Bežen' nita' gaž yichjba' na' žia ši lozba' na' žia tğüeje corona lao to to lozban'. Na' to to yichjban' nyoj to laba' da' chlo'en chon cuimba' ca Dios.

² Ble'eda' bežen' nacha' ca to tigr, perw ni'ana'ban' zjanaquen ca ni'a na' oso na' cho'aban' naquen ca cho'a león. Nach beļ ben' žia gaž yichj bnežjwba' bežen' yela' guac na' yela' chnabia' cheban' cont gwnabia'ba' na' cont gosenita' beñach bosozenague' cheba'.

³ Ble'eda' to yichj bežen' nacchguan güe', ca to da' gatlemba', perw beyacha'. Na' yogo'loļ beñač besyebande' dan' beyachan' na' bosozenague' cheba'.

⁴ Yogo'ze beñe' gosonxene' beļen' dan' bemba' cont gwnabia' bež xigüen', na' lecze gosonxene' bež xigüen', gosene':

— Nono zoa beñe' nap yela' chnabia' xen ca bež nga, na' nono zoa beñe' soede' tilene'ba'.

⁵ Lecze nono bžon gwna bežen' zaca'chba' ca Dios, na' gwnaba' yela' ya' che Diosen'. Na' goc lo na' bežen' gwnabia'ba' chopeyon bio'.

⁶ Na' gwnechguaba' yela' ya' che Diosen' na' che yaba gan' zoe' na' len che yezica'chle beñe' ca' že' yaban'.

⁷ Na' gwyo'o lo na' bežen' gwdiļlemba' beñe' ca' gosejnilaže' Diosen' na' bi gosezoede'ba'. Bibi goc yesone' cont yesyechoje' lo na'ba'. Gwnabia'ba' yogo' naciön, yogo' yež, yogo' diaža na' beñe' chesac gwde gwdele diža' da' de lo yežlion'.

⁸ Na' yogo' beñe' že' yežlion' beñe' bi zjanyoj lagaque' le'e libr che Jesucriston', gosonxene' bežen'. Le cate' gwxcete yežlion' Jesucriston' bzoje' le'e libr che' la yogo' beñe' nežde' gata' yela' mban chegaque' toli tocane, Jesucristw ben' zaca'lebde' ca xila' dao' be gosot beñe' gualaž cheto' neče xtoļa'gaque'.

⁹ Note'tez le'e žia nagle da' chene, le gwzenag da' nga nia' le'e.

¹⁰ Beñe' yeseyixjue' ljež beñače' ližya, decze de ližya yesata' legaque'. Na' beñe' yesot ljež beñače' len spada, decze de gac chegaque' ca'. Da'nan' chonen byen soačhačh chio' ba gwlej Diosen' cont naccho lo ne'e, gwyo gwčhejcho len bi da' gac checho na' soačhačhcho šejnilaže'chone'.

¹¹ Gwdena' ble'eda' yeto bež xigüen' be bchoj lo' yo. Na' žia čop lozba' da' nac ca loz xila', perw be'ba' diža' can' choe' beļ ben' žia gaž yichjen' diža'.

¹² Na' bež nechon' bemba' cont bež gwchopen' gwnabia'ba' par leba' na' bež gwchopen' bemba' cont yogo' beñe' že' yežlion' gosonxene' bež nechon' ben' beyaque len güe' dan' naquen ze da' got leba'.

¹³ Na' bež gwchopen' bemba' zan da' bebanchgüe beñe' len yela' guac cheban', na' bemba' cont bešele'ede' yi' le'e yaban' na' beselažon' lo yežlion'.

¹⁴ Na' da' bemba' da' ca' gan' zoa bež nechon', gwziye'ba' beñe' že' yežlion' cont bosozenague' cheba'. Nach bemba' mandadw gosone' to l'gua'a l'saca' da' nac ca bež nechon' da' gosonxene', bež ben' goc yichjban' güe' len spada, güe' da' naquen ze da' got leba' perw beyacha'.

¹⁵ Na' goc lo na' bež gwchopen' bemba' cont l'gua'a l'sacan' gwyo'on biš grasyw. Na' goc gwñen, benen mandadw gosote' yogo' beñe' bi gosonxenen'.

¹⁶ Na' bež gwchopen' lecze bemba' byen gosezoa yogo' beñe' señw che bežen' le'e na'gaque' liča o loxgagaque', beñe' gole len bi' bixjw, na' beñe' gwñi'a len beñe' yaše', na' beñe' cheson xšin beñe' yoble ca beyixe' len yezica'chle beñe'.

¹⁷ Na' note'teze beñe' še bi zoe' señw che bežen' o laba' o número da' zejen laba', bi goc bi si'e neca goc bi gote'.

¹⁸ Čhyažjecho yela' sina' cont šejni'icho da' nga. Beñe' chejni'i guac gwlab'e número cheban', le naquen número da' chčhin beñačh, na' número cheban' naquen xop gayoa gayon xop.

14

Da' gosol beñe' ca' to gayoa tapeyon mil gosonxene' Diosen'

¹ Na' gwna'a na' ble'eda' Jesucristw ben' zaca'lebde' ca xila' dao' be gosot beñe' gualaž cheto' neče xtoļa'gaquen', zeče' lo ya'a Siön len to gayoa tapeyon mil beñe' yoble. Na' zjanyoj la Jesucriston' len la Xe' Diosen' loxgagaque'.

² Na' benda' chesoļ beñe' zan beñe' že' yaban'. Nenen ca chsiž ga zjadechgua yegw zan na' ca nen cate' chašjw chtin. Na' nenen ca nen cate' beñe' zan chosogole' arpan' to ši'ize.

³ Na' gosole' to da' cobe lao Diosen' na' lao beñe' ca' tap zjažia xil na' lao beñe' blao ca' tapechoa gan' čhi' Diosen' chnabi'e. Noch no beñe' yoble goc goļ len, con beñe' ca' to gayoa tapeyon mil na'ze gosac bososede' dan' gosolen' cont gosonxene' Diosen', legacze' bebej Criston' lo na' Satanásen' šlac ne' nite' yežlion'.

⁴ Beñe' ca' gosolen' zjanaque' beñe' bi gosata'lene' no'ol bi nac xo'olgaque', na' gosapchgua cuingaque' cont gosac lažda'ogaquen' xilaže' len Diosen'. Na' zja'acteze' len Jesucriston'

gate'teze zeje' chosozenague' che', le bebeje' legaque' lo na' Satanásen' cont zjanaque' lo ne'e na' lo na' Diosen'. Da'nan' zjazaca'lebde' ca to tlaw coseš da' bnežw bene' Israel gualaż cheto' ca' lo na' Diosen'.

⁵ Gwbat goso'e diža' güenlaže' na' bibi doła' zjanape' lao Diosen' ben' chi'e chnabi'e.

Da' gosenā šone angl

⁶ Nach ble'eda' yeto angl le'e yaban' chde' lo be'. Na' gwduxjue'ede' diža' güen che Diosen' da' bi te chen len bene' ze' yežlion', len bene' zjanac to to naciön, to to yež, to to diaža, na' bene' chesac gwde gwdele diža' da' de yežlion'.

⁷ Gwne' zižje gože' legaque':

—Le žeb Diosen' na' le gonxene', le ba bžin hor gone' yela' justis che benach. Le gonxen Dios ben' ben yaban', yežlion', nisdao' na' ga chal nis.

⁸ Yeto angl za' cožen' gwne':

—Bač bžin ža cuiayi' ciuda Babilonia da' nac da' blao. Bač bžin ža cuiayi' ciuda che bene' ca' bosozoe' Diosen' ca'ale na' gosebede' da' nac yela' zto', le ba gosego'oyele' bene' ze' yogö naciön cont chesone' güedenag len Diosen'.

⁹ Nach yeto angl zej cože' bene' gwchopa' be'e diža' zižje gwne':

—Note'teze bene' chesonxen bež xigüen' len l gua'a lsaca' cheba' na' cheso'e latje chesezoa señw che beža' loxgagaque' o taca'gaque',

¹⁰ Diosen' ba nžie' bia' yesesaca'zi'chgua bene' ca'. Yesezaca'zi'e gan' čala' yi' len azufre lao angl che Diosen' na' lao ben' zaca'lebde' ca xila' dao' ben' gosot bene' Israel neče xtoła'gaque'.

¹¹ Toli tocanē čhas žen che yi' gan' yesezaca'zi'en. Na' bene' ca' chesonxen bežen' len l gua'a lsaca' cheban', na' bene' zjazoa señw che bežen' loxgagaque' o taca'gaque', bi gac yesyezi'laže' len da' yesezaca'zi'en ne chel ne lagüe ža.

¹² Da'nan' chonen byen soačhač čio' ba gwlej Diosen' cont naccho lo ne'en, gwyo gwčeicho len bi da' chac čecho, čio' chzenagcho che da' non Diosen' mandadw goncho na' bi chbejičijcho dan' chejnilaže' cho Jesüsen'.

¹³ Nach benda' to bene' zoa yaban' gwne':

—Bzöj da' nga: “Mbalaz bene' ca' ne' chesejnilaže' Xancho Jesucriston' žinte ža yesate. Can' chac na'a na' can' gac bate'teze.”

Na' Spiritw che Diosen' žan:

—Da' li nite' mbalaz, le yesyezi'laže' len xšingauen', na' gachia' yogö da' güen da' ba gosone'.

Yotob Diosen' bene' bi chosozenague' che' cont yesezaca'zi'e

¹⁴ Nach gwña'a da' yoble na' ble'eda' to bejw šiš le'e yaban' na' cože' bejon' chi' to bene' nac ca to benach. Na' zoa to corona de oro yichjen' na' noxe' to da' nzi' hoz da' nłachgua.

¹⁵ Na' yeto angl bchoj lo' gan' chesonxene' Diosen' yaban' na' gwne' zižje gože' ben' chi' cože' bejon':

—Ba bžin hor yotobo' coseš che uvas dan' de yežlion', le ba golen.

¹⁶ Nach ben' chi' cože' bejon' noxe' hoz botobe' cosešen'.

¹⁷ Nach bezchoj yeto angl lo' gan' chesonxene' Diosen' yaban' na' lecze noxe' yeto hoz da' nłachgua.

¹⁸ Na' lecze bezchoj yetoe' ben' yo'o lo ne'e yi' da' čala' lo mes gan' chesonxene' Diosen'. Na' angl nga gwne' zižje boł güiže' angl gwchopa' ben' lecze noxe' hoz, gože'ne':

—Ba güe uvas da' žia lo yežlion'. Bečoguen len hoz čion' dan' nłachgua cont yotobchon.

¹⁹ Nach anglen' bečogue' uvas da' žia yežlion' len hoz dan' noxen' na' botoben' bzalen' to lo' ša' xen ga yesesien' cont choj xisen'. Zeje diža', Diosen' botobe' bene' ca' bi bosozenag che' na' gwlo'e legaque' ga yesezaca'zi'e.

²⁰ Na' gan' gosezaca'zi'en naquen cho'a ciudan', na' lo' ša' xen gan' gwlo'e uvasen' belalje chen zil da' nac xchengaque', bežinen ca sibe to xčhega' cabayw, na' bžiljon šone gayoa mil metr.

15

Angl ca' zjajo'o lo na'gaque' gaže yela' zi' da' zelao yesac

¹ Na' ble'eda' yeto da' leca zaca' yebanecho le'e yaban'. Ble'eda' gaže angl bene' zjanac lo na'gaque' yesone' yegaže yela' zi' cont yeyož gwlo'e Diosen' can' chone' da' chloque' bene' ca' cheson da' xinj.

² Lecze ble'eda' to da' nac ca to nisdao' de vidrw da' nchixen yi'. Na' cho'a nisdao' zjazecha bene' ca' gosezoede' bi gosonxene' bežen' na' l gua'a lsaca' dan' nac ca leba', na' bi goso'e latje yosozoe' legaque' señw cheba' o número da' zejen laba'. Na' zjanoxe' tgüeje arpa da' bnežw Diosen' legaque'.

³ Na' ble'eda' le'gaque' chesonxene' Diosen' cheso'le' to da' bsede da' Moisésen' bene' Israel gualaž cheto' ca', Moisés ben' ben xšin Diosen' cani'. Lecze cheso'le' da' naquen to da' bsede Jesucriston' le'gaque', Jesucristw ben' zaca'lebde' ca' xila' dao' be gosot bene' gualaž cheto' neče xto'la'gaque'. Quinga žan:

Xanto' Dios, yogo' da' ba beno' len yela' guac xen chio' naquen da' güen juisyw na' da' zaca' yebanecho.

Yogo' da' chono' zejen to licha na' naquen da' zaca'.

Len' chnabi'o naciön ca'.

⁴ Nono zoa bene' bi cheya'la' žebe' le' Xanto', da' chono' castigw che da' malen'.

Nono zoa bene' bi cheya'la' gonxene' le'.

Tozo' le' naco' bene' laždao' xilaže' juisyw.

Na' bene' že' yogo' naciön yeside' laguon' yesonxene' le',

le ba besele'ede' da' ba beno' na' zjaņezde' zejczen to licha.

⁵ Gwde benda' da'na' nach gwña'a da' yoble na' ble'eda' byaljo gan' chesonxene' Diosen' yaban', latje gan' ngo'ošagüe' ley che Dios da' nyoj.

⁶ Na' ble'eda' gaž angl ca' zjayo'o lo na'gaque' yesone' gac gaž yela' zi' lo yežlion', besechoje' gan' chesonxene' Diosen' yaban'. Angl ca' zjanyaze' lache' šagüe' da' nac šiš xila' da' chactiten, na' to toe' nchej cho'alčo'e to bant de oro.

⁷ Na' ble'eda' bene' ca' tap zjažia xil ben' nita' lao Diosen', na' toe' bnežjue' angl ca' gažen' tğüje tas de oro da' zjanža'ten da' zjajožen da' chon cont chac yela' zi' ca' lo yežlion', na' zejen Diosen' ben' zoa to'li tocaņe chlocchgüe' da' cheson bene' bi chosozenag che'.

⁸ Na' doxen gan' chesonxene' Diosen' yaban' gwche'chguan ca' žen che be'ni' da' nsa' Diosen' na' che yela' guac xen che'. Nono goc šo' gan' chacxen Diosen' šlac biņa' yeyož yesac yela' zi' ca' gaž da' zjanac lo na' gaž angl ca'.

16

Tas ca' gaže na' yela' zi' ca' gosac cate' bososcho'en

¹ Na' benda' gwne Diosen' zižjehgua, zoe' gan' chacxene', gože' angl ca' gaže:

—Le šja'ac le šjalaj dan' yože lo' tas chelen' lo yežlion', da' zejen leca chloca' da' xinj cheson bene' ca' bi chosozenag chia', na' gona' ga yesezaca'zi'chgüe'.

² Nach angl nechon' gwyeje' jalalje' da' yože lo' tas chen' lo yežlion' gan' nac yo biž, na' yogo' bene' ca' zjazoa señw che bežen' na' chesonxene' l' gua'a lšaca' da' nac ca' leba', gosebie' güe' xen güe' zban na' goselachgüe'.

³ Nach angl gwchopen' jalalje' da' yože lo' tas chen' lo nisaon' na' nisaon' beyaquen chen ca' chen che bene' guat, na' gosat yogo' be ca' že' lo' nisen'.

⁴ Nach angl gwyonen' jalalje' dan' yože lo' tas chen' lo yegw ca' na' gate'ze chal nis na' lecze besyeyaquen chen.

⁵ Nach benda' gwne angl ben' chape' nisen' da' de lo yežlion', gože' Diosen':

—Xanto' Dios, len' naco' bene' laždao' xilaže' juisyw. Ba zoaczo' le' cate' za' xe yežlion'. Zejczto' licha can' ba gwchoglaguo' chac da' quinga,

⁶ le bene' že' yežlion' ba gosote' bene' ca' gosote' xtižon' na' gosote' nochle bene' gosac lo nao'. Da'nana' ba beno' cont yese'eje' chen neče da' bosolalje' xchen bene' ca'. Na' da' chac čhegaque' naquen da' cheya'la'cze gac.

⁷ Nach benda' gwne to bene' do cho'a mes gan' bene' ca' že' yaban' chosozeye' bi da' chosozeye' cate' chesonxene' Diosen', gwne':

—Xanto' Dios, len' napo' la'zelagüe yela' guac xen, chono' con can' žo' gono', na' chono' da' zej to licha cate' chchogbi'o che bene'.

⁸ Nach angl gwdapen' jalalje' dan' yože lo' tas chen' lo gwbižen', na' gwbižen' bzeyen beņach.

⁹ Yogüe' leca goseye', perw bi besyetiņjde' xto'la'gaque' na' bi gosonxene' Diosen', con gosene' yela' ya' che Dios ben' be' latje goc da' ca' chesezaca'zi'e.

¹⁰ Nach angl gayon' jalalje' dan' yože lo' tas chen' gan' chi' bežen' chnabia'ba' na' beyac čho'ldoxen gan' chnabia'ban'. Na' beņachen' gosagwxetje lože'gaquen' catec gosesezaca'zi'e.

¹¹ Na' gosene' yela' ya' che Dios ben' zoa yaban' neče dan' chesezaca'zi'en na' neče güe' xen dan' zjažia lo cuerp čhegaquen', perw ne ca' bi besyetiņjde' che da' mal dan' gosonen'.

¹² Nach angl gwxopen' jalalje' dan' yože lo' tas chen' lo yegw xen da' nzi' Eufrates, na' bebiž nis yegon' cont beyaquen to nez ga yesede bene' gwnabia' ca' za'ac do gan' chla' gwbiž.

¹³ Nach ble'eda' šone da' xigüe' da' zjanac ca' blož. Ton bchojen cho'a be' be zoa gaž yichj, yeton bchojen cho'a bež xigüen' na' yeton bchojen cho'a ben' cho'e diža' güenlaže' cont chesonxene' bežen'.

¹⁴ Na' da' xigüe' quinga gosonen yela' guac da' besyebane bene', na' jasetoben yogo' bene' gwnabia' ca' ze' gate'teze lo yežlion' cont yesedillene' Dios ben' nap la'zelagüe yela' guac xen cate' žin ža gac ca'.

¹⁵ Na' benda' ben' nac Xi'in Dios gwne':

—Le gwzenag da' nga: ba zoa yida' da' yoble, yedexenyala' bene' bi chosozenag chia' can' chzenyal bene' gwban ca' chjalane'. Mbalaz zjazoa note'teze bene' nita'teze' chesebeze' neda' cate' yida' na' chesezaquede' bibi da' mal chesone', le yesacde' zto' še bina' yesyetinjde' xtoła'gaquen' caten' yida', na' yogo'ze bene' yesacbe'ede' da' malen' ba gosonen' še ca'.

¹⁶ Nach bezle'eda' da' xigüe' ca' šone bosyotoben yogo' bene' gwnabia' ca' ze' lo' yežlion' to latje ga nzi' Armagedón diža' hebreo.

¹⁷ Na' angl gažen' jalalje' dan' yože lo' tas chen' lo be', na' benda' gwne' Diosen' zižje, gan' zoe' chesonxene' le' yaban' gan' lece' chi'e chnabi'e, gwne':

—Bač goc da' cheyala' gac.

¹⁸ Nach gwyp yes, goc sšag, na' gošj gwtin, na' leca gwxo'. Gwxo'ch ca ba goc bate'tezechle šlac že' beñachen' lo yežlion'.

¹⁹ Na' catequen' gwxo' besenyittecze yogo' yež da' zjachi' lo' nisdaon' na' yogo' ya'a ca'.

²⁰ Na' catequen' gwxo' besenyittecze yogo' yež da' zjachi' lo' nisdaon' na' yogo' ya'a ca'.

²¹ Na' gwche'chgua yej ži'a lo yežlion', yej ži'i da' cha'a do tapa rob güeje beselažon' cože' bene'. Na' bene' ze' yežlion' gosene' yela' ya' che Diosen' neče dan' besežaglaochgüe' len yej dan' gwchen'.

17

Diosen' be'e castigw che ciuda blao da' zaca'lebe ca to no'ole zle'

¹ Na' ca nac angl gaž ca' gosoxe' tas de oron', toe' bedenie' neda', gože'nda':

—Da, gwlo'eda' le' can' gon Diosen' saca'zi' no'ole blaon' chi' lo' nisdao' ca', no'olen' nac no'ol zle'.

² Yogo' bene' gwnabia' ca' ze' yežlion' ba besyebede' bosozenague' che' gualaz che Diosen', na' da'nan' guac nacho zjanaque' xtoe'. Na' bene' ze' yežlion' da' besyebechde' le' clcl ca Diosen', guac nacho gosožode' da' ba gose'eje' vino da' bnežjue' legaque'.

³ Nach šlac ben Spiritw che Diosen' cont ble'edaogüeda' da' quinga, anglen' gwche'e neda' to latje daš. Na' bžina' na' ble'eda' to no'ole žia cože' bež xna be nac gaž yichjba' na' žia ši lozba'. Na' doxen cuerp cheban' nyoj diža' da' chžiaba' yela' ya' che Dios.

⁴ No'olen' nyaze' lache' da' nac moradw na' xna, na' non cuine' xdan len oro, len yej zaca' na' len perlas. Na' noxe' to tas de oro da' nža'ten yožen vino. Na' vinon' zejen chbede' chone' da' yela' zto' na' bichle da' chgue'e Dios.

⁵ Na' loxgue' nyoj diža' da' žan naquen' naque', diža' da' bi gosejni'i beñaç, žan: "Naca' ciuda Babilonia na' nacchgua' blao. Naca' no'ole zle', le chona' cont bene' ze' yežlion' bi chesonxene' Diosen', na' chgo'oyela' legaque' cont chesone' da' zan da' chgue'e Diosen'."

⁶ Na' ble'eda' chzože no'olen', le ba güe'eje' xchen bene' ca' zjanac lo na' Diosen', bene' goso'e diža' chesejnilaže' Jesusen', na' da' nacho güe'eje' xchengaque' zeje diža' betue' zane'. Na' cate' ble'eda' no'olen' leca bebanda'.

⁷ Nach gož anglen' neda':

—Bi yebando'. Gwzejni'ida' le' bi zejen dan' ble'edo' no'olen' žie' cože' bež be gaž yichjen' na' žia ši lozba'.

⁸ Bežen' ble'edo' gwzoaba' gwnabia'ba' šlož na' bich zoaba' na'a, perw yechojba' lo' yechw zitjwchgua dan' nac lo gabižen' gan' yo'oba' na'a cont soaba' nabia'ba' yežlož, na' techle yeyo'oba' na' saca'zi'ba' toli tocanē. Cate' gwxe yežlion' Diosen' bzoje' la bene' ca' zjanape' yela' mban toli tocanē le'e libr chen'. Na' bene' ca' bi zjanyoj lagaque' le'e libr che Diosen' yesyebande' cate' yesele'ede' bežen' gwzoa, ben' bi zoa na'a perw soaba' da' yoble.

⁹ Chyažjecho yela' sina' cont šejni'icho da' nga: da' gaž yichj bežen' zjanaquen gaž ya'a gan' chi' no'olen'.

¹⁰ Na' lece' zejen gaž bene' gwnabia'. Gayoe' ba gosenite' gosenabi'e na' ba gwnit yela' gwnabia' chegaquen'. Toe' chnabi'e na'a na' ben' yeto bene' bzeben' za' yedenabi'e, na' cate' yide', šložze yedenabi'e.

¹¹ Na' bež ben' gwzoa cana' perw bich zoaba' na'a, zejen yeto bene' gwnabia', bene' xono'. Naque' to bene' ca' gaže gosenabi'e na' nabi'e da' yoble, perw Diosen' gone' cont cuiaye'e na' chi saque' toli tocanē.

¹² Na' lozba' ca' ši dan' ble'edo', zejen ši bene' gwnabia' bene' za' za'ac cont yesenabi'e. Na' gac lo na'gago'te yesenabi'e txen len bežen', perw šložze.

¹³ Na' yogo'te bene' ca' ši, toz ca yesone' yesegüe'e lo na' bežen' yela' gwnabia' chegaquen' na' bichle da' chac chesone' cont bežen' gacchba' blao.

¹⁴ Na' yesedillene' Jesucristw ben' zaca'lebbe' ca xila' dao' ben' gosot bene' gualaž cheto' neche xtol'a'gague', na' Jesucriston' gone' gan lo gwdilen', le len' naque' Rey ben' chnabi'e yezica'chle rey, na' naque' Xancho ben' chnabi'e yezica'chle bene' gwnabia'. Na' bene' ca' yeson txen len Jesucriston' zjanaque' bene' ca' ba gwlej Diosen' cont zjanaque' xi'ine', bene' ca' nezde' yesenita'chache' yesejnilaže'ne' bite'teze da' gac.

¹⁵ Nach anglen' gože' neda', gwne':

—Nisdao' ca' ble'edo' gan' chi' no'ol zlen' zejen yesenita' bene' zan juisyw, bene' yež zan na' nación zan, bene' chesac gwde gwdele diža' da' de lo yežlion'.

¹⁶ Na' bežen' žia no'olen' cože'ban', ben' žia ši loz, gue'eba' no'olen' na' lecz ca' yeson lozba' ca' ši dan' zejen ši bene' gwnabia'. Na' yesaque' txen yeseye'e da' de che no'olen' na' yosyocua'ane'ne' ga'alyide'. Tena' yesagüe' xpelen' na' yosozeye' bi da' yega'an da' bi yesagüe'.

¹⁷ Le Diosen' güe'e latje yesaque' txen yesone' yogo' da' ca' na bežen', na' yesone' yela' chnabia' chegaque' lo na' bežen' cont yeyož gac yogo' dan' ba gwna Diosen'.

¹⁸ Na' no'olen' bach ble'edo', naque' ciuda blaochgua da' chnabian' bene' gwnabia' ca' že' doxen lo yežlion'.

18

Can' gac cate' cuiayi' ciuda Babilonian'

¹ Gwdena' ble'eda' yeto angl bene' gwza' yaban' betje' lo yežlion'. Goc lo ne'e yela' gwnabia' xen cont goc can' gwne', na' gwyni' lo yežlion' len be'ni' che' da' nse'e.

² Na' anglen' gwne' zizje, gwne':

—Ba bžin ža cuiayi' ciuda Babilonian' da' nac leca ciuda blao. Ba bžin ža yeyaquen xišna' da' xigüe' ca'. Na' ba bžin ža yeyaquen xišna' yogo'cze be zoa xil be chesegue'e beňach.

³ Cuiayin', le bene' ca' že' ciudan' gosego'oyele' bene' že' yogo' nación cont bosozoe' Diosen' ca'ale bi gosonxene' le'. Na' bene' gwnabia' ca' že' yežlion' ba gosonchgüe' da' mal txen len bene' Babilonia ca' catequen' besyebede' gosone' da' yela' zto', na' bene' güen delgens ca' že' lo yežlion' ba gosaque' bene' gwni'a, le bene' Babilonia ca' gosonditjchgüede' dan' gota' chegaque' gosezi'en.

⁴ Nach benda' gwne' yeto bene' zoa yaban', gwne':

—Le'e nacle xi'ina', le yechoj ciuda Babilonian' cont bi gonle da' mal txen len bene' ca' na' cont bi saca'zi'le txen len legaque',

⁵ le dechgua xtol'a' bene' Babilonia ca', na' bich cues Diosen' gwnežjue' castigw chegaque'.

⁶ Yezezaca'zi'sque' lagüe dan' bosochi bososaque' bene', na' yesežzaglaošque' da' xench ca dan' bosochi bososaque' bene' yoble. Gacšca chegaque' castigw gualech ca da' gosone' che bene'.

⁷ Con can' gota'chgua da' šagüe' da' güen chegaque' na' gosone' con bi da' žan chegaque', chnablaža' gacchgua chegaque' yela' yaše' yela' zi' cont yesyegüine'chgüede'. Bene' Babilonia ca' ba gosone' xbab lo' yichjlažda'ogaque' gosone': "Gwbat te yela' chnabia' cheton"; gwbat soato' yela' güine', neto' že'to' ciuda blao nga."

⁸ Da'n'an' lo toze za gac yogo' da' ca' gosacde' gwbat gac chegaque'. Bene' zan yesat, bene' zan yesegüine'de', na' yesebil' yesedone', na' yeseye' len yi'. Gac ca' che bene' že' ciuda Babilonian', le Xancho Diosen' nape' yela' guac xen cont gone' yezezaca'zi'e neche xtol'a'gague'.

⁹ Bene' gwnabia' ca' že' lo yežlion' bene' bosozenag che bene' Babilonia ca' cont bosozoe' Diosen' ca'ale na' gosone' bichle da' chgue'e Diosen', legaque' yesebeže' na' yesegüine'de' cate' yesele'ede' žen da' chas cate' šey ciudan'.

¹⁰ Na' yesyega'ane' zito'le yesene'e can' gac che bene' Babilonia ca', le yesežebchgüe'. Na' yesene':

—jNyaše'chgua chac che ciuda Babilonia nga da' nac blaoch ca yogo' ciuda! Ba chbiayi' ciuda da' gwnabia'ch lo yezica'chle ciuda da' zjachi' yežlion'. Ba bžin ža cuiayin' to ši'ize.

¹¹ Nach bene' güen delgens ca' že' yežliona' yesebeže' na' yesegüine'de' cate' cuiayi' ciudan', le noch no si' dan' yesoten'.

¹² Nono žel bene' si' da' yesote' da' nac de oro, de plata, de vej zaca', na' de perlas. Nono žel bene' si' lache' la'ay da' chesote' de lino, de sed, na' lache' moradw na' lache' xna. Nono žel bene' si' da' yesote' da' nac de yag da' chla' zix'o de bichle yag zaque', de marfil, de ya na' de mármol.

¹³ Nono žel bene' si' canel, no set zix, no yal, no mirra, no perfume, no vino, no set yela' guagw, no yezj šiš, no trigw, no burr bžina', no xila', no cabayw, no carret, na' no beñach bene' yesote' ca beyixe'.

¹⁴ Na' bene' güen delgens ca' yesene' che ciudan':

—Ba gwde che yogo' da' zix' ca' na' yogo' bichle da' ca' gosazlaže' bene' Babilonia ca' yesezi'e lo yela' gwñi'a chegaquen'. Gwbatech yesezi'e da' ca'.

¹⁵ Na' bene' güen delgens ca' bene' gosote' da' ca' gosezi' bene' Babilonian', ben' gosata' yela' gwñi'a chegaque' ñeche bene' Babilonia ca', yeseze' zito'le yesežebchgüe' che dan' chesežagla'o bene' Babilonian'. Na' yesebeže' na' yesegüine'de',

¹⁶ na' zižje yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Bene' gwže' ciudan' gosazchgüe' lache' šagüe' lache' zaque', no lache' moradw na' no lache' xna. Gosonchgua cuingaque' xdan len oro, len yej zaca' da' chesactiten, na' len perlas.

¹⁷ Perw na'a zejzenez gwžiyai' yogo' da' šagüe' chegaquen'.

Yogo' xan barcw ca, yogo' bene' ca' chja'ac'lo' barcw ca', len bene' ca' cheson žin lo' barcon' na' nochle bene' cheson žin lo' nisdaon', yogüe' yeseze zito'le yesene'e.

¹⁸ Na' yesele'ede' chas žen cate' šey ciudan' na' yesene':

—Biñ' gata' yeto ciuda yoble doxen lo yežlion' da' žinlaže' ca ciuda nga len yela' gwñi'a yela' šagüe' chen.

¹⁹ Na' yosožia yo bište yichjgaque' da' yesyegüine'de', na' yesebežyaše', yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Neche yela' gwñi'a che bene' ca' gwže' lo ciudan' yogo' chio' bencho gan xen len žin da' bencho len barcw checho quinga. Na' na'a zejzenez gwžiyai' ciudan'.

²⁰ Perw le'e že'le yaban', le yebe. Le'e gwseła' Diosen' gogle postlw che', na' le'e gwsele' be'le xtižen', na' yezica'chle le'e zoale lo' na' Diosen', le yebe. Le Diosen' ba gwchoglagüe' yesebiayi' bene' Babilonia ca' ñeche dan' bosochi bososaque' le'e.

²¹ Nach to angl gual bcose' to yej xen ca dan' chon žin gan' chi' molin xen, na' bzažen' lo' nisdaon', gwne':

—Can' gac che ciuda Babilonian', yeniten can' benit yej xen dan' bzała' lo' nisdaon', na' gwbatech le'echon da' yoble.

²² Gwbatech yosogole' arpa lo ciudan'; gwbatech yosocuež güecuež ca' no flauta no trompeta. Gwbatech žel bene' zjansed cont yesone' no xšinłaze' da' chosoçhine', ñeca yenecho sšag che bene' chesot len molin lo ciudan'.

²³ Gwbatech le'echo be'ni' che lámpara, na' gwbatech yenecho bene' cheson lñi che yela' güešagna'. Yesebiayi' bene' güen delgens che ciudan' bene' zjanac bene' blao lo yežlion', le bene' Babilonia ca' ba goseziye'e bene' že' yogo' nación len yela' gūaža' chegaquen'.

²⁴ Bene' Babilonia ca' gosote' bene' goso'e xtiža' Diosen' na' nochle bene' gwlej Diosen' cont gosaque' lo ne'e, na' bene' ciuda nan' zjanape' doła' che yela' got che yezica'chle bene' gosot bene' doxen lo yežlion'.

19

¹ Gwdena' benda' bene' zan juisyw bene' že' yaban' chesonxene' Diosen', na' nen zižje, chesene':

Bene' güen juisyw nac Dios chechon'.

Ba bene' cont chio' chejnilaže'chone' zoacho len le'.

Naque' bene' zaca' juisyw, na' nape' yela' guac xen.

² Zejcze to licha na' chone' can' cheyala'cze gac dan' chchoglagüe' yesezaca'zi' bene' bi chosozenag che'.

Ba gwchoglagüe' cuiayi' ciuda xen da' zaca'lebe ca to no'ole zle',

le bene' lo ciudan' gosego'oyele' bene' že' doxen lo yežlion'

cont bosozoe' Diosen' ca'ale bi gosonxene' le'.

Diosen' ba gwchoglagüe' cuiayi' laž bene' Babilonia ca',

le cheyala'cze yesezaca'zi'e da' gosote' bene' ca' gosonxen le'.

³ Nach da' yoble gosene':

—Bene' güen juisyw nac Diosen'. Tołi tocañe chas žen gan' šey ciudan'.

⁴ Nach bene' blao ca' tapechoa na' bene' ca' tap bene' žia xil jasechaze' coscho'ale lo yon' gosonxene' Diosen' gan' chi'e chnabi'e, gosene':

—Can' cheyala' gac. Bene' güen juisyw nac Diosen'.

⁵ Na' benda' gwne' to bene' do gan' chi' Diosen' chnabi'e, gwne':

Yogo' chio' naccho bene' güen xšin Diosen' cheyala' gonxenchone',

chio' chzenagcho che', chio' naccho bene' gole na' chio' naccho bene' xcuide' na' bi' bixjw.

Yela' güešagna' che ben' zaca'lebde' ca xila' daon' gosot bene' Israel neche xtoła'gaque'

⁶ Nach benda' be xne che bene' zan juisyw chesonxene' Diosen'. Na' xtiža'gaquen' nenen ca chac ga chziž yegon' cate' dechguan na' ca nen cate' leca chašjw chtin, chesene':
jBene' güen juisyw Xancho Diosen'!

Len' nape' la'zelagüe yela' guac xen na' len' chnabi'e.

⁷ Chebechgüecho na' zoachguacho mbalaz chonxenchone'.

Le ba bžin ža gac yela' güešagna' che ben' zaca'lebde' ca xila' dao' be gosot bene' Israel neche xtoła'gaque'.

Ba zoa no'olen' si'e gac xo'ole'.

⁸ Ba bnežjue'ne' lache' šagüe' da' nyaze', lache' šiš xila' juisyw.

Na' lache' šagüe' da' šiš xila' nyaze' zejen da' güen da' chon chio' ba gwlej Diosen' cont naccho lo ne'e.

⁹ Nach anglen' da' yoble gože'nda':

—Bzoy da' nga: “Mbalaz bene' ca' ba goxe' cont yesenite' cate' gac lni che yela' güešagna' che ben' zaca'lebde' ca xila' dao' be gosot bene' Israel neche xtoła'gaquen'.”

Nach anglen' gwne':

—Diosen' gože' neda' dan' ba gwnia', na' naquen da' li.

¹⁰ Nach bzoa xiba' cont gonxena' anglen', perw anglen' bi bene' latje, gwne':

—Bi gono' ca'. Neda' naca' con to bene' güen xšin Diosen' can' naco' le' na' bene' lježo' ca' bene' bi chesebejyichje' xtiža' Jesúsen' da' chesejle'e. Benxen Diosen'.

Na' note'teze bene' cheso'e diža' li che Jesúsen', zoa Spiritw che Diosen' chzejni'in legaque' cont cheso'e xtižen'.

Bene' žia cože' cabayw šiš

¹¹ Nach ble'eda' yaban' ca to da' nyaljo, na' ble'eda' to cabayw šiš na' žia to bene' cože'ba'. Na' ben' žia cože'ban' zjansi'ene' Ben' Chon Con Can' Že' na' Cho'e Diža' Li. Zejzce' to licha can' chchoagläe' saca'zi' bene' bi chosozenag che' na' can' chdiłlene' da' malen'.

¹² Na' ble'eda' yejlagüe' ca' chesactiten ca to yi' da' čala'nin, na' zjazoa zan corona yichje'. Na' ble'eda' nyoj yeto le' loxguen' da' nombia' toze le'.

¹³ Ble'eda' nyaze' to lache' da' dope chen, na' le' Xtiža' Dios.

¹⁴ Na' ble'eda' bene' zan bene' zjanac soldadw che Diosen' zjana'ogüe'ne', zjanyaze' lache' šagüe' da' nac da' šiš na' da' naquen xilaže', na' to to bene' ca' zjaže' tgüeje cabayw šiš.

¹⁵ Cho'a ben' le' Xtiža' Dios chchoj to spada da' nłachgua da' gwčhine' čhine' nación ca' bi chosozenag che'. Le nabi'e nación ca' na' žan ca žan yosozenague' che'. Na' gone' yesezaca'zi'chgua bene' ba goson da' malen', le Dios ben' nap la'zelagüe yela' guac xen chlocchgüe' can' ba gosonen'.

¹⁶ Na' le'e xcamise' na' le'e xichje' nyoj diža' quinga žan: “Naca' Rey ben' chnabia' yezica'chle rey na' naca' Xan yezica'chle bene' gwnabia'.”

¹⁷ Nach ble'eda' to angl bene' zecha lo gwbižen', na' bosye'e boł güiže' yogo' cuen šod ca' chesaš le'e yaban', gože'ba':

—Le da, le yedobe nga gagwle to xše' xen da' goñ Diosen' gagwle.

¹⁸ Gata' xpela' bene' gwnabia', xpela' xan soldadw, xpela' no bene' gual. Gata' xpela' cabayw na' xpela' bene' gosebie'ba'. Gata' xpela' yogo' cuen bene', bene' gosac esclavos na' bene' bi gosac esclavos, bene' gosac bene' xcuide' na' bene' gosac bene' gole.

¹⁹ Nach ble'eda' bež xigüe' nechon' len yogo' bene' gwnabia' ca' že' yežlion' na' soldadw čhegaque' ca'. Ba besedobe' txen cont yesediłlene' Jesús ben' žia cože' cabayw šišen' len soldadw che' ca'.

²⁰ Na' bež nechon' gočba' lo na' Jesúsen'. Na' lecze ca' goc che bež xigüe' gwchope ben' choe' diža' güenlaže' na' bamba' yela' guac cont benachen' bosozenague' che bež nechon', cont gosonxene' l gua'a lsaca' čheba' na' cont gosezoe' señw čheba'. Chopteba' gosacba' lo na' Jesúsen', na' ca' zjambamba' bosozale'ba' lo' yi' gabil gan' čala'nin azufre, yi' xen da' nac ca to nisdao'.

²¹ Nach bene' ca' yezica'chle, Jesúsen' ben' žia cože' cabayw šišen' betue' legaque' len spada da' chchoj cho'en', na' yogo' šod ca' gosagwxtatba' xpela'gaquen'.

20

Can' gac lo to mil iz

¹ Na' ble'eda' to angl bene' zoa yaban' betje' cont gwsaljue' yechw zitjwchgua dan' nac lo gabilen', na' noxe' to gden xen.

² Na' anglen' bežoe' beł ben' zoa gaž yichj, be bla' da' nechw ža gwlaste. Leba' chnabia'ba' da' xigüe' ca' na' leba' Satanás. Anglen' bcheje'ba' gdenna' to mil iz.

³ Nach beyoż bcheje'ba', na' bzaļe'ba' lo' yechw gabiļen' na' la' bseyjwrtie' cho'a yechon' na' bchišen' to seyw. Bene' ca' cont bich siye'ba' benač šlac bina' te to mil iz. Na' cate' ba gwde to mil izen', cana'ch yeseže'ba' gdenņa' cont yechojba' yešlož dao'.

⁴ Nach ble'eda' bene' ca' gwlo'o Diosen' lo na'gaque' gosone' yela' justis che benač zjachi'e gan' chesenabi'e. Na' lecze ble'eda' bene' bi gosonxene' bež xigüen' len l' gua'a lsaca' cheba' neca goso'e latje yosożoe' señw cheba' loxgagaque' o taca'gaque'. Gosenita'chače' goso'e diža' chesejnilaže' Jesüsen' na' goseyixjue'ede' xtiža' Diosen'. Da'nan' bene' ca' besegue'ede' Diosen' gosote' legaque' gosechogue' yengaque'. Perw Diosen' bene' cont besyebane' ladjo bene' guat ca', na' txen len Criston' gosenabi'e to mil iz.

⁵ Cate'ch ba goc to mil iz besyeban bene' ca' gosenita'chach gosejnilaže' Criston', ben' gosac bene' nechw besyebane' ladjo bene' guat ca', cana'ch yosbane' yezica'chle bene' guat.

⁶ Mbalaz nita' bene' ca' belis bosbane' ladjo bene' guat ca' da' nechw, bene' ba gwlej Diosen' cont zjanaque' lo ne'e. Bi yesac chegaque' can' gac che bene' ca' yesežaglägüe' neče xtolä'gaque' toli tocaņe, da'nan' žacho yela' got gwchope. San yesenite' yesonxene' Diosen' na' yesonxene' Criston', na' da'nan' guac načo yesaque' bxož. Legaque' yesenabi'e len Criston' to mil iz.

⁷ Na' cate' ba goc to mil izen', Diosen' güe'e latje yechoj Satanás dan' chnabia' da' xigüe' ca' lo' yechw zitiwchgua dan' nac lo gabiļ gan' bseyjuen'.

⁸ Na' yechojen na' da' yoble siyen' bene' že' yogo' nación ca' že' lo yežlion'. Na' siyen' bene' ca' zjanzi' Gog na' Magog, gwtoben legaque' cont yesedillene' Criston', na' yesaque' bene' zan juisyw ca' yox da' chi' cho' a nisdao' da' nono chac gwlab.

⁹ Nach ble'edagüe'da' bene' zan juisyw ca', gosa'aque' doxen lo yežlion', ja'aque' gan' chi' ciuda dan' chaque Diosen' gan' že' bene' ca' gwleje' cont zjanaque' lo ne'e. Na' cate' gosechje' ciudan', Diosen' bene' cont bchoj yi' le'e yaban' bzeyteczen legaque'.

¹⁰ Na' ca' nac Satanás dan' gwziye' bene' ca' že' yežlion', angl che Diosen' bosozalen' lo yi' gabiļ gan' čhala' azufre, yi' xen da' nac ca' to nisdao' gan' ba bosozale' bež xigüe' nechon' na' bež xigüe' gwchopen' ben' be' diža' güenlaže' cont gosonxen benačhen' bež nechon'. Na' yesežaglaon do ža do yel toli tocaņe.

Goc yela' justis che bene' ca' ba gosat

¹¹ Nach ble'eda' chi' Diosen' to lo siy xen da' nac da' šiš, chi'e chnabi'e. Na' čhna'tie' yežlion' len da' ca' chle'echo le'e yaban' na' besyeniten, noch no besele'e len, na' gach ga gosac xišne'en ga yoble.

¹² Na' ble'eda' bene' ba gosat, bene' gole len bene' xcuide' len bi' bixjw, zjazeche' lao Diosen'. Nach Diosen' bzaše' libr ca' gan' zjanyoj yogo'loļ da' goson to toe'. Na' gwdena' bzaše' libr gan' zjanyoj la bene' ca' zjanape' yela' mban toli tocaņe. Na' bene' yela' justis chegaque' con ca' gosone' šlac gosebane', le' yogo' da' gosone' zjanyojen le'e libr ca'.

¹³ Yogo' bene' gosat lo' nisdaon' besyechoje' zjazeche' lao Diosen', na' yogo' bene' gosat ga yoble lecze besyechoje' zjazeche' lägüe' cont bene' yela' justis che to toe' con ca' gosone' šlac gosebane'.

¹⁴⁻¹⁵ Nach Diosen' bcueze' yela' goten' nombia'cho, na' bene' cont noch no gwže' latje che bene' guat ca' na' bñitlagüen'. Na' bene' bi bosozenag che Dios, yogo' bene' bi nyoj lagaque' le'e libr gan' nyoj la bene' zjanap yela' mban toli tocaņe, bosozale' legaque' lo yi' gabiļ da' nac da' xen ca' to nisdao'. Na' dan' goc chegaque', lenna' yela' got gwchope chegaque'.

21

Yežlion' na' le'e yaban' besyeyaquen da' cobe

¹ Gwdena' ble'eda' le'e yaban' ba beyaquen da' cobe na' lecze ca' yežlion', le' yaba dan' goc da' nechw na' yežlio nechua' besyeniten. Na' lecze bich gota' nisdao'.

² Neda' Juan ble'eda' ciuda che Diosen', ciuda Jerusalen cobe da' chi' yaban' gan' zoa Diosen', betjen lo yežlion'. Ba nonen' xdan ca' to no'ole bene' ba bpa'a cuine' cont naque' xdan cate' gwšagne'e.

³ Na' do gan' chi' Diosen' chnabi'e benda' gwne to bene' zižje, gwne':

—Gwņa'šc, Diosen' ba betje' zoalene' benač. Soateze' len legaque', le' gwleje' legaque' cont zjanaque' yež che', na' yesonxene'ne'.

⁴ Na' Diosen' gone' cont bich gac da' yesyeyaše'laže'de', da' yesyegüine'de' o da' yesebeže' čhen. Nono gat, nono šey la, le' ba gwde che yogo' da' ca' gota' lo yežlio nechon'.

⁵ Nach Dios ben' chi' chnabi'e gwne':

—Da' li' ba chocoba' yogo'loļ da' de.

Lecze gwne':

—Bzoj diža' quinga ba bendo', le' naquen diža' li' na' gac can' gwnian'.

⁶ Nach gože' neda':

—Baç goc da' cheyała' gac. Neda' naca' ben' ben yežlion' len yogo' bichle da' de, na' naca' ben' gon cont te çhen. Da'nana' zaca'lebda' ca letr nechw da' nzi' A na' letr bzebe da' nzi' Z. Note teze bene' chaclaže' si'e da' gwnežjua'ne', gwnežjua'ne' yela' mban toli tocaņe da' zaca'lebe ca nis ya'a da' che'ejcho cate' chbilecho, na' bi sia' laxjuen.

⁷ Na' bene' chesejnilaže' neda', še ba gosezoede' bi yesebejyichje' xtižan', gac çhegaque' yogo' da' šagüe' da' ba bia' diža' çhen, na' yesonxene' neda', na' gwlo'a zjanaque' xi'ina'.

⁸ Perw ca nac bene' ca' chesežeb yosozenague' chia', bene' bi chesejnilaže' neda', bene' cheson da' ca' chgue'eda', bene' chesot ljež beņache', bene' cheson da' nac da' yela' zto' len cuerp çhegaque', bene' cheson txen len bite'teze yela' guaža', bene' chesejnilaže' l gua'a lsaca', na' yogo' bene' cheso'e diža' güenlaže', yogo' bene' ca' yesezaca'zi'e toli tocaņe lo yi' xen da' nac ca to nisdau', yi' gabil gan' çala' azufren'. Na' da' gac çhegaquen', lenna' žacho yela' got gwchope.

Ciuda Jerusalén da' nac da' cobe

⁹ Na' bezle'eda' to angl gažen' ben' gosoxe' tas ca' gaže dan' zjanža'te da' zjajožen da' bosolalje' cont gosac yela' zi' ca' la'zelagüe lo yežlion'. Gwbigue' gan' zoan' na' gože' neda':

—Da len neda' cont gwlo'eda' le' bene' ca' zjazaca'lebde' ca to no'ole za' gwšagna'. Na' Jesucristw ben' zaca'lebde' ca xila' dao' ben' gosot bene' Israel neçe xtoła'gaque', guac naço le' si'e no'olen'.

¹⁰ Nach Spiritw che Diosen' benen cont gwya'alena' anglen' to lo ya'a xen da' nac sibe, na' blo'ede' neda' ciuda Jerusalén da' nac ciuda che Dios. Ble'eda' gwzoan yaba gan' zoa Diosen' na' chetjen lo yežlion'.

¹¹ Na' ciudan' goctitchguan len be'ni' da' nsa' Diosen', na' ble'eda' chactiten ca to yej da' zaca'chgua, ca yej da' nzi' jaspe da' chle'echo ca vidrw.

¹² To ze'e xen da' nac sibe nyechjen ciudan', na' nita' šižinw puert çhen, na' to to cho'a puerten' zecha tgüje angl. Na' le'e puert ca' zjanyoj la šižinw bene' ca' bosoxie' šižinw cuen diaža che neto' nacto' bene' Israel.

¹³ Na' le'e ze'e dan' zoa šla'a ciudan' gan' chla' gwbiž nita' šone puert, na' šla'a gan' chxo'a gwbiž yešonen, na' šla'a zej yichjelen yešonen, na' šla'a zej xanelen yešonen.

¹⁴ Na' ze'e dan' nyechje ciudan', lenenna' naquen de šižinw yej xen, na' zjanyoj le'e yej ca' la šižinw neto' nacto' postlw che Jesucristw ben' zaca'lebde' ca xila' dao' ben' gosot bene' gualaž cheto' neçe xtoła'gaquen'.

¹⁵ Na' angl ben' be'len neda' diža' noxe' to ya da' nac de oro da' bchine' gwxi'e medidw ciudan', che ze'e çhen na' che puert ca'.

¹⁶ Ciudan' naquen da' cuadradw, toze ca naquen zлага' len toņ. Anglen' bchixe' ciudan' len ya çhen' na' goquen çhope mil çhope gayoa kilómetros to to šla'an, ca'te' ndonen, ca'te' zlagan' na' ca'te' siben'.

¹⁷ Nach bchixe' ze'e dan' nyechj ciudan' na' goquen gayontap metr yela' sib çhen, metr da' nombia' beņach, le lenna' bchin anglen' gwxi'e medidon'.

¹⁸ Ze'e da' nyechj ciudan' naquen de yej da' zaca' da' nzi' jaspe, na' doxen ciudan' naquen de oro na' nlan' ca to vidrw da' nac xilaže'.

¹⁹ Na' ze'e da' nyechj ciudan', zjanone' lenen xdan len yogo' cuen yej da' zaca' da' de da' zjanac beya color na' chesactiten. Da' nechon' naquen de jaspe; da' gwchope de zafiro; da' gwyone de ágata; da' gwdae de esmeralda;

²⁰ da' gayo' de ónice; da' gwxope de cornalina; da' gaže de crisólito; da' xono' de berilo; da' ga de topacio; da' ši' de crisoprasa; da' šnej de jacinto; na' da' šižinw de amatista.

²¹ Na' puert ca' šižinw zjanaquen šižinw perlas, to ton zjanonen' de toze perla. Na' nez yo da' de lo ciudan' naquen de oro na' zjanlan' ca vidrw da' nac xilaže'.

²² Bibi yodao' ble'eda' lo ciudan', le bene' ca' ze' ciudan' zjanite' lao xancho Dios ben' nap la'zelagüe yela' guac xen na' lao Jesucristw ben' zaca'lebde' ca xila' dao' ben' gosot bene' gualaž cheto' neçe xtoła'gaque'. Legaque' chesonxen bene' lo ciudan'.

²³ Bene' ca' ze' ciudan' bi cheseyažjde' gwbižen' ne bion' yososenin' lo ciudan', le be'ni' da' nyechj Diosen' chsenin' len legaque' na' lecz ca' be'ni' da' nsa' Jesucriston'.

²⁴ Na' be'ni' che Diosen' gwšenin' len bene' za'ac yogo' nación bene' chesejnilaže' Diosen', na' bene' gwnabia' ca' ze' yežlion' yesonxene' Diosen' yosonežjue'ne' bi da' zaca' da' šagüe' da' de çhegaque', len no yela' bala'an da' de çhegaque'.

²⁵ Bitw šeyjw puert ca' zjanita' ciudan' lagüe' ža, na' gwbat gac šeže'le.

²⁶ Can' ba gwnia', yela' zaca' yela' xdan da' zjade yogo' nación len yela' bala'an da' zjade che bene' gwnabia' che nación ca', yosonežjuen' Diosen' lo ciudan'.

²⁷ Lo ciudan' gwbat gac šo' bene' chon da' zban. Bi gac šo' bene' chon bite'tez da' chgue'e Diosen' o bene' choe' diža' güenlaže'. Con bene' zjanyoj lagaque' le'e libr che Jesucriston' gan' zjanyoj la bene' zjanape' yela' mban toli tocaņe, legacze' gac yeso'e na'.

22

¹ Nach anglen' blo'ede' neda' yegw gan' yože nis da' chnežjon beŋachen' yela' mban toli tocaŋe. Nisen' nacten ca vidrw le nyadichguan. Yegwna' chchojen do gan' chi' Diosen' chnabi'e txen len Jesucriston' ben' zaca'lebde' ca xila' dao' ben' gosot beŋe' gualaž cheto' neche xtoła'gaquen'.

² Na' gachol nez yo xen che ciudan' na' chop la'a cho'a yegon' ze yag da' chnežjon beŋachen' yela' mban toli tocaŋe. Na' yogo' bio' chesebian frut, šižinw ni'a chesebian lao tgüiz, na' bene' nación ca' yosočhine' xlaguenna' ca rmed cont yesenite' güen.

³ Gwbat gata' bi da' chgue'e Diosen' lo ciudan', le ciudan'an' cui'e nabi'e txen len Jesucristw ben' zaca'lebde' ca xila' dao' ben' gosot beŋe' gualaž cheto' neche xtoła'gaque', na' yogo' bene' že' ciudan' yesonxene' le'.

⁴ Yesenite' yesele'ede' cho'alao Diosen', na' voj la Diosen' loxgagaque'.

⁵ Gwbatech gac šeže'le lo ciudan'. Na' bene' že' lo ciudan' bi yeseyažde' be'ni' che no lámpara o che gwbiž, le be'ni' da' nyechj Xancho Diosen' gwsenin' len legaque'. Na' yesenabi'e len le' toli tocaŋe.

Ba zoa yid Jesucriston' da' yoble

⁶ Nach anglen' gože' neda':

—Yogo' diža' quinga ba bendo' zjanaquen da' li na' gac con can' ba gwnato'. Xancho Diosen' chbeje' bene' cheso'e xtižen' na' chzejni'ide' legaque' bin' yesene', na' len' ba gwsele' neda' chzejni'ida' le' len bene' lježo' ca' chesonxene' Diosen' cont gacbe'ele da' ca' za' gac.

⁷ Nach gwna Jesús'en':

—Da' li ba zoa yida' da' yoble. Na' mbalaz beŋe' chosozenag che da' ca' ba bzojo' le'e libr chio' choen' diža' che da' ca' za' gac.

⁸ Neda' Juan benda' na' ble'eda' da' quinga ba bzoja' nga, na' beyož bendan' na' ble'edan' jazoa xiba' xni'a angl ben' blo'e neda' da' ca', godca' gonxena'ne'.

⁹ Perw anglen' bi bene' latje, gwne':

—Bi gono' ca', le naca' con to bene' güen xšin Diosen' can' naco' le', can' zjanac bene' lježo' ca' ba gwleje' cheso'e xtižen', na' can' zjanac yogo' bene' yosozenag che da' ca' ba bzojo' le'e libr chion'. San benxen Dios.

¹⁰ Lecze gože' neda':

—Bi gwcuašo' diža' ca' ba bzojo', le ba zoa gac da' ca' bzojon'.

¹¹ Na' bene' cheson da' mal, yesonchcze' da' malen' chesonen'. Na' bene' cheson da' yela' zto', yesonchcze' da' yela' zton' chesonen'. Na' bene' cheson da' chazlaže' Diosen', yesonchcze' da' güenna' dan' chesonen'. Na' bene' ba gwlej Diosen' cont zjanaque' lo ne'e, lo ne'en yesyega'aŋcze'.

¹² Nach Jesús'en' gozne':

—Da' li ba zoa yida' da' yoble, na' yedeyena' gac güen che to to beŋač o saca'zi'e con can' ba ben to toe'.

¹³ Neda' naca' ben' ben yežlion' len yogo' bichle da' de, na' naca' ben' gon cont te čhen. Da'n'an' zaca'lebda' ca letr nechw da' nzi' A na' letr bzebe da' nzi' Z. Ba zoa' cate' gwxe yežlion' na' soacza' cate' te čhen.

¹⁴ Mbalaz beŋe' ca' nita'teze' chesenabe' yeca'a xtoła'gaque' cont yesaque' txen len bene' ca' ba ble'edo' ben' ba besyeyach xalana'gaque'. Legaque' gac yesagüe' frut dan' chbia yag yela' mban toli tocaŋe, na' gac yeso'e cho'a puert che ciudan'.

¹⁵ Perw ca nac bene' ca' cheson da' nac da' zban, bene' ca' cheson txen len no yela' guaža', bene' cheson da' nac da' yela' zto' len cuerp čhegaque', bene' chesot ljež beŋače', bene' chesejniłaže' l' gua'a l'saca' o bi da' ca' ben Diosen', na' yogo' bene' cheso'e diža' güenlaže' o chesyebede' chosozenague' dan' zjanac ca', yogo' bene' ca' bi gac yeso'e lo ciuda' čhian'.

¹⁶ —Neda' Jesús ba gwseła' angl čhian' cont ba bzende' le' yogo' da' ca' ba bzojon'. Na' cheyala' gwnežjon' bene' ca' chesedop chesežag chesonxene' neda'. Neda' naca' xi'in diaža che da' rey David na' naca' ben' gwseła' Diosen' yežlion' lo diaža che'. Na' zaca'leba' ca beljw xsil.

¹⁷ Spiritw che Diosen' na' lecze ca' chio' chonxencho Jesús'en' chŋablaže'cho yob yidšca Jesús'en' da' yoble, chio' zaca'lebcho ca to no'ole si'e. Na' yogo' bene' yesene diža' quinga lecze yesenablaže'sque' yide' da' yoble.

Na' note'teze bene' chaclaže' si'e da' gwnežjw Jesús'en' le', cheyala' yedenaben', na' gwnežjue'ne' yela' mban toli tocaŋe da' zaca'lebe ca nis ya'a da' che'ejcho cate' chbičho, na' bi si'e laxjuen.

¹⁸ Na' chosnisda' le'e chzenagle can' ža libr nga che da' ca' za' gac, note'tezle še gwzanchle ca dan' ža libr nga, Diosen' gone' gac čhele yogo' yela' zi' dan' zjanyoj le'e libr nga.

¹⁹ Na' note'tezle še žale bi gac yogo' da' qui zjanyoj le'e libr nga, Diosen' yoxie' lale le'e libr chen' gan' nyoj la bene' ca' zjanape' yela' mban toli tocañe na' gone' cont bi gac šo'le lo ciuda chen', neca gac chele yogo' da' güen da' zjanyoj le'e libr nga.

²⁰ Nach Jesús, ben' bzejni'ide' neda' yogo' da' ca' ba bzoja', že':

—Da' li ba zoa yida' da' yoble.

Na' neda' chapa'ne':

—Ca' gacšca. Yob yidšco', Xana' Jesús.

²¹ Xancho Jesucriston' soacze' gaclenšcacze' yogo'le. Da' na'zen' chzoja'.